


Yus Papí: Shuarjai
Yus Yamaram Chicham
Najanamu



New Testament in Shuar (EC:jiv:Shuar)

Yus Papí: Shuarjai Yus Yamaram Chicham Najanamu

New Testament in Shuar (EC:jiv:Shuar)

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
fb10d1f0-e2d5-5d8e-8a74-10846708c857

Contents

MATEU	1
MÁRKUS	54
RÚKAS	88
JUAN	145
TÚRAMU	184
RÚMANAM	239
1 KURINTIUNAM	260
2 KURINTIUNAM	281
KARASEANAM	296
IPISIUNAM	305
JIRIPIUSNUM	313
KURUSENAM	319
1 TISARÚNIKIANAM	324
2 TISARÚNIKIANAM	329
1 TIMIUTÉUN	332
2 TIMIUTÉUN	338
TITIUN	343
JIRIMIUNKAN	346
ISRAERNUM	348
SÁNTIAK	364
1 PÍTIUR	370
2 PÍTIUR	377
1 JUAN	381
2 JUAN	387
3 JUAN	388
JÚTAS	389
APUKARÍPSIS	391

Yúsan Shiir Chichamen MATEU aarmia nu

Jesukrístu weatrí
(Rúkas 3.23-38)

¹ Jesukrístu weatrí ju áiniawai. Tura ashí nankaamas ti uunt weat Tawitcha Apraámsha áiniawai. ² Apraáma uchirí Isak. Tura Isaka uchirí Jakup. Jakupa uchirísha Jutá ni yachíjjai. ³ Tura Jutá uchirín Páresan tura Sarancha Tamar jurermiayi. Páresa uchirísha Esrum, nuna uchirísha Aram. ⁴ Nuna uchirísha Aminiátáp. Nuna uchirísha Nasun. Nuna uchirísha Sarmun. ⁵ Sarmunka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isaí. ⁶ Nuna uchirísha uunt akupin Tawit. Uunt akupin Tawitia uchiríncha Sarumúnkan Patsepa jurermiayi. Patsepasha emka Uríasa nuweeyayi.

⁷ Sarumúnka uchirí Rupuam. Nuna uchirísha Apías. Nuna uchirísha Asa. ⁸ Asa uchirísha Jusapát. Nuna uchirísha Juram. Nuna uchirí Usías. ⁹ Usías uchirí Jutam. Nuna uchirí Akas. Nuna uchirí Esekías. ¹⁰ Esekías uchirí Manasés. Nuna uchirí Amun. Nuna uchirí Jusías. ¹¹ Jusías uchirí Jekunías ni yachí armia nujai. Nuí Papirúnianmaya shuar Israer shuaran mesetjai nupetkar Papirúnia nunkanam achirar júkiarmiayi.

¹² Nu ukunmanka Jekunías uchirí Saratiár akiiniamiayi. Tura nuna uchirí Surupapír. ¹³ Surupapíra uchirí Awiut. Nuna uchirí Iriakím. Nuna uchirí Asur. ¹⁴ Asura uchirí Satuk. Nuna uchirí Akim. Nuna uchirí Eriut. ¹⁵ Eriuta uchirí Ereasár. Nuna uchirí Matañ. Nuna uchirí Jakup. ¹⁶ Jakupa uchirí Jusé Marí áishriya nu. Marisha Jesusan jurermiayi. Nu Jesuska shuáran uwemtikiartin asa Kristu tu anaikiamuiti.

¹⁷ Tuma asamtai Apraámnumiá Tawitnium Jesusa weatrí katurse (14) áiniawai. Tawitniumiásha Papirúnianam jukimiunma nuísha katurse weat áiniawai. Papirúnianam jukimiunmayasha Krístunam ataksha katurse áiniawai.

Jesukrístu akiiniamu
(Rúkas 2.1-7)

¹⁸ Jesukrístu akiiniamu júnis ámiayi. Ni nukurí Marí Jusejai anajmanairuyayi. Tura tsaniatsain Yusa Wakaní ajaprumtikiamiayi. ¹⁹ Ajaprukmetaisha Jusé Marin iniatsaatsuk nin ajapatniun enentáimpramiayi. Tura ti péñker asa aya iniaisatniun wakerimiayi aents nékainiatsain. ²⁰ Nuna tu enentáimia pujái, mesekranam Yusa suntari tari chicharuk tímiayi “Juséa, ame weatrum Tawitchakait. Tuma asam Marijjai nuatnaikiatin ashamkaip. Uchin jurertatna nuka Yusa Wakaníniuiti. ²¹ Uchin áishmankan takustatui tura nuna naari JESUS anaikiattame. Ashí ni shuarín ni tunaariya uwemtikiartin asa Jesus anaikiatniuiti” tímiayi.

²² Yus ni etserniuríjjai yaunchu timia nu uminkiat tusa nu túrunamiayi. Juna áamtikramiayi:

²³ “Nuwa natsa ajapruktatui tura uchin takustatui. Nuna náarísha Emanuér anainiaktatui.” Tu áarmaiti. Emanuérsha nu chichamnum “Yus íjjai pujuwiti” tawai.

²⁴ Jusesha mesekranmaya shintiar Yusa suntari timia núnsan Marin nuatkamiayi. ²⁵ Tura uchin júreatsain tسانیچhamiayi. Tura jurerматаi uchin Jesus anaikiamiayi.

2

Ti neka apach Jesusan eqkarmiania nu

¹ Jutía nuñkanam Piriñ pépru ana nuñ Jesus akiiniamiayi. Nuñsha nú nuñka akupniurj Irutisauyayi. Akiiniamtai ti neka apach nantu tátainmaaniya Jerusaren péprunam táarmiayi. ² Taar inintruiniak “¿Israer shuara únt akupniurj tui akiiniait? tiarmiayi. Nantu tátainmaani pujaati ni yaari wáinkiamji. Tura tikishmatratai tusar winiaji” tiarmiayi.

³ Irutis nuna antuk nusháa enentáimpramiayi. Tuma asamtai ashí Jerusarennumia shuarsha antukar nusháa enentáimpramiayi. ⁴ Irutis nuikia ashí Israer-patri uuntrincha tura yaunchu akupkamun jintinni-uncha untsukarmiayi. Tura Kristu akiiniatniurjin inintrusmiayi. ⁵ Tutai chichainiak “Jutía nuñkanam Piriñ pepru ana nuñ akiiniatniuíti, tiarmiayi. Yaunchu Yúsnan etserin tu áaruuti:

⁶ “Jutía nuñkanam, Piriñ pepru, ishitiápchich ana nuyá nekas uunt akupin winittiwai. Nii ashí Israer shuaran, Wíi shuar ásarmatai, péñker wáinkiatatai,” tawai Yus.” Tu tiarmiayi.

⁷ Nuna tuñiakui Irutis ti neka apachin úusan, urutía yaa emka wáinkiamarum tusa aniasarmiayi. ⁸ Nuyá Pirinnum akupeak “Nuñ werum uchi péñker inintrusrum wáinkiatarum. Tura wáinkiarum ujatatarum. Wisha werin tikishmátuutaj” tímiayi.

⁹⁻¹⁰ Tutai ti neka apach wearmiayi. Tura yaa, yajaya wáinkiarmania nu, tuke eem wémiayi. Tura yaan wáinkiar ti wararsarmiayi. Tura nú yaa uchi pujumia nuñ ejeniarmiayi. ¹¹ Jeá wayawar uchincha ni nukurj Marijjai wáinkiarmaniayi. Tura uchin tikishmatrarmiayi. Nuyá ni kajuntriyan kurincha, mirá kunkuinniasha, chíkich kunkuinniasha súsarmiayi. ¹² Nuyá mesekranam Yus “Irutisaini weerap” tutai chíkich jintianam waketiarmiayi.

Ejiptunam pisaamu

¹³ Ti neka apach waketrantai Yusa suntari mesekranam Jusen ujakmiayi. “Nantakim uchi ni nukurj Ejiptu nuñkanam jukim nuñ pujustá. Irutis uchin máataj tusa eqtatui. Tura ukunam ankant ajasmatai ujak-tajme” tímiayi.

¹⁴ Tutai Jusé kurat shintiar nú káshik uchincha nukurj Ejiptunam jukimiayi. ¹⁵ Irutis jáatsain nuñ pujusarmiayi. Ejiptunam pujusmatai Yus yaunchu timia nu uminkiamiayi. Iis, Yúsnan etserin aak tímiayi: “Ejiptunmayan winia Uchirun untsukmajai.”

Tu áarmiayi.

Irutis uchin máawarat tusa akupkamu

¹⁶ Irutissha ti neka apach nin ananka yajá waketran nekáa ti kajekmiayi. Ti kajek ashí áishmanchin Pirinnumsha tura yantamach pujuarmia nunasha maawaarat tusa akupkamiayi. Ti neka apach ujakmia nuna enentáimias ashí jimiara uwin takakun tura nú uchichin máawarat tusa akupkamiayi. ¹⁷ Nuka Yusnan etserin Jeremías aarmia nu uminkiamiayi. Juna áarmiayi:

18 “Ramá nuṅkanam ti útainiak uur ajainiawai. Raker ti uutu asa atsankrachminiaiti ni uchirí jákarmatai.” Tu áarmiayi.

19 Tura Irutis jakamtai Yusa suntarij mesekranam Jusen ujakmiayi. 20 “Uchin máataj tiarmia nuka jákarai. Yamaikia ataksha uchi ni nukuríjiaí jukim Israer nuṅkanam waketkitia” tímiayi. 21 Tutai Jusé nantaki uchinchá nukuríjiaí jukin Ejiptunmaya Israer nuṅkanam waketkimiayi. 22 Túrasha Irutisa uchirí Arkiráu Jutía nuṅkanam uunt akupin ajasun nekáa nuj wétinian aránkámiayi. Mesekranmasha ujakma asa nuj pujutsuk Kariréa nuṅkanam wémiayi. 23 Nuj jeá Nasarét péprunam pujusmiayi. “Nasarétnumiá átatui” Yusnan etserin yaunchu tu etserkamu nujai uminkiamiayi.

3

Imiakratin Juan atsamunam etserkamiania nu
(Márkus 1.1-8; Rúkas 3.1-9, 15-17; Juan 1.19-28)

1 Nuyá imiakratin Juan Jutía nuṅkanam aents atsamunam etserki támiayi. 2 “Enentáim yapajíatarum. Tsawant ishichik ajasai Yus juí akupin ajastín.” Tu etserkamiayi.

3 Nú Juan kan yaunchu Yúsnan etserin Isayas juna áarmiayi: “Shuar atsamunam aents untsumui. Untsumuk “Atumí enentái Uunta jinti iwiarturtarum tura naka awajsatarum” tawai.” Tu áarmiayi.

4 Nu Juan sha kamiyu ure najantramun entsauyayi. Emenmamkesha nuapeyayi. Tura yutai-títikriátsnasha chinijiaí yúuyayi. 5 Tura Jerusarén péprunmaya shuarsha tura ashí Jutía nuṅkanmaya shuarsha Jurtañ entsanam matsamiarmia nú shuarsha mash Juán kan tariarmiayi ni chichamen anturkatai tusar. 6 Tura ni tunaarin paant etserkarmatai Juan Jurtañ entsanam imiainiarmiayi.

7 Juan sha Pariséuncha Satuséuncha imiatti tusa wininian wáiniak tímiayi “Napia áaniutirmincha, ¿ya atumniasha ti asutniátniunmaya uwempratiuncha ujatmakmarum? tímiayi. Asutiátin tsawant ishichik ajasai. 8 Tuma asamtai enentáim yapajíamuitkiuñkia péñker wekaamurmijiaí paant iniakmatarum. 9 Atumsha “Iikia Apraám weeitji” tu enentáimtumasairap. Nujai uwemprashtatrum. Yus wakerakka ju kayan Apraáman tiran ki najankainti, tímiayi. 10 Numi ajaktinia áintsan kampuwárin jacha atuttsamuiti. Tura numi péñker nereatsna nuka tsupikia jinium apeamu átatui. 11 Wikia aya entsajain imiajrum atumi enentái yapajíawakrumin. Antsu winia ukuruj winiana nuka péñker awajtamstaj tusa imiantinia áanis tura já áanis Yusa Wakanin enketramprattarme. Wijiaí nan kaamantu asamtai wikia tsuntsumpruan ni sapatrínkisha atitrachminiaitjai. 12 Aruusa nerejai túruinia áintsan átatui. Awajtiutairin achikiuiti tura nujai saepen awajtitiawai. Tura nerén péñker ikiustatui, antsu saepénka jinium apeattawai. Nu jisha take kajinchaiti.” Tu tímiayi Juan.

Juan Jesusan imiaimiu amia nu
(Márkus 1.9-11; Rúkas 3.21-22)

13 Nuyá Jesus Kariréa nuṅkanmaya winis Jurtañ entsanam támiayi Juan imiatti tusa. 14 Juan sha emka nakitiak Jesusan tímiayi “Ame winia imiatminiaitme. Túrutamniaiatmesha ¿urukamtai winia tarutnium?” tímiayi.

15 Tura Jesus tímiayi “Ántsaṅ asati yamaikia. Núnisrik ashí Yus akup-kamu umirkatniuitji.” Tutai Juan iniaisamiayi. 16 Tura Jesus imiani entsaya jíinkímtai nayaimpi uranmiayi. Tura Yusa Wakaní yámpitsa áintsan Jesusan tarimiayi. Niisha wáinkíamiayi. 17 Túramtai nayaimpinmaya Yus chichaak “Juka winia Uchiruiti. Ti aneamuiti. Ti shiir enentáimtajai” tímiayi.

4

*Uunt iwianch Jesusan anankataj tímiania nu
(Márkus 1.12-13; Rúkas 4.1-13)*

1 Nu túrunamtai Yusa Wakaní Jesusan iwianchjai nekapmamtiksattsaa aents atsamunam jukimiayi. 2 Nuḡ kuarenta (40) tsawant, káshisha tsawaḡsha yurumsuk pujak tsukarmiayi. 3 Nuḡ uunt iwianch Jesusan nekapsataj tusa tarí tímiayi “Nekas Yusa Uchirínkiumka ju kaya apatuk najanata.”

4 Tutai Jesus tímiayi “Yus-Papinium áarmaiti: “Aents aya apatkujain iwiaaku pujuschamniaiti. Antsu Yus táman enentáimtuiniak nekas iwiaaku pujusartatui” tawai” tímiayi.

5 Tutai uunt iwianch Jerusarén péprunam jukí Yusa Uunt Jeḡ cháikín iwiak 6 tímiayi “Nekas Yusa Uchirínkiumka juḡ akaikim iniaata. Kame Yus-Papinium áarmaiti:

“Yus ni suntarín akatar akúptúrmaktatui. Nawemin kayanam aji-intsumniḡ wenkurmaktatui” tawai” tímiayi.

7 Tutai Jesus tímiayi “Núnisaṅ Yus-Papinium áarmaiti: “Ame Úuntrum Yus “Nekapsataj” tiip” tawai” tímiayi.

8 Ataksha uunt iwianch naint yakí wájakmanum iwiakmiayi tura nuyá ashí nunkanmaya péprun shiira nuna iniaktusmiayi. 9 Tura tímiayi “Winia tikishmatrurakminkia juḡna mash amastatjai.”

10 Tutai Jesus tímiayi “Werumta, uunt iwianchi. Yus-Papinium aarma awai:

“Ame Úuntrum Yúsak tikishmatrata tura Niḡki shiir awajsata” tawai” tímiayi.

11 Tutai uunt iwianch Jesusan ikiuak wémiayi. Túramtai Yusa suntariḡ tariar atsumamurín súsarimiayi.

*Jesus Kariréa nunkanam etserkamiania nu
(Márkus 1.14-15; Rúkas 4.14-15)*

12 Juan sepunam enketui taman antuk Jesus Kariréa nunkanam wémiayi. 13 Tura Nasarét péprunam pujutsuk Kapernáum péprunam we pujusmiayi. Kapernáumsha Kariréa antumianka kánmatkariḡn pujumiayi. Ti yaunchusha Jakupu uchirí Sapurúnsha tura Niptarísha nu nunkanak nuḡ pujustaitsar achikiaruyayi. 14 Jesus nuna túramtai yaunchu Yúsna etserin Isayas aarmia nu uminkiamiayi. Juḡna áarmiayi:

15 “Sapurúnsha Niptarísha nayaantsanam tíjiuch Jurtaṅ entsa amainini nunkan achikiarmiayi. Nuka Kariréaiti Israer-shuarcha matsatainia nuḡ. 16 Nu aents kiritniunam pujuiniyataṅ ti tsáapninian wáinkiarimiayi. Jákatniunam pujuiniaḡ tsáapin tsáapnirmiayi.” Tu áarmaiti.

17 Nuyá Jesus étseruk tímiayi “Tunaarum enentáimturum enentáim yapajiátarum. Juḡ nunkanam Yus akupkatin tsawant ishichik ajasai.”

Jesus kuaru aents namakan achinian ni unuiniamurí ajasarat tusa achikmiania nu

(Márkus 1.16-20; Rúkas 5.1-11)

¹⁸ Jesus Kariréa antumiañka kánmatkarin wesa jimiará áentsun nuámtak yáchinnium wáinkíamiayi. Chikichik Antresauyayi, chikichcha Semun̄kauyayi. Nu Semun̄ núnisañ Pitru náartiniuyayi. Namakan achin ásar namakan nekajai nan̄kiak yujaarmiayi. ¹⁹ Nuna Jesus wáinkiar tiarmiayi “Nemartustarum. Túrakrumin shuarsha Yusna arti tusan yamá namak achíarmena núnisañ shuaran-eaḡu awajsatjarne.” ²⁰ Tutai ni nekarin ikiukiar Nin nemariarmiayi.

²¹ Nuyá ishichik wésañ ataksha nuámtak yachinnium wáinkíamiayi. Jakupu Juanjai mai Sepetéu uchirí ármiayi. Niisha kanunam en̄kemsar ni nekarin ni aparíjjai iwiarainiak pujuriarmiayi. Tura Jesus “Nemartusta” tutai ²² nu chichamaik kanuncha tura aparin̄cha ikiukiar Jesusan nemariarmiayi.

Jesus untsurí shuaran jintintiamiania nu

(Rúkas 6.17-19)

²³ Ashí Kariréa nun̄kanam Jesus Israer-shuar iruntainiam etserki wémiayi. Yus ju nun̄kanam akupkatin chichaman etserkamiayi. Tura untsurí sun̄kurjai jáinian ashí tsuármiayi. ²⁴ Ashí Siria nun̄kanam Jesus tsuákratman nekaawar ashí nan̄kamas sun̄kurjai wáitin armia nuna Jesusan tsuarti tusa itiarmiayi. Ashí jaancha, najaimiancha, yajauch wakantrukuncha, wáuruncha, tampemaruncha Jesus tsuármiayi. ²⁵ Tura untsurí shuar Jesusan nemariarmiayi. Kariréa nun̄kanmayasha, Tekapurisnumiasha, Jerusaréñ péprunmayasha, Jutía nun̄kanmayasha, Jurtan̄ entsa amainiyasha Jesusan nemariarmiayi.

5

Náinnium Jesus etserkamu

¹ Jesus untsurí shuar káunkarun wáiniak náinnium waka nuj pujusmiayi. Tura ni unuiniamurísha taar pujusarmiayi. ² Nuyá Jesus júnis unuiniamiayi.

Warastin ainia nu

(Rúkas 6.20-23)

³ “Ame wakanim atsumamu nekamarum kakaram ajasrum warastarum. Tuma asarum Yus akupeamunam pachiinniuitrume. ⁴ Kúntuts pujarum nu warastarum. Yus atsañtamprattarme. ⁵ Pééjchach enentáimtumarmena nu warastarum. Yus ashí nun̄kan amastatrume. ⁶ Eseer wekasataj tusa aya kitiamarum nu warastarum. Yus imiktamprattarme. ⁷ Waitnen̄kratniutiram warastarum. Yus waitnentramprrattarme. ⁸ Péñker enentáimniutiram warastarum. Yus wáinkíattarme. ⁹ Chicham iwiarin árum nu warastarum. Yusa uchirí turamartatui. ¹⁰ Péñker túrakrumin yajauch awajtamainiakui warastarum. Yus akupeamunam pachiinniuitrume. ¹¹ Wíi shuar asakrumin katsekramainiakuisha, itit awajtamainiakuisha, tura ashí tsanumprutmainiakuisha warastarum. ¹² Núnisañ yaunchu Yúsnañ etserin armia nunasha túrawarmiayi. Túramtai shiir enentáimkiuram warastarum. Nayaimpiniam ti péñker akinkíattarme’ tímiayi.

Ju nunkanam átum tsáapninia áintsarum tura weeya áintsarum árume
(*Márkus 9.50; Rúkas 14.34-35*)

¹³ ‘Átumka ju nunkanam wee ana áintsan̄ketrume. Tura wééaitiat jeakchaitkiun̄ka míchuiti. ¿Nusha itiur yuámniak ati? Antsu ántrai. Tuma asamtai aa najatai tepet tusar ajapashtinkiait’ tímiayi.

¹⁴ ‘Átumka ju nunkanam shiripkia áintsan̄ketrume. Náinniumka pepu úumkachminiati. ¹⁵ Núnisan̄ shiripik ekeemakam kajun̄num en̄keatsme. Antsu yakí sukúatsmek ashí jeanam ana nu paant atí tusam. ¹⁶ Núnisan̄ atumsha Yusjaj̄ pēnker túramu paant atí. Tura ashí aents nuna iisar niisha Yus Apan shiir awajsartatui’ tímiayi.

Yaunchu akupkamun pachis Jesus unuiniamiania nu

¹⁷ ‘Muisais akupkamuncha tura yaunchu Yúsnan etserin etserkarmia nuna ántar awajsattawai” turutiirap. Antsu nuna Wikia umiktaj tusan táwitjai. ¹⁸ Nekasan tájarme. Ashí túrunatniua nu amúatsaj̄n nu akupkamu ishichkisha yapajniáshtatui. Nayaimpisha tura nun̄kasha tuke amúatsaj̄n nu akupkamusha amuukashtatui. ¹⁹ Nu asamtai shuar chikichik akupkamun, yúpitchuch ana nunaksha, umirchakka tura chíkich shuaran umirkashtinian unuiniakka Yus nekas akupin paant ajastatna nu j̄ nú shuar uunt áhattawai. Antsu ashí shuar akupkamun umiana nu tura chíkich shuaran umirkatniun unuiniana nusha Yus nekas akupin paant ajastatna nu j̄, nu shuarka uunt átatui. ²⁰ Tuma asamtai Yus akupkamunam pachiinkiataj tákumka Pariséujaj̄ nan̄kaamas tura akupkamu jintinniuajaj̄ nan̄kaamas eseera wekasatniuitrume’ tímiayi.

Kajeamun pachis Jesus unuiniamiania nu
(*Rúkas 12.57-59*)

²¹ ‘Yaunchu tiniu armia nu ántichukaitrum: “Mañkartuawairap. Mañkartana nuka asutniátniuiti” tiniu ármiai. ²² Tura Wisha tájarme: Shuar ni yach̄in aya kajerakka nusha asutniátniuiti. Ni yach̄in kátseka nuka akupniunam junaktiniati. Tura ni yach̄in “netsé” tákun̄ka jinium akupnakminiati.’

²³ ‘Tuma asamtai Yus susataj tusam wakerakum tura ame yatsum ámin itit enentáimturman enentáimpramka, ²⁴ suamu nu j̄ ikiuakum emka ame yatsum werim niijjaj̄ iwiarata. Turam waketkim Yus suam nu susata.’

²⁵ ‘Shuar úuntnum júramkuin̄kia jintian̄ wesam niijjaj̄ iwiarata úuntnum ejetamsaj̄n. Túrachakminkia úuntnum surutmaktatui tura niisha suntar-num surutmaktatui tura sepunam en̄ketmattawai. ²⁶ Tura nekas tajai, nu j̄ en̄kemamka ashí rearchisha akikmachkumka jíinkishtatme’ tímiayi.

Tsanirmatniun pachis Jesus unuiniamiania nu

²⁷ ‘Yaunchu tiniu armia nu ántichukaitrum: “Tsanirmawaip.” ²⁸ Tura Wisha tájarme: Shuar nuw̄an tsanirmataj tu iiska nu j̄kia ni enentáin tsanirmayi.’

²⁹ ‘Tuma asamtai ame j̄imi tunaanum yajauch awajtamkuin̄kia ukuin̄kiam yajá ajapata. Ashí ame ayashim jinium esaatsaj̄n aya chikichik ayashmi muchitmar̄i emesratin̄ pēnkeraiti. ³⁰ Ame ewejmesha untsuurmetiat tunaanum ajunmakuin̄kia tsupikiam yajá ajapata. Ashí ame ayashim jinium esaatsaj̄n aya chikichik ayashmi muchitmar̄i emesratin̄ pēnkeraiti.’

Nuwa ajapatniun pachis Jesus unuiniamiania nu

(Mateu 19.9; Márkus 10.11-12; Rúkas 16.18)

³¹ ‘Núnisañ yaunchu tiniu ármiai: “Shuar ni nuarjñ ajapatniun wakera nuka papí najana susati.” ³² Tura Wisha tájarne: Shuar ni nuarjñ tsanirmachun ájapeakka nuwañ tsanirmamtikiati. Tura ajapamujajñ nuatnaiyakka nuka tsanirmaiti.’

Jesus aya nekasa nu titinian unuiniamiania nu

³³ ‘Núnisañ yaunchu tiniu ármiai: “Yusa naari pachisan turattajai” tákumka nekas takamtsuk umiktiniaitme.” ³⁴⁻³⁷ Tura Wisha tájarne: Áyatik “Ee” tákumka tura “Atsá” tákumka wáitrusuk nuke titiá. Támena nu nekas umiktaj takum ame nú arant pachistiniaitkiumka nuka yajauchi-iti, iwianchnumiati. Ti nekas tajai tusam nayaim pachischatniuitme. Nuka Uunt Yus pujutainti. Nuñkasha pachischatniuiti Yusa tarimtaiari asantai. Jerusareñ péprusha pachischatniuiti Uunt Akupin pujutai nuñ asantai. Múukmesha pachischatniuitme. Chikichik intiashkesha pújusha mukusasha awajsachminiaitme. Áyatik nekasa nu páchitsuk titiá.’

Ikkiatniun pachis Jesus unuiniamiania nu

(Rúkas 6.29-30)

³⁸ ‘Yaunchu tiniu armia nu ántichukaitrum: “Shuar máanikiar jji apu-
jtukka niisha apujtuktiniaiti. Tura naj akarkasha ni najisha akarkat-
niuiti.” ³⁹ Tura Wisha tájarne: Yajauch shuar taritraitrap. Antsu ame
yapimin ijiutmamtai áatú yapimsha tsañkatkata. ⁴⁰ Tura pushirmin
jurutramkitiaj tákuisha sakurmesha susata. ⁴¹ Tura káarkancha chi-
kichik kirumitruk jurutkia túrarkui ámeká jimiará kirumitru ejeeta.
⁴² Seatmana nu susata. Ikiatmakuisha páchitsuk ikiasta.’

Nemasri aneetniun Jesus unuiniamiania nu

(Rúkas 6.27-28, 32-36)

⁴³ ‘Núnisañ tiniu armia nu ántichukaitrum: “Ame shuarum aneeta tura
nemasrumka kajerkata.” ⁴⁴ Tura Wisha tájarne: Nemasrum anee-
tarum. Yajauch chichartamna nusha shiir awajsata. Nakitramana
nusha nawamkata. Tura katsekramainiana nu tura yajauch awajta-
mainiana nusha Yus ájtuusarta. ⁴⁵ Atumsha nu túrakrum atumí Apari
nayaimpiniam pujana nu túrana áitkiasumek túrarme. Iista, Yus yajauch
shuarnumsha péñker shuarnumsha tsáapin awajmatkiatsuk. Núnisañ
yumincha yajauch shuar pujuiniamunmasha péñker shuar pujuinia-
munmasha yútmuktisuk. ⁴⁶ Aya atumin anenmainia nuke aneakmesha
¿yaki akirmakat? Yajauch shuarsha nuna túrin áiniawai. ⁴⁷ Aya ame
yatsumek shiir chichaakmeká ¿warí péñkerak túram? Yus-shuarchasha
nuna túrin áiniawai. ⁴⁸ Nu asantai atumí Apari Yus nayaimpiniam pujana
nujajñ métek ti péñker átiniaitrome.’

6

Pénker túratniun Jesus unuiniamiania nu

¹ ‘Ashí íimiainiañ aya shuar iirsarti tusarum Yusna nu takasairap.
Tu takaakrumniñkia Yus Apa nayaimpiniam pujana nu penké akir-
makchattarme. ² Nu asantai shuar atsuma nu yayiakmeká ashí
shuar ujakairap. Anañkartin ainia nuka íruntainmasha tura pepuru
jintí wekasasha ashí íimiainiañ shiir túrajai tusar nuna túrin áiniawai.
Junasha “pénker túrawai” tu enentáimturarti tiniu ásar Yus akíatsañ

aya tu enentáimturmajain akinkiaruiti, nekas tajai. ³ Antsu átumka atsumainia nu yaiyákmeka penké úukam túrata. Chikichkisha nu yáinman nekaashti. ⁴ Úukam túrakminkia ame Apa Yus uukman wainia nu, nuna akirmaktatui.'

Yus áujsatniun Jesus unuiniamiania nu
(Rúkas 11.2-4)

⁵ 'Atumsha Yus áujeakrumsha ántar chichamtin ainia núnis áujsairap. Nu shuarka iruntainmasha tura pepru jintísha shuar iirsarti tusa wajakiar Yúsan áujin áiniawai. Nekasan tájarme, Yus akiatsain aya nu iismajain akinkiaruiti. ⁶ Tura ame Yus áujeakmeka ame kuárturmin wayam waiti epenim nuí amek ame Apa Yus áujsata. Nuna ame Apa Yus uuka túramu waitma asa akirmaktatui.'

⁷ 'Yus áujeakmesha ántam esaram áujsaip. Yúsan nékainiatsna nuka "Esaram áujeakuinkia Yus anturtuktatui" tu enentáimainiawai. ⁸ Niijai métek ajasairap. Átumka seatsrumniñ Yus Apa átum atsumamun nékawai. ⁹ Nu asamtaí Yus áujkuram júnis títiniaitrame:

'Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. ¹⁰ Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisañ ju nunkanmasha uminkiatí. ¹¹ Aparu, ii yurumkarí ashí tsawant amasta. ¹² Tura winia nemas-run tsankurajna núnisemek, Aparu, winia tunaaru tumashrísha tsankurturta. ¹³ Tunáa wakeruktin tsankatrukaip. Antsu ashí tunaanumiá uwentikrurta. Tuke ashí aents akupkamniaitme. Núnisam Amesha tuke ti kakarmaitme. Tura ti shúraitme. Tuma asakmín seajme. Nuke atí.'

¹⁴ 'Amesha chikich shuar yajauch awajtamka nu tsankureakminkia Yus Apa nayaimpiniam pujana nu amincha tsankurtamprattawai. ¹⁵ Tura chikich tsankureachkumniñkia Yus Apasha ame tunaarmincha tsankurtamprashtatui.'

Ijiarmatniun pachis Jesus unuiniamiania nu

¹⁶ 'Ijiarmarum Yus áujkurmesha wake mesekrum susuntrairap. Anankartin shuar chikich shuar "ijiarmaiti" tu enentáimtursarti tusa tuma áiniawai. Nekasan tájame, Yúska akiatsain aya nujai akikma áiniawai. ¹⁷ Antsu ámeká ijiarmamsha péñker temashmaram péñker jaupmitia. ¹⁸ Shuar ijiarmaiti tu enentáimturmasarain. Aya Yus Apak nekaattawai. Tura asa akirmaktatui.'

Kúttian pachis Jesus unuiniamiania nu
(Rúkas 12.33-34)

¹⁹⁻²⁰ 'Ju nunkanmayá kuit ikiaunkatniujai nankaamas nayaimpiniam kuit ikiaunkata. Juñkia kayaa yúchakait tura mash meseatsuk. Tura kasasha wayá kasamtsuk. Antsu nayaimpinmanka kayaaasha yuatsui tura mash meseatsui tura kasasha wayá kasamtsui. ²¹ Kuítrum ana nuí enentáimtustatme. Tuma asam nayaimpiniam ikiaunkata.'

Ayashí tsáapnintri
(Rúkas 11.34-36)

²² 'Ame jímijiaí tsáapin amiñ wayamniaiti. Tuma asamtaí ame jimi péñkeraitkiuñkia amiñ tsáapin wayá tuke tsáapniiti. ²³ Antsu ame jimi yajauchitkiuñkia tsáapin amiñ wayachmin asamtaí tuke kiritin

átatui. Núnisan̄ yajauchia nu wakerakmeka péñkera nu ame enentáim̄iñ wayachmin asamtai tuke kirit ajastatui. Nu kiritcha imiá yajauchiti.'

Yussha kuitsha máimtek enentáimtushamniaiti
(Rúkas 16.13)

²⁴ 'Shuar jimiará úuntrin umirkatniun tujintiawai. Chikichan wakerak chikichnaka nakitrattawai. Chikichan umiruk chikichnaka umirkash-tatui. Núnisan̄ átumka Yussha kuitcha máimtek enentáimtustin tujinkiat-tarme.'

Yus ni uchirín péñker wáinkiaiti
(Rúkas 12.22-31)

²⁵ 'Tuma asamtai tájarne: Wariniak yuataj wariniak umartaj tura wariniak entsartaj tusarum nuke enentáimsairap. Yus iwiaaku átinian amasu asa yurumkancha amaschamniakait. Tura jū ayashniasha nana asa entsataincha amaschamniakait. ²⁶ Chínkisha enentáimpratarum. Yakí nanamainiak yurumkan arakmainiatsui. Tura juuk yurumkan ikiuiniatsui. Tuma aiñ Yus Apa nayaimpiniam pujana nú Yusak áyureatsuk. Atumsha chin̄kia nú nan̄kaamaschakaitrum. ²⁷ Nu arantcha ti enentáimkiumsha ¿nujaj̄ tsakartatmek?'

²⁸ 'Nuikia ¿urukamtai entsartincha timiá enentáimprum? Iistá, kukujsha takachuitiat tura najanchaitiat ²⁹ ti shíirmach áiniawai. Yaunchu uunt akupin Sarumún̄ ti shiir iwíarmamniuitiat kukujja tímianchayayi. ³⁰ Iis, nupa yamá tsakaawai tura kashin aents tsupikiar jinium epeenawai. Tuma aiñ Yus ti shiir áentseatsuk. Nuna tura asa atumniasha nú péñker waitmakchattawak. ¿Urukamtai Yus nekas enentáimtatsrum? ³¹⁻³² Jū nuñkanam ana nu pachikiairap. Chíkich shuar, Yúsan nékainiatsna nu, warin̄ yuattaj̄ wariñ umartataj̄ wariñ entsartataj̄ nuna ti pachiniawai. Tura atumsha tu enentáimsarum weerap. Ame Apa nayaimpiniam pujana nu ame atsumamurmin nékawai. ³³ Tuma asamtai Yusjaj̄ shiir wekasatin tura Yus akupkamu ana nu umiktin emka enentáimsatarum. Túrakrumniñkia atsumamurmin Yus suramsattawai. ³⁴ Kashin átatna nujaj̄ itirchat enentáimsairap. Kashinkia nusháa itirchatr̄ij̄jaj̄ tsawarchattawak. Yamá tsawanta jujaj̄ máakchakait.'

7

Chíkich sumamtikiawairap
(Rúkas 6.37-38, 41-42)

¹ 'Chíkicha tunaarj̄ ti enentáimtusairap. Núnisan̄ Yus atumí tunaarj̄ iirtamsashtatui. ² Chíkich wárik sumamtikiatin enentáimkiumniñkia Yus núnisan̄ sumamtikramattawai. Tura ame chíkicha túramurj̄ nekapmar-mena nú nekapkajaj̄in amincha nekapmarmattawai. ³ Tuma asamtai ¿itiurtsuk atumi j̄iñ numi enketna auk ítskesha atumi yachí j̄iñ tsuat enketusha iyarum? ⁴ Ame j̄iim̄iñ numi tuke enketaj̄isha ¿itiurtsuk ame yatsumi j̄iyya tsuátan jurustajme tame? ⁵ Ántar shuará, ame yáintaj̄ tákumka emka ame j̄iim̄iñ numi enketna nu jusata. Nuyá paant iistatme yatsumi j̄iñ tsuat enketna nu jurustin.'

⁶ 'Ti shiira nuka yawá súsashtiniaiti. Nuna nakitrar amincha esat-michartimpiash. Kuítrumsha kuchi súsashtiniaiti. Aya najatrachartatuak.'

Yus seakmin suramsattawai
(Rúkas 11.9-13; 6.31)

⁷ Yus seakrumin suramsattawai. Eakrumka wainkiattarme. “Wini-ajai” tákurmin awaintiamattarme. ⁸ Seana núna awáiniawai. Eana nuka wáiniui. “Winiyajai” tuinia núna awáiniawai.’

⁹ ‘Ame uchiram apatkun seatmakui ¿kayaash súsaintiam? ¹⁰ Tura naman seatmakui ¿napíash súsaintiam? ¹¹ Nuikia átum yajauchitirmesha atumi uchirí péñker ana nu tuke súuchakaitrum. Nuna nankaamas nuikia seakrumniñkia atumi Aparí nayaimpiniam pujana nu péñker ana nuna suramsashtatuak.’

¹² Júnaka Muisaissha Yúsnan etserniusha akupenawai: “Chíkich ámin túrutatí tusa wakerakmek aimesha núnismek túratá.” Tu akupenawai.’

Wañkaram jintiasha tura yupikiach jintiasha
(Rúkas 13.24)

¹³⁻¹⁴ ‘Wañkaram jintia awai. Wayatniusha yúpichuchiiti. Nuisha untsurí wáiniawai. Tura nusha menkakatniunam jeawai. Túrasha chíkich jintia awai. Nusha yupikiach asa itiurchataiti. Wayatniurjsha yupikchiti. Nuí ishichik wáiniawai. Tura nusha iwiaaku pujustinnium jeawai. Tuma asamtai tuke iwiaaku pujustaj tákurmek a yupipitin jintia achiktarum.’

Nerejai numi nekaatainti
(Rúkas 6.43-44)

¹⁵ ‘Aneartarum. Wáitruiniak “Wi Yúsnan étserjai” tuinia nu írunui. Pátatek murikiua áinis yúpichuch áiniawai tura ni enentáin nekas únt-yawa áinis áiniawai. Pátatek shiir chichainiawai tura ni enentáin yajauch piakuiti. ¹⁶ Atumsha túramujai nin nekaatniuitrume. Naranmayá shuiya júukchamniaiti. ¿Tsachiksha kushinñkiapen nerektatuak? ¹⁷ Núnisañ péñker numia nu tuke péñkeran nereatsuk. Tura yajauch numia nu yajauchin nereatsuk. ¹⁸ Péñker numi yajauchin nereatsui. Núnisañ yajauch numi péñkeran nereatsui. ¹⁹ Yajauch numi ajakar tsupirar jinium apeashtinkiait. ²⁰ Tuma asamtai wáittrin ainia nuka túramujai nekanattawai.’

Ashikia Yus akupeana nuí jeachartatui
(Rúkas 13.25-27)

²¹ ‘Aya winia Apar nayaimpiniam pujana nuna wakeramurin umirin ainia nuke Yus akupeamunam pachuinkiertatui. Chíkichka “Uuntá, Uuntá” turutainiyat nayaimpiniam jeachartatui. ²² Amuukatin tsawant jeamtai untsurí turutiartatui “Uuntá, Uuntá, ame náaram pachisar ashí nunkanam etserkachmakaj’. Ame náarmesha pachisar yajauch wakancha jiiiki akupkamji. Tura ame náaram pachisar aentsti tujintiamu túramji” turutiartatui. ²³ Nuí chichainiakui “Werumtarum. Penke nékachuitjarme. Aya yajauchitrume” títiatjai.’

Péñker ukurma tura yajauch ukurma
(Rúkas 6.47-49; Márkus 1.22)

²⁴ ‘Shuar winia chichamprun antuk umirkanka nu shuar ti péñker enentáimniuiti. Niisha ju shuarjai méteketete. Jea jeamuk kayanam ukurmai. ²⁵ Tura yumi ti yutuk entsa nujanñkruamai tura nase ti kakaram umpuimiai. Túmain pukukachmai ni ukurmari kayanam ukuamu asamtai. ²⁶ Tura shuar winia chichamprun antuk umirtukchanka ju shuara núnisañ enentáimchaiti. Jea jeamuk náikminiam ukurmai. ²⁷ Tura yumi yutuk entsa nujanñkruamai tura nase ti kakaram umpuimiai. Túmakui jea mash saanaki iniaamai” tímiayi Jesus.

28 Jesus nuna tinia amukmatai ashí shuar ti enentáimprarmiyai. 29 “Yusa kakarmarijjai unuitiamtsujik. Israer-shuara jintinniurinkia núnis un-
 uiniainiatsui” tiarmiyai.

8

Jesus tunamarun tsuarmiania nu

(Márkus 1.40-45; Rúkas 5.12-16)

1 Jesus muraya támatai untsurí shuar Nin nemariarmiyai. 2 Nui shuar tunamaru Jesusan jearin tikishmatramiyai. Tura tímiyai “Uuntá, waker-
 akmeke tsuáramniaitme.”

3 Tutai Jesus uwejjai antiñ “Wakerajai. Péñker ajasta” tímiyai. Tutai tunamaru ni tunamarmari péñker ajasmiyai. 4 Tura Jesus tímiyai “Pai, penké etserkaip. Áyatik Israer-patri iniakmamsam Muisais timia nu susata ashí shuar nekaawarti tusam.”

Jesus suntara uchirín tsuarmiania nu

(Rúkas 7.1-10)

5 Jesus Kapernáum péprunam wayamtai apachi suntara kapitiántri Nin tarimiyai. 6 “Uuntá, tímiyai. Winia uchir tampemaru jeá tepes ti wait ajáa tepawai” tímiyai.

7 Jessusha “Ayu, winin tsuartaiai” tímiyai.

8 Tutai kapitián tímiyai “Uuntá, Ame ti nankaamaku asam winia jeaurí wayachminiaitme. Áyatik “Péñker ajástí” tákumin winia uchir péñker ajatrustatui. 9 Iista, winiasha akuptuiniatsuk tura wisha suntaran akupenatsjak. Juna “Wetá” takui wéawai. Tura chikichnasha “Winitía” tutai winiawai. Tura takartinian “Ju túratá” tutai umíawai.”

10 Kapitián nuna tutai Jesus ti enentáimiuk Nin nemarainian tímiyai “Nekasan tájarne, Israer-shuar Yúsan tímiatrus enentáimtin atsawai.

11 Maa, yajaya untsurí shuar Yus akupeana nui jeawar Apraámjaisha Isakjaisha Jakupjaisha iruntrar yurumáwartatui. 12 Tura Israer-shuar Yúsnun jeamnia ániayai aq kiritniunam ajapnawartatui. Nui ti úutin tura ti wáitsatin átatui.”

13 Nuyá Jesus kapitiáin chicharuk “Jeemjin waketkitia. Nekas enentáimtusú asakmin uchiram péñker ajatramsattawai” tímiyai. Túramtai ni uchirí nu chichamtaik péñker ajatsamiyai.

Jesus Pitru tsatsarín tsuármiania nu

(Márkus 1.29-31; Rúkas 4.38-39)

14 Jesus Pitru jeen we Pitru tsatsarín tsuemujai jaa tepan wáinkiamiyai. 15 Tura ni uwején antiñmatai tsuemun michatramiyai. Tura nuwa nantakin ashí ajamsarmiyai.

Jesus untsurí jáinian tsuármiania nu

(Márkus 1.32-34; Rúkas 4.40-41)

16 Kashi ajasmatai yajauch wakantrukarun Jesusan itiararmiyai. Tura nu yajauch wakanin chikichik chichamjai chicharas jiji akupiararmiyai. Ashí jáiniancha tsuáarmiyai. 17 Yúsnan etserin Isayas “Ii pimpirmaríncha ii sunkuríncha jurutramkimiaji” yaunchu timia nu uminkiatu tusa nu túrunamiyai.

Jesus nemarsatin

(Rúkas 9.57-62)

18 Shuar untsurí Jesusan káutkarmatai “Entsa amain katiñtai” tímiyai.

19 Nuj Israer-shuara jintinniurj Jesusan tarí tímiayi “Uuntá, Ámin páchitsuk nemarsatniun wakerajme.”

20 Tutai Jesus tímiayi “Kujanchmasha ni waarj̄n takaktsuk. Chiñkisha pasunken takaktsuk. Tura Wi Yúsnumiãitiatan tepestiniur atsawai.”

21 Nin nemarniusha tímiayi “Uunta, emka winia aparun iwiarsan ikiuuttajai.”

22 Tura Jesus “Nemartusta, tímiayi. Wakannium jaka ainia nu jakan iwiarsarti” tímiayi.

Nasesha entsasha Jesusan umirkarmiania nu

(Márkus 4.35-41; Rúkas 8.22-25)

23 Nuyá Jesus ni unuiniamurj̄ij̄i uunt kanunam enkemámiayi. 24 Nuj nase ti kakaram umpuimtai antumiañ ti tamparintin ajasmiayi. Tura entsa kanunam yaráná piákmiayi. Tuma ain̄ Jesus kanunam kanar tepemiayi. 25 Nuyá ni unuiniamurj̄ k̄urashim Jesusan ishintiarar tiarmiayi “Uuntá, wayaj̄i. Kakaram ajachkumñ̄kia jakattaji.”

26 Jesus tímiayi “¿Urukamtaí timiá ashamaru, Yus enentáimtutskesha?” Nuyá wajaki nasencha entsanacha chicharkamiayi. Tutai mash miaaku ajasmiayi. 27 Nuna ísar ni unuiniamurj̄ ti enentáimsarmiayi. Tura tiarmiayi “J̄usha ¿warí áentsuit? Nasesha entsasha Nin umirainiatsuk” tiarmiayi.

Jatara nunkanam Jesus yajauch wakantrukuñ tsuármiania nu

(Márkus 5.1-20; Rúkas 8.26-39)

28 Nuyá Jesus entsá amaini katiñ Jatara nunkanam jemiayi. Nuj jimiará shuar yajauch wakantruku tuke iwiartainium pujú Jesusan tariarmiayi. Mai yajauch wakantruku ásar ti kajen ármiai. Tuma asamtai shuar nu jintianam nankaamachu ármiai. 29 Niisha Jesusan wáinkiar kakantar tiarmiayi “¿Warí pujuram iij̄i, Jesúsá, Yusa Uchiría. Tsawant jeatsain̄ in amukratkataj̄ tusamek taum?” tiarmiayi. 30 Nuj arant kuchi untsurí shushunmak yujaarmiayi. 31 Yajauch wakancha Jesusan seainiak “J̄iiki akupkartakmeke kuchíniam wayatin tsan̄katkartukta” tiarmiayi.

32 Tutai Jesus “Pai, wetarum’ tímiayi. Yajauch wakancha shuara enentáiȳa j̄iinkiar kuchiniam enkemáwarmiayi. Túramtai kuchi wáurkiar arau utsanamiayi. Nuyá entsá iniankar jakerarmiayi.

33 Kuchí wáinniusha nuna ashamkar péprunam tseke wéarmiayi. Nuj jeawar ashí túrunamun etserkarmiayi. Yajauch wakantrukuñ péñker ajasmancha etserkarmiayi. 34 Nuyá ashí nú peprunmaȳa shuar Jesusan in̄kiun̄tai tusar ashinkiararmiayi. Tura in̄kiun̄kar ni nun̄keȳa waketkiti tusar seawarmiayi.

9

Jesus emearun tsuármiania nu

(Márkus 2.1-12; Rúkas 5.17-26)

1 Nuyá Jesus kanunam en̄kemar antumiañ amaini katiñmiayi. Tura nuj̄ ni péprur̄in Kapernáumnum jemiayi. 2 Nuj jeamtai shuar emearu jaan patak yanakin ejeetiarmiayi. “Tsuártatui” nekas tu enentáimtuinia ásarantai Jesus jaan tímiayi “Uchirú, kakaram ajasta. Ashí ame tunaarum tsan̄kuramuiti.”

³ Takui Israer-shuara jintinniurj yajauch enentáimprar “Juka Yúsan ti yajauch chicharuí” tiarmiayi.

⁴ Tu enentáimainian Jesus nekáa tiarmiayi “¿Urukantai imiá yajauch enentáimprum. ⁵ Tua imiá yúpichuchit. Shuara tunaarj̄n tsankuratin yúpichuchikiaiit. Tura emearun “Nantakim wekasata” titin yúpichuchikiaiit?

⁶ Wi Aents Ajasua núchakaitaj. Ju nunkanam Wi tunaan asakátratniuitjai. Wátsek, nu nekaatarum tusan juna iniakmstatjai.” Nuna tinia emearun “Wajaktia, tepetairam jukim jeemj̄n wetá” tímiayi. ⁷ Tutai emearu tsuámar nantaki ni jeen wémiayi. ⁸ Tura nuna ashí aents wáinkjar Yus kakarman shuáran susa asamtai ashamkar Yúsan shiir enentáimtusarmiayi.

Jesus nemartusat tusa Mateun achíawai
(Márkus 2.13-17; Rúkas 5.27-32)

⁹ Nuyá Jesus wémiayi. Nuj̄ wesa Mateun kuit júutainium pujan wániak “Nemartusta” tímiayi. Tutai Mateu nuna ikuak Jesusan nemarmiayi.

¹⁰ Nú ukunmasha Mateu jeen yurumuk pujaj̄ yajauch armia nu Israer-shuar untsurj̄ káunkar Jesusa unuiniamurj̄j̄j̄j̄j̄j̄ irunar yurumiarmiayi.

¹¹ Pariséusha nuna ísar Jesusa unuiniamurj̄n aniasarmiayi “¿Urukamtia atumí Uuntrj̄ kuitia achinj̄aj̄isha tunaarinniuaj̄aj̄isha irunar yuruma?”

¹² Tura Jesus nuna antuk tímiayi “Pénker ainia nuka tsuákratniun atsumainiatsui. Antsu jainia nu tsuákratniun atsumainiawai. ¹³ Werum ju aarma unuimiutarum:

“Murik maam Winia surusum nujaj̄ “máakete” tátsujaj. Antsu wait-neñkartutain wakerajaj,” Yus-Papinium tu áarmaíti.

Wikia “pénkeraitjai” tuínian untsuktaj tusan táchaitjai. Antsu tunáa shuar ni enentáin yapaj̄j̄awarat tusan táwitjai” tímiayi.

Ijarmatniun Jesusan aniasarmiania nu
(Márkus 2.18-22; Rúkas 5.33-39)

¹⁴ Nuyá imiakratin Juanka unuiniamurj̄ Jesusan tariar aniasarmiayi. “¿Urukantai iikia tura Pariséusha ijarmaj̄ tura ame unuiniamurmeka ijarmainiatsu?” tiarmiayi.

¹⁵ Jesus ayak tímiayi “Nuatma nampernum ipiaamu ainia nu ¿ajakra uutu wayamniakait? Yamái-nuatu pujakui úutchamin áiniawai. Núnisan Wi pujakui ijarmashtin áiniawai. Tura tsawant jeattawai nuatua áintsan Wi junaktatjai. Antsu nuj̄kia ijarmawartatui’ tímiayi.

¹⁶ ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chinikiá nuna nankaamas jaaktatui. ¹⁷ Nijiamanch yamáí nawar nuap najanamun arutnum yaraachminiaiiti. Túramka kariák nuap najanamun ijikratniuiti, nijiamchisha ukaratniuiti, tura nuap najanamusha yajauch ajastiniiaiiti. Antsu yamaram nijiamanch yamaram nuap najanamunam yaraatniuiti. Nu túramka nijiamchisha nuap najanamusha mai péñker ártatui.”

Jesus Jairu nawantrinha tura chíkich nuwancha tsuármiania nu
(Márkus 5.21-43; Rúkas 8.40-56)

¹⁸ Jesus nuna taj̄ Israer-shuara uuntrj̄ Jesusan tarí tikishmatar tímiayi “Winia nawantur jarutkayi, tura Ame winim ewejmij̄j̄j̄j̄j̄j̄ antintrukak-minkia ataksha nantaktiatui.” ¹⁹ Tutai Jesus ni unuiniamurj̄j̄j̄j̄j̄j̄ wajakjar nijj̄j̄j̄j̄j̄j̄j̄ wearmiayi.

²⁰ Tura jintiá weenaj nuwá tuse (12) uwitin numpá ájapeak wáitias pujú asa Jesusa ukurini amainian ni pushirin antinmiayi. ²¹ “Áyatik ni pushirin antinnaka péñker ajastatjai” tu enentaimpramiayi. ²² Nuna nekáa Jesus ayantar nuwán tímiayi “Shiir enentáimprata, nawantru. Yus shiir enentáimtusú asam péñker ajasume.” Nu chichamtaik ni jáamuri péñker ajasmiayi.

²³ Nuyá Jesus uunta jeen jeamiayi. Tura nuñ charaatum ajainiancha tura jakan iwiarsatai tusar péeman umpuiniiancha wáiniak ²⁴ tímiayi “Aa jíintratarum. Nuwáchikia jákachai antsu aya kanarai.” Penké jakan nekayat túratta nuna neka asa “aya kanarai” tímiayi. Takui aents Nin wishikrarmiayi. ²⁵ Tura nuna ashí jiiir Jesus jeá wayá nuwáchin uwe-jnum achik iniantkimiayi. Túram nantakmiayi. ²⁶ Nu túramu ashí nu nuñkanam etsernarmiayi.

Jesus kusurun jímiarun tsuármiania nu

²⁷ Nuyá Jesus wéakui jimiará shuar jii kusuru untsunki weriarmiayi. “Uuntá, ii Uuntri Tawit ame weatrum asamtai in waitnenkarturta” tiarmiayi. ²⁸ Jesus jeá wayamtai jii kusuru tariarmiayi.

Tura Jesus aniasar “¿Juna túramniaiti túrutrumek?” tímiayi.

Niisha “Ee, Uunta” tiarmiayi.

²⁹ Tuíniakui Jesus ni jiiin antinkiar tímiayi “Átum nekas enentáimtarmenta núnisan túrunati.” ³⁰ Nujai jii péñker ajasarmiayi. Nuyá Jesus “Et-serkairap. Shuar penké nekáwarain” tímiayi. ³¹ Táraitiat jíinkiar Jesus túramun ashí nu nuñkanam etserkarmiayi.

Jesus chichachun péñker awajsamiania nu

³² Nuyá wenaj shuar yajauch wakantruku chichachun Jesusan itiararmiayi. ³³ Tura Jesus yajauch wakanin jiiiki awemamtai nu chichachu chichakmiayi. Ashí nuna íisar ti enentáimprarmiayi. Tura tiarmiayi “Yáunchusha Israer nuñkanam jujai métek túramu penké atsuwiti.” ³⁴ Antsu Pariséuka yajauch enentáimtuiniak tiarmiayi “Nu shuar iwianchi uuntri kakarmarjiaj yajauch wakanin jiiiki akupeawai.”

Jesus shuaran waitnentawai

³⁵ Jesus ashí péprunam we ni iruntairin wayá “Yus akupeana nuñ enkemátarum” tu etsermiayi. Tura ashí nánkamas sunkurjaj jániancha tsuármiai. ³⁶ Shuaran íisar murik wáinchatia núnis pimpikiar tura kúntuts pujuinia asamtai waitnentrarmiayi. ³⁷⁻³⁸ Nuyá ni unuiniamurin tímiayi “Ju aents Yus-Chicham ujaktiniaitji Yus-shuar ajasarat tusar. Nu takat ti núkap awai tura takarin ishichik ániawai. Nu takatka júuktinia áintsankete. Júuktin tsawant jeamtai takau táasmatai takamtikin ujaktin átsuk takaun akupkat tusa. Atumsha núnisrumek Yus seatarum ni shuarin akupak áentsun júukarat tusarum.”

10

*Jesus tuse (12) unuiniamurin achikmiayi tuke nemarsatniun
(Márkus 3.13-19; Rúkas 6.12-16)*

¹ Nuyá Jesus tuse (12) unuiniamurin achik Yusa kakarmarin súsarmiayi yajauch wakanin shuara enentáiyá jiiiki akupkatniun. Núnisan ashí sunkurjaj jánian tsuáartinian susamiayi.

² Ju áiniawai Jesus tuse (12) unuiniamurĭn achikiarmia nu: Emka Semuĭn núnisan Pitru náartiniuyayi. Nuyá ni yachi Antres. Nuyá nuámtak yáchintin Jakupusha Juansha, Sepetéu uchirĭ armia nu. ³ Nuyá Jiripi, Parturumí, Tumas, Mateu. Mateusha kuitian achiniuyayi. Arpeu uchirĭ Jakupusha. Ripiu núnisan Tateu náartiniuyayi. ⁴ Ásumpĭ Semunsha nuyá Jútas Iskariúti Jesusan ukunam surukmia nu. Nu tuse (12) achikma ármiai.

Jesus ni unuiniamurĭn etserkarti tusa akupkarmiania nu

(*Márkus 6.7-13; Rúkas 9.1-6*)

⁵ Nu tuse (12) unuiniamurĭn Jesus júnis chicharak akupkarmiai. “Israer-shuarcha matsatmanum weerap. Samaria nunĭkanam péprunam weerap. ⁶ Antsu Israer-shuar murikiua áinis Yusajya wákaru ainia nu weritiarum. ⁷ “Tsawant ishichik ajasai Yus jú nunĭkanam akupin ajastin” tu etserki wetarum. ⁸ Tunamarusha chĭkich sunĭkurjai jainia nusha tsuarterum. Jakasha iniantkitiarum. Yajauch wakanĭcha shuara enentáiya jĭiki awematarum. Nu túratin kuitĭchajai kakaram susamuitrume, tuma asamtai atumsha ashĭ ánrarmek túratarum.’

⁹ ‘Kurisha ashĭ kuitĭcha jukiirap. ¹⁰ Úyuncha jukiirap. Sapatcha tura ushukrustinĭcha jukiirap. Antsu chikichik pushĭ jukitiarum. Takau asakrumin yurumkan ajampramsartin áiniawai.’

¹¹ ‘Péprunam jearmesha péŋker shuar wáinkiarum nuĭ wayarum tuke nuĭn pujustarum. ¹² Nu jeanam wayamsha “Ju jea shiir atĭ” titiá. ¹³ Nekas péŋker shuaraitkiunĭka shiir ajasarti. Antsu nu shuar péŋker itiarmachkunĭka shiir ajascharti. ¹⁴ Tura náŋkamsan atumin awáintiamainiachkuĭnĭka anturtamainiachkuĭnĭka nuyá jĭinkitiarum. Nu shuar yajauch ásarmatai jĭinkirum atumí naweya nunĭka japimiarum ikiuktiarum. Ni tunaari aents nekaawarat tusarum túratarum. ¹⁵ Nu shuaran nekapsatin tsawant jeamtai Yus asutiáshtatuak. Sutum péprunmaya shuara nanĭkaamas Kumura péprunmaya shuarnasha nanĭkaamas Yus asutiáttawai nu shuaran’ tímiayi.

Yajauch awajsatniun ujakmiania nu

¹⁶ ‘Aneartarum. Wisha murik yawanum akupkatniua áintsanak akupajrume. Tuma asamtai shiir nawamkartĭn áyatrum aneartarum. ¹⁷ Yajauch shuarjai aneartarum. Akupniunam juramkiartatui. Israer-shuar iruntainiam asutiamawartatui. ¹⁸ Wĭi shuar asakrumin uunt-numsha tura nuyá akupniunmasha juramkiartatui. Núnisrum akupniunĭcha tura Israer-shuarĭchana winia chichamur ujaktatrume. ¹⁹ Tura akupniunam surutmakakrumnisha wariniak titiay tu enentáimprairap. Nuĭ uuntjai chichaakrumin Yus títinian jintinramattarme. ²⁰ Nuĭnĭka átum enentáimmiajai chichaschattarme antsu atumí Aparĭ Yusa Wakanĭ atumin chichamtikramsattarme.’

²¹ ‘Shuar ni yachĭnĭcha máawarti tusa suruktatui. Apasha ni uchirĭn surukartatui. Uchisha ni aparĭn máawarti tusa surukartatui. ²² Tura Wĭi shuar asakrumin mash muĭjramkartatui. Tura tuke katsuntea nu uwemprattawai. ²³ Chikichik péprunam yajauch awajtamainiakui chĭkich péprunam pisartarum. Wĭi Aents Ajasuitjai. Tuma asan nekasan tájarne, átum Israer-shuar mashi ujatsrumniĭn wantinkiattajai.’

²⁴ ‘Unuiniamuka nin unuiniana nuna nanĭkaamaschaiti. Takarniusha ni uuntri nanĭkaamaschaiti. ²⁵ Unuiniamuka nin unuinia nujai métek ajaska maak. Takarniusha ni úuntriĭjai métek ajaska maak. Wátsek,

Winia atumí úuntrin “Iwianchi uuntri” túrutainiakui atumniasha nuna nan̄kaamas yajauch turamtatui.’

Yúsak ashamkatniuiti
(Rúkas 12.2-9)

²⁶ ‘Tuma asamtai aentska ashamkairap. Ashí uukma nu paant nekanattawai. ²⁷ Ishishmasan kiritniunam ujaajrumna nu, tsawái kakantrarum etserkatarum. ²⁸ Aya ayashin main ainia nu ashamkairap. Wakanin máachmin áiniawai. Antsu wakanniasha ayashniasha mai jinium emesramnia asamtai Yus ashamkatarum.’

²⁹ ‘Jimiará chin̄ki pen̄ké ishichik kuitjai surukmin áiniawai. Túmaitiat Yus tsan̄kateachkuin̄kia nun̄ká jaka iniainiatsui. ³⁰ Ame intiashmisha mash nekapmarmaiti. ³¹ Nu asamtai jákatin ashamkairap. Yusjai átumka ti untsurí chin̄kijijai nan̄kaamas pen̄kerchakaitrum.’

Jesus natsantrashtiniaiti
(Rúkas 12.8-9)

³² ‘Ashí shuar ashí íimiainiain Winia natsantruiniatsna núnaka Winia Apar yakí nayaimpiniam pujana nuj natsantrashtatjai. ³³ Antsu shuar íimiainiain Winia natsantra núnaka Wisha yakí nayaimpiniam winia Apar pujana nuj natsantrattajai.’

Jesusa chichamejai shuar akannartatui
(Rúkas 12.51-53; 14.26-27)

³⁴ ‘Ashí shuar nawamnaikiar shiir pujusarat tusan ju nun̄kanam táchaitjai. Nuna túrat tusarum enentáimturairap. Antsu wi tamaajai shuar pen̄ker ajasarmatai yajauch shuar nin nakitrartatui. ³⁵ Shuar ni aparín nakitrattawai. Nuwasha nukurín nakitrattawai. Najatísha tsatsarín nakitrattawai. ³⁶ Tuma asa shuar ni shuarijjai nemasrintin ártatui.’

³⁷ ‘Shuar ni aparíncha nukuríncha Wijjai nan̄kaamas aneakka Wí shuar áchamniaiti. Núnisan̄ ni uchiríncha nawantrin̄cha nan̄kaamas aneakka Wí shuar áchamniaiti. ³⁸ Tura ashí wáitsatniun surimiatsuk ni krúsrin̄ yanaki jukí nemartachkuñka Wí shuar áchamniaiti. ³⁹ Aya jú nun̄kanam pen̄ker pujustaj tana nu ni iwiaakmarin̄ emesrattawai. Tura Winia anentu asa ju nun̄kanam pen̄ker pujustinian páchiatsna nu tuke shiir pujustatui.’

Akinkiatin
(Márkus 9.41)

⁴⁰ ‘Atumin itiaarma nuka Winia itiaarui. Tura itiaarea nuka Winia akuptukmia nunasha itiaawai. ⁴¹ Yúsnan etserniuncha Yúsnumia winia asamtai itiaakka etserin akinkíattana nujai méték akinkíattawai. Pen̄ker shuárnasha pen̄ker asamtai itiaakka pen̄ker shuar akinkíattana nujai méték akinkíattawai niisha. ⁴² Uchin̄cha Wí shuar asamtai entsá michan shikirak súsanka imiá nekas nusha akinkíattawai.” Tu tímiayi Jesus.

11

Imiakratin Juan Jesusaj shuaran akupkamiania nu
(Rúkas 7.18-35)

¹ Tura tuse (12) unuiniamurin̄ Jesus tinia akupkar Niisha nú nun̄ka péprunam we Yus-Chichaman jintiák etserkamiayi.

² Tura Juan sepunam enkemas Kristu túramun antukmiayi. Antuk ni unuiniamurín jímiarán Jesúsai akupkamiayi. ³ Tura Jesusan aniasarmiayi “¿Nekas ame Kristu Yus akupkamu tátinia nukaitiam. Kame chichichak nákastataj?”

⁴ Tutai Jesus tímiayi “Waketkirum ashí ántarmena nusha wáintrumna nusha Juan ujaktarum. ⁵ Kusurusha wáinmainiawai. Shutuapsha wekainiawai. Tunamarusha péñker ajainiawai. Empekarusha ántuiniawai. Jákarusha nantainiawai. Tura kuítrinchanmasha uwempratin chicham ujakmaiti. Nu ujaktarum. ⁶ Túrusha yawetsuk Winia tuke shiir enentáimturna nú shuar shiir átatui.” Jesus nuna tutai waketkiarmiayi.

⁷ Waketkiarmatai shuar káunkarun Jesus Juan pakhis áujmatmiayi. “Shuar atsamunmasha ¿warí werimiarum? Pintiu nase umpúam atúu we juní we ajana nuka ¿ístai tusarumek wémarum? Kame Juan kka nú shuarchaiti. ⁸ Nuikia ¿warí werimiarum. Shuar péñker iwiarmampra ístai tusarmek wémarum? Warí, péñker iwiarmampraka uunta jeen pujuiniatsuk. ⁹ Nuikia ¿warí werimiarum. Yúsnan etserniuk werimiarum? Maa, túrachmashiuram. Túrusha Juan kka yaunchu etserniu nan kaamas enentáimtustiniaiti. ¹⁰ Yaunchu Yus-Papinium áarmaiti:

“Winia akatramurun amijni emka akupeajai ame jintimin iwiarat tusa.” Juan nu akatramuiti. ¹¹ Nekasan tájarne, shuar imiakratin Juanjai nan kaamas uunt atsuwiti. Tuma ain Yus akupeamunam pachiinia nu shuarnaka, nekasmianchancha, Juanjai nan kaamas shiir enentáimtustiniaiti. Tuma asantai nu pachiinkiatin enentáimpratarum.’

¹² ‘Kakaram shuarka imiakratin Juan támia nú tsawantnumia Yus akupeamunam ti pachiinkiatniun wakeruniak kakarmajai pachiinkiatniun enentáimiainiawai. ¹³ Juan pujumia nú yaunchu ashí Yúsnan etserin armia nusha tura Muisais akupkamusha Yus akupin ajastinian etserkarmiayi. ¹⁴ Yaunchu Yúsnan etserin “Kristu táatsain Erías tátiniaiti” tímiayi. Tura nekaatin wakerakrumka Juan nu Eríasaiti. ¹⁵ Antuktin jeakrumka nekaatarum.’

¹⁶ ‘Ju áentsnasha ¿warijjai métek nakumkataj? Uchijjai métek ániawai. Ni aijjai iruntrar nakurustaj táyatañ tuíniawai ¹⁷ “Námpera áinis nakurustaitisar peem umpuarji túrusha jantsemáchure. Nuyá iwiarsatniua áinis nakurustaitisar íwiareakur kantamtaí kantamáji túrusha átum úutcharme.” ¹⁸ Atumsha núnisaitrume. Kame Juan núkap yurumtsuk nijiamchincha úmutsuk wekaimiayi. Túmakui átumka “Yajauch wakantrukuiti” tímiarme. ¹⁹ Nuyá Wisha Aents Ajasu támajai. Tura yurumeaku tura úmakui “Ti yurumin ti nampenaiti. Ashí yajauch shuaran amikrinti” túrutrume. Wátsek, wi túramujai Yus nekas nékamu nekanattawai.”

Yajauch péprunmaya shuaran chicharkamiania nu
(Rúkas 10.13-15)

²⁰ Nuyá tujintiamun túramiania nú peprunmaya shuaran pachis Jesus chicharkamiayi. Tuma ain nuyá shuar ni enentáin yapajíácharu asantai juna chicharkamiayi.

²¹ “Wáinkiatá, Kurasín péprunmayatiram, Petsaitia péprunmayatirmesha. Nuí aents tujintiamun ti túraitjai. Tíru péprunmasha Setun péprunmasha nu tujintiamu túramuitkiuinikia yaunchu ni enentáin yapajíáwaraayi. Túrawar kúntuts pujutai pushín entsarar yun kunim ajakíaraayi. ²² Tura Wisha tájarne, nekapsatin tsawant jeamtaí Yus atumin tí asuttiamattarme.

Tirunmaya shuaran nan̄kaamas tura Setunnumia shuaran nan̄kaamas asuttiamattarme.’

²³ Tura atumsha Kapernáum péprunmayatirmesha, ashí nan̄kaamas nan̄kaamantu ajastin enentáimtumarme. Antsu ashí emestamprartatui. Atumiin aents tujintiamun ti túraitjai. Sutuma péprunam nu tujintiamu túramuitkiuin̄kia nu pepru yamaisha tuke aayi. ²⁴ Tura Wisha tájarne, nekapsatin tsawant jeamtai Yus Sutumanmaya shuar nan̄kaamas atumin asuttiamattarme.”

“Winin ayampratarum” tímiania nu

(Rúkas 10.21-22)

²⁵ Nuyá Jesus tímiayi “Shiir enentáimtajme, Aparu, ashí nayaimpisha nan̄kasha Úntrinme. Tuma asam Ame túram nu ti unuimiaru enentáimtumainia nuyá úukuitme antsu uchichia áinis nan̄kaamantu enentáimtumainiatsna nú shuar paant awajtusuitme. ²⁶ Ame, Aparu, núnis wakera asam túraitme.’

²⁷ Winia Apar ashí surusuiti. Wisha ni Uchirí asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nu shuarsha winia Aparun nékainiawai. ²⁸ Ashí pimpikniutirmesha itieurchat pujarmena nusha Winí winitiarum. Túrakrumnīnkia ayamtikrattajrume. ²⁹ Wi kajechu asan tura péejchach enentáimin asamtai Winí winirum unuimiartarum. Winia chichamur ántakrum umiakrumnīnka atumí wakaní ayamprattawai. ³⁰ Atumin akuptaj nú túratin yúpichuchiiti. Káarkasha Wi súajrumna nu wampuchiiti” tímiayi Jesus.

12

Jesusa unuiniamuri ayampratin tsawantaj trikiu neren pakaarmiania nu

(Márkus 2.23-28; Rúkas 6.1-5)

¹ Nuyá Jesus ayampratin tsawantaj ajanman̄ ajapenin̄ nan̄kaamamiayi. Ni unuiniamurīsha tsukarar trikiu neren majusar yukí wekasarmiayi. ² Pariséu shuarsha nuna wáinkiar Jesusan aniasarmiayi “Iista, ame unuiniamuram ayampratin tsawantaj túratin surimkiamua nuna túruiniawai.”

³ Tutai Jesus tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. ⁴ Yusa Uunt Jeen wayá Yus iniaktusma tantan yuámiayi. Nu tantasha aya Israer-patrik yúatin asamtai Tawitniasha tura ni neman̄in ana nunasha suritkiamuyayi. Túmain̄ yúawarmiayi. ⁵ Muisais akupkamunam aarma nu áujdachukaitrum. Israer-patrikia ayampratin tsawantaj takainiayatan̄ nusha tunaachuiti. ⁶ Nekas tájarne, yamá Yusa Jeen enentáimtustinia nuna nan̄kaamas Wíniaka Aents Ajasuitjiana nu, nekas enentáimtursatniuitrume. ⁷ Yus-Papinium tawai:

“Murik maam Winia surusum nujaj “maakete” tátsujai. Antsu waitnen̄kartutain wakerajai.”

Nu chicham nekas nékaitkiurmeka yamá túrarmena núnisrum tunáa túrachu ánrarum súmamtikiachaintrume. ⁸ Wi Aents Ajasu asan ayampratin tsawantan Úntrin̄tjai.”

Shuara uwejé jakan Jesus tsuármiania nu

(Márkus 3.1-6; Rúkas 6.6-11)

⁹ Jesus nuyá wé Israer-shuar iruntainiam wayamiayi. ¹⁰ Nui shuar ámiayi ni uwejé jaka. Tura Jesusan ántar nekapsatai tusa wakeruinia ásar aniiniak “¿Ayampratin tsawantai jaa shuar tsuarminkiait?” tiarmiayi.

¹¹ Tutai Jesus tímiayi “Atumsha atumí murikrj ayampratin tsawantai waanam akaiki iniamtai jusatai tusarum wéchaintrupash. ¹² Antsu shuaraka murikjai nankaamaschakait. Tuma asantai ayampratin tsawantaisha péñker ana nu túramniaiti.” ¹³ Tinia iniais áishmankan uwejé jakan tímiayi “Uwejém takuitia.” Tutai uwejé takuí chíkich uwejéjai métek péñker ajasmiai. ¹⁴ Nuna túramtai Pariséu shuarsha aa jiiñkiar Jesus itiurak máawaintiaji tusar chichaman najatiarmiayi.

Isayas Jesusnan tímia nu uminkiamiayi

¹⁵ Jesus nin máatniun nekaama nuyá jiiñkimiayi tura wéakui untsurj shuar nemariarmiayi. Untsurj jáiniancha tsuámiayi. ¹⁶ Tsuar “et-serkairap” tinia akupiararmiayi. ¹⁷ Yaunchu Yúsnan etserin Isayas tímia nu uminkiaiti tusa túrunamiayi. Niisha juna áarmiayi:

¹⁸ “Júiti Wi achikmaj nu. Niisha Wi tájana nuna umin asantai ti aneakun Niiijai waraajai. Winia Wakantru kakarmarjñ takamt-suk susattajai. Túramtai winia uwempratin chichamprun ashí Israercha nunkanmasha etserkattawai. ¹⁹ Jíakchattawai tura kakaram chichaschattawai. Winia anturtukarat tusa péprunam weak untsukchartatui. ²⁰ Akupin ajatsuk shuar pintiu punua núnis pimpiru ainia nuna kúpitsuk yáintatui. Núnisañ shuar ji yama ikiapámu áinis kakarmachu ainia nuna ikiajniatsuk ikiakártatui. Tura ashí nupetak ti péñker kakaram akupin ajastatui. ²¹ Tura Israer-shuarchasha Nin nekas enentáimtusartatui.”

Jesusan “iwianchi uuntri kakarmarijjai túrawai” tiarmania nu (Márkus 3.19-30; Rúkas 11.14-23; 12.10)

²² Nuyá Jesusan shuar yajauch wakantrukun itiararmiayi. Nu shuar jii kusurusha chichachusha ámiayi. Tura Jesus tsuármatai paant íimsamiayi tura chichakmiayi. ²³ Nuna wáinkiar shuar shiir enentáimprar tiarmiayi “¿Tawitia uchirj pampanku iniañnamu uwemtikkiartin tátinia nuáshit?”

²⁴ Tura Pariséu shuarsha nuna antukar yajauch enentáimtuiniak tiarmiayi “Juka iwianchi kapitíántrñ Pirsepún umirniuiti. Tuma asa nuna kakarmarijjai yajauch wakanin jiiiki akupeawai.”

²⁵ Jesus tu enentáimainian neka asa tímiayi “Nú nunkanmaya shuar nuamtak kajernaiyakuñkia nú nunka wari meserchattawak. Núnisañ nuamtak shuar ní shuarjai mánainiakka amunaikchartatuak. ²⁶ Núnisañ íwianch nuamtak jiiiki akupnainiakka máanaikiar wárik amuukashtatuak. ²⁷ Kame Wi Pirsepú iwianchi kakarmarijjai iwianchin jiiiki akupeakuñkia atumí uchirjsha ¿yana kakarmarijjain jiiiki akupena? Ni túramurijjai átum awajirma nekamatarum. ²⁸ Wi Yusa Wakaní kakarmarijjai yajauch wakanin jiiiki akupea asantai atumsha Yusa akupeamurj atumijn jeartamarmena nu nekaatniutrume.”

²⁹ ‘Iista. Shuar kakaram shuara kuítrñ kasarkatin wakerakka emka kakarman jñkiá aya túrañ ni jeen wayá kasarkamniaiti. Wi iwianchin jiiikmiajai uunt iwianch nupetkamua nu nekaamniaiti.’

³⁰ ‘Wijjai tsanñ pujatsna nuka winia nemasruiti. Núnisañ Winia yáintsuna nu aya itiurchat nájateawai.’

³¹ ‘Tuma asamtai tájarme, Ashí shuar tunáa túruinia nusha yajauch chichainia nusha tsan̄kuratin awai. Antsu Yusa Wakan̄in yajauch chicharin ainia nuka tsan̄kurashtiniaiti. ³² Winiasha Aents Ajasuit-jiana nuna yajauch chichartuinia nú shuarsha tsan̄kuramniaiti. Tura Yusa Wakan̄in yajauch áujmatainia nuka pen̄ké tsan̄kurachminiaiti. Ju nun̄kanmasha tura ukunmasha tsan̄kurnarchattawai’ tímiayi.

Ni nerejai numi nekaamniaiti

(Rúkas 6.43-45)

³³ ‘Yutai numi pen̄keran nereawai. Tseas numisha yajauchin nereawai. Ni nerejai numi nekaamniaiti. Núniskete atumjai. ³⁴ Tseas wenunniutirmesha, ¿atumsha itiurak imiá yajauchitirmesha pen̄ker chichamsha chichastarum? Shuar ni enentáin enentáimna nuna chichaawiti. ³⁵ Pen̄ker shuar pen̄ker enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti. ³⁶ Tura Wisha tájarme, nekapsatin tsawant jeamtai ashí enentáimtsuk chichakma nuna Yúsán paant ujakartatui. ³⁷ Iis, ame chichammijjai nekanattarme. Pen̄ker chichakuitkiumka sumamashtatme. Tura pen̄ker chichakchaitkiumka sumamattame.”

Nu shuar yajauch ásar iniakmamun seawarmiania nu

(Márkus 8.12; Rúkas 11.29-32)

³⁸ Pariséu shuarsha Israer-shuara jintinniurisha Jesusan chicharuk “Uuntá, ame Yúsaiyajtjai tusam nayaimpinmaya kakarmajai iniakmamú túrata, iisha wáinkiatái” tiarmiayi.

³⁹ Tutai Jesus tímiayi “Shuar yajauch tura Yúsán enentáimtachu ásar nayaimpinmaya iniakmamun seainiawai. Tuma asamtai, áyatik yaunchu Junas túrunamu iniakmastiniaiti. ⁴⁰ Junas menaintiu kashi menaintiu tsawantcha namaka ampujen enkemsamiayi. Núnisnak Wi, Aents Ajasu asan, menaintiu kashi menaintiu tsawantcha nun̄ká jakan tepestatjai. ⁴¹ Júnás Níniwi péprunmaya shuaran Yus-Chichaman etserkamtai nu shuar ni tunaar̄in enentáimtsusar ni enentáin yapajíawarmiayi. Tura juí yamá Junasa nan̄kaamas etserin pujawai. Wiitjai nusha, tura anturkachuitrume. Tuma asamtai nekapsatin tsawant jeamtai Níniwinmaya shuar juyá shuaran súmamtikiawartatui.’

⁴² ‘Yaunchu nuwá yajayá shuaran úunt akupniurjyayi. Nu nuwá Sarumún̄ ti neka asamtai nin anturkataj tusa tarimiayi. Tura juí yamá Sarumún̄jai nan̄kaamas anturkamnia pujawai. Nusha Wiitjai. Tuma asamtai nekapsatin tsawant jeamtai nu nuwá juyá shuaran súmamtikiawartatui’ tímiayi.

Yajauch wakan jiiiki akupkamuitiat wáketna nu

(Rúkas 11.24-26)

⁴³ ‘Shuara enentáiya yajauch wakan jiiinkin yumi pen̄ké yútatsna nuí wéawai. Tura nuí pen̄ker pujustinian wáinkiach ataksha waketkitniun enentáimiu. ⁴⁴ “Wí jiiinkimij nuí waketkittijai” tawai. Tura waketki shuara enentáin pen̄ker iwiaramu tura an̄kantan wáiniak ⁴⁵ ni ain siati (7) iwianchin níijjai nan̄kaamas yajauchin itiá shuara enentáin enkemáwartatui. Túrunamtai nu shuar nuiki núna nan̄kaamas yajauch ajastatui. Núnisan̄ juyá shuar túrunawartatui” tímiayi Jesus.

Jesusa yachí, Jesusa nukurí

(Márkus 3.31-35; Rúkas 8.19-21)

46 Jesus nu shuarjaj tuke chichaak pujaj ni nukurisha ni yachisha tari-armiayi. Tura aa wajasar Nijijaj chichastaj tiarmiayi. 47 Túramtai Jesusan ujakar “Ame nukusha yatsumsha aa wajasar chichastaj turamainiawai” tiarmiayi.

48 Chichaman ujakmia nuna Jesus tímiayi “¿Ya ainia winia nukursha winia yatsursha?” 49 Nuyá ni unuiniamurjín iniakmas tímiayi “Ju áiniawai winia nukur tura winia yatsursha. 50 Ashí shuar winia Apar nayaimpiniam pujana nu wakeramun umiiniana nu winia yatsur winia umar winia nukur áiniawai” tímiayi.

13

Untsurí métek-taku chichamjaj Jesus unuiniamiania nu

(1) Atsaamin atsaampramiayi

(Márkus 4.1-9; Rúkas 8.4-8)

1 Nu tsawantaj Jesus ni jeeya jíinkin antumianka kánmatkarín pujusmiayi. 2 Tura ti untsurí shuar káunkarmatai kanunam enkemar nuj pujusmiayi. Shuarsha antumianka kánmatkarín pujusarmiayi. 3 Túrunawarmatai untsurí métek-taku chichamjaj unuiniamiayi. “Atsaamin atsaamprataj tusa jíinkimiai, tímiayi. 4 Atsaamki wesa arakrj jintia písunmasha iniarmai. Tura chiniki tariar yuawarmai. 5 Chikichcha kaya írunmanum iniarmai. Nunka ishichik asamtai wárik tsapainiarmai. 6 Tura nantu etsantramtai péñker kankáprúrcharu asa sukuam káararmai. 7 Chikichcha janí nupanam iniarmai. Tura janí wárik tsakar nupetak ajakramai. 8 Chikichcha péñker nunkanam iniarmai. Nusha péñker nerekar chíkich siansha (100) nerekarmai. Tura chikichcha sesenta (60) nerekarmai. Tura chikichcha trainta (30) nerekarmai. 9 Kuishim ákuinikia antukturum” tímiayi.

“¿Urukamtai aya métek-taku chichamjaj jintiam?” aniasarmiania nu

(Márkus 4.10-12; Rúkas 8.9-10)

10 Nuyá ni unuiniamurjín Jesusan taruntar aniiniak “¿Urukamtai aya métek-taku chichamjaj ju shuar unuiniam?” tiarmiayi.

11 Tutai Jesus tímiayi “Urukuk ju nunkanam Yus akupin ati, nuka yaunchu nekanachmiayi. Tura yamaikia Yus ashí nuna atumin paant iniakturmawai. Antsu chíkich nuna nekaachmin áiniawai. 12 Kame núkap takakna nu shuar nú nukap patatnaktatui tura ti núkap takustatui. Antsu ishichik takakna nuka ishichik takakuk juruktiniati. Núnisan Yusna ti nekarum nú nukapka yúpichuch nekaattarme. Tura ishichik nékarum wárik kajinmatkittiarne. 13 Tuma asamtai aya métek-taku chichamjaj unuiniajai. Nú shuarka íniayatan wáiniáiniatsui. Ántuiniayatan ántachua núnis nékainiatsui. Túmainiak Winia nekarainiatsui. 14 Nujaj yaunchu Yúsnan etserin Isayas timia nu uminkiaiti. Juna tímiayi:

“Ti ántayatrurum anturkashtatume. Wániatrumsha nekaashtatume. 15 Ju shuara enentáj kátsuram ásar péñkera nuna nakitiainiawai. Nu asamtai péñker ántuiniatsui, jíisha pusá ánis áiniawai. Túrachkunka paant nekaawarainti, tura nekas antukarainti, tura enentáijjaj enentáimias Winia tsuarat tusa tarutiarainti.”

16 Tura átumka paant wainkia asarum péñker anta asarum shíraitrume.

17 Nekasan tájarne, untsurí Yúsnan etserniusha tura péñker shuarsha átum yamá wáintrum nuna wáinkiatnium wakeruiniayatan

wáinkiacharmiyai. Tura átum yamáí ántarme nuna antuktinian wakeruiniyatañ antukcharmiyai' tímiyai.

Jesus atsaampramu chichaman paant jintintiamiania nu
(Márkus 4.13-20; Rúkas 8.11-15)

¹⁸ 'Ayu, antuktarum. Atsaampramu chichaman paant jintintiatjarme. ¹⁹ Árak jintia písunam iniaararma nuka shuar Yus-Chichaman ántayatañ ni enentáin ikiuiniatsna núiti. Tura íwianch nu Yus-Chicham ni enentáin atsaampramu áinis antukman kajinmatkiawai. ²⁰ Árak kaya írunmanum iniaararma nuka shuar Yus-Chichaman antuk waras umirainia núiti. ²¹ Tura núkap kan̄kaprurcharu ásar katsuiniatsui. Antsu itiurchatan in̄kiuiniak tura Yus-Chichaman wakeruinia ásarmatai chíkich yajauch áujmatam wárik iniaisar ikiuiniawai. ²² Árak jañkí nupanam iniaararma nuka shuar Yus-Chichaman antuk emka umirniua núiti. Tura ju nuñkanam írunna nuna tuke páchiniak ni kuítríncha ti enentáimtuinia ásarmatai ashí Yus-Chichaman enentáimtamun núpeteawai. Tuma asamtai nu áentsnum Yus-Chicham atsaampramu nereatsui. Yus-Chicham ni enentáin takasma atsawai. ²³ Tura árak péñker nuñkanam iniaararma nuka shuar Yus-Chichaman antuk péñker umirainia núiti. Tura péñker nerenawai. Chíkich siañ (100) nerekarma núnis chikichcha sesenta (60) nerekarma núnis chikichcha trainta (30) nerekarma núnis ániawai" tímiyai Jesus.

(2) Yajauch nupa tríkiunam atsaamkamu

²⁴ Jesus ataksha ju métek-taku chichaman áujmatsamiyai. "Shuar Yus akupeamunam pachiinkiertin júnisaiti. Shuar péñker arakan, tríkiun ni nuñken araamai. ²⁵ Tura ashí kanararmatai nemasrj kashi taa trikiu arakmanum yajauch nupañ aratak ikiukmiai. ²⁶ Trikiu tsapakar nereakui nuyá yajauch nupaśha nusháa nereku asa ti paant ajasmai. ²⁷ Nuna íisar takainia nu ní úntrin werí tiarmai "Uunta, ¿péñker arak araachmakam. Itiura jusha yajauch nupaśha tsapakuit?"

²⁸ "Tutai nérentin timiai "Winia nemasur arakuiti."

"Takui ni takarniurj tiarmai "¿Yajauch nupañ uwerat tusam wakeramek?"

²⁹ "Tutai timiai "Atsá, uwerairap. Yajauch nupa uweaj tukamarum trikiu uweniirum. ³⁰ Iniaisatarum. Antsu métek tsakakti. Júuktin tsawant jeamtai winia takartinian emka yajauch nupañ uwer írumar jinkiawarat tusan akupkartatjai. Tura áesawartatui. Tura trikiu neren júukar péñker ikusarat tusan akupkartatjai" timiai" tímiyai Jesus.

(3) Mustasa jin̄kiái

(Márkus 4.30-32; Rúkas 13.18-19)

³¹ Jesus ataksha métek-taku chichaman áujmatsamiyai. "Shuar Yus akupeamunam pachiinkiertin mustasa jin̄kiáiya áintsan̄kete. Shuar péñker nuñken araamai. ³² Mustasa jin̄kiáikia ímiá uchichiitiat tsapái tsakaakka ashí numichijjai nan̄kaamas uunt ajawai. Ti uunt asamtai chin̄ki ni kanawen pasuñmainiawai" tímiyai Jesus.

(4) Karin en̄ketatin

(Rúkas 13.20-21)

³³ Núnisañ chíkich métek-taku chichaman áujmatsamiyai. "Shuar Yus akupeamunam pachiinkiertin karinia áintsan̄kete. Nuwañ nijiamchiriam karinia en̄kea mashi páchimiawai. Tura nu mash karimtikiawai" tímiyai.

Jesus aya métek-taku chichamjain jintintiamiania nu

(Márkus 4.33-34)

³⁴⁻³⁵ Ashí nuna Jesus métek-taku chichamjai áujmatsamiayi. Yaunchu Yúsnan etserin timia nu uminkiatu tusa túramiayi. Etserin juna áarmiayi: “Métek-taku chichamjai áujmattiatjai. Yámankamtaiknumiá nékashtain et-serkattajai” tu áarmiayi.

Nu asamtai aya métek-taku chichamjain áujmatmiayi Jesus.

Jesus yajauch nupa tríkiunam atsamkamun paant awajsamiania nu

³⁶ Nuyá shuaran ikiukin Jesus jeá támiayi. Túramtai ni unuiniamurj tariar “Yajauch nupa áujmatmena nu paant awajsaata” tiarmiayi.

³⁷ Tutai Jesus tímiayi “Wi Aents Ajasuitjai. Wi péñker arakan atsaamkajtjai. ³⁸ Ashí nunka aja áintsaiti. Péñker jiníkiái Yus-shuaran Yus akupea nuna nakumeawai. Yajauch nupa iwianchna ainia nuna nakumeawai. ³⁹ Tura íwianch ii nemasri asa yajauch nupan arakuiti. Tura nunka amúamunam Yusa suntari arakan júuktinia áintsan shuaran yaruaktatui. ⁴⁰ Yajauch nupa irur jinium áesatniua áanis nunka amúamunam túrunattawai. ⁴¹⁻⁴² Nuj Wi Aents Ajasu asan winia suntarun akupkattajai. Tura ashí tunaan túruinia nunasha tura chikichan tunaanum útsuinia nunasha mash irurar jinium apeawartatui. Nujsa ti úutin ti wáitsatniusha átatui. ⁴³ Antsu péñker túruinia nuka ti shiir wincha ajarar ni Apari akupeana nuj etsa núnis tsáapnin ajarartatui. Wats, kuishim átsuk. Antukta.’

(5) Kuit wáinkiamu

⁴⁴ ‘Shuar Yus akupeamunam pachiinkiatin kuit nunká uukma áintsankete. Shuar nu kuitian wáiniak nuin ataksha uukmai. Tura ti waras waketki nu kuit niiniu atí tusa ashí ni takakman suruk nu nunkan sumakmai.’

(6) Kaya shiirmach ti kuitia nu

⁴⁵ ‘Shuar Yus akupeamunam pachiinkiatin júnisaiti. Shuar kayachin ti shiirman eak wekaana áintsankete. ⁴⁶ Tura kayan ashí nankaamas kuit jeean wáiniak waketki ashí takakna nuna suruk nu kayan niiniu atí tusa súmawai.’

(7) Neka

⁴⁷ ‘Shuar Yus akupeamunam pachiinkiatin júnisaiti. Shuar nekajai namakan achía áintsankete. Nekan nayaantsanam ajuntak niisháa namakaim achíawai. ⁴⁸ Tura nekanam nemarmatai kukar jiki, nuj péñker namaknasha chaninnium chumpiniawai. Tura yajauch namaknaka ajapenawai. ⁴⁹ Núnisan átatui nunka amúamunam. Yusa suntari taar Yus-shuaran tura íwianch shuaran akantrattawai. ⁵⁰ Tura íwianch shuarnaka uunt jinium apeattawai. Nujsa ti úutin ti wáitsatin átatui.” Nuna ashí ni unuiniamurjiai áujmatsamiayi Jesus.

Yamá nekaamujajisha tura yaunchu nekaamujajisha Yus-shuaran yáintiniaiti

⁵¹ Jesus nuna tinia amuk “¿Jú mash antukurmek?’ tímiayi.

Tutai ni unuiniamurj “Ee, Uunta, ashí antukji” tiarmiayi.

⁵² Tuiniakui Jesus tímiayi “Shuar ashí Yúsnan péñker unuimiaruka aents kuítriniua áintsankete. Ni ikiutairiya yamarmancha yaunchu sumakmancha jusamniaiti. Núnisan nu shuar yamá nekamujajisha tura yaunchu nékamujajisha Yus-shuaran yáintiniaiti.”

Jesus Nasarétnum waketkimiania nu
(Márkus 6.1-6; Rúkas 4.16-30)

⁵³ Jesus nu métek-taku chichaman áujmatas amuk nuyá wémiayi. ⁵⁴ Tura ni péprurin Nasarétnum jeá Israer-shuar iruntainiam wayá unuiniamiayi. Tura nuyá shuar antukar tí enentaimprarmiayi. Tura “¿Jusha tuj imiá unuimiaruit, tiarmiayi. Itiurak aents tujintiamun túramniait? ⁵⁵ Juka karpintíru uchirinchukait. Nukurísha Marichukait. Tura ni yachísha Jakupu, Jusé, Semun, Jútas áiniatsuk. ⁵⁶ Tura ni umaisha iijjaj írutra pujuiniatsuk. ¿Nuikia itiura mash neka?” tiarmiayi. ⁵⁷ Túrawar Jesusan itiurchat enentáimturarmiayi.

Túramtai Jesus chicharuk “Yúsnan etserniun ashí shuar péñker anturainiawai, antsu aya nuna nunkeyañka ni shuarinikia nin anturainiat-sui” tímiayi. ⁵⁸ Tura nú shuar Jesusan enentáimtuiniachu asamtai aentsti tujintiamun aya ishichik túramiayi.

14

Imiakratin Juan jakamu
(Márkus 6.14-29; Rúkas 9.7-9)

¹ Kariréa nunkanam Erutis akupniuyayi. Tura Jesus túramuncha antukmiayi. ² Tura ni írutramurin tímiayi “Nuka imiakratin Juan jakamunmaya nantaki túrawai auka. Tuma asa aents tujintiamun túrawai” tímiayi. Kame Erutis Juan kan maa asa tímiayi.

³⁻⁴ Akupin Erutis ni yachí Jiripi nuwen Jirutíasan akintrukmatai Juan Erutisan “Ame yatsumi nuwé akintrukchatniuitme” tímiayi. Tutai Erutis Juan kan achik jirujaj jiníkiá sepunam enkeatarum tusa akupkamiayi. ⁵ Niisha Juan kan máataj tukamá aentsun ashamiarmiayi. Ashí aents “Juan Yúsnan etserniuiti” enentáimtuiniakui ashammiai. ⁶ Tura akupin Erutis akiiniamu tsawantri jeamtai nú námpertin Jirutíasa nawantri ashí ipiaamu pujuiniamunam jantsemamiayi. Túramtai Erutis shiir enentáimtak ⁷ “Ame ashí wakeram nu seattia, tímiayi. Nekasan amastat-jai, Yussha iirui” tímiayi.

⁸ Tutai nu nuwach emka ni nukurí akatramu asa Erutisan chicharuk “Imiakratin Juan ka muuké tsupikiam amamkunam enkeram surústá” tímiayi.

⁹ Tutai Erutis wake mesekmiayi. Túrasha “nekas Yus iirui” tiniu asa tura ni amikrísha antukaru asamtai umikmiayi. ¹⁰ Ni suntarin sepunmayan Juan ka muuken tsupik itiarti tusa akupkamiayi. ¹¹ Tura amamkunam itiar nuwachin súsarmiayi. Tura niisha ni nukurí susamiayi.

¹² Nuyá Juan ka írutramurí tariar ayashí jukiar iwiansarmiayi. Túrawar Jesusan ujauwearmiayi.

Jesus senku mir (5000) áishman kan ayuramiania nu
(Márkus 6.30-44; Rúkas 9.10-17; Juan 6.1-14)

¹³ Jesus nuna antuk Niñki ni unuiniamurijjaj kanunam enkemar arant aents atsamunam wémiayi. Túrasha nuna aents nekaawar kukarak weriarmiayi Jesusan. ¹⁴ Kanunmaya jíiniaj tukamá untsurí áentsun wáinkiamiayi. Tura wáiniak waitnentrarmiayi. Tura jániancha tsuáarmiayi. ¹⁵ Kíakui ni unuiniamurí Nin tariar tiarmiayi “Kíawai,

Uunta. Tura shuar tǵijuch pujaaka atsawai. Ju aents akupkarta. Péprunam wear sumak yuuwearti” tiarmiayi.

¹⁶ Tutai Jesus tímiayi “¿Urukamtaik wearat? Antsu atumek ayuratarum.”

¹⁷ Tutai tiarmiayi “Tikia takaktsuji. Aya seᅅku (5) tantachik jimiaichik namakchijaᅅ takakji.”

¹⁸ Tuńiakui Jesus “Wats, nu itiantiarum” tímiayi. ¹⁹ Tinea aents chírichriniam pujusarti tusa akupkamiayi. Nuyá seᅅku (5) tantancha jímiar namaknasha achik nayaimpiniam íimias Yúsan yumı̄nsamiayi. Tura puur ni unuiniamurı̄n aents ayuratarum tusa súsarmiayi. ²⁰ Ashí yurumáwar jémararmiayi. Tura nuyasha puunaruka tuse (12) chaᅅkin tíarmiayi. ²¹ Nuı̄ yurumáwarmia nusha nuwasha uchisha nekapmatsuk seᅅku mir (5000) aya áishmaᅅ ármiayi.

Jesus entsá pátatek wekasamiania nu
(Márkus 6.45-52; Juan 6.16-21)

²² Nuyá Jesus ni unuiniamurı̄n kanunam eᅅkemprarum amain émaa ajatarum tusa akupkarmiayi. Niisha áentsun akupkarmiayi. ²³ Akupkarsha naint waka Yúsan áujumiayi. Káshisha nuı̄ Niᅅki tuke pujumiayi. ²⁴ Tura antumiaᅅ tí waᅅkaram asamtai kanu ajapén ajasmatai nase tukumma entsa tamparukmiayi. ²⁵ Tsawaana aı̄ nii tuke wenai Jesus entsá pátatek wekas pujuiniamunam jeamiayi. ²⁶ Tura ni unuiniamurı̄ entsá pátatek wekaan wáinkiar ti sapijmiakarmiayi. Tura ashamainiak “wakanchashit” tiarmiayi.

²⁷ Tuńiakui Jesus tiarmiayi “Kakaram ajastarum. Wiitjai. Ashamprukairap.”

²⁸ Takui Pítiur chicharuk tímiayi “Uunta, Ámetkumka nuı̄ wekasa jeatin untsurkata.”

²⁹ Takui Jesus tímiayi “Wats, winitía.”

Tutai Pítiur kanunmaya akaikin Jesus wajana nuı̄ jeataj tusa entsá pátatek wekasamiayi. ³⁰ Tura ti nasen násentun nekáa ashamkamiayi. Ashama asa entsá wayamiayi. Tura “Uuntá, achirkata” tu untsummiayi.

³¹ Nu chichamtaik Jesus uwejnım achik júak “Maa, Yus imiá ishichik enentáı̄mtuschamek” tímiayi. ³² Tura kanunam eᅅkemáwarmatai nasesha meᅅkakamiayi.

³³ Túramtai kanunam eᅅkemarmia nusha Jesusan tikishmatar chicharuk “Nekas ame Yusa Uchirı̄nme” tiarmiayi.

Jesus Jinisarıt̄niumia shuaran tsuármiania nu
(Márkus 6.53-56)

³⁴ Tura amainı̄ katiᅅkiar Jinisarıt̄ nunᅅkanam jearmiayi. ³⁵ Tura nuyá aents Jesusan nekaawar nu nunᅅkanam ashí ujanairarmiayi. Túrawar jaancha ni pujamunam itiararmiayi. ³⁶ Ni pushirı̄nkisha antiᅅtai tusar seawarmiayi.

15

Shuáran yajauch awajeana nuna Jesus jintintiamiania nu
(Márkus 7.1-23)

¹ Nuyá Jerusarėn péprunmaya Pariséusha yaunchu akupkamu jintin-niurı̄sha Jesusan tariar aniasarmiayi ² “¿Urukamtaik ame unuiniamuram ii uunrı̄ yaunchu jintintrarmia nuna uminiatsu? Iis, ikijmiatskesha yurumáiniawai” tiarmiayi.

³ Tuíniakui Jesus aniasarmiayi “¿Urukamtai atumsha Yus akupkamu umirtsuk aya aents akupkamu umiirum? ⁴ Iis, Yus tíchamkia: “Ame apa, nukusha shiir enentáimtustarum.” Tura “Shuarsha ni aparíncha nukuríncha katsekka nu shuar jakati” tíchamkia.

⁵⁻⁶ Antsu átumka tárume “Shuar ashí niiniu írúnna nuna mash “Yúsnaiti” takui nuikia nujai ni aparíncha nukuríncha yáinçhamniaiti, tárume. Nin yáinçhian nakitiak ayatik “Ashí winia áiniana nu Yusna asamtai yáinçhamniaitjame” tíniiaiti” tárume. Núnisrum tákuram Yus akupkamu iniaisarum aya aents akupkamu umiirume, tímiayi. ⁷ Antra chicham-tiniaitrume. Yúsna etserin Isayas yaunchu nekas atumin áartampriamiayi juna:

⁸ “Ju aents ni wenejai shiir awajtuiniawai, tura ni enentái jeachat pujuiniawai. ⁹ Tura tukeneasan shiir awajtuiniawai. Aentsu chichamen jintintiainiyat “Yusa chichamente” tuiniawai.” Tu áarmiayi” tímiayi Jesus.

¹⁰ Tinja shuaran untsuk tiarmiayi “Ju antukrum péñker nekaatarum. ¹¹ Aents yúana nuka shuáran yajauch awajsashtatui. Antsu wenunmaya jiinia nuka shuáran yajauch awajeawai” tímiayi.

¹² Nuyá ni unuiniamurj Jesusan tariar “Maa, Pariséu ame chichammin antukar ti itiurchat enentáimprarai” tiarmiayi.

¹³⁻¹⁴ Tuíniakui Jesus tímiayi “Ikiuktiarum. Kusuru áintsan áiniawai. Tura kusuruncha jintintiainiawai. Mai kusuru ásar mai wáanam akaiki ini-aawartatui. Wats, ajanam nupá áintsan áiniawai. Tura ashí winia Apar nayainpiniam pujana nu araachmaka takamtsuk uwé ajapamu átatui” tímiayi Jesus.

¹⁵ Takui Pítiur Jesusan tímiayi “Nu métek-taku chicham paant awajsata.”

¹⁶ Tutai Jesus tímiayi “¿Atumsha nekaachurmek. ¹⁷ Enentáimprachurmek? Ashí wenunam wayaana nu wakenam wéatsuk. Tura nuyá iniañkastiniaiti. ¹⁸ Antsu wenunmaya jiinia nu enentáinmaya jiiniu asa áentsun yajauch awajeawai. ¹⁹ Enentáinmaya ashí yajauch enentáimsatin jiiniainiawai. Mankartuatniusha, chikicha nuwé kasamkatniusha, tsanirmatniusha, kasamkatniusha, wáitruatniusha, yajauch áujmatsatniusha ²⁰ ashí nu áiniawai nekaska shuáran yajauch awajeana nu. Tura ikijmiatsuk yurumátniuka shuáran ni enentáin yajauch awajeatsui” tímiayi.

*Nuwá Israer-shuarcha Jesusan enentáimtusmiania nu
(Márkus 7.24-30)*

²¹ Jesus nuyá jiinki Tiru péprunmasha Sitiun péprunmasha wémiayi. ²² Tura nu nunkanmaya nuwá Jesusan tarí tímiayi “Uunta, uunt akupin Tawit ame weatrum asamtai winia waitnentrurta. Nawantur yajauch wakantruku asa ti wáitrutawai” tímiayi.

²³ Tura Jesus ákchamiayi. Tura ni unuiniamurj tariar “Awemata, tiarmiayi. Tuke untsunki apapétmaji” tiarmiayi.

²⁴ Nuyá Jesus tímiayi “Aya Israer-shuarnum menkakaru áinia nuna eaktinian Yus akuptukuiti.”

²⁵ Túrasha nuwá tikishmatar tímiayi “Uunta, waitnentrurta.”

²⁶ Tutai Jesus tímiayi “¿Uchí apatkurj jurukir yawá susamniakait?” tímiayi.

²⁷ Tutai nuwá tímiayi “Nekas, Uunta, tame. Tura yawasha ni aentsri yurumainiakui nunká iniaarun yuúniatsuk.”

28 Takui Jesus tímiayi “Maku, nekas Winia enentáimtursaitme. Ame wakeram núnisan atí” tímiayi. Tura nu chichamaik ni nawantrí péñker ajasmiayi.

Jesus untsurí jáinian tsuararmiania nu

29 Jesus nuyá jiinki Kariréa antumianka káanmatkarin waketikmiayi. Tura naint waka nuí pujusmiayi. 30 Nuí untsurí aents Nin tariar shutu-apnasha kusuruncha chichachuncha tsupirkamuncha chíkich jáiniancha itiararmiayi. Túrawar nawenam aeprusarmiayi. Túram tsuararmiayi. 31 Nuna ísar chichachusha chichainiakui, tsupirkamusha péñker ajainiakui, shutuapsha péñker wekainiakui, kusurusha wáinmainiakui, tí shiir enentáimprarmiayi. Yus ni áentsrin Israeran yáinmatai shiir yumiñsarmiayi.

Jesus kuaru mir (4000) áishmankan ayuramiania nu
(Márkus 8.1-10)

32 Nuyá Jesus ni unuiniamurin untsukar tiarmiayi “Ju aentsun wait-
nentinaiajai. Warí, menaintiu tsawant Wijíají yurumtsuk yujainiatsuk.
Ayurtsuk ni jeen akupkachminiaitjai. Jintia pimpiki wáitsartatui.”

33 Ni unuiniamurí tiarmiayi “Túrasha, Uunta, ¿shuar atsaasha tuyan
yurumak imiá sumaktají ju aents ayurawartincha?”

34 Jesus aniasarmiayi “¿Urutma tanta takakrum?”

Tutai niisha “Siati (7) tanta nuyá ishichik namak takakji” tiarmiayi.

35 Nuyá aents nuñká pujusarti tusa akupkamiayi. 36 Tura siati tan-
tan achik namaknasha achik nuyá Yúsan yumíñsamiayi. Tura puur
aents ayuratarum tusa ni unuiniamurin susamiayi. 37 Ashí yurumáwar
jémararmiayi. Tura puunaru siati chankin tiáirmiayi. 38 Tura nuí yu-
rumáwaruka nuwásha uchisha nekapmatsuk aya áishmankak kuaru mir
(4000) ármiayi. 39 Nuyá Jesus áentsun akupak kanunam enkemar Maktara
nuñkanam wémiayi.

16

Pariséusha Satuséusha iniakmamurin Jesusan seawarmiania nu
(Márkus 8.11-13; Rúkas 12.54-56)

1 Pariséusha tura Satuséusha Jesusan nekapsatai tusar tariarmiayi.
Túrawar “Ame Yúsaiyáitkiumka kakarmarmijíají nayaimpinnmaya iniak-
masta, iisha wáinkiatái,” tiarmiayi.

2 Tutai Jesus tímiayi “Átumka “Kapaaku péetar kintiamkui kashin esatrur-
tatui” tniuitrume. 3 Túrasha “Te ajas kapaaku péetar tsawaakui yumi
yajauch átatui” tniuitrume. Tura nekasaiti. Maa, átumka nayaim ísrum
ju nuñkanam túrunattana nu nékarme. Antsu Yus yamáí jú nuñkanam
tura nuka nékatrume. Ántraitrume. 4 Aents yajauch ásar tura Yusan
enentáimtachu ásar kakarmajají iniakmamun wakeruiniawai. Túrasha
áyatik Junas túrunamia nuke iniakmastiniaiti” tímiayi. Tinia ikiuak
wémiayi.

Pariséusha Satuséusha jintintiaiania nu aneartiniaiti
(Márkus 8.14-21)

5 Tura entsá amaini katinkiar ni unuiniamurí tantan júkitniun kajin-
matkiarmiayi. 6 Nuyá Jesus tímiayi “Wáinkiatarum, Pariséusha Satuséusha
wakaprutai takakainia nújajisha aneartarum.”

⁷ Tutai ni unuiniamurj tiarmiayi “Ii tanta itiachakrin tátsuk.”

⁸ Jesus nuna antuk tímiayi “¿Urukamtai tanta itiachji tunaiyarum. Yusa kakarmari kajinmatkintrumek. ⁹ Senku tantajai túramiaj nu kajinmatkintrumek. Senku mir (5000) áishmankan ayuramtai untsurj chanjin tíarmia nu enentáimtsurmek. ¹⁰ Tura siati tantajai kuaru mir (4000) áishmankan ayuramtai nuna ishichik chanjin tíarmia nu kajinmatkintrumek. ¹¹ Itiurak imiá nékatsrum? Wi Pariséu wakaprutairisha Satúséu wakaprutairisha aneartarum tákun penké tantan tátsujai” tímiayi. ¹² Nuna Jesus takui ni unuiniamurisha nekaawarmiayi. Penké tantaa wakaprutairin tíchamiayi antsu Pariséusha Satuséusha unuiniatairin tímiayi.

Pítiur Jesusan Yus anaikiamun paant ujakmiania nu
(Márkus 8.27-30; Rúkas 9.18-21)

¹³ Tura Sesaria-jiripiunam jeawar Jesus ni unuiniamurj aniasarmiayi “Aents Ajasuitjiana juna ¿yaiti turutainiawa Winia?”

¹⁴ Niisha ayak tiarmiayi “Chíkich, imiakratin Juánkaiti turamainiawai. Chíkichka, Eriásaiti turamainiawai. Chikichcha Jeremiasaiti, chikichcha chíkich aents Yúsnan etserniuiti turamainiawai” tiarmiayi.

¹⁵ Tutai nincha aniiniak “¿Atumsha yaiti túrutrum?” tímiayi.

¹⁶ Semuñ Pítrusha “Ámetme Kristu, Yus Anaikiamu. Nekas iwiaaku Yusa Uchirínme” tímiayi.

¹⁷ Tutai Jesus tímiayi “Shiiraitme Junasa uchirj Semunka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame. ¹⁸ Tura Wisha tájame, ame Pítruitme, kayach tútaim. Nu kayanam jea jeamtinia áintsan Yus-shuaran ekenin tsakatmartatjai. Túramtai jákatniusha tura Yusa nemasrisha nu jeamman pukukchattawai. ¹⁹ Yus akupeamu yawincha amastatjai. Ju nunkanam jinjiatniusha atiatniusha amasmaiti. Tuma asamtai ame ju nunkanam suritiam nu nayaimpinmasha suritniaktatui. Tura ju nunkanam tsankateam nu nayaimpinmasha tsankatnaktatui” tímiayi. ²⁰ Nuna tinia Jesus ni unuiniamurj Krístuitiaj nu etserkairap tinia akupkarmiayi.

Jesus Nin máatniun etsertumakmiania nu
(Márkus 8.37–9.1; Rúkas 9.22-27)

²¹ Nuyá Jesus juna unuiniatan nankammiayi. “Wi Jerusarénum wétiniaitjai. Nuñ Israer-shuara úuntrisha, Israer-patri úuntrisha, Israer-shuara jintinniurisha ti wáitkiarsartatui. Nuyá mantuawartatui túrasha menaintiú tsawantaj nantaktiatjai.”

²² Takui Pítiur arantach jukí chicharuk tímiayi “Uunta, nuka penké áchatniuiti. Áminkia túrutmcharminiaiti.”

²³ Jesus ayanmatar Pítrun tímiayi “Werumta, Satanása. Yajauch awajtame. Ámeka Yus wakeramu enentáimtsume. Antsu jú nunkanam enentáimainia áinis enentáimme.”

²⁴ Nuyá Jesus ashí ni unuiniamurj tímiayi “Shuar Winia nemartustaj tusa wakerakka ni wakeramurj iniais ni krusj yanaki Winia nemartusti. ²⁵ Shuar áyatik penker pujustaj tákunka nu shuar uwemtsuk jakattawai. Antsu jákatniuitkuisha penker pujustinian enentáimtsuna nú shuar nekas iwiaakman wainkiattawai. ²⁶ Wats, shuar ashí jú nunkanam írunga nuna sumakka tura nujaj ni wakanj emeseak ¿itiurak penker pujustin? Shuar wakanj emesramu ¿ashí jú nunkanam írunga nujaj

iwiaramniakait? ²⁷ Wi Aents Ajasu asan, winia Aparu kakarmarjijai tura ni suntarjijai tana ashí shuáran ni takasmajai métek akiktatjai. ²⁸ Paant tájarme, shuar juí wajainia ju játsuk Wi akupin ajasmatai wáitkiartatui” tímiayi.

17

Jesus nushá iira ajasmiania nu

(Márkus 9.2-13; Rúkas 9.28-36)

¹ Nuyá sais (6) tsawant nankaamasar Pítruncha, Jakupuncha, tura ni yachí Juannasha níniak júkiar Jesus náinnium yakí wakamiayi. ² Nuí Jesus nusháa iira ajattsarmiayi. Ni yapisha etsaya áinis wincha ajasmiai. Ni pushirisha ti puju jiitsumir ajasmiai. ³ Nuisha Muisaisnasha Eríasnasha Jesusjai chichainian wáinkarmiayi. ⁴ Nuyá Pítiur Jesusan tímiayi “Uunta, ti shiir pujaji juí. Wakerakminkia menaint áakmaktai, Áminiu chikichik tura chíkich Muisaisnasha, tura chikichcha Eríasna.” ⁵ Tura Pítiur tu auju wájai yuran kim ti puju amuamiayi. Tura nu yuran minmaya chichaman antukarmiayi. “Ju ka winia aneamu Uchiruiti, tímiayi. Nin ti shiir enentáimtjai. Nii péñker anturkatarum” tímiayi. Tu chichasmiai Yus. ⁶ Nuna ni unuiniamurí antukar ti ashamkar pákea ajakiarmiayi. ⁷ Túrunawarmatai Jesus táriar antiñ “Ashamkairap, nantaktiarum” tiarmiayi. ⁸ Tura pañkainiar íimij tukamá aya Jesusan wáinkarmiayi.

⁹ Nuyá náinniumia akainiak Jesus tiarmiayi “Átum ísurmena nu penké etserkairap. Wi Aents Ajasu asan jakamunmaya nantaatsain etserkairap’ tímiayi.

¹⁰ Nuyá ni unuiniamurí Jesusan aniiniak “¿Urukamtai in jintintramin “Kristu táatsain Erías emka tátiniati” tuinia?” tiarmiayi.

¹¹ Tuíniakui Jesus áikmiayi “Nekas Erías tátiniati. Tura nii mash iwiarat-tawai. ¹² Kame nekas Erías táwiti tura nin nekaacharmai. Antsu aents wakeriarmia nuna túrawar yajauch awajsarmiayi. Núnisan Winiasha, Aents Ajasu ain, wáitkiarsartatui.” ¹³ Nuna takui ni unuiniamurí imi-akratin Juáñkan áujmatui, tu enentáimprarmiayi.

Jesus iwianchin jiki akupkamiania nu

(Márkus 9.14-29; Rúkas 9.37-43)

¹⁴ Ataksha aents matsatmanum jeawarmatai shuar Jesusan tarí tikishmatramiai. ¹⁵ Tura tímiayi “Uuntá, winia uchir waitnentrutrata. Wainchi tukum ti wáitniuiti. Jiniumsha patamniuiti. Entsasha iniainaiti. ¹⁶ Ame unuiniamurmíncha itiarjiai túrasha tujinkiarai.”

¹⁷ Takui Jesus ashí tímiayi “Maa, Yus penké enentáimtichuitrume. Imiá úmichuitrume. ¿Wi atumin katsuntu ajatniukaitjarum? Wats, uchi itiaritiarum’ tímiayi. ¹⁸ Itiarim Jesus yajauch wakanin jiki akupkamiayi uchi ayashíniá. Túramtai nu chichamaik péñker ajasmiai.

¹⁹ Nuyá urum ni unuiniamurí Jesusjai nin ki pujusar áujmatainiak “¿Urukamtai yajauch wakan jiktin iikia tujinkiamaj?” tiarmiayi.

²⁰ Tuíniakui Jesus tiarmiayi “Yus nekas enentáimtachu asarum tujinkiar me. Túmaitiat nekasaiti mustasa jin kiáí timiá uchichitiat ti uunt tsakaatsuk. Núnisan Yus ishichkisha enentáimtakrumka nu naint ékemkata tutai nu naint túrunattawai. Penké tujinkiashtatrumka Yus nekas enentáimtakrumka. ²¹ Kame nu yajauch wakan jiki akupkatniuka ijiamam Yus áujsatniuiti.”

Ataksha Jesus ni játniun ujakmiania nu

(Márkus 9.30-32; Rúkas 9.43-45)

²² Jesus ni unuiniamurijjiaí Kariréa nunkanam wekas juna ujakarmi-ayi. “Wi Aents Ajasu asan, aentsnum surunkattajai tura mantamnat-tajai. ²³ Túrutawarmatai menaintiú tsawantaj nantaktiatjajai.” Tura ni unuiniamurj nuna antukar ti kúntuts enentáimprarmiayi.

Jesus ankantaitiat akiktinia nuna akikmakmiania nu

²⁴ Jesus ni unuiniamurijjiaí Kapernáum péprunam jeawarmiyai. Tura kuítian achin Pítrun tariar aniasarmiyai “¿Atumi uuntri Israer-patrin akiktinia nuna akínkiait?”

²⁵ Tutai Pítiur “Ee” tímiayi.

Tura Pítiur jeá wayá chichaatsain Jesus emka tímiayi “Chíkich nunkanmaya akupin ¿yana kuítrijjain takainia. Ni shuáriniunkek atantainia. Antsu yajaya shuárnan atantainiatsuk. Nekaschak, Semunká?”

²⁶ Tutai Pítiur “Nekas yajaya shuárnan atantainiawai” tímiayi.

Jesus tímiayi “Nuikia ni shuarj ankant ániawai. Iisha núnisrik nu akiktin ankantaitji. ²⁷ Túrasha itiurchat enentáimpraraín tusar akiktai. Ame tsau jukim entsá wetá. Túram emka namak japikim iwiankam nuí kuit wáinkiatame. Nu jukim Wíniasha áminiusha akikmakta.”

18

“¿Ya imiá nankaamantuit?” tunaiyarmiania nu

(Márkus 9.33-37; Rúkas 9.46-48)

¹ Nu tsawantaj ni unuiniamurj tariar Jesusan aniasarmiyai “Yus akupeamunam pachiinia nu ¿ya imiá nankaamantu áminiait?”

² Nuna tuíniakui Jesus uchin untsuk ajapen awajtusar ³ tímiayi “Tí nekasán tájarme, atumí enentáimtaijri yapajjarum uchia áinis ajachkurmeka Yus akupeamunam pachiinkiachminiaitrumé. ⁴ Nu asamtai ju uchia áinis pééjchach enentáimtumana nuka Yus akupeana nuí nekas nankaamantu ajasminiaiti. ⁵ Nú arantcha Winia anentuk uchin itiaana nú shuar Winiasha itiaareawai’ tímiayi.

Tsuumainti yajauch túrumtikiatin

(Márkus 9.42-48; Rúkas 17.1-2)

⁶ ‘Shuar ju uchin Winia umirtana nuna tunaanum ajuarmatainikia nuna túratsain niisha kuntujén kayajajai jinpiar nayaantsanam ajapen kunanam ajunmaitkiunka maak ainti, tímiayi. ⁷ Ju nunkanam tunáa iniaata írunuk tuke itiurchataiti. Antsu shuar chikichan tunaanum ajuarka ti iturchatan inkiuntatui’ tímiayi.

⁸ ‘Nu asamtai ame ujewem tura nawem tunaanum ajunmatniuitki- iuinikia tsupikiam ajapata. Kame muntuch pujustin tura ukunam nayaimpiniam wétin péñkeraiti. Antsu kajinkiashtin jinium takam- suk jeatniuka imiá yajauchiiti. ⁹ Núnisan ame jimi tunaanum ajun- matniuitkiuinikia ukuinkiam ajapata. Kame chikichik jijjiaí pujusam nayaimpiniam wétin péñkeraiti. Antsu jinium mai jintiuk wétin imiá yajauchiiti’ tímiayi.

Murik menkaaka áujmatsamu

(Rúkas 15.3-7)

10 ‘Uchi ainia nu nakitraitrap. Yusa suntari nin wáinkiatniua nu winia Aparuj tjiuch pujuiniawai. 11 Kame wi Aents Ajasu asan, menkaakarun eaktajtsan táwitjai.’

12 ‘Enentáimpratarum. Shuar sian (100) murikiun takakuiat chikichik menkakamtai untsurí menkakacharun náinnium matsaak, menkakan eaushtatuak. 13 Wáinkiasha untsurí menkakacharua nujai nankaamas waraschattawak. 14 Núnisan atumi Aparí nayaimpiniam pujana nu, nu uchi chikichiksha menkakacharti tawai’ tímiayi.

Yus-shuarti tsankurnairatin
(Rúkas 17.3)

15 ‘Chikich Yus-shuar ámin yajauch túrutmakuinkia nii werim áujtsata. Tura ámechik werim ame yatsumjai chichasta. Anturtamkuinkia ame yátsum yáinkiume. 16 Tura anturtamchakuinkia nuyá chikichik shuar jimiará shuarsha jukim ataksha weritia. Túram ataksha áujnaisatarum, niisha paant nekaawarat tusam. 17 Túrasa yatsum tuke ántachkuinkia Yus-shuar iruntainiam iwiainiakta. Túrasa yatsum tuke ántachkuinkia Yus-shuar núnisan enentáimtusta nu shuar.’

18 ‘Nekasan tájarme, ju nunkanam suritiam nu nayaimpinmasha suritniaktatui. Tura ju nunkanam tsankateam nu nayaimpinmasha tsankatnaktatui.’

19 ‘Núnisak tájarme, ju nunkanam pujusrum jimiará Yus-shuartiram métek enentáimprarum winia Apar nayaimpiniam pujana nu seakrumninkia wakerarmena nuna suramsattarme. 20 Jímiar menaintiusha Yus-shuar Winia enentáimturuk iruntrarmatai Wisha nu níijai pujajai’ tímiayi Jesus.

21 Takui Pítur werí Jesusan aniasmiayi “Uuntá, winia yatsur yajauch awajtakui zurutma tsankuratniuitiaj. Siátikik tsankuratniuitiaj?”

22 Jesus aiyak “Siátik tátsujme, antsu iniannatsuk tsankuratniuitme” tímiayi.

Takakmau tsankurachun pachis áujmatsamiania nu

23 Tuma asa Jesus Yus akupeamunam pachiinkiaru tsankurnairartiniaiti tusa ju métek-taku chichaman áujmatuk tímiayi, “Uunt akupin takarín tumashin akirkarat tusa untsukarmai. 24 Yama nánkamuk tí nukap tumashmakua nuna untsukmai. Akikmakchamnia ti tumashmakuyi. 25 Tura nu takakmau kuitri atsakui uunt akupin “Yajasma áitkiasrum nuartiuk uchirtiuk ashí waririntiuk suruktaram, timiai. Nu kuitjai akirkati” timiai.

26 Tutai nu takakmau uunt akupniun tikishmatar seak timiai “Uunta, waitneasam nákarsatá. Auka, mash akiktatjame.” 27 Uunt akupin waitnentar mash tsankur ankant akupkamai. 28 Tura nú chichamaik nú takakmau jiinki ni ajn inkiunmai. Nú ajsha nin ishichik tumashiiyi. Tura tsékenki suwenam achik chicharuk timiai “Wari akirkata tumashitmena nu.”

29 Tura ni aj nin tikishmatar timiai “Waitneasam nákarsatá. Auka, mash akiktatjame” timiai. 30 Túrasa nakitramai. Antsu tsankurtsuk sepunam enkeamai ashí akirkati tusa. 31 Chikich takakmau nuna wáinkiar ti kúntuts enentáimtuiniak uunt akupniun ashí etsertukarmai. 32 Nuna antuk uunt akupin untsuk itia timiai “Yajauchiitme. ¿Winia “waitnentrurta” túrutkumin tsankurachmakjam? 33 Amesha núnismek

ame ajm tsankuratniuitme” timiai. ³⁴ Tinia uunt akupin kajekmai. Tura ashí tumashin akikmatsuk asutniati tusa suntarnum surukmai.” ³⁵ Jesus nuna áujmatas amúak timiayi “Núnisan winia Apar nayaimpiniam pujana nu atumin túrutmattarme atumi yachj nekas enentájjai tsankureachkurminkia.”

19

Jesus nuwá ajapatniun áujmatsamiania nu
(Márkus 10.1-12; Rúkas 16.18)

¹ Jesus nuna tinia ikuak Kariréa nunkanmayá wémiayi. Tura Jurtan entsa amain Jutía nunkanam jeamiayi. ² Untsurí aents nemariarmiayi tura jáiniancha péñker awajsamiayi.

³ Nuñ Pariséu Jesusan nekapsataj tusar aniasarmiayi “¿Shuar ni nuwen itiurchat akui ajapamniakait?”

⁴ Tutai Jesus timiayi “¿Átumka Yus-Papí áujsachukaitrum? Yámankamtaik Yuska shuáran áishman kan nuwancha najanamiayi tawai. ⁵ Tuma asamtai áishman ni aparín ni nukurín ikiuki ni nuwejai tsaniñ chikichik ayash tinia áinis ajasartatui, tu áarmaiti, timiayi. ⁶ Tuma asa jímiarcha antsu chikichik ayash áiniawai. Tuma asamtai shuar Yus apatkamia nuna, aents akankashtiniaiti’ timiayi.

⁷ Takui tiarmiayi “Nuikia ¿urukamtai papí áarar nuwá ajapatniun Muisais tsankatkamia?”

⁸ Tutai Jesus tiarmiayi “Timiá ántichu asakrumin nuwá ajapatniun tsankatkamiayi. Túrasha émkaka núnischauryayi. ⁹ Wi tájarme, shuar ni nuwen chikichjaj pujuschan ajapeakka tura chikichan nuatkunka tsanirmayi. Chikich áishman sha nuwá ajapamun nuátkanka nusha tsanirmayi” timiayi.

¹⁰ Takui ni unuiniamurj tiarmiayi “Nuikia áishman ni nuwé penké ikiukchamniaitkiuñkia nuátkachminiaiti.”

¹¹ Jesus tiarmiayi “Nu chichamnaka mash antukchamin áiniawai. Antsu Yus nuna umiktin susamua nuke antukmin áiniawai. ¹² Chikich chikich nuatkachmin áiniawai. Chikich nuátkachmin akiiniawaru áiniawai. Chikichcha aentsjaj nuátkachmin najanaru áiniawai. Chikichcha nuátainiatsui Yus akupeamu takatan takastinian. Juna antuktinian jeáka antukti.”

Jesus uchin shiir awajsamiania nu
(Márkus 10.13-16; Rúkas 18.15-17)

¹³ Nuyá Jesusan uchin itiararmiayi. Nin antin Yúsan áujtusarar tusar wakermiayi. Túruiniakui ni unuiniamurj chicharkarmiayi.

¹⁴ Túruiniakui Jesus timiayi “Uchi Winí winitin tsankatkatarum. Suritki-airap. Kame ju uchía áintsan péejchach áinian nunak Yus akupkamniaiti.”

¹⁵ Tinia uchin miniakas nuyá wémiayi.

Kuútrintin Jesusjaj chichasmiania nu
(Márkus 10.17-31; Rúkas 18.18-30)

¹⁶ Shuar natsa Jesusan tarin aniasmiayi “Uuntá, péñkeraitme. Tuma asam turuttia ¿warinia túrakna tuke iwiaaku átataj? timiayi.

¹⁷ Tutai Jesus nin enentáimtikrataj tusa timiayi “¿Urukamtai péñkeraitme túrutam. Shuar péñkerka atsatsuk. Aya Yúskechukait? Wats, tuke iwiaaku pujustaj tákumka akupkamu umirkartá.”

¹⁸ Tutai shuar “¿Tuna nekas umirkatniuitiaj? timiayi.

Takui Jesus tímiayi “Maṅkartuawaip, tsanirmawaip, kasámkáip, chíkich shuar tsanumpruraip, ¹⁹ ame apa nukusha umírkatá, ame shuárum ame ayáshim aneamna nútiksamek aneeta.”

²⁰ Tutai natsa tímiayi “Núnaka úchichik mash umiki tsakaruitjai. Nuyasha ¿warí táatrusa?” tímiayi.

²¹ Takui Jesus tímiayi “Nekas péṅker átaj tákumka, weme ame kuítrum kuítrincha ainia nu sústartá. Tura nayaimpiniam kuítrintin ajastatme. Nuyá Winia nemártústá” tímiayi Jesus. ²² Tura natsa nuna antuk kúntuts wémiayi ti kuítrintin asa.

²³ Nuyá Jesus ni unuiniamurin tiarmiayi “Nekasan tájarme, kuítrintin Yus akupeamunam pachiinkiatin ti itirchataiti. ²⁴ Ataksha tájarme, kamiriuka kawái naṅkaamas uunt asa auja jin wayachminiati. Núnisan kuítrintin Yus akupeamunam pachiinkiatin ti itirchataiti.”

²⁵ Ni unuiniamurí nuna antukar antúu ajarmiayi. Túrawar anini-ainiarmiayi “¿Nuikia yaki uwempramniati?”

²⁶ Tuíniakui Jesus ashí íisar tímiayi “Aents uwempratniun nekas tujinti-ainiawai antsu Yuska ashí tujintiatsui.”

²⁷ Nuyá Pítiur tímiayi “Uuntá, iikia ashí ikiukchajik Ámin nemarsatai tusa. ¿Warin wáinkiatitai iisha?”

²⁸ Jesus tímiayi “Nekasan tájame, ukunmaṅka ju nunka yamaram ajastatui. Aents Ajasu asan, Wisha nu, uunt akupin ajastatjai tura atumsha winia nemartusutirmeka Wijiái métek akupin ajastatume ashí Israer-shuar akupkatin. ²⁹ Tura shuar ni jeencha, yachincha, umaincha, aparincha, nukuríncha, nuaríncha, uchiríncha, tura nunkencha Winia anentu asa ikiukin wekaakka, nu shuar nii ikiukmia núnisan yamaisha ti untsurí wáinkiatitawai tura ukunmasha tuke shiir pujustatui Yusjai. ³⁰ Untsurí yamáí penkerí áiniana nu ukunam ukunmaani pujusartatui, tura yapajíawar yamáí ukunmayá áiniana nu ukunam emka pujusartatui’ tímiayi Jesus.

20

Jesus takarniun pachis áujmatsamiania nu

¹ Yus akupeamunam pachiinkiatin júnisaiti. Nunka nérentin ni araamurin júuktaj tusa káshik iniartaj tusa jínkimiyai. ² Chikichik tenariu kuit jean tsawant takamtsuk akiktajrume tusa chichas ni araamun júuktiniam akupkarmiyai. ³ Nantu takuntajsha ataksha jínki shuar yujan wáiniak ⁴ timiai “Atumsha winia arakur júuktin yáintkiatarum. Shiir akiktajrume.” Tutai wearmai. ⁵ Ataksha tutupin aj nuyá áaṅkúsha jínki, núnisan tinia akupkarmai. ⁶ Ataksha nantu patamsaj jínkimiai. Tura shuaran yujan wáiniak “¿Urukamtai takakmatskesha áani pujarum?” timiai.’

⁷ “Warí, iincha iniatmainiatsji” tiarmai.’

“Tuíniakui timiai “Atumsha winia nunkaruj takautarum. Péṅker akiktajrume.”

⁸ Kirit ajátekiái takatrin wáinniun timiai “Takatan takasaru untsukam akikiarta. Kíaraj naṅkamawaru emka akikiarta. Túram káshik naṅkamawarujai amuktá” timiai. ⁹ Takui nantu patamsa aj naṅkamawaru wayawarmatai chikichik tenariu kuit jean ashí akikiarmai. ¹⁰ Mash umintramtai nuyá emka naṅkamawaru wayawar “nuna naṅkaamas achikchatjiash” tu enentáimsarmai. Tura chíkichik

tenariu kuit jean achikiarmai. ¹¹ Achikiar nérenniun itiurchat enentáimturarmai. ¹² Tura tiarmai “Iikia ashí tsawant nantujai wáitsachjik. Ju shuarsha nantu patamsa ai nankamawaruka penké ishichik takasari. Túrasha iijjai métek akikiarume” tiarmai.

¹³ Tutai nérentin chikichiniak iniakmas timiai “Umpá, penké kasartsujme. Káshik chikichík tenariu kuit jeá chichasar iijjai iwiarachjik, timiai. ¹⁴ Pai, ame kuítrum achikiume. Nantu patamsai takasuncha amijjai métek akiktinian wakerajai. ¹⁵ Warí, winia kuítrujai wi wakaramun túrachminkaitaj. Antsu wi tsanka asantai ¿yajauch enentáimturmek?” timiai.’

¹⁶ “Núnisaiti Yus-shuarnum. Émkaru áinia nu uku ártatui. Tura ukuya áiniana nu, emka ártatui. Untsurí ipiaamu áiniawai tura ishichik achikma áiniawai.” Tu áujmatsamiayi Jesus.

Jesus ataksha ni jákatniurin etserkamiania nu

(Márkus 10.32-34; Rúkas 18.31-34)

¹⁷ Jesus Jerusarénnum jintiá wesa ni unuiniamurin akankin tiarmiayi ¹⁸ “Iistarum, Jerusarénnum wéaji. Nuisha Israer-patri úntrin tura ni jintinniurincha Winia surutkartatui. Nuisha, wi Aents Ajasu an, “mantamnati” túrutartatui. ¹⁹ Tura apachnium surutkartatui. Nui katsekrukar, awattiar krúsnum máawarti tusar túrutawartatui. Túrasha jakayatan menaintiú tsawantaj nantaktiatjai” tímiayi.

Jakupu tura Juanka nukuri Jesusan seamiayi

(Márkus 10.35-45)

²⁰ Nuyá Jakupusha Juansha, mai Sepetéu uchiri, nukurijjai tariar Jesusan tikishmatrarmiayi. Tura nukuri Jesusan waitnentrurarat tusa seamiayi. ²¹ “¿Warí wakeram?” tímiayi Jesus.

Tutai nuwa tímiayi “Ame uunt akupin ajastatmena nui winia uchir chikichik untsurnumaani chikichcha menaanmaani akupkarti tusam apujsarta.”

²² Takui Jesus tiarmiayi “Atum seatrumna nu nékatsrume. ¿Wi wáitsattajna nujai métek túramniakaitrum? Wi wáitsatniun yapá umartinia áinis umartiniaitjai. Núnisan wáitsatniujai imiaitniua áintsan imiantiniaitjai. ¿Nú pininnumiá umarminkiaitrum. Núnisan imianminkiaitrum?”

Tutai “Páchitskea” tiarmiayi.

²³ Tuíniakui Jesus tímiayi “Ayu. Winia pininkruija umartatrome. Wi imiantiatjana nujai imiantiatrome. Antsu Wijjai tsaninka pujustinniaka Wikia íschatniuitjai, antsu winia Apar iwiarturu áinia nuna nui apujsattawai” tímiayi.

²⁴ Chíkich tias (10) unuiniamuri nuna antukar nu jímieran kajerarmiayi. ²⁵ Túmainiakui Jesus untsukar tiarmiayi “Ju nékarme, apachniumka kapitían ajasar ni shuarin nérenniua áinis ti akupenawai. Ni úntrisha waantu enentáimsar “wítjai akupniun” tu enentáimtikiaiawai. ²⁶ Antsu atumjainka núnis áchatniuiti. Nankaamaku ajastaj tákuka chikicha yaintri átiniaiti. ²⁷ Ame kapitíantrum ajastaj tákuka ashí shuara yaintri ajástí. ²⁸ Wisha Aents Ajasuitiatan, Winia yáintkiarat tusan táchaitjai antsu shuáran yáintaj tusan táwitjai. Untsurí shuaran tunáa tumashrin akikmatkataj tusan jákatniuitjai. Nuna tarimjai” tímiayi Jesus.

Jímiar jii kusurun Jesus tsuármiania nu

(Márkus 10.46-52; Rúkas 18.35-43)

²⁹ Jirikiú péprunmaya wénakui untsurí aents Nin nemariarmiayi. ³⁰ Nuí jintiá yantam jímiar jii kusuru pujuarmiayi. Jesus wéawai taman antukar kakantar untsukarmiayi. “Uuntá, uunt akupin Tawitia Uchirinçhukaitiam. Waitnentrurta” tiarmiayi.

³¹ Tuíniakui “Takamatsatarum” tiarmiayi.

Tútaisha nú nankaamas untsumkarmiayi. “Uuntá, Tawitia Uchiriá, waitnentrurta” tiarmiayi.

³² Tuíniakui Jesus wajas jii kusurun untsukar aniasarmiayi “¿Warí itiurtukat tusarum wakerutarum?”

³³ “Uuntá, iimtai tusar wakeraji” tiarmiayi. ³⁴ Tuíniakui Jesus nin waitnentrar ni jiiin antinçhiarmiayi. Nu chichamaik íimiar niisha Jesusan nemariarmiayi.

21

Jesus Jerusaréñnum wayamiania nu

(Márkus 11.1-11; Rúkas 19.28-40; Juan 12.12-19)

¹ Jerusaréñnum nuntumsar Petpajái péprunam jeawarmiayi. Nusha Uriwiu náinnium ayamçhiyayi. Nuí jeawar Jesus ni unuiniamurin jímiar an akupeak tímiayi ² “Tijjuch péprunam wérum umpuuru umpuuruçhijjai jinçhiamu wáinkiatarme. Nu atiarum itartitiarum. ³ Tura aents “Urukamtai áitkiarum” túramkurminkia “Uunt wakerawai, tura wárik awainçhittiwai” titiarum” tímiayi.

⁴ Tura nusha yaunchu Yúsnan etserin aarmia nu umínkiatí tusa tímiayi. Júnis áarmiayi:

⁵ “Ashí Israer-shuarnum ju etserkatarum:

“Istarum, atumi Akupniurí, péjchach ajas umpuuruçhiniam ekeemak winitramprume. Péjchach asa káarak áintstai umpuuru uchirin ekeemak winitrámtrume,” titiarum.” Tu áarmaiti.

⁶ Tutai nu jímiar unuiniamurí wear Jesus timia núnisañ túrawarmiayi.

⁷ Umpuuruçhin nukurtiuk itiararmiayi. Tura ni pushirin áitkiaram Jesus entsamkamiayi. ⁸ Shuar untsurí ásar ni wéamunam pushirin áitkiarmiayi. Chikichcha nuká jurukar ni wéamunam áeprurarmiayi. ⁹ Shuar untsurí eem wearmia nusha tura uku winiarmia nusha kakantar untsumiarmiayi. “Juna weatři uunt akupin Tawit asamtai nankaamakuiti. Yusa náarijn winiana ju ii Uuntrinti. Shiir atí. Nayaimpinmasha Yus shiir awajsatai.” Tu untsumiarmiayi.

¹⁰ Jesus Jerusaréñnum wayamtai ashí shuar ti enentáimainiak “¿Jusha yait?” tiarmiayi. ¹¹ Chikichcha “Yúsnan etserin Jesusaiti, tiarmiayi. Nasarét pepru Kariréa nunçhkanmayaiti” tiarmiayi.

Yusa Uunt Jeen suruktinian Jesus surimkiamiania nu

(Márkus 11.15-19; Rúkas 19.45-48; Juan 2.13-22)

¹² Nuyá Jesus Yusa Uunt Jeen wayá kuítian súruiniak tura súmainiak pujan akuprámiayi. Kuítian yapajinia misarinchha ayanturmiayi tura yampitsa súruinia kutançhriñcha núnisañ ayanturmiayi. ¹³ Nuyá tímiayi “Yus-Papinium áarchamukait,

“Yusa Jeenka Yus aujtai jéaiti.” Antsu átumka kasa matsamtaiya nútikiarme” tímiayi.

¹⁴ Nuí Yusa Jeen jii kusurarusha shutuapsha Jesusan tariarmiayi. Túramtai tsuáramiayi. ¹⁵ Tura Israer-shuar pátrisha tura Israer-shuara jintinniurisha aents tujintiamun Jesus túrakui íisar kajerarmiayi. Nu

arantcha uchi Yusa Jēen “Juna weatri uunt akupin Tawit asamtai nan̄kaamakuiti” untsumainiakui Jesusan ti kajerkarmiayi. ¹⁶ Tura tiarmiayi “¿Jū uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papí juna tana juka áujsachukaitrum. Júnis tawai, “Uchisha kuírchisha Yusa náarin imiá shiir awajtusarat tusa Yus tsan̄katkaiti.” Tu áarmaiti.

¹⁷ Nuna tinia ikiuiniak Jerusarēnumiā jiinki Petania péprunam we nui kanarmiayi.

Jesus iikiu numin yuminkramiayi

(Márkus 11.12-14, 20-26)

¹⁸ Kashin tsawaar Jerusarēnum waketas Jesus tsukaarmiayi. ¹⁹ Iikiu numi jintiá yantam wajan wáiniak akaktajtsa werimiayi. Tura werí aya númuniak wáinkiamiayi. Túra numin tímiayi “Atakka nerechattame.” Takui nu chichamaik káarmiayi.

²⁰ Nuna wáiniak ni unuiniamurí ti enentáimprar aniasarmiayi “¿Urukaku imiá wárik jaka?”

²¹ Tuíniakui Jesus tiarmiayi “Nekasan tájarme, Yus nekas enentáimtakrumka, “nekaspash túrat” táchakrum iikiun túrajna nusha túramniaitrum. Tura nu arantcha nu naint “Ékemtam nayaantsanam iniañta” tutai túrunattawai. ²² Ashí Yus áujeakum seamna nu, Yus nekas enentáimtakum seakmeka, wáinkíattame” tímiayi.

Yusa kakarmaríjiai Jesus takasmania nu

(Márkus 11.27-33; Rúkas 20.1-8)

²³ Yusa Uunt Jēen Jesus wayá unuiniamiayi. Turaj Israer-patri uuntrí tura Israer-shuara úuntrísha Jesusan tariar aniasarmiayi “¿Yana chichamejají jū túram. Ya jū túratniuncha akuptamkait?” tiarmiayi.

²⁴ Tutai Jesus tiarmiayi “Wisha aniaštaj tusan wakerajrume. Jū áirkakrumniñkia Wisha yana chichamejají túraj nuna ujaktatjarme. ²⁵ Wats, ¿ya imiakratin Juankan akupkamia. Yusak, aentsuk, ya akupkamia?”

Tutai nuántak tunainiarmiayi. “Yus akupkamiayi” tákurniñkia “¿urukamtai enentáimtichuitrum?” túramtatji. ²⁶ Kame “shuar akupkaiti” tákurnisha ashí aents mantamattaji. Warí, ashí niisha Juan Yúsna etserniuyi tuíniatsuk” tiarmiayi. ²⁷ Nuyá Jesusan “Nékatsji” tiarmiayi.

Tutai Jesussha aíiniak “Wátsek, Wisha núnisnak akuptukua nuna ujakchattajrume” tímiayi.

Jimiará uchi tiarmia nuna áujmatsamiania nu

²⁸ Jesus unuiniak tiarmiayi “Enentáimpratarum. Shuar uchin jímiaran takakuuyi. Nuna chikichkin chicharuk timiai “Uchirú, arakur júuktin yamáí wetá.”

²⁹ ‘Tutai uchi “Atsá, nakitiajai” timiai. Tayat urum enentáimiar takuamai.’

³⁰ ‘Nuyá aparí chikichnasha werí núnisan timiai.’

‘Tutai uchi “Apawa, páchitsuk wetajai” timiai, túrasha wéchamai.’

³¹ ‘¿Túa ni aparí wakeramun umirkama?’ tímiayi Jesus.

Tutai “Emkaa nu” tiarmiayi.

Tuñiakui Jesus tímiayi “Nekasan tájarme, yajauch shuar ainia nu tura tsanirma ainia nusha átumka pachiintsrumniñ nii emka Yus akupeamunam pachiinkiartatui. ³² Iis, imiakratin Juan péñker wekasatniun etserkamiayi, túrasha antukchamarne. Antsu yajauch shuar ainia nu tura tsanirma ainia nu umirkarmiayi. Nusha wáinkiaiatrum atumi tunaarj enentáimturchamarne’ tímiayi.

Yajauch takaun áujmatsamiania nu
(*Márkus 12.1-12; Rúkas 20.9-19*)

³³ Ju chíkich áujmatmasha antuktarum. Nunká nérentin uwa ajan ajamai. Tura wenuimiai. Uwa neketaincha najanamai. Kumpin jeancha najanamai. Tura mash péñker iwiar shuar wáitrukarti tusa apujkimiai. Tura niñkia yajá nunkanam wemai. ³⁴ Tura júuktin tsawant jeamtai juuk nakak akúptúrkartí tusa chíkich takarniurj akupkamai. ³⁵ Tura nuj pujuinia nu, akupkamun achikiar chikichnaka katsumkar, chikich-nasha máawar, chikichnasha kayajaj tukurar máawarmai. ³⁶ Túrawarmatai nérentin takarniun nuna nankaamas akupramai. Ataksha nuj pujuarmia nu núnisan túrawarmai. ³⁷ Amúamunam ni uchirín akupeak “Winia uchir asamtai umirkachartimpiash” timiai. ³⁸ Túrasha nu takau nérenniu uchirín wáinkiar “Nuna aparj jakamtai juna mashi júkishtatuak, tiarmai. Maatai, túrar ii nérentin ajastai” tiarmai. ³⁹ Tiar achikiar arant júkiar nuj máawarmai.” ⁴⁰ Tinia Jesus aniasarmiayi “Nunká nérenniurj taa nu takaun ¿itiurkatin?” tímiayi.

⁴¹ Tutai tiarmiayi “Nu shuar ti yajauch ásarmatai waitnentsuk máawartatui. Tura nu ajan chíkich takaun neren akanak nin susannia nuna apujsattawai” tiarmiayi.

⁴² Tuñiakui Jesus tímiayi “Átumka Yus-Papikia ¿penkek áujchaitrum? Júnis áarmaiti:

“Jea jeamin utsan̄karmia nú kaya ashí kayajaj nankaamas apujsamuiti. Núnaka ii Uuntrj Yus túraiti. Iisha íisar ti enentáimtaji.” Tu áarmaiti.

⁴³ Tuma asamtai tájarme, Yusna írunna nu wáinkiatárum tusa suramsamuitiat atumíyã junas chíkich aents súnastatui. Niisha awantukiartatui.

⁴⁴ Tura shuar nu kayan tukumainia nuka kupintrartatui. Tura nu kaya shuarnum iniarka tsai tsai awajsattawai auka” tímiayi Jesus.

⁴⁵ Israer-patri uuntriŕsha Pariséusha Jesus áujmatman antukar “in túramji” tusar achiktaj tiarmiayi. ⁴⁶ Tura ashí aents “Jesus Yúsnan étserui” tuinia ásarmatai nin ashamkarmiayi.

22

Métek-taku chichamjai nuatnaiyamun Jesus áujmatsamiania nu

¹ Jesus ataksha áujmatuk juna tímiayi: ² “Yus akupeamunam pachiinkiartin júnis enentáimprammiaiti. Uunt akupin ni uchirj nuáteakui nampermamai. ³ Túrak ni takarniurj ipiaamautarum tusa akupkarmai. Tura ipiaamusha nakitrarmai. ⁴ Ataksha chíkich takarniuncha ipiaamakrum ju titiarum tusa akupkarmai. ““Mash yurumkan iwiarajai, tawai, titiarum, timiai. “Waakasha máatarum tusan akupkarjai, tawai. Ajaermancha máatarum tusan akupkajai, tawai. Ashí nuatnaiyamunam winiarti,” tawai” titiarum” timiai. ⁵ Támaitiat nú ipiaamusha nakitrarmai. Chikichik ni nunken wemai. Chikichcha kuítian suruktinian wemai. ⁶ Chikichcha ipiaakratniun achikiar yajauch awajsarmai, tura

chikichnaka máawarmai. ⁷Túramtai uunt akupin ti kajek, ni suntari mash máataru túrarum ni jee mash ekeemáktárum tusa akupkarmai. ⁸Nuyá ataksha ni takarniurin akupkamai. “Nuatnaikiatin jísat mash iwiaru-muiti, timiai. Tura nu ipiaamu winichmin armái. ⁹Tuma asamtai pepru jinti werum ashí shuar nánkamas wáintrum nu ipiaatarum” timiai. ¹⁰Takui takarniuri jínkiar pepru jintin wajainian, yajauch shuarnasha péñker shuarnasha, ashí ipiaawarmai. Túramtai jee piákmai.’

¹¹‘Nuyá uunt akupin ipiaamun íisartaj tusa wayamai. Nuñ shuaran péñker iwiamamprachun wáinkiamai. ¹²Tura timiai “Umpá, ¿urukamtai nuatnaiyamunam entsatai pushí entsatsuk wayam?” Tutai nu áishman tákamtak pujusmiayi. ¹³Nuyá uunt akupin yurumka ajaaman timiai “Achikrum nawenmasha uwejnusha jinñkiarum aa júnkrum kiritniunam ajapatarum. Nuñsha ti úutin ti wáitsatin átatui” timiai. ¹⁴Kame untsurí ipiaamu áiniawai antsu ishichik achikma áiniawai.”

Uunt akupin Sésar akiktinia nu
(Márkus 12.13-17; Rúkas 20.20-26)

¹⁵Nuyá Pariséu chichaman najatawar uyumtikiatai tusar tiarmiayi. ¹⁶Túrawar ni shuarincha tura akupin Erutisa nemarniurisha Jesusan akuptukarmiayi. Kame akupin Erutis uunt akupin Sésara kuitri wáinin asamtai nu apachniasha akupkarmiayi. Niisha jeariar Jesusan tiarmiayi “Uuntá, amesha nekas chicham chichaame. Nu nékaji. Chíkich shuar tuinia nu ántutsuk nekasam Yus-Chicham jintiame. Shuar shiir enentáimturarat tusam jintiatsme, tiarmiayi. ¹⁷Tuma asamtai ju nekaatai tusar wakeraji. ¿Uunt akupin Sésar akikminkiait?” tiarmiayi.

¹⁸Jesus ni yajauch enentáijjai aníam nekáa tiarmiayi “Aya shiir chichamtiniaitume. ¿Urukamtai uyumatkiarkatin wakerutarum? tímiayi. ¹⁹Wats, Sésar akiktinia nú kuit itiaritiarum.” Takui chikichik kuítian itiararmiayi. ²⁰Nuna iis Jesus aniasarmiayi “¿Juí yana yapimpiait tura yana naari áarmait?”

²¹Tutai “Uunt Sésarna” tiarmiayi.

Tuiniakui Jesus chicharuk tiarmiayi “Nuikia uunt Sésarna nu, Sésar susatarum. Tura Yusna nusha Yus susatarum” tímiayi. ²²Tura nuna antukar ti enentáimprarmiayi. Tura ikiuiniak wearmiayi.

Jesusan jakamunmaya nantaktinian aniasarmiania nu
(Márkus 12.18-27; Rúkas 20.27-40)

²³Nu tsawantajk Satuséusha Jesusan tariarmiayi. Satuséuka jakamunmaya nantakchatniuiti tuíniawai. Nuna tiniu ásar juna Jesusjai áujmatsarmiayi. ²⁴“Uuntá, Muisais juna áartampramiai, “áishman uchin yajutmatsuk jakamtainkia ni yachi nu nuwan nuatak ni yachin yajútmátrati,” tu áarmiayi, tiarmiayi. ²⁵Ayu, íi shuarnum siati (7) yáchintin árimiayi. Iwiairi nuatak uchin yajutmatsuk jakamiayi. Tura wajen ni yachin ikiurkimiayi. ²⁶Tura niisha nuatak uchin yajutmatsuk jakamiayi. Tura chikichcha núnisan jakamiayi. Tura chikichcha siati armia nu ashí nuatkar jákarmiayi. ²⁷Nuyá nuwasha jakamiayi. ²⁸Jakamunmaya nantakiar ¿yaki nekas ni aishri ati? Ashí nin nuatkacharmakia” tiarmiayi.

²⁹Tuiniakui Jesus tímiayi “Yus-Chichamsha nékachkuram tura Yusa kakarmarisha nékachkuram nantaktin atsawai tákuram ti awajiarne. ³⁰Nekaatarum. Jakamunmaya nantakiaruka nuatkachartatui. Antsu

Yusa suntarij nayaimpiniam pujuinia núnisar nuartichu pujusartatui.
³¹ Túrasha jakamunmayá nantakiartatna nu nekaatajtsa wakerakrumka
 ju enentáimsatarum. Muisais aarma nu áujsachukaitrum. Júnisañ áarmiayi:
³² “Wíitjai Apraáma Yúsrintjai, Isaka Yúsrintjai, Jakupu Yúsrintjai.” Tu
 áarmiayi.

Watsek, Yuska jaká Yúsrinchuiti. Antsu iwiaaku ana nuna Yúsrinti,
 tímiayi. Iis, nu shuar imiá yaunchu jákaruitiat Yusjai iwiaaku pujuiniak
 nantakmin áiniawai” tímiayi. ³³ Ashí aents nuna antukar nu jintintiam ti
 enentáimprarmiayi.

Yus akupkamu imiá enentáimtustinia nu
(Márkus 12.28-34)

³⁴ Satuséu Jesusan aiktinian tujinkiarmatai Pariséu nuna antukar
 irunrarmiayi. ³⁵ Tura chikichik Pariséu jintintin asa Jesusan
 uyuntikiataj tusa aniasmiayi ³⁶ “Uuntá, ¿túa Yus akupkamu imiá
 nankaamas enentáimtustiniait?”

³⁷ Tutai Jesus tímiayi “Júiti: “Ame Yúsrum ashí enentáimjai aneeta.
 Ashí ame wakanmijjaisha tura tuke enentáimtusam aneeta.” Tu áarmaiti,
 tímiayi. ³⁸ Núiti emka ashí akupkamu nankaamas enentáimtustinia nu.
³⁹ Chikichcha jujai métek-taku awai. Nusha tawai: “Ame írutramuram ame
 ayashim aneamna nútiksamek aneata.” ⁴⁰ Nu jímiar akupkamu umirkam
 ashí Muisais akupkamia nusha tura ashí Yúsnan etserin unuiniarmia
 nusha umirkattame” tímiayi.

Kristu Tawit weeaitiat Yusa Uchirinti
(Márkus 12.35-37; Rúkas 20.41-44)

⁴¹ Tura Pariséu tuke irunar pujuiniakui ⁴² Jesussha aniasarmiayi
 “Kristu tutai ¿ya weeá átiniait. Warí enentáimtarum atumsha?”

Takui “Tawit weeá átiniaiti” tiarmiayi.

⁴³ Tuíniakui Jesus tiarmiayi “Nuikia ¿urukamtai Tawit, Yusa Wakaní
 “titia” tutai, Krístun “winia Úuntur” tímia? Iis, Tawit juna tímiayi:

⁴⁴ “Uunt Yus winia Úuntrun juna tímiayi: “Akupin pujutainium, winia
 untsuruini, pujusam náarsata. Ashí ame nemasrumin nupetkan
 Ámin umirtamkarti tusan amastatjai” tímiayi Yus.” Tu tímiayi
 Tawit.

⁴⁵ Watsek, Tawit Krístun “winia Úuntur” tajsha ¿itiurak ni pampanmarí
 áti?” tímiayi Jesus. ⁴⁶ Nuna takui penkesha áikcharmiayi. Túrawar atakka
 uyumantikiatai tusar aniascharmiayi Jesusan.

23

Jesus Pariséuncha Israer-shuara jintiniurincha “yajauchitrume” timia-
nia nu

(Márkus 12.38-40; Rúkas 11.37-54; 20.45-47)

¹ Jesus ni unuiniamurincha tura ashí shuárnasha tiarmiayi ² “Israer-
 shuara jintinniurisha tura Pariséusha Muisais akupkamun paant uat-
 mainiawai. ³ Tuma asamtai tuinia nu umirkatarum. Túrasha ni
 túruinia nu jumamkiirap. Nu shuar shiir chichainiyat nusháa túrin
 áiniawai. ⁴ Ti itiurchat ana nuna akupeenak ti emeram entsaktinia
 áintsañ áentsun apujtuiniawai. Túrasha chikichik uwejejaisha ishichkisha
 takuitnion nakitiainiawai. ⁵ Aya shuar írsarti tusar ashí túruiniawai.

Ashí shuar péñker enentáimturarti tusar Yus-Papin nijiaíncha tura kurturíncha ti wan̄karam awajsar anujak yujainiawai. Tura nu arantcha pushiri sasariaman ashí shuarjají nan̄kaamas esaram awajas wekainiawai. ⁶ Nampernumsha péñker iwíaramunam pujustinian wakeruiniawai. Iruntainmasha nan̄kaamantu ajasa pujustinian wakeruiniawai. ⁷ Jintíá wekainiaksha ashí aents áujuiniak “Jintínkiartiniá” turutiarti tusa wakeruiniawai’ tímiayi.

⁸ ‘Túrasha átumka ashí shuar “Jintínkiartiniá” turutiarti tusa enentáimsashtiniaitrume. Átumka nuámtak yáchintrume. Átumka chikichik jintinkiertin ni naari Kristu takakrume. Nu asamtai “Jintínkiartiniá” túramcharmin áiniawai. ⁹ Ju nun̄kanmasha shuar “Aparú” tiirap. Chikichik nayaimpiniam pujana nu atumí Aparínti. ¹⁰ Atumi uuntri aya Kristuk asamtai “Uuntrú” túramcharmin áiniawai. ¹¹ Antsu átum írutkamunmaya uunta nuka peejchach átiniaiti. ¹² Shuar nan̄kaamantu ajastaj tákuinkia Yus nin peejchach awajsattawai. Antsu peejchach ana nuna Yus nin nan̄kaamaku awajsattawai’ tímiayi.

¹³ ‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitrume. Yus akupeamunam wayátin waiti epeniuitrume. Atumsha wayátsuk chikichcha wayátaj tuinia nusha suritniuitrume.’

¹⁴ ‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitrume. Wajé jee atankiirum aents enentáimturarain̄ tusarum ti esaram Yus áujtiniaitrume. Túrin asarum átum ti asutniátiniuitrume.’

¹⁵ ‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitrume. Nun̄kanmasha nayaantsanmasha yajá wekainiuitrume chikichik shuar winí nemartusat tusarum. Tura atumi nemiari ajasmatai atumjají nan̄kaamas tunáa sumamamnia awajearme.’

¹⁶ ‘Wáinkiatárum átumka. Jintinkiertiniaitiatrum nékachu asarum kusurua áiniuitrume. Ju jintiarme: “Shuar nekasan tajai tusa Yusa Jee páchiakka nii tana nuna umitsuk ikiukminiati. Antsu nekasan tajai tusa Yusa Jee kuri ana nuna páchiakka ti nekas umiktiniati” tíniuitrume. ¹⁷ Nétsetrume. Yúsjaínkia ashí kuri ánrachukait. Antsu Yusa Jee írunna nuka aya nuín ikiusma asa Yusna ajasuiti. Tuma asamtai kurijají nan̄kaamas Yusa Jee enentáimtustiniati. Enentáimcha asarum kusurua áinin wáakuitrume. ¹⁸ Nu arantcha tíniuitrume: “Shuar nekasan tajai tusa naman̄-maar-Yus-sútain páchiakka nii tana nuna umitsuk ikiukminiati. Antsu Yús-sutainiam naman̄ patasman páchiakka ti nekas umiktiniati” tíniuitrume. ¹⁹ Nétsetrume. Penké naman̄ Yusjají ánrachukait. Aya Yús-sutainiam patasma asa nu naman̄ enentáimtuschatniukait. Enentáimcha asarum kusurua áinin wáakuitrume. ²⁰ Enentáimpratarum. Shuar nekasan tajai tusa Yús-sutain páchiakka aya sútainiak páchiatsui antsu sutaincha tura nuí patasmancha máí-metek páchiawai. ²¹ Núnisan̄ shuar Yusa Jee páchiakka aya nunak páchiatsui antsu Yus nu jeenam pujú asamtai nunasha páchiawai. ²² Núnisan̄ shuar nayaimpin páchiakka Yus puju-tainchsetrume. Penké naman̄ Yusjají ánrachukait. Aya Yúa tura Yus nuí pujana nunasha páchiawai.’

²³ ‘Maa wáinkiatarum jintinniutirmesha, Pariséutirmesha. Ántrarum shiir chichamtiniaitrume. Kumintsu nukeshá, anisa nukeshá, menta nukeshá tias (10) akantram chikichik akankamu Yus súwitrume. Nuka

pénkeraiti, ikiukchatniuiti. Túramaitiat nekas pénker túratniua nu túrutsuk ikiuwitrume. Yus nekas enentáimtustincha, waitnentáimturтинcha tura tuke pénker túratniusha enentáimtsuk ikiuwitrume. ²⁴ Átumka jintinkiar-tiniatiatrum nékachu asarum kusuru áiniuitrume. Kutanam yajasmach enketu wáinkiumeka júwitrume. Túrayatrum kamiriu wáinkiumeka kawai nankaamas úunt aín takamtsuk kújawitrume.'

²⁵ 'Maa wáinkiatarum jintinniutirmesha, Pariséutirmesha. Ántrarum shiir chichamtiniaitrume. Átumka tsapasha pininsha initiaanj niijiatsuk aya pátatek nijiawitrume. Núnisrum pátatek shiir awajmamniuitrume tura enentáiminkia kasamkatniusha tura chíkichna wakeruktincha nujaj piákuitrume. ²⁶ Kusuru áiniuitrume, Pariséutirmeá. Antsu emka initiaanj tsapasha pininsha nijiaktarum. Túrakrumninikia pátatkesha mai pénker átatui. Núnisrum atumsha atumi enentáin ana nu shiir awajsarum pátatkesha shiir átatrume.'

²⁷ 'Maa wáinkiatarum jintinniutirmesha, Pariséutirmesha. Ántrarum shiir chichamtiniaitrume. Iwiarsamu pújujaj yakarar shiir awajsamua áiniuitrume. Aanj shiir ániawai. Tura initkia jaká ukunchijaj piákuiti. ²⁸ Núnisaitrume atumsha. Chíkich shuar ísmaka ti shiira áiniuitrume. Túrusha atumi enentáinkia ashí mujmiai piákuiti.'

²⁹ 'Maa wáinkiatarum jintinniutirmesha, Pariséutirmesha. Ántrarum shiir chichamtiniaitrume. Yaunchu Yúsnan etserin iwiarsamunam átumka shiir enentáimtakrum jea jeamkairume. Tura pénker shuar yaunchu jákarusha shiir enentáimurtaj tusarum ni iwiarsamu shiir awajearme. ³⁰ Túrakrum ju tíniuitrume: "Íikia yaunchu ii weatrijaj pujaitkiurkia Yúsnan etserin máatin yáimkiachaaji." ³¹ Nujaj ti paant chichaarme atumsha. "Íi weatři Yúsnan etserniun máawar tunáa túrin ármiai" tárume. Tura "Yáimkiachaaji" táyatrum, atumsha métek túrin asarum "Niijaj méteketji" tárume. ³² Wats, atumi weatři nankamawarmia nu átum amuktatrum' tímiayi Jesus.

³³ 'Napia áiniuitrume. Shuar aya yajauch awajniuitrume. Túmatirmesha Yus tunáa shuaran ajiniam akupkartatna nuya çitiurak uwempratarum? ³⁴ Untsurí shuaran akuptuktatjarne. Yúsnan etserniuncha, ti nekancha, jintinkiar-tinniasha akuptuktatjarne. Tura atumsha chíkich máattarme, chikichcha krúsnum ajintruarum máattarme, chikichcha iruntai jeanam asutiáttarme, tura chikichcha ashí nunkanam áintrattarme. ³⁵ Nu tura asarum pénker shuara numpé puarma nujaj átum sumamattarme. Yámankamtaik Apir ti penker shuaraitiat máamuyayi. Tura ukunam Perekiasa uchirí Sakarías atumi uuntri Yusa Jee ámanum naman-maar-Yús-sutai ajapén aténkamunam máawarmiai. Wats, Apir máamunmaya Sakarías máamunam ashí pénker shuar ti untsurí máamujaj sumamat-tarme. ³⁶ Nekasan tájarne, yamá puiunia nú shuar ashí nujaj sumamawartatui' tímiayi Jesus.

*Jerusarénumia shuaran Jesus aneak úutmiania nu
(Rúkas 13.34-35)*

³⁷ 'Jerusarénumiatirmeá, Yúsnan etserin máiniaitrume. Yus akatar akupturmakmasha kayajaj tukuram máiniaitrume. Túrin árumnin wait-nentajrume. Atash ni uchirin weana áitkiasnak weartinian wakerim-jarne, tura nakitramarme. ³⁸ Iistarum. Ame pépruram ajapamuiti.

39 Tura “Yusa náarijn winiana nu, shiir atí” títiatrumna nu tsawant jeatsain penké wáitkiashtatrome. Nuna tájarne” tímiayi Jesus.

24

*Yusa Uunt Jee saanaktinian Jesus ujakmiania nu
(Márkus 13.1-2; Rúkas 21.5-6)*

¹ Jesus Yusa Uunt Jeeñia jínki weai ni unuiniamuri nin tariar Jeñ iniaiktusar áujmatsarmiayi. ² Tura Jesus tiarmiayi “Nu mash yamá wáintrume. Tura nekasan tájarne ukunmanka mash saanaktiatui. Chikichik kayaksha ekenramuri atsuttawai” tímiayi.

*Amúamu tsawant nekaatin
(Márkus 13.3-23; Rúkas 21.7-24; 12.22-24)*

³ Nuyá Uriwiu náinnium wear niniki nu j pujusar ni unuiniamuri Jesusan aniasarmiayi “¿Nusha urutaik túrunatí. Tura ame tátincha tura nunka amuukatin tsawant jeakuisha warijiañ nekaattají? Nu ujatkata” tiarmiayi.

⁴ Tuñiakui Jesus tímiayi “Aneartarum, anañkramawairap. ⁵ Untsurí shuar winia náarun pachisar “wi Krístuitjai” tiar untsurí shuaran anañkawartatui. ⁶ Ti untsurí meset chicham antuktatrome túrasha sapijmiakairap. Núnisan átiniaiti nunka amúatsain. ⁷ Apachcha chikich nunkanmaya apachjai máaniawartatui. Tura ti tsukasha átatui. Sunkursha ti pampartatui. Usha ti uñkartatui. Nuka untsurí nunkanam ashí túrunawartatui. ⁸ Nujai ti wáitsatin aya yama nañkamui’ tímiayi.

⁹ Nuyá atumniasha yajauch awajsarti tusa surutmakartatui. Tura mantamawartatui. Tura winia naar pachia asakrumin ashí shuar muñjramkartatui. ¹⁰ Nu tsawantaj untsurí shuar Yúsán iniaisartatui. Túrawar nuamtak muñjniainiak surunairartatui. ¹¹ Untsurí shuar wáitruiniak “wi Yúsán etserniuitjai” tiartatui. Túrawar untsurí shuaran nusháa enentáimtikartatui. ¹² Tura tunáa ti ákui nuamtak anenaichartatui. ¹³ Tura shuar ashí nuna tuke katsuntra nu uwemprattawai. ¹⁴ Ashí aents nekaawarat tusa Yus-Chicham ashí nunkanam etsernaktatui. Túramtai amuukatin tsawant jeattawai” tímiayi.

¹⁵ Shuar juna áujea nu enentáimprati. Kame Jesus tímiayi “Yúsán etserin Taniar muijmiamtik tuke emesratin ana nuna yaunchu aar etserkamiayi. Nuka Yusa Jeeñ wantinkiamtai ¹⁶ ashí shuar Jutía nunkanam írúnna nu, muranam pisararti. ¹⁷⁻¹⁸ Ti wárik pisartin asamtai shuar jea yakí pujaksha tura shuar ajanam wekaakusha jeá waketki warirí jukitiaj tíchati. Antsu nuyañ wárik pisarti. ¹⁹ Nu tsawantaj nuwá ajamtincha tura kuírchin takaku ainia nusha ti wáitsartatui. ²⁰ Ayampratin tsawantajsha tura michá nántutincha nu pisartin tsawant áchati tusarum Yus seatarum. ²¹ Maa, nu tsawantaj ti wáitsatin átatui. Ti yáunchusha núnisan wáitsatin atsuuyayi. Ukunmasha atsuttawai. ²² Nu wáitsatin ti esarmaitkiuinikia chikichikisha uwemprachainti. Tura Yus nu wáitsatniun wárik amumtikiattawai. Shuar Niñiu ajasarat tusa achikma ainia nu uwemprarat tusa wárik amumtikiattawai’ tímiayi.

²³ “Tura atumin “Júiti Kristu,” tuñiakui sha tura “Nuj pujawai” tuñiakui sha anturkairap. ²⁴ Untsurí shuar Krístuitjai tusar wantinkiertatui. Untsurísha “Yúsán etserniuitjai” tiartatui. Tura shuaran anañkatakj tusar aents tujintiamun iniakmasartatui.

Tura ti kakarman túruiniak Yús-shuarnasha anan̄kamin áiniakuin̄kia anan̄kawarainti. ²⁵ Túrunatsain̄ nuna emka ujaajrume. ²⁶ Tuma asamtai “Iis, Kristu nūj aents atsamunam pujawai” túramainiakuisha nūj wéerap. “Jūi úumak pujawai” tūniakuisha anturkairap. ²⁷ Núnisan̄ úumkan táchattajai. Peem péetuk ti wárik ashí nun̄kanam wáinkiachminkiait. Núnisnak wi Aents Ajasuka winiakun paant wantinkiattajai. ²⁸ Wats, jaka tepaana nūj chuan̄ káutkachartatuak’ tímiayi.

Kristu tátintri

(Márkus 13.24-37; Rúkas 21.25-33; 17.26-30, 34-36)

²⁹ ‘Ti wáitsatin nan̄kaamasmatai ti wárik tsawáji nantu kajinkiattawai. Tura kashí nantusha etsantrashtatui. Yaasha ashí muchitrattawai. Nayaimpiniam kakaram ainia nusha peantrartatui. ³⁰ Nūjikia Wi Aents Ajasuka, tátiniur paant átatui. Tura ashí nun̄kanmaya aents Wi winiáji wáitkiar asuttiamattaji tusar úutiartatui. Wisha ti kakaram tura Yusa wincharijjaji yurañminiam winiáji wáitkiartatui. ³¹ Yusa suntarjin̄ kachu kakaram umpuarterum tinia akupkamtai nu suntar ashí nun̄kanmaya ashí Yús-shuaran, Yus achikma ásarmatai, irurartatui’ tímiayi.

³² ‘Iikiu numirī nakumea nu nekaatarum. Ni nuken̄ eteakui “esat nantu jeatemayi” tátsurmek. ³³ Núnisan̄ ashí jū wáinkiumeka “amuukatin tsawant nekas jeatemayi” títiniaitrume. ³⁴ Nekasan̄ tájarme, yamá aents pujuinia nu amúatsain̄ ashí túrunattawai. ³⁵ Nun̄kasha nayaimpisha amuukartatui antsu winia chichamur amuukashatui’ tímiayi.

³⁶ ‘Tura nu túrunatin tsawant nekanachminiaiti. Yusa suntarjsha nékainiatsui. Wisha Yusa Uchiríntiatnak nékatsjai. Antsu aya winia Aparuk nékawai’ tímiayi.

³⁷ ‘Wi tátiniur jeamtai yaunchu Nuai pujumia nú tsawantin̄ túrunamia núnisan̄ átatui. ³⁸ Nu tsawantin, tuke amaartsain̄, aya júnisan̄ aa asamtai yurumuk umarar pujuarmiayi. Nuatnainiarmiayi. Ni nawantrin̄cha nuatmamtikarmiayi. Tura tumá pujuiniaji Nuai uunt kanunam enkemamtai ³⁹ nu aents tuke nékainiatsain̄ ama amarak mash amuukarmiayi. Núnisan̄ átatui Wi tátin̄ jeamtai. ⁴⁰ Nu tswantajik jimiará shuar ajanam pujuttawai. Chikichik junaktiatui tura chikichkia ikiunkittiwai. ⁴¹ Núnisan̄ jimiará nuwá shana nekeak pujuttawai. Chikichik junaktiatui chikichkia ikiunkittiwai’ tímiayi.

⁴² ‘Nu asamtai atumsha iwiarnarum pujustarum. Nekaachminiaiti uruk ájntuk taritjarum. ⁴³⁻⁴⁴ Tuma asamtai aneara pujustarum. Wi nekaachmanum tátin̄ júnisan̄ enentáimpramniaiti. Shuar jū kashi kasa tátinian nekaanka kánutsuk kasa táawai tusa iwiarnar nákasainti. Núnisrum aneara pujustarum.’

Pénker takamtikniuncha yajauch takamtikniuncha Jesus áujmatsamiania nu

(Rúkas 12.41-48)

⁴⁵ ‘Shuar pénker uminian tura pénker enentáimniun̄ áujmatsattajai. Nuna uuntrī yajá irauweak “Yurumátin̄ jeamtai winia takartin̄ ayuratarum” tíchanpiash. ⁴⁶ Nu takamtikniuncha ni uuntrī taa takatrin̄ tímiatrusan̄ túran tarin̄kia shiir enentáimtusainti. ⁴⁷ Nekasan̄ tájame, umin̄ asamtai ni uuntrī ashí ni waririn̄ wáitrukát tusa takatan susattawai. ⁴⁸⁻⁴⁹ Antsu úuntur wau táchattawai tusa takamtikin̄ ni uuntrī yáintrin̄ yajauch awajeak tura takatsuk aya yurumátniun̄ tura nampektinian wararkun̄ka nu takamtikin̄ yajauchiiti. ⁵⁰ Turaj̄ ni uuntrī aya aneachma

taa nu takamtikniun, yajauch asamtai, ⁵¹ ti kakaram asutiattawai. Yajauch shuar pujuinia nuĵi akupkattawai. Nuĵisha ti wáitiak ti úttiatui' tímiayi Jesus.

25

Jesus tias (10) nuwān áujmatsamiania nu

¹ Yus akupeamunam pachiinkiatin júnis átatui. Nuatnaikiatin jísat akui tias nuwā natsa kantiran akaawar nuátkattana nu áishmañkan inkiunĵeá itiatatui tusar wearmai. ² Senku nuwā enentáimcha armai. Tura chíkich senku nuwā enentáimin armai. ³ Enentáimcha arma nú nuwā aya akaamunak juíniak amuukamtai yaraatniun asuitin júkicharmai. ⁴ Antsu chíkich senku núwāka akaamuncha juíniak tura ataksha amuukamtai yaraatniun asuitin júkiarmai. ⁵ Tura júinkiarantai nuatkatin áishmañ wari taachkui karĵi pujakui kanararmai. ⁶ Nuyá kashi ajapén shuar untsumuk "Pai nuatkatin winiawai. Werirum inkiuntarum" timiai. ⁷ Tu untsumun antukar nantakiar kantiran akaatai tusar pujursarmai. ⁸ Nuyá senku nuwā enentáimcha arma nu, chíkich nuwā enentáimniun tiarmai "Incha atumí asuitirĵi ishichik ajamprusaitia. Ii kantirĵisha kajiniawai."

⁹ "Tutai chíkich senku nuwā tiarmai "Atsá, warĵi íncha jeartamchattaji. Tura atumnia penké jeashtatui. Nekaska surutainium werum sumaka utumtarum" tiarmai."

¹⁰ "Tura nuyá senku nuwā enentáimcha arma nu, asuitian sumak utitai tusar wéarai ukunam nuatkatin áishmañ tamai. Túramtai enentáimin nuwā arma nuka nuatnaikiatin námpernam nuatkatniujai wayawarmai. Túramtai wáitin epeniarmai. ¹¹ Tura epeniarai enentáimcha nu táarmai. Tura tiarmai "Úuntá, waiti uratritia."

¹² "Tu untsumainiakui nu uunt kajerak chichak "Cha, ĵyátsukaitrum? Penké nékatsjarne" tiarmai." ¹³ Jesus nuna áujmatas umik tímiayi "Aents Ajasuitjai tura tátin tsawantrusha tura uruk aiñ tátaj nusha nékatsrume. Tuma asarum tuke iwiarnarum pujustarum' tímiayi.

Kuit susamun áujmatsamiania nu

¹⁴ "Núnisan Wi tátin júnisaiti. Shuar chíkich nunkanam wéak_u ni takarniurĵin untsukar ni kuítrĵin akanak súsarmai. ¹⁵ Chíkichkiniak senku mir (5.000) kuítian susamai. Chíkichnasha jimiará mir (2.000) kuítian susamai. Tura chíkichnasha chíkichik mir (1.000) kuítian susamai. Nii takastin jearma nujai métek súsarmai. Tura ikiuak yajá wemai. ¹⁶ Takarĵin senku mir kuítian achikmia nujai takakmas ataksha senku mir kuítian patakmai. ¹⁷ Chíkichcha núnisanĵi jimiará míran achikmia nujai takakmas ataksha jimiará míran patakmai. ¹⁸ Tura chíkich shuar ni uuntrĵi kuítrĵin chíkichik míran achikmia nuna wāĵ taur úukmai."

¹⁹ "Nuyá ukunam nu shuara uuntrĵi támai. Tura kuítian súkiarma nujai itiurkarmakit tusa untsukarmai. ²⁰ Emka senku mir kuítian achikmia nu tamai. Nuyá ni úntrĵin chíkich senku mir patakman suak timiai "Uuntá, senku mir kuit surusmame. Pai, atak senku míran patasmajai."

²¹ "Takui ni uuntrĵi timiai "Ti penker takakmauwitme. Nekas umini-aitme. Ishichkijaiŷha ti penker takakma asakmin ti núkap yamaikia amastatjai. Winí wayam wĵijai ti shiir warasta" timiai."

²² "Nuyá chíkich shuar jimiará míran achikmia nu tarĵi timiai "Uuntá, jimiará mir surusmame. Pai, ataksha jimiará míran patasmajai."

23 ‘Takui ni uuntri timiai “Ti penker takakmauwitme. Nekas umini-aitme. Ishichkijajsha ti penker takakma asakmin ti nukap yamaikia amastatjai. Winí wayam wijjai ti shiir warasta” timiai.’

24 ‘Nuyá chíkich shuar chikichik míran achikmia nu tarí timiai “Uuntá, ti kajen asakmin tura araachiatam tura atsaamprachiatam júurtuktarum tiniu asakmin 25 sapijmiakum ame kuítrumniaka nunká táutran úukmajai. Pai, júiti ame surukmiam nu” timiai.’

26 ‘Takui ni uuntri timiai “Ámeke yajauchiitme. Aya nákiitme. Wi araachiatan tura atsaamprachiatan júurtuktarum tíniuitme túrutsumek. 27 Tu enentáimkiumka ¿urukamtai kuit-iruntainiam ikiirtuschamam? Nuikia wi táakun patasan achikiájajai” timiai. 28 Nuna tinia nuí wajainian tiarmai “Ju shuar chikichik mir kuit atankirum tias mir kuítian takaka nu susatarum. 29 Kame nukap takakna nú shuar ataksha patatnastatui tura ampiniartatui. Antsu ishichik takakna nusha ishichik takakuiat jurunkittiwai. 30 Ju umichu shuarsha aa kiritniunam ajapatarum. Nuí ti wáitiak ti úuttiatui” timiai”. Tu áujmatsamiayi Jesus.

Akantratin átatna nu

31 Jesus áujmatuk tímiayi ‘Aents Ajasuitjiana nu ashí akupin ajasan Yusa suntari énekema winittiajai. Tura Uunt Akupin asan shiir pujutairui pujustatjai. 32 Túramtai ashí nunkanmaya aents Winia irunturartatui. Túrunawarmatai akantrartatjai. Murikiu wáinin kachurtinian tura kachurtichujai akanea nútisanak shuáran akantrattajai. 33 Tura kachurtichunka, penkera nuna, untsuuruini awajsartatjai. Tura kachurtinnika, yajauchia nuna, menaruini awajsartatjai. 34 Túran nekas Uunt Akupin asan untsuuruini wajainian títiatjai “Atumniaka winia Apar shiir awajtamsaitrume. Wi akupeajna nuí winitiarum. Yus nunkan najanamia tímianaik átum nuí warastinian tsankatramkamiarme. 35 Kame Wi tsukamá wekai ayurtuamiarme. Kitiamá wekajsha umartin surusmiarme. Wait ajá wekajsha itiaararum ajamprusmiarme. 36 Pushir atajsha átumka surusmiarme. Jaa tepajsha íráiamiarme. Sepunam enketajsha tarum íráiamiarme” títiatjai. 37 Tutai untsuuruini wajainia turutiartatui “Uuntá, ¿urutia tsukamá wekaamnisha ayuramaji. Urutiá iisha kitiamá wekáa wainkiarsha umartincha amasmaji. 38 Tura urutia wait ajá wekaamnisha tura pushiram mamurmataisha iisha amasmaji. 39 Urutia iisha jaa tepamin tura sepunam enketmin wainkiarsha winitir íimiai?” turutiartatui.’

40 ‘Turutainiakui Wi Uunt Akupin asan tiartatjai “Nekasan tájarme, ashí ju wí shuar péejchachisha waitnentramarum nu Winia anentakum túraitrume” tiartatjai’ tímiayi.

41 ‘Wi Uunt Akupin asan menaruini wajainian tiartatjai “Atumsha yajá wetarum. Yajauchijjai yumiñkramuitrume. Yus uunt iwianchi ni suntarijjai tuke kajinkiashtin jinium apeatniua nuí wétatrume atumsha. 42 Átumka Wi tsukamaj ayurtuachmarme. Kitiamajsha umartin suruschamarme. 43 Wait ajá wekajsha ikiatrachmarme. Pushirun imiamprajsha entsartin suruschamarme. Jaa tepajsha tura sepunam enketajsha íraichmarme” tiartatjai.’

44 ‘Tutai niisha turutiartatui “¿Urutia, Uuntá, tsukamakmesha, kitiamakmesha, wait ajaknísha, pushiram imiampramsha, jáakmesha, tura sepunam wait ajá pujamnisha ísha winitir yáinçhamaji?” turutiartatui.’

⁴⁵ “Wi Uunt Akupin asan tiartatjai “Nekasan tájarme, Ashí Wíi shuar, péejchachisha waitnentrachmarum nuí Winiasha túrutachuitrume” tiartatjai. ⁴⁶ Nu shuarka tuke wáitsatniunam weartatui. Tura Yus achikma ainia nusha tuke iwiaaku Yusjaj pujustinnium weartatui” tímiayi Jesus.

26

Jesus achiktin chichaman jurusarmiania nu

(Márkus 14.1-2; Rúkas 22.1-2; Juan 11.45-53)

¹ Jesus ashí nuna tinia umik ni unuiniamurij tiarmiayi ² “Atumsha nékarme, Paskua jisat jeatin jimiarchik tsawant ajasai. Nuí Wi Aents Ajasu asamtai krúsnun máawarti tusar surutkartatui” tímiayi.

³ Nuyá Israer-patri uuntrijsa Israer-shuara jintinniurjsa Israer-shuara úuntrijsa Kaipiasa jeen áarin iruntrarmiayi. Kaipiassha Israer-patri uuntriyyayi. ⁴ Nuí anañkatin chichamjaj Jesus achikiar maatai tusar chichaman jurusarmiayi. ⁵ Tura tiarmiayi “Jístatin túrachminiaiti aents téetet ajarajin tusar.”

Nuwa Jesusan kunkuinian ukatramiania nu

(Márkus 14.3-9; Juan 12.1-8)

⁶ Jesus Petania péprunam pujus tunamaru Semunka jeen pujumiayi. ⁷ Nuí pujaj nuwa ti kuit jeá kunkuinian arapástru tutai kaya najanamunam piakun itiamiayi. Tura Jesus misanam yurumátaj tusa pujan tarí nu kunkuinian ukatramiayi. ⁸ Túramtai ni unuiniamurij nuna íisar kajerkar tiarmiayi “¿Urukamtai au kunkuin imiá kuítiniasha áantrasha wasurea? ⁹ Antsu ti kuitjaj suruk shuar kuítrincha ainia nuna yáítskesha” tiarmiayi.

¹⁰ Jesus tuinian anturak tiarmiayi “¿Urukamtai ju nuwa yajauch enentáimtarum? Túrutana ju ti péñkeran túrayi. ¹¹ Kuítrincha tuke atumjaj pujushtatuak. Antsu Wikia atumjaj tuke pujushtatjai. ¹² Ju nuwa kunkuinjaj ukatruaraj juka, Wi iwiarnastin asamtai áitkiarayi. ¹³ Nekasan tájarme, ashí nunkanam uwempratin chicham etsernakui tuke ju nuwa pachinias etsernaktatui. Túramtai ni túramurij kajinmankishtatui” tímiayi.

Jútas Jesusan surukmiania nu

(Márkus 14.10-11; Rúkas 22.3-6)

¹⁴ Nuyá Jesus tuse (12) unuiniamunmayaj chikichik ni naari Jútas Iskariúti Jesusan suruktaj tusa Israer-patri uuntriin wémiayi. ¹⁵ Tura jeari tímiayi “Jesusan achikia amakui ¿urutmá akirkaintrum?” Takui trainta (30) kuítian akikiarmiayi. ¹⁶ Nu akikiam Jútas itirak Jesusan súsaraintaj tu enentáimias wekaimiayi.

Kristu jakamu enentaimtustin námper

(Márkus 14.12-25; Rúkas 22.7-23; Juan 13.21-30; 1 Kurintiunam 11.23-26)

¹⁷ Wakapruachu tantan yurumáinia nú námper yama nan kamkui Jesusa unuiniamurij tariar aniasarmiayi “¿Tui paskua námper iwiaarakrin yurumáttam?” tiarmiayi.

¹⁸ Tuíniakui Jesus tímiayi “Péprunam wetarum. Nuí chikichik shuara jeen jearum titiarum “Uunta chichaak “Winia tsawantur ishichik ajasai. Tuma asan paskua namperan winia unuiniamurjaj ame jeemiin yurumátajaj” tawai” titiarum” tímiayi. ¹⁹ Tutai ni unuiniamurij wear Jesus timia nuna umikiar paskua nampertin yurumátniun iwiararmiayi.

20 Tura kashi ajasáí Jesus ni tuse (12) unuiniamurijíaj misanam yurumuk pujumiayi. 21 Nuí yurumáiniaí Jesus tiarmiayi “Nekasan tájarme, átum pujarmena juyá chikichik Winia surutkattawai.”

22 Nuna takui ti kúntuts enentáimprar mai aní awajiarumiayi “Uuntá, ¿wiáshitiaj?”

23 Mai tu awajenam Jesus tiarmiayi “Wi nú piniñnumañ jimiartukan yuajna ju Winia surutkattawai. 24 Wi Aents Ajasu asan Yus Chicham tana nujaj métek túrunattajai. Túrasha shuar Winia surutkattana nuka ti asutniátin asa akiinmainchu ajakuiti” tímiayi.

25 Nuyá Jútas suruktaj tana nu Nin tímiayi “Uuntá nuikia ¿wiáshitiaj?”

Takui Jesus tímiayi “Ee, nekas ámetme.”

26 Tura yurumuk pujuiniaí Jesus yurumkan achik Yúsan yumıñsamiayi. Tura puur ni unuiniamurıñ suiniak tímiayi “Ju yuatarum. Juka winia ayashruiti.” 27 Nuyá piniñkian achik Yúsan yumıñsamiayi. Tura suiniak tiarmiayi “Jusha ashí umartarum. 28 Juka winia numparuiti. Tura winia numpar puármatai, yamaram chicham nekas uminkiattawai tawai. Tura puármatai untsurı shuara tunaarın tsankurattawai. 29 Tura ataksha átum Yus akupea nuí jeatsrumnıñ ju uwa yumırın umarchattajai. Tura tsawant jeamtaí atumjai Yus akupeana nuí yamarman umartatjai” tímiayi Jesus.

Pítıur natsantratniua nuna Jesus ujakmiayi

(Márkus 14.26-31; Rúkas 22.31-34; Juan 13.36-38)

30 Yús-kantan kantamáwar umikiar Uriwiu náinnium wearumiayi. 31 Nuí Jesus tímiayi “Ju kashi átum Winia ashí natsantrurtatrome. Kame Yus-Papinium áarmaiti “Murikiu wáinnıun mantuattajai túram murik pisararatui.” Tu áarmaiti. 32 Tura nantakin Kariréa nunkanam Wi émkattajai átum wéatsrumın.”

33 Takui Pítıur tímiayi “Chikich natsantramainakuisha wikia túrashtatjai.”

34 Tutai Jesus tímiayi “Nekasan tájame, ju kashi atash shiniatsain menaintiú natsantrurtatme.”

35 Pítıur tímiayi “Maa, Ámijíaj métek mántuiniakuisha penkesha natsantrashtatjame.” Ashí ni unuiniamurı núnisan tiarmiayi.

Jesus Jitsemanı ajanam Yúsan áujsamiania nu

(Márkus 14.32-42; Rúkas 22.39-46)

36 Nuyá Jesus ni unuiniamurıjıaj Jitsemanı náartin ajanam jeá tímiayi “Juı pujusrum náarsatarum. Aranta aj wena Yúsan áujsatjai.” 37 Tinia Pıtruncha tura mai Sepetéu uchırı jukı wémiayi. Nuısha ti kúntuts enentáimiuk wake mesekmiayi. 38 Nuyá Jesus tímiayi “Ti kúntuts jakamnia enentáimjai. Atumsha juı pujusrum Wijıaj métek iwiáa pujutarum.” 39 Tinia Jesus arantach we nuı tikishmar tsunsuma Yúsan áujeak tímiayi “Winia Aparú, Wi túrunatniua nu nusháa iwıaramniaitkiuıñkia ju wáitsatniua nu tsankatrukaip. Tura Wi wakeraj núniska áchati antsu Ame wakeram núnis atı” áujuk tímiayi.

40 Nuyá ni menaintiı unuiniamurı pujuiniamunam waketki kanúu pujuinıan jeariar Pıtrun tímiayi “Átumka chikichik úraksha Wijıaj iwiáa pujutin ¿tujınkiarmek? 41 Iwiáa pujusrum Yus áujsatarum. Tunáa nupet-tamkairap. Enentáımin ti wakerınıaitrume túrasha ayashım pimpiruiti.”

⁴² Tinia ataksha we Yúsán áujeak tímiayi “Winia Aparú, Wi imiá nekasán wáitsatniuitkiunkia nuǰkia Ame wakeramna nu atí.” Tu áujсамиayi.

⁴³ Nuyá ataksha taa ni menaintiu unuiniamurǰ tarimiayi. Tura kari ti nupeteam ataksha kanú pujuarmiayi. ⁴⁴ Túmainiakui nin ikiukin ataksha áujmia núnisan Yúsán áujsatá tusa waketkimiayi. ⁴⁵ Áujas umik ni unuiniamurǰ pujamunman wémiayi. Tura tiarmiayi “Antsu yamaikia kanarum ayampratarum. Ura jeayi. Wi Aents Ajasu ain, tunaarintin shuarnum surunkatin jeayi. ⁴⁶ Wari nantaktiarum. Wéartai. Súrutna nu winiawai” tímiayi.

Jesusan achikiarmiania nu

(Márkus 14.43-50; Rúkas 22.47-53; Juan 18.2-11)

⁴⁷ Jesus tu chichaj Jútas támiayi. Nusha ni unuiniamurǰiyayi. Nujajsha untsurǰ shuar puniajajsha tura numijjajsha winiarmiayi. Nu shuaran Israer-patri uuntriǰsha Israer-shuara úuntriǰsha akupka ármiayi. ⁴⁸ Jútas, Jesusan sura, tuke Jesusaj jeatsuk nu shuaran tiarmiayi “Wi miniakkan mukunattajna núiti. Nu achiktaram.” ⁴⁹ Nu asantai Jesusan tarǰ “Winiajai Úuntá” tinia mukunamiayi.

⁵⁰ Takui Jesus tímiayi “Amikrú, ¿warǰ winitiam?” Nuyá achikiar Jesusan júkiarmiayi.

⁵¹ Nuǰ chikichik Jesusa tsaníakmarǰ ni puniarǰn ukuiniak shuara kuishǰn tsupirkamiayi. Nu shuarsha Israer-patri uuntriǰ takarniurǰiyayi.

⁵² Túramtai Jesus tímiayi “Puniarum enkeata. Ashǰ puniajaj máanainia nusha puniajaj mantamnashtatuak. ⁵³ Wi wakeraknaka winia Aparun timiá untsurǰ suntarǰn seakui páchitsuk akupturkainti. ¿Nu nékatsmek? ⁵⁴ Tura nuna túramtainkia Yus-Chichamnum tana nu uminkiachainti” tímiayi.

⁵⁵ Nuna tinia Jesus nu shuaran tiarmiayi “Átum kasá achiktaj tawa nútiksarum puniajajsha numijjajsha tarutniurme. Kame ashǰ tsawantaj Yusa Jeen atumjaj pujusan Yus-Chichaman etsermiajai. Nuǰsha achirkachmarme. ⁵⁶ Antsu yamaikia yaunchu Yúsán etserin áararmia nu umínkiatǰ tusarum jútikrarme.” Tu tímiayi Jesus.

Nuyá ni unuiniamurǰ Jesusan Níniak ikiuiniak pisararmiayi.

Israer-patri uuntriǰn Jesusan júkiarmiania nu

(Márkus 14.63-65; Rúkas 22.54-55, 63-71; Juan 18.12-14, 19-24)

⁵⁷ Shuar Jesusan achikiarmia nusha Kaipiasaj júkiarmiayi. Nusha Israer-patri uuntriǰiyayi. Nuǰsha Israer-shuara jintinniurǰsha Israer-shuara uuntriǰ armia nusha irunar matsarmiai. ⁵⁸ Tura Pítur árantak Jesusan nemarkin uuntriǰ jeen aari jeamiayi. Tura suntarjaj tsanin pujusmiayi Jesusan itiurkartin tusa.

⁵⁹ Tura Israer-patri úuntriǰsha Israer-shuara úuntriǰsha tura ashǰ naamka uunt armia nusha Jesusan wait-chichamjaj súmamtikiatai tusar áujmatarmiayi. ⁶⁰ Untsurǰ shuar ántar tsanumpruiniakuisha máatin chichaman nekaracharmiayi. Nuyá jimiará shuar tsanumpruiniak ⁶¹ tiarmiayi “Ju áishman chichaak “Yusa Uunt Jeen yumpuran ataksha menaintiú tsawantin jeaminiaitjai,” tu chichamai” tiarmiayi.

⁶² Nuyá Israer-patri uuntriǰ wajaki Jesusan tímiayi “¿Áimtsmek. Turamainia nusha anturmammek?” ⁶³ Túrusha Jesus tuke áimchiamiayi. Túmakui Israer-patri uuntriǰ chicharuk “Nekas iwiaaku Yusa náarǰin

tájame nekasa nu táchakminkia Yus íirmastatui. ¿Ame Krístukaitiam. Yusa Uchirínkaitiam? Paant etsérkatá” tímiayi.

⁶⁴ Tutai Jesus tímiayi “Ee, ame támena núitjai. Tura ataksha atu-min tájarme, wi Aents Ajasu asan ti kakaram Yusa untsuuriní pujai wáitkiáttarme. Tura yurañminiam winiajša wáitkiáttarme” tímiayi.

⁶⁵ Nuyá Patri uuntri nuna antuk ti kajek ni pushiri jaak tímiayi “Ju áishmañ ni chichamejai Yúsán nekas yajauch chicharniuiti. Nuyáša ¿warí atsumaj? Atumsha Yúsán yajauch chicharu antukcharumek. ⁶⁶ ¿Waritia enentáimprum?”

Tutai “Sumamayi. Mantamnati” tiarmiayi. ⁶⁷ Tiar usukiawarmiayi yapiniam. Tura awattiararmiayi.

Chikichcha yapiniam awati wishikiainiak tiarmiayi ⁶⁸ “Ame Krístuchukaitiam. ¿Ya awattama? Íitsuk nekaata.” Tu chichariarmiayi.

Pítur Jesusan natsantramiania nu

(*Márkus 14.66-72; Rúkas 22.56-62; Juan 18.15-18, 25-27*)

⁶⁹ Nu túmain Pítur aa pujai nuwá chikichik jeari tímiayi “Amesha ju Kariréanmayá Jesus tutajijai wekaichamkam.”

⁷⁰ Tutai Pítur ashí ántuiniamunam tímiayi “Nékatsjai. ¿Warittsuk chichaam?”

⁷¹ Nuna tinia jíinkitaj tusa wéaj chíkich shuar wáiniak nuj pujuinian tiarmiayi “Au áishmañsha Nasarénumiá Jesusjai wekainiuiti.”

⁷² Tutai Pítur ataksha tímiayi “Nekasan tájarme, ju áishmañkan penké nékatsjai.”

⁷³ Árusañ nuj pujuarmia nu Pítrun tariar tiarmiayi “Nekas amesha aujai wekaimiame. Warí, chichammijiai páantaiti.”

⁷⁴ Tutai Pítur “nekas Yus íirui” taku tímiayi “Nu áishmañkan penké nékatsjai.” Nuna taj atash shiniukmiayi. ⁷⁵ Túramtai Pítur Jesus nuik tímia nuna enentáimpramiayi. “Atash shiniatsain menaintiú natsantrurtatme” tímiayi Jesus. Pítur nuna enentáimiar jíinki we ti útmiayi.

27

Piratui Jesusan júkiarmaniania nu

(*Márkus 15.1; Rúkas 23.1-2; Juan 18.28-32*)

¹ Kashin tsawarmatai Israer-patri uuntrisha Israer-shuara úuntrisha Jesus maatai tiarmiayi. ² Tiar Jesusan jinjiawar apachi uuntrin Punsui Piratui júkiarmaniayi.

Jútas máamamiania nu

³ Jútas Jesusan suruk tura máatai tuńian antuk enentáimiar trainta kuítian Israer-patri uuntrincha Israer-shuara úuntrincha awañtukiarmiayi. ⁴ Tura tímiayi “Nu áishmañ tunaarinchán máatarum tusan surukan wi sumamajai.”

Takui tiarmiayi “Nusha íjijajsha warí urukatiñ. Nuka amek íischatniukaitiam.” ⁵ Tinia Jútas nuj Yusa Uunt Jee kuítian utsañ ikiuak nuyá we kajempramiayi. ⁶ Nuyá Israer-patri uuntri nu kuítian júukar tiarmiayi “Ju kuit shuar sumakma asamtai Yusa kuítrijijai irurchamniaiti.” ⁷ Tura nuamtak áujmatsar “nunka sumaktai” tiar Nuwe Najantai nunkan sumakarmiayi yajaya shuar nuj iwiarsatniun. ⁸ Shuar sumakma kuitjai sumakma asamtai yamaisha Numpá Nunka tuke tuńiawai. ⁹⁻¹⁰ Nujai yaunchu Yúsán etserin Jeremías tímia nu uminkiamiayi:

“Uunt Yus turutmia núnisaṅ túrawarmiyai. Israer-shuar trainta kuítian seawarmatai nuna akantrar nujaj Nuwe Najantai nunḱan sumakarmiyai.” Tu áarmiyai.

Piratu Jesusan aníasmiania nu
(*Márkus 15.2-5; Rúkas 23.3-5; Juan 18.33-38*)

¹¹ Jesusan apachi úuntrijn ejeniarmatai nii aniasmiyai “¿Nekasmek Israer-shuara uunt akupniuríntiam?”

Tutai Jesus “Ame támena núitjai’ tímiyai.

¹² Nuyá Israer-patri úuntrisha Israer-shuara úuntrisha súmamtikia Jesus pachischamiyai. ¹³ Nuyá Piratu tímiyai “Ashí yajauch chichartamainia nu ¿anturmammek?” ¹⁴ Tútaisha Jesus penḱé áimkiachmiyai. Túmakui akupin ti enentáimiar títinian nekaachmiyai.

Piratu Jesusan “mantamnati” tímiania nu
(*Márkus 15.6-20; Rúkas 23.13-25; Juan 18.39–19.16*)

¹⁵ Jísat tsawantin apachi uuntri Israer-shuar shiir enentáimprarat tusa sepunam enḱetun shuar wakeramun jiki anḱant akupniuyayi.

¹⁶ Nují sepunam tunáa shuar Parapás náartin pujumiyai. Ashí shuar nékarmiyai. ¹⁷ Tuma asantai Piratu Israer-shuar iruntrarun aniasmiyai “¿Yana anḱant akupkat tusarum wakerarum. Parapásnak akupkattaj; Kristu tutai Jesusnak akupkattaj?” tímiyai. ¹⁸ Kame Israer-shuar ántar kajerainiak ni itiarman nekaamiyai.

¹⁹ Tura Piratu nuna inintrak pujaj ni nuarí chichaman akuptukmiyai. “Ju péṅker áishmaṅ súmamtikiatniujaj pachiinkiaip. Mesekranam nii áitkiatniun nekaan wáitsan tsawarjai” tímiyai.

²⁰ Túrasha Israer-patri úuntrisha Israer-shuara úuntrisha “Parapás anḱant wetí, tura Jesus mantamnati” titiarum tusar shuáran akatarmiyai. ²¹ Apachi akupniurí ataksha aniasarmiyai “Ju jimiará áentsun ¿yana anḱant akupkat tusarum wakerarum?”

Tutai “Parapás” tiarmiiai.

²² Tutai aniasarmiyai “Jesusnasha. Yusa Anaikiamurí Kristu tuinia nunasha, ¿itiúrkáttaja?”

Tutai ashí “Krúsnum máatá” tiarmiiai.

²³ Tuíniakui Piratu tiarmiiai “¿Warí yajauchinia túrait?”

Tutai kakantar untsujuk “Krúsnum máatá” tiarmiiai.

²⁴ Tura Piratu Jesus uwemtikrachminiaitkiui antsu ashí shuar charaatum ajainiakui entsa uturtitiarum tusa seamiyai. Tura ashí íimiaiinaṅ ik-ijmiak tímiyai “Ju péṅker áishmaṅ máatniunam wikia pachiintsujai. Antsu atumek íistarum.”

²⁵ Tutai ashí shuar tiarmiiai “Iik ii shuarjijaj ju áishmaṅ máatin íistaji.”

²⁶ Nuyá Piratu Parapásan anḱant akupkamiyai. Tura Jesus asutiárum krúsnum máatárum tusa akupkamiyai. ²⁷ Nuyá akupin pujutai jeṅam akupniu suntarí Jesusan júkiar ashí suntaraim irunturarmiyai. ²⁸ Tura pushirí áitkiar akupin entsatain kapaḱaku pushin áentsrarmiyai. ²⁹ Múuknúmsha tawaspan jaṅki najanamun etsemtikarmi-ai. Tura karisun akupniu numiría áaniun untsuuríṅ ataksarmiyai. Túrawar wishikiainiak tikishmatrar tiarmiiai “Israer-shuara uunt akupniurínme.” ³⁰ Tiar usukiarmiiai. Tura karisun jurukiar múuknum awatiarmiiai. ³¹ Tura núkap wishikrar kapaḱaku pushin áitkiar ni pushirín áentsrarmiyai. Nuyá krúsnum maatai tusar júkiarmiiai.

Jesusaan krúsnum máawarmiania nu
(Márkus 15.21-32; Rúkas 23.26-43; Juan 19.17-27)

³² Jesusaan jukí wésar Serini nunkanmaya shuaran, ni naari Semun, Jesusa krúsrin jurukit tusar achikiarmiayi. ³³ Nuyá Kúrkutanam ejeniarmiayi. Kúrkutaka, shuar chichamjainkia, muuka ukunch tútainti. ³⁴ Nui Jesusaan umutai yapájai pachimpra najanamun áartaj tusar súarmiayi. Tura Jesusaan apas iis umarchamiayi.

³⁵ Krúsnum ajintrurar suntar yáki Jesusa pushirin jukit tusar nakurisar awakmakua nuna súarmiayi. Nujainkia yaunchu Yúsnan etserin áarmia nu uminkiamiayi:

“Winia entsarmarun akantrarmiayi tura nakurisar awakmakua nuna winia pushirun súarmiayi.” Tu áarmiayi.

³⁶ Nuyá wáinkiatu tusar pujursarmiayi. ³⁷ Tura urukamtu máamuit ashí aents nekaawarti tusa áarman muuknumaani anujtukarmiayi. *JUITI JESUS, ISRAERA UUNT AKUPNIURI*

Tu áarmauyayi.

³⁸ Núnisan Nijjai métek jimiará kasa chikichkin untsuurnumani tura chikichnasha menaanmani krúsnum máawarmiai. ³⁹ Shuar nu nankaamainiak muuke peatar wishikiainiak ⁴⁰ tiarmiayi “Ame Yusa Uunt Jee sáakim menaintiú tsawantin jeamtajai tichakaitiam. Nekas Yusa Uchirinkiumka krúsnumia akaikim uwemprata” tiarmiayi.

⁴¹ Núnisan Israer-patri úntrisha, Israer-shuara jintinniurisha, Pariséusha, Israer-shuara úntrisha, Jesusaan wishikiainiak nuamtak tiarmiayi ⁴² “Chikichnaka uwentikrati tura Nínkikia uwemtsui. Israera Uunt Akupniurintkiunka krúsnumia akaikimtai nekas enentáimtustatji. ⁴³ “Yúsan nekas enentáimtiniaitjai” tawai. Wátsek, Yus nekas Nin aneakka uwentikrati. “Wi Yusa Uchirintjai” turamchamkaj” tiarmiayi. ⁴⁴ Kasá shuarsha Nijjai ajintruamu armia nusha Nin wishikrarmiayi.

Jesusa jakamuri
(Márkus 15.33-41; Rúkas 23.44-49; Juan 19.28-30)

⁴⁵ Nuyá tutupin ai tee ajasmiai. Túrunayat ataksha aanku tsáapin ajasmiai. ⁴⁶ Nuni ai Jesus kakantar untsumkamiayi. “Erí, Erí, rama sapaktani’ tímiayi. Nusha shuar chichamjainkia “Yusrú, Yusrú, ¿urukamtu ajapa ikiurkiniam?” tawai. ⁴⁷ Shuar nu wajarmia nusha nuna enentáimtsuk antukar tiarmiayi “Yaunchu Yúsnan etserniun Eríasan untsuawai.” ⁴⁸ Tura chikichik tsékenki we uruchin itiamiayi. Tura churuinian ajamper sapapjai ijiú mukunati tusa susamiayi. ⁴⁹ Tura chikichcha wishikeak tiarmiayi “Iníáísatá, Erías tarí uwentikratpiash.”

⁵⁰ Jesus ataksha kakantar untsamak nuyá jakamiayi. ⁵¹ Nu chichamaik Yusa Uunt Jee tarach jamu yakiiniya achik nunkaani tseu jaanakmiayi. Nunkasha úurkamiayi. Kayasha jakukarmiayi. ⁵² Núnisan iwiarsamusha uraniarmatai untsuri Yus-shuar jákarusha nantakiarmiayi. ⁵³ Nusha emka Jesus nantakmiatai niisha nantakiar iwiarsamun ikiukiar Yusa péprurin Jerusarénum wayawarmatai untsuri shuar wáinkiamiayi.

⁵⁴ Nuyá suntar Jesusaan wáinkiamia nusha tura ni kapitiantrisha nunka úurkamtu nuyá chikichcha ashammai ajasmatai ti sapijmiakarmiayi. Tura tiarmiayi “Ju áishman nekas Yusa Uchirinti.”

⁵⁵ Nuḡsha nuwā Jesusan nemariarmia nu, arant wajasar, ii wajaarmi-
ayi. Nusha Kariréanmayā pataatukiar Jesusan yaínki ejeniarmiayi.
⁵⁶ Nujai Máktaranmayā Marisha, Sepetéu nuwésha, tura chíkich Marisha
ármiai. Chíkich Marikia Jakupuncha tura Jusenchā nukuriyayi.

Jesus iwiarsamu

(*Márkus 15.42-47; Rúkas 23.50-56; Juan 19.38-42*)

⁵⁷ Kiaraj shuar ti kuítrintin Arimatéu péprunmayā ni naari Jusé támiayi.
Nusha Jesusan enentáimtiniuyayi. ⁵⁸ Nii Piratuj we Jesusa ayāshin
seamiayi. Nin súsarāt tusa Piratu akupkamiayi. ⁵⁹ Túram Jusé ayāshin
ayāshin krusnumiā jusa ti péñker tarachjai penuarmiayi. ⁶⁰ Tura
kaya wāā táurmanum yamaram amia nuḡ iwiarsamiayi. Ni iwiarsa-
tin táumtikramunam Jusé iwiarsamiayi. Iwiaras kaya uuntjai etektuk
ikiuak wémiayi. ⁶¹ Nuḡsha Máktaranmayā Marísha tura chíkich Marísha
iwiarsamunam naka ii pujuarmiayi.

Jesus iwiarsamun suntar wáinkiarmania nu

⁶² Nú kiarajin ayampratin tsawantna mash iwiarnakui Israer-patri
úuntriḡsha Paríséusha Piratuj wearmiayi. ⁶³ Tura tiarmiayi “Uuntá, nu
wáitrin áishman iwiaaku pujus “Menaintiú tsawant jakan nantaktiat-
jai” tiniuyi. ⁶⁴ Nu asamtai iwiarsamunam menaintiu tsawant suntar
wáinkiarat tusa akuptukta. Ni unuiniamurj kashi tariar tura ni ayāshin
kasamkar “Pai, nantakni” shuáran tiarajin. Jujajinkia nuna nanḡkaamas
shuáran anaḡkawarainti” tiarmiayi.

⁶⁵ Tutai Piratu tiarmiayi “Nuḡ suntar takakrume. Werum iwiarsamu
urakchamnia péñker wáinkiatárum.” ⁶⁶ Tutai wear iwiarsamun
urankashti tusar etektukma inḡkiunmanum serajai yakarar ni áarmarin
anujtukarmiayi. Tura suntarnasha awajtukarmiayi.

28

Jesusa nantakmiari

(*Márkus 16.1-8; Rúkas 24.1-12; Juan 20.1-10*)

¹ Ayampratin tsawant nanḡkaasmatai tumintin yama tsawaana aj
Máktaranmayā Marisha chíkich Marijjai iwiarsamu iyutai tusar wearmi-
ayi. ² Tumaj Yusa suntari nayaimpinmayā iwiarsamun tarí kaya atutka-
mun urak nuḡ pujusmiayi. Túmakui nunḡka ti úurkamiayi. ³ Yusa sun-
tarisha peemia tímiatrus wínchayayi. Pushirisha ti puju áuyayi. ⁴ Tura
iwiarsamun wáiniarmia nú suntarsha nuna wáinkiar ashamainiak ti ku-
ranḡkarmiayi. Jaká áinis ajasarmiayi.

⁵ Nuyá nayaimpinmayā suntar nuwān tímiayi “Ashamkairap. Jesus
krúsnum máawarmia nu eatsrumek. ⁶ Juinkia pujatsui. Nii timia núnisan
nantakniuiti. Pai, áepsarma nu ítiarum. ⁷ Wárik wérum ni unuinia-
murj “Jesus jakamunmayā nantakni tura wari Kariréanam wétatui. Nuḡ
werirum wáinkiáttarme” titiarum. Wats, nunak tájai” tímiayi. ⁸ Tutai
nu nuwā iwiarsamunmayā wárik jínkiar ashamainiyat ti warasar
tseḡe waketiarmiayi ni unuiniamurj in ujaktai tusar. ⁹ Tumaj Jesus
wantintiukarmiayi. Tura “pujarmek” takui Jesusan tariar tikishmatrar
nawencha miniakrusar shiir awajsarmiayi. ¹⁰ Túram Jesus tiarmiayi
“Ashamprukairap. Werum winia yatsur ujatruktarum. Kariréanam
weartí. Nuḡ wear wáitkiartatui. Tu ujaktarum” tímiayi.

Suntar etserkarmiania nu

¹¹ Nuwá wéarmatai iwiarsamu wáinin suntarsha péprunam wéar Israerpatri úuntrin ashí túrunamun ujakarmiayi. ¹² Niisha nuna antukar Israershuara úuntriijai áujmatsatai tusar wearmiayi. Áujmatsar suntaran ti kuít akikiar ¹³ tiarmiayi “Atumsha étserkuram “Kashi kanararin ni unuiniamuri taar Jesusa ayashin kasamkarmai” titiarum. ¹⁴ Tura akupin átum kanarman nekamtaisha niijiai ii iwiarattaji atumin yajauch awajtamsain tusar” tiarmiayi.

¹⁵ Nuyá suntarsha kuítian achikiar tiarmia nuna tímiatrusan titiái tusar wéarmiayi. Tura tuke yamaisha Israershuar tu túrunaiti tuíniawai.

*Jesus ni unuiniamurin akatar akupkamiania nu
(Márkus 16.14-18; Rúkas 24.36-49; Juan 20.19-23)*

¹⁶ Nuyá ni auntse (11) unuiniamuri Kariréanam wéarmiayi. Tura Jesus timia nú nainnium jeawar ¹⁷ nuj Jesusan wáinkiar tikishmatrarmiayi. Kame chíkichka Jesusashit tuíniayat Nin wáinkiar tikishmatrarmiayi. ¹⁸ Nuyá Jesus tíjiuch tantá tímiayi “Ashí nayaimpinmasha nunḱasha akupkatniun kakarman surusuiti. ¹⁹ Tuma asamtai ashí nunḱanam werum ashí shuar jintintiarum Wíi shuar awajsatarum. Túrarum Yus Apa náariijai, Yus Uchi náariijai, tura Yus Wakaní náariijai imiaitiarum. ²⁰ Ashí atumin Wi akatramajrum nu nútiksarmek umiktin unuiniantarum. Tura ju nekaatarum: Tuke tsawantai ikiutsuk atumjai pujuttajai” tímiayi Jesus.

Yúsan Shiir Chichamen

MÁRKUS aarmia nu

Imiakratin Juanka etserkamuri

(Mateu 3.1-12; Rúkas 3.1-9, 15-17; Juan 1.19-28)

¹ Juj Jesukristunu shiir chicham nánkameawai. Jesukristu Yusa Uchirinti.

² Yuska imiakratin Juan kan pachis ni etserniurin Isayasan ti yaunchu ni Papirin juna áamtikramiayi:

“Iisiana, ame wéamurmín emka wetí tusan winia akatramurun akupeajai. Niisha ame jintimin iwiarattawai. ³ Niisha aents atsamunam untsumuk juna títiatui: “Uunta jinti iwiarturtarum; naka awajsa-tarum.”

Nuke áarmaiti.

⁴ Wats, aents atsamunam imiakratin Juan imiaitssa pujus étseruk, ““tunaarun Yus asakatrurat” tusarum, enentáim yapajjarum imiantiarum” tímiayi. ⁵ Anturkatai tusar ashí Jutía nunkanmaya shuar tura Jerusarén peprunmaya shuarsha Njin tariarmiayi. Taar, ni tunaarin ujakarmatai, Juan Jurtan entsanam imiainarmiayi.

⁶ Juan sha kamiriu ure najantramun entsauyayi. Emenmamkesha nuapeyayi. Tura chinijai yutai-titikriatsnasha yuuyayi. ⁷ Niisha áentsun ujaak tímiayi “Wijainkia nankaamas ana nu winia ukuru winittawai. Niisha nekas ii Uuntri asantai, wikia tsuntsumpruan ni sapatri jinkiamurinkisha atitrachminiaitjai. ⁸ Wikia entsajain aya ayashmin imiaajrume, antsu Ninkia imiantinia áanis Yusa Wakaní atumí enentáim enketramprattarme” tímiayi.

Juan Jesusan imiaimiania nu

(Mateu 3.13-17; Rúkas 3.21-22)

⁹ Juan áentsun imiak pujurainiai, Jesuska Nasarét pepru Kariréa nunkanam ana nuyá jiinki Juan kan tarimiayi. Tura Juan Jurtan entsanam Jesusan imiaimiayi. ¹⁰ Nuin, Jesus entsaya jiiniuk, nayaimpin uranniun wáinkiamiayi. Tura Yusa Wakanín yámpitsa núnin najanar Njin taarun wáinkiamiayi. ¹¹ Tura nayaimpinmaya chichaamun juna antukmiayi, “Ámeke winia aneamu Uchiruitme. Ámin shiir enentáimtajme.”

Uunt iwianch Jesusan anankataj tímiania nu

(Mateu 4.1-11; Rúkas 4.1-13)

¹² Nuyá wárik Yusa Wakaní Jesusan atsamunam jukimiayi. ¹³ Tura nu, yajasma yujamunam, kuarenta tsawant pujumiayi. Nu pujai uunt iwianch Satanás naartin Jesusan nekapsataj tusa pujurmiayi. Túramtai Jesusan wáinkiatatai tusar nayaimpinmaya suntar tariarmiayi.

Kariréa nunkanam ni takatrin Jesus nankammaniania nu

(Mateu 4.12-17; Rúkas 4.14-15)

¹⁴ Ukunam, Juan kan sepunam enkeawarmatai, Jesuska Kariréa nunkanam Yusa akupeamurin pachis shiir chichaman etserki támiayi.

¹⁵ “Tsawant jeayi. Shuarnum Yusa akupeamuri jeatemai. Tuma

asantai, yaunchu enentáimsamuram yapajjárurum, Uwempratin Chicham umirkatarum” tu etserkamiayi.

Jesus namakan achinian ni unuiniamurı ajasat tusa kuaru achikmiania nu

(Mateu 4.18-22; Rúkas 5.1-11)

¹⁶ Jesus Kariréa antumianka kánmatkarıın wekas, namakan achinian Semunnasha ni yachi Antresnasha nekan ajuntuk pujuinian wáinkiamiayi. ¹⁷ Wáiniak “Nemartustarum, tímiayi. Namak achiarmena nútiksanak áentsun-eau Yusna arti tusan awajsatjarme” tímiayi. ¹⁸ Tura nuyanka ni nekarın ajapa ikiuiniak Jesusan nemarsarmiai.

¹⁹ Nuyasha Jesus ishichik arantach wesa, Sepetéu uchirın Jakupun ni yachın Juánasha kanunam ni nekarın apaa pujuinian wáinkiarmai. ²⁰ Wáiniak, nemartusta tusa unsukarmiayi. Tutai ni aparıncha, ni aparı takarniurıncha kanunam ikiuiniak Jesusan nemarsarmiai.

Jesus iwianchin áishmannumia jıiki akupkamina nu

(Rúkas 4.31-37)

²¹ Nuyá Kapernáum péprunam jeawarmiayi. Nui Israer-shuara ayampratin tsawanrı jeakui Jesus Israer-shuar iruntainiam wayá Yus-Chichaman unuiniamiayi. ²² Tura ni jintinniurı jintintiarmia nuna iniankas uunt chichamjai Jesus jintiakui ni chichamen anturkar ti enentáimprarmiayi. ²³ Nuiasha nu iruntainiam áishman iwianchruku ámiayi. Niisha unsumuk ²⁴ “¿Warı itiurtamkatsamea incha taum, Nasarénumia Jesusa? Wikia nékajme. Ámetme Tunaartichu Yúsaiya winiamna nu. In emestamprataj tusam táchamek” tímiayi.

²⁵ Tutai, Jesus kakantar chicharuk “Takamátsatá. Ni enentáiya jıinkitia, tájame” tímiayi.

²⁶ Tutai iwianch áishman kan ukurak ajakniıkiar unsumak kakaar aa jıinkimiayi. ²⁷ Nuna wáinkiar, ashamkar nuámtak aniniaisarmiayi. “¿Ausha warinkit. Yamaram chicham warı chichamait? Ju Jesuska timiá kakaram asa ímia iwianchin akupeatsuk. Iisiana umirainiatsuk” tiarmiayi. ²⁸ Tura ti wárik nu túrunamu ashı Kariréa nunkanam antunkamiayi.

Jesus Semunka tsatsarın tsuármiania nu

(Mateu 8.14-15; Rúkas 4.38-39)

²⁹ Nuyá Israer-shuara iruntai jeenia jıinki Jesuska Jakupujai Juanjai sha we, Semunı ni yachi Antresjai pujuarmia nui jeawarmiayi. ³⁰ Semunka tsatsarı tsuer peaknum jaa tepemiayi. Núnaka wárik Jesusan ujakarmiayi. ³¹ Nuınkia Jesus werı uwejnum achik iniantkimiayi. Tura nu chichamaik michatramiayi. Michatar, péıker ajas, Jesusnasha ni nemarniurıncha ayurawarmiayi.

Untsurı jaan Jesus péıker awajsarmiania nu

(Mateu 8.16-17; Rúkas 4.40-41)

³² Nu tsawantaj kıaraj, ashı jáinian, iwianchrुकuncha Jesusan itiararmiayi. ³³ Tura ashı nú péprunmaya shuar taar wáitiniam Jesusan káutkarmiayi. ³⁴ Untsurı shuáran chıkich sunkuraim jáinian Jesus tsuararmiayi. Tura iwianchruku armia nuna enentáıyan iwianchin jıırkiarmiayi. Jesuska iwianch nékamu asa, winia náarun ántar pachisarajın tusa suritkiarmiayi.

*Kariréa nunkanam Jesus Yus-Chichaman etserkamiania nu
(Rúkas 4.42-44)*

³⁵ Nuyá kashin káshik tsawaatsain Jesus nantaki Yúsan áujsataj tusa jinki atsamunam wémiayi. ³⁶ Tura Semun ni amikrijijai Jesus wemaanum wéarmiayi. ³⁷ Nin wáinkiar “Ashi shuar Ámin eátmainiawai” tiarmiayi.

³⁸ Tutai Jesus chichaak “Chíkich péprunmasha arantach wetai. Nuj Yusa chichame etserkatai; nuna túrattsan táwitjai” tímiayi.

³⁹ Nuna ti ashí Kariréa nunkanam Israer-shuar iruntai jeanam etseras wekaimiayi; tura núnisan iwianchniasha jiiki akupkini wekaimiayi.

*Tunamaru shuaran Jesus tsuármiania nu
(Mateu 8.1-4; Rúkas 5.12-16)*

⁴⁰ Túramtai, ti tunamaru shuar Jesusan seatajtsa tarimiayi. Taa tikishmatar tímiayi “Wakerutakmeke tsuaratin tujintratsme.”

⁴¹ Jesus nin waitnentak uwejejai antiñmiayi. Antiñ “Wakerajme. Péñker ajasta” tímiayi. ⁴² Nu chichamaik, Jesus chichakmatai, ni sunkurj menkakamiayi. Tura péñker ajasmiayi. ⁴³ Túrunamtai Jesus kakantar chicharuk ⁴⁴ akupeak “Wáinkiatá, nánkamsam etseraip, tímiayi. Antsu weme, Israer-patirmin iniakmamsata. Túram ashí aents ame péñker ajasmarumin nekaawarat tusam, Muisais aar akupkamiania nu umikiam súsatin ana nu susata” tímiayi. ⁴⁵ Tura etserkaip támaitiat, jiinki ni túrunamurin mash etseramiayi. Tura nuna etserka asamtai, péprunam, aents írunmanum wétinian Jesus nakitramiayi, antsu aa atsamunam pujumiayi. Tura ashí nunkanmaya Jesusan tariarmiayi.

2

*Jesus emearun péñker awajsamiania nu
(Mateu 9.1-8; Rúkas 5.17-26)*

¹ Kapernáum péprunam Jesus ukunam ataksha wémiayi. Jeamtai, ni jeen pujan nekaawarmiayi. ² Tuma asamtai shuar wárik ti untsurj káutkarmiayi. Ti untsurj asamtai, jea piakmiayi; wáitinmasha ankantchauyayi. Jesuska Yus-Chichaman nu aentsun ujaak pujurmiayi. ³ Nuinkia ni amikrin emearun kuaru shuar tampumpuwar júkiar Jesusan itiararmiayi. ⁴ Tura jeawar, untsurj shuar írunu ásamtai jeá wayatniun tujinkiararmiayi. Tuma ásar, yakinini wakar jea urakar, áankawar, tampunam ni amikrin Jesus pujamunam awaintiuwar itiararmiayi. ⁵ Tura niisha Jesus nekas tsuártatui tu enentáimmiarin Jesus nekáa emearun chicharuk, “Uchirú, ame tunaarumka tsankuramuiti” tímiayi.

⁶ Israer-shuara jintinniurisha nuna antúu pujuarmiayi. Tura ni enentáijjai enentáimsar, ⁷ “¿Yusha urukamtai emearun tu chichara? Yúsan imiá yajauch chicharui. Warí, yaki tunaan asakarminiait; aya Yúsak tunaan asakarchamniakait” tu enentáimsarmiayi.

⁸ Jesuska ni enentáimmiarin nekarawar “¿Urukamtia átum tu enentáimprum? tímiayi. ⁹ Emearu, tunaarum tsankuramuiti títinjai, emearu, wajakim tampuram entsakim wekasata títinjai ¿tuá imiá yúpichuchit? ¹⁰ Wats wi, Aents Ajasu asan Yusa kakarmarijijai shuara tunaari tsankuramniaitjiana nuna paant iwiaintiuktajrume” tímiayi. Nuna tinia emearun chicharuk ¹¹ “Wajaktia, tájame; túram tampuram

jukim jéemjin wetá” tímiayi. ¹² Nu chichamaik emearu wajaki, tampurin jukí, ashí íimiainiajn jíinkimiayi.

Nuna túrunamtai ashí ashamkarmiayi. Tura “jútikiamu penké wáinchaitji” tiar Yusa náarin uunt awajsarmiayi.

Jesus Riwin untsukmiania nu

(Mateu 9.9-13; Rúkas 5.27-32)

¹³ Nuyá ukunam Jesus antumiannum waketkimiayi. Tura ashí shuar káunkarmatai jintintiawarmiayi. ¹⁴ Tura jintintiawar amuk, akupin akitiai jeanam nankaamak, Arpeu uchirin Riwin pujan wáinkiamiayi. Wáiniak “Nemartusta” tímiayi. Tutai Riwi wajaki Jesusan nemarsamiayi. ¹⁵ Chíkich tsawant, Riwisha Jesusan ni jeen itiaamiayi. Tura untsurí kuítian-juu shuarsha, yajauch shuarsha Jesusjai ni unuiniamurijjaisha ashí nuim misanam pujuarmiai. ¹⁶ Tura kuítian-juu shuarsha yajauch shuarsha Jesusjai irunar yurumáinian wáinkiar, Pariséu jintinniurisha Israer-shuara jintinniurisha Jesusa unuiniamurin aniasarmiayi. “¿Urukamtai ame úntrum Jesus, kuítian-juu shuarjai tura yajauch shuarjaisha yuruma?” tiarmiayi.

¹⁷ Jesus nuna antuk tímiayi “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “pénkeraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiayi.

Yurumtsuk Yus áujsatniun Jesusan aniasarmiania nu

(Mateu 9.14-17; Rúkas 5.33-39)

¹⁸ Juanka unuiniamurisha Pariséu unuiniamurisha yurumtsuk Yúsan áujiarmiayi. Túmakui chíkich shuar Jesusan tariar chicharainiak, “Juanka unuiniamurisha, Pariséu unuiniamurisha yurumtsuk Yúsan áujainiatsuk; ¿ame unuiniamurmeka urukamtai yurumtsuk áujainiatsu?” tiarmiayi.

¹⁹ Tutai Jesus chichaak, “¿Nuatma nampernum ipiaamu ainia nu ijiarmawartiniak ainia? Yama nuatu pujakuí ni amikri warainiak ijiarmachartin ainiaawai. Núnisan winia unuiniamur, Wi pujakuí, warainiak yurumtsuk pujuschartin áiniawai. ²⁰ Tura tsawant jeattawai, Winia jurukiartin. Nuiñkia winia unuiniamur ijiarmawartatui’ tímiayi Jesus.

²¹ Tura nuyá juna tímiayi ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chiníkiá nuna nankaamas jáaktatui. ²² Nijiamanch yamáí nawar nuap najanamu arutnum yaraachminiaiti. Túramka wakaprua kariak nuap najanamu ijiakratniuiti. Tura nijiamanch ukarattawai. Nuap najanamu yajauch ajastatui. Antsu yamaram nijiamanch yamaram nuap najanamunam yaraatniuiti” tímiayi.

Trikiu neren yuawarmiania nu

(Mateu 12.1-8; Rúkas 6.1-5)

²³ Chíkich ayampratin tsawantai Jesus ajanman ajapén nankaamarmiayi. Tura ni unuiniamuri trikiu neren majukiar wearmiayi. ²⁴ Nuna wáinkiar Pariséu Jesusan chicharainiak “¿Warí, urukamtai ame unuiniamuram ayampratin tsawant takastin surimkiamu aisha takainia?” tiarmiayi.

²⁵ Tutai Jesus tímiayi “Íi uuntri Tawitia túramuri Yús-Papinium áusachukaitrum. Niisha ni nemarniurisha tsukamainiak, ni yurumkarí atsakuí, túrawarmia nu áusachukaitrum. ²⁶ Apiatár Yusnan pujurniu

uuntri pujai Uunt Tawit Yusa Jeen wayamiayi. Tura Tawitkia, patri nankaamas uunt asa, pátrichuiat, iniaktusma tantan, aya patri yútainiak, yuamiayi; tura ni nemarniuríncha ajamsamiayi. Nu áujsachukaitrum, tímiayi. ²⁷ Ayampratin tsawantaj túrashtinian umirkashtimpiash tusa Yuska aentsun najanachmiayi. Antsu aents ayamprarat tusa Yus ayampratin tsawantan tesamiayi. ²⁸ Wissha, Aents Ajasu asan imia ayampratin tsawantan Nerenniurintjai” tímiayi.

3

Uweje jakan Jesus tsuármiania nu

(Mateu 12.9-14; Rúkas 6.6-11)

¹ Ataksha chíkich tsawantaj Israer-shuar iruntainiam Jesus wayamiayi. Nuí shuar ámiayi, ni uweje jaka. ² Tura tunáan túrayi titiai tusar wakeruiniak “ayampratin tsawantaj tsuártimpiash” tusar, Pariséu shuarsha Jesusan ii pujuriarmiayi. ³ Nuínkia Jesus uweje jaka shuaran chicharuk “Ajapén wajasta” tímiayi. ⁴ Nuínkia mamikmaun chicharuk “¿Ayampratin tsawantaj péñker túratin yajauch túratniujai tuá imiá péñkerait. Shuar uwentikratin máatniujai tuá imiá péñkerait?” tímiayi.

Nuna takui niisha pachischarmiayi.

⁵ Tura Jesus kajek nin íyarmiayi; tura ni enentáin kátsum ásarmatai kúntuts enentáimsamiayi. Tura shuáran chicharuk “Uwejem iniakmasta” tímiayi. Iniakmasmatai ni uweje jaruku ataksha péñker ajatsamiayi. ⁶ Nuyá Pariséu shuar jíinkiar, Jesus maami tusar Erutis shuarjai áujmatsarmiayi.

Untsurí shuar Jesusan káutkarmiania nu

⁷ Nuyá Jesus ni unuiniamuríjjai antumiañnum wémiayi. Kariréa nunkanmaya untsurí shuarsha Jesusan nemariarmiayi. ⁸ Untsurí nunkanmayasha káunkarmiayi. Jutía nunkanmayasha, Jerusarén péprunmayasha, Itiumía nunkanmayasha, Jurtan entsa amainiasha, Tiru tura Setun pepru pujuinia nú nunkanmayasha, untsurí shuar ni túramurín nekaawar, Jesusan káutkarmiayi. ⁹ Untsurí káunkar chanuntawarain tusa Jesus ni unuiniamurín kanuram inianáastarum tusa seamiayi. ¹⁰ Kame untsurí shuaran Jesus nuik tsuaru asamtai, jaa shuar nuí káunkarmiania nu Jesusan antiñtaj tusar shitianainiakui nuna seamiayi. ¹¹ Tura iwianchrukusha Jesusan wáinkiar tikishmatrarmiayi. Untsumainiak “Ame nekas Yusa Uchirínme” tiarmiayi. ¹² Tura nuna etserkairap tusa Jesuska kakantramiayi.

Jesus tuse shuaran anaikiarmiania nu

(Mateu 10.1-4; Rúkas 6.12-16)

¹³ Nuyá Jesus náinnium wakamiayi. Tura anaikiatniun wakerimia nú shuaran untsukmiayi. Tura niisha Jesusan weriarmiayi. ¹⁴ Tura Níjjai wekasar Yus-Chichaman unuinartinian tuse shuáran anaikiarmiayi. ¹⁵ Tura sunkur tsuártinian, iwianchcha jíiki akupkatniun ni kakarmarín súarmiayi nú shuaran. ¹⁶ Ju shuáran anaikiamu ármiai: Semun, Jesus chíkich naarin Pítur apujtusmiania nu; ¹⁷ Sepetéu uchirí Jakupu, ni patai Juánsha; ípiamtajai métek kakaram ásarmatai nuna mai “Puanérjis” naari susamiayi. Nusha shuar chichamjainkia “ípiamta nuke” tawai. ¹⁸ Nuyá Antressha, Jiripi, Parturumí, Mateu, Tumas, Arpeu uchirí Jakupu,

Tateu, ásump Semuñ, ¹⁹ Jútas Iskariúti. Jesusan ukunam surukmia nú Jútasauyayi. Anaik amukmatai jeá waketrarmiayi.

Yusa Wakanin yajauch chicharna nu
(Mateu 12.22-32; Rúkas 11.14-23; 12.10)

²⁰ Waketkiarmatai, ti untsurí shuar taarmatai takatři ti akui, yurumátniun jeacharmiayi. ²¹ Jesusa shuarisha nuna nekaawar Jesus ti itiurchat pujus wáurtsuash tu enentáimsar jukitiai tusar nu jeanam jeariarmiayi.

²² Nuyá Israer-shuara jintinniuri Jerusarennumia táarmiania nu, Jesusan áujmatainiak “Pirsepu enkea asa iwianchrukuiti. Tuma asa uunt iwianchi kakarmarijiai iwianchin jiki akupeawai” tiarmiayi.

²³ Tutai Jesus winitiarum tusa nin untsukmiayi. Tura enentáimtikrataj tusa juna tímiayi: “¿Iwianch Satanáskesha itiur ajapmamatın? ²⁴ Chikichik nú nunkanmaya shuar nuámtak kajernaiakuınkia, nu nunka wari meserchattawak. ²⁵ Nuámtak shuar ni shuarjiai kajernaiakuınkia nu shuarsha amunaikchartatuak. ²⁶ Núnisan ¿Satanáskesha ni suntarijiai máaniakka itiurak tuke pujusarat? Amunaikiartatui. ²⁷ Nánkamas shuar kakaram shuara jeen wayá, nérenniun jinkiatsuk ni kuıtrın kasarkachminiaiiti. Antsu nérenniun jinkiá ni kuıtrın kasarkamniiaiiti. ²⁸ Nekas tájarme, shuar tunáa ashı túruiniana nuka tsankuramniiaiiti. Winiasha winia Aparnasha yajauch áujmatasha tsankuramniiaiiti. ²⁹ Antsu Yusa Wakanin yajauch áujmatna nuka tsankurachminiaiiti; antsu nu shuar ninki tuke sumamattawai.” ³⁰ “Jesuska iwianchrukuiti” tuıniakui Jesus nunı tímiayi.

Jesusa yachi Jesusa nukurı
(Mateu 12.46-50; Rúkas 5.19-21)

³¹ Nuyá ni yachi ni nukurıjiai taar aa wajasar, Jesusan untsukat tusa akupkarmiayi. ³² Shuar Jesusan téntak pujuarmia nu tiarmiayi “İis, nukusha, yatsumsha aa wajasar untsurmainiawai.”

³³ Tutai Jesus chichaak “Ya ainia winia nukursha yatsursha” tímiayi. ³⁴ Nin téntakar pujuarmia nuna iis “Júiti winia nukurka, yatsurka, tímiayi. ³⁵ Shuar Yusa wakeramurın uminiana nu winia yatsuruiti, winia umaruiti, winia nukuruiti” tímiayi.

4

Atsaamin atsaampramiania nu
(Mateu 13.1-9; Rúkas 8.4-8)

¹ Nuyá jiinki antumianka yantamen Jesus ataksha unuiniartinian juarkimiayi. Tura untsurı shuar iruntrarmatai, kanunam enkempramiayi. Shuarsha antumianka káanmatkarın pujuarmiayi. ² Jesuska métek-taku chichamjai ti jintintiarmiayi. Jintintiuk juna tímiayi: ³ “Antuktarum. Atsaamin atsaamprataj tusa jinkimiai. ⁴ Atsaamkui ni arakři jintiá iniararmai. Chınki yakiya káutkar yuawarmai. ⁵ Chikichcha kaya ırınmanum iniararmai, nunka ishichik ámanum. Tura nunka ishichik asamtai wárik tsapainiarmai. ⁶ Tura etsa etsantar sukuám kanıape atsa asamtai káararmai. ⁷ Chikichcha janıı nupanam iniararmai. Janıısha tsapainiar kanıkar ajakrarmai; túram nerekcharmai. ⁸ Chikichcha péıker nunkanam iniararmai. Tura

tsapainiar nerekarmai, chíkich trainta, chíkich sesenta, chíkich sian nerekarmai. ⁹ Kuíshim ákuin̄kia antuktarum” tímiayi.

(Mateu 13.10-17; Rúkas 8.9-10)

¹⁰ Untsurí wearmatai, ishichik Niijjaj juakarmiania nu, ni tuse unuini-amurijjaj aniasarmiayi “¿Ame jintintiamna nusha warimpiait?” tiarmiayi.

¹¹ Tutai Jesus chichaak “Yuska ni akupeamurín atumin paant nekantikramattsa wakerutmarme. Antsu chíkich shuarka aya métek-taku chichamjaj jintintiáwartatui. ¹² Íniayatan wáinkiacharat tusa, antukarsha nekaacharat tusa, umirtsuk ni tunaarj tsan̄kurnacharat tusa túrattawai’ tímiayi.

(Mateu 13.18-23; Rúkas 8.11-15)

¹³ Tura tímiayi ‘Wí jintintiajrumna nú métek-taku chicham nekaachurmek. Nu nékachkurmeka žitiurak chíkich métek-taku chichamsha nekaatarum? ¹⁴ Atsaamniua nuka Yus-Chichaman étserna nuna nakumui. ¹⁵ Jin̄kiái jintiá iniaarua nuna chíkich shuar ántuiniamun nakumui. Nu shuar chichaman ántuiniawai. Tura antukarmatai Satanás wárik tarí ni enentáin atsaampramun jurawai. ¹⁶ Chíkich shuar ántuiniamu kayanam atsaampramua núniskete. Niisha chichaman antukar wárik warainiak umiktasa wakeruiniawai. ¹⁷ Tura ni kan̄kape atsakui, aya ishichik katsuiniawai. Tura ukunam, Yus-Chichaman wakeruiniakui shuar kajeram tura chíkich itiurchatan wáinkiar Yúsajya kanainiawai. ¹⁸ Chíkich ántuiniamuka jan̄kí nupanam atsaampramua núniskete. Nu shuar Yus-Chichaman ántuiniawai. ¹⁹ Ántuiniayat ju nun̄kanam ana nuna ti páchiniawai. Tuma ásar kuítian tura shiirmachin ti takustinian wakeruiniawai. Nú wakeramu ni enentáin Yus-Chicham ana nuna kan̄kar emen̄katui. Tuma asamtai nerektinian tujintiainiawai. ²⁰ Tura chíkich ántuiniamusha péñker nun̄kanam atsaampramua núniskete. Nú shuarsha Yus-Chichaman antukar umiiniawai. Tura nerenawai, chíkich shuar trainta, chíkich shuar sesenta chíkich shuar sian̄sha nerenawai.’

Uukma ana nu paant nekanattawai

(Rúkas 8.16-18)

²¹ Nuyá Jesus juna tímiayi ‘¿Shuar shiripkin ekeemak itiá pitiaknum en̄keattawak. Peaknum wakenam ikiustatuak? Atsá. Antsu misanam ekentsashtinkiait. ²² Núnisañ ashí uukma ana nu ukunam paant nekanattawai. Tura núnisañ yamá ishishmasa chichasmasha ukunam paant nekanattawai. ²³ Kuíshim ákuin̄kia antuktarum.’ ²⁴ Tura nuyá tímiayi ‘Ántarmena nu esetrarum enentáimsarum antuktarum. Urutá péñkerak enentáimsatarum, núnisañ Yuska ámin nekaatniun suramsatarme, tura nú núkap patatramsattarme. ²⁵ Tuma asamtai shuar núkap takakna nu patatnastatui. Antsu chíkich shuar ishichik takakuk jurunkittiawai.’

Yusa akupeamurí júnisaiti

²⁶ Nuyá Jesus chichaak juna tímiayi ‘Yusa akupeamurí júnisaiti. Shuar jin̄kiain atsaampratniua núniskete. ²⁷ Jin̄kiáin atsaamar, untsurí kanar, tsawar, uruksanpi tusa nákwai. Tura itiura tsapainia núnaka nékatsui. ²⁸ Kame jin̄kiái nun̄kanam init aku niñki tsapaatsuk; emka nukareawai,

nuyá tuyureawai tura nujamar katsuawai. ²⁹ Túruna káakmatai júuktin tsawant jeayi tusar júniawai.’

(Mateu 13.31-32; Rúkas 13.18-19)

³⁰ Ataksha Jesus tímiayi ‘¿Yusa akupeamuri warijiaink’i nakumkataj. Warijiaink’i métek-takuit? ³¹ Mustasa jinkiaí araamua nujai métek-takuiti. Nu jinkiaisha ashí nankaamas ishitiupchichiti. ³² Tura araam tsapáí ashí nankaamas uunt ajawai; tura tsenkeakmarisha kámpuram asamtai nui mikintranam chin’kisha shiir ayamainiawai.”

(Mateu 13.34-35)

³³ Núnisan Jesus untsurí métek-taku chichamjai Yus-Chichaman ujaamiayi. Nii nekaatniun jearmia nunak ujaamiayi. ³⁴ Chíkich shuaran aya métek-taku chichamjai ujaamiayi; antsu ni unuiniamurijjai Nínki pujus ashí paant jintinrarmiayi.

Nasencha, entsancha Jesus imijíánmia nu

(Mateu 8.23-27; Rúkas 8.22-25)

³⁵ Nu tsawantai etsa akaikimtai Jesus ni unuiniamurin chicharainiak “Entsa amain katintai” tímiayi. ³⁶ Tutai kanunam enkemprarmiayi. Chíkich shuarnaka káanmatkanam ikiukiar Jesusan kanunam pujan júkiarmiayi. Chíkich kanunmayasha atampriarmiayi. ³⁷ Tura nasesha ti nasenkatasa nan’kammiayi; chíchimi kanunam yaráná piáktasa ajamiayi. ³⁸ Jesuska kanú senkarin atamprus kanúu tepemiayi. Tura, ni unuiniamurí Jesusan ishintiak chicharuk “Uunta ii wayajnia júka pachitmatmek” tiarmiayi.

³⁹ Tutai Jesus nantaki nasen kakantramiayi. Entsancha chicharuk “Takamatsata. Miaku ajasta” tímiayi. Tutai nasesha men’kakamiayi, entsasha miaaku ajasmiayi. ⁴⁰ Túrunamtai Jesus ni unuiniamurin chicharainiak “¿Urukamtai ashamarum? Itiura Yus nekas enentáimtatsrum” tímiayi. ⁴¹ Tura imiá ashamainiak “¿Maa júsha yait? Nasesha entsasha nin umirainiatsuk” tunaiyararmiayi.

5

Jataranmayan iwianchrुकun Jesus tsuármiania nu

(Mateu 8.28-34; Rúkas 8.26-39)

¹ Nuyá antumian amaini Jatara nun’kanam jeawarmiayi. ² Jesus kanunmaya jinkimtai áishman iwianchrुकu, shuar jakáa iwiartainiumia wárik taa Jesusan inkiumiayi. ³ Nu shuar iwiartainium tuke pujuyayi. Tura jirujainkia nin jinkiaatniun tujinkiararmiayi. ⁴ Jirujai nawenmasha, uwejnusha tuke jinkiau ármiayi. Túramaitiat jinkiaarman tsuriar tepet-tepet awajmiayi. Tura ti kakaram asamtai nin nupetkachminiuyayi. ⁵ Tuke tsawaisha káshisha, iwiartainiumsha murasha kayajai ijiunak untsumuu wekainiuyayi. ⁶ Tura yajayan wáiniak Jesusan tseke tarimiayi; tura tikishmatramiayi. ⁷⁻⁸ Túrunamtai Jesus chicharuk “Iwianchiá, ni enentáiya jinkitia, tájame” tímiayi.

Takui iwianch kakantar chichaak “¿Winiasha urukamtai tarutnium, Uunt Nan’kaamaku Yusa Uchiri Jesúsá? Yus iirmanum wáitkiarsaip, tájame” tímiayi.

⁹ Takui Jesus tímiayi “¿Ame náarmesha yait?”

Tutai niisha ayak “Untsurí ásar wikia Untsurí-suntar tu anaikiamuit-jai” tímiayi.

¹⁰ Nuna ti amik, nu nunkanmaya akuptukain tusa Jesusan ti seamiayi. ¹¹ Nujsha nainnium nuntumas untsurí kuchi shushunmak matsamarmiayi. ¹² Tuma asamtai, kuchiniam enkemátin tsankatrukta tusar Jesusan seawarmiyai.

¹³ Tuiniakui Jesus “ayu” tímiayi. Takui íwianch áishman̄kainiā jíinkiar kuchiniam enkemáwarmiyai. Kuchisha ti untsurí, jimiará mir (2.000) áchiawash. Ashí mash nánatanam iniaawar antumian̄num inian̄karmiyai. Nujsha entsá k̄iakar jakerarmiyai.

¹⁴ Túrunamtai kuchin wáinin pisarar péprunmasha shuarnumsha nuna etserarmiyai. Tuma asamtai iyutai tusar ashintiukarmiyai. ¹⁵ Túrawar Jesusai jeawarmiyai. Jeawar áishman̄ yaunchu iwianchrukun ya- maikia péñker ajasun pushir̄in entsar pujan wáinkiararmiyai. Wáinkiar ashankarmiyai. ¹⁶ Tura wakеткиar kuchi túrunamuncha iwianchrukun péñker ajasman̄cha mash etserkarmiyai. ¹⁷ Tuma asamtai ni nunkeya j̄iinki wetá tusa seawarmiyai. Jesus kanunam enkemamtai áishman̄ nuik iwianchrukun amia nu Jesusan chicharuk ¹⁸ “Wi Ámij̄jai tuke tsan̄inkian wekasatjai” tímiayi.

¹⁹ Tura núnaka Jesus suritkiamiayi. “Antsu ame jeem̄jin, áminiurm̄jin weme, ashí Uunt Yus túrutma nu tura waitnentrampa nusha ujakarta” tímiayi.

²⁰ Tutai áishman̄sha wémiayi. Tura antsu Tekapuris nunkanam Jesus nin péñker awajsamia nuna ashí shuaran ujakmiayi. Nu nunkanmaya shuarka nuna antukar ti enentáimprarmiyai.

*Jimiará jaan Jesus tsuármiania nu
(Mateu 9.18-26; Rúkas 8.40-56)*

²¹ Ataksha Jesus kanujai katin̄matai, aents untsurí Nin irunturarmiyai. Jesuska antumiānka káanmatkar̄i wajamiayi. ²² Tura Israer-shuar iruntai jeā náampruku, ni naar̄i Jairu, támiayi. Taa, Jesusan wáiniak, piniakum tepersamiayi. ²³ Piniakumar ti seak, “Winia nawantur jarutui. Winitia, túram péñker ajasat tusam uwejm̄ij̄jai antin̄trukta. Nuiñkia jarutkashtatui” tímiayi.

²⁴ Tu tímiatai Jesus niij̄jai wémiayi. Tura untsurí shuar wena ásar Nin chánuararmiyai.

²⁵ Nuj pachitkia nuw̄a ti jaa wémiayi. Niisha tuse uwi numpan ajapeak wáitias pujuyayi. ²⁶ Ti untsurí tsuakratin nincha iisu armiyai. Tura iyamsha ti wáitias pujuyayi. Tura ni kuitr̄incha ashí ajapaitiat tsuámarchauyayi; antsu tsuamsha nu arant ajauyayi. ²⁷ Nu nuwasha, Jesus túramun antuku asa, ni ukuurin̄j amainiān̄ ni pushir̄in antin̄miayi. ²⁸ “Wi aya ni pushir̄in antin̄naka péñkerapi ajasaint̄jia” tu enentáimiar túramiyai. ²⁹ Tura Jesusa pushir̄in antin̄ nú chichamaik numpa ájapman men̄kakamiayi. Péñker ajasman̄ ayash̄iin nekapramiayi. ³⁰ Tura nuiñ Jesuska, ni kakarmar̄ij̄jai tsuarman nekapmampramiayi. Tura nuna nekáa, ayantar chichaak “¿Yaki winia pushirun antin̄truka?” tímiayi.

³¹ Tutai ni unuiniamur̄i tiarmiayi, “Untsurí Ámin antin̄mainiasha ¿urukamta “yaki winia antint̄kia” tame?”

³² Tura Jesus, yaki túruta tusa ashí ímpramiayi. ³³ Nuiñkia nuwasha, ni ayash̄in túruna nuna nekáa, ti ashamak kuraimiyai. Tura Jesusan jear̄i

tikishmatramiayi. Tura ni túrunamurín ashí paant ujakmiayi. ³⁴ Takui Jesus nin chicharuk “Nawantru, Winia nekas enentáimtursa asakmin, péñker awajtamsaitme. Shiir wetá, tura tuke péñker pujusta” tímiayi.

³⁵ Tura Jesus nuna tuke chichas pujaj, iruntai jea uuntri jeenia tariarmiayi. Tariatr chicharainiak “Ame nawantrum jakayi. ¿Urukamtai Unuikiartin tuke itit awajsatam?” tiarmiayi.

³⁶ Tura Jesuska, nii tiarmia nuna ántayat, núnaka pachitsuk, iruntai jea uuntrin chicharuk “Ashamkaip; áyatik nekas enentáimtursata” tímiayi. ³⁷ Tura Niijjai wétinian aya Pítruncha, Jakupuncha ni yachi Juanjai tsankatkarmiayi. ³⁸ Iruntai jea uuntri jeen jeawar, áentsun charaatum ajainian, útainian untsukum ajainiancha Jesus wáinkiamiayi. ³⁹ Tura nuwach penké jakan nékayat, wayá nin chicharuk “¿Urukamtai timiá útrum, tura wa wa ajarum? Nuwach jákachai, antsu kanarai” tímiayi.

⁴⁰ Nuna takui wishikrarmiayi. Tura Jesus ashí jiiir akupkarmiayi. Áyatik nuwachí aparín, nukuríncha tura Niijjai táaruncha nuwachí tepamurín jukimiayi. ⁴¹ Tura wayawar Jesuska nuwachí uwejen achik tímiayi “Taritia kumi.” Nusha shuar chichamjainkia “nawantrú nantáktiá” tawai. ⁴² Nuwach tuse uwí takakuya nu, nú chichamaik nantaki wekasamiayi. Túramtai nuj pujuarmiania nu ti enentáimprarmiayi. ⁴³ Jesuska chichaak “Atumsha penké etserkairap’ tímiayi. Tura “nuwach ayuratarum” tímiayi.

6

Jesus Nasarénum pujusma

(Mateu 13.53-58; Rúkas 4.16-30)

¹ Jesus nuyá jiiñki ni nunken waketkimiayi. Ni unuiniamurisha nemariarmiayi. ² Nuisha ayampratin tsawant jeamtai Israer-shuar iruntainiam wayá unuiniamiayi. Tura Jesusan anturkarmiania nu ti enentáimsarmiayi. “¿Jusha tuj unuimiaruit. Ni nekaatniuríncha yaki susait. Tura aentsti tujintiajnian nuna Niisha itiurak tura? ³ Jusha karpintíruhukait; Marí uchirínchukait. Ni yachisha Jakupusha, Jusesha, Jútassha, Semunsha nékatsjik. Tura ni umaisha juj iijjai pujuiniatsuk” tiarmiayi. Túrawar Nin nekas enentáimtustinian tujinkiararmiayi.

⁴ Túrasha Jesus nin chicharuk “Yúsnan etserniun chíkich nunkanmayaanka shiir anturainiawai. Antsu ní nunkeyañka, ní shuarsha anturainiatsui” tímiayi.

⁵ Tura nuisha, ni nunkenkikia aentsti tujintiamun túratniun tujinkiamiayi. Antsu jaancha aya ishichik ni uwejejai antiñ tsuarmiayi. ⁶ Tura nekas enentáimtacham “¿urukamtai nusha?” tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuúniakní wekaimiayi.

Yus-Chicham etserkatarum tusa Jesus ni unuiniamurín akupkarmiania nu

(Mateu 10.5-15; Rúkas 9.1-6)

⁷ Tuse unuiniamurín untsuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmarín súsararmiayi. ⁸ Tura chicharuk “Jintiá yurumatniusha jukiirap, uyuntrumijncha kuitcha enkearum jukiirap. Antsu aya áanik mashtun

jukiirum wetarum. ⁹ Sapat uwekatarum, tura entsartincha jímiar jukiirap, tímiayi. ¹⁰ Tura jea wayarmena nuñ pujustarum; pujá-pujakuarum nuyá chíkich peprunmasha wetarum. ¹¹ Tura nánkamas aents atumin awaintiamainiachkuisha, anturtamainiachkuisha, nuyá jíinkirum, nu shuar yajauch ániawai tusarum, atumí nawe nuñka akakekrum ikiuktiarum. Kame Yus áentsun nekapsattana nú tsawant jeamtai, nu shuarnaka asutiattawai. Sutuma péprunmaya shuarjai tura Kumura péprunmaya shuarjai nankaamas nin asutiattawai” tímiayi Jesus.

¹² Nuyá Jesusa unuiniamuri jíinkiar enentái yapajjar Yúsai enentáimtumartinian etserkarmiayi. ¹³ Tura iwianchruku enentáiyá iwianchin jíirki akupkarmiayi, tura asuitijai yakarar untsurí jáinian tsuararmiayi.

Juanka jakamuri

(Mateu 14.1-12; Rúkas 9.7-9)

¹⁴ Jesusa náarin tura ni túramurin ashí aents áujmatin ásarmatai, uunt akupin Erutis nuna antukmiayi. Erutiska “Imiakratin Juan jakamunmaya nantakni. Tuma asa ti kakaram takaawai” tímiayi. ¹⁵ Tura chíkich shuar “Eríasaiti” tiarmiayi. Chikichcha “Yúsnan etserniuiti, yaunchu etserniuya nukete” tiarmiayi. ¹⁶ Erutis nuna antuk “Nekas Juánkaiti. Ni muuken tsupiktinian akupkamiay nu, jakamunmaya nantakniuiti” tímiayi. ¹⁷⁻¹⁹ Kame Uunt akupin Erutis, ni yachi Jiripi nuarín nuatkamiayi. Nu nuwa naarí Jirutíasaiti. Juansha uunt akupniun Erutisan chicharuk “Yatsumi nuarí akintrukchatniuitme’ tímiayi. Tutai nuwa Jirutías Juánkan ti kajerkamiayi. Tura Juánkan máataj tusa wakerimiayi. Túrasha uunt akupin Erutis nuna surimkiamiayi. Antsu Juan achikrum sepunam enkeatarum tusa akupkamiayi. ²⁰ Juansha tuke enentáijjai Yusa jintín wekainiuyayi. Erutis, ni esetar enentáimniun neka asa Juánkan ashamak Jirutías wakeramurin túrawain tusa suritkiamiayi. Kame Erutis Juan étserman nékachuiat antuktinian wakerimiayi.

²¹ Jirutías, itiurak máawaj tu pujai, uunt akupin Erutis, ni akiiniamu tsawantri jeamtai, ni suntarincha, Kariréa nuñkanmaya úntrincha, kuítrintin armia nunasha untsukar, namperan najanamiayi. ²² Nuisha Jirutías nawantri wayá jantsemámtai Erutis tura níjjai nampernum matsarmia nusha shiir enentáimsarmiayi. Túramtai uunt akupin nuwachin chicharuk “Ame wakeram nu seattia. Wi amastatjai. ²³ Nekas tájame, ashí ame seatmena núnaka amastatjai. Wats, seatkumniñka takakjana nuna jímiapetek nakakan, amastatjai” tímiayi.

²⁴ Tutai nuwach jiinki ni nukurín Jirutíasan chicharuk “¿Wariniak seat-taj?” tímiayi.

Tutai “Imiakratin Juanka muuke seata” tímiayi.

²⁵ Nu chichamaik nuwach wari wayá Erutisan chicharuk “Yamaikia uunt amamkunam Juanka muuken wakerajai” tímiayi.

²⁶ Nuna takui uunt akupin ti kuntuts enentáimpramiayi. Tura nii tiniu asa ni amikri matsatainia nu antukaru ásarmatai surimkiatniun tujinkiamiayi. ²⁷ Tuma asa uunt akupin Juanka muuke itiata tusa ni suntarin wárikmas akupkamiayi. ²⁸ Túramtai suntar wari we, sepunam Juanka muuken tsupikmiayi. Tsupik, amamkunam itia, nuwan susamiayi. Túram achik ni nukurín susamiayi. ²⁹ Juan maamun antukar ni unuiniamuri ni ayashin iwiarsatai tusar júkiarmiayi.

Señku mir áishmañkan Jesus ayuramiania nu

(Mateu 14.13-21; Rúkas 9.10-17; Juan 6.1-14)

³⁰ Tura Jesusa unuiniamurj Nii akupkarma nu, ataksha waketki káunak irunturarmiayi. Ashí nii túrawarmia nuna, unuiniarmia nunasha ujakarmiayi. ³¹ Tura untsurj shuar táiniakui, niisha ankant ajastinniasha yurumátniuncha tujinkiararmiayi. Tuma asantai Jesus chichaak “Tijjai wemí aents atsuiniamunam; nuj ishichik ayamprarmi” tímiayi. ³² Nuyá Jesus ni unuiniamurjjiai kanunam enkemprar, aents atsuiniamunam jeatai tusar jiiinkiararmiayi. ³³ Túrusha shuar ni wéenan wáinkiararmiayi. Tura “Jesusaiti” tiarmiayi. Tuma ásar ashí péprunmaya untsurj shuar tseke ashintiukar, ni jeatniunam náakarmiayi. ³⁴ Jesus kanunmaya jiiinki ti untsurj aents iruntrar matsatun wáinkiamiai. Murik péñker wáinchataiya núnisañ matsatu ásarmatai Jesus nin wáitnentrarmiayi. Tura núkap unuiniarmiai. ³⁵ Nuyá kjiakui ni unuiniamurj Jesusan tariar chicharainiak “Atsamunam pujatsjik; tura yamá kjiatsuk. ³⁶ Shuar wari akupkarta. Tijjuuch péprunmasha, shuarnumsha wearti, ni yurumkarj sumarmakarat” tiarmiayi.

³⁷ Tutai Jesus chichaak “Atumek ayuratarum” tímiayi.

Tutai “Iisha ju shuar ayuratai tusar, ¿jimiara sian kuitjai yurumak sumaktai tusar wétinkiaitai?” tiarmiayi.

³⁸ Tura Jesus ni unuiniamurj chicharainiak “Tanta takakrum nu iistarum ¿urutmak aa?” tímiayi.

Tutai nekapmarar chichainiak “Tántaka señkuchikiiti, tura namaksha jímarchikiiti” tiarmiayi.

³⁹ Tutai Jesus tímiayi “Ju shuar chírichiniam pujusarti tusar akupkatarum.” ⁴⁰ Ankant ankant sian siansha, señkuenta señkuenta iruntrar matsamsarmiayi. ⁴¹ Jesuska señku tantancha, jímiar namaknasha jusa, yakí nayaimpinmaan jímias Yúsan yuminsamiayi. Tura yurumkan púurmiayi. Puur ni unuiniamurj súsarmiayi. Namaknasha puur súsarmiayi, ashí shuáran ajamsarat tusa. ⁴² Ashí yurumáwar ejemarmatai, ⁴³ puunaruncha, namak ampirmancha achikiar, tuse chañkinian áimkiar júkiarmiayi. ⁴⁴ Nu yurumkan ti untsurj yurumáwarmiai. Aya áishmañkak señku mir (5.000) ármiai.

Jesus entsá pátatek wekasamiania nu

(Mateu 14.22-27; Juan 6.16-21)

⁴⁵ Nuyá Jesus ni unuiniamurj chicharainiak “Kanunam enkemprarum, katinkrum amain émaa ajatarum, Petsaitia péprunam. Wisha ju shuaran áujsan ikiuktatjai” tímiayi. ⁴⁶ Shuáran áujas ikiuki Yusjai chichastaj tusa náinnium wémiayi.

⁴⁷ Tura kirit ajasmanum kánuka antumiannum ajapén nanammiai. Jesuska niñki juakmiayi. ⁴⁸ Jesusa unuiniamurjsha wia-wiainiakua ti pimpikiarmiayi, nase tukumma ásar. Nuna Jesus wáiniak tsawartin ishichik ajasmatai entsá pátatek wekas nin jeariarmiayi. Tura nankaamaktiasa wea núnisañ wémiayi. ⁴⁹ Jesus entsá wekaan ni unuiniamurj wáinkiar, wakanchashit, tu enentáimprarmiayi. Túrawar ti untsumkarmiayi. ⁵⁰ Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wítjai Jesus; ashamprukairap” tímiayi. ⁵¹⁻⁵² Nuñkia entsaya kanunam waka enkempramiayi. Túramtai nasesha majaantmiayi. Ni unuiniamurjnia enentái kiritia áintsan

ásarmatai Jesus yurumkan núkap awajsamia nuna paant nekaatniun tuke tujinkiarmaiya. Tuma ásar yamáí túrunamu itiurak aankia tusar ti enentáimprar sapijmiakarmiaiya.

Jinisarítnumiā shuáran Jesus tsuármiania nu

(Mateu 14.34-36)

⁵³ Nuyañka katĩnkjar, Jinisarít núñkanam jeawarmiaiya. Jeawar kanun ajuñiarmiaiya. ⁵⁴ Kanunmayā jíntrarmatai, nu nuñkanmayā shuar Jesusan nekaawarmiaiya. ⁵⁵ Tura “Jesus pujawai” táman antukar, ashí jeañmayā jaan ni peakrintiuk Jesus pujamunam itiaarmiaiya. ⁵⁶ Tura Jesus wekaak wémia nuñsha, péprunmasha, shuar matsatmanumsha, ishichik matsatkamunmasha jaan itiarar jintiá áeprusarmiaiya. Túmainiak Jesusan pushirmin antiñtaj tusar seawarmiaiya. Tura ashí antiñkarmia nuka péñker ajasarmiaiya.

7

Jesus Pariséun áujmatsarmiania nu

(Mateu 15.1-20)

¹ Pariséusha, Israer-shuara jintinniurisha Jerusaréñnumiā Jesusan tariarmiaiya. ² Tura Jesusa unuiniamurĩn ikijmiatsuk yurumun wáinkjar “Israer-shuara túrutairĩn túruiniatsui” tiarmiaiya. ³ (Kame Pariséusha, tura ashí Israer-shuarsha, ni uuntrĩ jintintiamurĩn umikjar ti núkap ikijmiarar yurumin ármiaiya. ⁴ Péprunmayā tari “ikijmiatsuk yurumáshtiniaiti” tiniu ármiaiya. Tura ti untsurĩ ni uuntrĩ túrutairĩ núñisan ármiaiya. “Tsapancha, ichiñnasha, jiruncha, peaknasha nijiakartiniaiti” tiniu ármiaiya.) ⁵ Tuma asamtai Pariséusha, Israer-shuara jintinniurisha Jesusan chicharainiak “¿Urukamtai ame unuiniamuram ii uuntrĩ jintin-tramniuitaj nuna túruiniatsu. Urukamtai ikijmiatskesha yurumáinia?” tiarmiaiya.

⁶ Tutai Jesus tímiyai “Ántar chichamtiniaitume. Isayas yaunchu nekas atumin áartampramiyai juna:

Ju aents ni wenejaj Winia “ti péñkeraiti” turutainiawai, tímiyai Yus, tura ni enentáinkia jeachat pujuiniawai. ⁷ Tura tukeneas Winia shiir awajtuiniawai. Aentsu chichamē jintiainiyat, “Yus-Chichamaiti” túniawai.”

Tu áarmaiti. ⁸ Tura átum Yusa chichamē iniaisarum, aentsu jintintiamurĩ umirkarum, ichiñnasha, tsapancha nijiaaktin, tura chikich túrutaisha áintsarmek untsurĩ túrarme. ⁹ Túrákrum Yus-Chichamka tsukintiaani ikiusurme atumí uuntrĩ chichamē umirkatai tusarum. ¹⁰ Kame Muisais yaunchu aar juna tíchamka:

Ame apa nukusha shiir enentáimtustarum.

Tura ataksha áarmiaiya:

Shuarsha ni aparĩn, nukurĩncha yajauch chichareakka, nu shuar jákatniuiti.

¹¹⁻¹² Túrasha átumka Pariséutirmeka, antsu ju tárume: “Shuar ni aparĩn ni nukurĩn chicharuk “Wi yáinťinian takakjana nu Kurpanaiti” takuñkia, atumsha péñkeraiti, aparĩncha nukurĩncha yáinťchatí” tarume. (Kurpan tana nuka, Yus susamu, tawai.) ¹³ Nekaatarum, Pariséutiram. “Íi yaunchu uuntrĩ chichamē tuke umiki wétiniaitji” tákurum, Yus-Chicham peñké ántar chichama núñin awajearme. Núñisrumek chikichcha untsurĩ túrarme.” Tu timiayi Jesus.

14 Nuyá ataksha Jesus ashí shuáran untsukar “Mash anturtuktarum, ashí nekaatarum, tímiayi. 15 Aaya ayashnium wayaana nu, shuáran yajauch awajsachminiati; tura antsu ni enentáinia jiiinia nu, yajauch awajsattawai. 16 Shuar nuna ántakka enentáimprati” tímiayi.

17 Nuyá áentsun ikuiak, jeá wayamtai, ni unuiniamurj aniasarmiayi “¿Nu métek-taku chicham warintiuua?” tiarmiayi.

18 Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachminiati. 19 Antsu wakenam wayá, nankaamas menkaatsuk” tímiayi. Nuna taku, ashí yurumak páchitsuk yuamniati, tímiayi. 20 Nuyá tímiayi “Shuara enentáinia jiiinia nu, yajauch awajsamniati. 21 Shuara enentáinia, initiá, yajauch enentáimsatniusha, tsanirmatniusha, natsa tsanirmatniusha, shuar máatniusha, 22 kasamkatniusha, chikichna wakeruktincha, péñkercha túratniusha, anañkatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka initiá wininiatsuk. 23 Ashí nu tunáa ainia nu, shuara enentáinia jiiiniu asa, shuáran yajauch awajainiawai” tímiayi.

Serupinísianmaya nuwá Jesusan nekas enentáimtusmiania nu
(Mateu 15.21-28)

24 Tiru pepu, Setún péprusha Serupinísia nunkanam ámiayi. Nuka Israer-shuara nunkenchayuyai. Nu nunkanam Jesus wémiayi. Tura jeá, jeá wayáa pujusmiayi. Tura nuj pujamun nu nunkanmaya shuar nekarawarajin tusa nakitmiayi; túrasha uumkatniun tujinkiamiayi. 25 Wárik nu nunkanmaya nuwá Jesus pujan nekaamiayi. Nu núwaka nawantrj iwianchrukuyuyai. Tuma asa Jesusan tarí ni nawen piniakum tepersamiayi. 26 Nu nuwá Israer-shuarcha, Serupinísianmayayuyai. Túmaitiat, nawantru enentáiyá iwianchin jjiirturkitia tusa Jesusan seamiayi. 27 Tutai Jesus nuwan chicharuk “Uchi emka ejemartí. Uchi apatkurj atankir yawach súsatin péñkerchaiti” tímiayi.

28 Tutai nuwá ayak “Nekas, Uunta, tame. Tura yawachisha misanam wakenam pujuinia nu, uchi apatkun yurumuk juyumak kákeamun yuúniatsuk” tímiayi.

29 Tutai Jesus tímiayi “Péñker tame. Tuma asam, shiir wetá; ame nawantrumj enentáiyá iwianch jíinkiyi” tímiayi.

30 Takui niisha wémiayi. Tura ni jeen jeá, ni nawantrjn íwianch jíinkimtai péñker ajas peaknum tepan wáinkiamiayi.

Jesus empekun tsuármiania nu

31 Jesus Tirunmaya jíinki Setún péprunam nankaamarkutak, Tekapuris nunkanmaani nankaamaki, Kariréa antumiannum ataksha jeamiayi. 32 Nu j chichachu ámiayi, kuishin empeku. Nu shuáran Jesusan itiarar, ni uwejejaj antin kiati tusar seawarmiayi. 33 Shuar matsatmanumiá Jesus nin akanki jukí kuishin tsara uwejejaj tsutsukruamiayi. Tura usukia, nu shuara iniajn antintkiamiayi. 34 Tura nayaimpinmaan j ímias súkaska mayati “Epata” tímiayi. Nuka, shuar chichamnumka “chinkiatí” tawai. 35 Nu chichamaik ni kuishisha chin kiamiayi, iniajsha séermiayi. Tura paant chichasmiayi. 36 Tura Jesus chicharainiak “Peñké etserkairap” tímiayi. Jesuska surí-suritiamaitiat, nu nankaamas etseriarmiayi. 37 Tura ti enentáimprarmiayi. Enentáimprar, “Ju Jesus aya péñkeran túrawai. Empekuncha ántumtikniati, tura chichachun chichamtikniati” tiarmiayi.

8

*Kuattru mir shuáran Jesus ayuramiania nu**(Mateu 15.32-39)*

¹ Nu tsawantáí shuar timiá untsurí iruntrarmiayi. Yurumkarí atsakui Jesus ni unuiniamurín untsukar juna tímiayi: ² “Jú shuáran waitnentajai. Menaintiú tsawant Wijíai pujuinia ásarmatai ni yurumkarí amuukachaik. ³ Tura ni jeen ayurtsuk akupeamka, tsukariin jintiá pimpikiartatui, yajaya káunkaru ásar” tímiayi.

⁴ Tutai ni unuiniamurí chichainiak “Túrasha júi atsamunam, jú aents ejemaratat tusar ¿tuyá yurumkak wáinkiatatj?” tiarmiayi.

⁵ Tutai Jesus nin aniasmiayi “¿Urutmá tanta aa?”

Tutai “siati awai” tiarmiayi.

⁶ Nuñkia ashí áentsun “nuñká pujustarum” tiarmiayi. Tura tantan achik, Yúsan yumínsamiayi. Tura puuk, áentsun ajamsatarum tusa ni unuiniamurín susamiayi. ⁷ Tura uchich namaksha ishichik aan achik, Yúsan yumíñkias, ni unuiniamurín chicharuk “Júsha shuar ajamsatarum” tímiayi. ⁸ Turam ashí yurumáwar ejemarmiyai. Ampirma púunaruncha siati chañkinnium áimkiarmiayi. ⁹ Kuattru mir (4.000) shuar yurumáwarmiyai. Yurumáwar amikiarmatai, Jesus nin áujas akupkarmiayi. ¹⁰ Tura ni unuiniamuríjjíai kanunam enkemprar Tarmanúta nuñkanam wearmiayi.

*Pariséu Jesusan iniakmasta tiarmiania nu**(Mateu 16.1-4; Rúkas 12.54-56)*

¹¹ Paríséu Jesusjái áujmatsatai tusar tariarmiayi. Nekapsatai tusar wakeruiniak Nin chicharuk “Nayaimpinmaya kakaram iniakmasta” tiarmiayi.

¹² Tuíniakui Jesus kúntuts enentáimias, súkaska mayati “¿Urukamtai, yamaiya aentstiram, nayaimpinmaya kakarman iniakmasat tusarum wakerarum? Nuka penké sunaschattarme, paant tájarne” tímiayi.

¹³ Nuyá nin ikiukiar ataksha kanunam enkemar amain katiñmiayi.

*Pariséu túramuríjjíai aneartarum, tímiayi Jesus**(Mateu 16.5-12)*

¹⁴ Tura ni unuiniamurí yurumak jukitiai tukamá kajinmatkiarmiayi. Kanunmañka aya chikichik tantanak takaku ármiayi. ¹⁵ Jesussha ni unuiniamurín enentáimtikuiuk tímiayi “Wáinkiatarum; Paríséusha Erutissha wakaprutain takakainia nújajisha aneartarum” tímiayi.

¹⁶ Tutai ni unuiniamurísha tunaiyarmiayi “Tanta kajinmatkin asakrin nuna túramtsujiash” tiarmiayi.

¹⁷ Tura Jesus nuna nekáa chichaak “¿Urukamtai aya yurumkak enentáimtarum? Tuke nékatsrumek. Penké enentáimtsurmek. Atumí enentáí tuke kiritkiait? tímiayi. ¹⁸ Jimi ajsha itiura wáintsurmea. Kuíshim ajsha itiura ántatsrum. Ashí kajinmatkintrumek. ¹⁹ Nekaatarum, nuik, senku tantan púuran senku mir áishmañkan ayurachmakaj. ¿Tura ampirma urutmá chañkinnium chumpiamarum?” tímiayi.

Niisha tiarmiayi “Tuse chañkinnium chumpiamji.”

²⁰ Ataksha Jesus tímiayi “Tura siati tantajai kuattru mir shuaran ayuramtai, ¿ampirmasha urutmá chañkinnium chumpiamarum?”

Niisha “siati” tiarmiayi.

²¹ Tuma asamtai Jesus tímiayi “¿Itiura imiá nékatsrum?”

Jesus kusurun ímtiksamiania nu

²² Nuyá Petsaitia péprunam jeawarmiayi. Jeawarmatai, áishman jii kusurun Jesusan itiararmiayi. Túrawar antinta túsar seawarmiayi. ²³ Tuma asamtai Jesus uwejnun achik péprunam aani enkeki jukí jiiin usukjjai kuérmiayi. Tura uwejjai antin “¿íimmek?” tímiayi.

²⁴ Tutai kusuru íimi tímiayi “Aentsun iiyajai, túrasha paantcha. Numi wekainian áaniun iiyajai” tímiayi.

²⁵ Nuyá ataksha Jesus ni uwejjai kusuru jiiin antinmiayi. Tura kususurusha úmamkes iis, péñker ajas, ashí paant ímpramiayi. ²⁶ Jesus chichaak “Jeemiiin weakum péprunam wayawaip tura shuar ujakaip” tímiayi.

Pítur Jesusan “Yusa Anaikiamurinme” tímiania nu

(Mateu 16.13-20; Rúkas 9.18-21)

²⁷ Jesus ni unuiniamurijjai uunt pepru Sesaria-jiripiunam jeatsuk, tíjjuch uchich péprunam irasarmiayi. Jintia wésar Jesus ni unuiniamurjin chicharainiak, “¿Yaiti turutainiawa Winia?” tímiayi.

²⁸ Tutai niisha áimkiarmiayi “Chíkich chichainiak, imiakratin Juankaiti, turamainiawai. Chíkichcha, Eríasaiti, tura chíkichkia, yaunchu Yúsnan etserin nantakniua núiti, turamainiawai” tiarmiayi.

²⁹ Tutai Jesus tímiayi “Atumsha, ¿waritrume. Yáitij?” tímiayi.

Tutai Pítur tímiayi “Ámeke Krístuitme; Yúsaiya akupkamuitme.”

³⁰ Tutai Jesus chichaak “Peñké etserkairap” tímiayi.

Jesus ni jákatniurin ujakmiania nu

(Mateu 16.21-28; Rúkas 9.22-27)

³¹ Unuiniak: “Wi Aents Ajasuitjiana ju ti wáitsatniuitjai. Israer-shuarti ii uuntrisha, Patri úuntrisha, ii jintinniurisha Winia nakitrurar mantu-awartatui. Túrasha menaintiu tsawant nankaasmatai nantaktiniaitjai” tímiayi. ³² Nunasha paant ujakmiayi.

Tura Pítrusha Jesusan arantach jukí kakantramiayi. “Tu chichasaip” tímiayi.

³³ Tutai Jesus ayantmatar, ni unuiniamurin iis, Pítrun kakantar chicharuk “Satanása, werumta. Ámeke Yusna ana nu enentáimtsame, antsu aya áentsnak enentáimtame” tímiayi. ³⁴ Nuna tuasua amik tura nuí matsarmia nunasha, ni unuiniamurincha untsuk tímiayi, “Shuar Winia nekas nemartustasa wakerakka ni wakeramurinkia iniaisati; tura ni krusri yanakí nemartustí. ³⁵ Kame shuar ju nunkanam aya niñki anenmamkunka nu shuar ni iwiaakmarin emenčkaktatui. Antsu Winia anentu asa tura winia chichamprun anea asa, shuar aya péñker pujustinniak enentáimtsuna nu, nekas iwiaakman wáinkiatstawai. ³⁶ Nekaata, shuar ashí ju nunkanam írunna nuna sumaksha túrasha ni wakanj jinium wéakuisha, ¿ituirak péñker pujusaint? ³⁷ Shuarka wakanin uwemtikrataj tusa wakerak ¿urutmak akikmakaint? ³⁸ Antuktarum. Yamaiya aents Yúsan nakitiar ajapawaru yajauch ainia nu íimiainiamunam shuar Winia natsantrakuñkia tura winia chichampruncha natsantakuñkia, wi, Aents Ajasuitjiana ju, winia Aparu kakarmarijjai tura nayaimpinmaya péñker suntarjai atak taakun, nú shuaran natsantrattajai Wisha.’ Tu tímiayi Jesus.

9

¹ Ataksha Jesus nin chicharuk, ‘Nekas tájarme, shuar játsuk Yus ni kakarmarjijai aentsu enentáin akupkattana nú tsawantan wáinkiaratna nu jui iijiai pujuiniawai’ tímiayi.

Jesus nusháa iira ajasmiania nu
(Mateu 17.1-13; Rúkas 9.28-36)

² Nuyá sais tsawant nankaasmatai, Jesus Pítruncha, Jakupuncha, Juánasha uunt náinnium júkiarmiayi. Nuisha Jesus nushá iira ajasmiai. ³ Ni pushirisha ti puju jítsumir ajattsarmiayi. Nujai métek puju awajsatin ju nunkanam atsawai. ⁴ Túruna nuj Erías, Muisaisjai wantinkiar Jesusjai chichainian wáinkiararmiayi. ⁵ Nuyasha Pítur Jesusan chicharuk “Uuntá, ii jui pujustin ti péñkeraiti. Menaintiú áakmaktai, Áminiu chikichik, Muisaisna chikichik, Eríasnasha chikichik” tímiayi. ⁶ Jesusa unuiniamurj sapijmainiak, Pítur wariniak titi nekaachmiayi. Nékachu asa nuna tímiayi.

⁷ Tura yuran kim tara mikintiu awajsamiayi. Yuran minmaya chichaak “Júiti winia aneamu Uchir. Nii anturkatarum” tímiayi.

⁸ Nuyanka ni unuiniamurj ayantmar iiyaj tukamar aya Jesusnak wáinkiararmiayi. Chíkichkia atsuarmiayi.

⁹ Nuyá náinniumia akainiak Jesus nin chicharuk “Wáinkiarumna nu etserkairap. Wi, Aents Ajasuitjiana ju jakamunmaya nantaatsain nu etserkairap” tímiayi.

¹⁰ Tutai ni tímian ímiatrusan úukarmiayi. Tura “jakamunmaya nantaatsain tana nu, ¿wariniak ta?” nuamtak tunainiarmiayi. ¹¹ Tura Jesusan aniasarmiayi “¿Urुकamtaí Israerti ii jintinniurisha, Erías emka tátiniaiti, tunia?” tiarmiayi.

¹² Tutai Jesus tímiayi “Nekas Erías ashí iwiarattsa emka tátiniaiti. ¿Tura Aents Ajasunun Yus-Papinium warintua?

“Ti wáitsattawai; Nin nakitrartatui.” Tu áarmaiti.

¹³ Wi tájarme, Erías nekas táwiti. Támatái, shuar ashí ni wakeriarmia nuna nin túrawarmiayi. Yusa Papirijn Eríasa túrunatniurj aarma amia tímiatrusan túrawarmiayi” tímiayi Jesus.

Jesus iwianchin jiki akupkamiania nu
(Mateu 17.14-21; Rúkas 9.37-43)

¹⁴ Tura ni unuiniamurj matsatmanum atak wáketuk, ti untsurj aents káutkar Israer-shuara jintinniurisha nijijai tunai pujuinian wáinkiamiayi. ¹⁵ Tura aencha, Jesusan wáinkiar warainiak, tsékeñki weriar, áujarmiayi. ¹⁶ Túrunawarmatai, Jesus chicharainiak, “Warí tunaiyarum?” tímiayi.

¹⁷ Tutai chikichik ayak “Uuntá, winia uchirun Ámin itiarjame. Iwianchruku asa chichachuiti. ¹⁸ Túmakui íwianch enkemtakun paat ajar áepeawai; túram uchisha saun kaput apak najin kátetete awajeawai. Túram kakaakcha ame unuiniamurmin seamjai, jirtukti tusan, túrasha tujintrutkarai” tímiayi.

¹⁹ Tutai Jesus tímiayi “Yúsan enentáimtichutirmea urutmá tsawantak pujustaj atumjai. Urutmá katsuntrataj! Uchi itiatarum” tímiayi. ²⁰ Takui uchin Jesusan itiararmiayi. Tura íwianch uchin enkemta Jesusan wáiniak uchin ajakramiayi. Uchisha chichiptur nunká iniaan péper-péper ajakin wenunam saun apakmiayi.

²¹ Túrunamtaí Jesus ni aparín aniasmiayi “¿Urutá yaunchu áinkiait?”

Tutai ni aparj t́imiayi “Úchichik áinkiaiti. 22 Tuma asa tuke jutikiú pujurniuiti; jiniumsha apeawai, entsá maataj tusa ajaawai. Yaintruk-miniaitkiumka waitneasam yaintrukta” t́imiayi.

23 Tutai Jesus chicharuk “¿Urukamtai, yaintrukminiaitkiumka, tame? Nekaata, shuar Winia nekas enentáimturna nu ashí túramniaiti” t́imiayi.

24 Tutai uchi aparj kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” t́imiayi.

25 Tura shuar untsurí káunainian Jesus wániak kakantuk “Empeku chichachu awajin iwianchi jíinkitia, tájame. Jíinkim ataksha wayawáipia” t́imiayi. 26 Tura íwianch jíiniuk untsamak uchin we-werkasa ajakar chichichiipu áepkimiayi. Túram uchi jaka ímianis tepemiayi. Túrunamtai untsurí shuar “jakayi” tiarmiayi. 27 Támanak Jesus uwejen achik awajkimiayi, tura uchi nantaki wajakmiayi.

28 Tura Jesus jeá wayamtai, niñki pujusar, ni unuiniamurj aniasar “¿Urukamtai iisha jíiktin tujinkiamaj?” tiarmiayi.

29 Tutai Jesus t́imiayi “Jú iwianchkia ijiarmar Yus áujkur jíikminiaiti” t́imiayi.

Jesus ataksha ni jákatniurin ujakmiania nu

(Mateu 17.22-23; Rúkas 9.43-45)

30 Nuyá jíinkiar Kariréa nunkanmaani nankaamakarmiayi. Ni unuini-amurj unuinia asa nu nankaamamun nekaawarain tusa Jesus nakit-miayi. 31 Unuiniak juna t́imiayi: “Wi Aents Ajasuitiaj juna mantamnati tular achirkar surutkartatui. Tura máamuitatnak, iwiarsamunmayan menaintiú tsawantaj nantaktiatjai” t́imiayi. 32 Tura nu chichaman nekaacharmiayi. Nékainiachiat, anintrustinian arantukarmiayi.

“¿Yaki imiá nankaamantuit?”

(Mateu 18.1-5; Rúkas 9.46-48)

33 Nuyá Kapernáum péprunam jeawarmiayi. Tura Jesus jeá pujus ni unuiniamurj aniniak, “¿Atumsha jintiá winisrum warí áujmatmiarum?” t́imiayi. 34 Tura natsarar pachischarmiai. Kame jintiá wésar “íijjai ¿yaki imiá nankaamantu ajasat?” tunainiarmiayi. 35 Ni unuiniamurj pachischarmatai, Jesus pujus ashí tuse unuiniamurj irur chichaak “Shuar nekas nankaamantu ajastajtsa wakerakka, peejchachia nuke enentáimtumar shuara yáintri atí” t́imiayi. 36 Tura uchin itiáa miniakas chichaak: 37 “Shuar uchin winia naaruj shiir awajeakka Winia shiir awajtawai. Tura Winia akuptukua nunasha shiir awajeawai” t́imiayi.

“Shuar in nakitramachkunka in páchitkiawai”

(Rúkas 9.49-50; Mateu 10.42)

38 Nuyá Juan Jesusan chicharuk “Uuntá, shuar ame náarmin pachis iwianchin akupea wainkiamji. Tura íijjai írutkachu asamtai nu túratin suritkiamji” t́imiayi.

39 Tutai Jesus t́imiayi “Antsu suritkiarap. Shuar winia náarun pachis tujinkiamun túrakka, nu shuar wari tsanumprutatniun tujinkiattawai. 40 Shuar in nakitramachkunka, in páchitkiawai, t́imiayi. 41 Winia nemarka asakrumin shuar yumiiichinkesha ajampramkuka ántar túratsui; akikma átatui’ t́imiayi.

(Mateu 18.6-9; Rúkas 17.1-2)

42 ‘Tura shuar ju uchin Winia umirtuinia nuna yajauchin túrumtikiamtainkia, ti asutniattawai. Tuma asamtai uchin yajauchin túrumtiktsain kuntujuen kayajai jinmiar nayaantsanam ajunmaka maak ainti. 43 Ame uwejmek yajauchin túrumtikramamniaitkuinkia tsupikta. Mai uwejtuk wáitsatniunam jeatniujainkia chikichik uwejjai ju nunkanam pujusar tuke iwiaaku pujustinnium jeatin ti shiiraiti. Warí, wáitsatniunmanka ji kajinkiashtin awai, 44 jákaru akarisha jáiniatsui tura jisha tuke kapaawai. 45 Nawemsha yajauchin túrumtikramamniaitkuinkia nusha tsupikta. Mai nawentuk wáitsatniunam jeatniujainkia chikichik nawejai ju nunkanam pujusar tuke iwiaaku pujustinnium jeatin ti shiiraiti. Wáitsatniunmanka ji kajinkiashtin awai, 46 jákaru akarisha jáiniatsui tura jisha tuke kapaawai. 47 Jimisha yajauchin túrumtikramamniaitkuinkia ukuinkiata. Mai jiiintiuk wáitsatniunam jeatniujainkia chikichik jijijai ju nunkanam pujusar Yus akupeana nu j jeatin ti shiiraiti; 48 wáitsatniunmanka jákaru akarisha jáiniatsui tura jisha tuke kapaawai.

49 Naman Yus susamu weakinia áintsan aentstirmesha jijiai nekapnastatrum. 50 Weesha ti penkeraitiat michumarka, ¿itiurak jea-jeat átink? Wats, wee jeakua áintsarmek atumek shiir enentáimtunaistarum” tímiayi Jesus.

10

Nuwa ajapatniun Jesus áujmatsamiania nu

(Mateu 19.1-12; Rúkas 16.18)

1 Jesus Kapernáumnumia jiinki, Jutía nunkanam nankaamaki, Jurtan entsa amain jeamiayi. Nu j pujai, aents ataksha Nin irunturarmiayi. Iruntrarmatai tuke túrin asa ataksha unuiniamiayi. 2 Tura Pariséu Jesusan nekapsatai tusar wakeruiniak, Nin chicharainiak “¿Áishman ni nuarí ajapatin tsankamkamukait?” tiarmiayi.

3 Tutai Jesus tímiayi “¿Muisais wariniak timia?”

4 Tutai “Papíjiai in ajapatniun tsankatramkamiaji” tiarmiayi.

5 Tutai Jesus tímiayi “Atumí enentai kátsuram asamtai nu chichaman atumin tsankatramkamiarme. 6 Tura Yus yámankamtaik ashí najanamia nui, áishman nasha nuwancha najanamiayi. 7 Tuma asamtai áishman ni aparíncha nukuríncha kanaki ikiuki, ni nuaríjai tsanintiniaiti. 8 Warí, áishman nuaríjiai jimiariat chikichik ajasartatui. Tuma asamtai yamá jimiarchaiti, antsu chikichik ajasuiti. 9 Tuma asa, Yus atsankiania nuna, aents akankashtiniaiti” tímiayi.

10 Tura urum jeá wayawar, Jesusa unuiniamurí nu chichaman ataksha aniasarmiayi. 11 Tuiniakui Jesus tímiayi “Shuar ni nuarín ajapa ikiuak chikichan nuátkañka, emka nuarín yajauch awajas, ikiuak, tsanirmayi. 12 Nuwasha ni áishri ajapa ikiuak, chikichjai niiniurtukka, niisha tsanirmayi” tímiayi.

Jesus uchin shiir awajsamiania nu

(Mateu 19.13-15; Rúkas 18.15-17)

13 Antiñkariat tusar uchin Jesusan itiararmiayi. Túruiniakui Jesusa unuiniamurí “itiarap” tiarmiayi.

14 Tura Jesus nuna wáiniak, kajek juna tímiayi “Uchi Winí winitin tsankatruktarum. Suritkiarap. Iis, shuar ju uchía núnisan peejchach

enentáimtumainia nu Yusa akupeamurin pachiinkiamniaiti. ¹⁵ Nuní asamtai tájarme, uchi umiana núnisan Yusa akupkamurin shuar umíachkunka nuna pachiinkiachminiaiti. ¹⁶ Nuyá uchin miniakas, “Yus yáinmakarti” tímiayi.

*Kuítrintin Jesusan áujsamiania nu
(Mateu 19.16-30; Rúkas 18.18-30)*

¹⁷ Ukunam, Jesus nuyá weaj, shuar tseke Nin tarimiayi. Tarí tikish-matar chicharuk “¿Uuntá, Amesha ti péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

¹⁸ Tutai Jesus tímiayi, “¿Urukantai Winia, péñkeraitme, túrutam? Shuarka chikichkisha péñkerka atsawai. Aya Yúsak péñkeraiti. ¹⁹ Yus akupkamu nékatsmek. Ju áiniawai: tsanirmawairap, mankartuawairap, kasamkairap, chíkich shuar tsanirprurairap, anankartuawairap, apasha nukusha umirkatarum. Nu áiniawai” tímiayi.

²⁰ Tutai kuítrintin chichaak “Uunta, núnaka úchichik mash umiki tsakaruitjai” tímiayi.

²¹ Tutai Jesus iis waitnenmai tímiayi “Chikichik táasume. Weme ashí áminiu ana nu surukta. Túram nu kuit kuítrincha susarta. Túrakum nayaimpiniam kuítrum ikiaun kattme. Túram winitia, krus yanaktinia áintsamek itiurchatrum ajn nemartusta” tímiayi.

²² Tura kuítrintin nu chichaman antuk, wake mesek, kúntuts enentáimiar wémiayi, ti kuítrintin asa.

²³ Nii wématai, Jesus ashí ni téntakmarin iis, ni unuiniamurin chicharuk, “Kuítrintin ainia nu Yusa akupeamurin pachiinkiatin ti itiurchaiti” tímiayi. ²⁴ Takui ni unuiniamurj nuna antukar niisháa enentáimprarmiayi. Túramtai Jesus tímiayi “Uchiru antuktaram. Shuar kuítriniak enentáimtuinia nuka, Yusa akupeamurin pachiinkiatin penké itiurchataiti. ²⁵ Uunt kamiriu auja jin wayatin ana nú nankaamas, kuítrintin Yusa akupeamurin pachiinkiatin itiurchataiti” tímiayi.

²⁶ Nuna antukar nú arant niisháa enentáimprarmiayi. “¿Nuiñkia yaki uwempramniait?” tunaiyarmiayi.

²⁷ Tura Jesus nin iisar chichainiak “Aents niñki túrachminiaiti, antsu Yus túramniaiti. Yuska ashí túramniaiti” tímiayi.

²⁸ Nuyá Pítiur Nin chicharuk “Iis, iikia ashí ikiukir némartusujik” tímiayi.

²⁹ Tutai Jesussha tímiayi, “Nekas tájarme, shuar Winia nemartak Yus-Chichamnasha ipiampartasa wakerak ni jeencha, yachincha, umaincha, aparincha, nukurincha, nuarincha, uchirincha, nunkencha uyumatsuk ikuakka, ³⁰ nu shuar ju nunkanam sian patatnas jeencha, yachincha, umaincha, nukurincha, uchirincha, nunkencha, ju nunkanam wáitiatat sunastatui. Tura ukunam, nunka amuukamtai, nu shuarsha jáchatainiam tuke péñker pujustatui. ³¹ Tura untsurj shuar yamá penkerj ainia nu, ukunam ukunmaanj pujusartatui, tura líksan untsurj shuar yamá ukunmayá ainia nu, ukunam eem pujusartatui” tímiayi Jesus.

*Jesus ni jákatniurj ataksha ujakmiania nu
(Mateu 20.17-19; Rúkas 18.31-34)*

³² Nuyá arak Jerusarénnum wéenak, jintiak wearmiayi. Jesuska émak wémiayi. Ni unuiniamurisha niisháa enentáimprarmiayi. Ashamainiayatán Jesusan nemarsarmiayi. Túmainiaj atak ni nekas unuiniamurin akankiar, ni túrunatniurin ujakmiayi. ³³ Ujaak tímiayi “Antuktaram, arak

Jerusarénnu wéaji. Nuĵ Winia, Aents Ajasuitjiana ĵuna, Patrĵ uun-trĵincha, jintinniummasha surutkartatui. Niisha apachnium mantam-nati tusar surutkartatui. ³⁴ Nusha Winia wishikrurar, katsumprukar, usukruawar mantuawartatui. Túramaitiatnak menaintiú tsawantaj nan-taktiatjai” tímiayi.

*Jakupu Juanĵai seawarmiania nu
(Mateu 20.20-28)*

³⁵ Sepetéu uchirĵ Jakupusha Juansha Jesusan taruntarmiayi. Taruntar “Uuntá, ii seattajnia nu túrak tusar wakeraji” tiarmiayi.

³⁶ Tutai Jesus tímiayi “¿Warí itiurtukat tusam wakerutam?”

³⁷ Tutai “Ame nupetmaktin tsawantrum jeamtai, iisha Ámĵĵai pujus-taitsar wakeraji, wi untsuurumini, winia yatsursha menaarmini. Nu tsanĵkatrukta” tíarmiayi.

³⁸ Tura Jesus tímiayi “Átum seatrumna nu nékatsrume. Wi umartat-jana nu umarminkaitrum. Tura Wi imiantiatjana núnisrum imian-minkaitrum” tímiayi.

³⁹ Niisha tiarmiayi, “Túramnaitĵi, páchitskea.”

Tuĵniakui Jesus tímiayi “Wats, Wi umartatjana nu umartatrume, tura Wi imiantiatjana núnisrumek imiantiatrume. ⁴⁰ Túrasha winia untsuuru-inĵi, menaruinĵsha átum pujustinian Wikia súsashtiniatĵarme, antsu Yus wakerana nu nuĵn apuĵsattawai” tímiayi.

⁴¹ Tura chíkich tias unuiniamurĵi nuna anturkar Jakupuncha, Juánnasha ti kajerkarmiayi. ⁴² Tura Jesus ni unuiniamurĵin irur tímiayi “Ĵu nékarme; Yus-shuarchanum akupnĵuitĵai tuinia nu, waantu enentáimtumás, ni shuárĵin ti akupeawai; tura uunt ainia nusha ashí shuar ti takamtikiainiawai. ⁴³ Antsu atumĵai núnisanĵ atsutnĵiuiti. Átumka, wi unuiniamutiram, uunt ajastaj tusarum wakerakrumka, ashí yáimin ajastiniaitrum. ⁴⁴ Shuar atumí penĵkerĵi ajastajtsa wakerakka, takarniua nuke ajas, umirtamkatí. ⁴⁵ Wissha, Aents Ajasuitjiana ĵu, shuar takartusarat tusan táchamĵai, antsu ashí shuáran yáintaj tusan táwitĵai. Wissha jarukan shuáran uwentĵkrataĵtsan táwitĵai” tímiayi.

*Jesus Partimiásan tsuármiania nu
(Mateu 20.29-34; Rúkas 18.35-43)*

⁴⁶ Jesus ni unuiniamurĵĵai, tura chíkich untsurĵi aentsĵai Ĵirikiú péprunam jeawarmiayi. Nuyá Ĵirikiúnmayasha ĵíinkiar weenaj, Timiasa uchirĵ Partimiás, kusuru amia nu, jintiá yantam kuítian seamu puĵu-miayi. ⁴⁷ Niisha, Nasarénumĵia Jesusaiti táman antuk, untsumuk “Uunt Jesusa, amesha Uunt Akupin Tawit weeachukaitiam, Yus anaikiach-makaitiam. Winĵaja waitnentrurta” tímiayi.

⁴⁸ Tura untsurĵi nuĵ matsamarmia nu nin chicharainiak “Takamatsata” tiarmiayi.

Niisha nú nanĵkaamas untsummĵiayi “Tawit weeá Jesusá, winia wait-nentrurta.”

⁴⁹ Nuna antuk Jesus wĵatas, chichaak “Untsuktarum” tímiayi.

Takuĵ shuar kusurun untsuiniak “Kakaram ajasta. Wĵaktia; untsur-mawai” tiarmiayi.

⁵⁰ Tuĵniakui niisha esekmatairĵin ajapa ikiuak wĵaki Jesusan tseke tarimiayi.

⁵¹ Tura Jesus nin chicharuk “¿Winia itiurtukat tusamea wakerutam?” tímiayi.

Tutai kusuru chicharuk “Uunta, ímtiasan wakerajai” tímiayi.

⁵² Tutai Jesus chichaak “Shiir wetá. Winia nekas enentáimtursa asam péñker ajasume” tímiayi. Tura nu chichamaik ímpramiayi. Tura Jesusan nemarki wémiayi.

11

Jesus Jerusarénum wayamiania nu

(Mateu 21.1-11; Rúkas 19.28-40; Juan 12.12-19)

¹ Wésar Jerusarénum tura Petpajái péprusha Petania péprusha Uri-wiu naint ínkiuasmak ámanum jeawar, Jesus jimiará unuiniamurín ujuikimiayi. ² Ujuiak tímiayi “Aatuniní pépruchiniam werum nuin umpuuru uchich jiníkiamu wáinkiatarme. Nu umpuuru tuke entsamprukchamuiti. Nu atiarum utitiarum. ³ Tura “¿Urukamtia áitkiarum?” turamainiakuisa, “ii Uuntri wakerawai” titiarum” tímiayi. ⁴ Tutai wearmiayi. Tura umpuurun wáitiniam aani jiníkiamun, jintiá yantamnum wajan wáinkiar atiwarmiayi. ⁵ Nuí pujuarmia nu “¿Warí áitkiarum. Urukamtai umpuuru atiarum?” tiarmiayi. ⁶ Takui, niisha Jesus timia nu ujakam suritkiacharmiayi. ⁷ Tura umpuurun Jesusan itiarar pushirín umpuurunam awantkarmiayi. Túram Yesus entsamkarmiayi. ⁸ Tura untsurí shuarsha pushirín jintianam ayapar áinkarmiayi. Chíkichcha jintiá yantamnumian nukan juuk jintianam áintrarmiayi. ⁹ Eem wearmia nusha, uku winiarmia nusha warainiak “Jusanna” untsamkarmiayi. “Yusa náarín winiana nu imiá péñkeraiti. ¹⁰ Ii uuntri Tawitia akupeamurí tátatna nu imiá péñker atí. Ii Yusrí naari shiir ati.” Tu untsamki wearmiayi. ¹¹ Tura Jesus Jerusarénum jeamiayi. Jeá, Yusa Uunt Jeen wayamiayi. Tura ashí iiyasua amik, kintiampraj tusa ni tuse unuiniamuríjiaí tíjiuch Petania péprunam wearmiayi.

Jesus iikiu numin yumínkramiania nu

(Mateu 21.18-19)

¹² Kashin tsawar, Petanianmaya jintia wesa, Jesus tsukammiayi. ¹³ Tura arant wajan iikiu numirín núkenniun wáiniak, nereatsuash tusa iyumiayi. Tura nereshtairín asamtai neren péñké wáinkiachmiayi. ¹⁴ Nuyá iikiu numin yumínkeak: “Ame nerem péñké yunaashti” tímiayi. Ni unuiniamurísha nuna táman antukarmiayi.

Yusa Uunt Jeen suruktinian Jesus suritkiamiania nu

(Mateu 21.12-17; Rúkas 19.45-48; Juan 2.13-22)

¹⁵ Nuyá atak Jerusarénum jeawarmiayi. Nuí Jesus Yusa Uunt Jeen wayá suruktai tusar pujuarmia nuna jíiki akupkatasa naníkammiayi. Kuítian yapajín armia nuna misarín tura yampitsan súrin armia nuna kutankríncha ayanturmiayi. ¹⁶ Tura káarak entsaki Yusa Uunt Jeen naníkaamaktinian suritkiarmiayi. ¹⁷ Nuyá “Yus áujсатаi tusar ashí shuar Yusa jeen wayamnia átatui” tú aarchamukait Yusa Papiríin. Antsu átumka Yusa jeé kasa matsamtaiya nútikiarme” tímiayi. ¹⁸ Aents nuí matsamarmia nu Jesusa chichamen antukar ti enentáimprarmiayi. Tuma asamtai Israer-patri úuntriísha, Israer-shuara jintinniurísha, nuna nekaawar, Jesusan ashamainiak mantamntati tusar chichaman jurusarmiayi. ¹⁹ Nuyá kiakui Jesus Jerusarénumia jíinkimiayi.

*Iikiu numin káarun wáinkiarmania nu
(Mateu 21.20-22)*

²⁰ Kashin káshik nankaamainiak iikiu numin kan̄kaptuk jaka wajan wáinkiarmai. ²¹ Tura Pítiur enentáimias Jesusan tímiayi “Uunta, iista, iikiu Ame yum̄inkramam nu kan̄kaptuk káarchaik.”

²² Tutai Jesus tímiayi “Yus nekas enentáimtustarum. ²³ Iis, nekas tátsujrumek, shuar “Yus nekas túratpiash” tútsuk, tura “wi tájana nuna Yus nekas túrattawai” tu enentáimsar, j̄u náintian “jiinki nayaantsanam iniánti” tákūnkia, páchitsuk iniantatui, tímiayi. ²⁴ Tuma asantai tájarme, ashí Yus ájukuram searmena nuna suramsattarme. “Wi seajna nuna yamá takakjai” tu enentáimkiurmeka, wáinkiāttarme. ²⁵ Tura Yus ájukuram pujarmena nu, kajernaiyamuram ákūnkia tsan̄kurnáiratarum. Atumí Aparí nayaimpiniam pujana nu atumí tunaar̄in tsan̄kurturti tusarum túratarum. ²⁶ Atumsha tsan̄kurnáiyachkurminkia, núnisan̄ atumí Aparí nayaimpiniam pujana nu atumí tunaar̄in tsan̄kurtámprashtrume” tímiayi Jesus.

*Yusa kakarmarjijai Jesus takasmania nu
(Mateu 21.23-27; Rúkas 20.1-8)*

²⁷ Ataksha Jerusaré̄nnum waketkiarmai. Jesus Yusa Uunt J̄ēn wekai, Israer-patr̄i úuntrīsha, Israer-shuara jintinniur̄isha, Israer-shuara iruntai-j̄ē̄ úuntrīsha Nin káutkarmiai. ²⁸ Káutkar Jesusan tiarmai “¿Yana kakarmarjijai j̄u túram. Ame túramna nuna ya tsan̄katrama?” tiarmai.

²⁹ Tuiniakui Jesus tímiayi, “Chikichkiniak aniatatjarme. Áirkatarum. Túrakrum̄nkia Wisha winia takastinian tsan̄katrukma nuna ujaktatjarme. ³⁰ Wats, turutiaram, ¿ya Juan̄ imiainiun tsan̄katkama? ¿Shuar tsan̄katkamka? ¿Yus tsan̄katkamka? Áirkatarum” tímiayi.

³¹ Tura niisha enentáimprar “Yus akupkaiti” tákurninkia, “¿urukamtia umirkachuram?” turamchattajik. ³² Antsu “shuar tsan̄katkaiti” tákurkia, ashí shuar ashamaji” tunainiarmai. Ashí aents Juan̄ nekas Yúsnan etserniuiti, tu enentáimainiakui ashammiarmai. ³³ Nuyá Jesusan tiarmai “Iikia nékatsji.”

Tutai Jesus tímiayi “Wisha núnisnak yana kakarmarjijai takaaj nuna ujakhattajrume.”

12

*Yajauch takau armia nu
(Mateu 21.33-46; Rúkas 20.9-19)*

¹ Jesus j̄u métek-taku chichaman unuiniamiai: “Shuar uwa ajan ajam wenuimiai. Nuyá uwa nekeetain najanamai. Tura kumpin j̄ēn najanamai. Najana takartusti tusa shuáran iikiuak nīnkia jeachat wémai. ² Neretai tsawant jeamtai, ni takarniur̄in júukman akankat tusa akupkamai. ³ Tura ajanam takau arma nu, nu takarniun achik, katsumkar, áyatik awain̄kiarmai. ⁴ Ataksha chíkich takarniun akupkamai, tura nunasha kayajai tukurar, múuknum katsumkar, katsekar awain̄kiarmai. ⁵ Tuma aīn̄ ataksha chíkichan akupkamai, tura nunasha máawarmai. Ti untsur̄in akupramai. Chikichnasha katsumkarmai, chikichan máawarmai.

6 Tura niijjaj chikichik tuke ámiayi, nuka ni aneamu uchirij. Nu uchincha ukunam akupkamai. Akupeak “Winia uchirnaka shiir awajsartatui” tímiai. 7 Tura ni uchirij winian wáinkiar, takau shuar nuámtak chichainiak “Juka ajá nérenniu uchirjnti. Wátsek, maatai; túramka ájaka iiniu átatui” tiarmai. 8 Túsar achikiar máawarmai. Ayashincha ajanmaya ajapawarmai” tímiayi.

9 Tura nuyá aniasmiayi, “¿Wats, warí enentáimsarum; ajá nérenniurj itiurkattawa? Jeashtanmayá taa, ajá takainia nú shuaran amuktatui. Ni ajaríncha chikichan ikiastatui. 10 Ju, Yus-Papinium aarma ana nu áujсахukaitrum:

Kaya péñkernak, jeammin “yajauchiiti” tusar ajapawarmia nu ashí kayajaj nankaamas péñker apujsamuiti. 11 Nusha Yus túramuiti. Isha íisar ti enentáimtaji.

Nuke áarmaiti” tímiayi.

12 Tura nú metek-taku chichamjaj nin áujmatma asa achiktai tusar chichaman jurusarmiyai. Túmainiyat shuáran ashamainiak Jesusan ikiuiniak wearmiayi.

Unt akupin súsatin tura Yus súsatin

(Mateu 22.15-22; Rúkas 20.20-26)

13 Tura wear, imiaamtikiar yajá chichakmatai nújaj yajauch títai tusar Paríséu shuarnasha, Erutisa nemarjín shuarnasha akatar Jesusan akup-tukarmiyai. 14 Túram Nin jeariar chicharainiak: “Uuntá, aents nakiti-ainiajn tuke nekas chicham páchitsuk chichaame, nu nékaji. Aents pátatek iiyatsme, antsu nekas Yusa jinti unuiniamé. ¿Waritia enentáimiam, ii kuitri uunt Sesar súsatin péñkerkait. Susattajik. Suritkiattajik? Nu nekaatai tusar wakeraji” tiarmiayi.

15 Tura Jesus ni yajauch enentáimmiarjín nekara “¿Urukamtai Winia yajauch titi tusarum wakerutarum? Kuit itiatarum, Wi íistaj” tímiayi.

16 Tutai kuítian itiariarmiayi.

Jesus nuna iis tímiayi, “¿Juisha yana yapj tura yana naarj áarmait?” tímiayi.

Tutai “Uunt Sésarna” tiarmiayi.

17 Nuyá Jesus tímiayi “Uunt Sésarna ana nu susatarum; túrarum Yúsnaka Yus susatarum” tímiayi. Tura ni áimkiamurjín antukar ti enentáimprarmiayi.

Aents nantaktinian Satuséu anintrusarmiania nu

(Mateu 22.23-33; Rúkas 20.27-40)

18 Nuisha Satuséu aents, jakamunmaya nantaktin péñké atsawai tiniu armia nu, Jesusan tariarmiayi. Taar Jesusan chicharainiak: 19 “Uuntá, Muisais juna áatrampramijai:

“Áishman ni nuarj júreatsajn jakamtainkia, yachin yajutmatrattsá, ni yachj nu wajen nuátkatniuiti.”

20 Wats, siati yachi ármiyai. Iwairj nuwan nuatak yajutmatsuk jakami-ayi. 21 Ni yachj wajen akinkiamiayi. Nusha núnisan yajutmatsuk jakamiayi. Nuna yachisha núnisan tura nuna yachisha núnisan túramiyai.

22 Tura ashí siati patajnman, patajnman nu nuwan nuátkarmiyai. Yajut-matsuk, yajutmatsuk jiniawarmiayi. Tura ukunam nuwasha jakamiayi.

23 Nuinkia nantaktin tsawantaj, nantakiarmatai, ¿yana nuarjín ati? Ashí siati nuátkacharmaka” tiarmiayi.

²⁴ Tutai Jesus tímiayi ““Jakamunmaya nantaktin atsawai” tátsurmek. Yusa chichame tura Yusa kakarmari nékachu asarum awajiarne, tímiayi. ²⁵ Iimiatarum, aents jakamunmaya nantakiarmatai, nuatnaikiatin at-suttawai, antsu nayaimpinmaya suntara núnisanan pujusartatui. ²⁶ Tura jakamunmaya nantaktiniapitia tusarum nu nekaatin nekas waker-akrumka Muisais aarmia nu enentáimtustarum. Yuska numichinmaya Muisaisan chicharuk “Wikia Apraáma Isaaka tura Jakupu Yúsrintjai” Yus tímiayi. ²⁷ Yaunchu jákaru ain, Yus nuna taku, ayashnium jakayat iwiaaku pujuinia nuna Yusrintjai, tawai. Nekas jaka ainia nuna Yusrinchuiti. Nantaktin atsawai tau asarum awajirurme” tímiayi Jesus.

*Yus akupkamu imiá péñker ainia nu
(Mateu 22.34-40)*

²⁸ Jessusha Satusésusha áujmatnainian Israer-shuara jintinniuri taa anturkamiayi. Anturak, Jesus ti penker áimkiui, niisha Jesusan júna aniasmiayi: “¿Yus akupkamu tuá imiá péñkerait?” tímiayi.

²⁹ Tutai Jesus tímiayi “Júiti Yus akupkamu imiá péñker: Antukta Israer shuará. Ii Yusrí úuntaiti, tura Niñki nekas Yúsaiti. ³⁰ Tuma asamtai, tuke enentáimjai ti enentáimsam Uunt Yus aneeta. Túram ame iwiaakmarmesha, kakarmarmesha Yus íktusta. Núiti nekas péñker akupkamu, tímiayi. ³¹ Nuyasha chikichcha awai, “ame ayashim aneamna tímiatrusmek ame írutramurmesha aneeta.” Chíkich nu nankaamas péñker akupkamu atsawai’ tímiayi.

³² Tutai jintintin tímiayi “Ee, péñkeraiti, Uunta. Nékasmeke tame. Chikichk Yus awai, chíkichkia atsawai. ³³ Tura tuke enentáimjai ti enentáimsar, ii kakarmarisha Yus íktusar Nin aneakrikia, ii ayashi aneajnia núnik ii írutramurisha aneatniuitji. Nusha ashí Yus sutai ana nujai nankaamas péñkeraiti’ tímiayi.

³⁴ Nuna tiniu asamtai Jesus ni péñker áimkian nekáa “Ameja Yus akupeamunam pachiinkiatin ishichik táasume” tímiayi. Tura nuyá chíkich shuar Jesusan aniastinian arantukarmiayi.

*Kristu tutai ¿yana uchirimpait?
(Mateu 22.41-46; Rúkas 20.41-44)*

³⁵ Jesus Yusa Uunt Jeen unuiniak pujumiayi. Tura chichaak “¿Urukamtai ii jintinniuri “Yus anaikiamu Krístun Tawitia shuari” tuinia?” ³⁶ Tawit, antsu, Yusa Wakaní aarta tutai, Yus-Papinium júna áarmiai:

Uunt winia Úuntron tímiayi “Ame nemasrumin nupetkatin amuatsain winia untsuuruinini pujusta”.

³⁷ Kame Tawitkia, Krístun áujmatuk, “winia Uuntru” taisha, ¿itiura ní shuarisha áitink’?” tímiayi Jesus. Tuma asamtai untsuri shuar nui matsamarmia nu ti shiir antukarmiayi.

*“Israer-shuara jintintin ainia nújai aneartarum” Jesus tímiania nu
(Mateu 23.1-36; Rúkas 11.37-54; 20.45-47)*

³⁸ Jesus unuiniak tímiayi, “Israer-shuara jintinniuri ainia nujai aneartarum. Niisha waantu enentáimtumasar, esaram pushin entsarar wekasatajtsar wakeruiniawai. Péprunmasha shuar shiir áujtusarat tusa wakeruiniawai. ³⁹ Israer-shuar iruntainiam penkeri pujutainium pujustinian wakeruiniawai. Nampernumsha penkeri pujutainium pujustinian sha wakeruiniawai. ⁴⁰ Tura waje jeencha atantainiawai. Túrawar

aents nekaracharat tusar ti esaram chichamjaj Yúsan áujainiawai. Nincha chikichjaj nankaamas Yus asutiawartatui” tímiayi.

Waje kuítrín susamiania nu

(Rúkas 21.1-4)

⁴¹ Jesus Yusa Uunt Jēen kuit enketainiam naka pujus áents kuítrín chumpian wáinkiamiayi. Untsurí kúitrín tin núkap enkeawarmiayi. ⁴² Nuyá waje kuítrincha taa jimiará uchich kuítian, reara áantsan, enkeamiayi. ⁴³ Jesuska unuiniamurín untsuk “Nekas tájarme, jū waje kuítrinchaitiat, ashí enkeena nú nankaamas núkap enkeayi. ⁴⁴ Iis, kuítrinniusa nii ampirma nuna enkeenawai, tura antsu jū nuwá kuítrinchaitiat, ampirmatsuk ni yurumatniurín takurmakman ashí enkeayi” tímiayi.

13

Yusa Uunt Jēen yumpuntratniun Jesus ujakmiania nu

(Mateu 24.1-2; Rúkas 21.5-6)

¹ Yusa Uunt Jēeniá Jesus jiinkimtai, unuiniamurí Nin tímiayi “Iisia, Uunta, kayasha ti shiir áiniawai. Jeasha imiá úuntchakait.”

² Tutai Jesus tímiayi “Jū imiá uunt jea wáinmek. Kaya ekenramu au ashí mash yumpuntrartatui” tímiayi.

Amuukatin tsawantin uruku átatna nu

(Mateu 24.3-28; Rúkas 21.7-24; 17.22-24)

³ Nuyá Uriwiu náinnium wakar, Yusa Uunt Jēe naka pujusar, Pítrusha, Jakupusha, Juansha, Antressha, nínkimias Jesusan aniiniak ⁴ “Uuntá, tímiam nu, ħurutíá túrunatta. Nu túrunatin jeakuisha itiura nekaattajia? Paant ujatmakta” tiarmiayi.

⁵ Tutai Jesus tímiayi “Aneartarum, anankramawairap. ⁶ Nekaatarum, untsurí winia naarun pachisar winiartatui. Chíkich chíkich “Wiitjai Kristu” taku, untsurín anankawartatui. ⁷ Tura meset chicham ántakrumka, yajaya meset chicham ántakrumsha sapijmiakairap. Nekas túrunashinkiait. Nujajisha amuukatin tsawantka tuke jeatsui, tímiayi. ⁸ Shuar chíkich shuarjaj mesetan najanawartatui; apachcha chíkich apachjaj núnisarañ mesetan najanawartatui. Untsurí nunkanam úurkattawai. Tsukasha ártatui, charaatum ajamusha núnisañ átatui. Tura nujaj itiurchatka aya yama nankamui.’

⁹ “Túmaitkui atumsha aneartarum. Akupin iruntainiumsha surut-makartatume, tura íi shuar iruntainmasha katsumpramkartatume. Wíi shuar asakrumin, kapitíannium, akupniunmasha juramkittiarne. Nuñ jearum, Winia chichastatume. ¹⁰ Nu túruntsajñ ashí áentsnum Yus-Chicham etsernaktiniaiti. ¹¹ Atumin surutmaktasar juramainiakusha, warintiajak tusarum ti enentáimsairap. Chichastin jeamtai, Yusa Wakaní jintinramattarmena nu titiarum. Iis, atumí enentáijjaj tíchattarme, antsu Yusa Wakaní jintintiam títiatume. ¹² Nu tsawantin shuarsha ni yachín mantamnati tusa suruktatui. Apasha ni uchirín suruktatui. Uchisha aparíncha nukuríncha kajerak, jakati tusa suruktatui. Núnisañ untsurí shuar túrawartatui. ¹³ Nuiñkia Wíi shuar asakrumin ashí nakitramprartatui. Tura shuar yawetsuk katsuntranċa uwemprattawai” tímiayi.

¹⁴ Nuyá Jesus tímiayi “Shuar juna áujeana nu nekaati. Yúsnan etserin, ni naari Taniar, ti yajauch tuke emesin ana nuna yaunchu aar etserkami-ayi. Nuka pujushtainiam pujan wáinkiumesha, ashí Jutía nunkanam pujarmena nu, náinnium pisartarum. ¹⁵ Jeá yakiini pujana nu akaiki wariri achiktajtsa, jeen wayashti. ¹⁶ Ajanam pujana nusha ni pushirin jukiti-ajtsa waketskisti. ¹⁷ Tura ajamtin áiniana nusha, kuírchin umuntsainia nusha, nu tsawantin timiá itirchatan wáinkiertatui. ¹⁸ Tuma asamtai átum pisaarmena nu yumitin ahati tusarum Yus seatarum. ¹⁹ Nu tsawantinkia ti wáitsatin átatui. Yama nankamtaik Yus nunkan najanama nuisha, yamaisha ukunmasha timiu wáitsatin penké atsuttawai. ²⁰ Tura Uunt Yus wáitsatin tsawantan ishichik awajsattajai tichaitkuinkia, uwempratin penké atsuinti. Tura ni shuarin anaikiamia nuna yáintajtsa wakerak, nu tsawantan ishichik awajsattawai. ²¹ Nu tsawantaj “júiti Kristu” túramkuinkia anturkairap. ²² Kame “Kústuitjai” ántar tuinia nu, tura “Yúsnan etserniuitjai” ántar tuinia nusha wantinkiertatui. Wantinkiar Yus anaikiam shuárnasha anañkatai tusar wakeruiniak, ni kakarmarin iniakmainiak aentsti tujintiamun túrartatui. ²³ Tura átum aneartarum. Aetak, túruntsain ujakchajrumek’ tímiayi Jesus.

Aents Ajasu tutai tátintri

(Mateu 24.29-35, 42-44; Rúkas 21.25-36)

²⁴ Jesus tuke unuiniak juna tímiayi: ‘Tura nu wáitsatin nankaamasmatai, etsaasha nantusha etsantrashtatui. ²⁵ Yaasha nayaimpinmaya kakekartatui, tura nayaimpiniam kakaram ainia nu muchitrartatui. ²⁶ Nuyasha ashí aents Winia wáitkiartatui. Wi, Aents Ajasuitjiana ju, ti kakaran, ti wincha ajasan, yuranminiam winiái wáitkiartatui. ²⁷ Nuí nayaimpinmaya suntarun akupkattajai, Wíi shuaran ashí nunkanmayan irurarat tusan. Arakaaniya, nunkaaniya, ashí nunka nanatkamunmayan Wíi shuaran irurartatui.’

²⁸ ‘Ikiu numi nakumea nu nekaatarum. Ni chinimpri punkak nuke jeaku, “ju nunkanam esat jeatemai” tátsurmek. ²⁹ Núnisrumek Wi tájarmena nu wáinkiumeka, ni tátintri jeatemai tu nekaattarme. ³⁰ Nekas tájarne, yamaí aents pujuinia nu kajiñ amuniatsain, ashí Wi tájana nu túrunatniuiti. ³¹ Nayaimpisha nunkasha amuukatniuiti. Tura winia chichampruka amuukashtiniaiti. ³² Tura tsawantcha nekanachminiaiti. Nayaimpinmaya suntarsha nékainiatsui; Wisha Yusa Uchirintiatan nékatsjai. Aya winia Aparuk nékawai. ³³ Atumsha anearum enentáimprarum Yus aujsa pujustarum, tsawant nékachu asarum.’

³⁴ ‘Tura Wikia ju shuarjai méteketjai. Ju shuarsha jeachat weak, ni jeen ikuawai. Ikiuak ni shuarin wáitrukarti tusa apujas ikuak ashí shuaran takatrin súawai. Tura wáitin wáinnium, “ameja penker wáinkia” timiai. ³⁵ Wikia nu jeá nérenniua núnisnak, urutai tátataj nékachu asarum anearum pujustarum. Kíaraimpiash, tura ajapkeash, atash shiniukaimpiash, káshikiash tátatjai. ³⁶ Nérentin aya aneachmak taa, kanúu tepaj wáitkiai tusarum aneartarum. ³⁷ Wi atumin tájana nu, ashí shuaran tajai, anearum pujustarum” tímiayi Jesus.

14

Jesusan chichaman jurusarmiania nu

(Mateu 26.1-5; Rúkas 22.1-2; Juan 11.45-53)

¹ Jímiarchikí tsawant ajasmiayi paskua tutai námper jeatin. Paskua námpertincha wakapruachu tantan yuatin námpernasha métek najanin ármiai. Israer-patri uuntri^{sha}, Israer-shuara jintinniur^{isha} Jesusan anañkar achikiar maatai tusar wakeriarmiayi. ² Túrasha “Jista tsawantin túrachmi, aents charaatum ajaraiñ tusar” tiarmiayi.

Nuwa kun^{kuin}ian Jesusan ukatramiania nu

(Mateu 26.6-13; Juan 12.1-8)

³ Jesussha Petania péprunam tunamaru Semun^{ka} jeen misanam pujan, nuwa tarimiayi. Nartu kun^{kuin}ian arapástru tutai kaya najanamunam piakun itiamiayi. Nu kun^{kuin} ti kuitiaiti. Mutí chuchuke kupik Jesusa muuken kun^{kuin}ian ukatramiai. ⁴ Tura nu^j pujuarmia nu, kajerar tunaiarmiayi “¿Urukantai ju kun^{kuin}ian ántar wasurea? ⁵ Júnasha súrakka, menaintiú sian^{ku} kúitnium surukminiuyi. Nu kuitcha kuítrinchan súsañka maak” tiarmiayi. Tusa nuwañ kajer^{karm}iai.

⁶ Antsu Jesus chicharainiak “Iniaisatarum. ¿Urukantai au kajerarum? Winia shiir túrutayi, tímiayi. ⁷ Kuítrincha atumjai tuke íruntsuk. Wakerakrunka tuke péñker awajsatniuitrume. Antsu Wikia atumjai tuke pujshatjai. ⁸ Ju nuwa ashí nii túramnia núnaka umikiai. Wi jákatin jeatsain, iwiarsatin kun^{kuin}ian shiir ukatrurai. ⁹ Nekas tájarme, ashí nun^{kan}am Yus-Chicham etsernaktatna nu^j, ju nuwa túramur^{isha} etsernaktatui, nin kajinmatkiaraiñ tusa” tímiayi.

Jútas Jesusan suruktaj timiania nu

(Mateu 26.14-16; Rúkas 22.3-6)

¹⁰ Nuyá Jútas Iskariúti, Jesusa unuiniamur^{int}iat, Israer-patri uuntriñ werimiayi, Jesusan suruktaj tusa. ¹¹ Niisha nuna antukar, warasar “Kuit amastatji” tiarmiayi. Jútassha Jesusan itiurak yúpichuch tsan^{ka}mkattaj tusa enentáimias wekaimiai.

Jesusjai iruntrar yurumáwarmia nu

(Mateu 26.17-29; Rúkas 22.7-23; Juan 13.21-30; 1 Kurintiunam 11.23-26)

¹² Wakapruachu tantan yuatin jisat nan^{ka}kama tsawant tsawarmatai, paskua námpertin yúatin murik máatin jeamtai, Jesusa unuiniamurⁱ ini-asarmiayi “Paskuatin murikiu yúatin iwiaratai tusar ¿tuj wétataji. Tui yurumattam?” tiarmiayi.

¹³ Tutai Niisha jimiará unuiniamurⁱⁿ akatar akupeak “Péprunam watarum. Nu^j áishmañ yumin jukí wéa wáinkiatarme. Nu áishmañ nemarsatarum. ¹⁴ Wayana nu^j jeá nérenniurⁱ títiarum “Uunt túramui, ¿wisha, unuiniamur^{jai} tuj yurumáttaj?” ¹⁵ Nu nérentin, yakí písunam uunt tesamunam ashí iwiaramun iniakturmastatrume. Nu^j jisat ii najanatin iwiaratarum” tímiayi. ¹⁶ Ni unuiniamurⁱ wear, péprunam jeawar, Jesus timia núnisañ wáinkiar^{mi}ayi. Tuma ásar paskua námperan iwiararmiayi.

¹⁷ Nuyá kíakui Jesus ni tuse unuiniamur^{ijjai} wayawarmiayi. ¹⁸ Niisha misanam pekaamak, yurumáiniak pujusar, Jesus tímiayi. “Nekas tájarme, chikichík shuar Wijjai yurumna nu, surutkattawai.”

¹⁹ Nujai kúntuts enentáimprarmiayi. Chíkich chíkich Jesusan aniasar “wíashitiaj” tiarmiayi.

²⁰ Jesus tímiayi “Ju misanam tuse irunar yurumprum nu, chikichik surutkattawai. Wijjai piniñnum yurumkan ayak yuana núiti. ²¹ Nekas Wi, Aents Ajasuitjana ju, jákatniunam wéajai, áarturma áintsanak. Tura áishmañ súrutna nu ti wáitsattawai. Niisha akiinmainchu ajakuíti” tímiayi.

22 Yurumainiak Jesus Yúsan yuminkias, yurumkan achik, puuk, chicharainiak “Achiktarum, jusha winia ayashruiti” tímiayi. 23 Piniñnasha achik, Yúsan yuminkias, ni unuiniamurin súsarmiayi. Ashí umararmiayi. 24 Umararmatai Jesus tímiayi “Júiti winia numpar, untsurin yáintajtsa puártinia nu. Nujai Yamaram Chichaman Yus najanaiti. 25 Nekas tájarme, uwa yumiri ataksha jui umarchattajai. Tura tsawant jeamtai, ukunmasha, Yus akupeana nuj yamarman umartatjai” tímiayi.

Pítur natsantratniua nuna Jesus ujakmiania nu
(Mateu 26.30-35; Rúkas 22.31-34; Juan 13.36-38)

26 Yus-kantan kantámawar, jinkiar, Uriwiu náinnium wearmiayi. 27 Nuñkia Jesus nin tíarmiayi “Ju kashi átum natsantrurtatrome. “Murikiu wáinnium máattajai, túramtai murik tsakinmakartatui” tu aarchamukait. 28 Tura ukunam Wi nantakin atumin Kariréanam émtuktiajrome” tímiayi.

29 Tutai Pítur chicharuk “Ámin ashí natsantramainiakuisa, wikia natsantrashtatjame” tímiayi.

30 Tutai Jesus tímiayi “Nekas tájame, ju kashi atash jimiará shiniatsain, natsantrurtatme. “Núnaka nékatsjai” menaintiú turuttiatme” tímiayi.

31 Tutai Pítur kakaram chichaak “Ámijijai métek máantuiniakuisha, núnaka penké tíchattajai” tímiayi. Ashí ni unuiniamurí núnisan tiarmiayi.

Jesus Jitsemani ajanam Yúsan áujsamiania nu
(Mateu 26.36-46; Rúkas 22.39-46)

32 Nuyá Jitsemani ajanam wearmiayi. Jeawar Jesus ni unuiniamurin tímiayi “Jui pujustarum, Yúsan áujsatasa pujai”. 33 Pítrun, Jakupuncha, Juápnasha jukimiayi. Tura Jesuska ti kuntuts enentámiar wake mesek nekapsatasa nankammiayi. 34 Tura nin chicharuk “Wi ti kuntuts enentáimjai, tura jakannia nekapeajai. Jui iimia pujutarum” tímiayi. 35 Jesussha ishichik arantach we, nunká piniakumar tepes Yúsan aujmiayi. “Ju wáitsatin átatna nu, túrutatniuitkuñkia iniaitiusta” tu seamiai. 36 Tuke áujuk tímiayi “Apawá, ashí tujinchaitme. Piniñnumia ashí umartinia áantsan ti nekapsatajna nú wáitsatniun, jurutkitia. Antsu Wi wakeraj nucha, ame wakeramuram túrunati.” 37 Tura ni unuiniamurin tarin, kanúu tepenan wáinkiamiayi. Pítrun tímiayi “¿Semunka kánamek. Kanutsuk ishichkisha iimia pujustin tujinkiamék? 38 Anearum Yus áujstarum, tunaanum iniaaraj tusarum. Atumí wakaniin kakarmaitrome, antsu atumí ayashjin kakarmachuitrome” tímiayi.

39 Ataksha we, nuik Yúsan áujsama núnisan áujsamiai. 40 Ataksha waketruki, ni unuiniamurin kanúu tepenan tarimiayi. Karí ti pujá asamtai, Jesusan áujsatniun tujinkiarimiayi. 41 Jesus ataksha we, tarí tímiayi “Kanarum ayampratarum. Máakete. Jeayi. Wi, Aents Ajasuitjiana ju, tunáa shuarnum surukmaitjai. 42 Nantáktiárum, wemí. Iis, Winia súrutna nu nuntumsai” tímiayi Jesus.

Jesusan achikiarmiania nu
(Mateu 26.47-56; Rúkas 22.47-53; Juan 18.2-11)

43 Jesus nuna chicháa pujá unuiniamurí Jútas tarimiayi. Nijijai untsurí aents puniá takaku, tura numincha takaku káutarmiayi. Israer-patri untrí, Israer-shuara jintinniurí, tura Israer-shuara úntrí akupkarma asa káutkarmiayi. 44 Káuntsain Jútas chicharainiak, “Wi mukunattaj áujkin

núiti Jesus. Achiirum, péñker emetarum jukitiarum” tímiayi. ⁴⁵ Tura Jesusan tarí, mukunuk áujas “Uuntá, Uuntá” tímiayi. ⁴⁶ Túramtai aencha Jesusan achikiar emetawarmiayi. ⁴⁷ Túruiniakui nuí wajatusha puniari úkuitsañ, patri uuntri takarniurin awati ni kuishin tsupirkamiayi.

⁴⁸ Túram Jesus áentsun tímiayi “Kasakaitiaj. Puniajai numijjai, kasá nútiksarmek achirkatai tusarum tarutniurme. ⁴⁹ Ashí tsawant atumjai Yusa Uunt Jeen wayan unuiniakun pujuchmakaj. Túmaj nuí achirkach-marme. Tura Yus timia nu uminkiat tusa ju túrunayi.” ⁵⁰ Nuiñkia ni unuiniamurj Niniak ikiuiniak pisararmiayi.

Natsa pisarmiania nu

⁵¹ Tura áishman nátsaach aya tarachin penumas Jesusan atamprimiayi. Tura natsaach suntar achikiam ⁵² tarachrin ajapa ikiuak misú tsékeñkimiayi.

Patri uuntriin Jesusan júkiarmiania nu

(Mateu 26.57-68; Rúkas 22.54-55, 63-71; Juan 18.12-14, 19-24)

⁵³ Patri uuntriin Jesusan ejeniarmiayi. Nuí Patri uuntrisha, Israer-shuara jintinniurjsha, Israer-shuara uuntrisha irunturarmiayi. ⁵⁴ Tura Pítiur íkiañ nemarki Patri jeen aach jeá, Patri suntarjijai jinia anamuk pujumiayi. ⁵⁵ Patri uuntri ashí naamka uunt armia nujai iruntrar maatai tusar wakeruiniak shuar Jesusan tsanumprurat tusar eatkarmiayi. Nu chichamjai mantamnati, tiarmiayi. Túrasha wáinkiacharmiayi. ⁵⁶ Túrasha untsurj shuar Jesusan tsanumpruiniayatan yapajjá yapajjá chichainia ásarmatai wáinkiacharmiayi. ⁵⁷ Nuyá chíkich wajakiar wáitruiniak juna tiarmiayi ⁵⁸ “Yusa Uunt Jeen, aents jeamarmia nuna yumpuntiatjai. Túran menaintiú tsawantaj, chikichan, aents jeamchamun jeamtatjai” tau antukmajj” tiarmiayi. ⁵⁹ Tura tuke yapajjáwar tiarmiayi.

⁶⁰ Nuishá Patri uuntri ajapén wajaki Jesusan chicharuk “¿Áimsatin penké tujintiamék. Warinia turamainia?” tímiayi.

⁶¹ Tura Jesus takamtak áimtsuk pujumiayi.

Patri uuntri atak chicharuk “¿Ame nekas Yusa Anaikiamurjnkaitiam. Ii Yusri Uunt tajinia nuna Uchirjnkaitiam?”

⁶² Tutai Jesus tímiayi “Ee, nútjai. Winia, Aents Ajasu tutaintiajna nu Kakaram Yusa untsuurinj pujaj wáitkiattarme. Tura nayaimpinmaya yuranminiam winiaj wáitkiattarme” tímiayi.

⁶³ Tutai Patri uuntri kajek, ni pushirin jaak tímiayi “¿Chíkich títincha warí atumajj? ⁶⁴ Nii tana nujaj Yúsan kátsekeamu antukurme. ¿Warintia enentáimprum?” tímiayi.

Takui “jakamniaiti” ashí tiarmiayi. ⁶⁵ Chíkich chíkich Jesusan usukiáwarmiayi. Jiin epetkar awatiar “¿Ya áitkiarma? etserkata” tiarmiayi. Patri suntarjsha yapiniam awatiarmiayi.

Pítiur Jesusan natsantramiania nu

(Mateu 26.69-75; Rúkas 22.56-62; Juan 18.15-18, 25-29)

⁶⁶ Núnaka túruiniaj Pítru nunká, jea aani pujan, nuwa Patri uuntri takarniurjya nu tarimiayi. ⁶⁷ Niisha Pitrun jinia anamu pujan wáinkiamiayi. Wáiniak, “Amesha Nasarenumia Jesusjai wekaichukaitiam” tímiayi.

⁶⁸ Tutai Pítiur chicharuk, “Nékatsjai. Ame támena nuna nékatsjai” tímiayi. Tura aa wáitainiam jiinkimiayi. Tumai atash shiniukmiayi.

⁶⁹ Nu núwasha Pitrun ataksha wáiniak, shuáran nuí pjuuinian tímiayi “Júiti ni shuari.”

⁷⁰ Tura ataksha “atsá” tímiayi.

Ishichik árusan, shuar nuí pujuarmia nu ataksha Pitrun chicharuk “Nekas ni shuarinme. Kariréanmayá shuárchakaitiam. Auyá shuara nuní chichaame” tiarmiayi.

⁷¹ Tutai Pítrusha kakantar chichaak, “Ju áishmannaka átum tárumna núnaka nékatsjai. Wáitrakuñkia Yus írsati” tímiayi. ⁷² Nuyá ataksha atash shiniukmiayi. Pítrusha, Jesus nuik timian enentáimmiayi. Iis, Jesus nuik tíchamka “Atash jimiar shiniatsain, ame, núnaka nékatsjai, menaintiu turuttiatme” tíchamka. Pítru nuna enentáimias ti úutmiayi.

15

Jesusan Piratúí ejeniarmiania nu

(Mateu 27.1-2, 11-14; Rúkas 23.1-5; Juan 18.28-38)

¹ Tura kashin káshik Patri uuntri, Israer-shuara úuntri*jijai*, Israer-shuara jintinniur*jijai*, ashí naamka armia nujai irunturar, chichaman jurusarmiayi. Túrawar Jesusan jin*kiamun* apach kapitían Piratúin ejeniarmiayi. ² Ejeniarmatai Piratu aniasmiayi “¿Amesha Israer-shuara Uuntri*nkáitiam*?”

Tutai Jesussha “Amek tame” tímiayi.

³ Nuyá Patri uuntri ti tsanumprurarmiayi. ⁴ Ataksha Piratu aniasmiayi “¿Áimsatin penké tujintiamek? Ti untsurí etserturmainiatsuk.” ⁵ Tura Jesus nunasha áikchamiayi. Túmakui Piratu ti enentáimpramiayi.

Jesusan, mantamnati, tíarmiania nu

(Mateu 27.15-31; Rúkas 23.13-25; Juan 18.38–19.16)

⁶⁻⁷ Shuar ámiayi, ni naari Parapás. Niisha ni shuari*jijai* meset ámanum, shuaran maa asamtai sepunam enkeamuyayi. Tura námper tsawantai Piratu sepunmayá chikichík shuarnak *jíiki* akupniuyayi, aents seawarmia nuna. ⁸ Nuísha untsurí shuar Piratun káutkar tiarmiayi “Ame ju námpertin tuke túramna nu túratá. ⁹⁻¹⁰ Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuarteram *¿atumí* akupniur*in jíiki* akupkattajak? ¿Nu wakerarmek?” tímiayi.

¹¹ Tutai Patri uuntri áentsun chichainiak ““Antsu Parapás *jíikim* akúpkatá” titiarum” tiarmiayi.

¹² Tutai Parapásan seawarmatai Piratu ataksha chicharainiak “Jesusnasha, átum ii akupniur*i tarumna* nuna, *¿itiurkattaja*?” tímiayi.

¹³ Ataksha ni kakantar tiarmiayi “Krúsnum mantamnati.”

¹⁴ Piratusha nin tiarmiayi “¿Warí tunaana túriniait?” tímiayi.

Takui niisha nú nankaamas kakantar tíarmiayi “Krúsnum mantamnati.”

¹⁵ Tuma asamtai, aents shiir enentáimprartí tusa, Piratu tunáa shuaran, Parapásan *jíiki* akupkamiayi. Tura Jesusnasha katsumkarum krusnum ajinrurtarum tusa suntaran tsan*katkamiayi*. ¹⁶ Tiniu asamtai suntar Jesusan jukiar, kapitían *jeen* awayawarmiayi. Nu *jea* naari Piritiúriiuiti. Túrawar untsurí suntaran untsukarmiayi. ¹⁷ Ashí káunkar, pushin kapañniun Jesusan áentsrarmiayi. Tawasap *jan*ki** najanamun etsenkrumtikiarmiayi. ¹⁸ Nuísha Jesusan áujсар “Shíiraitme, Jesúsá, Israer-shuara akupniur*iya*” wishikiainiak tiarmiayi. ¹⁹ Muuknumsha sapapjai

awatiarmiayi; nuyá usukiawarmiayi, túrawar ántar tikishmatrarmiayi. ²⁰ Tura Jesusan wishikrar amukar, kapaqantin pushin átkiar, ni pushirín áentsrarmiayi. Túrawar krúsnum ajintrurtai tusa júkiarmiayi.

Jesusa jakamuri

(Mateu 27.32-44; Rúkas 23.26-43; Juan 19.17-27)

²¹ Semun Serini núñkanmaya shuárayayi. Arijantruncha, Rupuncha aparíyayi. Semun kan takatnumia winian suntar emetawarmiayi, Jesusa krusrín yanaki jukiti tusa. ²² Jesusnasha Kúrkuta náinnium júkiarmiayi. Kúrkuta, shuar chichamjainkia, muuka ukunch naint, tutaínti.

²³ Jeawarmatai, karía, mira kunkuinjai pachimprar áartaj tusa susarmiayi Jesusan. Túrasha umarchamiayi. ²⁴⁻²⁵ Nantu yaki jatemsantai krúsnum ayapar ajintrurar ikiusarmiayi. Túrawar suntar yaki jukit tusa nakurutaijjai nakurusar Jesusa pushirín yaruakarmiayi. ²⁶ Urukamtaí máamuit, ashí aents nuna nekaawarat tusa, ni krúsrín ju aarmauyayi: *ISRAER SHUARA AKUPNIURI*

²⁷ Nu náinnium jimiará kasa shuaran Niijjai máawarmiayi. Chikichik Jesusa untsuurín krúsnum, chikichik ni menarín krúsnum máawarmiayi. ²⁸ Yus-Papinium aarma ana nujai uminkiauyayi. Nuí “tunáa shuarjai nekapmarmauyayi” tu áarmaiti.

²⁹ Shuar nankaamainiak, muuke pearar, Jesusan katsekainiak tiarmiayi “Iisia, amesha, “Yusa Uunt Jeen yumpuntiatjai, tura menaintiú tsawantaj ataksha jeamkattajai” tíchakaitiam, tiarmiayi. ³⁰ Amek krúsnumia akaikim uwemprata.” ³¹ Núnisan Patri uuntrisha, Israer-shuara jintinniurisha Jesusan wishikrar chicharnaisarmiayi “Chikichan uwentkraitiat, Niñki uwempratniun tujintiwai. ³² Yusa anaikiamuri Krístuashit, ii akupniuriniashit, tiarmiayi. Wats, yamá krúsnumia akáikití, iisha nu íisar Yus-shuar ajastai” wishikiainiak ántar nuna tiarmiayi. Jesusjai krúsnum ajintruamusha Nin wishikiarmiayi.

(Mateu 27.45-56; Rúkas 23.44-49; Juan 19.28-30)

³³ Tutupin jeamtaí ti kiritin ajasmiayi ashí nunkanam. Tura, nantu nunkaach ajasmatai ataksha tsaapnirmiayi. ³⁴ Nuin Jesus kakan-tar untsumuk tímiayi “Iruí, Iruí, rama sapaktani.” Nuka shuar chichamjainkia, “Yusrú, Yusrú, ¿urukamtaí ajapa ikiurkiniam?” tawai. ³⁵ Shuar nuí pujuarmia nu, nu chichaman nékachu ásar, nuna antukar “Eriasan untsúawai” tiarmiayi. ³⁶ Chikichik shuar churuinian uruchjai ajamper, sapapjai ijiú mukunati tusa susamiayi. Tura tímiayi “Wajastarum, Eriás Nin jukitaj tusa winishtimpiash. Iistai” tímiayi.

³⁷ Nuñkia Jesus kakaram untsamak jakamiayi. ³⁸ Túramtai Yusa Uunt Jeen ejamu niñki jaanakmiayi, yakíya nunká. ³⁹ Suntara kapitiantrisha Jesusan ayamtus wajamia nu, Jesus kakaram untsamak jaamun iis tímiayi “Nuka ti nekas Yusa Uchiriyayi.”

⁴⁰ Nuwasha arant ii pujuarmiayi. Nu nuwajai Máktara péprunmaya Marí, chikich Marisha, Sarumáisha pujuarmiayi. Chikich Marisha uchich Jakupuncha Jusenchá nukuríyayi. ⁴¹ Nu núwaka, Kariréa nunkanam Jesus wekaimia nuí, Nin nemarsar yáintaitsar wekasarmiayi. Untsurí chikich nuwasha Jesusjai Jerusarénum wear, nu nuwajai arant ii pujuarmiayi.

*Jesusan iwiarsarmiania nu**(Mateu 27.57-61; Rúkas 23.50-56; Juan 19.38-42)*

⁴² K̄jatemamtai, ayampratin tsawant jeatsain, námper iwiaratin tsawant asamtai, ⁴³ Arimiatiánmaya José arantutsuk, kakaram ajas, Piratuí jeá Jesusa ayash̄in seatajtsa utuamiayi. Nu Jusenchá ashí irunin ainia nu anturin ármiayi. Niisha Yus j̄u nuñkanam akupin ajasat tusa nákasmiayi. ⁴⁴ Tura Jesusa ayash̄in seam, Piratusha “wárik jaka” tímiayi. Tuma asa suntara kapitiántr̄in untsurak “¿Nekas jakayik?” tímiayi. ⁴⁵ Tutai kapitián “Ee” takui, Jesusa ayash̄in Jusén tsan̄katkamiayi. ⁴⁶ Jusesha puju tarachin péñkeran sumarak, Jesusa ayash̄in itiar áepas penuarmiayi. Tura yamaram kaya táurmanum ikiusmiayi. Ikius wáitiniam kayan átutmiayi. ⁴⁷ Tura Máktaranmaya Marí, José nukurí Maríjjai ni ikiuamun ii wajarmiyai.

16*Jesus nantakmiania nu**(Mateu 28.1-10; Rúkas 24.1-12; Juan 20.1-10)*

¹ Tura ayampratin tsawant nan̄kaasmatai, Máktaranmaya Marisha, Jakupu nukurí Marisha, Sarumáisha, kun̄kuinian Jesusa ayash̄in kuertai tusar sumakarmiyai. ² Tura kashin Tum̄ntin, ti káshik, nantu yáma jiinia, iwiarsamunam jeariarmiayi. ³ Wésar chichainiak “Iwiarsamu wáitir̄i kayancha ¿yaki akan̄ketramkattaj?” tiarmiayi. ⁴ Jear uunt kaya akan̄kekman wáinkiarimiayi. ⁵ Iwiarsamunam wayawar, natsan esaram puju pushin entsar, untsuurnumaan̄i pujan wáinkiar ti ashamkarmiyai. ⁶ Túmainiakui natsa tímiayi “Ashamkairap. Nasarénumiá Jesús krúsnum jakama nu éarme. Iniantkimiuiti. J̄ui pujatsui. Wátsek, j̄u ikiusmanum ístarum. ⁷ Túrarum werum Pítrusha, ch̄ikich unuiniamur̄isha j̄u ujaktarum. Kariréanam atumin émkiyi. Turammarumna núnisan̄ túruna wáinkiatarme” tímiayi. ⁸ Niisha ti ashamainiak purushniarar iwiarsamunmaya tseke wearmiayi. Ti ashamainia ásar, ch̄ikichkinkesha ujakcharmiyai.

*Máktaranmaya Marin Jesus wantintiúkmiania nu**(Juan 20.11-18)*

⁹ Émkaka Tum̄ntin ti káshik Jesús nantaki, Máktaranmaya Marin wantintiúkmiyai. Nu Maríá enentáiyá siati iwianchin Jesús yaunchu ajapruyayi. ¹⁰⁻¹¹ Marisha Jesusa nemar̄i kúntuts uutu matsatainian werí, “Jesús iwiaakui, imia wi wainkiajai” tímiayi. Támaitiat anturkacharmiyai.

*Jesus jimiará shuaran wantintiukmiania nu**(Rúkas 24.13-35)*

¹² Tura urum jimiaara shuar Jerusarénumiá tsan̄in weenan, Jesús nusháa iira ajas tarimiayi. ¹³ Niisha Jesusan wáinkiar waketkiar, unuiniamur̄in ujakarmiyai, tura ni chichamen̄cha anturkacharmiyai.

*Jesus ni unuiniamur̄in akupkarmiania nu**(Mateu 28.16-20; Rúkas 24.36-49; Juan 20.19-23)*

¹⁴ Nuyasha Jesusa auntse unuiniamur̄i misanam pekaamkar pujuinian Jesús tarimiayi. “¿Atumí enentáji urukamtai kátsuram ainia, urukamtai Winia nekas enentáimtursachuram?” tímiayi. Ni nantakmiar̄in wáinkiaru chichamen̄ anturkacharu ásarmatai kakantramiyai. ¹⁵ Nuyá

chichaak “Ashí nunkanam wetarum. Túrarum ashí shuarnum Yusa shiir chichame etserkatarum. ¹⁶ Shuar anturak imiani uwemprartatui. Shuar antukcharka, tuke sumamawartatui. ¹⁷ Shuar winia náarun pachis, Yúsan nekas enentáimtakka, juna túrawartatui, Yusa kakarmarín iniakmastaj tusa: iwianchin jiiiki akupkartatui; chíkich chichamjai chichasarukamtai Winia nekas enentáimturtatui; ¹⁸ napincha achiksha, tseasnasha úmaksha, jaa ajaschartatui. Jaa shuaran ni uwejejai antin, nu shuaran péñker awajsartatui.” Tu tímiayi.

Jesus nayaimpiniam wakamiania nu

(Rúkas 24.50-53)

¹⁹ Jesus chichas amukmatai, Yus nayaimpiniam jukimiayi. Túruna Yusa untsuuriní pujusmiayi. ²⁰ Ni unuiniamurisha jíinkiar, ashí nunkanam Yus-Chichaman etserkarmiayi. Tura Uunt Yus nin yáinmiayi. Tura etserainiakui, ashí aents ni kakarmarín nekaawarat tusa, aentsti tujintiamun túratniun susamiayi. Nuke atí.

Yúsán Shiir Chichamen

RÚKAS aarmia nu

¹ Nekas iinj́ Jesus túramia nuna “ímiatrusan áartajai” untsurí aents tiarmiayi. ² Yámankamtaikniumiãñ ísarmia nú shuar, tura Yus-Chichaman etserkatniun yáinkiarmlia nusha in unuitiamprarmia nútiksaran áartinian wakeriarmiayi. ³ Wisha núnisnak esetsaran enentáimsan, yámankamtaikniumiã nuna nekaamjai. Tuma asan túrunamia nuna ímiatrusnak amincha áatratajtsan wakerimjame, winia úntur Tiupiru. ⁴ Jintinramawarma nú nan_kaamas nekaata tusan wakerakun áatjame.

Imiakratin Juan_ka akiiniatniurín ujakmiania nu

⁵ Jutía nun_kanam uunt akupin Erutis akupkamlia nú tsawantin Israer-shuar Yúsnan pujurin ámiayi, ni naari Sakarías. Niisha Aptías weeayuyai. Ni nuweshá Irisapít Arun weeayuyai. Irisapítia úntrisha Israer-shuar Yúsnan pujurin ámiayi. ⁶ Yúsjaisha Sakaríassha Irisapítcha máí-metek pé_nker ámiayi. Yus akupkamlia nunasha umirin ámiayi. Tuma asamtai pé_nkesha chíkich nin yajauch chicharkatin atsuarmiayi. ⁷ Yusjai pé_nker wekainiyat Irisapít júrechuyai. Túrasha mai úntach ámiayi.

⁸⁻⁹ Israer-shuar Yúsnan pujurin chíkich weeanmayá nuyá chíkich weeanam, an_kant an_kant Yusa jéen takáu ámiayi. Chíkich tsawant, Sakarías weeá takastin amia nuj, Sakaríaska kun_kuinian ekeemaktaj tusa inít wayatniuyai. ¹⁰ Inít kun_kuinian ekeemaj untsurí aents aani matsamsar Yúsán áujtak pujuarmiayi. ¹¹ Sakarías inít pujaj kun_kuin ekeematainiam untsuurnumaanj aya aneachma nayaimpinmayá suntar wajamiayi. ¹² Nuna wajan wániak Sakaríaska purushnairmiayi. ¹³ Túrasha nayaimpinmayá suntar chicharuk tímiayi “Sapijmiakaip Sakarías. Nekaata. Ame seamna nuna Yus anturtamkayi. Tura ame nuwem Irisapít uchin takustatui. Nii akiiniamtai, “Juan” anaikiata. ¹⁴⁻¹⁵ Ame uchiram akiiniattana nuka Yusjaisha nan_kaamantu átatui. Tuma asamtai akiiniamtai, amesha shiir enentáimsam warastatme. Tura chíkich aents untsurí warasartatui. Ame uchirmesha karía ainia nuna umarchattawai. Tura áetak akiinchanak Yusa Wakaní pimiutkattawai, tímiayi. ¹⁶ Tura ni shuarín Israer-shuar áiniana nuna, ii Untrí Yusjai ataksha nawamtikiartatui. ¹⁷ Uunt Yúsaiya akatramu átatui. Yaunchu Yúsnan etserin Erías kakaram etserkamlia núnisãñ niisha etserkattawai. Nujaj shuaran ni uchiríjjai nawamtikiartatui. Tura umichu áinia nuna eseer enentáimtikrartatui. Ni Untrí taakui ni enentáí iwiamu arti tusa etserkattawai” tímiayi nayaimpinmayá suntar.

¹⁸ Nuna takui Sakarías nayaimpinmayá suntaran tímiayi “¿Nunasha warijjain paant nekaataj? Wisha nuarjai máí-metek ti úntchichukaitaj” tímiayi.

¹⁹ Tutai nayaimpinmayá suntar tímiayi “Wikia Kapriiraitjai, Yusa suntarintjai. Nii akatturmatai chichastájam tusan tura nu shiir chichaman ujaktájam tusan tarijme, tímiayi. ²⁰ Túrasha wi tájamna nu “nekasaiti” tu enentáimprachume. Tura asam uchiram akiintsain muut ajastatme. Chichastin pé_nké tujinkiattame. Tura wi tajana nu, tsawant jeamtai túrunattawai.”

21 Nuna tumaj Yusa jeen aani pujusar, Sakaríasan nákas pujuarmiayi. “¿Urukamtaik init we imiá menkaka?” tu enentáimprarmiayi. 22 Nuyá Sakarías jiinkimtai, áujsartaj tukamá tujinkiararmiayi. Sakaríaska, muut ajasu asa, aya úwíjmiasañ chichamiayi. Túmakui, Sakarías init pujus Yúsai wáimiakun nekaawarmiayi.

23 Yusa jeen takastin tsawantri amuukamtai Sakaríaska ni jeen waketkimiayi. 24 Nuyá ukunam ni nuari Irisapít ajaprukmiayi. Tura senku nantutin aya jeen pujusmiayi. 25 Jeá pujus, “Aents wishikruini-akui natsantan jurutkitiaj tusa uchi takustinian Yus tsankatrukai” tu enentáimpramiayi Irisapít.

Jesusa akiiniatniurin nayaimpinmaya suntar etserkamiania nu

26 Nu senku nantu nankaasmatai Yus ni suntarin Kapriiran Nasarét péprunam akupkamiayi. Nu pepru Kariréa nunkanam pujawai. 27 Nasarétnumia nuwan, naari Marí, iyutí tusa akuptukmiayi. Nu núwaka áishmanjai pujuchuyayi. Niisha Jusejai uatnaikiatsa anajmanair pujumiayi. Juseka uunt Tawit weeayuyayi. 28 Wats, nayaimpinmaya suntar Marí pujamunam wayá tímiayi “Yus penker enentáimturma asamtai, ámin winitjiame, Mariya. Yuska ámin nemartamuk ashí nuwá nankaamas penker awajtamui” tímiayi.

29 Tura Marisha nayaimpinmaya suntaran wáiniak, chichaamun nékatsuk “Urukamtaik tu chicháa” tu enentáimpramiayi. 30 Nuyá nayaimpinmaya suntar chicharuk tímiayi “Mariya, sapijmiakaip. Yus shiir enentáimturmawai. 31 Antukta. Amesha ajapruktatme. Túram Uchi takustatme. Nusha “Jesus” anaikiata. 32-33 Niisha uunt átatui. Nincha “Uunt Nankaamaku Yusa Uchiri” tiartatui. Tura Uunt Yuska yaunchu Tawitian uunt akupniurj awajsamía núnisan ame Uchirmin ame shuárumin Israer tutain Uunt akupin awajsattawai. Ni akupeamurisha Yus susamu asa penké amuukashtiniaiti” tímiayi.

34 Nayaimpinmaya suntar nuna tutai Marí tímiayi “Nusha winia áishur atsajsha, ¿itiurak túrunataj?”

35 Tutai nayaimpinmaya suntar Marín tímiayi “Yusa Wakaní tarutramtatui. Tura yuranmia núnisan Uunt Yusa kakarmari ijirmattawai. Nu tuma asamtai Uchi akiiniattana nu Yúsaiya asamtai, “Yusa Uchirinti” tiartatui, tímiayi. 36 Tura Irisapít ame kaná kaimia nusha núnisan weamtanam ajaprukai. Iis, “júrechuiti” tiarmia nu, yamaikia sais nantu pujawai ajamtin. 37 Yúsjainkia itiurchatka penké atsawai” tímiayi.

38 Tutai Marí tímiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpinmaya suntarka wémiayi.

Irisapítian Marí iyumiania nu

39-40 Nu tsawant Marí wárikmas muranam Jutía nunkanam ni kaná kain Irisapítian iyutaj tusa wémiayi. Sakaríasai jeá, ni jeen wayá, Irisapítian áujsamiayi.

41 Marí áujeamun antukmatai Irisapítia ampujén uchiri muchitkiamiayi. Tumaj Yusa Wakaní ni enentáin pimiutkamiayi. 42 Nuiñkia kakantar chichaak Marin tímiayi “Yus amincha ti shiir awajtamsaiti. Tura Uchiram akiniattana nusha Yus shiir awajsamuiti. 43 Kajrua, ame winia Uuntru nukurí áminin, Yus winia ti waitnentra asa, áujsata tusa ámin

akuptamkachaik, tímiayi. ⁴⁴ Warí, wisha ame áujtamna nuna ántakui ampujruí uchi waras muchitrukayi. ⁴⁵ Amesha Yus turámiania nu umikiu asam shiir pujame. Yus tímia nu túrunattawai auka” tímiayi.

⁴⁶ Nuna tinia iniaisamtaí Marí juna tímiayi:

“Wikia tuke enentairjái “Yus timiá úuntaiti” tajai. ⁴⁷ Tura Uunt Yuska winia Uwemtikruru asamtaí ti waraajai. ⁴⁸⁻⁴⁹ Wisha péejchach aín ni wakeramurín umiktajtsan wakerakui winia enentáimturayi. Tuma asamtaí ashí aents, “Marincha Yus shiir awajsaiti” tuke turutiartatui. Yuska imiá penker tura imiá kakaram ana nu winia ti uuntan túrutaiti. Tuma asamtaí ashí aents “Marincha Yus shiir awajsaiti” turutiartatui. Núnaka yamáí nankamamunak tuke turutú ajartatui. ⁵⁰ Tura Nin umirkatniun wakerana nunasha Yus tuke waitnentrartatui. ⁵¹ Ti itirchatan páchitsuk túraití Nii. “Nan̄kaamantuitjai” tu enentáimtumainia nuna nupetkaiti. ⁵² Ashí akupin ainia nuna awakkaruiti. Tura íksan̄ péejchach ainia nuna uunt awajsaruiti. ⁵³ Péñker ana nuna kitiamainiakui Yus penkeran súsaruiti. Tura antsu “ashí takakjai” tuinia nuna aya júñik awajsaruiti. ⁵⁴ Israer-shuar Niiniu ájinia núnaka waitnentratniun kajinmattsuk yáinmákuítji. ⁵⁵ Yaunchu ii Uuntri Aprááman tura ní shuarnasha “túratvajai” timia nuna ímiatrusan̄ tuke túraití.” Nuní tímiayi Marí.

⁵⁶ Marikia Irisapítjai menaintiú nantu pujus ni jeen waketkimiayi.

Imiakratin Juan̄ka akiiniamurí

⁵⁷ Nuyasha ni jurertin tsawantri jeamtaí Irisapítcha uchin áishmankan takusmiayi. ⁵⁸ Tura ni shuarísha, ni írutramurísha “Irisapítian Yus ti shiir yáin̄miayi” tuíniak, nin iyuwearmiayi. Tura máí-metek warasarmiyai.

⁵⁹ Israer-shuar túrutai júñisaiti: uchi akiiniamurí uchu tsawant jeamtaí, shunichirí nuapen̄ tsupiktin awai, sirkunsisiún tutai. Yus nuna tú tinu asamtaí tuke túrin ármiyai. Wats, Irisapítia uchirí akiiniamuríniá uchu tsawant jeamtaí tsupirkataí tusar ni jeen jearmiayi. Nuñkia ni aparí naarí Sakarías anaikiataitsar wakermiyai. ⁶⁰ Tura ni nukurí tímiayi “Atsá. Antsu ni naarí Juan̄ átatui.”

⁶¹ Tutai tiarmiayi “¿Nusha urukamtia? Amée shuarumsha nu náartincha áwak’ tiarmiayi. ⁶² Nuñkia uchi aparín “¿Warí anaikiatajtsam wak-eram?” tusar aya úwejejin̄ iniasarmiyai.

⁶³ Tutai uchi aparísha “Nakash surusta; áartaj tusan wakerajai” tusa aya úwejejin̄ iniakmamiayi. Takui nakash susam, ni naarí Juán̄kaiti, tu áarmiyai. Nuna wáinkiar “Ayawa urukakun̄ ta” tu enentáimprarmiyai. ⁶⁴ Nú chichamaik Sakarías chichatsuk pujamun chichakmiayi. Tura nuñ Yusa náarincha shiir awajsamiayi. ⁶⁵ Nuñkia ni írutramurísha ashamkarmiyai; tura ashí Jutía nuñka murá amia nuí nu túrunamun ujakam ashí nekaawarmiyai. ⁶⁶ Nu túrunamun antukar ti enentáimsarmiyai. Tura “ju uchin Yus nekas pujurtsuk. Tuma asamtaí uunt ajas ¿urukuk ati?” tu enentáimprarmiyai.

Sakarías Yus jintintiam tímiania nu

⁶⁷ Uchi aparí Sakarías, Yusa Wakaní pimiutkam tura Yus jintintiam, juna tímiayi:

⁶⁸ “Israer-shuartí ii Yusrj naarí shiir awajsatniuitji. Ii Yúsriša tarut-maitji. Tura uwemtikrampraitji. ⁶⁹ Yaunchu ii uuntri Tawit Yusa

wakeramurijjaj uunt akupin áchamkia. Tura ni ukurin ti kakaram Uwemtikkiartinian suramsaitji. ⁷⁰⁻⁷² Yuska ii nemasriya tura in nakitramainiajnua nuyá uwemtikrampratniun enentáimsamia nuna, yaunchu ni etserniurin péñker armia nuna ujakmiayi. “Winia ti penker chichamprun tájana nuna yapajitsuk umirkan tuke wáitnentratajrume” yaunchu ii úuntrin tímiania nunasha ni etserniurin ujakarmiayi. Yaunchu nu ujakma yamá iisha wainji. ⁷³⁻⁷⁵ Nu ujakman Yuska yámankamtaik imiá yaunchu ii uuntri Apráaman tíchamkia. Apráaman ujakmia nu júiti: “Wi wakeraj nútiksaran, Winia umirtúkar péñker wekainia nuna ni nemasriya uwemtikrattajai. Sapijmiatsuk winia tuke takartusarat tusan túrattajai” Yus tímiaiyi Apráaman. Iisha ni shuari asakrin, nuna taku incha túramaji. ⁷⁶ Tura amincha, uchiru, “Uunt Yusna etserniuiti” turamartatui. Amesha ni tátintri iwiarataj tusam Uuntaj émkim wétatme. ⁷⁷ Ni shuari, ni tunaari tsankurnar uwemprarat tusam túrattame. ⁷⁸⁻⁷⁹ Yuska ashí shuaran anea asa, incha wáitnentrakam ni pujamunmaya ni tsáapnintrin suramsaitji. Ni enentáin kir-itniunam wekáinia nuna, mesertinnium jeatemá ásarmatai, ni tsáapnintri jeat' tusa túrait. Tura ashí incha ii enentáin imiatkinchanum wekasarmí tusa túrait.” Nuní tímiaiyi Sakarías.

⁸⁰ Uchisha tsakarmiayi. Tura Yúsán nekaki-nekaki wémiayi. Israer shuarum etserkatin tsawantri jeatsajñkia atsamunam pujuyayi.

2

Jesusa akiiniamuri (Mateu 1.18-25)

¹ Wats, Juan akiiniamia nú uwitin uunt akupin Akustu ashí nunkanam áentsun nekapmarartí tu chichakmiayi. ² Nu nekapmartinian yaunchu túrushtain yamá túriarmiayi. Siria nunkanam Seriniu akupin pujaj túrawarmiayi. ³ Ni naari áartaj tusa ashí shuar ni nunkenin wétin ármiaiyi. ⁴ Tuma asantai Jusé Nasarét péprunmaya Kariréa nunkanam amia nuyá jiinki Pirin péprunam Jutía nunkanam amia nuí wémiayi. Juseka Tawit weeanam akiinia asa, ni nekas nunkenka Pirin kauyayi. ⁵ Nu asantai, ni náarin áartaj tusa Jusé wémiayi Marijjaj. Marisha Jusé núweyayi. Tura tsanincharuyayi. Túmaitat Marisha Yusa Wakaní kakarmarijaj ajam-tiniuyayi. ⁶ Tura nuí Pirinnum pujuiniaj Marí takustintri jeamiayi. ⁷ Nuí iwiarjin uchin áishman kan takusmiayi. Tura uchi penutajjaj penuar, waaka yurumtainiam áepsamiayi. Írar kanutainiam pujustin ankant atsa asantai túrawarmiayi.

Murikiun wáinnium nayaimpinmaya suntar Yus akatar akuptukmia nu

⁸ Tura Pirinnum tíjiuch murikiun wáinin kashi murikrin wáiniuk pu-juarmiayi. ⁹ Túmainiaj nayaimpinmaya suntar murikiun wáinin matsatainian wantintiukmiayi. Tura Yúsnumiá tsáapnin ni matsatainiamunam etsantramiayi. Túrunamtaí murikiun wáinniuka ti ashamkarmiayi. ¹⁰ Túrusha nayaimpinmaya suntar tímiaiyi “Ashamprukairap. Ashí áentsnum ti warastin atí tusan ti penker chichaman itiarjarme. ¹¹ Júiti: yamá tsawantaj uunt Tawitia péprurin Pirinnum yaunchu Yus anaiki-amu KRISTU tufai, uwemtikrampratj tusa akiinturmarme. Nu Uchisha ashí áentsun akupniuiti, tímiaiyi. ¹² Tura jujai nekaattarme: uchi

penutaijjai penuarma waaka yurumtainiam tepá wáinkiatarme. Nu wáinkiarum nekas júiti, tu nekaattarme.”¹³ Nu chichamaik nayaimpinmaya suntar ti unturí, nayaimpinmaya káunkarmiayi. Túrawar Yusa naarin shiir awajainiak juna tiarmiayi:

¹⁴ “Nayaimpinmasha Yus najkaamtuiti tu enentáimtusarti. Tura ju nunkanmasha Yusjai nawamnaikiaru ainia nu imiatkinchanum pujusarti.” Tu tiarmiayi.

¹⁵ Tura Yusa suntari nayaimpiniam waketkiarmatai murikiun wáinin tiarmiayi “Wats, Pirinnum wárik wetái. Nu túrunamu Yus turamajnia nu iyumi” tiarmiayi.

¹⁶ Nuna tiar wárik wearmiayi. Tura Marincha Jusenchá wáinkiarmiayi. Tura uchinchá waaka yurumtainiam tepan wáinkiarmiayi.¹⁷ Wear nuna wáinkiar, nayaimpinmaya suntar uchi túrunamurin timia nuna etserkarmiayi.¹⁸ Tura murikiun wáinin tiarmia nuna antukaruka ti enentáimtusarmiayi.¹⁹ Túrasha Marikia ashí túrunamia nuna ni enentáijjainkia enentáimtu pujumiayi.²⁰ Tura murikiun wáinniuka antukarmia nuna enentáimtusar, tura ísarmia nunasha enentáimtusar “Nayaimpinmaya suntar ujatmakmajnia tímatrusan túrunayi” tiarmiayi. Tuma ásar Yusa náarin shiir awajsar kantampruawar waketkiarmiayi.

Uchin Jesusan Yusa Uunt Jeen itiarmania nu

²¹ Tura uchi akiiniamu uchu tsawant jeamtaí, ni túrutairin túrin ásar, ni shunichirí nuapen tsupirkarmiayi. Túrawar Marí ajapratsain nayaimpinmaya suntar tímia nútiksai “Jesus” anaikiarmiayi.²² Tura Muisais akiiniatniunam akupkamia núnisan, tsawantri jeamtaí, Yusa Uunt Jeen Jerusarénum uchin Yus iiktustai tusar júkiarmiayi.²³ Kame Yus-Papinium ju aarma awai:

“Ashí uchi iwiairi áishman akiinkiuñka Yusna átatui.”²⁴ Tuma asamtaí, Marí Yusa Uunt Jeen wáitsuk pujamu wayatniuri jeamtaí, uchin Yus iisti tusa Yusa Uunt Jeen Jerusarénum pujana nuí itiarmaniayi. Tura yampitsan jímiarán súsarmiayi. Muisáis akupkamun umiiniak nuna túrawarmiayi.

²⁵ Nu túmaj Semeún naartin áishman Jerusarénum pujumiayi. Semeúnsha Yusa Wakaní pujurma asa péñker áishmankauyayi. Yúsan nekas enentáimtiniuyayi. Yusa anaikiamurijjai Israer-shuar ankant ajastin jeati tusa nákauyayi.²⁶ “Winia anaikiamur KRISTU tutai wáintsuk jákashtatme” uunt Yusa Wakaní tu jintintiamiayi.²⁷ Nú Semeún Yusa Wakani “wetá” tutai, Yusa Uunt Jeen wémiayi. Tura nú tsawantai Muisáis tímia núnisan umirkatai tusar Marisha Jusesha uchin Jesusan Yusa Uunt Jeen itiararmiayi.²⁸ Itiararmatai Semeún uchin jusa miniakas Yúsan áujuk juna tímiayi:

²⁹ “Yamaikia, Uunta, Amiin wi jeatin ankant atí. Turutmiamna nu ímatrusmek umikiume.³⁰⁻³¹ Ju Uchi ashí aents uwemtikrartá tusam susamna nuna yamáí imia winia jiiurujai wáinkiajai.

³² Israer-shuarcha ainia nu tsáapninium wekasarat tusa akuptukmaiti ju Uchi. Tura Israer-shuar Áminiuram ájinia nuna ashí aents shiir enentáimtikrartí tusam ju Uchi akuptukmaitji. Nuna wáinkian shiir enentáimsan jákatniuitjai.”

³³ Tura Semeún Uchinium tu chicharkui Jusesha Jesusa nukurísha ti enentáimprarmiayi.³⁴ Semeúnsha chichaak “Yus shiir enentáimturmasartí” nin tímiayi. Nuyasha Marin chicharuk tímiayi

“Nekaata. Ju Uchin Israer-shuartisha untsurí nakitrar iniarartatji. Tura chíkich Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmarín ti paant iniakmastatui. Tuma ain untsurí Aun yajauch chichariatatui.³⁵ Nujai shuar ni enentáin warinia enentáimia nu, paant átatui. Maaj, ashí nu túmakui, ijiumua núnismek ame enentáimin ti wáitsattame, Mariya.” Tu chichasmiayi Semeún.

³⁶ Nuwasha Ana naartin nuí Yusa Uunt Jeen pujumiayi. Niisha Yúsnan etserniuyayi. Ni aparísha Panuíruyayi tura Aser shuarauyayi nu nuwa. Niisha ti úuntchiyayi. Niisha yama nuatnaikiamujai siati uwi ni áishrijjai tsanin pujusarmiayi. ³⁷ Tura wajemamiayi. Tura uchenta kuaru uwi takakuyayi. Tura ninkia Yusa Uunt Jeeniá jiiintsuk káshisha tsawaisha tuke Yúsán áujniuyayi. Tura yurumtsuk Yúsán áujniuyayi. ³⁸ Semeún tuasua amikmatai Anasha taa, Uchin wáiniak Yúsán yuminqsamiayi. Tura Jerusarénum Yus uwentikrampratai tusa nákarmia nuna áujkuñka uchin áujmat wémiayi.

Nasarétnum waketkiarmiania nu

³⁹ Nuyá Yus tímia nuna ashí túrawar amikiar Kariréa nunkanam, kame nii pujumia nú peprunam Nasarétnum Jusesha Marisha Uchisha waketkiarmiayi. ⁴⁰ Uchi Jesus tsakaki, kakaram ajaki tura nú nankaamas nekaki wémiayi. Tura Yus Nin ti shiir awajsamiayi.

Jesus Yusa Uunt Jeen túrunamuri

⁴¹ Jusesha, Jesusa nukurísha tuke uwitin paskua námper jeakui Jerusarénum weu ármiayi. ⁴² Ni túrutairi túruiniak, Jerusarénum weak Jesusan tuse uwi jeamtai júkiarmiayi. ⁴³ Námper amuukamtai ni nukurísha Jusesha nékachmanum Jesuska Jerusarénum juákmiayi. ⁴⁴ Marisha Jusesha “wí shuarjai winiawai” tusa, núnaka eátsuk chikichík tsawant wekasarmiayi. Nuyá wáinkiataj tukamá, ni shuariin tura ni nékamunam eakarsha, ⁴⁵ wáinkiacharmiai. Nuiñkia Jerusarénum ataksha waketrukiarmiayi, eaktai tusar. ⁴⁶ Tura menaintiú tsawant eakar Yusa Uunt Jeen Yus akupkamun jintinnian anturak anintrú pujan wáinkiaarmiayi. ⁴⁷ Tura nuí ashí Jesusan anturkarmiania nu, niisha ti nékakui tura áimtanash ti péñker áimkiui, ti enentáimturarmiayi. ⁴⁸ Ni aparísha nukurísha tumáa pujan wáinkiar, ti enentáimprarmiayi. Tura ni nukurí chichaak tímiai “Uchiru, ¿ausha urukamtai itiurchat enentáimtikrurmam? Ame apasha wisha urukayik tusar ti eakjame” tímiai.

⁴⁹ Tutai Jesus tímiai “¿Urukamtai eátrum? Winia Aparnan túratnuiitjiana nuka nékatsrumek” tímiai.

⁵⁰ Tura timia núnaka penké nekaacharmiayi. ⁵¹ Nuyá Jesus ni-ijjai Nasarétnum waketkimiayi. Ninkia tuke umiriarmiayi. Ashí nu túrunamun Marikia tuke enentáimtu pujumiayi. ⁵² Jesuska tsakaki, tura nekaki wémiayi. Yussha tura aencha Nin shiir enentáimtiarmiayi.

3

Imiakratin Juañka etserkamuri

(Mateu 3.1-12; Márkus 1.1-8; Juan 1.19-28)

¹ Tipiriu uunt akupin pujamu kinse uwi jeamtai, Jutía nunkanam Punsu Piratu akupin pujumiayi. Tura Kariréa nunkanam Erutis akupin pujumiayi. Itiurea nunkanmasha Trakuniti nunkanmasha ni yachi Jiripi

akupin pujumiayi. Tura Apirinia nunkanam Risanias akupin pujumiayi. ² Tura nu uwitin Anassha Kaipíásha Israer-patri uuntri pujuarmiayi. Nu uwitin Sakaríasa uchirí Juan atsamunam pujan Yúsaiya chichaman antukmiayi. ³ Nuyá Jurtañ entsanam supichik matsarmama nuna Juan wekaatusar juna tímiayi “Winia tunaarun Yus tsankurturat tusarum, enentai yapajjárúum imiantiarum.” Tu ujakmiayi. ⁴ Nu ujakman Isayas yaunchu juna áarmiayi:

Atsamunam wekaana nu untsunmun ántuiniawai. Nii untsunuk juna tawai: Atumí enentái Uunta jinti iwiarturtarum; naka awajsa-tarum. ⁵ Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jiikmia arti. Tura pujutrin ainia nusha métekrak paka awajsamu arti. ⁶ Túrunamtai ashí nunkanmaya aents Yúsaiya uwempratin aan nekaawartatui.

⁷ Untsurí aents imiatit tusar tariarmia nuna Juan chicharainiak tímiayi “Napia áaniutirmincha, ti asutniátin jeatemáttana nuyá uwempratarum tusa ¿ya ujatmakuram? tímiayi. ⁸ “Íikia Apraám weeitji, tuma asakrin Yus shiir enentáimturmají” tu enentáimtumasaírap. Antsu enentáim yapajíamuitkiuinikia péñker wekaamurmijíají paant iniakmasterum. Warí, Yus wakerakka, ju kayan Apraáma shuarín páchitsuk najankainti, tímiayi. ⁹ Aneartarum. Numi ajaktinian kampuwarín jacha atuttsamuiti. Numi péñker nereatsna nuka ajakar jinium apeamu ártatui” tímiayi.

¹⁰ Tutai aentska enentáimprar “¿Nuiñkia itiurkatjik?” tiarmiayi.

¹¹ Tutai Juan tímiayi “Jimiará pushin takakna nu, takaktsuna nuna chikichan súsatniuiti. Yurumkan takakna nusha takaktsuna nuna ajam-satniuiti” tímiayi.

¹² Uunt akupniu kuítrín juu armia nú shuar imiantiaj tusar Juánkan weriar aniasarmiayi. “Uunta, ¿iisha warí itiurkatjik?” tiarmiayi.

¹³ Tutai Juan tímiayi “Kuit uunt akupin tana nu iniañkasrum achiki-airap.”

¹⁴ Suntarsha aniasarmiayi “Uunta, ¿iisha warí itiurkatjik?”

Juañsha tímiayi “Ame kakarmarmijíají chikichna jurukip. Tura nin tsanumprurap. Tura uunt akupin akirmaná nújajín warasta” tímiayi.

¹⁵ “Ju Juan Yusa anaikiamurínchuashit” tu enentáimsar paant nekaataitsar náarmiayi.

¹⁶ Tumají Juan tímiayi “Wikia aya ayashmin entsanam imiajrume. Tura wijíají nankaamas ana nu tátatui. Ni sapatrí jiníamurínkisha atitrachminiaitjai. Niisha taa, imiantinia áanis tura jíiya áanis Yusa Wakanín enketramprattarme. ¹⁷ Shuar aruusan awajtia núnisan, nusha yajauch ana nuna ajapa aya péñkernak júuktatui. Neren ikustatui tura yajauchinkia ji tuke kajinchatainiam apeattawai” tímiayi.

¹⁸ Juan nu arant shiir chichaman áentsun ti núkap ujakarmiayi. ¹⁹ Tura nuyasha akupin Erutisan chicharkamiayi. Ni yachí Jiripi nuarín Jirutíasan kasararak nuatkui tura chíkich yajauchincha túrakui chicharkamiayi. ²⁰ Tura Erutis núnaka ántutsuk chíkich yajauchin túramiayi. Juánkan achik sepunam enkeamiayi.

Jesusa imianmiari

(Mateu 3.13-17; Márkus 1.9-11)

²¹ Nu túruntsajín, Juañsha ashí nú nunkanmaya áentsun imiak pu-jurainají Jessusha imianmiayi. Niisha Yúsán áujuk pujají nayaimpisha

uranmiayi. ²² Tura Yusa Wakaní yámpits najanar paant tarurmiayi. Tura Yus nayaimpinmaya chicharuk “Amek winia aneamur Uchiruitme; Ámin ti wararjame” tímiayi.

Jesukrístu shuari
(Mateu 1.1-17)

²³ Jesus trainta (30) uwi takaku asa ni takatrín nanċkamamiayi. “Jusé uchirínti” tiniu armiayi. Jusésha Iría uchiríyayi. ²⁴ Irísha Matata uchiríyayi; Matat Riwi uchiríyayi; Riwi Mirkía uchiríyayi; Mirki Jana uchiríyayi. Jana Jusé uchiríyayi; ²⁵ Jusé Matatíasa uchiríyayi; Matatías Amusa uchiríyayi; Amus Najuma uchiríyayi; Najum Esrí uchiríyayi; Esri Nakaia uchiríyayi; ²⁶ Nakai Maata uchiríyayi; Maat Matatíasa uchiríyayi; Matatías Semái uchiríyayi; Semái Jusé uchiríyayi; Jusé Jutáa uchiríyayi; ²⁷ Jutá Juana uchiríyayi; Juana Resa uchiríyayi; Resa Surupapira uchiríyayi; Surupapir Saratiira uchiríyayi; Saratiir Nerí uchiríyayi; ²⁸ Nerí Mirkí uchiríyayi; Mirki Atí uchiríyayi; Atí Kusama uchiríyayi; Kusam Irmutama uchiríyayi; Irmutam Ira uchiríyayi; ²⁹ Ir Jusué uchiríyayi; Jusué Irieséra uchiríyayi; Iriesér Jurema uchiríyayi; Jurem Matata uchiríyayi; ³⁰ Matat Riwi uchiríyayi; Riwi Semeúnka uchiríyayi; Semeún Jutáa uchiríyayi; Jutá Jusé uchiríyayi; Jusé Junánka uchiríyayi; Junan Iriakímia uchiríyayi; ³¹ Iriakím Mirea uchiríyayi; Mirea Mainiánka uchiríyayi; Mainián Matata uchiríyayi; Matata Natańka uchiríyayi; ³² Natan Tawitia uchiríyayi; Tawit Isaí uchiríyayi; Isaí Upitia uchiríyayi; Upit Puusa uchiríyayi; Puus Saramúnka uchiríyayi; Saramún Naasunċka uchiríyayi; ³³ Naasun Aminiatapa uchiríyayi; Aminiatap Arama uchiríyayi; Aram Esruma uchiríyayi; Esrum Paresa uchiríyayi; Páres Jutáa uchiríyayi; ³⁴ Jutá Jakupa uchiríyayi; Jakup Isaka uchiríyayi; Isak Apraáma uchiríyayi; Apraám Tarea uchiríyayi; Taré Nakura uchiríyayi; ³⁵ Nakur Seruka uchiríyayi; Seruk Rakaua uchiríyayi; Rakau Pirikia uchiríyayi; Pirik Epera uchiríyayi; Eper Sará uchiríyayi; ³⁶ Sara Kainiánka uchiríyayi; Kainián Arpaksata uchiríyayi; Arpaksat Sema uchiríyayi; Sem Nuaia uchiríyayi; Nuai Ramikia uchiríyayi; ³⁷ Ramik Matusarínka uchiríyayi; Matusarín Enuka uchiríyayi; Enuk Jaritia uchiríyayi; Jarit Maararíira uchiríyayi; Maararír Kainianċka uchiríyayi; ³⁸ Kainianċ Enusa uchiríyayi; Enus Seta uchiríyayi; Set Atańka uchiríyayi; tura Atań Yus najanamuyayi.

4

Jesusa nekapsamuri
(Mateu 4.1-11; Márkus 1.12-13)

¹ Jesusa enentáin Yusa Wakaní pimiutkamiayi. Jesssha Jurtan entsanmaya wakatkimtai Yusa Wakaní aents atsamunam jukimiayi. ² Tura nuísha kuarenta tsawant pujusmiayi. Tura íwianċ Nin tunaanum ajuaraintiajtai tusa pujurmiayi. Nu kuarenta tsawantin Jesus yurumtsuk pujá asa ti tsukammiayi. ³ Nuínċka íwianċ chicharuk “Amesha nekas Yusa Uchiríntkiumka ju kaya apatuk najanata” tímiayi.

⁴ Tutai Jesus tímiayi “Yus-Papí tawai: “Aya apatkujain shuar iwiaaku pujuschamniaiti. Antsu ashí Yus-Chicham tana nujaj nekas iwiaaku pujusminiaiti,” tawai” tímiayi.

⁵ Tura nuyá íwianch naint yaki wájakmanum jukí, ashí nunka ainia nuna ju chichamaik iniaktusmiayi. ⁶⁻⁷ Tura chicharuk tímiayi “Ashí ju nunka wáinmena nu wíniati. Tura wi wakerajna nú shuaran súsatniuitjai. Tuma asamtai tikishmatrurakminkia ju nunkanam ashí akupkatniun susattajme. Tura nuí ni warirí ainia nusha áminiu átatui” tímiayi.

⁸ Tutai Jesus tímiayi “Yus-Papí tawai:

“Aya Niñki Yus ame Úntrum tikishmatram enentáimtustiniaitme.”
Tau asamtai, werumta, iwianchi” tímiayi.

⁹ Ataksha íwianch Jesusan Jerusarén péprunam jukimiayi. Tura Yusa Uunt Jee yakiini iwiak tímiayi: ¹⁰ “Yus-Papí tatsuk:

“Yuska ni suntarín wáinkiatá tusa akupturmaktatui. ¹¹ Kayanam ajintraín tusa wenkurmaktatui.”

Tuma asamtai nekas Yusa Uchirínkiumka juyá akaikim iniaata” tímiayi.

¹² Tutai Jesus ámiuk tímiayi “Yus-Papí junasha tawai:

Yus ame Úntrum nekapsataj tiip.”

¹³ Tuma asamtai íwianch penké tujintiak ishichik tsawant Jesusan iniaisamiayi.

*Kariréa nunkanam Jesus ni takatrín nankamamiania nu
(Mateu 4.12-17; Márkus 1.14-15)*

¹⁴ Jesus ni enentáin Yusa Wakaní kakarmari pimiutkamu ajas Kariréa nunkanam waketkimiayi. Nu nunkanam nankaamantu túramurín áujmatarmiayi. ¹⁵ Nu nunkanam ashí péprunam Israer-shuar iruntai jea armia nuí unuiniarmiayi. Tura anturkarmia nuka ni náarín shiir awajsarmiayi.

*Jesus Nasarétnum pujumiania nu
(Mateu 13.53-58; Márkus 6.1-6)*

¹⁶ Ni tsakarmariín Nasarétnum Jesus wémiayi. Tura Israer-shuar ayampratin tsawantin iruntai jeanam wayamiayi, tuke turin asa. Tura wayá Yus-Papin áusataj tusa wajakmiayi. ¹⁷ Nuñkia Yúsnan etserin Isayasa áarmarín súsarmiayi. Nuna urak, nuí juna áarman wáinkiamiayi:

¹⁸ Yusa Wakaní winí pujurtawai. Shuar warainiachun shiir chichaman ujaktinian anaitiukuiti. Kúntuts enentáimiar wake mesek pujuinian tsuártinian akuptukuiti. Tura jii kusuruncha ímtiktinian, tura yajauch awajsamu ainia nuna péñker awajsatniuncha, ¹⁹ tura Uunt Yus, shuáran yaiñtin tsawantrí jeán etserkatniuncha akuptukuiti.

²⁰ Nu áarman aujsua amik papin nukukmiayi. Tura iruntai jeanam yáimin pujan susa iniais Niñkia etserkataj tusa pujusmiayi. Tura ashí shuar pujuarmia nu émamkes ii pujuarmiayi. ²¹ Jesussha chicharuk tímiayi “Yus-Chicham yamá antukurmena nu yamá tsawantin túrunayi.”

²² Jesusan ashí péñker áujmatarmiayi. Tura Jesus ti shiir chichaakui ti enentáimprar “Juka Jusé uchirínchukait” tiarmiayi. ²³ Tu enentáimiaiñiakui, Jesus chicharuk “Atumsha shuar tuke tuinia núnisrumek, “tsuákratniuitkiumka amek tsuámarta,” turuttiatrume. Kapernáum péprunam aentsti túrachmin túramamna núnismek juísha túrata tusarum nu turuttiatrume. ²⁴ Túrasha nekas tájarme, Yúsnan etserniun ni nunkenkikia nii tana nuna anturainiatsui. ²⁵ Nuyasha tájarme, Iriás pujumia nú tsawantin, menaintiú uwí nankaamas yumi yutukcha asamtai ashí Israer núñkanam ti tsuka amia nuí ti

untsurí waje irunmiayi. ²⁶ Tuma ain nu wajen yainti tusa Yus Iríasan akuptukchamiayi. Antsu chíkich nunkanmaya wajen Sarepta péprunam pujumia nuna yainti tusa akuptukmiayi. Sarepta pepru Sitiún péprunam tíjiuch pujawai. ²⁷ Núnisan ii nunkesha Iriséu pujumia nu tsawantin ti untsurí tunamaru iruniarmiayi. Tura núnaka tsuárcharmiayi. Antsu chíkich nunka, Sírianmaya Naaman kan tsuármiayi” tímiayi Jesus.

²⁸ Israer-shuarsha iruntai jeen pujuarmia nu, nuna antukar ti kajerarmiayi. ²⁹ Tura wajakar Jesusan jiiiki péprunmaya akupkarmiayi. Tura pepru amia nuji naint yakí nánkatkamunam, nuyá akaki ajuatai tusar júkiarmiayi. ³⁰ Túrasha Jesuska irunar matsatainiamunman etempraktak jiinki wémiayi.

*Iwianchrukun Jesus tsuármiania nu
(Márkus 1.21-28)*

³¹ Nuyá Jesus Kariréa nunkanam Kapernáum pepru amia nuji wémiayi. Tura Israer-shuara ayampratin tsawantrijn tuke etserki wémiayi. ³² Yusa kakarmarin takaku asa nujai etserkamiayi. Tuma asamtai “Yusa kakarmarjijai unuítiamtsujik” tiar ti enentáimprarmiayi.

³³ Chíkich tsawantai áishman iwianchruku Israer-shuar iruntai jeenam pujumia nu untsumuk tímiayi, ³⁴ “Inikiartusta. Iikia Áminkia pachistin nakitijai. ¿Warí, incha amukratkataj tusam táchamek? Wikia nékajme. Ámeke ti penker Tunaaríncha núitme” tímiayi.

³⁵ Tutai Jesus iwianchin kakantar chicharuk “Takamatsata. Ju áishman ikiuktia” tímiayi.

Tutai nu chíchamaik íwianch áishman numia jiinki weak nunká ajuant ikiukmiayi. Túrasha nekas yajauch awajtsuk ikiukmiayi.

³⁶ Ashí pujuarmiania nu ti enentáimiar mai tunai ajarimiayi. “¿Jusha warí chichamait? Ju áishman Yusa kakarmarjijai iwianchin jiiiki awemat-suk” tiarmiayi.

³⁷ Tura ashí nú nunkanam Jesusa túramurín áujmatarmiayi.

*Semuñ Pitru tsatsarín Jesus tsuármiania nu
(Mateu 8.14-15; Márkus 1.29-31)*

³⁸ Jesussha Israer-shuara iruntai jeenia jiinki Semunka jeen wémiayi. Semunka tsatsari tsuer ti jáamiayi. Ti jaakuí Jesusan “tsuárturtá” tiarmiayi. ³⁹ Jesussha jaa tepan tsunsumprua tsuemun “michatrata” tímiayi. Tutai nú chíchamaik nuwasha michatramiayi. Nú chíchamaik nantaki nincha ayurawarmiayi.

*Untsurí jaan Jesus tsuármiania nu
(Mateu 8.16-17; Márkus 1.32-34)*

⁴⁰ Etsa akaikin aji ni shuari nánkamas sunkurjai jaarmia nuna Jesusan ikiaatkarmiayi. Jesussha jáinian chíkichkiniak chíkichkiniak uwejéjai antiñkiar tsuárarmiayi. ⁴¹ Ti untsurí iwianchruku armia nunasha iwianchrin jiiirkarmiayi. Jiinkiar íwianchkia untsumainiak “Ámeke Yusa Uchirínme” Jesusan tiarmiayi. Tura niisha “Jesuska Yusa anaikiamurinti” tu nékainiakui Jesus kakantar chicharak itiatmamtikarmiayi.

*Kariréa nunkanam Jesus etserkamiania nu
(Márkus 1.35-39)*

⁴² Kashin káshik tsawaak Jesus péprunmaya jiinki atsamunam Niñki wémiayi. Tura shuarsha eakiar ni pujamunam jeariarmiayi. Tura

iijjai tuke pujusat tusar emetataitsar wakeriarmiayi. ⁴³ Túmain Jesus tímiayi “Yus ii enentáin akupkatajtsa wakera nú shiir chichaman chíkich péprunam matsatainia nunasha ujaktiniaitjai. Nu túrata tusa akupka-muitjai” tímiayi. ⁴⁴ Tuma asamtai Kariréa nunkanam Israer-shuar iruntai jeanam Jesus tuke etserki wémiayi.

5

Namakan ti untsurín achikiarmiania nu
(Mateu 4.18-22; Márkus 1.16-20)

¹ Chíkich tsawantai Jesus Jinisarít antumianka tutainium káanmatkari pujai ti untsurí shuar, Yusa chichamen antuktai tusar wakeruiniak Jesusai káunkarmiayi. Antuktai tusar wakeruiniak kaé ajattsarmiayi. ² Tura jimiará kanun antumiankan káanmatkariin tepan wáinkarmiayi. Ni nérenniurinkia jínkiar ni nekarin nijiá pujuinia asamtai kánuka ankant ármiayi. ³ Tuma asamtai Jesus Semunka kanuríin enkempramiayi. Tura Semunkan chicharuk “Ishichik ajapén juruktía” tímiayi. Nuinkia kanunam enkemas áentsun káanmatkanam pujuinian unuiniamiayi. ⁴ Unuiniasua amik Semunkan chicharuk “Kanu kunanam jukim neka aj ajunkatarum” tímiayi.

⁵ Tutai Semun tímiayi “Túrasha, Uuntá, káshisha tuke aju-junkuar tsawarji. Túrasha penké achikchaji. Kame áankisha Ame támajai ajunkatjai” tímiayi.

⁶ Tura ajunkar namakan ti untsurín achikiarmiayi. Túram nekasha jaanaki wémiayi. ⁷ Tuma asamtai ni írutkamurín chíkich kanunam pujuinian uwejéjai “winitia, yáintkiamnium” tusar untsukarmiayi. Ni-isha táarmiayi. Túrawar jimiará kanunam métej awajsarmiayi. Tura kanusha inít wayastatuk ajamiayi. ⁸ Nuna túramtai Semun Pítieur Jesusan tikishmatar tímiayi “Uuntá, wikia ti tunaitjai. ¿Wíjjai sha itiurak pujus-tam?” ⁹ Semunsha ni írutkamuríjjai namakan timiá untsurín wáinkiar ashamkarmiayi. Tuma asa Semunsha nuní tímiayi. ¹⁰ Tura Sepetéu uchiri Jakupusha Juansha Semunjai pujuarmia nusha ashamkarmiayi. Tura Jesus Semunkan tímiayi “Ashamkaip. Yamaikia namaka-achinia áintsamek aents-égu ajastatme.” ¹¹ Nuyasha kanurín kukar júkiar, ashí takakmarincha ikiukiar Jesusan nemarki wearmiayi.

Tunamaru áishmankan Jesus tsuármiania nu
(Mateu 8.1-4; Márkus 1.40-45)

¹² Ukunam Jesus chíkich péprunam pujai tunamaru áishman taa Jesusan wáiniak tikishmatar nunká shushuma pankái Jesusan tímiayi “Uuntá, wakerutakmeka páchitsuk tsuáramniaitme.”

¹³ Nuna tutai Jesus antin tímiayi “Wakerajai. Tsuaajme.” Tura nú chichamaik tunamarusha pénker ajasmiai. ¹⁴ Túrasha Jesus chicharuk “Ámeka nu etserkaip, tímiayi. Antsu Israer-shuar Patrij werim ame pénker ajasmanum Muisáis akupkamia núnismek susata. Nujai ashí shuar ame pénker ajasmarmín nekaawartatui” tímiayi.

¹⁵ Tura Jesusa túramuri ti etsernamiai. Túmakui untsurí aents an-turkataj tusar káutkarmiayi. Tura ni sunkurincha tsuámartaj tusar káutiarmiayi. ¹⁶ Núnisan Jesuska aents atsuiniamunam we ni Aparin áujmiayi.

Emęarun Jesus tsuármiania nu

(Mateu 9.1-8; Márkus 2.1-12)

17 Chíkich tsawantaj̄ Jesus unuiniak pujaj̄ Pariséu aents tura Israer-shuara jintinniur̄isha Kariréa péprunmayasha, Jutía péprunmayasha tura Jerusarēnumiasha káunkarmia nu antúu pujuarmiayi. Jaa tsuártinian Yusa kakarmar̄in takakuyayi Jesus. 18 Nuiñkia emęarun tampumpua kuaru shuar itiararmiayi. Jesus pujamunam init awayattsar wakeriarmiayi. 19 Tura shuar ti untsur̄i piaku asamtai wayamnia atsumiayi. Túmaitkui yakiin̄i wear jean urakar, aents kaę ajas matsatmanum Jesus pujamunam emęarun tampunam nená itiararmiayi. 20 Nin itiarmanianu, Jesus Yusa kakarmar̄in takakui, tú enentáimtamun Jesus nekáa emęarun tímiayi “Ame tunaarum tsan̄kuramuitme.”

21 Nuiñkia Israer-shuara jintinniur̄isha, Pariséusha ni enentáin enentáimsar “¿Jusha yait Yúsa náar̄in yajauch awajtin? Warí, aya Yúsak tunaan tsan̄kurachminkiait” tu enentáimsarmiayi.

22 Tura Jesus ni enentáimsamur̄in nekáa tímiayi “¿Urukantai tú enentáimprarum átum? 23 Nuiñkia ¿warí imiá yúpichuchit, tsuártiniak, ni tunaar̄i tsan̄kuratniuk? 24 Wats, Aents Ajasu tutai Wisha tunaan tsan̄kuratniun Yusa kakarmar̄in takakjai. Jujaj̄ nekaatarum tusan wats itiurchat tárugna nuna túrattajai.” Nuyá emęarun chicharuk tímiayi “Amesha wajakim, tampuram achikiam ame jeemiin wetá.”

25 Nú chichamaik emęaru niisha íimiainiamunman̄ tampur̄in achik wajakni jeen Yúsan wararki wémiayi. 26 Túmakui ashí shuar ti enentáimprar Yusa náar̄in shiir awajsarmiayi. Tura ashamainiak “aentsti tujinkiamu yamá wáinkiaji” tiarmiayi.

Riwin Jesus untsukmiania nu

(Mateu 9.9-13; Márkus 2.13-17)

27 Ukunam Jesus wekas akupniu kuítr̄in-juu, naar̄i Riwí, ni chíkich naar̄i Mateu, akupin akitiai jeanam pujan wáinkiamiayi. Wáiniak “nemartusta” tímiayi. 28 Tutai Riwí wajakni takakmar̄inkia ikiuak Jesusan nemarsamiayi.

29 Nuyá ukunam Riwí namperan Jesusan najatamiayi. Tura untsur̄i akupniu kuítr̄in-juu tura chíkich shuarsha káunkar misanam pujuarmiayi. 30 Tura Pariséusha Israer-shuara jintinniur̄isha Jesusan tsanumpruiniak Jesusa unuiniamur̄in tiarmiayi “¿Maaj, urukantai atumsha akupniu kuítr̄in-juu ainia nújaj̄isha tura chíkich yajauch shuarjaj̄isha iruntrarum yurumprum?”

31 Tutai Jesus áimkiamiayi “Shuar jaachu péñker ainiana nu ¿tsuákratniun atsumainiawak? Antsu jaa ainia nu tsuákratniun atsumainiawai. 32 “Wikia péñkeraitjai” tuinia nuna untsuktajtsan táchaitjai. Antsu yajauch shuar ni enentáin yapaj̄já Winia ajasat tusan untsujaj̄i” tímiayi.

Yurumtsuk Yus áujsatniun Jesusan aniasarmiania nu

(Mateu 9.14-17; Márkus 2.18-22)

33 Nuyá Jesusan aniak tiarmiayi “Juan̄ka unuiniamur̄isha, Pariséu unuiniamur̄isha yurumtsuk Yúsan áujainiatsuk. Tura ame unuiniamurmeka ¿urukantai ijiarma Yúsan áujainiatsu?” tiarmiayi.

³⁴ Tutai Jesus tímiayi “Nuatma nampernum, zipiaamu ainia nu ijiarmamniakait, yamá-nuatu pujaj? ³⁵ Atsá. Wats Wisha ukunam junaktiatjaj; nuinkia ijiarmatin átatu” tímiayi.

³⁶ Tura junasha nujaj métek-taku unuiniamiayi: “¿Yamaram pushí tsupikiar nujaj arut pushiniam anujtukminkiait? Nu túramka yamaram pushí yajauch ajasaintiui; túrasha shiir anujkam arut pushijaj mai metek yamaram wáinkiachminiaiti. ³⁷ Núnisan nijiamanch yamá nawamu nuap najanam arutnum yaraachminiaiti. Túramka nijiamanch kariak ijiakratniuiti; túmak nijiamchisha nuap najanamusha mai metek menkainiawai. ³⁸ Tuma asamtai nijiamanch yamá nawamu yamaram nuap najanamunam yaraatniuiti. Nu túramka mai metek péñker átiniiaiti. ³⁹ Yaunchu nawamu úmana nuka yamarman nakitrattui. “Yaunchu nawamu imiá penkeraiti” tiártatu” tímiayi Jesus.

6

Ayampratin tsawantaj trikiu neren achikiarmiania nu

(Mateu 12.1-8; Márkus 2.23-28)

¹ Ayampratin tsawantaj Jesussha unuiniamurijjaj araaunam wekasar, unuiniamurisha trikiu neren majurkutak wekainiarmiayi; tura tishisar neren yuawarmiayi. ² Nuna túruiniakui Pariséu tiarmiayi “Maaj, atumsha ayampratin tsawantaj takaschatniua nu, ¿urukamtai takaarum?”

³ Takui Jesus ayak tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. ⁴ Tawit Yusa Jeen wayá, Yus iniaktusma tantan yuámiayi; tura nemarniuncha ajamsamiayi. Tura nu tantancha aya Israer-shuara Pátrirj yúatin ármiai. Tuma ain Tawitcha yajauchin túrutsuk achikmiayi, tímiayi. ⁵ Wisha Aents Ajasuitkiun ayampratin tsawantan Nérenniurintjai” tímiayi Jesus.

Shuara uweje jakaan Jesus tsuármiania nu

(Mateu 12.9-14; Márkus 3.1-6)

⁶ Chíkich ayampratin tsawantaj Israer-shuar iruntai jeanam Jesus wayá ununiartasa nankamamiayi. Nu shuar uweje untsuurja nu jakaa pujumiayi. ⁷ Tura Israer-shuara jintinnurisha, Pariséusha Jesusan “yajauch túrayi” titiai tusar wakeruiniak, “ju ayampratin tsawantaj nu shuaran tsuartimpiash” tusar ii pujuarmiayi. ⁸ Túrasha Jesuska ni enentáimmiarin nekariarmiayi. Túmayat uweje jakaan chicharuk “Jui ajapén wajasta” tímiayi. Tutai áishman ajapén wajasmiai. ⁹ Nuinkia irunniarmiania nuna Jesus tímiayi “Enentáimpratarum. Ayampratin tsawantaj yajauch túratin, péñker túratnuijaj ¿tuá péñkerait? ¿Uwemtikratin, máatnuijajsha tuá péñkerait?” tímiayi. ¹⁰ Nuyá téntakarmia nuna iis áishman kan tímiayi “Uwejem takuitia.” Áishmansha uwejen takuimtai nú chichamaik péñker ajasmiai. ¹¹ Tura chíkichkia ti kajerkarumiayi. Túrawar “Jesus warí ititurkamniakit” tusar aniniaismiai.

Tuse unuiniamun Jesus anaikiamiania nu

(Mateu 10.1-4; Márkus 3.13-19)

¹² Nuyá Jesus Yúsan áujstataj tusa náinnium wakamiayi. Tura nu kashi Yúsan au-ajukua tsawarmiayi. ¹³ Tsawarmatai unuiniamurin ikiankar tuse anaikiamiai. “Winia akatramuruitrume” tímiayi. ¹⁴ Ju ármiai: Emka, Semuñ chíkich naarj Pítur apujtusmia nu; tura nuyá ni yachi

Antres, Jakupusha, Juansha, Jiripisha, Parturumísha, ¹⁵ Mateusha, Tumassha, Arpeu uchirí Jakupusha, Ásump Semunsha, ¹⁶ Jakupu yachi Jútassha, tura Jútas Iskariúti Jesusan ukunam surukmia nu. Nu tuse achikma ármiayi.

Untsurí shuaran Jesus yáinkiarmania nu

(Mateu 4.23-25)

¹⁷ Niijjai Jesus náinniumia pakanam taawarmiayi. Nuí pujusarmiayi. Nuísha untsurí unuiniamurísha, tura Jutía nunkanmaya, tura Jerusareñnumia tura nayaantsanam ayamach Tíru, tura Setun péprunmaya ti untsurí aents antuktaitсар pujuarmiayi. Jesus tsuarati tusar káunkarmiayi. ¹⁸ Iwianchrukusha tsuámararmiayi. ¹⁹ Jesus tsuártinian tujinkiachu asamtai ashi shuar antiñtaj tusar wakeriarmiayi.

Náinnium Jesus etserkamu

(Mateu 5.1-12)

²⁰ Ni unuiniamurin Jesus iis juna tímiayi: “Yusan atsumajai” tárumna nu, Yus akupeamunam páchitkiaitrum; tuma asamtai warasminiaitrum.’

²¹ Yamái tsukamarmena nu ukunam ejemartatrum. Tuma asamtai warasminiaitrum. Yamái útrumna nu, ukunmanka wishirtatrum. Tuma asamtai warasminiaitrum.’

²² ‘Atumin nakitramprarmatai, ajapramawarmataisha, tura Winia Aents Ajasu tutaiya nú shuar ajasúti tusar tsanumprutmak katsekkramkarmataisha warasminiaitrum.’

²³ ‘Túramtai nayaimpiniam ti shiir ana nu núkap sunastin átatui tu enentáimsarum ti warastarum. Warí, ju shuara uuntri yaunchu Yúsna etserniun nútiksaran yajauch awajsacharmakia.’

²⁴ ‘Tura kuítrinnitiram atumsha atumí waratairi aya yamaik waintrume. Ukunmanka waraschattarme.’

²⁵ ‘Atsumatsjai, tu enentáimprumna nu, ukunmanka atsumattarme. Nuinkia waraschattarme. Yamái wishíarmena nu, ukunmanka wáitiakrum úttiatrum. Nuinkia waraschattarme.’

²⁶ ‘Ashí aents atumin shiir awajtamkurmin aneartarum. Nujai waraschatniuitrum. Warí nuna uuntri ántar-yusna etserin armia nuna nútiksaran yaunchu shiir awajsarmiayi.’

Ii nemasri aneatniun Jesus unuiniamiayi

(Mateu 5.38-48; 7.12)

²⁷ Winia anturtarmena nuna juna tájarme: Ame nemasrum aneata, nakitramainia nusha shiir awajsata; ²⁸ yajauch chichartamainia nusha shiir enentáimtusarta; katsekramainia nusha Yus áujtusarta. ²⁹ Ame yapimin ijiutmamtai áatú yapirúsha ijiuti tusam iniaktusta; ame pushirmin jurutramkitiaj tuíniakuisha sákurmencha jukiti tusam iniaisata. ³⁰ Seatmana nu susata, tura áminiun jurutramainiakuisha ataksha awanturkitia tiip. ³¹ Chíkich winia túrutati tusam wakeramna nútiksamak chikichcha túrata.’

³² ‘Iista, aya atumin anenmainia nuke aneakmesha, ¿nusha warí péñkera túrarum? Yajauch shuarsha nuna túrin ániawai. ³³ Tura atumniasha péñker awajtamainia nuke péñker awajkurmesha ¿nusha warí péñkera túrarum? Yajauch shuarsha nuna túrin ániawai. ³⁴ Awanturkimiñaiti tu enentáimtarum nuke íkiakrumsha ¿nusha warí péñkera túrarum? Yajauch shuar nuamtak yajauch

shuarjaj awan̄turkimmniaiti tu enentáimsar ikianainiawai. ³⁵ Tura atumsha nemasrum aneatniuitrume, tura péñker túratniuitrume, tura awan̄turkittiawai tu enentáimtsuk ikiastiniaitrume. Túrakrumniñkia Uunt Yus péñker akirmaktatrume; tura ni uchirintjai tu iniakmastatrume. Yuska, “yumiñsajme” ticha nunasha tura yajauch shuarnasha shiir awajeawai. ³⁶ Ii Aparí waitnentrarniua nútiksarmek atumsha waitnentratarum.’

Chikicha túramurj ti enentáimtusairap
(Mateu 7.1-5)

³⁷ ‘Chikicha túramurj ti enentáimtusairap. Núnisan̄ Yuska atumí tunaarjñ iirtamsashtatui. Chikicha tunaarjñ “nuka asutniatniuiti” tiirap. Núnisan̄ Yus atumin sumantikramashtatrume. Tsan̄kurnairatarum. Núnisan̄ Yus tsan̄kurtamp Prattawai. ³⁸ Chikichcha susata. Núnisan̄ Yus atumin suramsattarme. Niisha péñker nekapma, tura núkap ati tusa teeka awajas tura patas núkap enkea emetsaj amastatui. Atum chíkich túrarmena nútiksaj atumniasha túrutmattarme.”

³⁹ Tura nuyasha juna métek-taku chichaman ujakarmiayi: “Jii kusususha çitiurak chíkich kusuruncha jukimmniait. Mai metek wañnam ini-aashtatuk? ⁴⁰ Unuiniamua nu unuiniana nuna nan̄kaamas áchatniuiti. Túrashasha niisha ti unuimiatar unuiniana nujaj métek nekaammniaiti.’

⁴¹ ‘çItiurtsuk atumi jijn̄ numi enketna auk ítskeshasha atumí yachí jijn̄ tsuat enketusha iiyarum? ⁴² Ame jijimjñ numi tuke enketasha çitiurtsuk ame yatsumi jiiya tsuátan jurustajme tame? ¡Ántrairume! Emka ame jijimjñ numi enketna nu jusata. Nuñkia paant wáinkiatame yatsumi jijn̄ tsuat enketna nu jurustin.’

Nerejai numi nekaatainti
(Mateu 7.17-20; 12.34-35)

⁴³ ‘Péñker numi yajauchin nereatsui; tura yajauch numi péñkeran nereatsui. ⁴⁴ Numisha ni neren nékanui. Tsachikniumiasha kushin̄kiap júukchammniaiti. Tura naranmaya shuinia júukchammniaiti. ⁴⁵ Núnisan̄ péñker shuar ni enentáj péñker asamtai péñkeran chichaawai; tura yajauch shuar, enentáj yajauch asamtai yajauchin chichaawai. Páantchakait. Enentáin pimiutkamua ana nuyan̄ ni wenejaj chichaawai.’

Jimiará jea ukurtin
(Mateu 7.24-27)

⁴⁶ ‘Wi tájana nu túrachiatrumsha çurukamtai Winia, Uunta, túrutrum? ⁴⁷ Shuar winia chichamprun ántuinia nu jea jeammajaj méteketete. Winia anturtuk umiana nu jujaj méteketete: ⁴⁸ Shuar jean̄ jeamuk emka init taur kayanam ukurmai. Tura yumi ti yutuk, entsa nujan̄krua tukummaitiat pukukachmai kayanam ukuamu asa. ⁴⁹ Antsu Winia anturtukiat umiat-sna nuka jujaj méteketete: Shuar jean̄ jeamuk aya naikminiam jeammai. Tura entsa nujan̄krua tukumpram nu jeaka pukukamai. Tura mash sáantramai.” Tu unuiniamiayi Jesus.

7

Suntara yáintrin̄ Jesus tsuármiania nu
(Mateu 8.5-13)

¹ Jesus áentsun unuiniasua amik Kapernáum péprunam wémiayi. ² Nuj Rúmanmaya suntara kapitian̄tri pujumiayi. Nu kapitian̄i takarniuri, ti

aneamurj, jakamnia jaamiayi. ³ Tura Jesusan pachis áujmatainian antuk, ame shuarum Jesusan itiartiti tura winia takarniun tsuárturti tusa Israer-shuara úuntrin akupkamiayi. ⁴ Niisha Jesusan weriar, umirtukat tusa ti seainiak tiarmiayi “Ju kapitían nekas yáintin péñkeraiti. ⁵ Niisha yajaya apachitiat in shiir enentáimturmaj. Tura iruntai jean jeamtinnisha niniki chicharkaiti, tura yayawai.”

⁶ Nuyá Jesus niijjai wémiayi. Tura ni jeen jeastatuk jatemsantai kapitíancha ni amikrin akatar ju titiarum tusa Jesusan akuptukarmiayi. Niisha Jesusan chicharuk juna tiarmiayi “Uuntá, ánttram wayataj tu enentáimsaip. Ame ti nankaamaku asam winia jearu wayachminiaitme. ⁷ Tuma asakmin imia wiki Amiin jeatniun arantukjame. Ayatik “pénker ajasti” tákumin winia takarniusha péñker ajatrustatui. ⁸ Wi nékajai. Winia úuntur winia akuptuiniawai. Tura wisha suntaran akupenajai. Nunasha wi “wetá” takui wéawai. Tura chikichnasha “winitia” tutai winiawai. Tura winia takartinian “ju túratá” tutai umiawai.” Tu tímiayi.

⁹ Jesus nuna antuk ti enentáimias ni nemarainian tímiayi “Nekas tájarme Israer-shuar Yúsán tímiatrus enentáimtinian wáinchaitjai.”

¹⁰ Tura kapitiani akatramurj jeá waketkjar, takarniurj péñker ajasun wáinkiarimiayi.

Wajé uchirín Jesus iniantkimiania nu

¹¹ Nuyá ukunam chikich pepru Naín tutainium ni unuiniamurijjai tura chikich untsurj aentsjai Jesus wémiayi. ¹² Tura péprunam nuntumas jakaan iwarsatai tusar juinian wáinkiamiayi. Jakáa nukurj wájeyayi, tura uchirj jakamia núchikiiyayi. Tura ti untsurj nu peprunmayá nin nemsarmiayi. ¹³ Jesus nu wajen wáiniak tura waitnentar “úutip” tímiayi.

¹⁴ Nuiñkia Jesus jakaa enkerman tarunt antiñmiayi; nuna juñiasha wajasarmiayi. Nuiñkia Jesus jakaan chicharuk “Umpa nantaktia, tájame” tímiayi.

¹⁵ Tutai niisha nantaki pujus chichaamiayi. Tura Jesus ni nukurjñ “Jujú uchiram” tímiayi.

¹⁶ Tura matsamiarmia nu, nuna wáinkiar ashankarmiayi. Tura Yusa náarjñ shiir awajsarmiayi. Tura chichainiak, “Yúsnan etserniuchukait Niisha. Ataksha Yúsnan etserin uunt ana nu tarutramji” tiarmiayi. Tura “Israer-shuarti Niiniu ájinia nuna yáinmaktai tusa Yus tarutramji” tiarmiayi.

¹⁷ Tura ashí Jutía nuñkanmayasha tura ni írutkamu nuñka ármia nuyasha Jesus túramia nuna nekaawarmiayi.

Imiakratin Juan sepunam pujak ni amikrin akatar Jesusan akuptukarmiania nu

(Mateu 11.2-19)

¹⁸ Juan ni írutkamurj ujakam Jesus túramun nekaamiayi. Nekáa ni írutkamurjñ jímiarant untsukmiayi. ¹⁹ Tura Jesusaj akupkarmiayi. “Atumsha Jesus anístarum. ¿Amesha nekas Kristu Yus akupkamu tátinia núkaitiam. Kame chikichak nákastataj? titiarum. Nu nekáa ikiuutarum’ tímiayi.

²⁰ Tutai niisha Jesusan werí jeariar tiarmiayi “Incha imiakratin Juan akatar akuptamkaji. ¿Amesha nekas tátinia núkaitiam. Chikichak nákastataj? Nu nekaatai tusar wakeraji” tiarmiayi.

²¹ Wats, nii jeawarmia nu̇ Jesus untsurí jaan tsuártasa pujurmiayi. Iwianchruncha iwianchriṅ jírki akupkatasa pujurmiayi. Tura kusuruncha ímtikmiayi. ²² Tuma asa Jesus akatramuṅ junȧ tímiayi: “Waketkirum ashí átum antukurmena nusha, wáinkiarumna nusha ujaktarum. Kusurusha wáinmainiawai; shutuap ainia nu péñker wekainiawai; tunamarusha tsuámainiawai; empekusha ántuiniawai; jakaasha atak iwiiaaku ajainiawai; tura kuítrinch anumsha uwempratin chicham ujaktamaiti. Juaṅ nu ujaktarum. ²³ Yawetsuk Winia tuke shiir enentáimturna nú shuar shiir átatui” tímiayi Jesus.

²⁴ Waketkiarmatai Jesus Juaṅkan pachis áujmatman antuk shuar matsarmia nu̇ junȧ tímiayi: “Shuar atsamunmasha ¿warí werimiarum. Pintiu nase umpúam atúu we juní we ajana nu iistai tusarmek wémarum? Juaṅ núnichaiti. ²⁵ Nuikia ¿warí werimiarum. Shuar péñker iwiamampra ístai tusarmek wémarum? Warí, péñker iwiamampraka uunt akupniu jeen pujuiniatsuk. ²⁶ Nuinkia ¿warí werimiarum. Yúsnan etserniuk werimiarum? Maa, nú naṅkaamas wáinkiarume. ²⁷ Yaunchu Yus-Chichamnum ju̇ áarmaiti:

“Winia akatramurun aṁjini emka akupeajai ame jintimin iwiarat tusan.”

Juaṅ nu akatramuiti. ²⁸ Nekasan tájarme, Yúsnan etserin imiakratin Juaṅjai naṅkaamas uunt atsuwiti. Túmaitiat Yus akupeamunam páchinia nu shuarka nekas imianchaitiat, Juaṅjai naṅkaamas átatui” tímiayi. ²⁹ Penké shuarsha, kuítian-juusha, Juaṅ imiaimiujai imianiarmia nu, Jesus timian antukar Yusa náarin shiir awajsarmiayi. ³⁰ Túrasha Pariséusha Israer-shuara jintinniurisha Yus yáintaj támaitiat Juaṅ imiaamujai imiancha ásar nakitrarmiayi. ³¹ Nuinkia Uunt Jesus tímiayi “Yamaiya áentstiram, warijjaiṅ métek árum nuna paant títiatjarme. ³² Uchijjai métek árume. Ni ajjjai iruntrar nakurustaj tukamá tuíniawai “Námpera áinis nakurustaitsar peem umpuarji, túrasha jantsemáchurme. Nuyá iwiansatniua áinis nakurustaitsar íwiareakur kantamtai kantamáaji, túrasha átum úutcharme.” Tu tuíniawai. ³³ Atumsha núnisaitrume. Kame Juaṅ núkap yurumsuk úmutsuk wekaimiayi. Túmakui átumka “iwianchrukuiti” tímiarme. ³⁴ Nuyá Wisha Aents Ajasan támajai. Tura yurumá úmakuisha “ti yurumin tura ti nampenaiti; kame ashí yajauch shuwaran tura kuítian-juu amikrinti” túrutrume. ³⁵ Wats, nekas neka ainia nu, Yusa nekataiṙin iniakmainiawai.” Tu tímiayi.

Pariséu Semuṅ náartin Jesusan ni jeen ipiaamiania nu

³⁶ “Winí yurumáitia” tusa Pariséu Jesusan ipiaamiayi. Tutai Jesus ni jeen werí misanam pujusmiayi. ³⁷ Nuinkia nu péprunmaya yajauch nuwá, Jesus Pariséu jeen yurumáttsa weyi táman antuk, kayá mutinium kunkuin asuiti áimkiamun takukí jearmiayi. ³⁸ Tura úutki Jesusa nawen pujuras neajkjijai nijjarmiayi. Tura intiashijjai japirmiayi; nuyá nawenam mukuta kuṅkuinian ni nawen ukatramiayi. ³⁹ Pariséu Jesusan ipiaamia nu, nuna wáiniak junȧ enentáimsamiayi: “Ju̇ nekas Yúsnan etserniuitkiuṅka, ju̇ yajauch nuwá ántiana nuna nekaawainti. Warí, niisha netse nuwáchukait” tu enentáimsamiayi.

⁴⁰ Nuinkia Jesus Pariséuṅ chicharuk tímiayi “Semuṅká, ámin titiaj tusan wakerajai.”

Tutai Pariséu chichaak “Turuttiá, Uuntá” tímiayi.

41 Tutai Jesus tímiayi “Kuítian ikiamniun jimíarâ áishmañ tumashmakarmiayi. Chíkich kiniantus (500) tura chíkichka aya senkuentak tumashmakarmiayi. 42 Akiktin tsawant jeamtai máí-metek takakcha ármíayi. Tuma asamtai kuítian ikiamin ni tumashrïn máí-metek asakátrarmiayi. Wats, turuttíá çtú áishmañka ikiamniun nekas aneamia?” tímiayi.

43 Tutai Semun tímiayi “Enta, núkap tumashrïn tsankuramia nu.”

44 Tutai Jesus tímiayi “Nekas tame.” Nuiñkia nu nuwan iis Semunkan tímiayi “Ju nuwa wáintsumek. Ame jeemíin wayamtai winia nawer niijartin entsa suruschamame; antsu ju nuwaka nawerun neajkijíai niijarturai, tura intiashííai japirturai. 45 Mukutam áujtusshamame; antsu niñkia nawerun tuke mukutui. 46 Winia muukaruísha asuiti ikiurtuschamame; antsu niñkia naweruj kunkuin asuitin ukatrurai. 47 Nu tuma asamtai tájame, niísha Winia ti anentu asamtai ni tunaari untsurí ana nu tsankuramuiti. Tura tunaar ishichik awai tau tsankuramu ana nuka ishichik anenkratniuiti.” Tu tímiayi Jesus.

48 Nuiñkia nuwan tímiayi “Ame tunaarum tsankuramuitme.”

49 Tura chíkich ipiaamu Jesusjái misanam pujuarmiania nu “¿Júsha ya asañ tunaancha tsankurea?” nuamtak tunainiarmiayi.

50 Tura Jesus nuwan chicharuk ““Uwemtikiartiniái” tu enentáimturu asam uwempraitme. Shiir wetá” tímiayi.

8

Nuwa Jesusan yáinkíarmiania nu

1 Nuyá untsurí péprunam Jesus wekaráktak Yus akupeana nuna shiir chichaman etserkini wekaimíayi. Tura ni unuiniamurí tuse ármia nu nemarsarmiayi. 2 Yaunchu untsurí nuwa jaa armia nuna tura iwianchruku armia nunasha Jesus tsuáarmiayi. Nu nuwasha Nin nemarsarmiayi. Nusha ju ármíayi: Maktaranmaya Marí, siati íwianch jíirkimiuyania nusha 3 tura uunt akupin Erutisa takarniurí Chusa nuwé Juancha, tura Susancha; tura chíkich untsurí ni takakmarïn súsar Jesusan yáinkíarmiayi.

Atsaamin atsaampramun Jesus unuiniamiania nu

(Mateu 13.1-9; Márkus 4.1-9)

4 Untsurí péprunmaya Jesusan iistai tusar jíinkíarmiayi. Tura untsurí káunkarmatai ju métek-taku chichaman Jesus unuiniamíayi:

5 “Atsaamin atsaamprataj tusa jíinkíarmiayi. Atsaamki wesa jinkíái jintíai iniaararmiayi. Túrunamtai weenak najakarmiayi. Nuyá chiníki tariar yuawarmiayi. 6 Chíkich jinkíái kaya írunmanum iniaararmiayi. Nu jinkíái tsapainiar, wárik nantu sukuam káarmiayi. 7 Chíkich jinkíái janíkiniam iniaararmiayi. Tura janíkiasha jinkíáisha máí-metek tsapainiar, janíki kaníkar ajakramíayi. 8 Tura chíkich jinkíáisha péñker nuníkanam iniaararmiayi. Tura tsapainiar, péñker nerekar chíkichkia siansha (100) nerekararmiayi.” Tuasua amik kakantar chichaak Jesus tímiayi “Kuishim ákuñkia antuktarum.”

(Mateu 13.10-17; Márkus 4.10-12)

9 Nuyá ni unuiniamurí Jesusan anak tiarmiayi “Ju métek-taku chicham tamena nu çwarintkumea tame?”

10 Tutai Jesus tímiayi “Atumnia Yus ni akuptairïn nekaachma ana nuna nekantikramprume. Tura chikichnaka, wáiniainiyat kusurua núnin

ártí tusan, tura ántuiniayat nekaacharat tusan aya métek-taku chichamjají jintintiatjají, tímiayi.

Atsaampramu chichaman Jesus paant jintintiamiania nu
(Mateu 13.18-23; Márkus 4.13-20)

¹¹ ‘Wats, jū nekaatarum, tímiayi. Jinkiáisha Yusa chichamen nakumui. ¹² Jintíá iniaaru tana nuka shuar aya ántana nuna nakumui. Yúsan nekas enentáimtus uwempracharti tusa íwianch wárik taa nu chichaman ní enentáiyān júawai. ¹³ Kayanam iniaaru tana nuka shuar antuk waras umiana nuna nakumui. Tura nú shuar kan̄kape atsá asamtai, ishichik tsawantiniñ umikiar itiurchatan wáinkiar wárik kanainiawai. ¹⁴ Jan̄kiniam iniaaru tana nuka tuke enentáijijají umiatsna nuna nakumui. Nu shuarsha ántuiniawai, túrasha ni wakeramurijjají wekainiawai. Jū nun̄kanman̄ ana nuna ti páchiniakui, tura kuítian ti wakeruiniakui, warastinniak enentáimtuiniakui, Yus-Chicham ni enentáin̄ takaatsui. Nujaj kan̄karma ásar nerektinian tujintiainiawai. ¹⁵ Tura jinkiáí péñker nun̄kanam iniaaru tana nuka shuar antuk umiinia nuna nakumui. Niisha antukarmia nuna péñker enentáimtusar, yawetsuk umirkar ti péñker nerenawai.’

Ashí iwianiakma átatui
(Márkus 4.21-25)

¹⁶ ‘¿Shiripkin ekeemak nukuktinkiait? Peaknum waaptak ikiuschatniuiti. Antsu jeanam wáiniana nu paant wáinkiarat tusa yaki ekentsatniuiti. ¹⁷ Núnisan̄ ashí nekaachma ana nu paant átatui. Tura úukma ana nu nekanattawai. Tura iwianiakma átatui. ¹⁸ Tuma asamtai anearum péñker antuktarum. Shuar takakna nu patatsamnia átatui. Túrasha takaktsuna nu, takakjai tu enentáimtumana nuka jurunkíttiawai.’ Tu tímiayi.

Jesusa nukurí, Jesusa yachí
(Mateu 12.46-50; Márkus 3.31-35)

¹⁹ Jesus pujamunam nukurí ni yachísha tariarmiayi. ²⁰ Turamtai Jesusan tiarmiayi “Ame nukusha yatsumsha āa wajasar untsurmainiawai.”

²¹ Tutai Jesus tímiayi “Ee, nukuruiti, yatsuruiti, tura Yus tana nuna antuk umiána nusha winia nukuruiti, winia yatsuruiti.”

Nasesha entsasha Jesusan umirkarmiania nu
(Mateu 8.23-27; Márkus 4.35-41)

²² Chíkich tsawantai Jesus ni unuiniamurijjají kanunam en̄kemprar “Antumian̄ amaini wetai” tímiayi. ²³ Entsanam wesar Jesus kanarmiayi. Tura aya aneachma nase ti kakaram násentkui chíchimi tampá tukumar kanun init awayastatuk awajmiayi. ²⁴ Túram nuin̄kia Jesusan ishintiainiak “Uuntá, iisha entsá wayaaji” tiarmiayi. Nuin̄kia Jesus nantaki nasencha entsan̄cha chicharkamiayi. Nú chichamaik nasesha men̄kakamiayi, tura entsasha miaaku ajasmiai. ²⁵ Nuyá ni unuiniamurjñ chicharuk “¿Urukamtai Winia enentáimtusachuram?” tímiayi.

Tura niisha ashamainiak, ti enentáimprar “¿Ausha warí áishman̄kait? Nasesha entsasha Nii chicharkam umirainiatsuk” tiarmiayi.

Jatara nun̄kanam Jesus iwianchrुकun tsuármiania nu
(Mateu 8.28-34; Márkus 5.1-20)

²⁶ Kariréa nun̄ka amaini Jatara nun̄kanam jeawarmiayi. ²⁷ Kanunmaya Jesus j̄iinkimtai nu péprunmaya áishman̄ Nin taruntamiayi.

Nu áishmaṅsha yaunchu iwianchrुकुयayi. Misú wekas, jeá pujutsuk aents iwíarsamunam pujuyayi. ²⁸⁻²⁹ Íwianchkia nu aishmaṅkan ti kakaram nupet wémiayi. Tura emetatai tusar uwejencha nawencha jirujai jinkia wearmiayi. Túrasha tujinkiarimiayi. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishmaṅ Jesusan wáiniak tikishmatar kakantar chicharuk “¿Urukamtai winiisha tarutnium, Uunt Naṅkaamaku Yusa Uchirí Jesusa? Winia wáitkiarsaip tusan seajme” tímiayi. Íwianch niin pujurun Jesus jiki akupeam tu tímiayi. ³⁰ Jesus nu áishmaṅkan anias “¿yáitiam?” tímiayi.

Tútai nii chichaak “Wikia Untsuríntjai” tímiayi. Untsurí íwianch niin pujurma asa nuna tímiayi. ³¹ “In uunt wáanam ii jiinkimij nuin akuptukam amutkaip” íwianch seawarmiayi Jesusan. ³² Nuí ishichik arantach náinnium untsurí kuchi shushunmak yujaarimiayi. Tura íwianch chichainiak, “Antsu kuchiniam wayatin tsankatrukta” tiarmiayi.

Tutai Jesuska “Ayu, wetarum” tímiayi.

³³ Nuna takui íwianch áishmaṅnumia jiinkiar kuchiniam wayawarmiayi. Túram kuchisha náatanam akaiki iniaawar entsanam utsanawarmiayi. Túrunawar jakekarmiayi.

³⁴ Kuchin wáinniusha túrunan wáinkiar, ashamkar, péprunmasha tura arantcha etserkatai tusar tseke wearmiayi. ³⁵ Etserkarmatai, iyutai tusar untsurí shuar wearmiayi. Tura Jesus pujamunam jeawar, íwianch jiintiukiarmia nú áishmaṅkan péñker ajas pushí entsar Jesusa nawen pujan wáinkiarimiayi. Tura ashamkarmiayi. ³⁶ Iwianchruko áishmaṅ tsuárman wáinkiarimia nu yama taan ujakarmiayi. ³⁷ Tura ti ashamainiak Jatara nuṅkanmaya aents ashí Jesusan “Wetá” tiarmiayi. Tutai Jesus kanunam enkemar wémiayi. ³⁸ Íwianch jiintiukiarmia nú áishmaṅ Jesusan, wisha ame wéamunam winitiaj tusa seamiayi. Tutai Jesus nuna suritiak, ³⁹ “Antsu ame jeemijn weme Yus ámin túrutma nu ashí etserkata” tímiayi. Tutai áishmaṅ we Jesus nin túramia nuna ashí nu péprunam etserkamiayi.

Jairu nawantrincha tura chikich nuwancha Jesus tsuármiania nu (Mateu 9.18-26; Márkus 5.21-43)

⁴⁰ Tura Jesus katiñki Kariréanam tatí tusar nákas pujuarmiayi. Tuma ásar Nii waketki katiñki támatai nu aencha warasar áujsarmiayi. ⁴¹ Tumaj Israer-shuara iruntai jeá uuntri Jairu naartin támiayi. Nii taa, Jesusa nawen tikishmatar “Winia jearuj waitneasam winítrítia” tímiayi. ⁴² Ni nawantri chikichik amia nu, tuse uwí takaku, jakatasa pujakui nuna tímiayi.

Jesus “ayu” tinia weakui ti untsurí aents nemariarmiayi. Tura untsurí shuar kaé ajas weena ásar chanuawarmiayi.

⁴³ Nuí nuwa páchitkia wémiayi. Niisha tuse uwí numpa ajapeak wáitias pujuyayi. Tsuákratniua nuisha ni kufrin ashí ajapaitiat tsuámarchauyayi. ⁴⁴ Jesusa úkuriinj winia weantuk ni pushirí náñkatramurinj antinmiayi. Nuna tura nú chichamaik numpé ajapeamuncha péñker ajasmiayi. ⁴⁵ Nuñkia Jesus chichaak “¿Ya Winia antintkia?” tímiayi.

Tura “peñkesha antinchajme” tuíniakui Pítur ni tsaniakmarijjai Jesusan chicharuk “Uuntá, ti untsurí antinmasha, tura ti untsurí chanun-mainiasha ¿itiura “ya Winia antintkia” tame?” tiarmiayi.

⁴⁶ Tútaisha Jesus tímiayi “Nekas Winia antintkiayi. Winia kakarmarjai tsuárana nuna nékajai” tímiayi.

⁴⁷ Nuyá nu nuwasha, nekarayapi tusa kuranki taa Jesusa nawen tikishmatramiayi. Tura ashí aents ántuiniamunam urukaku antiñkia tura itiura warík péñker ajasmia nuna ujakmiayi.

⁴⁸ Nuñkia Jesus nuwan tímiayi “Nawantrú, shiir wetá. Winia nekas enentáimtursa asam péñker ajasume.”

⁴⁹ Jesus tuke chichas pujaj uunt Jairu jea, ti untsurí antiñmasha, turenia taa, Jáirun tímiayi “Ame nawantrum jakayi. Unuikiartin tuke itit awajipia” tímiayi.

⁵⁰ Tura Jesus nuna antuk tímiayi “Ashamkaip. Áyatik Winia nekas enentáimtursata. Túrakmin nawantrum péñker ajastatui” tímiayi.

⁵¹ Jeá jeawar Jesussha Nijjai untsurí wayatniun surimkiamiayi. Antsu aya Pítrun, Jakupun, Juánnasha tura nuwachi aparín nukuríncha wayatniun tsankatkamiayi. ⁵² Ashí úutainiak atakka wáinkiashtatjapi tu úutiarmiayi. Túmainiakui Jesus penké jakaan nékayat tímiayi “Úutirpa. Nuwachkia jákachai, antsu kanarai” tímiayi.

⁵³ Jakaancha urukaku ta tusar wishikrarmiayi. ⁵⁴ Nuyá Jesus nuwachi uwején achik, kákantar chicharuk “Nawantru nantaktia” tímiayi. ⁵⁵ Túram niisha jakayat atak iwiaaku ajasmiai. Tura nú chichamaik nantakmiayi; túrunamtai Jesus “ayuratarum” tímiayi. ⁵⁶ Nuwachi aparí nukurísha ti enentáimprarmiayi. Tura Jesus “Ju túramu penké etserkairap” tímiayi.

9

Jesus ni unuiniamurín etserkati tusa akupkarmiania nu

(Mateu 10.5-15; Márkus 6.7-13)

¹ Ni tuse unuiniamurín ikiaanak ni chichamejai iwianchrukun enentáiyán iwianchin jírki akupkatniun tura sunkurjai jaa tsuártinniasha ni kakarmarín súsarmiayi. ² “Yus akupin ajastin ujaktarum, tura jaa tsuártarum” tinia akupkarmiayi Jesus. ³ Nuyá tímiayi “Wéakrum áyatik wetarum. Ushukrustincha, uyuncha, yurumkasha, kuitcha penké jukiirap. Aya chikichík pushí jukitiarum. ⁴ Nánkamas jeanum jearum wayarmeka nuin pujustarum. Nuin pujusrumek chíkich péprunam wéakrum jíinkitiarum, tímiayi. ⁵ Tura atumin awaintiamatniun nakitiana nú péprunmaya jíinkirum nawemiyá nunka akakekrum ikiuktiarum. Awaintiamachma paant ati tusarum nu túratarum” tímiayi.

⁶ Nuyá jíinkiar ashí péprunam uwempratin chichaman ujakiar wearmiayi; tura ashí péprunam jáiniancha tsuákiar wearmiayi.

Erutis “Jesusan ístaj” tímiania nu

(Mateu 14.1-12; Márkus 6.14-29)

⁷⁻⁸ Uunt akupin Erutis Jesus túramun antukmiayi. Nu túramun chíkich shuarka “Juan jakamunmaya nantaki túrawai” tu wearmiayi. Chíkichkia, “yaunchu Yúsnan etserin Erías wantiniak túrawai” tu wearmiayi. Chíkichkia, “chíkich yaunchu etserin nantaki túrawai” tiarmiayi. Tuma asantai Erutis penké nekaachmiayi. ⁹ Tura tímiayi “Wiki, Juanka muuke tsupirkatarum, tíchamkaj. Tuma ajsha, ¿ju shuar, ni túramurí ashí shuar chichainia nusha yátsukait?” Tu enentáimiuk “iistaj” tímiayi.

Senku mir áishmankan Jesus ayuramiania nu

(Mateu 14.13-21; Márkus 6.30-44; Juan 6.1-14)

¹⁰ Atak Jesusa akatramurj waketki taar ni túramurjñ Jesusan ujakarmi-ayi. Nuñkia aents atsamunam Petsaitia péprunam tíjiuch weak nuj júkiarmiayi. ¹¹ Tura penké shuar nuna nekaawar nemariarmiayi. Túram Jesus nin shiir áuj samiayi. Tura Yusa akuptairj pachis unuiniarmiayi. Tura jaa armia nuna tsuáramiayi.

¹² Tura kíakui, tuse unuiniamu Jesusan wériar tiarmiayi “Uuntá, shuar akupkachminiashit. Tíjiuch péprunmasha, shúarnumkesha wear ni yurumátñiurjñ sumarmakarti, tura kanartintrjñ wáinkarti. Jui pujajnia juñkia penké atsawai” tiarmiayi.

¹³ Tutai Jesus tímiayi “Atumsha ayuratarum.”

Tutai chichainiak “Íisha aya senku tanta tura namaksha jímiarchik takakji. Ju shuar ayuratin sumaktai tusar wétiniaitji” tiarmiayi.

¹⁴ Áishmansha ti untsurj senku mir (5000) jeeá ámiayi. Tura Jesus ni unuiniamurjñ chicharainak ““senkuenta senkuenta kanaarum ankant ankant pujustarum,” titiarum” tímiayi.

¹⁵ Túrawarmatai ashí pujusarmiayi. ¹⁶ Nuyá senku tantan tura jimiará namaknasha Jesus achik, yakiñi íimias Yúsan yumñsamiayi. Nuyá ajamsarat tusa ni unuiniamurjñ súsarmiayi. ¹⁷ Ashí yurumáwar ejemarmarmiayi. Tura ampirman tuse chañkinnium áimkiarmiayi.

Jesus Yusa anaikiamurjñti ujakma amia nu

(Mateu 16.13-19; Márkus 8.27-29)

¹⁸ Jesus ni unuiniamurjñiai áentsnumiá kanaki pujuarmiayi. Jesus Yúsan ajsua umik ni unuiniamurjñ tiarmiayi “¿Yáiti turutainia Winia?”

¹⁹ Niisha áimkiarmiayi, “Chíkich “Ímiakratin Juánkaiti” turamainiawai; chikichcha “Írásaiti” tura chíkichkia “yaunchu Yúsnan etserin nantakniua núiti” turamainiawai” tiarmiayi.

²⁰ Tutai “Tura atumsha ¿yáiti túrutrum?” tiarmiayi.

Takui Pítiur chichaak “Ámeke Yusa Anaikiamurj, Kristu tutai, núitme” tímiayi.

²¹ Tutai Jesus “Penké etserkairap” tímiayi.

Ni jákatñiurjñ Jesus ujakmiania nu

(Mateu 16.20-28; Márkus 8.30-9.1)

²² Nuyá Jesus tímiayi “Wí Aents Ajasuitjiana ju ti waitsatñiuitjai. Wí shuara uuntrj, tura ni Pátrirj úntrisha tura ni jintinniurjsha nakitrurar maantuáwartatui. Túrasha iwiartusarmatai menaintiu tsawant jeamtai nantaktiatjai.”

²³ Nuyá ashí áentsun chicharuk juna tímiayi “Shuar Winia nekas nemartustajtsa wakerakka ni wakeramurjñkia iniaisati. Tuke tsawant ni krusrj yanaki nemartusti. ²⁴ Kame shuar ju nunkanam aya péñker pujustaj tákunka nu shuar uwemtsuk jakattawai. Ansu Winia anentu asa péñker pujustinniak enentáimtsuna nú shuarka nekas iwiaakman wáinkattawai. ²⁵ Íimiata, shuar ashí ju nunkanam ana nuna súnakui tura jiniun wétin ákuisha ¿itiurak péñker pujusat? ²⁶ Wí Aents Ajasuitjiana ju Winiasha tura winia chichampruncha shuar natsantraitkuñkia, winia wincharujai, winia Aparu wincharijjai tura nayaimpinmaya péñker sutara wincharijjai atak táakun shuar natsantrurmia nuna natsantrat-tajai Wí. ²⁷ Tura shuar Yusa akuptairjñ wáintsuk jákachartatna nu jui pujuiniawai. Nuna nekas tájarne” tímiayi.

Jesus nusháa iira ajasmiania nu

(Mateu 17.1-8; Márkus 9.2-8)

²⁸ Nuna tuasua amik nuyá chíkich semanatin Yúsan áujstaj tusa Jesus náinnium wakamiayi. Pítur, Jakupu, Juanjaj nemariarmiayi. ²⁹ Jesus auju pujus nusháa iira ajattsarmiayi. Ni pushirisha ti puju jítsumir ajasmiai. ³⁰ Nuñkia jimiara áishman Niijjaj chicháa wajarmiayi. Nuka Muisáis Eríasjaj ármiai. ³¹ Niñcha wincha jítsumir téntakarmiayi. Tura Jesus wáitias Jerusarénnum jákatniurín amia nuna áujmatarmiayi. ³² Pítur ni tsaniakmarijjaj karj ti pujainiajn iwiáa pujuarmiayi. Tuma ásar Jesusan tura jimiara áishmanjaj jítsumir ajas wajainian wáinkarmiayi. ³³ Tura nu áishman Jesusan ikiuki weenaj Pítur Jesusan chicharuk “Uuntá, iisha ti shiir pujatsjik. Menaintiu áakmaktai, Áminiusha, Muisais-nasha, Eriasnasha áakmaktai” tímiayi. Tura Pítrusha enentáimtsuk nuna tímiayi. ³⁴ Nuna chicháa pujaj yurañkim tarj kaput amuawarmiayi. Tura yurañkim amuam ti ashamkarmiayi. ³⁵ Nuñkia yurañminmaya ju chichaamun antukarmiayi: “Juka winia aneamu Uchiruiti. Nii anturkatarum.” ³⁶ Chichaamun antasua amikiar Jesus niñki wajan wáinkarmiayi. Nuñkia takamtak pujuarmiayi. Tura wáinkarmia nuna penké etserkacharmiayi.

Uchi iwianchrukun Jesus tsuármiania nu

(Mateu 17.14-21; Márkus 9.14-29)

³⁷ Kashin tsawantaj, náinniumia táarmatai, ti untsurj shuar Jesus inkiuntai tusar wearmiayi. ³⁸ Nu shuarnumia chikichik áishman Jesusan untsuak tímiayi “Uuntá, waitneasam uchir írtústá. Uchirsha jíchikiiti. ³⁹ Íwianch achik núpeteam niisha náñkamas untsumui. Tura chichichiptu ajas wenunmasha saun kaput apaawai. Íwianch nin tuke yajauch awajas ankant awajatsniun nakitiawai. ⁴⁰ Túmakui ame unuiniamurmin iwianchin jürukit tusan seamjai. Túrasha tujinkarmiai” tímiayi.

⁴¹ Tutaj Jesus tímiayi “Yus enentáimtichutirmin, tutupnik wekaichatirmin ¿urutmá tsawanttsuk atumjai pujustaj. Urutmá katsuntratjatsuk? Uchiram juj itiatá” tímiayi.

⁴² Tura uchi winiaj íwianch nunká ajuant chichichiptu áepsamiayi. Tura Jesus iwianchin kakantar chicharkamiayi. Tura uchin penker awajas ni aparín awantuki susamiayi. ⁴³ Tura ashí pujuarmia nu ti enentáimprar “Yuska imiá úuntchakait” tiarmiayi.

Jesus ni jákatniurín ataksha ujakmiania nu

(Mateu 17.22-23; Márkus 9.30-32)

Jesus túramun ti enentáimtu pujuiniaj Jesus ni unuiniamurín tímiayi ⁴⁴ “Wi tájarmena ju penker antuktatum. Winia Aents Ajasu tútain surtkartatui.”

⁴⁵ Tura Nii timia nuna unuiniamurj nekaacharmiayi. Nekaawarajin tusa paantcha awajsamuyayi. Tura wariñkit tusa anintrustinniasha arantukarmiayi.

“¿Yaki imiá nankaamantuit?”

(Mateu 18.1-5; Márkus 9.33-37)

⁴⁶ Nuyá ni unuiniamurj, yaki imiá nankaamaku ati tusa, nuamtak mai tunai ajarmiayi. ⁴⁷ Tura ni enentáimsamurín Jesus nekaamiayi. Tuma asa uchin achik ni pujamunam itiamiayi. ⁴⁸ Itiá tímiayi “Winia anentuk ju uchin shiir awajeana nuka Winiasha shiir awajatawai. Tura Winia shiir

awajtana nuka Winia akuptana nunasha shiir awajeawai. Kame átum nan̄kaamantuchu tárúmna nu ti nekas nan̄kaamantuiti' tímiayi.

(Márkus 9.38-40)

⁴⁹ Nuyá Juan̄ tímiayi “Uuntá, shuar ame náarmin pachis iwianchin j̄iiki akupea nu wáinkiam̄ji. Tura in páchitkiachu asamtaí nuka suritkiam̄ji.”

⁵⁰ Tutai Jesus tímiayi “Antsu suritkiarap. Shuar in nakitramachkuṅka in páchitkiawai.”

Jesus Jakupun Juán̄nasha chicharkarmiania nu

⁵¹ Jesus, nayaimpiniam waketitniur̄i jeatemamtaí, enentáimmia ímiatrusan̄ Jerusarénn̄num we-wémiayi. ⁵² Wesa, kanartinian wáinkiarat tusa akatar émtikiarmiayi. Tura niisha Samaria péprunam jeawarmiayi. ⁵³ Tura Samarianmayá aentska, Jerusarénn̄num wéenan nekaawaru ásar itiaatniun nakitramiayi. ⁵⁴ Jesusa unuiniamur̄i Jakupusha Juan̄sha nuna nekaawar; Jesusan tiarmiayi “¿Uuntá, Eriás yaunchu túramia núnisrik iisha túrat tusam wakeramek. Nayaimpinmayá ji tara Samarianmayá aentsun amukarti, títiatjik?”

⁵⁵ Tutai Jesus nin íisar kakantar chicharuk tímiayi “Atumsha atumi enentáí urukukit nuka nekamatsrume. ⁵⁶ Wi Aents Ajasu áentsun emes-rattsan táchaitjai. Antsu uwentikratajtsan táwitjai” tímiayi. Nuyá ch́kích péprunam wearmiayi.

Jesus nemarsatin

(Mateu 8.19-22)

⁵⁷ Jintiá weenaj, ch́kích áishman̄ Jesusan chicharuk “Uuntá, tuí wétatam nuísha nemarsatjame” tímiayi.

⁵⁸ Tutai Jesus tímiayi “Kujanchmasha ni wáar̄in takaktsuk. Chín̄kisha pasun̄ken takaktsuk. Tura Wi Yusa Uchir̄intiatan tepesan ayampratniur atsawai.”

⁵⁹ Ch́kích áishman̄kan Jesus “Nemartusta” tímiayi.

Tutai nii chichaak “Antsu, Uuntá, winia apar jakamtaí, iwiarsa iki-uakun nemarsatjame. Nu tsan̄kátrúktá” tímiayi.

⁶⁰ Tutai Jesus tímiayi “Jakaa ainia nu ni shuar̄in iwiarsatniunka enentáimtusarti. Tura ámeká weme Yus-shuar átin urukukit nu etserkata” tímiayi.

⁶¹ Nuyá ch́kích tímiayi “Uuntá, nemarsataj tusan wakerajme. Túrasha wíi shuaran emka áujsan ikiuweartaj tsan̄kátrúktá” tímiayi.

⁶² Tutai Jesus tímiayi “Shuar arayát ukunmaan̄i apajas iimna nu, Yus akupeana nuí takaschamniaiti.”

10

Ni unuiniamur̄in setenta armia nuna Jesus etserkatarum tusa akup-karmiania nu

¹ Nuyá ukunam ch́kích unuiniamur̄in setenta anaikiarmiayi Jesus. Tura j́miar j́miaran apatak émkítiarum tusa ashí péprunam ashí nun̄kanam ni wétin amia nuí akupkam̄iayi. ² Akupeak tímiayi “Nekas tájar̄me, Yus-Chicham étserkum, júuktinia núnisan̄, aents Yus-shuar awajsatin ti awai. Tura ¿yaki júukat, aya ishichik takainiasha? Tuma asamtaí ni takarniur̄i akupkat tusarum Nerentín seatarum. ³ Wetarum. Átumka murikiua núninaitrume. Uunt yawá yujamua núninnium tsuumai ámunam akupeajrume. ⁴ Yurumkasha, kuitcha, sapatcha júkiirap; shuarjai jintiá

ájumamsatai tusarum wajasairap. ⁵ Jeá wayakrum emka ju titiarum: “Ju jeanam pujuinia nuna Yus shiir awajsarti.” ⁶ Nérentin “Ee, nuna wakerajai” tákuinkia túrunattawai. Tura “Atsá, wakeratsjai” tákuinkia, “nuinkia túrunashti” titiarum. ⁷ Jeá wayattarmena nú jeanman pu-justarum. Tura ajampramsattarmena nu yuatarum. Warí, takaana nu akinkiashtinkiait. Chíkich jeanam nu werum nu werum ajairap. ⁸ Awaintiamawartatna nú peprunam jearmeka ajampramsartatna nu yuatarum. ⁹ Jaa ainia nu tsuártarum. Túrarum “Yus ju nunkanam akupin ajastin ishichik ajatemsai” nu peprunmaya shuar titiarum. ¹⁰ Íksarmek itiaarmachartatna nú peprunam jearum, jintiá wajasrum ju titiarum, ¹¹ “Yusna nakitra asakrumin, atumi pépruriniá nunka ii nawen peema japirar akakekji. Túrasha ju paant nekaatarum: Yus ju nunkanam akupkatin ishichik ajatemsai.” ¹² Yusa nekapsatin tsawantri jeantai nu peprunmaya shuaran ti asutiáttawai. Yaunchu Sutumannmaya shuaran asutiámia nujai nankaamas asutiáttawai. Núnaka paant tájarme tímiayi.

(Mateu 11.20-24)

¹³ Wáinkiatá, Kurasín péprunmayatiram. Wáinkiatá Petsaitia péprunmayatirmesha. Atumi péprurijn aents tujintiamun ti túraitjai. Warí, yaunchu Tiru péprunmasha, Setun péprunmasha nu tujintiamu túramuitkuinkia yaunchu ni enentáin yapajiáwarayyi. Túrawar kúntuts pujutai pushin entsarar yunkunim ajakiarayyi. ¹⁴ Tura atumsha aents tujintiamu túramu wáiniatrum yapajiachu asakrumin Tirunmaya tura Setunnumiá aentsjai nankaamas asutniáttarme. ¹⁵ Tura atumsha Kapernáumnumiá tirmesha, “ti nankaamantu ajaras nayaimpiniam jeattaji” tu enentáimtsurmek. Maaj, antsu jaka matsamtainium jeattarme, auka” tímiayi.

¹⁶ Tura Jesus ni unuiniamurjn junasha tímiayi: “Atumin anturtamainiakka Winiasha anturtuiniawai; atumin nakitramainiakka Winiasha nakitruiniawai; tura nú arant, Winia nakitrakka Winia akuptukua nunasha nakitiawai.” Tú áujas Jesus nin akupkarmiyi.

Setenta unuiniamu wakетки táarmiania nu

¹⁷ Ukunam nu setenta unuiniamu warasar wakетки táarmiyi. Tura chichainiak “Uuntá, ame náarmijn íwianch jiiki akupeam umirtamkamji” tiarmiyi.

¹⁸ Tutai Jesus tímiayi “Ee, Wisha nayaimpinmaya peem peetna núnisan, uunt iwianch Satanásan akaiki iniaan wáinkiamjai. ¹⁹ Atumniaka winia kakarmarun susamjarme, napi najarmasha titin najarmasha yajauch awajtamsairum tusan; tura ii nemasri kakarmari nupetkatniuncha susamjarme. ²⁰ Túrasha íwianch umirtamkui nu enentáimsam warasairap. Antsu atumí naari nayaimpiniam aarma aa asantai waratarum” tímiayi Jesus.

Jesus warasmiyi

(Mateu 11.25-27; 13.16-17)

²¹ Nuinkia ni enentáin Yusa Wakaní waramtiksam Jesus juna tímiayi: “Aparú, ashí nayaimpijjai nunka Úntrinme; tuma asam ju túrunamu ti unuimiaru enentáimtumainia nuyá úukuitme; antsu uchichia núnis nankaamantuchu enentáimtumainia nú shuar paant awajtusuitme. Ee,

Aparú, núnik wakerichmakum. Tuma asamtai shiir enentáimtajme, Aparú” tímiayi.

²² “Winia Apar ashí surusuiti. Wisha ni Uchirí asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wí wakeraj nú shuaran winia Aparun paant awajtajai. Nú shuarsha winia Aparun nékainiawai.” Tu tímiayi Jesus.

²³⁻²⁴ Nuyá ni unuiniamurín iis tímiayi “Wí tájarme, untsurí Yúsnan etserniusha tura uunt akupniusha átum yamáí wáintrum nuna wáinkiatniun wakeruiniayatan wáinkiacharmiayi. Tura átum yamáí ántarme nuna antuktinian wakeruiniayatan antukcharmiayi. Tura Yus achirmaku asakrumin, wáintrumna nu ti péñkeraiti” tímiayi.

Samarianmaya áishman katsumkamun yainmia nuna Jesus unuiniamiania nu

²⁵ Nuyá akupkamun jintinkiertin Jesus warintiak chichakat tusa wajati werimiayi. Werí iniimiayi “Uuntá, wí tuke iwiaaku átaj takun ¿warinia túratniuitiaj?” tímiayi.

²⁶ Tutai Jesus ayak “¿Yús-Papinium Muisáis áarmanum waritia áarmait. Waritia enentáimiam?” tímiayi.

²⁷ Akupkamun jintinkiertin ayak tímiayi “Juna tawai: Ti enentáimsam, tuke enentáimjai Uunt Yus aneeta. Ame kakarmaram, iwiaakmarmesha Yus íiktusta. Tura ame ayashim aneamna núnismek ame írutramurmesha aneeta. Núchakait” tímiayi.

²⁸ Tutai Jesus tímiayi “Péñker áimsame. Nu túrakmeka tuke iwiaaku átatme.”

²⁹ Tutai akupkamun jintinkiertin ni anintramun kúishtumaktajtsa wakerak “Winia írutramursha ¿ya ainia?” tímiayi.

³⁰ Takui Jesus tímiayi “Jerusarénumia jintia Jirikiú péprunam jeana nú jintianam áishman wean, kasa áishman tariar ni warirín, pushiríncha kasarkarmiayi. Tura katsumkar mayái ashirak ajuantar ikiukiarmiayi.

³¹ Tura Israer-shuar Patri ukunman winis nu áishman kan wáiniak aya íikian iis ikiukmiayi. ³² Nuyá ukunam Patri yáintrísha nu jintianam wesa, nu áishman kan wáiniak, áyatik iis ikiuak wémiayi. ³³ Tura nuyá Samaria nuñkanmaya áishman sha nu jintianman wesa, nu áishman kan wáiniak ní shuarinchunak wáitnéntramiayi. ³⁴ Nuyá nu áishman kan weantuk ni numpamnamurín asuitijjai tura wíniujai tsuar jaanchjjai penuarmiayi. Tura ni kawairín ekenak jukimiayi. Tura írar kanutainiam jukí ejé nu áishman kan péñker wáinkiamiayi. ³⁵ Tura kashin tsawarmatai Samarianmaya áishman weak jimirá kuítian jusa jeá nérenniurín susamiayi. Susa tímiayi “Ju áishman péñker wáitrukta. Tura wí amaajna ju táasmataisha wí wáketkun akiktajme” tímiayi. ³⁶ Ayu, ámijiaisha, nu menaintiu áiniana nu, ¿tuá imiá nekas katsumkamun waitnéntramia?” tímiayi Jesus.

³⁷ Takui akupkamun jintinkiertin chichaak “Entá, katsumkamun wáitnéntramia núa” tímiayi.

Tutai Jesus tímiayi “Amesha weme núnismek túrata.”

Marta ni kaijiai Marí jeen Jesus pujusmiania nu

³⁸ Nuyá Jesus jintiá wesa chíkich péprunam jeamiayi. Nu péprunmaya nuwá naari Marta ni jeen itiaamiayi. ³⁹ Marta kaj ámiayi ni naari Marí. Marisha unuiniamun anturkataj tusa Jesusa nawen pujursamiayi.

⁴⁰ Tura Mártaka ni takatrín ti enentáimtak Jesusan weantuk tímiayi “Uuntá

Jesúsá, ¿winia kajr takatan winiak íktursainia nuka enentáimsumek? Winia yáíntá turuttia” tímiayi.

⁴¹ Tutai Jesus tímiayi “Maaj Martá, untsurí túratin ana nu ti enentáimsam itit awajtamui. ⁴² Tura aya chikichik nekas túratniuiti. Marikia nekas penker ana nuna achikiai. Nusha penké jurunkishtatui” tímiayi.

11

Jesus Yus áujsatniun unuiniamiania nu

(Mateu 6.9-15; 7.7-11)

¹ Chikich tsawantaj Jesus Yúsán áujsataj tusa atsamunam pujumiayi. Áujtua amikmatai ni unuiniamurí chikichik Nin tímiayi “Uuntá, imiakratin Juan ni unuiniamurín unuiniamia núnismek Yus áujsatin unuitiurta.”

² Tutai Jesus tímiayi “Yus áujkuram jü titiarum:

Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan jü nunkanmasha uminkiatí. ³ Aparú, ii yurumkarí ashí tsawant amasta. ⁴ Tura winia nemasrun tsanjurajna núnismek, Aparú, winia tunaaru tumashrisha tsankurturta. Tunáa wakeruktin tsankatrukaip. Antsu ashí tunaanumiá uwemtikrurta.”

⁵⁻⁶ Nuyá Jesus juna tímiayi. “Wats, jü titiái. Kashi ajapén amikrum werishtameash. Tura “Winia amikiur yajaya winia jearuí yama tayi. Tura ajamsatniun penké takaksujai. Tuma asantai amikru, maintiu apatuk ajamprustá” tichatameash. ⁷ Tura nii inít pujusan chichaak “Warí, wáitisha epenmiati, tura winia uchirsha wijíaj ashí tepeenawai. Itiur nantakniak amastaj. Itit awajtipia” turamchanpiash. ⁸ Wats, paant tájarme, niisha amikrum asa, nantaki ikiatmastinian nakitiayat, itit awajtiñ tusa nantaki ashí wakeramna nuna suramsattawai. ⁹ Tuma asantai tájarme: Yus seatarum; túrakrumin suramsattarme. Eakrumka wáinkattarme. “Winiajai” tákurmin awajntiamattarme. ¹⁰ Seana núnaka suániatsuk. Eana nuka wáintsuk. “Winiajai” tuinia núnaka awajniatsuk.’

¹¹ “Wats, átum uchirtintiram, ame uchiram apatkun seatmakui ¿kayaash súsaintiam? Namakan seatmakui ¿napíash súsaintiam? ¹² Nujintian seatmakuisha ¿titiñkiash súsaintiam? ¹³ Warí, átum imiá yajauchitirmesha atumí uchirí penker ana nu tuke súchakaitrum. Atumí Aparí nayaimpiniam pujana nu, seakrumniñkia nú nankaamas ni Wakanñ suramsattawai.” Tu unuiniamiayi.

Jesusan “iwianchi kakarmaríjiaí túrawai” tiarmiayi

(Mateu 12.22-30; Márkus 3.19-27)

¹⁴ Shuar iwianchraku asa chichachu ámiayi. Nuna enentáiyen nu iwianchin Jesus jüki akupkamiayi. Íwianch jüinkimtai chichachu chichasmiayi. Túramtai shuar nuí pujuarmia nu ti enentáimprarmiayi. ¹⁵ Tura chikich tiarmiayi “Juka iwianchí kapitianrí Satanásan, ni chikich naari Pirsepún umirniuiti. Tuma asa nuna kakarmaríjiaí iwianchin jüki akupeawai.”

¹⁶ Tura chikichkia, nekas Yúsnumiá taawashit tusar “Nayaimpinmaya kakaram ana nu iniakmasam aents tujintiamu túrata” Jesusan tiarmiayi.

17 Tura Jesus tu enentáimiainian neka asa tímiayi “Núu nunkanmayan shuar nuamtak kajernaiyakuñkia nú nunka wárik meserchattawak; nuamtak shuarsha ni shuarjijai kajernaiyaksha amunaikchartatuak. 18 Winiaka “Pirsepú iwianchi kakarmarjijai iwianchin jiiiki akupeawai” túruttsurmek. Tuma asamtai tájarme, uunt iwianch Satanás naartin, ni suntarjijai kajernaiyaksha çitiur tuke kakaram átink’? 19 Tura Wi Pirsepú kakarmarjijai iwianchin jiiiki akupeakuñkia, atumi shuarisha çyana kakarmarjijain iwianchin jiiiki akupena? Niisha “iwianchi kakarmarjijai túrichuitji” tuiniajsha çitiura Winiasha, “iwianchi kakarmarjijai túraiti” turutminiaitrum? 20 Wikia Yusa kakarmarjijai iwianchin jiiikin akupeajai. Nu nekaarum Yus atumi enentáin akupin ajasuana nu nékarme.’

21 ‘Kakaram áishman kíishtumaktajtsa iwiarnar wajas jeen wáinkuii, ni wariri inít ana nusha tímiatrusañ áiniawai. 22 Antsu niijjai nankaamas kakaram ana nu winiakka nupetkashtatuak. Tura kíishtumaktinian iwiar takaman jurawai. Tura kasamkámun ni amikrin súawai. Kakaram áishman iwianchin nakumeawai. Tura nujai nankaamas kakaram áishman Winia nakumprawai. 23 Iista. Winia nemartatsna nu winia nemasruti. Núnisan Winia yáintsuna nuka aya itiurchat nájateawai.’

*Iwianch jiiiki akupkamuitiat wáketna nuna ujakmiania nu
(Mateu 12.43-45)*

24 Nuyá Jesus juna tímiayi: ‘Shuara enentáiyá íwianch jiinki ayamprataj tusa yumi penké yútatsna nuí wéawai. Tura ayampratniun wáincha asa ataksha waketkitniun enentáimui. “Wi jiiinkimij nuin waketkitjai” tawai. 25 Tura waketki péñker iwiamun tura ankant aan wáiniui. 26 Nuna wáiniak, ni ain siati iwianchin niijjai nankaamas yajaunchin itia enkemáwartatui. Túrunamtai nu shuar nuiki nuna nankaamas yajauch ajastatui.” Tu tímiayi Jesus.

Nekas warastin

27 Shuar iruniarmia nuí Jesus nuna chichaa pujai, nuwá untsumuk “Ame nukun Yus ti yáinñkiai. Ni ampujén ame pujuschamkam. Ámin amuntstamachmakam” tímiayi.

28 Tutai Jesus tímiayi “Antsu ni chichamen antukar umirainia nuna, nukurjai nankaamas Yus ti yáinñkiaru áiniawai, tajai” tímiayi.

(Mateu 12.38-42; Márkus 8.12)

29 Shuar untsurí Niin káunkarmatai Jesus tímiayi “Yamaiya shuarka yajauch áiniawai. Yajauch ásar, chichartuiniak “Nekas Yúsnumiáitkiumka aents tujintiamua nu túram Yusa kakarmari iniakmasta” turutainiawai. Túrashá áyatik yaunchu Junas túrunamujai iniakmasmia nujain nekaatin áiniawai. 30 Kame Junas túrunamujai Níniwi péprunmayá shuaran yaunchu Yus ni kakarmarin iniakmasmia núnisan yamaisha Aents Ajasu tutaingiana nu Wi túrunamujai Yuska ni kakarmarin iniakturmastatrumé. 31 Yaunchu Sarumún uunt akupin pujai Sepa núñkanmayá nuwá akupin Sarumunka chichamen nekaataj tusa ti jeashtanmayá támiayi. Tura yamaikia Sarumunjai nankaamas pujai átumka anturtatsrumé. Tuma asamtai Wi tájarme, Yus ashí shuaran nekapsattana nu tsawant jeamtai nu nuwá, akupniun péñker anturka asamtai, Yus íimianum péñker átatui. Antsu atumsha Winia anturtukcha asakrumin Yus íimianum yajauch átatrumé. 32 Tura Yúsnan etserin Junas Níniwi péprunmayá shuarnum Yus

Chichaman etserkamtai nu shuar ni tunaarín enentáimtusar enentáin yapajíawarmiayi. Tura juí yamáí Junasjai nankaamas etserin pujajai. ¡Tuma asamtai nekapsatin tsawant jeamtai Níniwinmaya shuar yamaiya shuar árumna nuna sumantikramattarme!

Ayashi tsáapnintrí
(Mateu 5.15; 6.22-23)

³³ ‘¿Shirikip ekeemakar úuktinkiait? Pitiaknumsha enkeashtiniaiti. Antsu shuar jeá wayana nu paant íimsat tusar yakí ekensatniuiti. ³⁴ Ame jímijíai wáinkiam nujai wekasatin nekaattame. Tuma asamtai ame jímijíai péñker ana nu wáinkiumka péñker wekasatniua; antsu ame jímijíai yajauch ana nu wáinkiumka, kiritniunam wekasatniua núnisan yajauchiniam wekasattame. ³⁵ Anearta. Enentáimin tsáapin ana nu kiritin ajaschati tusam anearam wekasata. ³⁶ Ame ayashmíin kirit ajatsuk aya tsáapniniaitkiuñkia, shirikip paant awajea núnisan ashí paant wáinkiattame” tímiayi.

Pariséuncha, Israer-shuara jintinniurísha “yajauchiitume” tímiayi Jesus
(Mateu 23.1-36; Márkus 12.38-40; Rúkas 20.45-47)

³⁷ Jesus chichasua amikmatai Paríséu shuar, winia jearuí yurumáitia tusa untsukmiayi. Tutai Jesus wayá misanam pujusmiayi. ³⁸ Tura Israer-shuar ikijmiartin ana nuna túrutsuk aya pujakui Paríséusha nuna wáiniak “maa ¿urukamtia tura?” tu enentáimsamiayi.

³⁹ Tura Uunt Jesus tímiayi “Pariséutirmeka atumí yurumtairí aya pátatek nijiaktin ti wakeriniaitume. Atumsha nu yurumtaijíaí méteketume. Pátatek péñker túrarme. Tura atumí enentáinkia kasamkatniusha tura yajauchia nusha piakuíti. ⁴⁰ ¡Enentáimcha! Warí, ashí pátatek wáiniaji nuna Yus najanachmakia; tura inít paantcha ana nunasha Yúsak najanachmakia. ⁴¹⁻⁴² Aneartarum, Paríséutirmesha. Aya nuka méntasha, anissha tura aya apatkusha Yus súsatin ti enentáimprume. Nukasha tsurisasrum apatkusha tias ana nuyá chikichik achikrum, Yúsnaíti tátсурmek. Tura antsu nu túratin iniaitsuk péñker wekasatniusha, Yus anenmarmena nusha péñker enentáimsatniuitume. Wats inít, enentáimin ana nútiksarmek jusam susarta. Nuiñkia ashí chamir átatui.’

⁴³ ‘Tura aneartarum Paríséutirmesha. Yus áujtai jeanam penkerí pujutainium pujustin wakerarme. Tura jintiá aents íimiainiamunam ti shiir áujtusarat tusarum wakerarme.’

⁴⁴ ‘Jintinniutirmesha, Paríséutirmesha máí-metek aneartarum. ¡Antar shiir chichamtinia! Iwiarsamu paantcha núniniaitume. Shuar nu nankaamaksha nájamiat nékatsui. Núnisan shuar atumí chichame antukar yajauchia nuna nekartamtsurme.’

⁴⁵ Nuikia Israer-shuara jintinniurí chikichik Jesusan chicharuk tímiayi “Uuntá, nu tákum incha yajauch chichareame.”

⁴⁶ Tutai Jesus tímiayi “Atumsha jintinniutiram aneartarum. Atumí akupkamuríjíaí káarak ti kijin entsakchamnia súarme. Tura átumka yáintaj tusarum atumí uwejejaísha penké ántiatsurme.’

⁴⁷ ‘Aneartarum tájarme. Yaunchu atumí uuntrí Yúsnan étserniun máawarmia nuna iwiarsamurí átum jeamniuitume nu etserin ti péñker áarmatai kajinmatkishtin. ⁴⁸ Nu túrakrum atumí uuntrí túrawarmia nu, “yajauchichuiti” tarume. Warí, niisha máawarmiayi, tura

atumsha máawarai táyatrūm niijjaj méteketrume. Warí, Yúsnan etserniū iwiarsamurīn jeamkuram atumek sumamarme.'

⁴⁹ 'Atumí túramurīn nekáa Yus juna yaunchu tímiayi: "Winia etserturniun tura winia akatramurnasha niin akuptukartatjai. Túramtai chikichnaka máawartatui, tura chikichnaka pataatukartatui." ⁵⁰ Tuma asamtai ashí ni etserniurīn maamu ainia nuna, yamaiya áentstirmin Yus sumamtikramattarme. Nuñka najanamunmaya júkí ⁵¹ yamáí ímiajaj maamu ainia nuna, kame Apir maamunmaya júkí yamáí Sakarías maamua tímiajaj anintrustatui. Namañ maar Yus sutai ámanum tura Yus-jea ámanum ajapén atenkamunam máawarmia nú Sakaríasan tajai. Nu tuma asamtai tájarme, ni etserniurī maantamnawarmia nuna yamáí matsatrumna nútirmin aninmasartatui.'

⁵² 'Jintinniutiram aneartarum. Waiti asakatniua núnisrumek nekas nekaatin surimiarme. Atumkesha nékatsrume. Tura nekaataj tana nusha suritiarme" tímiayi.

⁵³⁻⁵⁴ Jesus nuna takui Pariséusha, jintinniusha ti kajerkarmiayi. Tura nii tana nujaj "yajauch túrame" titiai tusar wakeruiniak untsurī anintri-armiayi.

12

¹ Nu tumaj shuar ti untsurī káunkarmiayi. Ti kaunka ásar nawen mai-najatnai ajarmiayi. Tura Jesus ni unuiniamurīn tútan juarkimi-ayi. "Pariséu ántar chichamtin áiniawai. Nuka wakaprutaiya núnisaiti. Wakaprutaikia nijiamanch yumirniūm yama enkeam páantchaiti. Tura ukunam nekaamniaiti. ² Núnisan ashí paantcha ana nu iwiainiakma átatui. Uukma ana nusha nekaamu átatui. ³ Nu tuma asamtai, kiritniunam tímiarmena nusha tsawái tsáapin ajasmanum antunkattawai. Tura jea inít pujusrum ishishmasrum tímiarmena nusha áa ti paant etsernak-tatui.'

*Yusak ashamkatniuiti
(Mateu 10.28-31)*

⁴ 'Amikrutiram, aya ayashmin main ainia nu ashamkairap, tájarme. Ayashmin maa nú arantka máashtatui. ⁵ Tura ya nekas ashamkatniuitrum, nuna paant jintintiattajrume. Ame ayashmī maa, nuyá ámin jiniūm akuptamkatniun tujintiatsna nu ashamkatarum. Ee, Yus ashamkatarum, tájarme.'

⁶ 'Jimiará chin̄ki ishitiúpchich ishichik kuitjaj surukchatniukait. Túrusha Yusha nu chin̄kin pen̄ké kajinmatkishtatui. ⁷ Wats, ashamkairap. Untsurī chin̄kijjaj nan̄kaamas Yuska atumīn enentáimturmarme. Warí, ame intiashmin mash Yus nekapmaruiti.'

(Mateu 10.32-33; 12.32; 10.19-20)

⁸ 'Ashí shuar ashí íimiainiamunam Winia Aents Ajasu tutain, Winia natsantruiniatsna núnaka, Wisha Yusa suntarī íimiainiamunam natsantrash-tajai; ⁹ antsu shuar íimiainiamunam Winia natsantrana núnaka Wisha Yusa suntarī íimiainiamunam natsantrattajai.'

¹⁰ 'Winia, Aents Ajasu tutain, shuar yajauch chichartakuñkia nusha tsankuramniaiti, tura Yusa Wakan̄ncha yajauch chicharkuñkia nuka pen̄ké tsankurachminiaiti.'

11 ‘Wats, Israer-shuar iruntai jeanmasha, tura Israer-shuar kapi-tiánniumsha, uuntnumsha juramainiakui, aninmainiakui sha warintia-jak tusam ti enentáimsáip. 12 Ame áimkiatin jeamtai, Yusa Wakani ame títiatmena nuna jintinramattawai,” tu timiayi.

Kútiak enentáimtuschatniuitji

13 Chíkich áishman Jesusan tímiayi “Uuntá, ii aparí ikiurtamkimiaj nuna yatsur winiasha nakak surustí, títia” tímiayi.

14 Tutai Jesus tímiayi “Áishmanka, atumin nu túratin anaikiamukaitiaj.”

15 Nuyá tímiayi “Pénker enentáimsatarum. Nii takakna nújain shuar iwiaaku, áchatniuiti. Tuma asamtai kuítrintin ajastin aya nuke enentáimsaip.”

16 Nuyá juna métek-taku chichaman unuiniak tímiayi:

“Kuítrintin áishman ni ajariyan arakan ti nukap juukmai. 17 Tura “¿Ti nukap asamtai tuñ ikiustaj. Itiurkatjak?” tu enentáimsamiai. 18 Wats, wi nékajai. Winia ikiutái-jearun ashiran nú nankaamas úntan najanatjai. Tura nuñ ashí ikiustajai. 19 Nuñkia untsurí uwitin shiir pujustinian ikiusman takustatjai. Tuma asamtai, ayampran, yurumán, umaran shiir pujustatjai” timiai.’

20 ‘Tura Yus nin chicharuk timiai “Netse. Yamái kashi jakattame. Nuñkia imiá nukap ikiusumna nusha ¿yana átata?” timiai” tímiayi.

21 Nuyá Jesus tímiayi “Shuar niñki kuítrin ikiauntumna nu, núnisaiti. Túrasha Yusjai ísmaka kuítrin chaiti.”

Yus ni uchirín pénker wáinkiaiti

(Mateu 6.25-34)

22 Nuyá ni unuiniamurin Jesus juna tímiayi: “Warí yuarik pujustaji tura wariñ entsartaji tusarum nuke ti enentáimsairap. 23 Yus iwiaaku átinian amasu asa yurumkancha amastatui. Tura ju ayashniasha najana asa entsataincha amastatui. 24 Chínkisha enentáimsatarum. Niisha arakmainiatsui. Juuk yurumkan ikiuiniatsui. Tuma ain Yuska ni yurumátniurin tuke súawai. Atumsha chinikia nú nankaamaschakaitrum. 25 Tura ya shuarak, ti enentáimtana nujai nú naya ajasminiait. 26 Kame yúpichuch ana nusha túrachminiaitiatrumsha, ¿urukamtai chíkich ainia nusha ti enentáimtarum?”

27 ‘Íistá, kukujsha takaachitiat tura nájanchitiat ti shírmach ániawai. Yaunchu akupin Sarumún ti shiir iwiarmamniuitiat kukujia tímianchayayi. 28 Iis, nupa yamá tsakaawai tura kashin aents tsupikiar jinium apeánawai. Tuma ain Yus ti shiir awajeatsuk. Nuna tura asa atumniasha nú pénker wáitmakchattawak. ¿Urukamtai Yus nekas enentáimtatsrum? 29-30 Ju nunkanam ana nu ti pachirap. Chíkich shuar, Yúsan nékainiatsna nu, wariñ yuataji, wariñ umartaji nuna ti pachiiinawai. Tura atumsha tu enentáimsairap. Urukatjak, tiirap. Ame Apa nayaimpiniam pujana nu, ashí atsumarmena nuna nékawai. 31 Antsu emka Yusna nu enentáimtustarum. Túrakrumniñkia atsumamna nuna Yus suramsattawai.’

Kútian pachis Jesus unuiniamiania nu

(Mateu 6.19-21)

32 ‘Winia murikrutiram ashankairap. Untsuríchuitrume. Túrasha atumí Aparí ni akuptairiin pachitmarktasa ti wakerutmarme. 33-34 Kuítrum tui aa, nuñ tuke enentáimtittiarne. Tume asamtai

takakrumna nu surukrum atsumainia nu susatarum. Nuka enketai arut ajatsna nuĭ enkeatnua núniskete. Túrakrum nayaimpinmaya kuit amuatsna nu íkiuwearme. Nuĭsha kasa nu kuitian kasamkataj tusa wayachminiaiti, tura kayaasha nu kuitian yúatniun tujintiawai.’

Aneerar wekasatniuitji

³⁵⁻³⁶ Ju enentáimsatarum. Ni uuntri nuatnaikiatin námpernumia taa, “uraitia” takui, takarnjuri jinia ekeemakar wárik urattiaĭ tusar nakáa pujuiniawai. Atumsha núnisrumek Wi atumj Uuntri támatai, shiir itiaatai tusarum anearum wekasatarum. ³⁷ Ni uuntri taak iwiáa pujuinian wáinkiarai nuka shiir pujuiniawai. Nu úuntak iwiar, “misanam pujustarum” ni takarnjurin títiatui tura yurumkan sústartui. ³⁸ Kashi ajapén taaksha tura tsawaana aj taaksha ni takarnjurin iwiáa pujuinian wáinkiuŋka, nu takarin shiir pujuiniawai. ³⁹ Tura juŋsha nekaatarum. Jeennia nu, kasa tátinian nékaitkiuŋka, iwiáa pujusaayi. Kasa wayá kasamkatniun suritkiaayi. ⁴⁰ Atumsha núnisrumek, anearum pujusatarum. Wi Aents Ajasu tutai aya aneachmanum tátatjai” tímiayi.

Pénker takarin yajauch takarniuĭai

(Mateu 24.45-51)

⁴¹ Nuyá Pítur aniasmiayi “¿Aya ínkik unuiniartaj tusam nu métek-taku chicham támek. Kame ashí nekaawarat tusamek tame?” tímiayi.

⁴² Tutai Jesus tímiayi “Atumsha pénger takatan wáinnia núnisketrume. Takatan wáinin ni uuntri takatrin takainia nuna, yurumátin jeamtai, ayurkamna núiti ni úuntrin shiir umirna nu, tura pénger enentáimtana nu. ⁴³ Ni uuntri taa, takatrin tímiatrusaŋ túran wáinkiuŋkia nu wáinniusha shiir enentáimsamniaiti. ⁴⁴ Umirin asamtai, ni uuntri ashí ni waririn wáitrukat tusa apujsattawai. Nuna paant tájarne. ⁴⁵ Tura nu takatan wáinniusha “úuntur wau táchattawai” tu enentáimias, ni uuntri takarniurin yajauch awajeakuŋkia tura niŋki ti yurumá, ti umar nampeakuŋkia, ⁴⁶ nuŋkia ni uuntri ni nákachmanum aya aneachma taa ti asutiáttawai. Umichu pujuinia nuĭ akupkattawai.’

⁴⁷ ‘Takarín ni uuntri wakerá nuna nékayat, iwiartsuk umitsuk pujakka ti awatramu átatui. ⁴⁸ Túrasha takarin nékachu asa, asutniámnia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisaŋ nankaamas seawartatui.’

Jesusjai shuar akannartatui

(Mateu 10.34-36)

⁴⁹ ‘Jijiai nekapsatnia nútiksanak nuŋkanam jinia ikiapartaj tusan tamajai. Tura túrunat tusan ti wakerajai. ⁵⁰ Imiantinia núnisan itiuŋchat ukatruktatui. Nusha wárik amuukat tusan ti wakerajai. ⁵¹ “Ashí shuar shiir pujusarat tusa táwiti” tu enentáimturumek. Núchaiti. Antsu shuar tesanairat tusan táwitjai. ⁵² Yamái jukimiutak chikichik shuarnum seŋku ainia nu akannakartatui; menaintiu shuar ni shuarin jímiaran nakitrartatui. Jímiarsha ni shuarin menaintiun nakitrartatui. ⁵³ Apasha ni uchirin nakitrattawai. Núnisaŋ uchisha ni aparin nakitrattawai. Nukusha ni nawantrin nakitrattawai, nawantrisha nukurin nakitrattawai. Tsatsarisha ni najatin nakitrattawai; najatisha tsatsarin nakitrattawai.”

(Mateu 16.1-4; Márkus 8.11-13)

⁵⁴ Jesus áentsun chicharuk juŋnasha tímiayi “Atumsha nantu akaataina maani kjar matai “yutuktatui” tátsurmek. Nusha nekas tárume. ⁵⁵ Tura

anaaraniã nase násenkamtai “séejik átatui” tárume. Tura nekas tárume. ⁵⁶ Yuramminmasha nunãanmasha túruna nu nékarme. Túmaitiatrumsha ju tsawantai túrunattana nusha çitiura nékatsrum? ¡Maaj, ánthraitrume!”

Nemasrumjaisha nawamnaikiata

(Mateu 5.25-26)

⁵⁷ “Túrasha péñker ana nusha çurukamtai atumek enentáimsarum wáintsuram? ⁵⁸ Irutramuram úuntnum júramkuinãkia jintia wésamek “nuamtak iwiarartai” titiá. Túrachkumniãkia akupniunam juramkittiame. Tura niisha suntarnum akuptamkattame. Tura niisha sepunam enketmattawai. ⁵⁹ Tura nekas tajai, nu ñ enkemamka ashí rearchisha akikmachkumka júnkishtatme” tímiayi.

13

Ii enentái yapajiátniuitji

¹ Nu tsawantin chícham ujaktai tusar Jesusan tariarmiayi. Kariréa nunãanam Israer-shuar ni waakarín máawar Yus susatai tusar pujuiniã, Piratu nin maa, nuna nunpen waaka numpejai pachimpramun ujakarmiayi. ² Tura Jesus tímiayi “¿Warí enentáimsarum? Kariréanmaya áishman tárumna nu, chíkich Kariréanmaya áishmanjai nanãaamas yajauch ásar túrunawarai çtu enentáimprumek? ³ Atsá; atumí enentái yapajiáchkurmeka núnisrumek atumsha jakattarme. Nuna paant tájarme, tímiayi. ⁴ Tura tiasiúchu áishman yakí jeã Seruí kupiniak iniaak nekenkarmiania nu, ¿warí enentáimtarum? Chíkich Jerusarénumiã shuarjai nanãaamas tunáa ásar túrunawarai çtu enentáimprumek? ⁵ Atsá, tájarme. Atumí enentái yapajiáchkurmeka núnisrumek atumsha jakattarme.”

Iikiu numi nereatsna nu

⁶ Júnasha Jesus métek-taku chichaman tímauyi. Júiti:

Shuar ni ajarín íkiu numin araaun takakuyi. Nerekchiash tusa iyumai. Túrasha nere atsumai. ⁷ Nuinãkia ni ajarín wáinniun timiai “Antukta, menaintiú uwitin júna nere átai tusan waketrú pujajai; túrasha penké wáinkiachjai. Ajakta. ¿Urukamtai ánthrash wajastata?”

⁸ Tutai ajá wáinin timiai “Atsá, uuntá; ju uwitin wajastí. Wajamurín takarsatjai tura péñker nunãan matsatkatjai. ⁹ Nujai nerekchampiash. Tura tuke nereachkuinãkia nuinãkia ajakta” timiai”, tímiayi.

Nuwan punuá kaarun Jesus tsuármiania nu

¹⁰ Ayampratin tsawantai Israer-shuar iruntai jeãnam Jesus unuiniak pujumiayi. ¹¹ Nuisha nuwã pujumiayi. Nu nuwasha tiasiúchu uwitin tuke jaa pujumiayi. Íwianch nin yajauch awajas apuna tuke ikiaramiayi. Túramu asa pañkái nakuenkataj tukamá penké tujinmiayi. ¹² Jesus nuna wániak, chicharuk “Nawantrú, ame jaamurmiyã ankant ajasume” tímiayi.

¹³ Nuna tinia ni uwejejai antinmiayi. Tura nú chichamaik nuwasha pañkái nakuenkamiayi. Tura Yusa náarín uunt awajsamiayi. ¹⁴ Tura Jesus ayampratin tsawantai tsuaru asamtai, iruntai jeã uuntri kajek iruntrarmia nuna tímiayi “Sais tsawantin takaschatniukait; ayampratin tsawantai tsuámartaj tusarum táchatniuitrume. Sais tsawant ana nuí tátiniaitrume.”

15 Tura Jesus tímiayi, “¡Ántar chichamtinia! ¿atumí waakarísha atumí umpuururísha yumi aartai tusarum ayampratin tsawantin atíarum júatstrumek? 16 Tura jú nuwasha, atumí shuarí Apraám shuarnumia akiiniati. Nii tiasiúchu uwí Satanás yajauch awajsamujai jinkiamuyayi. Nincha ayampratin tsawant ain yajauch awajsamunmaya atíachminkiait” tímiayi.

17 Jesus nuna takui ni nemasrísha natsaararmiayi. Tura penké shuar ni péñker túramurín wáinkiar warasarmiayi.

Mustasa jinkiaí

(Mateu 13.31-32; Márkus 4.30-32)

18 Nuyá Jesus tímiayi “¿Yusa akupeamurí warijjain métek-takuit? 19 Mustasa jinkiaíjjai métek-takuiti. Mustasa jinkiaíncha shuar ni ajarijn araamiayi. Tsapái, tsakaak, uunt numi ajasmiai. Ti uunt asamtai chiní ni kanawen pasunmarmiai.”

(Mateu 13.33)

20 Tura junasha tímiayi: “¿Yusa akupeamurí warijjain métek-takuit? 21 Tanta wakaprutaia métek-takuiti. Arinia núkap ana nuí nuwá wakaprutain ishichik enkéamiayi. Túram ashí wakapruamiayi.” Tu tímiayi.

Yupikiach waiti

(Mateu 7.13-14, 21-23)

22 Jesus Jerusarénum jeattsá weak untsurí peprunam wayá uniniarkutak wémiayi. 23 Weai chíkich shuar aniasmiayi “Uuntá, ¿uwe-mainia nu ishichkikiait?”

24 Tutai Jesus tímiayi “Yupikiach wáitiniam wayataj tusam ti wakeritiarum. Kame untsurí wayataj tusar wakeriartatui, túrasha tujinkiait-tui, tájarme. 25 Jeá nérenniurí wáitin epenmiatai, atumsha aa wajarum nu, wáitiniam wajasrum untsúakrum “Uuntá, uratritia” titiatrume. Túrasha “Nékatsjarme. ¿Tuyantskaitrum?” turamtatrume. 26 Nuyá átum titiatrume “Túrasha, uuntá, iisha ámijjai yurumámji, ámijjai umarmaji. Tura ii pépruríncha unuiniamame.” 27 Túrasha nii titiatui “Tuyantskaitrum, nékatsjarme, tátsujrumek. Yajauch túrintirmeka winiyanka kanaktiarum.” ’

28 ‘Nuyá Apraámsha, Isaksha, Jakupsha tura ashí Yúsnan etserin Yus akupeana nuí wayawaru wáinkiarum tura aa ajapam pujusrum ti úutkuram naim tásarara ajattarme. 29 Tura Yus akupeana nuí, nantu tatainmaaniyasha nantu akaatainmaaniyasha, arakiasha, nunkaaniasha taar, imia Israer-shuarchaitiat yurumátaí tusar pujusartatui. Tura atumsha, “Apraám shuáraitjai” táyatrume, wayashtatrume. 30 Nuísha yamáí ukunmaani ainia nusha emka ártatui; tura yamáí emka ainia nusha nuísha ukunmaani ártatui.”

Jerusarénumaani Jesus wémiayi

(Mateu 23.37-39)

31 Nu tsawantai Pariséu aents Jesusan tariar tiarmiayi “Erutis mantamattsá wakerutmawai. Tuma asamtai júyanka wetá.”

32 Tutai Jesus tímiayi “Werum nu kujancham jú titiarum: “Íistá. Ya-maisha ishichik tsawant iwianchin jíikin akupkartajai; túran jaancha tsuáartajai. Tura ukunam amuktatjai.” 33 Tura Jerusarénumaani ishichik tsawant tuke wétiniaitjai. Yúsnan etserin aya Jerusarénuman jákatniuiti.’

³⁴ “Jerusarénnumiatiram, Yúsnan etserin máiniaitrum; tura Yus akatar akupturmakmania nusha kayajai tukurum máiniaitrum! Tuma aijn atash ni shiamprin etektana núnisnak Wisha weaktasan wakerimjiarme, túrasha nakitramarme. ³⁵ Iistarum. Atumniasha Yus ajapramaitrum. Tura “Yusa náarijn winiana nu, shiir atí” titiatrumna nú tsawant jeatsain penké wáitkiashtatrum. Nuna tájarne” tímiayi Jesus.

14

Áishman eaak-jaan Jesus tsuármiania nu

¹ Ayampratin tsawantaj Pariséu uuntri jeen Jesus yurumáttsa wémiayi. Tura chíkich Pariséu wariniak túrat tusar ii pujuarmiayi. ² Nuj áishman eaak-jaa Jesus pujamunam naka pujumiayi. ³ Jintinniuncha Pariséuncha Jesus aniasmiayi “¿Warí tárur? ¿Ayampratin tsawantaj jaa tsuárminkiait. Tsuárchamniakait?” tímiayi.

⁴ Tura niisha áimtsuk pujuarmiayi. Nuinikia jaan antin tsuármiai. Tura “shiir wetá” tímiayi. ⁵ Nuyá Pariséun chicharuk, “Atumí umpuurarisha, waakarisha waá táurmanum akaiki iniamtai, ayampratin tsawant aijn nu chichamaik júatsrumek” tímiayi.

⁶ Takui áimkiatniun penké tujinkiarmiayi.

Nuátnaikiatin nampernum ipiaamu ármia nu

⁷ Ipiaamusha penkeri pujutainium pujustaisar ti wakeruiniakui, Jesus nuna wániak juna jintinramiayi:

⁸ “Nuátnaikiatin nampernum penkeri pujutainium pujusaip. Nuj pu-jakminkia, chíkich ámijiai nankaamas penkeri táchatpiash.”

⁹ “Tura ipiatmania nu chichartamuk “Chíkich iiktusta” turamchatpi-ash. Nuinikia chíkich nánkatkamu pujutainium wéakum natsartatme. ¹⁰ Antsu ipiatmakmin, nánkatkamu pujutainium pujustá. Nuinikia ipiatmamnia nu chichartamuk “Amikru, ámeke jui penkeri pujutainium pujustá” turamtatui. Nujai chíkich ipiaamu ainia nu, “nekas penkerinti” turamartatui. ¹¹ Iimiata, “penkerintjai” tu enentáimtuma nuka péejchach awajnostatui. Tura ímianchach enentáimtúmana nuka waantu ajastini-aiti.”

¹² Nuyá Nin ipiaamua nuna chicharuk tímiayi “Amesha yurumáití tusam untsuktajtsam wakerakmeke, ame amikrumsha, yatsumsha, ame shuarumsha, írutramuram kuítrintin ainia nusha ipiaawaip. Nii ipiaamka, ataksha íksan ámin ipiatmashtatuak. Nujai akikma átatme. ¹³ Antsu yurumáití tusam untsuktajtsam wakerakmeke, kuítrincha, wekaicha, shutuapsha, kusurusha ipiaawarta. ¹⁴ Niisha akirmaktinian tujintiaini-awai. Pénger shuar nantakiartatna nuj akinkiattame. Nu tuma asamtai warastatme” tímiayi.

Unt namperan Jesus nekamá chichasmiania nu

¹⁵ Nu misanam pujuarmia nuyá, chíkichik Jesus chichaamun antuk, Jesusan tímiayi “Yus akupeamunam pachiiniak, yurumkunka ti shiir ainti.”

¹⁶ Nuna takui Jesus juna jintintiamiayi: “Áishman namperan nájanuk, untsurí shuaran taartí tusa akatar akupkamai. ¹⁷ Yurumátin jeamtai “Winitiarum, yurumátin jeayi” tu tiarta tusa ni takarniurin akupkamai. ¹⁸ Tura winichiniaitji tusar ashí ujakarmai. Chíkich timiai “Nunkan yamá sumarmakjai. Iyutaj tusa wéakun winishtatjai. Tsankurturti”

timiai. ¹⁹ Tura chíkich chichaak “Wisha tias waakan sumarmakjai. Nekapsatsan wakerajai. Tuma asan winishtatjai. Tsankurturti” timiai. ²⁰ Tura chíkich chichaak “Yamáí nuatnaikijai. Tuma asan winishtatjai” timiai. ²¹ Takarin waketki ni úntrin ashí nuna ujakmai. Nuna antuk ni-isha kajekmiayi. Tura ni takarniurín timiai “Ju péprunam pénker jintian-masha tura uchich jintiachinmasha weme, kuitrincha tura wekaichasha, shutuapsha, kusurusha itiaarta.” ²² Nuyá ukunam ni takarniurí taa chicharuk “Uuntá, ame turutmiamna nútiksanak túramjai; túrasha tuke ankant awai” timiai.’

²³ ‘Tutai ni untrí chichaak “Jintianam weme, chíkich jintiachiniam weme, wáinmena nu ashí awayawarta. Winia jearuj piakat tusan wakerajai. ²⁴ Emka ipiaawarmajnia nuka penké chikichkíksha winin_kia yurumáchartatui, tajarme’ tímiayi.”

Kristu nemarsatin yúpichuchichuiti

²⁵ Untsurí aents Jesusjai irunki wearmiayi. Niisha nuna apajas iis juna tímiayi:

²⁶ “Shuar ni aparíncha, ni nukuríncha, nuaríncha uchiríncha, yachíncha, umaincha Wijjai nankaamas enentáimtakka, tura shiir pujustinian wakerak Winí winitniun nakitiakka winia unuiniamur ajaschamniaiti. ²⁷ Ni wakeramurín ajakeak ni krusrj yanakj nemartatsna nu winia unuiniamur ajaschamniaiti.’

²⁸ ‘Jeá yakí jeamtaj tusam wakerakmeka, kuítian urutmak ajapawaintiaj tusam tura urutmajaink’ amukaintiaj tusam emka enentáimsashtatmek. ²⁹ Túrutsuk aya ukura iniaisam amuktin tujinkiamin_kia, nuna wáiniainia nu, wishikiainiak juna tiartatui: ³⁰ “Tiskua. Nu shuar jeamtinian nan_kamamiayi. Túrasha amuktinian tujinkiamiayi.” ’

³¹ ‘Tura uunt kapitían chíkich kapitíanjai mesetan najanatin áchatpiash. Emka, niisha pujus, tias mir (10.000) suntarjai painti mir (20.000) suntar winiana nuna nupetkaintjash tusa enentáimsashtatuak. ³² Tujintiakka, chíkich kapitían jeachat pujaanak, nawamnaikiatai tusa akatar akupkashtatuak. ³³ Wats, “Kristu unuiniamurí ajastinjai, wi takakjana juna warí winia itiurtawa” tu enentáimsatniuitrume. Túrachkurmeka winia unuiniamur ajastin tujinkiarne.’

Wee michumarka yajauchiiti

(Mateu 5.13; Márkus 9.50)

³⁴ ‘Weeka jeaku pénkeraiti. Tura michumarka çitiurak atak pénker ati? ³⁵ Wee michumarka arakmatniunmasha yayaatsui. Tura tsuatnum ikiusmasha ántraiti. Aya ajapatniukete. Kuishim ákuin_kia antuktarum” tímiayi.

15

Jesus murik menkakamu chichaman unuiniamiania nu

(Mateu 18.10-14)

¹ Akupniui kuítrin-juu tura yajauch shuarsha Jesusan anturkatai tusar tarú wearmiayi. ² Tuma asamtai Pariséusha, Israer-shuara jintinni-urjsha Jesusan áujmatainiak “Jusha tunáa shuaran itiaawai tura niijjai yurumáiniawai” tiarmiayi.

³ Nuna tuiniakui Jesus ju métek-taku chichaman jintintiwarmiayi:

⁴“Shuar siaṅ (100) murikiun takuschampiasḥ. Nu siánnumiḡ chikichik meṅkakamtai nuwintia nuíwinkia ni matsatmaríin ikiuak, meṅkaka nuna ti eḡchattawak. Wáintsuk iniaisashtatui. ⁵Tura wáiniak yakainium awaṅkek waras jeṅ wáketui. ⁶Tura jeṅ jeá ni amikrín, írutramuríncha ikiaanak “Wijíai warastarum. Murikiur meṅkaka nuna wáinkiajai” tawai. ⁷Wats, nuwintia nuiwi péṅker shuar akui nayaimpiniam warastin awai. Tura antsu chikichík yajauch shuar ni enentáin yapajíamtainkia, nú naṅkaamas warastin átatui, tájarme’ tímiayi.

Kuit emeṅkakman Jesus unuiniamiania nu

⁸Nuyá chikich enentáimsatai. Nuwa tias kuítian takakna nuna chikichik meṅkakamtai, wáinkiatay tusa jinia ekeemak, jeṅ japimiak émamkes eḡchattawak. ⁹Tura wáiniak ni amikrín, írutramuríncha ikiaanak, “Wijíai warastarum. Kuit meṅkakamia nuna wáinkiajai” tawai. ¹⁰Núnisanṅ yajauch shuar ni enentáin yapajíamtai, Yusa suntariṅ matsatmanum ti warastin awai” tímiayi.

Uchi ni aparíin waketitniun Jesus unuiniamiania nu

¹¹Nuyá Jesus juna unuiniamiayi:

“Áishmanṅ jimiara’ uchin takakuyi. ¹²Tura pátatka uchi ni aparín timiai “Apawá, surustiniaitmena nu yamá surusta.”

“Tutai ni aparí ni kuítrín jímiapetek nakak mai uchin susamai. ¹³Ishichik tsawant naṅkaamasai pátatka uchi ni warirín irur júkí jeachat chikich núnkanam wémai. Nuísha náṅkamas yajauchin túrak kuítrín ashí ajapamai. ¹⁴Ni kuitri ashí amuuka aṅṅ nu nunkanam ti tsuka ámai. Niísha núnisanṅ tsukariṅ wáitsamai. ¹⁵Túmak takatan eḡkajtṅsa nu nunkanmayaṅ apachiṅ werimiai. Nu áishmanṅsha kuchirín wáitrukta tusa akupkamai. ¹⁶Uchi ti tsukamak kuchi ukatramun niísha yuátajtṅsa ti wakerimiai. Túrasha peṅké súcharmai. ¹⁷Tumáa pujus nuíṅkia enentáimpramai. “Winia aparuí takau shuar péṅkeran ti yurumáiniawai. Tura wikia júi tsukaruṅ wáitijai. ¹⁸Wats, aparuí waketitjai. Tura aparun chicharkun “Apawá Yúsjaisha ámijiaisha tunaan túrajai, titijai. ¹⁹Ame uchiram áchamniaitjai yamaikia. Ame takarniurmea áantsanak átaj tusan wakerajai” titijai” tu enentáimsamai. ²⁰Tura wajaki ni aparíin waketikimiai’ tímiayi.

“Tura ni aparísha jeachat winian wáiniak waitnentramai. Aparí tsékenki inkiun miniakak mukunámai. ²¹Nuṅkia uchirísha timiai “Apawá, Yúsjaisha ámijiaisha tunáan túrajai. Ame uchiram áchamniaitjai.”

²²“Túrasha ni aparínkia ni takarniurín chicharuk “Ti peṅker pushí itiarum áentsratarum, timiai. Tura uwejnun aweetaisha aweemtikiatarum. Tura sapatḡa aweemtikiatarum. ²³Túrarum waaka nueram ana nu maatarum. Námpér nájankur shiir enentáimsar yurumámi. ²⁴Warí, jú winia uchir jakaapitia tu enentáimsamjai. Túrasha iwiaakui. Meṅkakama nuna wáinkiajai.” Nuṅkia ti warasarmai’ tímiayi.

²⁵“Tumai iwíai’ úchikia takatnum pujumai. Tura wáketuk, jeá nuntumas jantsemáiniak túntuyiamun antukmai. ²⁶Nuṅkia yaintriṅ matsatun chikichkiniak untsuk “¿Warimpait?” timiai.’

²⁷“Tura nii chichaak “Ame yátsum tayi. Túramtai ame apa waaka nueram maatai tawai, ame yatsum péṅker tau asamtai” timiai.’

²⁸“Tura iwíai’ uchi kajek wayatniun nakitramai.’

“Tuma asamtai ni aparí jiiintiuki “wayata” timiai.’

29 ‘Tura uchisha aparín chicharuk “Wisha ámin umirkun untsurí uwitin ame takatrumin túraitjai. Nu nékame. Túrasha winia amikrujai námper najanatin chiipiuksha penké surichuitme. 30 Tura ju ame uchiram nuwajaj yajauchin túrak ame kuítrumin wasurkania nu támatai, waaka nueram máachumek” timiai.’

31 ‘Takui aparí chicharuk “Uchirú, ámeke wíjjaj tuke pujame. Tura wi takajana nusha ashí áminuiti. 32 Tura ame yatsum jákaiti tu enentáimsamaj nu iwiaakuiti. Menkaka nu yamaikia wáinkiaji. Tuma asantai námper najanar waraschatniukaitiaj” timiai’ tímiayi.

16

Takatan wáinin

1 Ju métek-taku chichamnasha Jesus ni unuiniamu7 ‘Tura nii chichaak “Ame yátsrín unuiniamiayi.

“Kuítrintin áishmañka takatrín wáinniurí ámai. Tura nérenniun ujainiak “Ame wáinniuram ame kuítrumin náñkamas ajapeawai” tiarmai.’

2 ‘Nuna antuk ni wáinniurín untsuk “¿Warinia jusha turamainia? timiai. Yamaikia winia wáinniur áchattame. Tuma asantai winia kuítrujaj itiuirkamea nu iniaktursata” timiai.’

3 ‘Tutai takatan wáinin enentáimsamai. “Maaj, wisha itiuirkatjak, timiai. Nunka táurtinniaasha jeatsjai. “Kuit surusta” tínniaasha natsamajai. 4 Winia takatur atsakui yurumkan ajamprusarat tusan túratajna nuna nekajai” tu enentáimsamai. 5 Nuyá nérenniun tumashmaku armia nuna ankant ankant untsukarmai. Emka tamia nuna chicharuk “¿Winia úuntur urutma tumashmakuitiam?” timiai.’

6 ‘Niisha ámiuk “Asuitin siañ taru tumashiitjai” timiai.’

‘Tutai takata wáinin chicharuk “Pai. Papinium tumashrum ana nu juá: wárikmasmek pujusam, nu papí jaakam, chíkich papinium aya senkuentachik aarta” timiai.’

7 ‘Nuyá chíkich tumashmaku támatai “¿Amesha urutmá tumashiitiam?” timiai.’

‘Tutai nii chichaak “Shana siañ taru tumashiitjai” timiai.’

‘Tutai “Pai. Papinium tumashrum ana nu júiti. Chíkich papinium aya uchentak aarta” timiai.’

8 ‘Nuyá takata wáinniu uuntri nuna nekáa “Nii yajauch túriniatit imiá enentáimniuiti” timiai’ tímiayi.

Nuyá Jesus tímiayi ‘Yus-shuarjaj nankaamas Yus-shuaracha aijjaj ni túratniuriniak takainiak imiá enentáimkia ániawai.’

9 ‘Ju nunkanam anankatin átsuk. Tura kuitsha aya ju nunkanmayankete. Tuma asantai atumsha kuitrumjaj “shuaran yaintaj” tu enentáimsatarum. Kuitjaj yaintin amuukamtai atumsha amuicha jeanam ipiaamu átaj tusarum túratarum.”

10 ‘Shuar ishichik takakna nujaj péñker túrakka, núkap takakna nujajsha péñker túrattawai. Tura ishichik takakna nujaj péñker túrachkunka, núkap takakna nujajsha péñker túrashtatui. 11 Tuma asantai ju nunkanmaya anankartin kuitjaj péñker túrachkurmeka, tuke átin ana nujaj takastincha ¿itiur takastarumek? 12 Takakme nuna Yus ikiatmasuiti. Nujaj péñker túrachkurminkia, atumnia átinia nuna ¿itiurak suramsat?’

13 ‘Takarniurj jimiara úuntrintin ajastinin tujintiawai. Warí, chíkich-naka aneak chíkichnaka nakitrashta túrattawai. Turya senkuentachik

aarta” timiaituak. Chikichan umiruk chikichnaka umirkashtatui. Yussa kuitcha mái-metek enentámtuschamniaitume” timiayi Jesus.

¹⁴ Paríséusha kuítian anen armia nu, ashí ni táman antukar Jesusan wishikrarmiayi. ¹⁵ Túmakui Jesus nin timiayi “Atumsha aents ímmianum péñker awajmamprume. Túrasha atumí enentáincha Yus péñker nékawai. Kame winia “nan̄kaamantuiti” turutit tusa wakera nuna Yuska nakiti-awai.’

Yaunchu etserkamu, yamá etserkamu

¹⁶ Juan étsertsain Muisáis aar akupkamia nunasha tura Yúsnan etserin ununiarmia nunasha antuktin ármiayi. Tura yamaisha tímianiaj ti shiir chicham awai. Yus akupeana nuj urukukit nuka paant etserkamuiti. Tura ashí shuar nuj pachinkiatatj tusar ni kakarmarjijain ti takaini-awai.’

¹⁷ “Túrasha yaunchu akupkamu ashí chicham uminkiatniuiti. Nu chicham uminkiashtinkia nayaimpisha nun̄kasha amukatniujaj nan̄kaamas iturchataiti.’ *

¹⁸ ‘Áishman nuarín ajapa chikichan nuátkun̄ka tsanirmawai. Tura nuwa ajapamu niiniurtakka nusha núnisan̄ tsanirmawai.’

Kuítrintin áishman Rásarujaí

¹⁹ ‘Áishman kuítrintin ámai. Niisha imiá shiir pushin ti kuit ainia nujaj iwiarmamniuyi. Tura tuke tsawant yurumak ti kuit amia nujaj namperan najanniuyi. ²⁰ Tura kuítrincha ámai ni naarj Rásaru. Niisha kuchapruku tunamaruyi. Tuke tsawant kuítrinniu wáitirijn pujuyi. ²¹ Ti tsukamak kuítrinniu misariniā kakekan yuattsa wakerimiai. Tura yawasha ni kuchaprjn nukatiarmai. ²² Kuítrincha jakamai. Jakamtai jaka shiir pujutainium, Apraám pujumia nuj nayaimpinmaya suntar júkiarmai. Kuítrinniusha jakamai. Jakamtai iwiarsarmai. ²³ Jaka pujutainium wáitias pujus, pañkái ímias, Rásarun Apraámjaj pujuinian wáinkiamai. ²⁴ Wáiniak untsukum “Apawá Apraamá wáitnentrurta, timiai. Rásaruka tsara uwejejaj entsan uchupir winia iniairun imichturat akup-turkata. Wisha juj jinium pujusan ti waitiajai” timiai.’

²⁵ ‘Tutai Apraám timiai “Uchirú enentáimpratá. Ame nun̄ká iwiaaku pujusam ti shiir pujumame. Antsu Rásaruka nuj ti yajauch pujumai. Tura niisha yamaikia juj áyamui tura ámeke wáitiame. ²⁶ Tura nú arant nánata ti uunt awai. Tuma asamtai juyá aj wétinian wakeruiniayat tujintiaini-awai. Tura aiyaj juj tátinian wakeruinia nusha tujintiainiawai.’

²⁷ ‘Nuñkia kuítrintin timiai “Nuñkia apawá Apraamá, juna seajme. Winia aparú jeen Rasaru akupturkata. ²⁸ Nuñsha winia yatsur sen̄ku matsatainiawai. Niisha ju wáitsatniunam tácharat tusa ujákartí, tájame” timiai.’

²⁹ ‘Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.”’

³⁰ ‘Tutai kuítrintin áimkiamai “Túrasha apawa Apraamá, antsu jakamun-maya nantaki, shuar we ujakam enentáin yapajjáwarainti.”’

³¹ ‘Tura Apraám timiai “Muisáis áarman tura Yúsnan etserin áarman anturainiachkun̄ka jaka nantaki we ujakmasha antukchartatui” timiai.” Tu áujmatsamiayi Jesus.

* **16:17** Mateu 19.1 ya sen̄kuentachik aarta” timiai-12; Márkus 10.1-12

17

Yajauch túrumtikiatin ti tsúumainti
(Mateu 18.6-7, 21-22; Márkus 9.42)

¹ Jesus ni unuiniamurĭn ĵuna tímiayi, “Aentsun yajauchin túrumtikiattana nu tuke átatui. Tura shuar ni aĭn tunaan wakerumtikna nu aneartí. ² Ju shuar uchich ainia nuna yajauchinium túrumtikna nuna Yus imiá asutiáttawai. Tuma asamtai nuna túratsaĭn uunt kayajai kuntujnum ĵinĵiá nayaantsanam ajunkam maak ainti. ³ Túrasha atumek ímiastarum. Ame yatsum ámin tunáa túrutmamtaĭnkia chicharkata; tura niisha “tsaĭnkurturta” túramkuĭnkia tsaĭnkurata. ⁴ Chikichik tsawantiniĭn siati túrutmamtai, tura “tsaĭnkurturta, atakka túrashtatjai,” siati túramkuĭnkia, tuke tsaĭnkurata.”

Yus nekas enentáimtakrikia tujinkiashtatji

⁵ Jesusa unuiniamurĭ Nin chicharuk “Yus enentáimtajnia nú naĭkaamas enentáimtustin yáinmaktá” tiarmiayi.

⁶ Tutai Jesus tímiayi “Mustasa ĵinĵiá ti ishitiúpchich ana núnisan ishichkisha Yus enentáimtaiktiurmeka, sikiumuru numi wajana nu, “Wajamurmĭyaĭnka ukuiniakam nayaantsanam wajasta” tákurmin nú numi umirtamkainti.”

Yusa takatri takasar “ti penker túraitji” tíchatnuiitji

⁷ ‘Atumí takarniurĭ arakmasua amik, waakancha iis támatai, ĵnú chichamaik amesha, “Winitíá, yurumáitiá” tíintmek? ⁸ Atsá. Antsu, “yurumak iwiarturata. Wi yurumátin tura umartincha surusminiam iwiarnarta. Nuyá ame yurumátá.” Nu tíchaintmek. ⁹ Nii túratin ana nunak túratsuk. Tuma asamtai yumĭnsashtatme. ¹⁰ Atumsha núnisrumek Yus túramna nu ashí umikiam “ti penker túraitjai” tíchatnuiitme. Antsu “aya ĭi túratniurĭ ana nuke tura asar iikia ántraitji” títiniaitme.” Tu tímiayi Jesus.

Tias áishmanĭkan tunamarun Jesus tsuárarmiania nu

¹¹ Jesus Jerusaréĭnum wesa Kariréa nuĭnka ikiuki Samaria nuĭnkanam naĭkaamakmiayi. ¹² Tura péprunam jeamtai, tias áishmanĭ ripra suĭnkurjai tunamaru armia nu, arant wajasarmiayi. ¹³ Tura unsumainiak “Uunt Jesusá, waitnenturta” tiarmiayi.

¹⁴ Jesus nin wáiniak, “Pátriĭ werirum iniaktumastarum” tímiayi.

Tura wésar péĭnker ajasarmiayi. ¹⁵ Nuyá chikichik ni tsuamarman nekáa kakantar chichaki Yusa náarĭn uunt awajki waketki Jesusan tarim-iaiyi. ¹⁶ Yumĭnsataj tusa Jesusan tikishmatar piniakumar tepesmiayi. Nu áishmanĭka Samarimanmayauyayi.

¹⁷ Nuna wáiniak Jesus tímiayi “Tsuámaru tiáschakait. ĵChíkich nuiwisha tui pujuinia? ¹⁸ ĵJu yajaya áishmanĭ níĭnkik Yusa naarĭ uunt awajsataj tusa waketki tai?” ¹⁹ Nuyá áishmanĭkan tímiayi, “Winia nekas enentáimtursa asam péĭnker ajasume. Wajakim shiir weta” tímiayi Jesus.

ĵYusa akupeamurĭ urutaik ati?

(Mateu 24.23-28, 36-41)

²⁰ Pariséu aents Jesusan aníak “ĵYusa akupeamurĭ urutaik ati?” tiarmiayi.

Tutai Jesus tímiayi, “Yusa akupeamurĭ paant wáinkiachminiaiti. “Yamaí naĭkamnayi” tichamniaiti. ²¹ “ĵJu awai, nuĭsha awai” tíchamniaiti. Warí, Yusa akupeamurĭnkia atumĭin pujawai” tímiayi.

22 Nuyá ni unuiniamurin chicharuk juna tímiayi: “Tsawant jeatawai atumsha Winia Aents Ajasu tutain “aya chikichik tsawantkesha Nii wáinkiarkea mak” turuttiatrume. Túrasha tujinkiatarme. 23 Aents Ajasu tutai “juj pujawai, nuisha pujawai” tuíniakui weriirap. Tana nu nemariirap. 24 Wi, Aents Ajasuitjiana nu tátinian tsawantur jeamtai paant wáitkiattarme. Peem péetuk ashí nayaimpin tsáapnin awajna núnisañ wi taamu paant átatui. 25 Tura nu túrunsañ yamai pujuinia nu Winia nakitruiniakui ti wáitsatniuitjai. 26 Winia atak tátiniur jeamtai, yaunchu Nuái pujumia nú tsawantin túrunamia núnisañ túrunattawai. 27 Yurumáwarmiayi, umararmiayi, nuatnaikiarmiayi, ni nawantri nuatnakat tusa surukarmiayi. Tumáa pujuiniáj Nuái uunt kanunam enkemprantai, amarak nu aentsnasha mash amuukarmiayi. 28 Tura Sutuma péprunmasha Rauta írutramurisha núnisañ Yusa asutiátniuri enentáimtutuk pujuarmiayi. Yurumáwarmiayi, umararmiayi, sumakarmiayi, surukarmiayi, ajancha ajarmarmiayi, jeancha jeammarmiayi. 29 Tura Raut Sutuma péprunmaya jinkimtai asupri tutai kaya keek yútana ántsañ nayaimpinmaya kakeetuk nu áentsun mash máawarmiayi. 30 Núnisañ winia atak tátiniur jeamtai enentáimtsuk pujusartatui.”

31 “Nu tsawant jeamtai jea yakiini pujana nú shuar ni waririn achik-taj tusa akaikishti. Jeá wayashti. Tura kampunniunam wekaana nú shuar ni jeen waketskishti. 32 Rauta nuarí túrunamu enentáimpratarum. 33 Aya ju nunkanmaysañ enentáimias “iwiaaku átaj” tana nu ni iwiaakmarin emenkáktatui. Tura ju nunkanam ni iwiaakmarin emenkana nu nekas iwiaakma ana nuna wáinkiatawai. 34 Paant tájarme. Nú káshitin jimiará áishman nuu peaknuman kanúu tepeartatui. Chikichik junaktiatui, chikichkia ikiunkittiwai. 35 Jimiará nuwá mái-metek nekée pujuartatui. Chikichik junaktiatui, chikichkia ikiunkittiwai. 36 Jimiará áishman kampuniunam wekainiartatui. Chikichik junaktiatui, chikichkia ikiunkittiwai.” Tu tímiayi.

37 Nuna antukar “Uunta ¿tuj túrunatta?” tiarmiayi.

Tutai ni chichaak “Jaka tepana nuj chuan káutkartatui.”

18

Shuar yawetsuk Yúsan tuke áujsatniuiti

1 Shuar yawetsuk Yúsan tuke áujsatniua nuna ununiartaj tusa Jesus ju métek-taku chichaman tímiayi:

2 “Chíkich péprunam shuaran akupin amai. Nú áishman Yúsnasha ashamchaui; shuárnasha péñker enentáimtichuyi. 3 Tura nú péprunam waje amai. Niisha shuáran akupniun chicharuk “Áishman winia yajauch awajtusmania nu írtusta” tusa tuke waketrú pujuyi. 4 Yámankamtaikkia nin anturkatniun nakitmiái. Tura ukunam enentáimias “Wisha Yúsan ashamachiatnak shuárnasha péñker enentáimtichuiatnak ju waje tana nuna túrattajai. 5 Warí niisha tuke taa itit awajtatsuk. Tuma asamtai nin kajerkañ tusan wárik túrattajai” timiai” tímiayi.

6 Nuyá uunt Jesus tímiayi “Shuaran akupin yajauchiitiat nuna timiai. 7 Tura Yus ti péñker asa, ni achikmarin tsawajsha, káshisha untsuamka nú nankaamas anturkashtuak. ¿Yáitsuk menkakatuak? 8 Atsá, wárik yáinkiatatui, tájarme. Tura Wi Aents Ajasuitjiana ju atak támatái, ¿shuaran tuke Winia nekas enentáimturainia nuna wáinkiatjash?” tímiayi Jesus.

Pariséusha, kuítian-juuncha Yúsan áujsarmia nu

⁹ “Pénkeraitjai” tu enentáimtumainiak chikichnaka yajauch enentáimtiarmia nuna Jesus nekapmá chichasmiayi. Juna tímiayi:

¹⁰ “Jimiará áishman Yusa Uunt Jeen Yus áujsatai tusar wearmai. Chíkichkia Pariséuuyi, chíkichkia kuítian-juuyi. ¹¹ Pariséusha wajaki Yúsan áujuk júnis tímiayi: “Yusrú, chíkich áishman kasa, yajauch, tsanirmau ainia nujai métekcha asan yuminsajme. Tura ju kuítian-juu wajana jújaisha métekchaitjai. ¹² Warí, Ame akupkamna nuna iniankasan wisha chikichik semanatinin jimiará tsawant ijiarman áujeajai; tura wi achiajna nuna tiásnumiá chikichkiniak Yúsnaiti tusan akankan súajai.” Tu tímiayi.’

¹³ “Tura kuítian-juusha arant wajas, nayaimpinmaanĭ pankái ĭmsatniunkesha natsaamak, tsunsuma, ni netsepen awatí “Yusá, ti tunaitjai. Waitnétrurtá” tímiayi.’

¹⁴ “Wats tájarne, nu kuítian-juu shuar Yus ĭmmianum ni enentái péñker awajnas ni jeen waketkimiai. Tura Pariséuka tamia núnisaj waketkimiai. Nekaatarum. Shuar nankaamantu enentáimtumana nuka péejchach awaj-nastatui. Tura antsu péejchach enentáimtumana nu, nankaamantu awaj-nastatui” tímiayi Jesus.

Uchisha Jesusna áminiaiti

(Mateu 19.13-15; Márkus 10.13-16)

¹⁵ Jesus antinĭkiarat tusar uchin itiararmiayi. Tura Jesusa unuiniamurĭsha nuna wáinkiar suritkiarmiayi. ¹⁶ Tura Jesus nin untsukar tímiayi “Uchi Winí winitin tsanĭkamkatarum, surimĭkiarap. Enentáimsatarum. Uchichia áintsan enentáimtumana nú shuárak Yus ni enentáin akupin ajasminiaiti. ¹⁷ Uchi ni úuntrĭn umira núnisaj shuar Yúsan umíachkunka Yus ni enentáin akupin ajaschamniaiti.” Tu tímiayi Jesus.

Kuítrintin áishman Jesusjai áujmatsamiania nu

(Mateu 19.16-30; Márkus 10.17-31)

¹⁸ Shuara uuntriĭ Jesusan tarí áujsamiayi. “Uuntá, amesha péñkeraitme. Tuma asam, turuttia, ĭwarinia túrakna tuke iwiaaku átataj?” tímiayi.

¹⁹ Tutai Jesus, “ĭUrukamtia Winia, péñkeraitme, túrutam? Aents péñkerka atsawai. Aya Yusak péñkeraiti. ²⁰ Tura Yus akupkamu ana nu péñker nékame. Tsanirmawairap, mankartuawairap, kasamkairap, tsanumprurairap, ame apasha, nukusha shiir enentáimtustarum. Nusha nékame” tímiayi.

²¹ Tutai áishman tímiayi “Uuntá, úchichik mash umiki tsakaruitjai.”

²² Jesus nuna antuk “Chikichik taatramsai, tímiayi. Ame takakmena nu ashí surukam kuítrincha ainia nu susarta. Nuĭnĭkia nayaimpiniam kuítrum átatui. Túram nemartustaj tusam winitia.”

²³ Tura nuna antuk, nu áishman ti kuítrintin asa ti kuntuts enentáimpramiayi. ²⁴ Tura kúntuts enentáimprantai Jesus nuna nekáa “Kuítrintin ainia nu Yus akupeamunam pachĭinĭkiatin ti iturchataiti, tímiayi. ²⁵ Kamiriuka, uunt ana nu, auja jĭin wayatin iturchataiti. Tura shuar kuítrin ti enentáimtana nu Yus akupeamunam pachĭinĭkiatin nú nankaamas iturchataiti.” Tu tímiayi.

²⁶ Tura nuna antukarmia nu tiarmiayi “ĭNuĭnĭkia yaki uwempramni-ait?”

²⁷ Tutai Jesus tímiayi “Aents tujintiaiania nuna Yuska páchitsuk túramniaiti.”

²⁸ Nuyá Pítiur Nin chicharuk tímiayi “Uuntá, iikia Ámin nemarsataj tusar ii takakmaaka ikiukji.”

²⁹⁻³⁰ Tutai Jesus tímiayi “Shuar Yus akupeana nuna túrataj tusa ni jeen ikiuakka tura núnisan ni aparíncha, nukuríncha, yachínkisha, nuwenkesha, uchirínkisha ikiuakka ju nuñkanmasha núkap wáinkiatstawai nu shuar. Tura tuke iwiaaku pujustinniasha wáinkiatstawai.”

Ataksha ni jákatniurin Jesus ujakmiania nu

(Mateu 20.17-19; Márkus 10.32-34)

³¹ Jesus ni tuse unuiniamurin akanki ikiaanak juna tímiayi:

“Jerusarénnum jeatemaji. Juisha Jerusarénnum Winia, Aents Ajasu tutain, túrunatniurun Yúsnan etserin yaunchu áatrurarmia nu uminkiatstawai. ³² Apachnium surutkartatui. Túrawar wishikrurar, katsekrukar usukruawartatui. ³³ Awatiar mantuáwartatui. Túramaitatnak menaintiú tsawantaj nantaktiatjai” tímiayi.

³⁴ Tura Nii tímiania nuna nekas túrunattawai, tícharmiayi. Wariniak ta tusar nekaacharmiayi.

Jirikiúnmaya áishmankan Jesus ímtikmiania nu

(Mateu 20.29-34; Márkus 10.46-52)

³⁵ Jesus Jirikiú péprunam nuntumsaj, nuj áishman jii kusuru, kuítian surusarat tusa jintiá pujumiayi. ³⁶ Untsurí aents nankaamainian antuk “¿warínkit?” tímiayi.

³⁷ Tutai, “Nasarénumia Jesus nankaamawai” tiarmiayi.

³⁸ Kusurusha nuna antuk untsukum “Jesusá, Uunt Kapitián Tawit weeachukaitiam. Tátiniuya núchakaitiam. Winiaja waitnentrurta” tímiayi.

³⁹ Eemak wearmiania nu chicharainiak “takamatsata” tiarmiayi.

Tutaisha nú arant untsukum “Tawit weeachukaitiam; winiaja waitnentrurta” tímiayi.

⁴⁰ Nuñkia Jesus wajas “itiatarum” tímiayi. Tura nii támatai, ⁴¹ “¿Warí itiurtukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

⁴² Tutai Jesus chichaak “Ímtia. Winia nekas enentáimtursa asam péñker ajasume” tímiayi.

⁴³ Nu chichamaik kusuru ímmiayi. Tura Yusa naarj uunt awajki Jesusan nemarmiayi. Tura ashí aents nuna wáinkiarimia nusha Yusa náarjin uunt awajarmiayi.

19

Sakíu Jesusjai

¹ Nuyá Jirikiú péprunam wayá nuj wekaikini ajamiayi. ² Nu j kuítrintin áishman ni naarj Sakíu pujumiayi. Nu Sakíu kuítian-juu úntriyayi. ³ Aents ti káunkámtai, Sakíu ti sútarach asa, Jesusan ístaj tukamá tujinkiamiayi. ⁴ Tuma asa Jesus nuke nankaamaktin asamtai, eemki tsékiniki sikiumuru numi wajamunam wakamiayi iistaj tusa. ⁵ Jesus nuj nankaamak panjá ímias chicharuk “Sakíu wárik akáikitiá. Ame jeemjin yamá kanartiniaitjai” tímiayi.

⁶ Tutai Sakíusha wárik akaiki, shiir enentáimias Jesusan itiaamiayi.

⁷ Ashí aents nuna wáinkiar “Maaj, Jesus tunáa áishmanka jeen pujawai” tusa mai tunaim ajarmiayi.

8 Nuyá Sakíu wajaki Jesusan chicharuk “Íistá Uuntá, wi takakjana juna jímiapetek nakakan kuítríncha ainia nuna susartatjai. Tura wáitruan chikichan kasarkaitkiuncha menaintiu patatsan awainkittiajai” tímiayi.

9 Tutai Jesus tímiayi “Ju áishman Apraáma shuárintiat yamá niisha níniujai uwempira asa nekas Apraáma shuarj ajasuiti. ¹⁰ Wisha Aents Ajasu asan menkakarú ainia nuna eakan uwemtikrartaj tusan táwitjai.” Tu tímiayi.

Kuítian nekapmá chichasmiayi

¹¹ Nu aents Jesusan anturkarmia nu “Jerusarénum jeawakrin Nii, Yus anaikiamu asa, wárik akupin ajastatui” tu enentáimsarmiayi. Tuma asantai wésar Jerusarénum nuntumsaraj, nuna enentáimsaráin tusa Jesus juna métek-takun chichasmiayi:

¹² “Áishman penkerj amai. Nu áishmansha jeachat chikich núnkanam kapitían náamkan tátaj tusa wemai. ¹³ Tura wétsuk ni takarniurin tias armia nuna untsukarmai. Tura ankant ankant kuit kurijiai nankaamas péker armia nuna suíniak “Ju kuitjai wi táatsain takakmá ajatarum” timiai.’

¹⁴ “Tura ni nunkénia shuarka nakitiarmai. Túmainiak “nu áishman ii kapitíantri ajasain túsar nakitiaji” nu titiá túsar áishman kan akatrar akuptukarmai.’

¹⁵ “Tuma ain kapitían náamak ni nunkén wakетки tamai. Taa “winia kuítrujai warí túrarum” titiaj tusa ni takarniurin kuitia súsarmia nuna untsukarmai.’

¹⁶ “Ni takarniurj emka chikichik taa “ame kuítrumjai takakmasan tias patasan achikmajai” timiai.’

¹⁷ “Tutai kapitían chichaak “Pénker túrame. Ishichik susamjamna nújainkⁱ wi tímiajna tímiatrusmek túrame. Tuma asakmin tias péprun akupin awajsattajme” timiai.’

¹⁸ “Chikich taa “Íistá Uuntá, ame kuítrumjai takakmasan senku patasan achikjai” timiai.’

¹⁹ “Nunasha chicharuk “Amincha senku péprun akupin awajsattajme” timiai.’

²⁰ “Nuyá chikich taa “Uuntá, ame kuítrumin paniiijai ijian ikiusmajai.

²¹ “Amesha kakaram chichau asakmin, ikiuschiatam achin asakmin tura arakmachiatam juu asakmin ashankamjame” timiai.’

²² “Tutai kapitían timiai “Maaj, amesha ti yajauchiitme. Ame támena nuke makurmawai. Wi kakaram chichau aisha, ikiuschiatan achin aisha tura araknasha arakmachiatan juu aisha, ²³ nuiñkia çurukam-tia kuit-ikiutainiam ikiuschamam? Nuiñkia wi atak táakun patasan achikiaajna” timiai. ²⁴ Tura nuj wajarmia nuna chicharuk “Kuítian takakmarj juruktiarum; túrarum tias takakna nú shuar susatarum” timiai.’

²⁵ “Tura niisha chichainiak “túrasha Uuntá, tias takakja” tiarmai.’

²⁶ “Tutai kapitían chichaak “Takakna nujai takaakuñkia patatnastatui tájame. Tura takakna nujai takaachkuñkia ishichik takakkuisha jurunkittiwai. ²⁷ Tura winia nemasur kapitían ajasain túsar nakitru-rarmania nu itiatarum. Tura wisha íimain máatárum” timiai.” Tu tímiayi Jesus.

Jerusarénum Jesus wayamiayi

(Mateu 21.1-11; Márkus 11.1-11; Juan 12.12-19)

28 Nuna tuasua amik Jesus Jerusarénumaaní wémiayi. 29 Petpajái pepuru tura Petania péprusha Uriwiu náinnium tíjiuchi; nuí jeastatuk ajatemas ni unuiniamurín jímiarán chicharuk, 30 “Tíjiuch péprunam wetarum. Túrarum nuí umpuuruch ekemtukchamu jiníkiamu waja wáinkiatarme. Nu atíarum itíatarum. 31 Tura “¿urukamtai atíarum?” tura-mainiakuisha, “ii uuntri wakerawai” títiarum” tímiayi.

32 Tutai unuiniamurí wear, Jesus timia ímiatrusan wáinkiarimiayi 33 Tura umpuuruchin atíakui nérentin chichainiak “¿Urukamtai umpuuruchsha atíarum?” tiarmiayi.

34 Tutai unuiniamusha “Ii uuntri wakerawai” tiarmiayi.

35 Tura umpuuruchin Jesusan itíariarmiayi. Túrawar ni pushirín umpuuruchiniam awantkar Jesusan ekenkarmiayi. 36 Tura Jesus wétinnium ni pushirín jintianam ayaparar áintrarmiayi. 37 Tura Uriwiu naint awankénamunam tíjiuch ajasarmatai untsurí aents Jesusan nemari-armia nu warainiak kakantar untsumainiak aents tujintiamun untsurí túran wáinkiaru ásar Yusa náarín uunt awajsarmiayi. 38 “Yusa náarín winiana ju ii uunt Akupniuiti. Nincha Yus shiir awajsati. Nayaimpiniam pujuinia nu shiir enentáimsar Yusa náarín uunt awajsarti” tiarmiayi.

39 Tura Pariséu aents nuí páchitra pujuarmia nu Jesusan chicharainiak “Uuntá, nemartamainia nu “takamatsata” tiarta” tiarmiayi.

40 Tutai Jesus tímiayi “Nuínkia ju takamatsarmataínkia, kayasha untsumkarainti. Nuna paant tájarne” tímiayi. 41 Jerusarénum tíjiuch ajatemas péprun wáiniak útuk júnis tímiayi: 42 “Jerusarénumia shuártiram, ju tsawantinkesha shiir pujustintrum nekaarmeka maak. Túrasha yamaikia nekaatin nankaamasai. 43 Kame ti itíurchat tsawant jeartamtatrome. Atumí nemasri nunkejai aa-tanishan tanishmarar téntatramkattarme. Mesetan najatramattarme, tura áatusha junisha mash árenmaktatrome. 44 Túrutma nunká ajunmartatrome. Tura atumijn pujuinia nuna máawartatui. Tura ashí emesrarmatai ishichkisha kaya irumpramusha penké atsuttawai. Wi Yusa anaikiamurín tarijrumna nu nekaachu asakrumin túrutmattarme.” Tu tímiayi.

*Yusa Uunt Jeen suruktinian Jesus surimkiamiania nu
(Mateu 21.12-17; Márkus 11.15-19; Juan 2.13-22)*

45 Nuyá Jesus Yusa Uunt Jeen wayá suruktasa pujuarmia nuna sumak-tasa pujuarmia nunasha jiki awemarmiayi. 46 Túrak juna tímiayi:

“Yús-Papinium yaunchu aarma awai: “Winia jearka Yus áujsatín jeaiti” tu áarmaiti. Túrasha átumka kasáa matsamtaiya nútikiarme” tímiayi.

47 Tuke tsawantin Yusa Uunt Jeen Jesus uwempratin chichaman un-uiniak pujai Israer-patri úntrisha, Israer-shuara jintinniurisha, tura pepuru úntrisha, itíur máamniakit tusar ti enentáimsarmiayi. 48 Túrasha ashí aents émamkes anturainiakui máatniun tujinkiarimiayi.

20

*Yusa kakarmarijai Jesus takasmiania nu
(Mateu 21.23-27; Márkus 11.27-33)*

1 Yusa Uunt Jeen Jesus uwempratin chichaman unuiniak pujai Israer-patri úntrisha, Israer-shuara jintinniurisha, Israer-shuara úntrisha táarmiayi. 2 Taar Jesusan chicharainiak “¿Yana chichamejai ju túram? ¿Ya ju túratniuncha akuptamkait?” tiarmiayi.

³ Tutai Jesus tímiayi “Wisha aniaštajrum tusan wakerajrume. ⁴ ¿Ya Juánnasha imiakrattia tusa akupkamia? ¿Yusak? ¿Aentsuk? Turuttiarum” tímiayi.

⁵ Tútaisha niisha nuamtak warintiajik mai tunai ajarmiyai. “Yus akupkai” tákurniñkia, “¿urukamtai enentáimtuscharum?” turamtatji. ⁶ Túrasha “aents akupkai” tákurnisha ashí aents kayajai tukurmar mantamattaji. Warí “Juan Yúsnan etserniuiti” tuñiatsuk” tiarmiayi. ⁷ Nuñkia Jesusan áiniak “Iisha nékatsji, Juan imiakratinnisha yátsuk akupkamia” tiarmiayi.

⁸ Tutai Jesus tímiayi “Wisha núnisnak winia akuptukua nuna tíchattajrume” tímiayi.

Pénker-takachu armia nu
(Mateu 21.33-44; Márkus 12.1-11)

⁹ Nuyá Jesus ju métek-taku chichamjai aentsun jintintiamiayi:

“Áishman niajariñ uwa araa amuk, shuaran takartusti tusa ikiukmiai. Tura niñkia wau táchataj tusa jeachat wémai. ¹⁰ Tura júuktin tsawant jeamtai juukman akanak jurumkit tusa takarniurñ takau shuariñ akuptukmai. Tura takarniurñcha katsumkar áyatik awañkiarmai. ¹¹ Nuyá nérentin chíkich takarniurñ akupkamai; tura nunasha núnisan katsekkar, awatiar, sútsuk akupkarmai. ¹² Nuyá ataksha chikichan akupkamai. Tura nunasha takau shuar katsumkar akupkarmai.’

¹³ ‘Nuyá ukunam ajá nérenniurí “Itiurkatjak, timiai. Winia aneamu uchirun akupkattajai. Nin wáinkiar shiir enentáimtuschartimpiash” timiai.’

¹⁴ ‘Túrasha takau shuar nuna wáinkiar, nuamtak chichainiak “Juka ajá nérenniurí ajastatui. Maatai. Nuikia aja iiniu átatui” tiarmai. ¹⁵ Nuna tuñiak ajanmaya jiki máawarmai.’

Nuyá Jesus aniasmiayi ‘Wats ¿warí enentáimsarum, ajá nérenniurí itiurkattawa? ¹⁶ Niisha taa, nu takau shuáran máawartatui. Tura núñkanka chikichan susattawai” tímiayi.

Nuna anturkar “Yus núnaka tsankatkashti” tiarmiayi.

¹⁷ Tura Jesus nin émamkes íisar tímiayi “¿Nuikia Yus-Papinium áarma nu warintia? Ju áarmaiti:

Kayan pénkernak jea jamin “yajauchiiti” tusar ajapawarmia nu ashí kayajai nankaamas pénker apujsamuiti. ¹⁸ Nu kayan tukumainia nuka kupintrattawai. Tura nu kaya shuarnum iniarka nu shuaran tsai tsai awajsattawai. Tu áarmaiti.

Pariséu achiktai tusar wakermiania nu
(Mateu 21.45-46; 22.15-22; Márkus 12.12-17)

¹⁹ Israer-patri uuntri tura Israer-shuara jintinniurjsha “nu métek-taku chichamjai in túramji” tu nekaawar nuikí Jesusan achikiar emetatai tusar wakermiayi. Tura untsurí shuar Jesusan wakermiayi, ashamainiak túracharmiyai. ²⁰ Tura Kapitiánnium suruktai tusar wakermiayi mamikmau shuaran Jesusan akuptukarmiyai. Nu shuar pénker shuara núnisan jeari; Jesus nékatsuk yajauch chichakat tusar; aniaštaj tusar wearmiayi. Ni chichakmarijiai uuntnum suruktai tusar túrawarmiyai. ²¹ Tu enentáimsar tiarmiayi “Uuntá, ame tuke nekas chichan chichaame, nu nékaji. Aents pátatek íiyatsme, antsu nekas Yusa jinti jintintiami. ²² Wats turuttia, ¿Rúmanmaya uunt akupin ii kuitri akiktin

pénkerkait? ¿Akiktinkiait? ¿Suritkiatniukait? Nu nekaatai tusar wakeraji” tiarmiayi.

²³ Tura Jesuska ni yajauch enentáimsamurin nekáa chicharainiak, ²⁴ “Kuit itiatarum. ¿Yana yapi tura yana naari jui áarmait?” tímiayi.

Tutai nii tiarmiayi “uunt akupniunu.”

²⁵ Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

²⁶ Aents ántamunam ni chichakmarjjai achiktinian penké tujinkiarmai. Antsu aya ímprarmiayi tura takamtak pujusarmiayi.

*Satusésha achiktai tusar wakeriarmiania nu
(Mateu 22.23-33; Márkus 12.18-27)*

²⁷ Nuyá Satuséu “jakamunmaya penké nantakchamniaiti” tuinia nu, Jesusan aniastai tusar tariarmiayi. ²⁸ Aniiniak tiarmiayi “Uuntá, Muisáis juna áartampramiai: “Áishman ni nuari júreatsain jakamtainkia ni yachi nu wajen nuátkati, yachin yajutmatratsa.” Tu áarmaiti, tiarmiayi. ²⁹ Wats, siati yachi ármái, tiarmiayi. Iwiairi nuwan nuatak yajutmatsuk jakamai. ³⁰ Ni yachi wajen akintiak, nuátak, niisha yajutmatsuk jakamai. ³¹ Nuna yachisha núnisan nu wajen nuátkamai; tura núnisan ashí siati nuna pataink’ nuátkarmái. Yajutmatsuk yajutmatsuk kajinkiarmai. ³² Tura ukunam nuwasha jakamai. ³³ Nantaktin tsawantai, nantakiarmatai, ¿yana nuarin’ ati? Ashí siati nuátkacharmaka” tiarmiayi.

³⁴ Tutai Jesus tímiayi “Ju nunkanman nuatnaikiatin awai. ³⁵ Tura nantakiar atak iwiaaku ámin ainia nuka nuatnaikiachartatui. ³⁶ Warí, jákashtin áiniatsuk. Nayaimpinmaya suntara áintsan ajasartatui. Tura nantakiaru ásar Yusa uchiri ajasartatui. ³⁷ Tura jákaru nantakiartin ainia nuna imia Muisáis jintíamiayi. Warí, numichiniam ji waiái keamanan Yus niijjai chichaamun, Yus-Papinium Muisaiska áarmiayi. Nú áarmanun Uunt Yús Apráama, Isaka tura Jakupu Yúsrinti, tímiayi. Nú áishman yaunchu jákaru ain “ni Yúsrinti” tímiayi. Nuna taku nantaktin awai tu jintíamiayi. ³⁸ Kame jaka menkakatniunam pujuinia nuna Yúsrinchuiti. Tuma asamtai jakáa Yúsrinti tíchamniaiti. Antsu iwiaaku ainia nuna Yúsrinti. Ashi Niiniun iwiaarkainiawai” tímiayi.

³⁹ Nuna antukar Israer-shuara jintinniuri “pénker tame, Uuntá” tiarmiayi.

⁴⁰ Tura nuyánka aniastinian arantukarmiayi.

*¿Kristu tutai yana uchirimpiait?
(Mateu 22.41-46; Márkus 12.35-37)*

⁴¹ Nuyá Jesus tímiayi “Yus anaikiamu Kristu tutaisha, ¿itiura “Aya Tawit weeaiti” tárúm? ⁴² Warí, Sarmu papinium Tawit nin’ki juna tátsuk:

“Uunt winia Úuntron “Akupin pujutainium Winia untsuuruini pujustá, tímiayi. ⁴³ Ame nemasrumin núpeteatsain nuí pujustá” tímiayi.” Tú áarmaiti.

⁴⁴ Kame Tawitkia, Krístun chicharuk, “winia Úuntron” tajsha, ¿itiurak Kristu tutai Tawitia pampanmarí átin’ki?” Tú tímiayi Jesus.

*Israer-shuaran jintintin ainia nuyá aneartarum
(Mateu 23.1-36; Márkus 12.38-40; Rúkas 11.37-54)*

⁴⁵ Ashí aents Nin anturkatasa pujuinia ni unuiniamurin Jesus juna tímiayi:

46 “Israer-shuaran jintintin ainia nuyá aneartarum. Niisha esaram pushin entsarar wekasataitsar wakeruiniawai. Tura jintiá ti shiir áujtusarat tusar wakeruiniawai; tura iruntai jeanam penkeri pujutainium pujustinian wakeruiniawai. Tura nampernumsha uunt pujutainium pujustaj tusa wakeruiniawai. 47 Túrasha waje jeencha atan-tainiawai. Túrawar aents nekaracharat tusar ti esaram chichamjai Yúsan áujainiawai. Nincha chikichjai nankaamas Yus asutiáwartatui.”

21

Waje ni kuítrin susamia nu
(Márkus 12.41-44)

1 Yusa Uunt Jeen kuítrintin kuit enketainiam kuítian enkeenan Jesus wáinkiamiyi. 2 Tura waje kuítrincha jimiara uchich kuítian, reara áaniun, enkean wáinkiamiyi. 3 Wáiniak tímiayi “Nekas tájarme, ju waje kuítrinchaitiat, ashí enkeena nú nankaamas núkap enkeayi. 4 Warí, chikichcha ampirma nuna enkeenawai. Tura niisha aya núchiniak takurmakman ampirmatsuk ashí enkeayi.”

Yusa Uunt Jeen saanaktinian Jesus ujakmiania nu
(Mateu 24.1-2; Márkus 13.1-2)

5 Yusa Uunt Jeen kaya shírmach armia nuna tura chikich shírmach susamu armia nunasha chikich shuar áujmatuk pujuarmiayi. Nuyá Jesus tímiayi:

6 “Átum yamá shiir wáintrumna nu ashí emesnartatui. Kaya ekenramsha mash yumpuuntrartatui” tímiayi.

Amuukatin tsawantin uruku átata nu nekaatin
(Mateu 24.3-28; Márkus 13.3-23)

7 Nuyá Jesusan chicharainiak “Uuntá, nusha ¿urutaik túrunatí? ¿Kame ju túrunatin jeatemamtaisha warijiajn nekaattají?” tiarmiayi.

8 Tutai Jesus tímiayi “Aneartarum; anannawairap. Nekaatarum. Winia náarun pachisar, “wi Kístitujai” tau ti untsurí jíntrartatui. “Nunka amuukatin jeayi” tu etserkartatui. Tuíniakui anturkarum nemarirap. 9 Tura meset chichamsha, kapitían mesetan nájanmasha antukrum sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.’

10 Nuyá tuke chicharuk tímiayi ‘Shuar chikich nunkanmaya shuarjai mesetnum ti nekas maaniawartatui. 11 Ti wurkattawai; untsurí nunkanam tsukasha, sunkursha ti átatui. Nayaimpinmasha ti ashammai nánkamas túrunattawai. Nujai Yus ni kakarmarin iniakmastatui.’

12 ‘Tura ju túruntsajn atumin pataaturmakar achirmakartatui. Iruntai jeanmasha makurmartai tusar juramkiartatui. Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui. 13 Nuinkia atumin túrutmakrumin wi túramu etserkatin arutmattarme. 14-15 Tura atumi nemasri nakitramainiak “wáitiati” títinian tujinkiarat tusan, winia nekatairjai chichastinian amatájarne. Tuma asamtai “Jurakuisha warinia tiniak kíishtumaktaj tusan áetak enentáimsashtatjai” titiarum.’

16 ‘Tura imia atumi aparisha surutmakartatui. Atumí yachisha, atumí shuarisha amikrumsha núnisarañ surutmakartatui. Tura máamunka

máawartatui. ¹⁷ Tura Winia ajasaru asakrumin ashí aents nakitram-prartatui. ¹⁸ Tura penké ishichkisha yajauch awajtamsachartatui.

¹⁹ Katsuntrarmeka iwiaaku átin wáinkiattarme.'

²⁰ 'Ju pepru Jerusareńka ąą tanishriń suntar téntakar matsatu wáinkiurmeka, emesratin jeá nekaattarme. ²¹ Nuikia juí Jutía nuńkanam pujuinia nu, náinnium pisartin áiniawai; tura juí Jerusareńnum pujuinia nusha juyąka jiinki wétin ainiawai. Tura ajanam pujuinia nusha, péprunam waketkishtin áiniawai. ²² Nu tsawantincha Yus asutiámun wáinkiartatui. Yús-Papinium nu túrunatin yaunchu aarma nu uminkiattawai nu tsawantin. ²³ Nuńkanam ti wáitsatin átatui. Tura ju aents ti asutniawartatui. Tuma asamtaí nuwą ajamtin ainia nusha, tura uchi kuírchin takakainia nusha imiá itirchatan wáinkiartatui. ²⁴ Tura juyá aents mesetnum jákartatui. Tura chikichnaka ashí nuńkanam misaawar júkiartatui; tura yajaya apach, Yúsnan enentáimtuiniatsna nu, juí Jerusareńnum wayawar najakartatui. Nu túratniunka Yus tsąńkatkana nuńń túrawartatui.'

Aents Ajasu tutai tátintri

(Mateu 24.29-35, 42-44; Márkus 13.24-37)

²⁵ 'Nuńkia etsanmasha, nantunmasha, yáanmasha Yuska ni kakarmarń iniakmak nusháa túrattawai. Nuńkanmasha ashí aents páchim enentáimprartatui. Tura nayaantsanam chíchimi ti aku tantáa ajakui ti ashankartatui. ²⁶ Tura túrunatin ana nuna enentáimsar mayáí ashinkartatui. Warí, nayaimpiniam kakaram ainia nusha peantrartatui. ²⁷ Nuyá Winia, Aents Ajasu tutain, yurańminiam ti shiir ajasan winiaí wáitkiartatui. ²⁸ Nu túrunatin nánkamkui uwempratin jeatemayi tusarum kakaarum shiir enentáimsatarum.'

²⁹ Tura ju chichamnasha nekapmamiayi. 'Ikiu numi tura nánkamas numisha enentáimsatarum. ³⁰ Ju nuńkanam ni nuké yama puńkakmatai "esat jeatemayi" tátsurmek. ³¹ Núnisań Wi tájana nu wáinkiurmeka, Wi ju nuńkanam akupin ajastin jeatema nu nekaatarum.'

³² 'Tura aents yamaí pujuinia nu jáatsań nusha ashí túrunattawai. Núnaka paant tájarne. ³³ Nayaimpisha nuńkasha amuukartatui. Tura winia chichampruka amuukachminiaiti. ³⁴⁻³⁵ Nu tsawant aya aneachma jeattawai. Ashí aents ju nuńkanam pujuinia nu, nuna enentáimsuk pujuiniaí jeattawai. Tuma asamtaí atumsha anearum wekasatarum. Yajauchiniam emetnarum, aya yurumátniuk, aya umartiniak enentáimtusrum, ju nuńkanam ana nu ti wakerakrumńńkia péńker enentáimsatin tujinkiatarme. Nu atsutí tusarum tura nu tsawant aya áwaktamkajj tusarum péńker wekasatarum. ³⁶ Anearum wekasatarum. Túrunattana nuí katsuntrataj tusarum Yus aujsa pujustarum. Túrarum Aents Ajasu tutai íimmianum péńker átaj tusarum túratarum."

³⁷ Tuke tsawant tsawajsha Yusa Uunt Jeen Jesus unuiniamiayi. Tura káshikia Uriwiu náinnium we-wémiayi. ³⁸ Tura tuke tsawant Yusa Uunt Jeen Jesus chichaamun anturkatai tusar káshik tariarmiayi.

22

Jesus achiktin chichaman jurusarmiania nu

(Mateu 26.1-5, 14-16; Márkus 14.1-2, 10-11; Juan 11.45-53)

1 Wakaprutai enketaachma tanta yuatin námper, paskua tutai, jeatemamiayi. 2 Israer-shuara Pátririsha Israer-shuara jintinniurisha áentsun ashamainia ásar, itiurak máawaintiaji tusar ti enentáimsarmiayi.

3 Nuinikia Iskariúti Jútasan enentáin íwianch wáintiamiayi. Nú Jútaska Jesusa unuiniamurijn páchitkiauyayi. 4 Israer-patri úuntrin tura Yusa Uunt Jee kapitían pujarmia nuna werimiayi. Tura Jesusan tu suruk-miniaiti tusa niijiaj chichasarmiayi. 5 Niisha nuna antukar warasar “kuit amastatji” Jútasan tiarmiayi. 6 Niisha “ayu” tinia, aents nékachmanum suruktaj tu enentáimsamiayi.

Kristu jakamu enentáimtustin námper

(Mateu 26.17-29; Márkus 14.12-25; Juan 13.21-30; 1 Kurintiunam 11.23-26)

7 Wats, wakaprutai enketaachma tanta yúatin námper jeamiayi. Paskua tutainium murikchin máatin ármiai. 8 Tura Jesus Pitruncha, Juánnasha akupeak “Paskua tutai námper iwiaratarum” tímiayi.

9 Tutai niisha chichainiak “¿Tuí iwiarat tusamea wakeram?” tiarmiayi.

10 Tutai Jesus juna tímiayi “Péprunam wetarum. Jearum áishmañ yumin takaku wekáa wáinkiattarme. Nú áishmañ nemarsatarum. Tura jeá wayaakui, 11 nú jeá nérenniurj chichareakrum “Uunt chichartamuk unuiniamurjaj paskua yurumátin ¿tuí aa? turamui” titiarum, tímiayi. 12 Tákurmin nú nérentin yakí písunam uunt kuártun ashí iwiaramun ini-akturmastatrum. Nuí ii yurumátin iwiaratarum” tímiayi.

13 Tutai niisha wear Jesus tímiania tímiatrusañ wáinkiararmiayi. Tura paskua namperan nuí iwiararmiayi.

14 Yurumátin jeamtai ni unuiniamurijaj Jesusa misanam pujusarmiayi.

15 Pujusarmatai, Jesus chichaak “Wisha játsuk atumjaj ju paskua najanat-niun ti wakerimjai, 16 atakka ju nunkanam atumjaj najanashtin asan. Tura antsu Yus akupeana nuí jear atak najanattaji” tímiayi.

17 Nuyá pininikian achik, Yúsan yuminkias, ni unuiniamurjin tímiayi “Ju pinin achikrum sunaisatarum. 18 Atakka ju nunkanam uwa yumirjin atumjaj umarchattajaj, tajarme. Tura antsu Yus akupin ajastin jeamtai atak iijaj umartatji” tímiayi.

19 Nuyasha yurumkan achik, Yúsan yuminkias puuk susarmiayi. Tura chicharainiak “Juka winia ayashruiti. Winia ayashur atum péñker pujustinnium surunkattana núiti. Winia enentáimtursarum yuatarum” tímiayi.

20 Tura yurumsua amikiarmatai pininikian achik, “Ju pinin winia numparun nakumea asa uwempratin yamaram chicham najanamun nakumeawai. Winia numpar atumnian puartamprattawai” tímiayi.

21 Túrasha winia surutkattana nu Wijaj métek ju misanam pujawai.

22 Kame Wi, Aents Ajasuitjana ju, Yus iwiaramua nútiksanak jakattajaj. Túrasha Winia surutkana nu nekaatí. Ti asutniattawai” tímiayi. 23 Nuna antukar “Wíashitiaj, yákit” tunaim ajarmiayi.

Nañkaamantu ana nu

24 “¿Iijaj yaki imiá nañkaamantu aint?” tunaim ajarmiayi. 25 Tura Jesus tímiayi “Ju nunkanam akupin ainia nu, waantu enentáimtumasar akupenawai. Tura akupenakui “péñker túrin áiniawai” tuíniawai. 26 Tura atumjainkia nuka atsutí. Antsu nañkaamantu ana nu, uchichia núnik ajastiniaiti; akupeana nusha takarnia nu nínik ajastiniaiti.

27 Enentáimsatarum. Misanam pujus yurumna nu, yurumkan ajamana nujaj̄i ¿tuá imiá nekas nan̄kaamantuit? ¿Yurumna nu nekas nan̄kaamantuchukait? Tura Wis̄a atumin yurumkan ajamna núnisnak pujajai.’

28 ‘Winia itiurchatrun wáinmij̄a nūi atumsha Wijjaj̄i tuke pujumarme. 29 Tuma asakrumin akupin ajastinian winia Apar surusu asamtai Wis̄a nútiksanak akupkatniun súajrume. Wi akupkatjana nūi atumsha Wijjaj̄i yurumáttarme, tura Wijjaj̄i umartatrume, tájarme. 30 Tura akupin puju-tainium pujusrum, Israer-shuar tuse írutkamu akupkattarme tajai.” Tu tímiayi.

*Pítur “atsá nékatsjai” títinian Jesus ujakmiania nu
(Mateu 26.31-35; Márkus 14.27-31; Juan 13.36-38)*

31 Nuyá Uunt Jesus tímiayi, “Nekaata, Semun̄ká. Trikiu neré tsat-samátniua áintsan̄ Satanás atumi enentáin páchim enentáimtikramprataj tusa seayi. 32 Tuma aiñ Yus enentáimtustinian kajinmatkiñ̄ tusan Wis̄a Yús̄an seamjai. Tura Yús̄num waketkim ame yatsum ikiakárarta” tímiayi.

33 Tutai Semun̄ tímiayi “Uuntá, sepunam en̄ketmainiakuisha wis̄a nemarsatajme. Tura mantamainiakuisha métek jakatjai” tímiayi.

34 Tutai Jesus tímiayi “Pitrú, nekas tájame, yamaik atash shiniatsaj̄i ame menaintiú natsantrurtatme” tímiayi.

Itiurchat winiawai

35 Nuyá Jesus tímiayi “Wis̄a yurumkajainchu, kuítjainchu, sapatjainchu akupkamjarmena nūi ¿táatramsamkarum?”

Niisha “Atsá pen̄ké táatramsachmaji” tiarmiayi.

36 Tutai Nii tímiayi “Antsu yamaikia yurumkan takakkuñka takustí, kuítniasha núnisan̄; tura puniancha takakchakka ni pushir̄in suruk punian sumakti. 37 Nekaatarum. Yus-Papinium yaunchu aarma ana nu wi túrunamuj̄ai uminkiattawai. Juīti aarma:

Yajauch shuarnum pachikiarmiayi.

Warí, Yus-Papinium ashí Winia aarma ana nu uminkiatniuiti.”

38 Tutai ni unuiniamur̄j̄i tiarmiayi “Uuntá, juī jimiarā puniá awai.”

Tutai Niisha “Asati” tímiayi.

Jitsemani ajanam Jesus Yús̄an áujsamiania nu

(Mateu 26.36-46; Márkus 14.32-42)

39 Nuyá Jesus jíinkimiayi. Tura tuke túrin asa Uriwiu náinnium wémiayi. Ni unuiniamur̄j̄isha nemariarmiayi.

40 Aj̄ jeá nin chicharuk “Itiurchat winiakui iniaraj̄j̄i tusarum Yus áujsatarum” tímiayi. 41 Tuasua amik arantach, kaya nankimiam jeana núnik Jesus wémiayi. Tura Yús̄an áujsataj tusa tikishmarmiayi.

42 Tikishmar juna tímiayi “Apawá, piniñnum yapá umartinia ántsan̄ Wi wáitsattajna nu wakerakmeke jurutkitia. Tura Wi wakerajna nucha antsu Ame wakeramna nu atí, tajai” tímiayi.

43 Nuyá, ikiakártaj tusa Yusa suntarīj̄i nayaimpinmayā tarimiayi.

44 Tura Jesus imiá wáitias pujak nú kakaram Yús̄an áujsamiayi. Tura ni searmar̄isha numpá ántsan̄ nun̄ká kitiawarmiayi.

45 Yús̄an áujsua amik wajaki ni unuiniamur̄j̄in werimiayi. Tura kúntuts enentáimiar̄ij̄ij̄aj̄i ti pimpiki kanúu tepenan tarimiayi. 46 Nuiñkia chicharainiak “¿Urukamtai kanúu teparum? Itiurchat winiakui iniaraj̄j̄i tusarum nantakrum Yus áujsatarum’ tímiayi.

Jesusan achikiarmiania nu

(Mateu 26.47-56; Márkus 14.43-50; Juan 18.2-11)

⁴⁷ Jesus tuke chichaa pujaj, untsurí shuar táarmiayi. Tura nuní eemka Jesusan unuiniamurí Jútas naartin winimiayi. Tura Jesusan mukunatajtsa tarunmiayi. ⁴⁸ Támatai Jesus chicharuk “Jútasá, ¿Aents Ajasu tutai muku-namek surutkattam?” tímiayi.

⁴⁹ Jesusjaj pujuarmia nu, túmamun wáinkiar “¿Uunt puniajaj íjuartatjik?” tiarmiayi. ⁵⁰ Tura chikichik Patri uuntri takarniurí kuishin untsuurin tsupirkamiayi.

⁵¹ Tura Jesus tímiayi “Iniaisatarum.” Nuna tinia ni kuishin antin tsuármiai. ⁵² Nuyá Israer-patri úuntrin, Yus-jea úuntrincha, tura pepru úuntrincha, Nin achiktaj tusa tariarmia nuna chicharuk “¿Wisha kasakaitiaj. Urukamtai puniajajisha numijajisha tarutniuram?” ⁵³ Nuik Yusa Uunt Jeen tuke tsawant atumjaj pujumaj nuí achirkachmarme. Túrasha átum kiritniumiá kakarmajaj nupetkatin yamá tsawantin tsankatkamuitrume” tímiayi Jesus.

Pítur “Jesusnaka nékatsjai” tímiania nu

(Mateu 26.57-58, 69-75; Márkus 14.53-54, 66-72; Juan 18.12-18, 25-27)

⁵⁴ Nuinkia Jesusan achikiar emetawar Israer-patri uuntri jeen júkiarmiayi. Tura Pítrusha íkiañ nemarki wémiayi. ⁵⁵ Tura aach jinia ikiapármiai. Túrawar anamuk pujuarmiayi. Pítrusha niijaj pujusmiayi. ⁵⁶ Tura nuwa, Patri takarniurí amia nu, Pítur jinia anamuk pujan wáiniak “Ju áishmansha Niijaj pujumiayi” tímiayi.

⁵⁷ Tutai Pítur chichaak “Nuwá, Nin nékatsjai” tímiayi.

⁵⁸ Tura árusañ chikich nin wáiniak “Amesha Niin páchitkaiatme” tímiayi.

Tutai Pítur tímiayi “Atsá. Wikia áinkia páchitkiatsjai” tímiayi.

⁵⁹ Chikichik ura nankaasmatai chikich apach chichaak “Nekas ju áishmansha Niijaj pujumiayi. Warí, niisha Kariréanmayançhakait” tímiayi.

⁶⁰ Tutai Pítur chichaak “Ame támena núnaka nékatsjai” tímiayi. Nú chichamaik Pítur chicháa pujañk' atash shiniukmiayi. ⁶¹ Tura nuinkia Uunt Jesus Pítrun apajas ísmiayi. Túra “atash shiniatsain ame menaintiu natsantrurtatme” Uunt Jesus timia nuna enentáimpramiayi. ⁶² Nuyá Pítur jiinki ti útmiayi.

Jesusan wishikrarmiayi

(Mateu 26.67-68; Márkus 14.65)

⁶³ Áishman Jesusan wáiniarmiania nu ti wishikiainiak awattiararmiayi. ⁶⁴ Jiin epetkar yapiniam awattiar chicharainiak “Nekamata, ya awatama” tiarmiayi. ⁶⁵ Tura katsekainiak ti untsurí chikichnasha nánkamas tiarmiayi.

Uunt Iruntainiam Jesusan ejeniarmiania nu

(Mateu 26.59-66; Márkus 14.55-64; Juan 18.19-24)

⁶⁶ Tsawarmatai, Israer-shuara úuntrisha, Israer-patri úuntrisha, Israer-shuara jintinniurisha iruntrar ni iruntairin ejeniarmiayi. Nuí chicharainiak ⁶⁷ “Paant titiá. ¿Yus anaikiamu Kristu tutaia núkaiatiam?” tiarmiayi.

Tutai Jesus tímiayi “Wi “ee” tákuisha, “nekasaiti” tíchattarme. ⁶⁸ Tura Wi aníamsha áirkashtatrume, túrasha akuptukchattarme. ⁶⁹ Tura wárik

Wisha Aents Ajasuitjiana nu, ashí nan̄kaamaku ajasan, Yusa untsuurin̄i pujustatjai” tímiayi.

⁷⁰ Tutai niisha tiarmiayi “¿Nuiñkia amesha Yusa Uchir̄inkaitiam?”

Tutai Jesus tímiayi “Ee, Wíitjai, átum Winia túrutrum núnisnak.”

⁷¹ Tutai niisha tiarmiayi “Warí, ¿iisha chikich ujatkat tusar atsumajik? Imia niñki chichaamu antukchajik” tiarmiayi.

23

Piratuí Jesusan júkiarmiania nu

(Mateu 27.1-2, 11-14; Márkus 15.1-5; Juan 18.28-38)

¹ Nuyá ashí Uunt iruntrarmia nu wajakciar Rúmanmaya akupin Piratuí Jesusan júkiarmiayi. ² Nui jeawar; Piratun chicharainiak “Ju áishman̄ í shuaran awajimtikiar enentáimtkiainia nu nekaamji. Rúmanmaya uunt akupin Sésaran kuit akiktinian suritramaji. Tura nu arant Niñki, akupin Kristu tutaintjai, tawai” tiarmiayi.

³ Tutai Piratu Jesusan chicharuk “¿Ame Israer-shuara akupniur̄inkáitiam?” tímiayi.

Tutai Jesus tímiayi “Ee, núitjai, ame támena núnisnak.”

⁴ Nuyá Israer-patri úuntrincha tura aents nuñ iruntrarmia nunasha Piratu chicharainiak “Ju áishman̄ tunaan túran penké wáinkiachuitjai, tajai” tímiayi.

⁵ Túrasha niisha nú kakantar chicharainiak “Antsu nekas ashí Jutía nunkanmaya aentsun ni unuiniana nuñai akajenawai. Kariréa nunkanmaya nan̄kaamas ímiajajisha tayi” tímiayi.

⁶ Piratusha nuna antuk “Nu áishman̄ ¿Kariréanmayañkáit?” tímiayi.

⁷ “Ee” tuiniakui, Erutisan akuptukarmiayi. Erutiska Kariréanmaya aentsun akupniuyayi. Túmaitiat nu tsawantin Jerusaréñnum ishichik tsawant pujusmiayi.

⁸ Erutiska Jesusan ístaj tusa ti wakerimiayi. Jesusa túramur̄in áujmatman ti antukmiayi. Tuma asa, “Wi ímiañ aents tujintiamun túrashtimpiash” tusa Jesusan wáiniak warasmiayi. ⁹ Jesusan ti nukap aniasmiayi; túramsha penké áimkiachmiayi. ¹⁰ Nuñsha Israer-patri úuntriñsha, tura Israer-shuara jintinniur̄isha yajauchiiti tusar charaatum awajiarimiayi. ¹¹ Tura Erutissha ni suntariññai Jesusan yajauch enentáimtuiniak Nin wishikiainiak ti penker pushin, akupniu entsatairiya ánniun, áentsrarmiayi. Nuyasha Erutis ataksha Piratuíñ akupkamiayi. ¹² Túram nu tsawant Piratu Erutisñai nawamnaikiarmiayi. Kame yáunchuka nemasnaikiau ármiai.

Jesusan “mantamñati” tiarmiania nu

(Mateu 27.15-26; Márkus 15.6-15; Juan 18.39–19.16)

¹³ Nuyá Israer-patri úuntrin aentsu úuntriññai tura penké aentsñai Piratu íkiaanak tímiayi ¹⁴ “Ju áishman̄ aentsu awajimtikuii tusarum itiertintrume. Túrasha átum ímprumñin̄ anintrusan yajauch átum tárumna nuna penké nekarachjai. ¹⁵ Erutissha núnisan̄ yajauchin nekaachai. Warí, juñ awainkíchmaka. Nuñkia páantchakait júñ aishman̄ jakamnia tunaanka túrichuiti” tímiayi.

¹⁶⁻¹⁷ Túraitiat tuke túrutai asamtai, jísat jeakui sepunmaya chikichik áishman̄kan Piratu añkant akupkatin ámiayi. Tuma asamtai, nii chichaak “juna asutián awematjai” tímiayi.

18 Tura aencha iruntrar ti unsumainiak “Atsá; jucha. Ju nakitiaji. Antsu Parapás akupkata” tiarmiayi. 19 Nu Parapássha akupniun nakitiaji mesetan najana asa tura maṅkartin asa sepunam enkeamuyayi.

20 Piratuka Jesusan akupkatta wakerak ataksha aentsun áujsarmiayi. 21 Túrasha nú arant unsumainiak “Atsá. Krúsnum mantamnati” tiarmiayi.

22 Tura ataksha Piratu chicharainiak “¿Urukantai. Warí tunaan túrait? Jakamnia tunaan túrachias tusan, aniasan penké nekarachjai. Asutián akupkatjai” tímiayi.

23 Tura niisha kakaram unsumainiak “Jesus mantamnati” tiarmiayi. Kame aencha tura Patri úuntriṣha ti unsumaina ásarmatai ni wakera-murí tsan̄katnakarmiayi. 24 Nii wakeriarmia nuna Piratu “túrattajai” tímiayi. 25 Tuma asa Parapásan, mesetan najanin tura maṅkartin amia nuna akupkamiayi. Tura Jesusnaka ni wakeramun túrawarti tusa íktusarmiayi.

Jesusan krúsnum ajintrurarmiania nu

(Mateu 27.32-44; Márkus 15.21-32; Juan 19.17-27)

26 Jesusan jukitiasa pujuiniaj Serini nun̄kanmaya Semun ni pépruriya Jerusarénnum yama jeamiayi. Nin achikiar, Jesusa krusrj ayantkar “ni ukurj wetá” tiarmiayi.

27 Untsurj aents Jesusan nemariarmiayi. Tura untsurj nuwasha ti kuntu enentáimiainiak úutkiar tura wa-wa ajakiar wearmiayi. 28 Túmainiakui Jesus nin iis, “Jerusarénnumia nuwatiram Winia enentáimtursarum úuttiirap. Antsu atumniak tura atumj uchirj enentáimtursarum úuttiarum. 29 Warí, ti iturchat tsawant jeawartatui. Tuma asamtai “Uchirtichu ainia nu, ajaprukchana nu tura amuntsachu ainia nu, chíkich aentsjai nan̄kaamas péñker pujuiniawai” tiartatui. 30 Nu tsawantaj aents chicharainiak “Náint in nekentmak yuturmaartai” tiartatui. 31 Warí, numi sameka áinis yajauch aya nánkamna aṅsha ju itiurchat átsuk. Tura numi kukaru ainkiamtai itiurak nú yajauch túrunachat.” Tu timiayi Jesus.

32 Tura Jesusjai krúsnum maatai tusar jímiar yajauch áishmaṅkan júkiarmiayi. 33 Karawír nain tutainium jeawar Jesusan krúsnum ajintrurarmiayi. Tura Jesusa untsuurinj chikichík yajauch áishmaṅkan tura ni menarinj chíkich yajauch áishmaṅkan núnisan̄ krúsnum ajintrurarmiayi.

34 Tura Jesus krúsnum ajintraku pujuram, chichaak “Apawá, tsan̄kurarta. Nii áitkiaiania nuna nékainiatsui” tímiayi.

Tura suntar pujuarmiania nu, yaki Jesusa pushirj jukit tusar nakurarmiayi. 35 Péprunmaya aents ii wajatiarmiayi. Tura uunt armia nusha Nin wishikiainiak “Chikichnaka uwemtikniuiti. Wats, yamá nekas Yusa anaikiamurj Kristu tútainikun̄ka imia Niñki uwémpratí” tiarmiayi.

36 Suntarsha Nin wishikrarmiayi. Tariar churuńian aartai tusar awajjarmiayi. 37 Tura chicharainiak “Amesha nekas Israer-shuara uunt akupniurinkiumka amek uwemprata” tiarmiayi. 38 Tura muuknumaani, Kriaku chichamjai, Rúmanmaya apach chichamjajsha tura Israer chichamjajsha ju áarar anujkamú ámiayi: *JÚITI ISRAER-SHUARA UUNT AKUPIN*

³⁹ Chikichík yajauch áishman̄ nūj ajintruamu amia nu kátsekeak chicharuk “Amesha nekas Yusa anaikiamurĩntkiumka amek uwem-prata tura incha uwentikramprata” tímiayi. ⁴⁰ Tura chíkich ni tsaniak-marĩn kakantar chicharuk “¿Amesha Nijjaj̄i métek asutniátasa pujayatam, Yus ashamatsmek? tímiayi. ⁴¹ Iikia yajauch asar wáitsatniuitji; īi tunaarīi akikmakur wáitijai. Antsu jū áishman̄ka yajauchin túrichuiti” tímiayi.

⁴² Nuyá Jesusan chicharuk “Amesha akupin ajasam winiasha enentáimtursata” tímiayi.

⁴³ Tutai Jesus chicharuk “Nekas tájame, jakar shiir pujutainium yamá tsawant Wijjaj̄i pujustatme” tímiayi.

Jesusa jakamuri

(Mateu 27.45-56; Márkus 15.33-41; Juan 19.28-30)

⁴⁴ Tutupin aj̄ ashí nun̄kanam ti kirit ajasmiayi. Tura menaintiú ura nan̄kaamasu ain̄, nantu nun̄kaach ajassha tuke kirit ámiayi. ⁴⁵ Tsawái nantusha mushatmarmiyai. Tura Jerusaré̄nnum Yusa Uunt Jēencha tarach ajamu aa jímiapetek nakaakamiayi. ⁴⁶ Nuyá Jesus untsumuk “Apawá, winia wakantrun Am̄ijn̄ ikiuajai” tímiayi. Nuna tinia jakamiayi.

⁴⁷ Suntara kapitian̄tri nu túrunamun wáiniak, Yusa náarin̄ shiir awajeak “Jusha imiá nekas pé̄nker áishman̄kuyi” tímiayi.

⁴⁸ Tura untsurí aents pujuarmia nu, nu túrunamun wáinkiar ti kuntuts enentáimiainiak ni netsep̄en paat awatiar waketkiarmiyai. ⁴⁹ Tura Jesusa amikr̄isha tura nuwá Kariré̄anmayá Nin nemariarmia nusha íkian̄ wajasar īi wajarmiyai.

Jesusan iwiarsarmiania nu

(Mateu 27.57-61; Márkus 15.42-47; Juan 19.38-42)

⁵⁰ Naka enentáimin pé̄nker áishman̄ ámiayi ni naarīi Jusé. Arimatéa pepu Jutía núnkanam ana nuyayuyayi. Israer-shuara Uunt Iruntairin̄ páchitkiauyayi. ⁵¹ Yus jū nun̄kanam akupin ajasat tusa Jusé nakas pujumiayi. Tuma asa Uunt Iruntainium Jesusan túrawarmia nuna nakitmiayi. ⁵² Tuma asamtai Piratuj̄ we Jesusa ayashin̄ seamiayi. ⁵³ Piratu “ayu” takui, Jesusa ayashin̄ krúsnumiá jusa tarachjaj̄i penuar kaya táurmanum iwiarsamiayi. Nu táurmanum chíkich iwiarsachmauyayi. ⁵⁴ Iwiaratin tsawantaj̄, ayampratin tsawant tsawastatuk ajasmatai túrunamiayi.

⁵⁵ Tura nuwá Kariré̄anmayá jukiniutak Jesusan nemarsarmia nusha iwiarsamunam weriar, Jesusa ayash̄i itiur ikiusmait nuna iisarmiyai. ⁵⁶ Iisar ikiuak ni jēen waketkiarmiyai. Tura Jesusa ayash̄i mejeenin̄ tusar kun̄kuinian̄ iwiararmiyai. Tura ayampratin tsawantaj̄, Israer-shuar akupkamun umikiar ayamprarmiyai.

24

Jesus nantakmiania nu

(Mateu 28.1-10; Márkus 16.1-8; Juan 20.1-10)

¹ Tumĩntin káshik kun̄kuinian̄ iwiaramun júkiar nu nuwá Jesus iwiarsamunam weriarmiyai. Tura chíkich nuwásha atampriarmiyai.

² Tura iwiarsamu kaya atutkamu urani aan wáinkiararmiyai. ³ Tura wayawar uunt Jesusa ayashin̄ wáinkiacharmiyai. ⁴ Wáinkiachu ásar ashankarmiyai. Tura “itiurkatjik” tiarmiyai. Tumaj̄ jimiará áishman̄kan pushin wincharpatniun entsaru nin ayaq̄amach wajainian wáinkiararmiyai.

⁵ Nuna wáinkiar ti sapijmiainiak tsuntsumawarmiyai. Túmakui nu

áishman chicharainiak “¿Iwiaakusha urukamtai jakaanumsha earum? tiarmiayi. ⁶ Jui pujatsui. Antsu nantakni. Nékatsrumek. Niisha Kariréanam tuke pujus ⁷ “Wi, Aents Ajasuitjiana nu, yajauch aentsnum surunkattajai. Túran krúsnum mantamnattajai. Tura menaintiú tsawantai nantaktiatjai” turamchamkarum” tímiayi.

⁸ Nuna takui Jesus timian enentáimprarmiayi. ⁹ Tura iwiarsamunmaya waketki taar, Jesusa unuiniamurin auntse armia nuna tura chikichnasha ashí nu túrunamun ujakarmiayi. ¹⁰ Jesusa unuiniamurin ujakarmia nu ju áiniawai: Maktaranmaya Marí, Juánasha, Jakupu nukurí Marisha, tura chikich nuwajaj. ¹¹ Tura Jesusa unuiniamurisha nuwá tuíniakuisha nekasaiti tu enentáimtsuk “wáuruk tuíniawai” tiarmiayi.

¹² Túrasha Pítrusha jiinki Jesus iwiarsamunam tsékenki werimiayi. Jeá, inít iis, aya tárachik tepenan wáinkiamiayi. Tura túrunamia nuna ti enentáimiar ni jeen waketkimiayi.

*Emaús wetai jintianmaani túrunamia nu
(Márkus 16.12-13)*

¹³ Nu tsawantajik Jesusa nemarniuri jímiar Emaús péprunam wéarmiayi. Emaúska Jerusarénumia auntse kirumitru jeá pujawai. ¹⁴ Túrunamia nuna chichaki wearmiayi. ¹⁵ “Itiurkit” tu aujmatki weenaj imia Jesus taa nuí páchiniak niijjaj wearmiayi. ¹⁶ Tura wáinkariat nekaashtin asamtai yait nekaacharmiayi.

¹⁷ We-wénakua Jesus chicharainiak “Jintiasha ¿warí áujmatkirum wéarum? ¿Urukamtai kúntuts enentáimprum?” tímiayi.

¹⁸ Chikichik, Kreupas náartin chicharuk “Jerusarénum túruna nuna ashí nékainiawai. ¿Ámeke amekék túrunamia nu nékachu páchitkiam?” tímiayi.

¹⁹ Tutai Jesus tímiayi “¿Warí urukait?”

Tutai tiarmiayi “Entá, Nasarénumia Jesusa túrunamuri taji. Niisha Yúsnan etserin asa Yusa kakarmarijjaj chichasmiayi tura nuna kakarmarijjaj takasmiayi. Núnaka ashí aents nékainiawai. ²⁰ Tura ii Pátriri uuntri tura ii pépruri uuntri “tunáa jakamnia túrayi” tusar “krúsnum mantamnatí” tiarmiayi. ²¹ Tura ii Israer-aentstin uwemtikrampratin tu enentáimsamji. Tura ni maamusha menaintiú tsawant nankaamasai. ²²⁻²³ Túrasha ii nuwá ni iwiarsamunam yamaí káshik weriar ni ayashin wáinkiacharmai. Tura “Yusa suntari wáinkiaji tura “Jesus iwiaakuíti” túramji” tiarmai. Nuna tu ujatmakakrin ti enentáimpraji. ²⁴ Nuyá íi shuar iwiarsamun weriar, nuwá tiarmia tímiatrusan wáinkiarimiayi. Tura Jesusnaka wáinkiacharmai.” Tu ujakarmai Jesusan.

²⁵ Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtatsrume. ²⁶ ¿Yusa anaikiamuri, Kristu tutai, shiir awajnutsuk ti wáitsashtinkiait?” tímiayi.

²⁷ Tura nuyá Yus-Papinium Muisáis aarmia nuyá jukin ashí Yúsnan etserin ni túrunatniurin áararmia nuna jintintiatasa nankamamiayi.

²⁸ Ayu, nii wearmia nú peprunam jeawarmiayi. Tura Jesuska nuí nankaamaki wétaj tau ajamiayi. ²⁹ Tura niisha chicharainiak “Weep. Iijjaj pujustá. Warí, nantu akaikiyi, kirit ajatemsai” tiarmiayi.

Tutai Jesus niijjaj pujustaj tusa wayamiayi. ³⁰ Tura niijjaj irunar misanam pujus, yurumkan achik, Yúsán yuminkias nincha puuk súsarmiayi.

³¹ Nu chichamaik, ni jii uranniuwa núnikiarmatai Jesusan nekaawarmi-ayi. Tura Niisha nú chichamaik menkakamiayi. ³² Tura nu shuarsha mai tunai ajainiak “Jintia winis Niisha Yus-Papin jintintramuk nekas ii enentáin shiir enentáimtikramprachmakají” tiarmiayi.

³³ Nuyá, Emaúsnumiá wárik jíinkiar Jerusarénum waketkiarmiayi. Nuí Jesusa unuiniamurin auntse armia nuna tura chíkich shuar Jesusan nemariarmia nunasha iruntrar pujuinian wáinkiarmaiayi. ³⁴ Auntse armia nusha tiarmiayi “Uunt Jesus nekas nantakni. Semun Nin wáinkiaiti.”

³⁵ Tutai niisha jintiá túrunamun ujakarmiayi. “Jesus yurumkan ajama-
makui nuí nekaamji” tiarmiayi.

*Ni unuiniamurin Jesus wantintiukmiania nu
(Mateu 28.16-20; Márkus 16.14-18; Juan 20.19-23)*

³⁶ Nuna áujmatuk pujuiniaí Jesus aya aneachma ajapén wajas “Shiir enentáimsatarum” tímiayi.

³⁷ Nuna antukar, tí sapijmiakar, wakanchashit, enentáimsarmiayi. ³⁸ Tura Jesus chicharainiak “¿Urukamtai sapijmiakrum wakanchashit, tu enentáimsarum? ³⁹ Winia uwejrusha, nawersha írtustarum. Wíkiitjai. Takarsa írsatarum. Warí, wakancha ayashtinkiait, ukunchtinkiait” tímiayi.

⁴⁰ Nuna tinia ni uwejéncha nawencha iniaktusarmiayi. ⁴¹ Warainiayat sapijmiainia ásar, Niimpiashit tu enentáimtusarmiayi. Tuma asamtai, nin chicharainiak “¿yurumak takakrumek?” tímiayi. ⁴² Takui, namaknasha, míshkincha súsarmiayi. ⁴³ Tura Jesus nuna achik niisha ímiaianiamunman yuamiayi. ⁴⁴ Tura nin tiarmiayi “Winia túrutawarma nuna, Wi atumjai nuik pujusan tímiajrume. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papin-
inium aarma ana nusha ashí uminkiatniuyayi” tímiayi.

⁴⁵ Nuyá Yus-Papinium aarman jintintiawarmiayi. ⁴⁶ Jintintiuk juna tímiayi: “Yusa anaikiamurí Kristu tutai jaka menaintiú tsawan-
tai jakamunmaya nantaktinia nu yáunchuk áarmauyayi. Tura Wi nú Kristuchukaitiaj. ⁴⁷ Winia náarun pachisar, Jerusarénumiá nanakama ashí nunkanam nu chicham etsernaktinia nu áarmauyayi. Shuar ni tunaari tsankurnarat tusar enentáin yapajjáníuiti. Tura tu etserkatniua nusha yaunchu áarmauyayi. ⁴⁸ Tura wi túrunamu neka asarum etserkat-
niuitrume, tímiayi. ⁴⁹ Tura winia Apar, winia Wakantrun susartatjai, turammarumna nuna akuptuktatjarme. Tura nayaimpinmaya táatsain jui Jerusarénum péprunam pujústárum. Taa ni kakarmarin suramsattarme.” Tu tímiayi.

*Jesus nayaimpiniam wakamiania nu
(Márkus 16.19-20)*

⁵⁰ Nuyá Jesus Jerusarénum péprunmaya júkiar Petania péprunam ejeniarmi-
ayi. Tura nuí ni uweje takui, “Yus yáinmakarti” tímiayi. ⁵¹ Nuna tu pujus, niyya kanakmiayi. Tura nayaimpiniam junakmiayi. ⁵² Ni un-
uiniamurísha Nin imiá shiir enentáimtusarmiayi. Tura nuyá ti warasar Jerusarénum waketkiarmiayi. ⁵³ Tura Yusa Uunt Jeeñ pujusar Yusa náarin shiir awajú pujuarmiayi. Áukete.

Yúsan Shiir Chichamen JUAN aarmia nu

Chícham aents ajasmiania nu

¹ Ashí nan^{ka}mamia nú yaunchu Yusa Uchirí tuke pujuyayi. Niisha Yúsan ti paant awajeakui, Chícham tíminiaiti. Chichamsha Yus^{ja}i pu-
juyayi. Chichamsha Yúsauyayi. ² Yáman^{ka}mtaik Niisha pujuyayi Yus^{ja}i.
³ Ashí najanamu ainia nu Niij^{ja}i najanamuiti. Nii najanachmaka pen^{ke}
atsawai. ⁴ Niisha iwiaaku átinia nérenniuti. Nu iwiaaku atincha tsáapnia
áinis Yusna ana nuna ashí shuaran paant nekamtikiamniaiti. ⁵ Nu
tsáapnin kiritniunam tsáapniawai. Tura kiritniusha tsáapninian ikiajniak-
tinian tujinkiaiti.

⁶ Áishman^{an} ámiayi, Yus akupkamu, ni naari Juan. ⁷ Niisha tsáapnin
chichaman etserkatajtsa támiayi. Nuna étseruk ashí umirkarat tusa
támiayi. ⁸ Juan^{sha} nu tsáapninchauyayi. Áyatik akupkamuyayi tsáapnin
chichaman etserkat tusa. ⁹ Nu tsáapninkia nekas tsaapniniaiti. Ju
nun^{ka}nam taa ashí shuaran enentáin tsáapniartiniaiti.

¹⁰ Chichamsha taramiayi ju nun^{ka}nam. Tura nun^{ka}kasha ni najanamu
ain, nun^{ka}kaya aents Nin nekaacharmiayi. ¹¹ Támiayi ni nun^{ka}kén tura
ni shuarsha ni enentáin itiaacharmiayi. ¹² Tuma ain^{an} chíkich shuar
Nin enentáimtuiniak ni enentáin itiaawarua nuna Yusa uchirí ajastinian
Yus tsan^{ka}tkamiayi. ¹³ Niisha Yusa uchirí ajasar ataksha númpentin
ayashímkiacharmai. Áentsnúmiá akiiniachu ániawai niisha. Áishman^{an} wak-
eramuj^{ja}sha akiiniacharmai. Antsu Yúsnumiá akiiniawaru ásar Yusa
uchirí ániawai.

¹⁴ Nú Chichamsha ayashtin ajas iij^{ja}i núkap tsawant pujumiayi. Yusa
anen^{ka}kratair^{ja}i piakuyi. Aya nekas nunak chichaamiayi. Núnisan^{an} ni
pén^{ka}kerin, aya Yusa Uchirí chikichkia nu takusminia nuna iniakmamiayi.
Nusha iisha paant wáinkiaitji. ¹⁵ Juan^{sha} Nin neka asa, étseruk tímiayi
“Júiti wi tímiaj nu: “Winia ukuruini winittiana nu wíj^{ja}in^{ka} émkaiti. Maa,
wi atsa^{ja}sha tuke pujuyayi” tiniujai.” Tu etserkamiayi.

¹⁶ Chichamsha ti anen^{ka}kartin asa ashí pén^{ka}ker ana nuna iniaitsuk
súramji. ¹⁷ Yusa akupeamurin Muisais yaunchu jintintraiti, antsu
aneatniuncha tura ashí nekas ana nunasha Jesukrístu jintintraiti.
¹⁸ Chikichkisha Yúsan pen^{ke} wáinkiachuiti. Tura ni Uchirí chikichkia nu
tuke Niij^{ja}i tsaníaku asa Yúsan paant awajturmasuitji.

Imiakratin Juan Jesukrístunun etserkamiania nu

(Mateu 3.11-12; Márkus 1.7-8; Rúkas 3.15-17)

¹⁹ Jerusarénnumiá Israer-shuar ni Pátrirⁱⁿcha Riwí-shuar^{ja}i Juan^{ka}i
akupkarmiayi yákit tusar.

²⁰ Inintruiniakui paant ujakmiayi. “Wikia Krístuchuitjai” tímiayi.

²¹ Takui ataksha aniasarmiayi “¿Nuikia yáitiam. Yúsnan etserin yaunchu
amia nú Eriáskaitiam?” tiarmiayi.

Juan^{sha} “Atsá, núchaitjai” tímiayi.

Nuyá ataksha aniasarmiayi “Nuikia ¿Yúsnan etserin tátinia núkáitiam?”
tiarmiayi.

Niisha “Atsá” tímiayi.

²² Takui “¿Nu arantcha yáitiam. In akuptamkajnia nusha warí títiatajⁱ. Warintia enentáimiam?” tiarmiayi.

²³ Juañsha tímiayi “Yúsnan etserin Isayas yaunchu timia núitjai. Ni-isha áarmiayi “Aents atsamu nunkanam shuar untsumui “Ii uuntri jintí naka awajsatarum,” tu untsumui.” Núnaka Isayas áaruuti. Tura wikia untsumna nú shuaraitjai” tímiayi.

²⁴ Juanjaj chichainiakka Pariséu akupkarma áarmiayi.

²⁵ Niisha tiarmiayi “Nuikia Krístuchuitiatmesha, Eríaschaitiatmesha, Yúsnan etserin tátinia núchaitiatmesha ¿urukamtai imiakratam?” tiarmiayi.

²⁶ Juañsha tímiayi “Wikia entsajajⁱ imiakratjai. Tura átum írutramunam shuar átum nékatsrumna nu wajaawai. ²⁷ Niisha winia ukuruinjⁱ winiyat wíjjajⁱnkia ti nankaamantuiti. Nii ti péñker asamtai wisha ni sapatrⁱ jinkiamurⁱncha atitrachminiatjai” tímiayi.

²⁸ Nuka Petapara peprunam túrunamiayi. Petaparasha Juan imiakrat-
mia nuⁱ Jurtañ entsa amain amai.

Jesus Yusa Murikrinti

²⁹ Nuyá kashin Juan Jesusan winian wáiniak tímiayi “Iistarum. Núiti Yusa Murikrⁱ ashí aentsu tunaarⁱn júana nu. ³⁰ Núiti wi timiaj nu, “Winia ukuruⁱ winiana nu wíjjajⁱnkia nankaamantuiti. Tura wi atsajⁱsha tuke pujuyayi” tímiyajai. ³¹ Wisha Nin nekaachmajai. Tura ashí Israer-shuar Nin nekaawarat tusan imiakⁱn támajai” tímiayi.

³² Nuyá tímiayi “Yusa Wakanin yámpitsa núnin nayaimpinmayan táarun wáinkiamjai. Tura ekemsamai. ³³ Nu túruntsajⁱ tuke Nin nekaachmajai. Tura Yuska winia imiakrattinian akuptak turutmiai “Chikichik shuar-
num Yusa Wakanⁱ tara ekema wáinkiam, nujajⁱ nekaattame. Yusa Péñker Wakanⁱjajⁱ imiakratnua núiti” túrutmiayi. Tura nujajⁱ Nin nekaamjai. ³⁴ Yamaikia wainkia asan ti paant nékajai tí nekas Yusa Uchirⁱnti” tímiayi Juan.

Jesusa unuiniamurⁱ emka armia nu

³⁵ Kashincha ataksha Juan nuⁱ wajasmiai ni unuiniamurⁱ jímiarjajⁱ. ³⁶ Jessusha nuⁱ nankaamakui Juan tímiayi “Iistarum, Yusa Murikrⁱ áuwiti.”

³⁷ Juanka unuiniamurⁱ nuna antukar mai Jesusan pataatukarmiayi. ³⁸ Jessusha úkumur ímias nu jímiaran wininian wáinkiamiai.

Tura tímiayi “¿Ya e^arum?”

Niisha “Uuntá, ¿tui pujam?” tiarmiayi.

³⁹ Jessusha tímiayi “Wats, iitarum.”

Niisha wear ni pujutairⁱn wáinkiarⁱmiayi. Tura áan^kú ajasmatai nu tsawantajⁱ nuⁱ kintiamprarmiayi.

⁴⁰ Juanka chichamen antukar Jesusan pataatukaruka jímiar áarmiayi. Chikichik Antresauyayi. Niisha Semunⁱ Pitru yachⁱyayi. ⁴¹ Antressha wárik ni yachⁱ Semunⁱkan eaktajtsa wémiayi. Tura wáiniak “Misías wáinkiaji” tímiayi. Misíaska ni chichamen “Kristu” tawai. Krístuka Israer-shuaran yainkariat tusa Yus anaikiamuiti.

⁴² Nuyá Antres ni yachⁱ Semunⁱkan Jesus pujamunam jukimiayi. Jessusha wáiniak tímiayi “Ámetme Semunⁱ, Junasa uchirⁱ. Túrusha Sépas átatme.” Sépaska Israer-shuar chichamnum kaya tawai. Tura Kriaku chichamnum nuka Pífruiti.

Jesus Jiripijai tura Natanaérjai chichasmiania nu

⁴³ Kashincha Jesus Kariréa nunkanam wétajtsa pujumiayi. Tura Jiripin wáiniak “Nemartusta” tímiayi.

⁴⁴ Jiripisha Petsaitia péprunmayayuyayi. Antressha Pítrusha nu péprunmayayuyayi. ⁴⁵ Nuyá Jiripi Natanaéran eakmiayi.

Tura wáiniak tímiayi “Muisais Yus akupkamu papinium “Anaikiamu tátatui” tu áarchamkia. Yaunchu Yúsnan etserniusha ujakcharmakia. Nu shuar wáinkiaji. Jesusaiti, Jusé uchirí. Nasarét péprunmayaiti.”

⁴⁶ Natanaérsha tímiayi “¿Nasarétnumiá péñker shuar áminkiait?”

Jiripisha “Winim ítiá” tímiayi.

⁴⁷ Jesussha Natanaéran tíjiuch winian wáiniak tímiayi “Ju shuar iis-tarum. Ti péñker Israer-shuaraiti. Penké anañkartichuiti.”

⁴⁸ Natanaérsha tímiayi “¿Itiur nékaram?”

Jesussha tímiayi “Jiripi tuke untsurmatsain wáinkíajme ikiu numirín ejamkam wajamin.”

⁴⁹ Natanaér nuikia tímiayi, “Uunta, nekas Yusa Uchirínme. Israer-shuar akupniuitme” tímiayi.

⁵⁰ Tura Jesus tímiayi “¿Aya wi “Ikiu numirín ajamkam wajamin wáinkíajme” takui Winia enentáimturamek? Antsu nuna nankaamas nekaachmin ana nusha wáinkíattame” tímiayi. ⁵¹ Nuyasha Jesus tímiayi “Wi nekas tájarme, Aents Ajasu asan atumsha nayaim uranmianum Yusa suntari Winin tara waka ajainia wáinkíattarme.” Tu tímiayi.

2

Nuatnaikiatin jísat Kaná péprunam ámiania nu

¹ Menaintiu tsawant nankaasmatai nuatnaikiatin jísat Kaná péprunam ámiayi. Kaná péprusha Kariréa nunkanmayuyayi. Jesusa nukurísha nu pujumiayi. ² Jesussha ni unuiniamurísha nu nuatnaiyamunam ípiaamu ámiayi.

³ Umutai amuukamtai Jesusa nukurí tímiayi “Umutai amuukai. Penké takakainiatsui.”

⁴ Tura Jesus tímiayi “Nukuá, ¿urukamtai Winia túrutam? Iniáitiústá. Winia kakarmar iniakmastiñ jeaatsui.”

⁵ Nuyá umutain wáinmainia nuna ni nukurí tímiayi “Ashí ni tana nu umiktárum.”

⁶ Nuí kayajai najanamu yumi-yaraatai sais (6) ámiayi. Nu yaraatainmaya Israer-shuar ni ewejéncha ni nawéncha nijiamau ámiayi Yus shiir enentáimtursatí tusar. Chíkich chíkich yaraatainiam uchenta (80) rítrusha, sian (100) rítrusha yumi wayamniauyayi.

⁷ Nuyá Jesus umutain wáinmaun “Ju yaraatai ámpratarum” tímiayi. Takui mete ámprarmiyai. ⁸ Ámprarmatai Jesus tímiayi “Pai, ishichik shikikrum námper chicharu suutarum.” Tutai nútiksai túrawarmiyai.

⁹ Jista chicharusha nu umutai ajasun nekáprámiayi. Yaraatainmaya yumi jusamun nekaachmai niisha tura umutai ajamau jusaru ásar nékarmai. Jista chicharusha nuwatun untsuk ¹⁰ tímiayi “Jístanmanka péñker umutain emka suíniatsuk. Tura jémararmatainikia tímianchan suíniatsuk. Túrusha ámeke péñker umutai ikiusam yamá jíkchamek” tímiayi.

¹¹ Jesus túramu Kananam Kariréa nunkanam túrunamiayi. Nujainkia Jesus emka ni kakarmarín paant iniaktusmiayi. Nuna ísar ni unuiniamurísha Nin enentáimtusarmiyai.

¹² Nuyá Kapernáum péprunam wémiayi. Ni nukurísha ni yachísha ni unuiniamurísha nemariarmiayi. Nuísha untsurí tsawant pujusarmiayi.

*Yusa Uunt Jeen suruktinian Jesus surimkiamiania nu
(Mateu 21.12-13; Márkus 11.15-18; Rúkas 19.45-46)*

¹³ Israer-shuara namperi, paskua tutai, ishichik ajasmatai Jesus Jerusarénum wémiayi. ¹⁴ Nuí jeá Yusa Uunt Jeen súruinian wáinkíamiayi. Turuncha murikniasha yampitsnasha súrin áirmiayi. Chikichcha ni misarín pujusar kuítian yapajíniancha wáinkíamiayi.

¹⁵ Nuna wáiniak yaranken chapikmar asutkiartutain najana nujai ashí waakartiuk murikrintiuk aa jíirmiayi. Kuítian yapajniu misaríncha ayantar ni kuítrin nunká utsankarmiayi. ¹⁶ Yampitsan súrinniasha tímiayi “Nuka juyá jíitiarum. Winia Aparu Jeen surutai jea najanawairap” tímiayi.

¹⁷ Nuna ísar ni unuiniamurí yaunchu Yus-Papinium áarman enentáimprarmiayi. Ju áarmaiti:
“Ame Jeem shiir atí tusan ti wakerukuitjai.”

¹⁸ Nuikia Israer-shuara uuntri Jesusan aniasarmiayi “Juna túramniaitjai tusam ¿warí kakarmak iniakmastatam?”

¹⁹ Jesussha tímiayi “Ju Jea sáakiakrumin menaintiú tsawantai iniantait-tijai Wikia.”

²⁰ Israer-shuarsha tiarmiayi “Kuarentisáis (46) uwitin juna jeamtinian pujursarmiayi. Amesha menaintiú tsawantai jeamtámeash.” ²¹ Kame Jesus “Jea” chichayat ni ayashín tímiayi. ²² Tuma asamtai Jesus ukunam jakamunmayá nantakmiatai ni unuiniamurí ni timian enentáimprar ni chichamencha tura yaunchu Yus-Papinium áarmancha “Nekasaiti” tu enentáimtusarmiayi.

Jesus ashí shuara enentáin nékawai

²³ Paskua námpertin ti untsurí Jerusarénum pujuarmia nu, Jesus aents tujintiamun túramtai, nuna wáinkiar Nin nekas enentáimtusarmiayi. ²⁴ Tuma ain Jesus ashí neka asa ninkia enentáimtuscharmíayi. ²⁵ Niñki ashí shuara enentáin neka asa chíkich ujatkat tusa atsumchamiayi.

3

Jesus Nikiutémujaí

¹ Shuar ámiayi ni naari Nikiutému. Niisha Pariséu asa nii tuinia áintsan Yúsna takauyayi. Niisha Israer-shuara uuntriyaí. ² Niisha kashi Jesusai irastajtsa wé tímiayi “Uuntá, shuáran unuiníarat tusa Yus akúptámkaiti. Nu paant nékaji. Yúsaiyanchuitkiumka aentsti tujintiamu túramna nu tujinkiaintme’ tímiayi.

³ Jesussha tímiayi “Tí nekas tájame. Atak yamaram akiiniachuka Yus akupeamunam pachiinkiashtatui.”

⁴ Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurí ampujén enkempramniakait atak akiiniatniuna?”

⁵ Ataksha Jesus tímiayi “Tí nekas tájame. Shuar entsayasha tura Wakan-niumiasha akiiniachuka Yus akupeamunam penké pachiinkiashtatui.

⁶ Ayashniumiá akiinia nuka ayashchakait. Núnisañ Wakanniúmiá akiinia nuka wakanchakait. ⁷ Wi “atak yamaram akiiniatniuiti” takui itiurchat

enentáimpraip. ⁸ Nase enentáimpratá. Nase nánkamsañ umpúawai. Ame-sha ántame tura tuyañ winiá túrasha tuñ weti nékatsme. Núniskete ashí Wakanniúmiá akiinia nu.”

⁹ Tuma asamtai Nikiutémusha atak anias “¿Yusha itiurak áminiait?” tímiayi.

¹⁰ Jesus áikmiayi “Ame Israer-shuara jintinniuríntiatmesha ¿itiura nékatsmea? ¹¹ Ti nekasán tájame. Nekas nékakur chichaaji. Íismajnia nusha ujaaji. Tuma añ ii chichame ántatsrume. ¹² Aya ju nunkanmayá túramu ujaam ántachkurmeka ¿itiurak nayaimpinmayá túramusha antuktaram?”

¹³ ‘Shuar chikichkisha nayaimpiniam waka atsawai. Aya Wiki, nayaimpinmayá taran Aents Ajasu asan, túraitjai. Tura Wikia nayaimpinmayaitjai. ¹⁴ Tura Winiasha, Aents Ajasu añ, mantuawartatui. Iis, yaunchu Israer-shuar atsamunam wekainiak napijijai ti jáiniakui tuke tsuamarti tusa Muisais napin jirú najana yakí numiniam awajaimiayi. Núnisnak Wisha awajnitniuitjai. ¹⁵ Nújainkia ashí Winia enentáimturna nuka jinium wétsuk Yusaj tuke iwiaaku pujustatui.”

Yuska ashí shuaran ti aneawai

¹⁶ Yuska ashí shuaran ti anea asa, ni Uchirín chikichik ana nuna shuáran uwemtikrarat tusa tsankatkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirín akúpturmakmiayi. ¹⁷ Yus áentsun kakerak jinium surukat tusa ni Uchirín akupkachmiayi. Antsu uwemtikrarat tusa akupkamiayi.

¹⁸ Yusa Uchirín enentáimtana nuka jinium penké surunkashtini-aiti. Tura Nin enentáimtatsna nuka, Yusa Uchirín chikichik ana nuna enentáimtachu asa, páchitsuk jinium surukmaiti. ¹⁹ Yusa Uchirí tsáapninia áintsañ ii tunaarj paant awajturmajai. Nu tsáapnisha ju nunkanam taraiti. Shuar tunáa ti tura ásar tsáapninian nakitrar kiritniun wakeriarmai. Nuna tura ásar jinium surunkaruiti. ²⁰ Ashí tunaan túruinia nuka tsáapninian mujjainiawai. Túrawar yupitiainiawai ni tunáa túramu paant ajasaj tusa. ²¹ Antsu ashí nekas túratniun umiiniana nuka tsáapninian weantainiawai. Yus ni enentáj pujuram tsáapninium takainiawai. Nuka ti paantaiti.

Imiakratin Juan ataksha Jesusnan chichasmiania nu

²² Nuyá Jesussha ni unuiniamurijjaisha Jutía nunkanam wear nuj pujusar imiakratiarmiayi. ²³ Juansha Enun nunkanam, Sarim tíjiuchia nuj, imiakratuk pujumiayi entsa nuj núkap aa asamtai. Tura aents táarmatai imiainiarmiayi. ²⁴ Nusha Juánkan sepunam enkenatsañ túrunamiayi.

²⁵ Tura Juánka unuiniamurj Israer-shuarjai jianaiktinian nankamawarmiayi. “¿Ya imiakratma imiá péñkerait?” tusar áujmatiarmiayi. ²⁶ Juánkaj inintrustai tusar wéarmiayi. “Uunta, ame nuik Jurtañ entsa amain pujakum shuar nuj pujá “núiti Yusa Murikri” tíchamkum. Yamaikia imiakratui tura ashí shuar Nin nemarainiawai” tíarmiayi.

²⁷ Tutai Juan tímiayi “Ashí kakarmaka aya Yúsaiyanchakait. ²⁸ Wisha paant tímiajai “Wikia Krístuchuitjai antsu ni jintin iwiarat tusan emka akupkamuitjai.” Nusha antukmarme. ²⁹ Kame shuar nuwan nuatna nuna áshrinti. Nuatnaiyak áishman nuwejai áujnainiakui, ni amikrishana nuna antuk ti waraatsuk. Wisha núnisnak aents Jesusaj wénakui ti

waraajai. ³⁰ Niisha tuke nan̄kaamaku uunt ajastiniaiti antsu wikia tuke tímiancha ajastiniaitjai.” Juan tu chichasmiayi.

Nayaimpinmaya tara nu

³¹ Nayaimpinmaya tara nuka ashí nan̄kaamakuiti. Nun̄kaya nuka, nun̄kaya asa jú nun̄kanmayanak áujmatui. Nayaimpinmaya tara nuka ashí nan̄kaamakuiti ³² tura nūj antukmancha íismancha áujmatui. Túrasha ni chichamen ántuiniatsui. ³³ Antsu ni chichamen ántana nuka “Yusa chichame imiá nekasaiti” tawai. ³⁴ Yus akupkamuka Yusa chichamen étserui. Yuska ni Wakanín ementutsuk susa asamtai tu étserui. ³⁵ Yus Apa ni Uchirín anea asa ashí ana nuna iistí tusa ataksaiti. ³⁶ Shuar Yusa Uchirín enentáimta nuka yamaram iwiaakmanum akiinia asa tuke Yusaj shiir pujustiniaiti. Antsu Yusa Uchirín enentáimtatsna nuka nu iwiaakmanum akiiniachuiti antsu Yus tuke nin kajerkaiti.

4

Jesus Samaria nun̄kanmaya nuwajai chichasmania nu

¹ “Jesus untsurí shuaran ni neparin awajeawai; kame Juanjaj nan̄kaamas untsurí imiaawai” taman Pariseu shuar antukarmiayi. ² Nekaska Jesus imiakratchamiayi, antsu ni unuiniamurí túrawarmiayi. ³ Pariséu nu chichaman antukarman Jesussha nekáa Jutía nun̄kanmaya jiinki Kariréa nun̄kanam waketkimiayi.

⁴ Wáketuk Samaria nun̄kanmaan̄j nan̄kaamaktiniuyayi. ⁵ Samaria nun̄kanam wéak Sekar péprunam jeamiayi. Nu pepru jeastatuk Jakupa nun̄ke ámiayi. Jakupsha nu nun̄kan ni uchirín Jusen tí yaunchu susamiayi. ⁶ Nūjsha yumirmat ámiayi. Jakup taurma asamtai “Jakupa yumirmatrí” tiarmiayi. Tutupin jeamtai Jesussha pimpiki winis yumirmat ayamach pujusmiayi. ⁷ Nūj pujaj Samarianmaya nuwá yumí shikiktajtsa támiayi. Tura Jesus “Entsa surusta” tímiayi. ⁸ Jesusa unuiniamurísha yurumkan péprunam sumaktajtsa wéaru asamtai aya Jesusak pujumiayi.

⁹ Samarianmaya nuwá Jesusan tímiayi “¿Itiura Israer-shuaraitatmesha Samarianmaya nuwá āisha entsa seatam?” Kame Israer-shuar Samarianmaya shuarjain̄kia pen̄ké chichachu ásar nuna tímiayi.

¹⁰ Jesussha tímiayi “Yus súamu nékakmekka tura entsa surusta tájam nusha nékakmekka ame antsu seattínme tura Wikia iwiaaku entsan amaintjai.”

¹¹ Nuwásha tímiayi “Uunta, entsasha ti iniaitai tura shikiktincha takaktsume. ¿Tuyaj iwiaaku entsasha surustam? ¹² Ii uuntri Jakup jú yumirmatan taur juyanak niisha ni uchirísha ni waakarísha umararmiayi. Nuyá ikiurtamkimiaji. ¿Amesha Jakupjai nan̄kaamas kakarmakaitiam?”

¹³ Jesussha tímiayi “Ashí shuar jú entsan umarka ataksha kitiamtiatui. ¹⁴ Antsu Wi súajna nú entsan umarka pen̄ké kitiamchattawai. Antsu nu entsa Wi susamuka ni enentáin púkunia áintsan̄ tuke pajamtiatui nujai tuke iwaaku pujustí tusa.

¹⁵ Tutai nuwá tímiayi “Uuntá, winiasha nu entsa surusta. Wisha kitiamcha átaj. Tura jú entsancha shikiktinian táchataj” tímiayi.

¹⁶ Nuyasha Jesus tímiayi “Áishrum untsukam utitia, turam jūj tatá.”

¹⁷ Nuwásha “Winia áishur atsawai” tímiayi.

Tutai Jesus tímiayi “Maa, nekas tame. Áishrum atsawai. ¹⁸ Kame ame áishrum senku (5) takusitme. Yamái takakmena nusha ame áishrumchaiti. Nekas tame.”

¹⁹ Nuna antuk nuwasha tímiayi “Uunta, ame Yúsnan etserni-uchukaitiam. ²⁰ Ii únuntrinka tuke Samarianam pujuarmia nu jú nainnium Yúsán tikishmatrarmiayi. Antsu átum Israer-shuar árumna nu aya Jerusarénum Yus tikishmátratniuiti tárume.”

²¹ Jesus tímiayi “Nuwá, enentáimsata. Tsawant jeattawai átum jú náinniumsha tátsuk tura Jerusarénumsha wétsuk Yus Apa tikishmatratin. ²² Átum tikishmatrum nuka nékatsrume. Iikia tikishmatrajnia nu nékaji. Israer-shuarnumiá Uwemtikkiartin winiakui nékaji. ²³ Tsawant winítiana nu yamáí jeayi. Ashí shuar Yus Apan nekas tikishmatainiakka tuke wakanjai tuke enentáijjajisha awajitsuk tikishmatrartatui. Núnisañ tikishmatrurat tusa wakerawai Yus Apa. ²⁴ Yuska Wakaniiti tura ashí Nin tikishmatainia nuka tuke wakanjjajai tura tuke enentáijjajai awajitsuk tikishmatratin ániawai.”

²⁵ Nuwasha tímiayi “Anaikiamua nu tátiniaiti. Nusha Krístuiti. Niisha taa ashí jintinramattaji.”

²⁶ Jesus tímiayi “Wiitjai. Ámin chichaaajmena nú Krístuitjai.”

²⁷ Nuiñ ni unuiniamurj táarmiayi tura nuwajai chichaa pujan wáinkiar ti enentáimprurarmiayi. Tumaitiat “¿Warí wakerakmea nuwajai chichaaam?” títinian arantukarmiayi. ²⁸ Nuyanka nuwá ni yumirñ ikiuki péprunam we ashí áentsun tímiayi ²⁹ “Winiirum ítiarum, shuar ashí wi túramun túruta nu. ¿Juka Krístuittiya?” ³⁰ Tutai péprunmaya jíinkiar Jesus pujamunam wearmiayi.

³¹ Jeainiatsañ ni unuiniamurj seak tiarmiayi “Uunta, yurumáta.”

³² Tura Jesus tímiayi “Wi yúatniunka takakjai átum nékachman.”

³³ Ni uniuniamurjsha nuámtak anniasarmiayi “¿Chíkich shuar yurumak itiarím tátsuash?” tiarmiayi.

³⁴ Tura Jesus tímiayi “Winia akuptukua nuna wakeramurj túrakun tura ni takatrñ takaakun Wíjjajainkia yurumátniua áintsañ ikiakáatui. ³⁵ Átumka “Tuke kuaru nantu árak júuktin taasai” tátsurmek. Túrasha Wi tájarne, shuar wininia nu iistarum. Yus-Chicham ni enentáin araamuiti. Tura júuktin tsawant jeayi. ³⁶ Arakan júaka akinkiatniuiti. Júukmataisha nu shuar uwemprar tuke iwiaaku pujusartatui. Núnisañ arakan araana nusha júana nusha mai metek warasartatui. ³⁷ Tiniu armia nuka nekasaiti: “Chikichik araawai chíkichcha júawai.” ³⁸ Iis, chíkich arakmamu júuktinian akupkaitjarne. Átum araachiatrumek chíkich takasmanum atumsha pachíintiukuitrume” tímiayi.

³⁹ Tura núwaka péprunam jeá “Ashí wi túramun ujat kayi” takui untsurj shuar Jesusan ti shiir enentáimtusarmiayi. Niisha Samarianmaya shuar ármiai. ⁴⁰ Nu asamtai ashí Jesusaj taar niijjai pujusát tusa seawarmiayi. Tutai Jesus jimiará tsawant nuj pujusmiayi. ⁴¹ Nú shuar untsurj ni chichamen antukar Jesusan ti shiir enentáimturarmiayi. ⁴² Nuyá nuwan tiarmiayi “Yamaikia aya ame chichammijjajñ Jesus enentáimtatsji antsu imia iisha ni chichamen anturkaji. Tura nékaji nekas Krístuiti, ashí shuaran Uwemtikin.”

Jesus akupniu takarniurj uchirñ tsuármiania nu

⁴³ Jimiará tsawant nan̄kaasmatai Jesus Samaria nun̄kanmayā jink̄i Kariréa nun̄kanam wémiayi. ⁴⁴ Kariréasha Jesusa nun̄ke asamtai, aĩnsha Jesusa timia áintsan̄ ámiayi: “Yúsnan etserniun ashí shuar péñker anturainiawai antu nuna nun̄keyan̄ka nin anturainiatsui.” ⁴⁵ Tuma aĩn̄ Kariréa nun̄kanam jeamtai auyá shuarsha Jerusarénnum paskua námpernum wearu ásar tura ashí ni túramun nuĩ wainkia ásar ti shiir awajsarmiayi.

⁴⁶ Nuyá Jesus Kaná péprunam atak támiayi. Nu péprunmasha nuik Jesus yumin umutai awajsamiayi. Jesussha nuĩ pujaī yajā péprunam Kapernáumnum akupniu takarin̄ ámiayi. Ni uchir̄isha jaa tepemiayi. ⁴⁷ Niisha Jesus Jutianmayā Kariréa nun̄kanam taman antuk Jesusaī wémiayi. Tura ni uchir̄ī jákatin tepakui ni jeen we ni uchir̄in̄ tsuarat tusa Jesusan seamiayi.

⁴⁸ Jesussha tímiayi “Aya aents túrachminian túrakui ísrum aya nújain̄ Winia enentáimtarme.”

⁴⁹ Tura takarin̄ tímiayi “Uunta, winia uchir̄ jáatsain̄ wari winitia.”

⁵⁰ Nuĩnkia Jesusa tímiayi “Jeem̄in̄ waketkitia. Yamaikia ame uchiram péñker ajasai.” Tutai nú aishman̄ Jesusa táman antuk wémiayi.

⁵¹ Ni jeen jeátémámtai ni takarniur̄ī in̄kiun̄ tiarmiayi “Yamaikia uchiram péñker ajasai.”

⁵² Apasha inintrusmiayi nantu urukaim péñker ajasma.

Niisha tiarmiayi “Yau, nantu pukuntamtaí, tsuemun michatramai” tiarmiayi.

Nuna antuk uchí apar̄isha enentáimsamai. ⁵³ Nantu pukunta aī Jesusa “Ame uchiram péñker ajasai” timia nuní aĩn̄ michatrait̄i. Tuma asamtai niisha ashí ni shuar̄isha Jesusan nekas enentáimturarmiayi.

⁵⁴ Jesus nū túramujaī ni kakarmarin̄ jimiará iniakmasmiayi. Nunasha Jutianmayā jiinki Kariréa nun̄kanam jeá túramiayi.

5

Petesta amia nuĩ tampemaron̄ Jesusa tsuármiania nu

¹ Nu nan̄kaasmatai, Israer-shuar namperan najanainiakui Jesusa ataksha Jerusarénnum waketkimiai. ² Jerusarén yama wayamunam murik wayatin̄ waitī t̄jiuch̄ amia nuĩ entsa pajamtaí jeammauyayi. Nu pajamtain̄ Petesta tiarmiayi. Nuna wáitir̄isha sen̄ku (5) ármiai. ³ Nuĩ untsur̄ī jáiniak nun̄kanam tepear̄miayi. Kusurusha shutuapsha tampe-makusha tepesar entsa miartukat tusa nákasarmiayi. ⁴ Kame ni tátaj taku Yusa suntarī táuyayi entsan umuchkiattsa. Nuyan̄ka emka shuar entsá wayá nu ni jáamuriyā tsuámarmiai. ⁵ Áishman̄ traĩntiúchu (38) uwi jaa tepá nuĩ ámiayi.

⁶ Jesussha nu shuaran nuĩ tepan wáinkíamiayi. Tura untsur̄ī uwitin jaa tepan nekáa aniasmiayi “¿Shiir ajastiniak wakeram?”

⁷ Tutai jaasha tímiayi “Uunta, entsa muchitkiuī ¿winia yaki en̄kétát? Kame wi en̄kemátaj taī ch̄ikich̄ emka en̄kemáiniawai.”

⁸ Nuyá Jesusa tímiayi “Nantaktia. Ame peakrum jukim wetá.”

⁹ Nu chichamtaik̄ áishman̄ shiir ajasmiayi. Tura ni peakrin̄ jukí wémiayi. Nusha ayampratin̄ tsawantaī túrunamiayi. ¹⁰ Tuma asamtai Israer-shuar shiir ajasan̄ tiarmiayi “Yamáí ayampratin̄ tsawantaiti. Peakrum júkishtiniatme” tiarmiayi.

¹¹ Áishmaṅsha tímiayi “Winia tsuara nu “Peakrum jukim wetá” turutni” túmiayi.

¹² Nuñkia aniasarmiayi “¿Ya “Peakrum jukim wetá” túramam?” tiarmiayi. ¹³ Tura áishmaṅsha Nin tsuárun nekáchmiayi. Untsurí shuar nuḡ aa asamtai tura Jesus weu asamtai nin nekaachmiayi.

¹⁴ Atak Jesus Yusa Uunt Jeen áishmaṅkan wáiniak tímiayi “Antukta. Yamaikia shiir ajasume. Atak tunáa túrawaip; nu arant ajasáim” tímiayi. ¹⁵ Nuñkia áishmaṅ Jesus nin tsuárman nekáa Israer-shuaran ujakmiayi. ¹⁶ Tuma asamtai ayampratin tsawantaj túramtai Israer-shuar Jesusan maatai tusar áintrarmiayi. ¹⁷ Tura Jesus tímiayi “Wina Apar tuke yamaisha takawiti. Núnisnak Wisha takaajai.” ¹⁸ Tutai Israer-shuar nuna nankaamas maatai tusa wakeriarmiayi. Ayampratin tsawantaj takaakui kajerarmiayi. Tura nu arantcha “Yus winia Aparuiti” takui Yusjaj métek enentáimtumawai tusar nu arant kajerarmiayi.

Yusa Uchirí túramnia nu

¹⁹ Nuyá Jesus tímiayi “Ti nekas tájarme, Yusa Uchirínkia ni enentájjain takaatsui. Antsu aya winia Apar takaana nuna ísan métek takaajai. Ashí winia Apar túramun Wisha ni Uchirí asan métek takaajai. ²⁰ Ni Uchirí asamtai winia Apar anentui tura ashí tura nuna iniakturui. Tura nuna nankaamas tujinkiamnian iniaktursattawai Wisha túratniun. Tura nuna túrakui ashamkattarme. ²¹ Winia Apar jakamunmayan iwiaaku ajasat tusa Ni wakerana nuna inianteatsuk. Núnisnak, ni Uchirí asan, Wi wakeraj nuna iwiaaku awájsáimnaitjai. ²² Winia Aparka súmamtiksui antsu shuar súmamtikiatniun ni Uchirín súsaiti. ²³ Tuma asamtai ashí shuar Yus Apan shiir awajainia áintsan ni Uchiríncha métek shiir awajsatin áiniawai. Yus Apa ni Uchirín akupka asamtai, Uchin shiir awajeatsna nuka Yus Apancha shiir awajeatsui’ tímiayi.

²⁴ ‘Ti nekasaiti. Winia chichamprun ántana nú shuarka Winia Akup-tukun enentáimtak ni iwiaakmarín tuke amuukashtinian takakui. Nu shuarsha ayashí iwiaakuitiat jákauyi antsu yamá nekas iwiaakuiti. Tuma asa sumamashtatui. ²⁵ Ti nekasaiti. Tsawant winittiana nu jeayi. Nu tsawant jaka ainia nu Wi untsumman antukar umirkarka iwiaaku ajasartatui. ²⁶ Iis, winia Apar iwiaaku awajsatniun takakui. Tura Winiasha, ni Uchirí asamtai, iwiaaku awajsatniun surusuiti. ²⁷ Nu arantcha wi Aents Ajasu asamtai, shuaran súmamtikiatniun surusuiti. ²⁸ “Ju chicham itiurchataiti” enentáimprairap. Atak tsawantaj wi untsumman ashí jákaru ainia nu antukartatui. ²⁹ Tura ashí iwiansamunmaya jínkiartatui. Péñker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui’ tímiayi.

“Jesus nekas Yúsaiyaíti” tu áujmatainia nu

³⁰ ‘Imia Wíki takaatsjai. Antsu Yus tana núnisnak súmamtikeajai. Wi wakeraj nuna enentáimtsuk antsu winia Apar wakera nuna wakerukan, Nii akupta asamtai, awajitsuk súmamtikjai. ³¹ Aya Wiki “Yúsaiyaítjai” tákunka winia chichamur ántar ainti. ³² Chikichcha awai. Niisha “Yúsaiyaíti” túrutui. Ni chichamesha imiá nekasaiti. ³³ Atumsha Juankej wi túramu inintrusmarme tura nii timia nu nekasaiti. ³⁴ Tuma aijn aents táman atsumatsjai. Antsu Juanka chichame enentáimkiuram uwempratarum tusan tájarme. ³⁵ Juansha jiya núnis keemai. Atumsha ishichik tsawantin nú tsáapninnium warastin enentáimprarmarme. ³⁶ Tura

Winia “Yúsajyaiti” túrutna nu, Juanjaj nankaamas péñkeran takakjai. Wi takasma núiti. Winia Apar takastinian surusma nuna takaakun nujaj páantaiti Yus Apa akupkamuitjai. ³⁷ Winia Aparsha, akuptuku asa, ayamprutui. Túrasha átumka ni chichamesha antukchaitrume tura wáintiash wáinkiachuitrume. ³⁸ Yus Apa akuptukuiti. Tuma asamtai Winia enentáimturchakrum winia Aparu chichamesha atumi enentáin wayachuiti. ³⁹ Átumka Yus-Chicham yaunchu aarma nuñ iwiaaku átinian wáinkiataj tusarum ti unuimiaruitrume. Nu chichamsha Wínian áujmatui. ⁴⁰ Tuma ain nekas iwiaaku átaj tusarum Winí tátin nakitiarme” tímiayi.

⁴¹ “Shuar Winia “shíiraiti” túrutainiakuisha nuna páchiatsjai. ⁴² Maa, Wi nékajrume. Átumka Yus aneatsrume. ⁴³ Winia Apar akuptukmatai táwitjai túrasha nakitrarme. Antsu chíkichka ní enentáijjain jeartamkuñkia nuka átum wakerarme. ⁴⁴ Átumka nuámtak “Shiir enentáimtursatí” tu enentáimtunaiyarme. Tura Yus enentáimturma nuka páchiatsrume. Nújainkia çitiurak Yus enentáimtustam? ⁴⁵ “Ti tunaarín Yusaj etserturmaktají” turutiirap. “Muisais akupkamun umirkan uwemprattajai” tátsurmek. Antsu Muisais aarma nujaj atumí tunaarj etsernaktatui. ⁴⁶ Iis, Muisais Winia áatrurmiayi. Atumsha ni timia enentáimtakrumka Winiasha enentáimturaintrume. ⁴⁷ Tura ni aarma enentáimtachkurmeka çitiurak wi tama enentáimtustarum?” tímiayi Jesus.

6

Jesus senku mir (5.000) áishmanñkan ayurawarmiania nu (Mateu 14.13-21; Márkus 6.30-44; Rúkas 9.10-17)

¹ Nu nankaasmatai Jesus Kariréa antumianñnum amain katinñmiayi. Nu antumianñsha Tipirias antumianñ tuñniawai. Jimiará náartiniaiti. ² Untsurí shuar Jesus ti jáinian timiá wárik tsuan wáinkiaru ásar Nin nemariarmiayi. ³⁻⁴ Israer-shuara paskuanamperj ishichik ajasmatai Jesussha ni unuiniamurijjaj náinnium waka nuñ pujusmiayi. ⁵ Jesussha untsurí aents wininian wáiniak Jiripin tímiayi “Timiá untsurí shuar ayuratniusha çtuyan yurumak sumaktají?” tímiayi. ⁶ Kame Jesuska Nii túrattana nuna neka asa Jiripi warittin tusa tímiayi.

⁷ Jiripisha nuyá tímiayi “Timiá nukap kuitjaj tanta sumakmesha ashí ishichik susamsha jeachaintjia” tímiayi.

⁸ Nuyá chíkich unuiniamurj Antres, Pitru yachj, tímiayi ⁹ “Uchi juñ senku (5) tantan jimiará namakjaj takakui. Ausha timiá untsurjnmasha jeatpiash” tímiayi.

¹⁰ Nuyañka ““Ashí pujustarum” titiarum” tímiayi Jesus.

Áishmanñsha nuwasha uchisha irunmiayi. Tura chírichri núkap aa asamtai nuñsha senku mir (5.000) áishmanñ pujusarmiayi. ¹¹ Jesussha nu tantan achik Yúsán yumñkias ni unuiniamurjñ susamiayi. Niisha ashí nuñ pujuinian súsarmiayi. Namaknasha núnisan ashí ni wakeriarmiania nuna súsarmiayi.

¹² Jémararmataisha Jesus ni unuiniamurjñ tímiayi “Ampirma júukrum chañkinnium chumpiatarum. Wasúrnákain.” ¹³ Niisha senku (5) tantan-mayá ampirman júukar tuse (12) chañkinnium áimkiarmiayi.

¹⁴ Nu shuarsha Jesus túramun ísar tiarmiayi “Ju nekas Yúsán etserin tátinia núchakait.” ¹⁵ Shuar Jesusan uunt akupin awajsataj tutai Jesus nekáa Niñki náinnium wémiayi.

Jesus entsá pátatek nanamas wekasamiania nu

(Mateu 14.22-27; Márkus 6.45-52)

¹⁶ Kǎkui Jesusa unuiniamuri antumiannum wearmiayi. ¹⁷ Káshisha Jesus tuke táchamtai uunt kanunam enkemáwar Kapernáum péprunam wéenak jíinkiarimiayi. ¹⁸ Tura nase ti umpúakui chíchimi ti wajaimiayi. ¹⁹ Ajapén ajaras Jesus entsá pátatek nanamas tíjiuch winian wáinkiar ashamkarmiayi. ²⁰ Tura Jesus “Wiitjai. Ashamprukairap” tímiayi. ²¹ Nújainkia ti shiir warasar kanunam itiaawarmiayi. Tura nu chicham-taik ni wéamunam jeawarmiayi.

Shuar Jesusan eak wekainiawai

²² Kashincha chíkich shuar amain ayuramunam kanararu nekaawar-mai. Jesusa unuiniamuri Jesusjainchu chikichik kanu amia nujai wéarun nekaawarmai. ²³ Nuj chichak matsatai Tipirias péprunmaya chíkich kanu táarmiayi. Yau Jesus Yúsan yuminǎkias tantan ayuramunam tíjiuch táarmatai ²⁴ nu shuar, Jesussha ni unuiniamuri sha nu atsuiniakui, nu kanunam enkemáwar Kapernáum péprunam Jesusan eáktajtsa wearmiayi.

Jesus apatkua áintsanǎkete

²⁵ Entsa amain Jesusan wáinkiar aniasarmiayi “Uunta, ¿urutía juisha támam?”

²⁶ Jesussha tímiayi “Ti nekas tájarme. Aents tujintiamu nekáa asarum éatsurme. Antsu tanta yuarum jémaru asarum éatrume. ²⁷ Juyá yuru-mak amuukatin asamtai ti pachisairap. Antsu amuukashtin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Juka shuáran Yáinkiertiniaiti” túrutui” tímiayi.

²⁸ Tutai inintrusarmiayi “¿Warí túratniuitiaj! Yus wakerana nu umik-tin?”

²⁹ Jesussha tímiayi “Yus akupta asa Winia enentáimtursarat tusa waker-awai.”

³⁰ Tutai aniasarmiayi “¿Aentsti tujintiamuka warí túrattam ii íisar Ámin nekas enentáimtustin? Chikichcha túratá. ³¹ Yaunchu ii uun-tri aents atsamunam maná yurumkan nayaimpinmaya susamun yu-rumáwarmiayi. Yus-Chichamnum núnik áarmaiti: “Nayaimpinmaya yu-rumkan Yus susamiayi.” Tu áarmaiti” tiarmiayi.

³² Jesussha tímiayi “Wi tájana nu nekasaiti. Muisais atumí úuntrin nayaimpinmaya yurumkan súsachmiayi. Antsu winia Apar yamá nekas apatkun nayaimpinmaya súramui. ³³ Íis, Yusaiya apatkunka, nayaimp-inmaya tára nu súramui tura nekas apatuk asa ashí shuaran nekas iwiaakman súawai.”

³⁴ Tutai “Uunta, nu apatuk tuke amasta” tiarmiayi.

³⁵ Tura Jesussha tímiayi “Wiitjai nu apatuk nekas iwiaakman súana nu. Winí winiana nú shuar penké tsukamashtatui, tura Winia enentáimturna nusha tuke kitiaarchattawai. ³⁶ Túrasha wi túramu wáinkiu mesha winia chichamur enentáimtatsrume. ³⁷ Ashí shuaran winia Apar tsanǎkatrukarmiania nu, Wíi shuar ajasartatui. Winin winiana núnaka penké nakitrashtatjai. ³⁸ Wi wakeraj nuna túratniun táchaitjai antsu Winia akuptukmia nuna umirkatniun táwitjai. ³⁹ Winia Apar akup-tukuiti tura juna wakerawai. Ashí winia tsanǎkatrukman emenǎkatsuk amuukatin tsawantaj iniantkariat tusa wakerawai. ⁴⁰ Yus Apa wak-erana nu júiti. Ashí shuar Winia “Yusa Uchirinti” tu enentáimturkui

yamaram iwiaakman tuke takusat tusa wakerawai. Nú shuarnaka amuukatin tsawantaj iniantkittiajai” tímiayi Jesus.

⁴¹ Tura Jesus “Wiiitjai, nayaimpinmaya apatuk akupkamu” takui Israer-shuar Jesusan áujmatiarimiayi.

⁴² Tura tiarmiayi “Jü Jesuschakait, Jusé uchiríya nu. Iikia ni aparísha nukurísha nékatsjik. ¿Itiurak “Nayaimpinmaya táraitjai” ta?” tiarmiayi.

⁴³ Jesussha tímiayi “Tu áujmatrukairap. ⁴⁴ Shuáran winia Apar akúpturkachuitkiuinikia penké weanturkachainti. Tura Winia akupturna nuna amuukatin tsawantaj iniántkittiajai. ⁴⁵ Yúsnan etserniu áarmarín tawai “Ashí Yus jintintiamu ártatui”. Núnisan ashí Yusa chichamen antukar unuimiatainiakka Winí táiniawai’ tímiayi.

⁴⁶ ‘Aya Wiki Yúsaiya tau asan Yúsan wáinkiaitjai. Chíkichka penké wáinkiachuiti. ⁴⁷ Ti nekas tájarme. Winia enentáimturna nú shuarka yamaram iwiaakman amuukashtinian takakui. ⁴⁸ Wikia iwiaakman súana nú apatkuitjai. ⁴⁹ Iis, atumí uuntri aents atsamunam maná yurumkan yúawariatcha ashí jákarmiayi. ⁵⁰ Antsu Wi tájana nú apatkun shuar yúakka jákachartatui. ⁵¹ Wikia nayaimpinmaya iwiaaku apatkuitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashruiti. Ashí shuar Yusaj iwiaaku pujusarti tusan winia ayashrun susattajai” tímiayi Jesus.

⁵² Nuyá nuámtak áujmattsar tiarmiayi “¿Itiurak ni ayashínkesha ayurta-mattaj?” tiarmiayi.

⁵³ Jesussha tímiayi “Ti nekas tájarme, Wi Aents Ajasu asamtai winia ayashur yúatniuitrume. Winia ayashur yúachmeka tura winia numpar umarchamka nekas iwiaaku pujatsrume. ⁵⁴ Winia ayashrun yúana nuka tura winia numparun úmakka yamaram iwiaakman amuukashtinian takakui. Tura nu shuaran amuukatin tsawantaj iniántkittiajai. ⁵⁵ Winia ayashruka nekas yurumkaiti tura winia numparsha nekas umutainti. ⁵⁶ Winia ayashruncha yúaka tura winia numparnasha úmaka Wijijai tsaniñ pujawai tura Wisha nu shuarjai tsaniñkian pujajai. ⁵⁷ Yus Apa, Winia akuptukuka, nu iwiaakma nérenniuiti. Tuma asamtai ni iwiaakmarín iwiaaku pujajai. Núnisan Winia yurakka winia iwiaakmarui iwiaaku pujustatui. ⁵⁸ Nayaimpinmaya apatkun tajai. Jü apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu jü apatkun shuar yúakka tuke iwiaaku pujustatui” tímiayi Jesus. ⁵⁹ Núnaka Jesus Israer-shuar iruntainiam unuiniarmiayi.

Iwiaaku chicham

⁶⁰ Nu chichaman antukar Jesusa unuiniamurj chicharainiak “Nii tana nu ti itiurchat asamtai ¿yaki antukminiait?” tiarmiayi.

⁶¹ Jesussha ni áujmatman nekáa tímiayi “Átum “jü chicham itiurchataiti” tárumek. ⁶² Wátsek, Wi nayaimpiniam pujumiaj nuj waketkimtaisha ¿urukawaintrume? ⁶³ Warí, aya wakanik iwiaakman súwaiti. Ayashkia penké áantraiti nekas iwiaaku awajsatniun. Wi tájana nujaj imiá nekas wakankia iwiaaku awajsamniaiti” tímiayi Jesus. ⁶⁴ Tura Jesus Nin enentáimtachun tura Nin suruktatna nunasha yaunchu neka asa ni unuiniamurjín tímiayi “Atumíncha winia chichamprun enentáimtachu tuke awai. ⁶⁵ Nu asamtai tímiajrume “Shuáran winia Apar akupturkachmaitekuiñkia penké weanturkachainti” tímiajai” tímiayi Jesus.

⁶⁶ Nuyasha ni nemarniuri untsurí armia nu Jesusan ikiukiar atakka Nijjajai wekasacharmiayi. ⁶⁷ Nuyá Jesus ni tuse (12) unuiniamurín chicharainiak “¿Atumsha wétin wakerarmek?” tímiayi.

⁶⁸ Semun Pítrusha áikmiayi “Uunta, zyáiniñ wetaj? Ame chicham-mijjajin nekas iwiaaku áminiaiti. ⁶⁹ Ame Kristu asam nekas iwiaaku Yusa Uchirínme. Nuka enentáimtusar ti paant nekaji” tímiayi.

⁷⁰ Jesussha tímiayi “Ashí tuse (12) árumna nu achikiuitjiarme nekas Wíi shuar ajastin. Tuma ain atumjín chikichik iwianchiiti” tímiayi. ⁷¹ Nuna taku Jútas Iskariútin, Semunka uchirín, enentáimtus tímiayi. Jútassha ni unuiniamuríntiat Jesusan ukunam surukmiayi.

7

Jesusa yachísha Nin enentáimtuscharmíayi

¹ Nu nankaasmatai Jesus Kariréa nunkanam wekaimiayi. Jutía nunkanam wéchamiayi Israer-shuara uuntriñ nuñ máataj tutai. ² Tura Israer-shuar aak aakmatai namperi jeatemamtai ³ Jesusa yachí wishiki-ainiak tiarmiayi “¿Urukamtai juísha pujam? Jutía nunkanam wetá, aisha ame unuiniamuram túram nuna ísarat. ⁴ Ashí shuar nekaawarat tákumka úukam túrawaip. Ti tujintiamu túriniaitkiumka ashí shuar íimianum túratá” tiarmiayi. ⁵ Ni yachísha ishichkisha Nin enentáimtachu ásar tiarmiayi.

⁶ Tura Jesus tímiayi “Winia tsawantur nampernum wétin jeatsui. Atumjainkia nánkamas tsawant wétin péñkeraiti. ⁷ Ju nunkanmaya aents atumniaka kajertamatsrume. Antsu ni tunaarín etsertin asamtai Wíniaka kajertuiniawai. ⁸ Átumka nampernum wetarum. Wikia tsawantur jeachkui wéatsjai.” ⁹ Juna tinia Jesuska Kariréa nunkanam juákmiayi.

Aak aakmatai nampernum Jesus timia nu

¹⁰ Ni yachí wearmatai Jesussha nampernum wémiayi. Tura nekarawarain tusa úumak wémiayi. ¹¹ Israer-shuara úuntriñsha námper irunturmanum éakar “Nu aishmansha ¿tuin pujá?” tiarmiayi. ¹² Ashí shuarsha Nin áujmatiarimiayi. Chíkich “pénkeraiti” tiarmiayi. Tura chikichcha “Pénkerchaiti. Aya anañkartawai” tiarmiayi. ¹³ Tura Israer-shuara úuntriñ ashamainiak uuk áujmatiarimiayi.

¹⁴ Nampersha ajapén ajasmatai Jesus Yusa Uunt Jéen wayá shuáran unuiniamiayi. ¹⁵ Israer-shuara úuntriñsha nuna ísarat ti enentáimsar chichaak “Jusha unuimiátrachiatcha ¿itiurak imiá neka?” tiarmiayi.

¹⁶ Jesussha tímiayi “Wi unuiniaina nu winia chichampruchuiti antsu Winia akuptukua Núnan unuiniajai. ¹⁷ Yus wakerana nuna shuar nekas umiktinian wakerakka winia chichamprun nekaattawai. Nekas Yúsnaikuiñkia, nuna nekaattawai. Aya wi enentáimmiyajajin chichaakuisha, nuna nekaattawai. ¹⁸ Ni enentáimmiyajaj chichaana nuka ashí shiir enentáimtursarti tusa chichaawai. Antsu nin akupka nuna shiir awajsarti tusa wakerak, nekas wáitratsuk tawai. ¹⁹ Muisais Yusa akupkamurín atumí uuntriñ amaschamka. Tuma ain nu umitsuk mantuatín wakerutarme” tímiayi Jesus.

²⁰ Nu shuarsha tiarmiayi “Wáurtsumek. ¿Ya mantamataj tusa wakera?”

²¹ Jesussha tímiayi “Ayampratin tsawantaj chikichkí túramtai ti enentáimtsurmek. ²² Muisais ashí tsupirnaktinian akupkachmiayi. Antsu ni uuntriñkia nuna akupka áiniawai. Tuma ain átumka Muisais

akupkamu umiktai tusarum ayampratin tsawantaisha uchi áishman tsúpirnaitrume. ²³ Wátsek, Muisais akupkamu uminkiatu tusarum ayampratin tsawantaisha uchi áishman tsúpirkurmekaka çurukamtai Wi ayampratin tsawantaj áishmanka ayashí takamtsuk tsuármatai kajertarum? ²⁴ Shuar túrana nu ísam wárik súmamtikiawaip. Antsu ininrúsam paant nekaam, nekasa nu enentáimtusta” tímiayi Jesus.

Jesus Yúsnumiá akupkamuiti

²⁵ Nuyá Jerusarénnumiá shuar tiarmiayi “Maatai tuinia núchakait. ²⁶ Tura nuí ashí ántamunam étserui tura suntar páchiniatsui. ¿Ii uuntriasha “Nekas Krístuiti” tu enentáimtuiniawash? ²⁷ Antsu nekas Krístu taa tuyan winiá nekanashtatui tura ju pujamuka ashí nékaji” tiarmiayi.

²⁸ Jesus nuna antuk, Yusa Uunt Jeen wájá kakaram chichaak tímiayi “Winia nekararum tuyá winiay nu nékarme. Kame núnisrum enentáimprume. Tura winia enentáirjai táchaitjai antsu winia Apar akuptukuíti. Niisha ti nekas akupniusha átumka nékatsrume. ²⁹ Antsu Winia akuptukuitkiui aiyá tau asan Wikia nékaji” tímiayi. ³⁰ Nuyá sepunam enkeataj táyat achikcharmiayi ni tsawantri jeachu asamtai. ³¹ Tura untsurí shuar Nin enentáimtusar “Krístu ta ¿nuna nankaamas aentsti tujintiamun túratpiash?” tiarmiayi.

“Eátkáttarme tura wáitkiashtatrume” tímiayi Jesus

³² Pariséusha Israer-patri úuntriasha Jesusnan timian antukar suntaran akupkarmiayi Jesusan achikiar sepunam enkeawarat tusar. ³³ Nuyá Jesussha tímiayi “Aya ishichik tsawant atumjai pujustatai. Nuyá ataksha Winia akuptuku pujana nuí waketkittijai. ³⁴ Átumka eátkáttarme tura Wi wéajna nuí wéchamniaitkiuram wáitkiashtatrume.”

³⁵ Israer-shuarsha nuamtak aniniaisarmiayi “¿Jusha tui wéakuin iisha wáinkiashtataji. Israer-shuar apachnium pujuinia nuí we apachin unuiniartatuak. ³⁶ Nii timia nu iturkit. “Átumka eátkáttarme tura Wi wéajna nuí wéchamniaitkiuram wáitkiashtatrume” tana nu iturkit?” tiarmiayi.

Yamaram iwiaakman súana nú entsa

³⁷ Jista amúamunam ti shiir najanawarmia nu tsawantaj Jesus wajakí kakaram chichaak tímiayi “Shuar ni enentáin kitiamakka Winin taa umar kitiakén imikráti. ³⁸ Winia enentáimturna nuka ni enentáiyá entsa wa áintsan yamaram iwiaakman súana nú entsa jiinkittiwai.”

³⁹ Nuna taku Jesus “Ashí Yúsan enentáimtusarun Yusa Shiir Wakaní súsatniuiti” tímiayi. Tura núnisan Yus-Papiniumsha áarmaiti. Antsu Jesus tuke nayaimpiniam wéatsain Yusa Wakaní shuar súdachmauyayi.

Shuarsha niisháa niisháa enentáimprarmiania nu

⁴⁰ Chíkich shuarsha nuna antukar “Ju nekas Yúsnan etserin tátinia núiti” tiarmiayi. ⁴¹ Chíkichcha “Juka nekas Krístuiti” tiarmiayi. Tura chíkichkia Jesus Kariréanmayaiti tu enentáimiainiak tiarmiayi “Warí, ¿Kariréa nunkanmayá Krístu áminkiait? ⁴² Yus-Papinium paant tawai “Krístuka yaunchu uunt akupin Tawit weeanmayá akiiniatniuiti, tawai. Tura Tawitia pépruriya Piriñnumiá átiniaiti” tawai” tiarmiayi. ⁴³ Tuma asamtai shuar niisháa niisháa enentáimprar kanakiarmiayi. ⁴⁴ Chíkich aiyá nuka “sepunam enkeatai” tiarmiayi túrasha túracharmiayi.

Israer-shuara uuntri Jesusan enentáimtuscharmiania nu

⁴⁵ Sutarsha waketkiarmiayi. Tura Pariséusha Israer-patri uuntrjsha “¿Urukantai itiachuram?” tiarmiayi.

⁴⁶ Sutarsha tiarmiayi “Chikichkisha ju áishman chichaa áanis chichaschaiti” tiarmiayi.

⁴⁷ Nuyá Pariséu tiarmiayi “Atumsha ananarume. ⁴⁸ Pariséutisha uuntcha nuna enentáimtuiniawash. ⁴⁹ Penké shuarka yaunchu akupkamun nékachua nuka yajauchiniam yuminkramu áiniawai” tiarmiayi.

⁵⁰ Nikiutémusha, kashi Jesusan tarimia nu, Pariséuitiat tímiayi ⁵¹ “Ti shuartikia, shuar ni túramun etserkamu ántutsuk súmamtikiachminiaiti” tímiayi.

⁵² Nuñkia niisha tiarmiayi “Wats, amesha Kariréanmayanchuashitiam. Yus-Chicham áujsam nekaattame. Kariréanmayá Yúsnan etserin penké tániatsui” tiarmiayi.

Nuwá wáinmakman Jesusan itiararmiania nu

⁵³ Nuyá ashí ni jeen waketkiarmiayi.

8

¹ Tura Jesuska Uriwiu náinnium wémiayi. ² Tura kashin tsawar Yusa Uunt Jeen atak támatai ashí shuar Nin káutkarmiayi. Túrawarmatai Jesus pujus unuiniarmiayi. ³ Nuyá Israer-shuara jintinniurjsha Pariséusha nuwan wáinmakman Jesusan itiararmiayi. Tura ashí iruntramunam ajapén awajsarmiayi. ⁴ Tura Jesusan tiarmiayi “Uunta, ju nuwá tsanirma pujá achinkiaiyi. ⁵ Muisais akupkamunmasha nuna túraka “kayajaj tukurar máatniuiti” tawai. ¿Amesha warintmea?” tiarmiayi. ⁶ Aya mamikmar nekapsatai tusar tiarmiayi. Nin sumamtikiatniun wakeriarmiayi.

Nuyá Jesus tsuntsumá ni uwejéjaj nuñká áarmiayi. ⁷ Tura tuke iníam wajaki tímiayi “Ayu, atumijya tunáa túrichu ákunka kayan achik nin emka tukuti” tímiayi. ⁸ Tura nuna tj, ataksha tsuntsumá nuñká áimiayi.

⁹ Tura ni chichamen antukar ni enentáin sumamawar úuntnumia júki chikichik chikichik jiinki wéarmiayi.

Ashí wéarmatai Jesus Niniki nuwájaj juákmiayi. ¹⁰ Jesussha wajaki aya nuwanak wániak tímiayi “¿Ámin súmamtikramainia nusha tuñ pujuinia. Chikichkisha áwak?” tímiayi.

¹¹ Niisha “Atsá, Uunta. Chikichkisha atsawai” tímiayi.

Nuyá Jesus tímiayi. “Ayu. Wisha súmamtikiatsjame. Yamaikia weme atakka tunáa túrawaip” tímiayi.

Jesus tsáapninia áintsankete

¹² Ataksha Jesus Yusa Uunt Jeen iruntrarun tímiayi “Ju nuñkanam Wi tsáapninia áintsan shuara enentáin tsáapniajaj. Ashí Wijjaj tsanin wekaana nú shuar ni enentáin kiritniunam wekasashtatui antsu tsáapnin yamaram iwiaakman súana nujaj wekasattawai.”

¹³ Pariséu nuikia tiarmiayi “Ame penkerum tau asam támena nu áantraiti.”

¹⁴ Jesus tímiayi “Tuyá winiaj tura tui weaj nu nékatsrume, tura Wikia nékajaj. Tuma asan winia penkerun táyatnak tájana nu penkeraiti. ¹⁵ Ju nuñkanmayá aents enentáimmiajaj enentáimtakrum ti súmamtikrume. Tura Wikia chikichkinkesha súmamtiktusujaj. ¹⁶ Tura súmamtikiunka awajitsuk túrajaj. Iis, Wiki shuar túramun penkerashit tusan enentáimtusujaj antsu winia Apar Winia akuptukua nusha Wijjaj métek shuar túramun

nékawai. ¹⁷ Atumí akupkamuriin áarmaiti: “Jimiará shuar mai nú chichamnak tákuinkia nu chicham nekasaiti.” ¹⁸ Wátsek Wisha winia Aparsha mai métek taji. Winia Aparsha akuptukuiti” tímiayi.

¹⁹ Tutai “¿Ame apasha tui pujá?” tiarmiayi.

Jesusha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.” ²⁰ Nuna Yusa Uunt Jeen Yusa kuítrín suinia nuí tímiayi. Tuma aiñ sepunam enkeatniun achikcharmiayi ni tsawantri jeachu asamtai.

“Wi wéajna nuí wéchamniaitrume’ tímiayi Jesus

²¹ Jesus ataksha tímiayi “Wikia wéajai. Atumsha eátkáttarme tura wi wéamunam wéchamniaitkiuram atumí tunaaríjjaiñ jakattarme.”

²² Israer-shuarsha tiarmiayi “Wi wéamunam wéchamniaitrume” tutai, nuinkia máamatpiash” tiarmiayi.

²³ Nuinkia Jesus tímiayi “Átumka nun kayaitrume antsu Wikia nayaimp-inmayaitjai. Ju nun kayaitrume tura Wikia juyanchuitjai. ²⁴ Tuma asamtai tájarme “Atumi tunaaríjjai jakattarme.” Nekas Wi tájana núitjai. Tura nu enentáimtachkurmeka atumí tunaaríjjai jakattarme” tímiayi.

²⁵ Niisha aniasarmiayi “¿Amesha yáitiam?”

Jesusha tímiayi “Yaunchu tájarme. ²⁶ Nu arantcha atumin súmantkiatjarum tusan ti tímíniaitjai. Winia Apar akuptukua nuka tuke nekas nuna tawai. Tura aya ni taman antukan ashí shuaran nunak tajai” tímiayi. ²⁷ Tuma aiñ ni Aparín áujmatman penké nekaacharmiayi. ²⁸ Tuma asamtai tímiayi “Aents Ajasuitjana ju, numiniam ajinruarum yakí takuriakrumin nújainkia nekarattarme. Wi tájana núitjai tura winia enentáirjaiñ takatsuk aya winia Apar unuiturmanak tájai. ²⁹ Winia akuptukua nuka tuke Wíjjaiñ pujawai. Winia Apar wakeramun tuke shiir túrakui ikiurkichuiti” tímiayi. ³⁰ Tutai untsurí shuar Nin nekas enentáimtusarmiayi.

Yus-shuarsha tura tunaanum emetamusha

³¹ Israer-shuaran Nin shiir enentáimtusarmia nuna Jesus tímiayi “Wi tájarmena nu yawetsuk túrakrumka nekas winia unuiniamur átratume. ³² Nújajisha timiá nekas ana nu nekaattarme tura nekas ankant ajastatrume” tímiayi.

³³ Niisha tiarmiayi “Iisha Apraám weeitji. Chikicha takarniur átai tusar penké emetachmaitji. ¿Urukamtai “Ankant ajastatrume” tame?” tiarmiayi.

³⁴ Jesus tímiayi “Timiá nekasaiti, ashí shuar tunaan túruinia nuka nu tunaajai emetamuiti. Tuma asa takarniua núnisañ ajasuiti. ³⁵ Takarniusha ajapnamnia asamtai Yus atumin ajapramamniaitrume. Tura Akupniu Uchirínkia ni Aparíjjaiñ tuke pujawai. ³⁶ Tuma asamtai Akupniu Uchirí ankant awajtamsamtainkia imiá nekas ankant pujustatrume. ³⁷ Átum Apraám weeittrume nékajai. Túmaitiatrum winia chichamur ántachu asarum mantuataj tárume. ³⁸ Winia Apar iniaktursamun áujmatjai. Átumka atumí uuntri timia túrarme” tímiayi.

³⁹ Tutai niisha tiarmiayi “Iikia Israer-shuar asakrin ii úuntriñkia Apraámaiti” tiarmiayi.

Tura Jesus tímiayi “Nekas enentáimin Apraám weeitkiurmeka níya núnis túrawaintrume. ⁴⁰ Nekas ana nuna Yus iniaktursamtai nuna ujak-jarme, tuma aḡn mantuataj tarume. Apraámka nuní túrachmiayi. ⁴¹ Antsu atumí uuntri túrana áintsarum túrarme” tímiayi.

Tutai niisha tiarmiayi “Warí, tsanirnumiá akiiniachuitji. Ii uuntri Yúskete. Niisha ii Aparínti.”

⁴² Tura Jesus tímiayi “Yus nekas atumi Aparíntkiuḡkia Winiasha anentíntrume Yúsnumiá tau asamtai. Wisha winia enentáimmarjaj jui táchaitjai antsu Yus akuptukuiti. ⁴³ ¿Urukamtai Wi tájana nu imiá nékatsrum? Wi tájana nu nakitia asarum winia chichamur ántatsrume. ⁴⁴ Atumí aparíḡkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchkia tuke mankartiniaiti. Nekas ana nunasha nakitiawai tuke wáitrin asa. Wáitraksha níniunak chichaawai. Iis, waitia uuntri asa tuke wáitriniaiti. ⁴⁵ Tura Wikia nekas takui átum enentáimtursume. ⁴⁶ ¿Yaki chikichkí tunaajaj súmamtikruamniait? Nuikia Wi nekas nuna tau aisha ¿urukamtai enentáimtursum? ⁴⁷ Yús-shuarka Yus timian ántawai tura átum Yúsnachu asarum Wi tájana nu nakitiarme” tímiayi.

Apraám akiintsajin Jesus pujumiayi

⁴⁸ Nuikia Israer-shuar tiarmiayi “Maa, ti nekas tátsujik “Ame Samar-ianmaya shuáraitme. Tuke yajauch ániawai nusha. Nu arantcha iwianchrukuitme amesha” nekas taji” tiarmiayi.

⁴⁹ Jesussha tímiayi “Iwianchrukchaitjai. Áyatik winia Aparun shiir enentáimtikiajai. Tura átumka yajauch chichartarme. ⁵⁰ Wikia “shiir enentáimturarti” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun péḡkerashit tusa nekaattawai. ⁵¹ Ti nekasaiti. Wi tájana nuna enentáimta nú shuarka peḡké jákashtiniaiti” tímiayi.

⁵² Nuḡkia Israer-shuar tiarmiayi “Pai, yamaikia ti paant íwianch takakme. Apraámsha ashí Yúsnan etserniusha jákaruiti tura Ame “Wi tájana nuna enentáimtaka peḡké jákashtiniaiti” tátsumek tiarmiayi. ⁵³ ¿Nuḡkia ii uuntri Apraám nan̄kaamaskaitiam. Niisha tura Yúsnan etserniusha jákacharuk ánia. Itiurak imiá nan̄kaamantu enentáimtumam?” tiarmiayi.

⁵⁴ Jesussha tímiayi “Wiki shiir enentáimtumaknaka peḡké áantrai. Antsu Winia shiir enentáimturna nu winia Aparuiti. Nusha átumka “winia Yúsrui” tárumna núiti. ⁵⁵ Nusha táyatrum Nin nékatsrume. Wikia Nin nékajai. “Nin nékatsjai” tákunka atumjaj métek wáitrin ántjai. Tura Nin neka asan Nii tana nuna tuke túriniaitjai. ⁵⁶ Apraámka, atumí uuntri, imiá yaunchu jákaitiat Wi ju nun̄kanam tátinian wararas nákasmiayi. Tura wáitiat ti shiir warartusmiayi” tímiayi.

⁵⁷ Nuyá Israer-shuar Jesusan tiarmiayi “Warí, seḡkuenta (50) uwí takaktsume túmaitiatam Apraáman wáinkiam̄jai tame.”

⁵⁸ Jesussha tímiayi “Ti nekas tájarme, Apraámka pujatsajin Wikia pujajai” tímiayi Jesus.

⁵⁹ Nuna takui kayan achikiar “Jesusan tukutai” tiarmiayi. Tura Jesus úumak ni matsatmanum ajapéniḡ weak Yusa Uunt Jeḡniá jiin̄ki wémiayi.

¹ Jesus ni unuiniamurijjai wesa áishmankan kusuru akiinian wáinkiamiayi. ² Ni unuiniamurisha aniasarmiayi “Uunta, júsha ¿urukamtai kusuru akiiniawit. Yana tunaarjijain kusuru akiiniait. Niiniujajimpiash, aparíniujajimpiash túrunawit?” tiarmiayi.

³ Jesus tímiayi “Ni tunaarjijainchusha ni aparíniujainchusha túrunaiti. Antsu Yus ni ayashín túratniua nu paant atí tusa túrunaiti. ⁴ Tsawaikia takastiniaiti. Yamaikia Winia akuptukua nuna takatrín túratniuitjai. Kashi ajasmatai takastin atsuttawai. ⁵ Jú nunkanam pujakun shuara enentáin tsáapnimtikratniuitjai” tímiayi. ⁶ Nuna chichas nunká usukmi nunkejai pachimiar kusuru jijn yakarmiayi. ⁷ Nuyá chichaak “Siruí pajamtai entsanam nijiamauta” tímiayi. Siruísha nu chichamnum “akupkamu” tawai. Kusurusha we nijiamar péñker íimiar támiayi.

⁸ Nuyá ni írutkamurisha nuik wáinin ármia nusha tiarmiayi “Juka pujus tuke kuítian seamniuya núchakait.” ⁹ Chíkich “Ee, núkete” tiarmiayi. Chikichcha “Atsá, núchaiti; kame nuash tumainti” tiarmiayi.

Tura niñki “Ee, wiitjai” tímiayi.

¹⁰ Tutai aniiniak “¿Itiurak yamaikia íimiam?” tiarmiayi.

¹¹ Niisha tímiayi “Áishman Jesusa nu tsakusan jírún yakartur “Siruí pajamtai entsanam nijiamauta” turutniai. Takui wena nijiamaran paant iimpramjai” tímiayi.

¹² Tutai “Nu áishmansha tuiñ pujá” tiarmiayi.

Niisha “Cha, nékatsjai” tímiayi.

Pariséu kusuru tsuárman inintrusarmiania nu

¹³ Nuyá kusuru tsuárman Paríséunam júkiarmiayi. ¹⁴ Kame Jesus kusurun tsuarmia nuí ayampratin tsawantauyayi. ¹⁵ Tuma asamtai Paríséusha itiurak íimnium tusar aniasarmiayi.

Niisha tímiayi “Jírúin tsakusan yakaarámtai, nijiamaran paant iimjjai.”

¹⁶ Nuyá chíkich Paríséu shuarnumiá nuamtak tunaiyar “Juna tsuáruka Yúsaiyanchuiti. Kame ayampratin tsawantaj túraiti” tiarmiayi.

Tura chikichcha “Tunáa shuaraitkiuinikia júnisan túratniun tujinkiaayi” tiarmiayi. Nujai akannaikiarmiayi.

¹⁷ Tsuármancha ataksha aniasarmiayi “Ámin tsuármarua nu ¿warí enentáimtam?” tiarmiayi.

Tutai “Wikia “Yúsna etserniuiti” tajai” tímiayi.

¹⁸ Tura Israer-shuar nekas kusuruiat yamá íimiui tu enentáimtuscharmiayi Pariseu. Tuma ásar ni aparíncha untsukar ¹⁹ inintrusarmiayi “¿Ame uchiram kusuru akiinia tárugna nukait. Itiurak yamaikia iimia?” tiarmiayi.

²⁰ Ni aparísha tiarmiayi “Íi uchirínkia kusuru akiiniam nu nékaji.

²¹ Tura iisha nékatsji itiurak yamaikia iimia. ¿Yátsuk péñker tsuáruit? Niisha úuntchakait, nii aniastarum. Niñki ujatmakarti” tiarmiayi.

²² Sapijmiak tiarmiayi. Israer-shuara úuntrinikia “Jesus Yus akupkamu asa nekas Krístuiti” tuinia núnaka Israer-shuara iruntainmaya jiki akupnakti tiniu ásarmatai tsuarma aparí ashamkarmiayi. ²³ Nu asamtai ni aparí “Niisha úuntchakait, nii aniastarum” tiarmiayi.

²⁴ Nuiñkia Israer-shuara uuntri kusuru tsuárman ataksha untsuk tiarmiayi “Yus íimianum nekasa nu titiá, ju áishmanikka tunaarinniuiti nékaji” tiarmiayi.

25 Tutai tímiayi “Kame tunaarinchashit. Nékatsjai. Antsu junak nékajai. Yaunchu kusuruitiatan yamaikia íimjiai.”

26 Ataksha aniiniak “¿Itiurtámkama. Itiur íimtikrammia?” tiarmiayi.

27 Niisha tímiayi “Yaunchu tájarme tura anturtatsrume. ¿Urukamtai ataksha titi tusa wakerarum. Niiniu ajastin enentáimprurmek?” tímiayi.

28 Nuñkia katsekkar “Ámeke ní shuarinme. Tura iikia Muisaisa shuarintji, tiarmiayi. 29 Yus Muisaisan akupkaiti iikia nékaji antsu nu áishman nékatsji. ¿Tuyantskait?” tiarmiayi.

30 Áishman tsuarma tímiayi “¿Ausha itiurtsuk áminiait? Winia íimtikurma nu átumka nékatsrume tuyankit. 31 Paant nékaji tunaarinnium Yus anturtsui. Tikishmatar ni wakerarum turuinia nunak anturui. 32 Yáunchusha kusuru akiinian tsuáruka tuke atsuwaiti. 33 Ju áishman Yúsaiyanchuitkiunka penké túrachayai” tímiayi.

34 Nuñkia tiarmiayi “Ámeke tunaarintin akiiniaiatmesha ¿in jintintin átaj tamek?” Nuna tiar jikj awemarmiai.

Wakanin kusurua nu

35 Kusuru tsuarman jikj awemarma nuna Jesus nekaamiayi. Tura wáiniak “Yusa Uchiria nu enentáimtamek” tímiayi.

36 Tsuarma tímiayi “Uunta, turuttia wisha nekaan enentáimtustaj.”

37 Jesussha tímiayi “Wainme. Wiitjai ámijjai chichajna nu.”

38 Tutai, tikishmatar “Uunta, enentáimtajme” Jesusan tímiayi.

39 Nuyá Jesus tímiayi “Shuara enentáin nekaan, akantratajtsan táwitjai. Ni enentáin kusuru ajn iimtikinian tura ananmamuk “Yusnan nekaan paant iimjiai” tana nuna ukusturtinian táwitjai” tímiayi.

40 Tutai Pariséu shuar nuj pujuarmia nu nuna antukar “¿Nuñkia iikia kusurukaitiaji?” tiarmiayi.

41 Jesussha tímiayi “Átum kusuruitkiurmeka atumí tunaari wáinchakrum sumamachu áinrume. Tura “paant iimjiai” tau asarum sumamaitrume” tímiayi.

10

Iikia murikiua áintsar aji

1 Jesus tímiayi “Wi tájana nu ti nekasaiti. Shuar murikiun takakna nu ni murikrin wenuimiunam kashi ikuiawai. Tura murik wenuimiunam pujuiniakuí yajauch shuar murikiun kasamkatniun wakerakka wáitiniam wayachmin asa tanishnum waruk yajá wayawainti. 2 Antsu murikiu wáinniuka wáitiniam wayawawai. 3 Waiti wáinniuka nekas murikiun wáinniun wáitin uratui. Muriksha ni wáinniurj chichamen nékainiawai. Niisha ashí ni murikrin chikichik chikichik náarin anaitius untsúawai. Tura tsawajkia ni murikrin jiki ayurtainiam yarumui. 4 Tura ashí ni murikrin jir émtuki wéawai. Muriksha ni chichamen ántuiniak untsuam nemarainiawai. 5 Chikich shuárnaka nékachu ásar nemarainiatsui. Antsu ni chichamen nékainiachu ásar pisainiawai.” 6 Nu métek-taku chicham-naka Jesus áujmatsamiayi tura shuar antukar nekaacharmiayi.

Pénker wáinniuka Jesusaiti

7 Nuyá Jesus tímiayi “Ti nekasán tájarme. Wenuimiu wáitiri murik wainia nuka Wiitjai. Shuarsha murikiu áintsar Winí wayamin ániawai.

8 Wi táatsain ashí táaruka kasa áiniak winia shuarun kasamkatai tusa

wakeriarmiayi. Tura winia murikiur Wíi shuar ániak nu shuaran an-turkacharmiayi. ⁹ Wikia wáititjai. Ashí Winin wayaaka uwemprattawai. Tura murikua ántsan wenuimiummaya jiinki péñker yurumáttawai tura atak wayá ayamprattawai' tímiayi.

¹⁰ 'Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai. ¹¹ Wikia péñker wáinniuitjai. Péñker wáinniuka ni murikrjn uwemtikrartaj tusa jakattawai. ¹² Antsu aya kuitjai takauka ni murikrjchu ániakui tura nekas wáinniuchu asa péñker wáintsui. Kame uunt yawá winiakui murikiun ikiuki pisaawai. Uunt yawasha murikiun achik tsakinmawai. ¹³ Nu shuarsha akikiam takáa asa murikiun enentáimtatsui. Nu asamtai aya pisaawai' tímiayi.

¹⁴⁻¹⁵ 'Wikia péñker wáinniuitjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwemtikrataj tusan jakattajai. ¹⁶ Chíkich muriknasha takakjai. Nusha ju wenuimiummayan chu ániawai. Nunasha itiattajai. Nu muriksha Winia umirtukar ashí métek matsamsar chikichik wenuimiummaya ajasartatui tura chikichik wáinin átatui' tímiayi.

¹⁷ 'Winia murikrun uwemtikrataj tusan jakattajai turan atak nantaktiatjai. Nu asamtai winia Apar anentui. ¹⁸ Wi wakerakun jakattajai. Wi wakerachkuñkia chikichkia mantuachminiaiti. Jákatniuncha tura nantaktinniasha winia Apar surusuiti' tímiayi Jesus.

¹⁹ Israer-shuarsha nuna antukar niisháa enentáimprar kanakiarmiayi. ²⁰ Untsurí tiarmiayi "¿Urukamtai ántarum wáuruk tausha. Yajauch wakanin takaksuk?" ²¹ Tura chikichcha tiarmiayi "¿Yajauch wakantrinniusha núnisan chichasminkiait. Yajauch wakantrinniusha kusurun ímtikramniashit?" tiarmiayi.

Israer-shuarka Jesusan nakitiarmiania nu

²² Micha nantutin Israer-shuar Jerusarénum namperan najanainiawai. Nu nampernumsha Yusa Uunt Jee atak jeamman enentáimtuiniawai. ²³ Jesssha Yusa Uunt Jee áachiniam wekasamiayi Sarumúnka wáitirja nuji.

²⁴ Israer-shuarsha Nin téntakar tiarmiayi "¿Ame nekas Krístukaitiam? Ju chichamaik etserkata. ¿Urukamtia nekas paant tátsum?" tiarmiayi.

²⁵ Tutai Jesus tímiayi "Yaunchu tiniu ajñ enentáimturachmarme. Winia Apar akupkamun takaajna nu ti paant awajtawai. ²⁶ Tura átumka winia murikruchu asarum enentáimturtsurme. ²⁷ Wisha winia murikrun untsuam anturtuiniak nemartuiniawai. Wisha winianak mash nékajai. ²⁸ Tura yamaram iwiaakman tuke jákashtinian súajai. Nu asamtai niisha menkakachartatui antsu Wi wainkia asamtai ¿yaki jurutkit? ²⁹ Winia Apar murikiun surusuiti. Niisha ashí nankaamas kakaram asamtai ¿yaki uwejéyan atankit? ³⁰ Wisha winia Aparjai iisha aya chikichkiitji" tímiayi Jesus.

³¹ Tutai Israer-shuarsha atak kayan achikiar tukutaj tiarmiayi.

³² Jesssha tímiayi "Winia Aparu kakarmarjijai ti untsurj péñkera nuna takasuitjai. ¿Tújajimpia mantuattarum?"

³³ Israer-shuarsha Nin tiarmiayi "Péñker túra asakmin máataj tátsum antsu Yus yajauch chicharkumin túrattaji. Ámeka shuáraitatam Yusa nuke enentáimtumame" tiarmiayi.

³⁴ Nuyá Jesussha tímiayi “Atumí akupeamuriñ Yus timia nu áarmaiti: “Átum yúsaitrume” tawai. ³⁵ Kame Yus-Papinium aarma nu tuke nekaschakait. Tuma asamtai ni chichamen antukarun Yuska “yúsaitrume” takui nuikia ti nekaschakait. ³⁶ Niisha yúsaitkiunkia nuikia Yus Apa anaikia ju nunkanam akupkamu asan ti nekas Yúschakaitaj. Nújainkia wi “Yusa Uchiríntjai” takui žitiurak “Yusan yajauch chicharui” túrutrum? ³⁷ Winia Apar túramu túrachkuunkia enentáimtursairap. ³⁸ Tura nekas túrakuunkia enentáimtursatarum. Tura Winia nakitrakrumsha nuikia wi túramu enentáimtustarum. Nujainkia winia Apar Winin pujamu ashí nekaattarme. Núnisnak Wisha Niñin pujajai. Iisha chikichkiitji.” ³⁹ Tutai ataksha sepunam enkeatai tiarmiayi. Túrasha Jesus uwempramiayi.

⁴⁰ Nuyá Jesus Jurtañ entsa amain wé yaunchu Juan imiakrattainium pujusmiayi. ⁴¹ Ti untsurí shuar iyumar tiarmiayi “Nekas Juanka aentsti tujintiamun túrachiat ashí Jesusnan tímia nu nekasaiti” tu tiarmiayi. ⁴² Nujisha untsurí Jesusan enentáimtusarmiayi.

11

Rásaru jakamu

¹ Petania péprunam áishman, ni naari Rásaru, jaa pujumiayi. Nu péprunam Marí ni kajijai Mártañai pujumiayi. ² Niisha Rásaru umai ármiayi. Nu Marisha ukunmanka kunkuinian sumak Jesusan kuer ni intiashjijai japirmiayi. ³ Tura Rásaru jaakui ni umaj Jesusan chichaman akuptuiniak tiarmiayi “Uunta, ame amikrum jaawai.”

⁴ Jesussha nuna antuk tímiayi “Tuke jakataj tusa jaatsui. Antsu Yusa kakarmarisha tura ni Uchirí kakarmarisha jú sunkur tsuármanum paant atí tusa jaawai.” ⁵ Jesus Mártañcha ni kajincha tura ni umaj Rásaruncha nekas aneemiayi. ⁶ Túmaitiat Rásaru jaawai taman antukiat ni pujamunam jimiará tsawant pujusmiayi. ⁷ Nuyá ni unuiniamuriñ “Ataksha Jutía nunkanam wetái” tímiayi.

⁸ Tura ni unuiniamuriñ tiarmiayi “Uunta, nuiksha Israer-shuar kayajai tukurmar mantamatai tícharmaka. žNuñ ataksha wétai támek?”

⁹ Jesussha ju métek-taku chichaman tímiayi “Tsawaikia páantchakait. Tsawaj wekaana nu paant asamtai tukumkashtatui. ¹⁰ Tura kashi wekaana nusha kirit asamtai tukumkátawai. Núnisan Wíi tuke pujakun winia takatrun takastiniaitjai. Túraknasha itiurchatan wáinkiashtatjai.” ¹¹ Nuyásha Jesus atak tímiayi “Ii amikri Rásaru kanarai. Wi ishintiartatjai.”

¹² Tutai ni unuiniamuriñ tiarmiayi “Uunta, aya kanarka nuñkia péñker ajastatui.” ¹³ Jesuska Rásaru jakamu nékayat “kanarai” tímiayi. Tura ni unuiniamuriñ Rásaru kajinmakua áintsan kanarai enentáimprarmiayi.

¹⁴ Jesus nuikia ti paant tímiayi “Rásaru yamaikia jakayi. ¹⁵ Tura nuñ pujuscha asan kúntuts pujatsjai. Jean túrattajna nu íisrum ti nekas enentáimtursattarme. Nuna nekaan shiir enentáimjai. Wátsek, iyutai.” ¹⁶ Nuyá Jimiampramu Tumas chikich unuiniamuriñ nuñ armia nuna “Iisha weri Niñjajai métek jakatai” tímiayi.

Iwiaaku átinniasha jaka nantaktinniasha Jesus nérenniuiti

¹⁷ Nuñ taa, Rásarun kuaru tsawant ikiusman wáinkiamiayi. ¹⁸ Petania pépruka Jerusarénnumia menaintiú kirumitru áinis tíjuchiiti. ¹⁹ Tuma

asamtai untsurj Israer-shuar Mártaasha Marísha, ni umaj jakamtai uutkui atsankrataj tusa weriarmiayi. ²⁰ Mártaasha Jesus tjiuch ajasun nekáa inkiuntajtsa wémiayi. Antsu Marikia jeá pujumiayi. ²¹ Tura Marta Jesusan inkiun tímiayi “Uunta, Ame pujakminkia winia umar jákachaayi. ²² Tura tuke nékajai ashí Yus seamna nuna súramui.”

²³ Jesussha tímiayi “Ame umaimisha nantaktiatui.”

²⁴ Mártaasha tímiayi “Nekas, ashí amuamunam jákaru nantaktin tsawantaj nantaktiatui. Nuna nékajai.”

²⁵ Nuyá Jesus tímiayi “Iwiaaku átinia nérentin asan Wikia iniantkar-tiniatjai. Winia enentáimturna nuka jakasha nantaktiatui. ²⁶ Tura ashí iwiaaku pujana nusha Winia enentáimturaka penke jákashtatui. ¿Nu nekasaiti tu enentáimtakek?”

²⁷ Niisha “Ee, Uunta, ame Yusa Uchirínme. Krístuitme, uwemtikkiartin jú nunkanam tátinia nu” tímiayi.

Jesus Rásaru iwiarsamunam taa úutmiania nu

²⁸ Mártaasha nuna tí, ni kaj Marin untsuk úukan tímiayi “Uunt júi taa untsurmawai.” ²⁹ Marisha nuna antuk wárik wajaki Jesusa iyuttsa wémiayi. ³⁰ Jesussha péprunam jeatsuk Marta inkiunmanum pujumiayi. ³¹ Marí wari wajaki wématai Israer-shuar nu jeanam atsankrattsa pujuiniasha nuna íisar weriarmiayi. Iwiarsamunam úuttiasa wéatsush tusa weriarmiayi. ³² Marisha Jesus pujamunam jeá tikishmatar tímiayi “Uunta, Ame pujakminkia winia umar jákachaayi.”

³³ Jesussha Marincha tura niijjai úutuncha wáiniak wáitnentaimta asa ti kúntuts pujumiayi. ³⁴ Tura “Tui iwiarsamarum” tímiayi.

Niisha “Uunta, íitia” tiarmiayi.

³⁵ Jesussha úutmiai. ³⁶ Israer-shuarsha “Ti aneatsuk” tiarmiayi. ³⁷ Tura chíkich “Kusuru tsuáruchukait. Nii pujakuisha Rásaru jákaampiash” tiarmiayi.

Rásaru iniantkimiu

³⁸ Jesussha ti kúntuts enentáimiar iwiarsamunam weankámiayi. Náinnium asa paka taurma áuyayi. Tura kaya atutkamuyayi. ³⁹ Tura Jesus “Kaya jurustarum” tímiayi.

Rásaru umaj Marta tímiayi “Uunta, kuaru tsawant jákaiti. Mejeatsuk’ tímiayi.

⁴⁰ Tura Jesus tímiayi “Yus enentáimtakmeka Yusa kakarmari wáinkiatame tíchamkajam.” ⁴¹ Nuikia kayarin uratiarmatai Jesus nayaimpin iis tímiayi “Aparu, Winia anturtakmin yuminsajme. ⁴² Winiasha tuke anturtame tura jú shuaran pénger enentáimtikrataj tusan tajai. Ame akuptukuitmena nuna nekarmawarti.” ⁴³ Nuna tinia kakaram untsuak “Rásaru jíinkitia” tímiayi. ⁴⁴ Nujainkia penuarmartiuk jíinkimiayi. Yapinmasha jaanchjiai ijamuyayi. Tura Jesus “Atirtarum. Wéti” tímiayi.

Jesusan achiktin chichaman jurusarmiania nu

(Mateu 26.1-5; Márkus 14.1-2; Rúkas 22.1-2)

⁴⁵ Untsurj Israer-shuar Marin nemariaru Jesus túramun íisar enentáimtusarmiayi. ⁴⁶ Tura chíkichkia Pariséunam wear Jesus túramun ujakarmiayi. ⁴⁷ Nuna antukar Pariséusha Israer-patri úntrisha ashí naamka uunt armia nujai iruntrar tiarmiayi “¿Warí ititurkamniait? Nu shuarka aentsti tujintiamun ti túratsuk. ⁴⁸ Aya júnik iniyaiyarkinkia ashí

shuar Nin enentáimtuschartatuak. Nuyá Rúmanmaya apach taar mesetan najanawartatui tura in amutmakar Yusa Uunt Jeencha emesrartatui.”

⁴⁹ Nu uwitin Kaipias Israer-patri uuntriyaui. Niisha tímiayi “Átumka nékatsrume. ⁵⁰ ¿Ashí Israer-shuar mesertin péñkerkakit. Antsu aya chikichik shuar jákatin péñkerchakait?” tímiayi. ⁵¹ Kaipiaska aya ni enentáimmiajain tíchamiayi. Antsu nu uwitin Israer-patri uuntri asamtai Yus nuna enentáimtikramiayi. Nújainkia Israer-shuar Jesus jaruktinian ujakmiayi. ⁵² Tura aya Israer-shuarnakcha antsu niijiaisha ashí nuñkanam Yus-shuar ajasarun irurtajtsa jákatniuyi. ⁵³ Tuma asamtai nu tsawantinin Israer-shuara uuntri Jesus máatai tusar áujmatsarmiayi.

⁵⁴ Nu asamtai Jesus paant wantiniak Israer-shuarnum wekaichmiayi. Antsu Jutía nuñkanmaya jiinki atsamu nuñkanam Eprain pepru tíjiuch wémiayi. Tura nuí pujusmiayi ni unuiniamurjjai.

⁵⁵ Israer-shuara namperi paskua ishichik jatemsamtai untsurí shuar yajá péprunmaya Jerusarénum káunkarmiayi. Kame paskua jeatsain Muisais timia núnisan ni ayashísha enentáisha iwiarnarat tusa wakeriarmiayi. ⁵⁶ Jesusnasha eak yujarmiayi. Tura Yusa Uunt Jeen pujusar numatak aniniaisar “¿Warí enentáimiam. Jístanam tatimpiash?” tiarmiayi. ⁵⁷ Parisésha Israer-patri uuntriasha akupainiak “Jesus pujá nekaamka ujatkata” tiarmiayi. Jesusan sepunam enkeatai tusar tiarmiayi.

12

Marí Jesusan kuñkuinian kuérmiania nu

(Mateu 26.6-13; Márkus 14.3-9)

¹ Paskua jísat jeatin sais tsawant ajasmatai Jesus Petania péprunam wémiayi. Jesus jakamunmaya iniantkimia nú Rásaru nuin pujumiayi. ² Jesus jeamtai ayurawarmiayi. Rásarusha niijjai yurumámiayi. Mártasha yurumkan iwiasmakmiayi. ³ Tura Marikia kuñkuinian ti kuitjai ritru ajapén sumak itiamiayi. Tura Jesusa nawen kuer ni intiashjjai japirmiayi. Jeasha nu kuñkuinjai ti shiir kuñkuñmiayi. ⁴ Jútas Iskariúti, Semunka uchirí, nuí pujumiayi. Niisha Jesusa unuiniamurintiat ukunam Jesusan surukmiayi máawarat tusa. Niisha tímiayi ⁵ “¿Urukamtai nu kuñkuinian ti kuitjai surukchama kuítrinchan súsatniun?” ⁶ Kame kuítrinchan enentáimtak tíchamiayi. Antsu unuiniamu kuítrin wainkia asa yúpichuch kasamkamniuyayi. Tuma asa nuna tímiayi.

⁷ Tura Jesus tímiayi “Iniaisata. Wi iwiarnakui kuératniun sumak ikiurtusuiti. ⁸ Kuítrincha tuke atumjai íruntsuk. Antsu Wikia atumjai tuke pujuschattajai” tímiayi.

Rásaruncha máataj tiarmiania nu

⁹ Israer-shuarsha Jesus Petania péprunam pujan antukar Jesus ístaitsar weriarmiayi. Rásaruncha Jesus jakamunmaya iniantkimia nusha iyutai tusar wearmiayi. ¹⁰ Túramtai Israer-patri uuntrinikia chichaman jurusarmiayi Rásaru maatai tusar. ¹¹ Untsurí Israer-shuar Rásaru iniantkimion nekaawar Israer-patrin ikiukiar Jesusan enentáimtusarmiayi. Túrawarmatai Rásaruncha máatniun wakerukarmiayi.

Jesus Jerusarénum shiir wayamiania nu

(Mateu 21.1-11; Márkus 11.1-11; Rúkas 19.28-40)

¹² Paskua namperan pachiintuktajtsa ti untsurí shuar Jerusarénum wearmiayi. Kashin tsawar Jesus nú peprunam tátinian nekaawarmiayi. ¹³ Niisha tintiuki nuké áinis nukan júurar Jesusan inkiuntai tusar jíinkiarimiayi. Túrawar untsumainiak “Shiir tati, tiarmiayi. Yusa kakarmarjijai winiana nu tí péñkeraiti. Israer-shuara uuntrí asa shiir atí” tu untsumiarmiayi. ¹⁴ Jesussha umpuurun wáiniak entsamkamai. Núnisan áarmaiti Yus-Chichamnum:

¹⁵ “Seuñ péprunmaya shuara, ashamkairap. Atumí Akupniurí umpuurunam entsamak winiawai.”

¹⁶ Nu chichamaik Jesusa unuiniamurí nu túrunamun nekaacharmiayi. Tura ukunam Jesus nayaimpiniam shiir waketkimtai enentáimprarmiayi. Ashí Jesusna aarma núnisan túrunamiayi.

¹⁷ Jesus Rásarun iwiarsamunmaya iniantkimiun wáinkiarua nú shuar nuna áujmatiarimiayi. ¹⁸ Tuma asamtai shuar Jesus nu tujintiamun túramtai nekaawar Jesusan inkiunktaj tusar jíinkiarimiayi. ¹⁹ Tura Pariséusha nuamtak tiarmiayi “Iis, penké tujinkiaji. Maa iista, ashí shuar Nin nemarainiatsuk.”

Kriaku apach Jesusjai chichastinian wakeriarmiania nu

²⁰ Paskua nampernum Yus shiir awajsatniun Jerusarénum weriaruka untsurí nunkanmaya shuar ármiayi. Kriaku apachcha ármiayi. ²¹ Niisha Jiripin weantukarmiayi. Kame nu Jiripi Petsaitia péprunmaya uyuyai. Petsaitia péprusha Kariréa nunkanam awai. Nincha Kriaku apach seainiak “Uunta, Jesusjai chichastaitisar wakeraji” tiarmiayi. ²² Jiripisha Antresan werí ujakmiayi. Nuyá niijjai métek tsaninjiar Jesusan weriar ujakarmiayi.

²³ Jesussha tímiayi “Wi Aents Ajasuitjiana ju tsawantur jeayi. Túramtai shiir awájnástatjai. ²⁴ Wi tájana nu ti nekasaiti. Jínkiaia ántsanketjai. Araachmaka niñki pujatsuk. Antsu araamka tsapain jinkiaichirí kaushmariat nereki ti untsurí ajatsuk. Núnisnak Wi jakamtai ti untsurí shuar yamaram iwiaakman takusartatui. ²⁵ Shuarsha jinkiaia nuke aya ju nunkanam péñker pujustinian enentáimkiunka ántar pujak nekas iwiaakmarin emenkkattatui. Tura ju nunkanam péñker pujustinian enentáimtsuk jákatniuncha ashamchaa nú shuarka nekas iwiaakman wáiniak tuke iwiaaku átatui. ²⁶ Shuar winia átaj takunka nemartusti. Túranka Wi pujajna nuí Wíi shuar tuke átatui. Núnisan Wíi shuar winia takatrun takáa nuna winia Aparsha shiir enentáimtustatui tímiayi.

Jesus ni jákatniun étserei

²⁷ Yamaikia enentáirui ti itiurchat pujajai. ¿Warittiajak. “Aparu, ju túrunatniunmaya uwemtikrurta” titiajash? Antsu jú túrunatniun táwitjai. ²⁸ Aparu, wi túramujai ashí shuar ame náarmin shiir enentáimturarti” tímiayi Jesus.

Tutai nayaimpinmaya chichaman antukarmiayi. “Winia náarun shiir awajsaitjai tura ataksha shiir awajsattajai” tímiayi.

²⁹ Shuarsha nú pujuinia “ipiamtachuashit” tiarmiayi. Tura chikichcha “Nayaimpinmaya suntar Nin chichasai” tiarmiayi.

³⁰ Jesussha tímiayi “Wi antuktinian chichaschayi antsu átum nekaatarum tusa chichasai. ³¹ Yamaikia nunkanam makumatin jeayi. Tura íwianch ju nunkanam akupniua nu nupetnak ajapnattawai. ³² Tura

numiniam awajnantai ashí nun~~kan~~mayan~~ka~~ shuar enentáimturartatui” tímiayi. ³³ Juna taku krúsnum jákatniun ujakmiayi.

³⁴ Shuarsha awajirar tiarmiayi “Yaunchu Yus akupkamu papiniumia áujsar nékaji. Kristu tutai tuke jáatsuk iwiaaku pujustiniaiti. ¿Itiurak nuikía “Aents Ajasu numiniam awajnitniuiti” tame? Aents Ajasuka Krístuchukait, Yus anaikiamu. Núchaitkiuin~~ka~~ Aents Ajasuka yait?” tiarmiayi.

³⁵ Nui~~n~~ka Jesus tímiayi “Wi tsáapninia áintsan~~ket~~jai. Tsáapnisha atum~~in~~ aya ishichik tsawantin tsáapniartatui. Tsáapin ana juik wekasatarum kirit ajatsa~~n~~. Kame kiritniunam wekaana nusha nékatsui itiuranimpia wea. ³⁶ Tsáapnin wáinkieuram nin enentáimtustarum. Túrakrum winia tsáapnintruí wekasattarme.” Jesussha nuna ti wémiayi uumak pujustaj tusa.

Untsurí Israer-shuar Jesusan enentáimtuscharmiania nu

³⁷ Jesus aentsti tujintiamun ti untsurí túramtaisha Nin enentáimtuscharmiai. ³⁸ Yúsnan etserin Isayas yaunchu aarma uminkiatniuyi:

“Uunta, ¿ya ii ujam antukuit. Yusa kakarmar~~ish~~a yana iniaktusuit?” tu áarmaiti.

³⁹ Nuna uminiak Jesusan enentáimtuscharmiai. Tura nu arantcha Isayas áarmiai:

⁴⁰ “Yus nin kusuru awajsaiti tura ni enentáin~~cha~~ kátsuram awajsaiti. Ni jii~~j~~ai ímsa~~n~~ tusa tura ni enentá~~j~~ai nekaawa~~n~~ tusa túrait. Kame ni tunaar~~j~~ iisar enentáimtuiniakui Yus nin tsuá~~r~~ainti” tu áarmaiti.

⁴¹ Isayas yaunchu Jesusan nayaimpiniam ti shiir pujan wániak nuna tímiayi.

⁴² Tuma a~~n~~ untsurí Israer-shuarsha tura ni uuntrinmayasha Jesusan nekas enentáimtusarmiai. Tura niisha Pariséun ashamainiak paant tícharmiai. Israer-shuara iruntair~~ya~~ jii~~k~~i awetama~~j~~ tusa ashammíarmi-ayi. ⁴³ Yus shiir enentáimtursati tutsuk antsu shuar shiir enentáimtursati tusar túrawarmiai.

Shuaran sumamtikiatniun táchaitjai antsu uwentikratniun táwitjai, timiania nu

⁴⁴ Jesus kakantar untsukum tímiayi “Winia enentáimturuk aya Winiak enentáimturtsui antsu winia Aparun Winia akuptukua nunasha enentáimtawai. ⁴⁵ Winia wáitkiusha Winia Aparnasha wáinui. ⁴⁶ Wikia tsáapnin asan Winia enentáimturainia nuka kiritniunam wekas~~a~~n tusan ju nun~~kan~~am táwitjai. ⁴⁷ Shuáran sumamtikiatniun táchaitjai antsu uwentikratniun táwitjai. Tuma asamtaí shuar winia chichamprun antuk umíach~~ku~~ka sumamaiti. Tura Wikia sumamtikiachuitjai. ⁴⁸ Winia nakitrur chichampruncha enentáimtachuka sumamtikiamuiti. Wi timiaj nuka amuukatín tsawantai nin sumamtikiattawai. ⁴⁹ Wi enentáimmia~~j~~ai chichaatsjai. Winia Apar akattur akuptukuiti. Tura chichastinia nuna surusuiti. ⁵⁰ Wisha nékaji, ashí winia Apar akupeamuka yamaram iwiaakman tuke amuukash~~t~~inian súawai. Tuma asamtaí winia Apar túrutmia núnisnak tajai” tímiayi Jesus.

13

Jesus ni unuiniamurí nawen nijiatramiania nu

¹ Paskua jísat jeatin chikichík tsawant ajasmatai Jesusa tsawantri jeatemayi. Túramtai ju nunkan ikiuki ni Apariín wétiniuyi. Jesussha nuna nekaamiayi. Ashí Níniun ju nunkanam pujuinian tuke anea asa amúamunmasha yapajítsuk tuke aneemiayi. ² Nu tsawantaisha murikiun yúatin ármiai. Tura yurumátin jeatsain, uunt iwianch Semunka uchirí Jútas Iskariúti enentáin Jesusan surukat tusa enentáimtikramiayi. ³ Tura Jesus Yusajya tau asa waketkitniuyi. Tura Yus Apa ashí mash susamiayi akupin atí tusa. Jesussha nuna nekáa ⁴ chíkich yurumuk pujuiniaj wajakmiayi. Tura pushirín áimiak awanékéman emenmamamiayi. ⁵ Nuyá nijaamatainiam entsan yará ni unuiniamurí nawen nijiatramiayi. Tura awanékémjaj japirmiayi. ⁶ Semun Pítrunam jeamtai Pítur tímiayi “Uunta, ¿Winia nawer nijiertaj tamek?”

⁷ Jesussha tímiayi “Wi túrajna nu yamáí nékatsme tura ukunam nekaatame.”

⁸ Tura Pítur tímiayi “Penké winia nawer nijiarhattame.”

Jesussha tímiayi “Wi nijaachkuinka Wijijai tsaninka pujuschamni-aitme.”

⁹ Tutai Semun Pítur tímiayi “Nuinka, Uunta, aya nawerkechu antsu uwejrusha tura muukarsha nijiatrurta.”

¹⁰ Tura Jesus tímiayi “Yamáí mainkia ayashí shiir asamtai aya nawenin nijiamártiniaiti. Atumí enentáin ashí péñkeraitrume. Túrasha ashí shuar-cha” tímiayi. ¹¹ Kame Jútas Nin suruktinian nekáa “ashí shuar-cha” tímiayi.

¹² Jesussha nijiar umik ni pushirín entsarmiayi. Tura atak pujus tímiayi “¿Atumsha Wi túrajna nu nekaarmek? ¹³ Wi atumí Uuntrí asamtai nekas “Uunta” túrutrume. Nusha péñkeraiti. ¹⁴ Tura Jintinniuiti-atan tura Úuntaitiatan atumí nawen nijiarhajak. Atumsha núnisrumek nuamtak náwen nijiatnairatarum. ¹⁵ Atumin nekapruatsan túramjai. Atumsha núnisrumek túratarum. ¹⁶ Ti nekas tajai. Takarniuka ni unutri nankaamaschaiti. Akupkamusha akupea nuna nankaamaschaiti. ¹⁷ Nu nekaarum túrakrumka shiir átatrume.”

¹⁸ “Tura tájana nuna ashí tátsujrume. Anaikiaitaj núnaka Wi nékajai. Tura Yus-Chícham uminkiatniuiti, nékajai. Ju aarmaiti: “Wijijai yurumna nu winia nemasur ajasai.”

¹⁹ Nuka túmatsain ujaajrume. Nuyá túrunamtai Yusa Uchiríntjai nusha paant nekaattarme. ²⁰ Wi tájana nu nekasaiti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai” tímiayi.

Jesus Jútas Nin suruktinian étserei

(Mateu 26.20-25; Márkus 14.17-21; Rúkas 22.21-23)

²¹ Nuna tí, Jesus ni enentáin ti itiurchat enentáimpramiayi. Tura paant tímiayi “Nekas tajai, chikichík juí atumjai pujana nu Winia surutkat-tawai.”

²² Tutai ni unuiniamurí nuamtak íniaisar “¿Yanak ta?” tiarmiayi. ²³ Chikichík unuiniamurí, Jesus ti aneamu, Nijijai tsanin yurumuk pujumiayi.

²⁴ Tuma asamtai Semun Pítur ni uwejéjai iniakmas “Aniasta, ¿yanak áujmata?” tímiayi.

²⁵ Tutai Jesusan áyanmatsan aniasmiayi. “¿Yait, Uunta?” tímiayi.

²⁶ Jesussha ayak “Tantan túumnium ajun̄kan susattaj núiti” tímiayi. Nújain̄ tantan túumnium ajun̄ Semun̄ka uchir̄in̄ Jútas Iskariút̄in̄ susamiayi. ²⁷ Tura wárik Jútas tantan achikmatai íwianch ni enentáin̄ wayamiayi. Nuyá Jesus tímiayi “Túrattamna nu wárik túrata.”

²⁸ Tura ashí nūi yurumainiak pujuarmia nusha wariniak ta tusa nekaacharmiayi. ²⁹ “Kuít̄rincha kuit̄ súsarta” tátsuash tu enentáimprarmiayi. Tura chikichcha “nampernum yurumátin̄ atsumajnia nu sumakta” tátsuash, tu enentáimprarmiayi. Jútas kuít̄ian wáinin̄ asamtai tu enentáimprarmiayi. ³⁰ Jútas tantan yua kashi ajasmanum jíinkimiayi.

Yamaram akupkamu

³¹ Jútas jíinkimtai Jesus tímiayi “Wi Aents Ajasu asamtai winia kakarmar yamaikia paant átatui. Tura wi túramujai Yusa kakarmarisha ti paant átatui. ³² Wi Yusa kakarmar̄in̄ paant awajeakui Wisha ni Uchir̄í asamtai winia kakarmarnasha Yuska wárik paant awajsattawai. ³³ Uchichiru, atumjaī ti untsur̄í tsawant pujuschattajai yamaikia. Wi Israer-shuaran tímiay nútiksanak atumin̄ tájarme. Atumsha Winia eátkáttarme tura wi wéamunam winishtatrome. ³⁴ Jū yamaram akupeamun amaajai nuamtak mai anenai ajatarum tusan. Wi atumin̄ aneajrumna núnisrumek atumsha nuamtak mai anenai ajatniuitrome. ³⁵ Anenaiyakrumniñkia nujaī ashí shuar “Kristu unuiniamur̄í áiniawai” túramartatui.

Pít̄iur Nin natsantratniun Jesus ujakmania nu

(Mateu 26.31-35; Márkus 14.27-31; Rúkas 22.33-34)

³⁶ Semun̄ Pít̄iur Jesusan aniasmiayi “Uunta, ¿tua wéam?”

Jesussha tímiayi “Wi wéajna nūi yamaikia winichminiaitrome. Tura ukunam winittiarne.”

³⁷ Nuyá Pít̄iur tímiayi “Uunta, ¿urukamtai yamaikia winichminiaitaj? Ámin yáin̄tajtsan jakataj tajai.”

³⁸ Jesussha tímiayi “¿Nekasmek táme? Ti nekas tájame, atash shiniatsain̄ Winia menáintiú natsantrurtatme” tímiayi.

14

Jesus Yus-jintiaiti

¹ “Kúntuts pujusairap. Yus enentáimtustarum, Winiasha enentáimtursatarum. ² Winia Aparūí átum pujustin̄ ti an̄kant awai. Tura nuna iwiarataj tusan Aparūí wéajai, nekasaiti. Nekaschaitkiuñkia ¿itiurak ujakaajrum? ³ Tura iwiaaran amukan ataksha tátatjai. Tura tana yaruaktatjarme, wi pujamunam atumsha pujusúk tusan. ⁴ Wi wéaj nu nékarme tura jintiasha nékarme” tímiayi Jesus.

⁵ Tumas tímiayi “Uunta, Ame weam nu nékatsji. ¿Jintiasha itiurak nekaattaj?”

⁶ Jesussha tímiayi “Wi nekas jintiaitjai. Wíjain̄chu wekaana nuka winia Aparūí jeatniun pen̄ké tujintiawai. Tura Wisha tuke nekas tiniu asan nekas ana nuna shuáran nékamtikiajai. Wisha shuáran yamaram iwiaakman tuke amuukashtinian súwitjai. ⁷ Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiayi.

⁸ Nuñkia Jiripisha tímiayi “Uunta, Apasha wáinkia maak.”

⁹ Jesussha tímiayi “Jiripi, atumjaī ti pujusu aisha ¿tuke nékartsumek? Winia wáitkia nuka Winia Aparnasha wáinkiaiti. ¿Itiurak, nuikia, “Apasha

wáinkiarkea maak” tame? ¹⁰ Winia Aparjaj tsaninkian pujakun tura winia Aparsha Wijjaj pujakui tuke chikichkiitji. ¿Nu nékatsrumek? Wi tájarmena nu Winia chichampruchuiti. Yus Apa Winí pujak ni wakeramun takaawai. ¹¹ Nekaatarum. Wisha winia Aparjaj tsaninkia pujakur nekas chikichkiitji. “Nu chicham iturchataiti” enentáimkiurmeka wi túramu nuikia enentáimpratarum. Wi túramujaj chikichik ájinia nu páantchakait. ¹² Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparuj wéakui nuna nankaamas tujintiamun túrattawai. ¹³ Ashí Winia enentáimtursarum seatrumna nuna amastatjai. Nújajinkia winia Apar shiir awajnastatui. ¹⁴ Winia enentáimtursarum seakrumninkia ashí túrattajaj’ tímiayi.

Jesus Yusa Wakanin akupkattawai

¹⁵ ‘Atumsha anentkurmeka winia chichamur umiktarum. ¹⁶ Tura wéakun winia Aparun chikichan akupturmakti tusan seattajaj. Niisha atumjaj tuke pujak atsanamprartatui. ¹⁷ Nusha Yusa Wakaníinti. Yus-shuarcha Nin nekaachmin áiniawai. Tuma asamtai ni enentáin wayachminiati. Antsu átumka atumi enentáin pujakui Nii nékarme. Niisha atumí enentáin tuke pujustatui. ¹⁸ Mitiaikia áitkiasnak ikiukchat-tajrume. Atumíin atak tátatjai. ¹⁹ Ishichik tsawant nankaasmatai chikich shuar irunna nu wáitkiachartatui. Tura Wi iwiaaku asamtai átumka nu iwiaakmajaj pujustatrume. Tuma asarum wáitkiattarme. ²⁰ Tura nu tsawantaj ju nekaattarme. Wisha winia Aparjaj tsaninkia pujakur chikichkiitji. Núnisnak Wisha atumjaj tsaninkian pujajaj. Tura atumsha Wijjaj tsaninkia pujarme. ²¹ Shuar Winia anentuka wi akupkamun nekáa umíawai. Nú shuarnaka winia Aparsha aneawai. Wisha nin aneajaj tura nekarati tusan iniaktustatjai.” Jesus nuna tímiayi.

²² Chikich Jútas, Iskariútichu, tímiayi “Uunta, ¿urukamtai ashí shuarnum iniaktutskesha aya in iniaktustatam?”

²³ Jesus tímiayi “Winia anentuka tájana nuna enentáimtawai. Winia Aparsha nu shuaran aneattawai. Tura Wisha winia Aparnum nu shuarjaj tsaninkia pujustatji. ²⁴ Antsu Winia anentchaka tájana nuna enentáimtatsui. Átum ántarmena nú chichamka wíniachuiti, antsu Yus Apa Winia akuptukua Núnaiti’ tímiayi.

²⁵ ‘Atumjaj tuke pujakun nuna tájarme. ²⁶ Yus Apa ni Shiir Wakanin atumin yáinmak atsanamprarat tusa akupturmaktatrume. Wi seam túrattawai. Nu Wakancha ashí Wi ujakjarmena nuna atak enentáimtikramprar ashí unuitiamprartatui’ tímiayi.

²⁷ ‘Imiatkinchanum pujustarum. Imiatkinchanum pujajna núnisrumek pujustarum tusan amaajaj. Jú nunkanmanka warastin wáinkiashtatrume. Antsu iturchatnum pujayatrunkesha Wijjaj imiatkinchanum pujustatrume. Ashamtsuk pujustarum. Itiurchat enentáimprairap. ²⁸ Nuik timiaj nu antukmarme. Aparuj wena atak atumíin tátatjai. Winia Aparka Wijjaj nankaamas úntaiti. Tuma asamtai ti nekas anentkurmeka “Aparuj wéajaj” takui ashí warasaarme. ²⁹ Nuka túmatsain ujajrume. Túrunamtai nuyá Winia enentáimtursattarme” tímiayi.

³⁰ Jú nunkanmayan akupin winiakui atumjaj núkap chichaschattajaj yamaikia. Winiaka nupettukchamniati. ³¹ Tura Wikia winia Aparun aneajaj tura Nii akupturkama nuna tuke túrajaj. Ashí shuar nuna nekaawartai tusa ashí túrunatniuiti. Wajaktiarum. Juyá wetái’ tímiayi.

15

Numi arakma áintsan̄ketjai

¹ ‘Winia iwiaakmarun amaakun numi arakma áintsan̄ketjai. Wikia kampuintjai atumsha kanawentrume. Winia Aparsha arakan wáiniua núnisaiti. ² Winia kanawernasha nereatsna núnaka tsupik ájapeawai. Tura nereana núnaka púruawai nú nukap nerekat tusa. ³ Wi ujakjarmena nujaj puruarmaitrume. ⁴ Numí kanawesha kampuin áchitkiachkun̄ka niñki nerechamniaiti. Núnisrumek atumsha Winí áchitkiachkurmeka nerechamniaitrume. Wi atumjaj áchitkij núnisrumek atumsha Winí tuke áchitkia atarum’ tímiayi.

⁵ ‘Wikia kampuintjai atumsha kanawentrume. Kampuinkia kanawen áchitkia núnisnak achiakjarme. Tura kanawe ni kampuiniñ áchitkia núnisrum Winí áchitkia atarum. Túrakrumka núkap nerektatrume. Antsu Wíjajinchuka péñker túratin péñké tujintiarme. ⁶ Winí áchitkiachuka ajapam kukartatui. Kanawesha kukarmatai shuar irumkar áesawartatui’ tímiayi.

⁷ Tuke Winí áchitkiaitkiurmeka tura winia chichamprusha kajin-mattsuk emetarmeka átum wakerarmena nu seakrumin amastatjai. ⁸ Átum núkap nereakrumniñkia ashí shuar “Nekas Jesusa unuinia-murinti” túramartatui tura winia Aparnasha shiir awajsartatui. ⁹ Winia Apar anenna nútiksanak Wisha atumin aneajrume. Winia aneamur tuke atarum. ¹⁰ Winia Aparu akupkamurñ umiakun tuke ni aneamurintjai. Núnisrumek winia akupkamur umiakrumka tuke winia aneamur átatrume’ tímiayi.

¹¹ ‘Wi waraajna áintsarmek warastarum tusan nuna tájarme. Tura ti shiir warastatrume. ¹² Wi akupkamu júiti: “Wi aneajrumna nútiksarmek ashí anenaitiarum.” ¹³ Shuar ni amikrñ yáintaj tusa jakañka ti anenkartichukait. ¹⁴ Wi akupeamu takaakrumka atumsha winia amikruitrume. ¹⁵ Takarniuka ni uuntri takaana nuna nékatsui. Tuma asantai “winia takarniuruitrume” tátsujrume. Antsu ashí winia Apar táman ujaku asan “winia amikruitrume” tájarme. ¹⁶ Aya atumí enentáimsamurijjaj Wí shuar ajaschamarme. Antsu akatramur ajastarum tusan atumniaka achikjarme Wi. Winia takatur takastiniaitrume. Túrarum péñker túratniuitrume nerektinia áintsarmek. Tura nu nere amuutsuk tuke átiniaiti. Tuma asantai winia Apar searmena nuna amastatui. ¹⁷ Júnaka akupeajrume: Nuamtak mai anenai ajatarum’ tímiayi.

Yus-shuarcha Jesusnasha Níniuncha nakitiainiawai

¹⁸ Ju nuñkanmaya shuar Winia emka nakitrurar atumniasha nakitramarme. ¹⁹ Atumsha ju nuñkanmaya shuaraitkiurminkia niiniua nútiksñ anenmaintrume. Antsu Wí shuar ajastarum tusan ju nuñkanmaya achikmajrume. Túramtai nekas ju nuñkanmayanchuitrume yamaikia. Nu asantai nu shuar nakitramainiawai. ²⁰ “Takarniuka ni uuntri nan̄kaamaschaiti” tíchamkajrum. Shuar Winia yajauch awajtusaru ásar atumniasha yajauch awajtamsartatui. Chikichcha umirtukaru ásar atumniasha umirtamkartatui. ²¹ Winia Akuptkun nékachu ásar Winia enentáimturkurmin yajauch awajtamsartatui’ tímiayi.

22 ‘Wi tana Yus-Chichaman nin ujakchamtaĩnkia tunaanum sumamacharaayi. Antsu ujakma ásar “Nékachkun túraitjai” tíchamin ániawai. 23 Winia nakitruinia nuka winia Aparnasha nakitiainiawai. 24 Aents penké túrachman túrachuitkiuĩnkia tunaanum sumamacharainti. Antsu wi túramun wáinkiaru ániayat Winiasha tura winia Aparnasha nakitiainiawai. 25 Yaunchu Yus akupkamunam áarmaiti: “Penké ántar nakitrurarmai.” Nu chicham uminkiatu tusa túrunaiti’ tímiayi.

26 ‘Tura atsantamprattsa yáinmana nuna winia Aparuıya akuptuktatjarme. Niisha tuke nekas tiniu Wakaniiti. Niisha Yusajıya taa atumin nekamtikramprattarme. 27 Atumsha yaunchu Wijıajı pujusu asarum nekamtikiattarme’ tímiayi.

16

1 ‘Átum kanartukairum tusan júnaka tájarme. 2 Israer-shuar iruntainiunia jıiki akuptamkattarme. Nu arantcha mantamainiaksha “Yúsan shiir awajsattsan túrajai” tíartatui. 3 Nu shuar Winiasha tura winia Aparnasha nékachu ásar túrutmawartatui. 4 Núnaka yamáı tájame. Tura túrunamtaı “núnsaıaı átiniaiti” timiaı nu nekaarum itiuıchat enentáimprairap’ tímiayi.

Yusa Wakanı túrana nu

‘Atumjai tuke pujá asan núnaka yaunchu ujakchamajrume. 5 Antsu yamaıkia wáketjai winia Akuptukmia nujai pujustaj tusan. Tuma áın wéajna nu inintratsrume. 6 Antsu nuna takui ti kuntuts enentáimprarme. 7 Tura Wi wémataı atumjainkia nuna nanıkaamas penıker átatui. Iis, Wi wéaknaka atumin yainmaktinia nuna akupkattajai tura wéachkuınkia táchattawai. Nuka ti nekasaiti. 8 Yusa Wakanı taa ashı jú nunıkanmaya aentsun ju menaintiun nekamtikiattawai. Ni tunaarı aan nekamtikiattawai. Penıker tunaajainıchu wekasamniana nunasha nekamtikiattawai. Tura Yus tunaanum súmamtkiamniana nunasha nekamtikiattawai. 9 Winia enentáimturainiachu tunáarintin ániawai. 10 Winia Aparuı wáketkui wáitkiashtatrume. Tuma asamtaı ashı shuar wi penıker tunaajainıchu wekaamun nekaawartatui. 11 Tura ju nunıkanam akupniunka Yus tunaanum súmamtkiaı asa shuarnasha súmamtkiamniaiti. Nuna paant nekaawartatui’ tímiayi.

12 ‘Nu arantcha núkap tíintjarme túrasha átumka nekaachaintrume. 13 Yusa Wakanı ashı nekas tiniu asa ashı nekasa nuna unuitiamprattarme. Ni enentáimtiaıjıı tíchattawai antsu winia Aparuı antukma nuna ujatmaktatui. Ukunam átatna nunasha ujatmaktatui. 14 Ashı Wınian ujatmak Winia shiir awajustatui. 15 Ashı winia Aparı takakna nusha Wıniaiti. Nu asamtaı “ashı Wınian ujatmaktatui” tajaı’ tímiayi.

Kúntuts pujuiniayat ukunam warasartatui

16 ‘Ishichik pujusrum Winia wáitkiashtatrume. Nuyá ataksha ishichik pujusrum ataksha wáitkiattarme. Wisha winia Aparuı wéajai’ tímiayi.

17 Nuyá ni unuiniamurı nuamtak aniniaisarmiayi “¿Jú chichamsha warimpait? “Ishichik pujusrum wáitkiashtatrume tura ataksha ishichik pujusrum wáitkiattarme tura Aparuı wéajai” tátsuk. 18 “Ishichik pujusrum” tana nusha ¿warimpait? Nii tana nu ántatsji” tiarmiayi.

19 Jessusha nin aniastai táman nekáa tímiayi “Ishichik pujusrum wáitkiashtatrume nuyá ataksha ishichik pujusrum wáitkiattarme” tímiaıjıı. ¿Núchakait átum inintrustin wakerarmena nu? 20 Ti nekas tájarme:

Átumka kúntuts pujusrum úttiatrume tura Yus-shuarcha warásártatui. Tuma aínkⁱ átum kúntuts pujayatrume ukunam warastatrume. ²¹ Iis, nuwasha jurertin tsawant jeamtai najaimiak wáitiatsuk. Tura uchin jurerka ti waraak wáitsamunka enentáimtsui. ²² Atumsha núnisrumek yamaik kúntuts pujarme. Tura atak íttjarum tusan winiakui ti shiir atumí enentáin warastatrume. Nu warastinian jurutramkichminia ániawai.’

²³ ‘Nu tsawantinkia penké ininsashtatrume. Ti nekas tájarme Winia enentáimtursarum winia Apar searum nuna ashí amastatui. ²⁴ Yamaisha Winia enentáimtursarum winia Apar seachurme. Seakrumniñkia amasatui ti shiir warasaruk tusa’ tímiayi.

Jesus jú nunkanmayan nupetkaiti

²⁵ ‘Métek-taku chichamjai nakumkan nuna tímiajai. Tura ukunmanka nujai chichatsuk winia Aparnan paant ujaktatjarme. ²⁶⁻²⁷ Nu tsawantai átumka Winia enentáimtursarum winia Apar seattarme. Winia Aparsha atumin anea asamtai Wi Nin áujsatin atumashtatrume. Winia anentu asarum tura winia Aparuíya taman enentáimtakrumin Niisha anenmawai. ²⁸ Winia Aparuíya jíinkin jú nunkanam táwitjai. Yamaikia jú nunkanmaya jíinkin ataksha Aparuí wáketjai” tímiayi.

²⁹ Nuyá ni unuiniamurí tiarmiayi “Yamaikia métek-taku chichamjainchu chichaame. ³⁰ Mash nékaitme. Shuar Ámin ininmatsain péñker áimkiatin nékame. Nu nekaar Ame nekas Yúsumaitme tu enentáimtaji” tiarmiayi.

³¹ Tura Jesus tímiayi “¿Nekasash enentáimtarum? ³² Ti warik átumka ashamkarum niisháa tsakinmaktatrume tura Winiak ikiurkittiarne. Antsu winia Apar pujakui Wiki pujatsjai. ³³ Winia enentáimturkuram imiatkinchanum pujasarat tusan tájarme. Jú nunkanam ti wáitsattarme. Tura Wi jú nunkanmayan nupetka asamtai warastarum” tímiayi Jesus.

17

Jesus ni unuiniamurín Yúsan áujtawai

¹ Nuna tí Jesus nayaimpinmaaní íimias tímiayi “Aparu, yamáí jeayi ame Uchiram shiir awajsatin. Núnisan ame Uchirmisha péñker awajtamsattawai. ² Ashí shuara Akupniurí najataitme. Nujainkia Winia surusumna nú shuaran yamaram iwiaakman tuke amuukashtinian súsaitjai. ³ Aparu, chíkich atsawai. Amek nekas Yúsaitme. Wisha Jesuskrístuitjai Ame akuptukmamna nu. Nu asamtai ashí shuar nuna enentáimtak yamaram iwiaakman tuke amuukashtinian takakui.’

⁴ ‘Ashí túratniun akuptukmamna nuna amukuitjai. Túran ju nunkanam shiir awajsaitjame. ⁵ Nuna túramtai, Aparu, ti yaunchu jú nunka atsaisha Ámijjai pujakui shiir awajtusmamna núnismek yamaisha shiir awajtusta.’

⁶ ‘Ashí jú nunkanmaya surusmamna nú shuaran Ámin nekamtikiamjai. Áminiu ániakui surusmame. Niisha ame chichammin umirtámkaruiti. ⁷ Ashí Wi takaajna nu Amek surusuitme. Niisha nuna nékainiawai. ⁸ Ame chichamem surusmam nuna ujakam niisha umirtámkaruiti. Ame akuptukakmin Amiiníya táwitjai. Nu nekasaiti tu enentáimtuiniawai.’

⁹ ‘Nin yainkiarta tusan seajme. Jú nunkanmaya shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yainkiarta tusan seajme. ¹⁰ Ashí Winia ainia nuka

Áminiuiti. Tura ashí Áminiu ainia nuka Winia ániawai. Winia péñkerusha ni túramunam paant awajsaiti.'

¹¹ 'Wikia yamaikia jú nunñkanam pujuschattajai. Tura nu shuarka juí pujuartatui. Antsu Ámijjajai pujustajtsan winiakui ashí surusumna nuka, Aparu, ti shiir asam ame kakarmarmijjajai wáinkiatá. Wisha Ámijjajai chikichik ájinia núnisan niisha ashí iruntrar chikichik ajasarti. ¹² Juí niijjajai pujakun ame kakarmarmijjajai ti péñker wáinkiamjai. Antsu Yus-Chíchamnum aarma uminkiatí tusa aya chikichik menkakaiti. Niisha tuke emesnartinia núiti.'

¹³ 'Yamaikia Amijini winiajai. Tura juí tuke pujakun júna tájame. Niisha Wi waraajna núnisar ti shiir warasarat tusan tajai. ¹⁴ Wi jú nunñkanmayanchuitjai. Niisha núnisan jú nunñkanmayanchu ániawai. Tuma asamtai ame chichammin Wi susamtaí jú nunñkanmayá shuarka nin nakitiainiawai. ¹⁵ Jú nunñkanmayá jiiiki tusan seatsjame. Antsu íwianch nin nupetkain tusan seajme. ¹⁶ Wi juyanchuitaj áintsan niisha juyanchu ániawai. ¹⁷ Ame chichammin ti nekasa nuna ántuiniakui péñker awajsata. ¹⁸ Juyá shuarnum akuptukmam áintsan Wisha nin chíkich shuarnum akupeajai. ¹⁹ Aya Áminiunak takastaj tusan enentáimtimjai. Túra asamtai niisha aya Áminiunak takastinian enentáimpratin ániawai' áujtak tímiayi.

²⁰ 'Aya níniunkeka seatsjame antsu ashí ni chichamen antukar Winia enentáimtursartatna nusha ame yáinkiarata tusan seajme. ²¹ Ashí niisha chikichikiniak enentáimtusarti tusan seajme. Wisha Amesha, Aparu, chikichik ájinia núnisan niisha Iijjajai iruntrar chikichik ajastai tusar seajme. Wíi shuar chikichik najanata tusan seajme. Nuyá jú nunñkanmayá shuar akuptukuitmena nuna nekaawartatui. ²² Ame shiir awajtursamna núnisnak Wisha nin shiir awajsaitjai. Iikia chikichik ájinia núnisan niisha chikichik ajasarti tusan túraitjai. ²³ Wi ni enentáin pujakui Amesha Winin pujakmin penké chikichik ajasarti. Túramtai ashí shuar júna nekaawartatui: Ame akuptukuitme, tura Winia anenmena áintsam nu shuarsha aneame. Wíi shuar chikichik ajasmajajai ashí shuar nuna nekaawartatui.'

²⁴ 'Aparu, shuar surusmam nu, Wi pujustatjana nuí pujusarti tusan seajme. Tura ti shiir awajtusmamna nuna íisarti tusan nuna seajme. Ju nunñka najanchamunman tuke anentin asam ti shiir awajtusmitme. ²⁵ Aparu, ti péñker áminin jú nunñkanmayá shuar nekarmainiatsui. Antsu Wi nékajme. Ju shuarsha ame akuptukman nékainiawai. ²⁶ Nú shuaran Ámin nekarmawarti tusan jintintiaitjai. Tura nu arantcha jintintiattajai. Nújainkia Wisha ni enentáin pujurkui Winia anenmena áintsan niisha anenkratin ajasartatui' áujtak tímiayi Jesus.

18

Suntar Jesusan achikiarmiania nu

(Mateu 26.47-56; Márkus 14.43-50; Rúkas 22.47-53)

¹ Jesussha nuna tinia amuk ni unuiniamurijjajai Setrun entsá katin numi arakmanum wémiayi. ² Jútassha Nin suruktajtsa pujumia nuka nu ajan nekaamiayi. Untsurí tsawant Jesus ni unuiniamurijjajai nuí iruntramtai Jútas Jesusan nuí wáinkiatniun enentáimpramiayi. ³ Tura untsurí suntarjajisha Jesusan tariarmiayi. Pariséusha Israer-shuar Patri

uuntriṣha suntarnasha Yusa Jeen wáiniuncha Jesusan achikiarat tusa akupkarmiayi. Niisha machitniasha nanḱincha rámparancha jiniasha júkari weriarmiayi. ⁴ Jesussha ashí átinia nuna neka asa jiintiuki “¿Ya eḱarum?” tímiayi.

⁵ Niisha “Nasarénumiḱ Jesus” tiarmiayi.

Jesussha “Wiitjai” tímiayi.

Jútassha Jesusan surukua nu niijiai pujuarmiayi. ⁶ Tura Jesus “Wiitjai” takui ti ashamkar úkumur waketainiak iniaarmiayi.

⁷ Ataksha Jesus “¿Ya eḱarum?” tímiayi.

Niisha “Nasarénumiḱ Jesus” tiarmiayi.

⁸ Nuiḱia Jesus tímiayi “Wiitjai, tájarme. Winia eḱatkurmeka Wíi shuar ainia júka wakеткиarti” tímiayi. ⁹ Jesus nuik aujuk “Winia Apar surusma nu menḱakacharai” timia nu uminkiat tusa Jesus “wakеткиarti” tímiayi. ¹⁰ Nuyá Semun Pítiur machitian jusa Marku kuíshin untsuurnumaanḱi tsupirkamiayi. Markusha Israer-patri uuntri takarniuriyayi. ¹¹ Túramtai Jesus Pítrun tímiayi “Machitrumka awainḱi ikiusta. Winia Apar wáitsatniun surakuḱia ¿wáitsashtinkaitia?”

Israer-patri úuntriniam júkiarmiania nu

(Mateu 26.57-58; Márkus 14.53-54; Rúkas 22.54)

¹² Nuiḱia apach suntarsha ni kapitiantriṣha Yusa Jeen wainniusha Jesusan achikiar jinḱiawarmiayi. ¹³ Nuyá Anasa jeen júkiarmiayi. Anassha Kaipiasa weariyayi. Tura Kaipias nu uwitin Israer-patri uuntriyaayi. ¹⁴ Kaipiasa nuik “¿Ashí Israer-shuar mesertin penḱerkait. Antsu aya chikichik shuar jákatin penḱerkchakait?” timia núiti.

Pítiur Jesusan natsantramiania nu

(Mateu 26.69-70; Márkus 14.66-68; Rúkas 22.55-57)

¹⁵ Semun Pítiur chikich unuiniamujai Jesusa uku weriarmiayi. Israer-patri uuntri nú unuiniamunka nékauyayi. Tuma asamtai ni jeen jeawar, suntar Jesusjai aḱ tanishnum wáiniakui niisha wayamiayi. ¹⁶ Tura Pítiur aḱ wáitiniam wajaamiayi. Túramtai chikich unuiniamu jiinḱi wáitin wáinia nú nuwajai chichas Pítrun awayamiayi. Nuḱ nékanu asa yúpichuch awayamiayi. ¹⁷ Waiti wáinniusha Pítrun aniasmiayi “¿Amesha nuna unuini-amurinchukaitiam?”

Pítrusha “Atsá, núchaitjai” tímiayi. ¹⁸ Tsetsek asamtai suntarsha tura nuḱ takarniusha jinia ikiapárar ni nawen anaak pujuarmiayi. Pítrusha nuḱ pachiiniak anamuk pujumiayi.

Kaipias Jesusan aniasmiania nu

(Mateu 26.59-66; Márkus 14.55-64; Rúkas 22.66-71)

¹⁹ Israer-patri uuntri Jesusan aniasmiayi “Ame unuiniamurmasha ¿ya ainia. Tura warí nin jintintiaitiam?”

²⁰ Jesussha tímiayi “Ashí íimiaiainḱi tuke etserniuitjai. Israer-shuar iruntainmasha Yusa Uunt Jeencha Israer-shuar irunainia nuḱ arantut-suk tuke etserkaitjai. ²¹ ¿Urukamtai Winia inintiam? Winia chichamprun antukua nu aniaстарum. Wi timian nii ujatmakarti. Wi timiancha niisha nékainiatsuk.”

²² Jesus nuna takui Yusa Jeen wáiniua nu nuḱ pujá Jesusan yapiniam awati tímiayi “¿Núnisanḱ nekas úuntnum chichastinkait?”

²³ Jesussha tímiayi “¿Warinmampa yajauch aa? Turuttia. Tura tájana nu penkeraitkiuin̄kia ¿urukamtai awattiniam?” ²⁴ Nuyá Anas Jesusan jinkiá Kaipias takaamunam akupkamiayi Kaipias Patri uuntri asamtai.

Pítiur ataksha Jesusan natsantramiania nu
(Mateu 26.71-75; Márkus 14.69-72; Rúkas 22.58-62)

²⁵ Tuke Anasa jeen chichainiaj Pítiur jinia anamuk puján shuar aniak “¿Amesha Jesusa unuiniamurinchukaitiam?” tiarmiayi.

Pítrusha “Atsá, wíchaitjai” tímiayi.

²⁶ Chíkich takarin, Marku shuari, nuj pujumiayi. Pítiur Marku kuishin tsupirkamia nuna shuari asa tímiayi “¿Ajanam Jesusjai wekaamin wáinkiachmakajam?”

²⁷ Pítrusha ataksha “atsá” taiñ atash shiniukmiayi.

Piratu Jesusan aniasmiania nu
(Mateu 27.1-2, 11-14; Márkus 15.1-5; Rúkas 23.1-5)

²⁸ Nuyá Kaipiasaiya Jesusan júkiar tsawant tsawaamunam apach kapi-tián Piratu takatai jeenam ejeniarmiayi. Israer-shuarsha ni uuntri akupkama nunisar wapik ajasaj tusar nu jeenam wayacharmiayi. Wayawarka paskua nampernum yurumáchmin ármiai. ²⁹ Nu asamtai Piratu niijjai chichastaj tusa jínki tímiayi “¿Jú áishman̄sha warí tunáa túrait?”

³⁰ Niisha “Tunaarinchaitkiuin̄kia am̄ini itiachaaji” tiarmiayi.

³¹ Tutai Piratu tímiayi “Atumek júkirum atumí akuptammarijai ni tunaari nekaatarum.”

Israer-shuarsha tiarmiayi “Antsu iikia Israer-shuartikia tunáa shuarsha máachminiaitji.” ³² Yaunchu Jesus ni jákatniurin enentáimtus “Wi awajnaaitniuitjai” tímiayi. Niisha krúsnum awajnain asamtai apach máataijjai Nii timia nu uminkiamiayi.

³³ Piratusha atak jeá wayá Jesusan untsuk “¿Ámeke Israera Uunt Akupniurinkaitiam?” tímiayi.

³⁴ Jesussha tímiayi “¿Amekek nu inintram. Kame chíkich túramainiatsuash?”

³⁵ Piratusha tímiayi “¿Wi Israer-shuarkaitiaj? Ameer shuarak Israer-patri uuntrijjai winin itiarmarai. ¿Warí tunáa túraitiam?”

³⁶ Nuin̄kia Jesus tímiayi “Wi jú nunkanam akupniuchuitjai. Juyaitkiuin̄kia Winia nemartuiniana nu máanaikiaraay. Túrawarmatai Israer-shuarnum surutkcharaay. Antsu juyán akupniuchuitjai.”

³⁷ Piratusha “¿Nuikia ame nekas uunt akupniukaitiam?” tímiayi.

Jesussha tímiayi “Ee, ame támena nu nekasaiti. Jú nunkanam akiinian ashí shuarn nekas ana nuna ujaktinian táwitjai. Ashí shuar nekas ana nuna umirniuka Wi táman ántawai.”

³⁸ Tura Piratu “¿Nekasa nusha warimpiait?” tímiayi.

Piratu Jesusan mantamnatniun tímiania nu
(Mateu 27.15-31; Márkus 15.6-20; Rúkas 23.13-25)

Piratusha nuna tj, atak Israer-shuarjai chichastajtsa jiinki tímiayi “Jú aishman̄ka tunaarin penké wáittsujai. ³⁹ Tura ashí uwitin paskua nampernum sepunmayá shuar an̄kant akupkatniuiti. Núnisrum tuke searme. Tuma asamtai, ¿yamaikia Israera Uunt Akupniurin an̄kant akupkattajak?” tímiayi.

⁴⁰ Nuiñkia ashí kakantar untsumainiak “Ju akupkaip; antsu Parapás akupkatá” tiarmiayi. Nu Parapássha kásauyayi.

19

¹ Nuyá Piratu suntaran akupkamiayi Jesusan asutiáwarat tusa. ² Suntarsha Jesusan wishikrar tawasap jañki najanamun etsenkrumtikiarmiayi. Yamakai pushincha uunt akupniua áintsan áentsrarmiayi. ³ Nuyá “Israera Uuntrja, kakaram ajasta” tiar yapiniam awatiarmiayi. ⁴ Nuyá Piratu atak jiinki tímiayi “Átum wáinkiarum nekaatarum tusan Jesusan jíiktijatjai. Wikia tunaarinkia penké wáittsujai.” ⁵ Tímiatai Jesussha jañkin etsenkruku tura pushin yamakairman entsaru jíinkimiayi. Tura Piratu nuí káunkarun tiarmiayi “Pai júiti, ístarum.”

⁶ Israer-patri uuntrijsa suntarsha Jesusan íisar ataksha ataksha kakantar untsumainiak “Krúsnum jakati” tiarmiayi.

Piratusha “Átum júiirum máatarum. Ni tunaarín penké wáittsujai” tímiayi.

⁷ Tura Israer-shuar tiarmiayi “Nu shuar “Yusa Uchiríntjai” takui jákatniuiti. Iiniu akupeamu aarma nuí núnskete” tiarmiayi. ⁸ Nuna antuk Piratusha nu nankaamas ashankamiayi. ⁹ Ataksha init wayá Jesusan aniasmiayi “¿Tuyampaitiam?” Tura Jesussha penké áikchamiayi. ¹⁰ Nuyá Piratu tímiayi “¿Urukamtia winia airtsum. Wi jeajna nu nékatsmek? Wakeraknaka krúsnum máatniuncha tura ankant akupkatniuncha jeajai.”

¹¹ Tutai Jesussha tímiayi “Yus nuna amaschaitkiuñkia penké tujinki-aintme. Nu asamtai amiñ surutka nu ámin nankaamas tunaarinniuiti.”

¹² Piratusha nú chichamtaik Jesusan ankant akupkatsa wakerimiayi. Antsu Israer-shuar untsumainiak tiarmiayi “Ju ankant iníakmekame áunt akupniui amikrinchuitme. Juka “úunt akupniuitjai” taku atumí uunt akupniurí nemasrinti” tu untsumkarmiayi.

¹³ Piratusha taman antuk akupin pujutainium pujus Jesusan untsukmiayi. Nuí kaya ukatkamu asamtai Israer-shuara chichamen Kapata anaikiarmiayi. ¹⁴ Paskua jisat jeatsain nantu tutupin ajatsain Piratu Israer-shuara tímiayi “Uunt akupniuram ístarum.”

¹⁵ Tura ashí “Jakati, jakati, krúsnum máatá” tu untsumkarmiayi.

Tura Piratu “¿Atumí uunt akupniurín krúsnum máattajak?” tímiayi.

Tura Israer-patri uuntri tiarmiayi “Atumí uunt kapitíántrumek in akup-tamji. Chíkichka atsawai.”

¹⁶ Tutai Piratu Jesusan krusnum mantamnati tusa tsankatkarmiayi. Tutai niisha Jesusan júkiar wearmiayi.

Jesusan krúsnum máawarmiania nu

(Mateu 27.32-34; Márkus 15.21-32; Rúkas 23.26-43)

¹⁷ Jesussha ni krusrí yanaki Kúrkuta náinnium wémiayi. Kúrkuta naarjsa Israer-shuara chichamen “muuka ukunch” tawai. ¹⁸ Nuí krúsnum ajintrurar awajainiarmiayi. Tura mai paé jimiará shuara chikichik chikichik awajainiarmiayi. Tura Jesus ajapén ámiayi. ¹⁹ Piratusha Jesusa krúsriñ uunt áarman anujkamiayi. *NASARETNUMIA JESUS, ISRAERA UUNT AKUPNIURI*

Tu áarmauyayi. ²⁰ Israer chichamjaisha Kriaku chichamjaisha Rúmanmaya chichamjaisha áarmauyayi. Menaintiu chichamnum aarma asamtai tura Jesusarén pepru tíjiuch asamtai Israer-shuar ti untsurí áujiarmiayi. ²¹ Nu

asamtai Israer-patri uuntri Piratun jeariar “Israera Uunt Akupniuri” áaraip. Antsu “Israera Uunt Akupniurintjai tawai” tu aarta” tiarmiayi.

²² Tura Piratu nincha áikiar “Wi áaraj nuke átatui” tímiayi.

²³ Suntarsha Jesusan krúsnum awajainiar ni entsarmarin kuátru akankar ankant ankant júkiarmiayi. Tura ni pushirin apatsuk najanamu asamtai jáaktinian nakitrarmiayi. Kame yakíya nunkaanj apaiyichma takamtsukuyi. ²⁴ Tuma asamtai suntar tiarmiayi “Juka jáakchatai. Antsu nakurakrin yának ati nu jukiti.” Nújainkia yaunchu Yus-Chichamnum aarma nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsarmiayi” áarmaiti.

²⁵ Krúsnumsha Jesusa nukurísha Kriúpasa nuarí Marisha tura Máktaranmaya Marisha wajaarmiayi. ²⁶ Jesus ni nukuríncha tura ni ti aneamu unuiniamuríncha nuí wajan wáiniak ni nukurín tímiayi “Nukuru, ju ame uchirmea áintsan atí.” ²⁷ Nuyá ni unuiniamuríncha tímiayi “Ju ame nukua áintsan atí.” Nu tsawantaik nu unuiniamurí ni jeen jukí awayámiayi.

Jesusa jakamuri

(Mateu 27.45-56; Márkus 15.33-41; Rúkas 23.44-49)

²⁸ Nuyá ashí uminkiamtai Jesus nuna nekáa yaunchu Yus-Papinium aarma uminkiatu tusa “kitiamajai” tímiayi. ²⁹ Nuísha piniñnum churuín ámiayi. Tura shuar nuna uruchjai ejampar sapapjai ijiu mukunaati tusa susamiayi. ³⁰ Jesussha churuínian najekaa “ashí túrunatniua nu mash uminkiai” tímiayi. Nuna tí, muuken nená jakamiayi.

Suntar Jesusan paenam nanjikijai ijiumiania nu

³¹ Nu tsawantai, kashinkia paskua námper uunt tsawantri asamtai tura ayampratin tsawant aa asamtai, Israer-shuar jaka ayashí nuí paant ain tusa nakitrarmiayi. Nu asamtai Piratun seainiak “Krúsnum ajintrurma ainia nuna kankejain suntar kupirkarti. Nuyá wari jákarmatai krúsnumia júkiarti” tiarmiayi. ³² Nuyá suntarsha weriar emka krúsnum amia nuna kankejain kupirkarmiayi. Nuyá chikichnasha Jesusjai atsankiar ajintrurma nuna kankejaincha kupirkarmiayi. ³³ Tura Jesusan weantuk yaunchu jákai tusa kankejain kupirtsuk ³⁴ suntar aya paenam ijiumiayi. Ijiumtaisha nu chichamtaik numpa yumijjai puarmiayi. ³⁵ Wi, Juan, nuna wainkia asan nekas tajai. Atumsha Yus enentáimtustarum tusan tí nekas tajai. Wi áarajna nu nekasaiti nekajai. ³⁶ Yaunchu Yus-Chichamnum aarma uminkiatu tusa túrunaiti:

“Ni ukunchin kupirkachartatui” tu áarmaiti.

³⁷ Tura chikichcha:

“Ijiuarmiania nuna wáinkiertatui” tu áarmaiti.

Jesus iwarsamu amiania nu

(Mateu 27.57-61; Márkus 15.42-47; Rúkas 23.50-56)

³⁸ Nuyá Arimatéanmaya Jusé Jesusa ayashín jukitiaj tusa Piratun seamiayi. Nu Jusé Jesusan enentáimtaitiat Israer-shuara úuntrin ashamak paant nemarsachmiayi. Niisha seamtai Piratu “Jukitia” tímiayi. Tutai Jusé Jesusa ayashín jukimiayi. ³⁹ Nikiutémusha Jesusjai chichas-taj tusa kashi tarimia nu jimirá kunkuin pachimpramun ti nukap sumak itiamiayi. Mira kunkuinniasa aruí kunkuinniasa sumakmiayi. ⁴⁰ Nuyá Jusé Nikiutémujai Jesusa ayashín júkiar kunkuinian kuéerar jaanch

esarmajaj penuararmiayi. Israer-shuar tuke nunisar ikiúu ármiai. ⁴¹ Jesus krúsnum maamua nuí aja tíjiuch ámiayi. Nu ajanmasha waa náinnium paka taurma ámiayi. Nusha yama taurma asamtai jaka nuí ikiuschamuyayi. ⁴² Nu waaasha tíjiuch asamtai tura Israer-shuara ayam-pratin tsawantri jeatemantai Jesusa ayashín nuí iwiarsarmiayi.

20

Jesus nantakmiania nu

(Mateu 28.1-10; Márkus 16.1-8; Rúkas 24.1-12)

¹ Tumintincha káshik kirit aijn Máktaranmaya Marí Jesus iwiarsamunam ístajtsa wémiayi. Jesusan iwiarsar kaya uuntjaj waañ atutkarmiayi. Tura Marí nuí jeá nu kaya uraimiun wáinkiamiayi. ² Nuna wáiniak Semun Pítur pujamunam tsékenki wémiayi. Chíkich unuiniamurj Jesus ti anemia nusha nuísha pujumiayi. Tura Marí tímiayi “Iwiarsamunmaya ii Úntrin júkiarai. Tura ¿tuíntuk ikiusara?” ³ Pítrusha chíkich unuiniamurjijaj jíinkiar iwiarsamunam iyuwarmiayi. ⁴ Mai métek tsékenkiar Pítur jeatsain chíkich unuiniamurj iwiarsamunam emka jeamiayi. ⁵ Niisha wayátsuk tsunsumá iis penuarmarinkia nuí tepan wáinkiamiayi. ⁶ Nuyá Semun Pítur ukunam jeá iwiarsamunam wayá penuarmarj nuí tepan wáinkiamiayi. ⁷ Chíkich jaanchcha Jesusa muuken penuarma nusha nanerma niisháa tepan wáinkiamiayi. ⁸ Nuyá chíkich unuiniamurj emka tamia nusha iwiarsamunam wayamiayi. Niisha túruna wáiniak “Jesus nekas nantakni” tu enentáimpramiayi. ⁹ Nuna wáintsuk Yus-Chichamnum “Jesus jakamunmaya nantaktiniati” áarman áujariat nekaacharmiayi. ¹⁰ Nuyá mai ni jeen waketkiarmiayi.

Máktaranmaya Marincha Jesus wantintiukmiania nu

(Márkus 16.9-11)

¹¹ Tura Marikia iwiarsamunam juak úutu pujumiayi. Niisha úutiatañ tsunsumá iwiarsamunam ímsamiayi. ¹² Tura Jesusa ayashí nuik tepesmanum nayaimpinmaya suntar puju entsaru jímiar pujan wáinkiamiayi. Chikichik múuknumaani tura chíkichka nawenmaani pujumiayi. ¹³ Nayaimpinmaya suntarsha “¿Urukamtai úutam?” tiarmiayi.

Marísha tímiayi “Winia Úntrin jurutkiarai tura ¿tuíntuk ikiusara?” ¹⁴ Nuna tí ayanmar Jesusan wáiniak Nin nekaachmiayi.

¹⁵ Jesus aniak “¿Urukamtai úutam. Ya eaañ?” tímiayi.

Marisha ajan wáinnia nuiti tusa tímiayi “Uunta, ame ni ayashí jukimkia, tui ikiusmam ujatkata wi jurumkitiaj” tímiayi.

¹⁶ Nuyá Jesus “Mariya” tímiayi.

Tutai niisha ayanmar “Rapuni” tímiayi. Nusha Israer-chichamnum “Uuntá” tawai.

¹⁷ Jesussha tímiayi “Emetruawaip. Winia Aparuj wáatsjai. Antsu weme Wíi shuar titiá “Winia Aparuj nayaimpiniam wéajai. Niisha atumí Aparínti. Winia Yúsruiti tura atumí Yúsrinti” tawai titiá” tímiayi.

¹⁸ Nuyá Máktaranmaya Marisha Jesusa unuiniamurj wáiniak “Wi Úntan wáinkiajai, tímiayi. Niisha juna mash túrutui” tu ujakarmiayi.

Jesus ni unuiniamurj wantintiukmiania nu

(Mateu 28.16-20; Márkus 16.14-18; Rúkas 24.36-49)

¹⁹ Nu tsawantaj, tumintin, ni unuiniamurj Israer-shuara úntrin ashamainiak kashi iruntrar waiti epeni pujuarmiayi. Túrasha Jesus

áyatik wayamiayi. Tura ajapén wajas “shiir pujustarum” tímiayi. ²⁰ Nuna t̄i, nuyá ni uwejen ajintruamuncha ni paen ijiumuncha iniakmasmiayi. Ni unuiniamur̄isha Úuntriñ wáinkiar shiir warasarmiayi. ²¹ Ataksha Jesus “Shiir pujustarum, tímiayi. Winia Apar akatar akuptukma núnisnak Wisha akatran akupeajrume” tímiayi. ²² Nuyá ni matsatmanumaan̄i umpūi tímiayi “Yusa Shiir Wakan̄i atumí enentáñ wayati. ²³ Shuara tunaar̄iñkia átum “asakárti” tákurminkia tsañkurnartatui. Tura nu shuar “sumamati” tákurminkia tuke sumama pujawai” tímiayi Jesus.

Tumas Jesus nantakniun wáinkiamiania nu

²⁴ Tura chikichik unuiniamu, Jímiampamu Tumas, Jesus tamia nūi pujuchmiayi. ²⁵ Tura ukunam chikich unuiniamur̄i ujainiak “Ii Uuntri wáinkiaji” tiarmiayi.

Tura Tumas tímiayi “Ajintruamur̄i wáinkian uwejr̄un awāintiuatniuitjai. Tura paenumsha awāintiuatniuitjai. Penké jaka asamtai aya nujai iniantkimiun enentáimtustatjai” tímiayi.

²⁶ Chikich tumiñtin ataksha Jesusa unuiniamur̄i iruntrarmiayi. Nuiñkia Tumassha niijiai pujuarmiayi. Tura waiti epenmianuman̄ Jesus wayá ajapén wajas “Shiir pujustarum” tímiayi. ²⁷ Nuyá Tumasán tímiayi “Winia uwejr̄ur ísam ame uwejem awāintiuata. Núnismek winia paerui uwejem awāintiuam ístá. Tura arantutsuk nekas enentáimtursata.”

²⁸ Nuyá Tumas “Winia Úuntruá, nekas winia Yúsruitme” tímiayi.

²⁹ Jessussha tímiayi “Winia wáitkiam nuñ enentáimtursame. Antsu Winia wáittsuk enentáimturaru nekas shiir ániawai” tímiayi.

Shuar Yusa Uchir̄in enentáimtusarti tusa jūu papí áarmaiti

³⁰ Aentsti tujintiamuncha Jesus túramu ti untsur̄i jūu papinium áarchamu ániawai. Tura ni unuiniamur̄i mash wáinkiarmai. ³¹ Antsu Jesuska Kristu asa Yusa Uchir̄inti tu enentáimtustarum tusan júnaka áarmajai. Tura enentáimtakmin Jesus ni iwiaakmar̄in yamarma nuna amastatui.

21

Entsá yantamnum Jesus siati (7) unuiniamur̄in wantintiukmiania nu

¹ Tipirias antumiañka káanmatkar̄in Jesus ni unuiniamur̄in wantintiukmiayi. Júnisan̄ ámiayi. ² Semun̄ Pítrusha Jímiampamu Tumassha Kananmaya Natanaérsha Sepetéu uchir̄isha tura chikich jímiar unuiniamur̄isha métek iruntrar pujuarmiayi. ³ Semun̄ Pítrusha “Namakan nekajai nan̄kiattsan wéajai” tímiayi.

Chikich mash “Iisha winittiaji” tiarmiayi.

Wéar uunt kanunam en̄kempr̄ar nu kashi achitsuk tsawararmiayi. ⁴ Káshik āin̄ Jesus entsá káanmatkar̄in wantinkiamiayi tura ni unuiniamur̄isha Jesusan nekaacharmiayi. ⁵ Jessussha tímiayi “Uchiru, ¿namak achikiurmek?”

Niisha “Atsá” tiarmiayi.

⁶ Tutaí Jesus tímiayi “Neka untsuurnumaan̄i ajunkatarum. Nūi achik-tatrame.”

Nii timia núnisan̄ túrawar namakan ti achikiar nekan júsatniun tujinkiarimiayi. ⁷ Nújain̄kia Jesusa unuiniamur̄i Jesus ti aneemia nu Pítrun tímiayi “Ii Úuntriñti.” Takui Pítrusha ámiaku asa ni pushir̄in entsar entsá inian̄miayi yukuak jeataj tusa. ⁸ Chikich unuiniamur̄isha jeachat pujuiniachuk nekan japiki kanujai káanmatkanam jeawarmiayi.

⁹ Káanmatkanam jeawar ji kajir ámanum namakan jiámun wáinkiar_{mi}ayi. Tantancha wáinkiar_{mi}ayi. ¹⁰ Jesussha “Átum achikiurmena nuyá jiátin itiatarum” tímiayi. ¹¹ Tutai Semun Pítur kanunam we nekan nekartiuk káanmatak japiki itiamiai. Itiar namaknasha siantu senkuenta nuyá tres (153) nekamararmiayi. Ti untsurí áyat nekasha jáankach_{mi}ayi. ¹² Nuyá Jesussha “Yurumáitiarum” tímiayi. Ni unuiniamurísha “aya ii Uuntri áminiaiti” túsar inintrustinian natsantiarmiayi. ¹³ Nuyá Jesus wajaki tantan jukí súsarmiayi. Núnisan namaknasha súsarmiayi.

¹⁴ Jesus jakamunmayá nantaki jujai menaintiu ni unuiniamurin wantintiukarmiayi.

Jesus Semun Pítrujai chichasmania nu

¹⁵ Nuyá yurumáwar Jesus Semun Pítrun aniasmiayi “Junasa uchirí Semun_{ka}, ¿ju shuar nan_{ka}amas anentmek?”

Pítrusha tímiayi “Ee, Uunta, wi wakerajam nu Ame nékame.”

Jesussha “Nuin_{ka} winia murikiur ayuratniua áintsam Winia enentáimturainia nu ya_{ntá}” tímiayi. ¹⁶ Ataksha aniasmiayi “Junasa uchirí Semun_{ka}, ¿Winia anentmek?”

Pítrusha “Ee, Uunta, wi wakerajam nu Ame nékame” tímiayi.

Jesussha “Winia murikiur wáinkiatá” tímiayi. ¹⁷ Nú ataksha aniasmiayi “Junasa uchirí Semun_{ka}, ¿winia wakerutamek?”

Pítrusha menaintiu iníam kúntuts enentáimiar tímiayi “Uunta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata. ¹⁸ Maa, nekas tájame. Natsa asamka iwiarmamram ame wakeramunam wéuyame. Tura úntach ajasmeka ame kunturam ayaparakmin chíkich aentstamprattawai tura ame wétin nakitiam nu_j juramkiartatui.” ¹⁹ Jesus nú_{jain}kia Pítur máatniun ujakmiayi. Tura núnisan jakamtai shuar Yúsar shiir awajsatniun ujakmiayi. Nuyá Pítrun “Nemartusta” tímiayi.

Juan túrunatniun Pítur Jesusan aniasmania nu

²⁰ Pítrusha ayanmar chíkich unuiniamurin Jesus ti anea nuna némarun wáinkiamiayi. Kame nu unuiniamuka nuik Jesus jáatsain yurumáiniakui “Uunta, ¿ya surutmaktata?” timia núiti. ²¹ Nincha Pítur wáiniak Jesusan aniasmiayi “Uunta, ¿jusha warí urukatniuit?”

²² Jesussha ayak “Wi wakeraknaka iwiaaku pujain tátatjai tminiaitjai. Nuna tákuisha ¿warí itiurtama? Ámeka nemartusta” tímiayi. ²³ Nú_{jain}kia “Nu unuiniamurí jákashtatui’ tusa Yus-shuarnum áujmatiar_{mi}ayi. Tú_rasha Jesus “jákashtatui’ tíchamiayi antsu áyatik “Wi wakeraknaka iwiaaku pu_{jain} tátatjai takuisha ¿warí itiurtama?” tímiayi. ²⁴ Wikia nú unuiniamurintjai. Ju papincha aaru asan “mash nekasaiti’ tajai. Ashí shuarsha núnisara_n tuíniawai.

²⁵ Nu arantcha ju_j áarchamusha ti awai. Kame ashí áamka ti untsurí papí asa ashí nun_{kan}am ikuschamnia ainti. Nuke atí.

Jesusa Akatramurĭ Yusa Wakanĭjĭai TÚRAMU

Yusa Wakanĭn nákasarmiania nu

¹ Amikiur Tiúpiru:

Nuik akupkamĭaj nú papinium ashí Jesus túramia nuna áatramĭajme. Tura unuitiampramĭaj nunasha áatramĭajme. Yámankamtaiknumĭa, ² nayaimpinĭam wétsuk, ashí Nii túramia nuna tímiĭajme. Jesuska, nayaimpinĭam wakétsuk Yusa Wakanĭ kakarmarĭjĭai túratniua nuna ni akatramurĭn jintintiawarmiĭai. ³ Tura jaka nantaki, Jesus tímiĭajĭk wantintiukmiĭai ni akatramurĭn. Tura kuarenta (40) tsawant nin wantintiukarmiĭai. Nuna tura nekas iwĭaakjai tusa iniakmasmiĭai, nekaawarat tusa. Tura Yusa akupeamurĭ urukukit nuna mash ujakmiĭai.

⁴ Jesuska ni akatramurĭjĭai tuke pujus, nin chicharuk “Jerusaréĭnumĭa wéerap, tímiĭai. Winia Apar “amastatjai” tímia nuna, paant ujakchamkajrum. Nu túrunat tusarum Jerusaréĭnum nákastarum, tímiĭai. ⁵ Tuke enentáimsatarum. Juanĭ entsajĭ atumĭ ayashĭn imiatmimiarme. Túrashá wárik Yusa Wakanĭsha atumniasha tarutmar, atumĭ enentáĭn enĭkemprutmattarme. Nusha enentáĭ imiantin áintsanĭkete” tímiĭai.

Jesus nayaimpinĭam wakamiania nu

⁶ Tura Jesusjĭai irunar matsamas anintriarmiĭai “Uunta, Israer-shuar ájĭnia nu, anĭkant ajasakrin iiniuk Akupin atak naamkatin yamaĭ jeayash” tiarmiĭai. ⁷ Jesus áimiuk tímiĭai “Winia Apar túrattana nu warĭ tsawantinĭk túrunatĭ nu nekaatniusha atumniachuiti. Apar Ninĭki neka asa ni kakarmarĭjĭaiĭn túrattawai. ⁸ Tura atumsha Yusa Wakanĭ kakarmarĭn sunastatrum. Nii taa enĭkemprutmamtaĭ kakaram ajasrum, Wĭí túramu etserkattarme. Emka juĭi Jerusaréĭn péprunam etserkattarme. Nuyá ashí Jutĭa núĭkanam, tura arant Samaria nunĭkanmasha, tura nú arant ashí núĭkanam werum, Wĭí túramu etserkattarme” tímiĭai Jesus.

⁹ Nuyá chichas amir, ashí ni akatramurĭ ii wajainĭai, Jesus nayaimpinmaaniĭ junakmiĭai. Wéa-wéakui yurankim mash Nin amuámiĭai. Tuma asamtaĭ ni akatramurĭ Nin wáinkĭacharmiĭai. ¹⁰ Tura Jesus waakkui ni akatramurĭsha yakĭ ii wajainĭai, jimĭará áishmanĭ puju entsaru nuĭ wantintiukarmiĭai. Tura ayamach wajattsarmiĭai. ¹¹ Nu áishmanĭsha Jesusa akatramurĭn tiarmiĭai “Kariréanmaya áishmanĭka, ĭurukamtaĭ nayaimpinmaaniĭ imiá ímprim? Ju Jesusak atumĭyaĭ nayaimpinĭam wea wáinkiarumna núnisaniĭ ataksha winittiwai” tiarmiĭai.

Matĭasan anaikiarmiania nu

¹² Tuasua amĭkmataĭ Jesusa akatramurĭ Uriwiu náinniumĭa akaikiar Jerusaréĭnum wakétkiarmiĭai. Uriwiu naincha Jerusaréĭnumsha tíjiuĭhiiti, chĭkĭchĭk kirumitrua núnisaniĭ. ¹³ Tura Jerusaréĭnum jeawarmiĭai. Nuĭ jeawar, jeá wayawar yakĭ wákararmiĭai. Nuĭ Pírusha, Jakupusha, Juansha, Antressha, Jirĭpisha, Tumassha, Parturumĭsha, Mateusha, tura Arpeu uchirĭ Jakupusha, nuyá ásump Semunĭsha, Jakupu yachi Jútassha, tímiĭan wayawarmiĭai. ¹⁴ Jusha mash tuke iruniarmiĭai

Jesusa yachijjai. Tura Jesusa nukurí Marijjai, nuyá chíkich nuwajajsha tuke iruniarmiayi, Yus áujstatai tusar. ¹⁵ Nuñ siántu painti (120) aents iruntrarmia nuñ Pítieur chichastaj tusa wajakmiayi.

¹⁶ Pítieur juna tímiayi “Yatsurtírmesha, umarutírmesha antuktarum. Yuska yaunchu ni Papirjín Jutasnan áamtikramiayi. Jútas akiintsajin Tawitkia, Yusa Wakanj jintintiam Jutasnan áarmiayi. Jesusan achik surukarmia nú shuaran nekapruamia núiti. Kame Tawitia áarmari Yus-Chicham asa tímianak uminkiatniuyi. ¹⁷ Nú Jutaska ii írutramuitiat, ii takaamurjín páchitkiaiat, ¹⁸ tunáa tura nujaj kuítian achik nuñkan sumakmiayi. Tura piniakum iniaañ tantane páttimiayi. ¹⁹ Tuma asamtai ashí Jerusarénum pujuarmia nu, nuna nekaawar nú nuñkan “Numpa Nuñka” anaikiarmiayi. ²⁰ Kame Sarmu papinium Tawitkia juna áarchamkia:

“Ni jeesha itiarak atí.

Nu jeañmanka penké pujuschartí.” Tura

“Ni takatrij chíkich atankiti.”

Tu aarmaiti’ tímiayi.

²¹ “Tuma asamtai yamaikia chíkich anaikiatniuitji. Tura nánkamas achikchatniuitji. Antsu ii nemartamkau atí. Uunt Jesu iijjai pujumia nuñ tuke Nin nemarsamia nu atí. ²² Juan Jesusan imiaimiania nú tsawantn-umiá jukí, Jesus nayaimpiniam wémiania nú tsawantan tímianu ejé tuke Nijjai wekaimia nu atí. Nu shuar enentámtusar, chikichik achiktaí. Iisha iruntrar Jesusa nantakmarij etserkamí tusar túramí” tímiayi Pítieur.

²³ Tura nuyá jimiará shuaran anaikiarmiayi. Matíasan anaikiarmiayi. Tura chikichnasha Jusen, ni chíkich naarj Parsapas, tura apach náarinjia Justu, nunasha anaikiarmiayi.

²⁴⁻²⁵ Tura nuyá Yus-shuar Yúsan áujainiak juna tiarmiayi “Ii Uuntri, Amesha ashí shuara enentáí nékame. Juñ awai jimiará áishman. Jútas tunáa túrak jákatniunam wéak akatramu takatan ikiukmiayi. Yamaikia Jútas takatrij achikiat tusam, ¿tuá achikium, Uunta? Paant iniakmasta.” Tu aujsarmiayi.

²⁶ Tura Israer-shuara túrutairj núnisan, wats yaki nupetmakat tusar túrawarmiayi. Tura Matías nupetmakmiayi. Túrunamtai Matíasnak pachikiarmiayi.

2

Yusa Wakanj taramiania nu

¹ Pintikiustís náartin jísat jeamtai, chikichík jeañman nuiñ Yus-shuar tuakarmiayi. ² Tumaj aya aneachma nayaimpinmaya nasea áintsan téter ajaki winian antukarmiayi. Ashí mash jeá pujuarmia nuka antukarmiayi. ³ Tura nuñ pujuiniñ jñ wajaí kea áaniun wáinkarmiayi. Túruna añkant añkant puunak tarurarmiayi. ⁴ Tuma asamtai Yusa Wakanj ashí ni enentájin pimiutkarmiayi. Túram chichasarat tusa Yusa Wakanj ni nekatairj súsararmiayi. Tuma asamtai nujaj niisha chíkich chichaman chichasararmiayi.

⁵ Nuñ Jerusarénum Yus táman umirin Israer-aents áarmiayi. Ashí nuñkanmaya Jerusarénum taar matsarmarmiayi. ⁶ Tura túrunamia nuna antukar káunkarmiayi. Tura ashí shuar ni chichamejain chichaamun antukarmiayi. Tuma ásar, warinkit, tu enentáimsarmiayi. ⁷ Nekaachar ashankarmiayi. “Warinkit, tunaim ajarmiayi. Ju aents

chíkich chíkich chichaman chichainia nu, ashí Kariréanmayanchukait, tiarmiayi. ⁸ Tura iisha ankant ankant ii chichamenka ántatsjik. Ausha urukainiakua, nunak chichainiawa, tiarmiayi. ⁹ Jui ashí nunkanmaya aents pujuiniatsjik. Partianmaya, Eramnumiasha, Misiuputámianmayasha, Puntanmayasha, tura Asia nunkanmayasha, ¹⁰ Prijianmayasha, Pampirianmayasha, Ejiptunmaya tura Áprikanmaya Serinia nú nankaamasnumiasha pujuiniatsjik, tiarmiayi. Nuyasha ii shuarsha Ruma péprunmaya yaunchu taar jui matsatainiawai. Chikichcha tuke Israer-shuar áiniawai. Tura chikichcha Israer-shuar ajastaj tusa Israer túrutairin mash túruiniawai. ¹¹ Kritianmayasha Arapianmaya pujuinijai. Tura ashí mash ii chichamejajisha Yusa pénker túramuri ántaji” tiarmiayi.

¹² Ashí aents nuna nékachu ásar ashamkarmiayi. Tura nuámtak anini-aisarmiayi “¿Warinminiat jü?” ¹³ Tura chikichcha wishikiarmiayi. “Nampeku áiniatsuash” tiarmiayi.

Pítiur ujakmia nu

¹⁴ Nuiñkia Pítiur, chíkich áuntse Jesusa akatramurijjai wajaki, kakantar chichasmiayi. Chichaak tímiayi “Jutíanmaya shuarteram, Jerusarénumiätirmesha antuktarum. Wi títiatjana nu antukrum pénker enentáimpratarum. ¹⁵ Jü áishman, nampekarai, tárugna nu, nampekcharai. Warí, nantu imiá ishichik takuni. ¿Áisha itiuurak? ¹⁶ Antsu Yúsnan etserin, ni naari Juér, yaunchu áarmia nu, yamá túrunayi, tímiayi.

¹⁷ Juna áarmiayi: “Yus tawai “Jú nunka amuukatin jeatemamtai, winia Wakantrun ashí áentsnum akupkattajai, yumi yaraanua áintsan. Atumí uchiri, atumí nawantrisha Yusa chichamen áujmatartatui. Tura nátsaka ímiiartatui. Tura uuntka mesekrami-artatui. ¹⁸ Tura áishmansha nuwasha winia takartin ainia núnaka winia Wakantrun akuptukartatjai. Túram niisha Wíi túramun áujmatartatui. ¹⁹ Yaki nayaimpiniam, aents túrachminian iniakmastatjai. Tura nunkanmasha winia kakarmarun iniakmastat tusan numpacha, jiniasha, mukuintiuncha yuranmia áintsan akupkattajai. ²⁰ Tura tsawái nantusha kajinkiattawai. Tura nantusha mushatmar numpa núniktatui. Uunt tsawant achikmi-ajna nu jeatsain, túrunattawai. Nú tsawantcha imiá nekas uunt átatui. ²¹ Nuiñkia ashí shuar nekas winia kakarmarun seana nuka uwemprartatui” tímiayi Yus.”

Núnis Juér áarmiayi’ tímiayi Pítiur.

²² Tuke chichaak: ‘Israernumiá shuarteram, wi títiatjana nu antuktarum. Nasarénumiá Jesusnan tajai. Nú Jesusan Yus shiir enentáimtawai. Yuska, átum ti enentáimprarum ni kakarmarin paant nekaatarum tusa, nú Jesusan ti ikiakármiai. Tura Jesusjai aentsti túrachminian Yuska túramiayi, átum íimmianum. Nuka ti paant nékarme, tímiayi. ²³ Tura Jesus surunkamia nuna Yuska yaunchu, túruntsain, paant nekaamiayi. Túrasha Yus enentáimmia nujai métek túrawarmiayi. Tura atumek emetarum Jesus jukimiarne. Nú arant, krúsnum máatarum, tunáa shuar tímiarme. ²⁴ Túramunak Yus Jesusan jákatniun nupetmamtik iniantkimiayi, tuke jákachmin asamtai. ²⁵ Íimiata, ii uuntri Tawit Jesusnan kantamprua juna áarmiayi:

Úuntan tuke pujurtan wáinmiajai. Winia pujurtakui awajkamú áhattajai.

²⁶ Tuma asamtai winia enentáirjaisha Nin shiir enentáimtusmiajai. Tura wenurjaisha shiir chichaman chichamiajai. Jáaknasha shiir enentáimsan jakattajai, aneantiniapitjia tusan.

²⁷ Winia wakaníur, Yusrú, jákatniunam ikiurtuschattame. Wi ame Uchirmetjai, Tunaarincha. Túmaitkui anentu asam ayashur káurtin tsankatrukhattame.

²⁸ Tura iwiaaku átin jintia jintintrutamame. Tura tuke pujurtakum waramtikrustatme.

Tu áarmiyai Tawit' tímiyai.

²⁹ Pítiur tuke chichaak: 'Páantchakait. Ii uuntri Tawit yaunchu jákai. Tura iwíarsamuiti. Ni iwíarsamurí iini pujatsuk. ³⁰ Túrasha Tawitkia Yúsnan etserniuyayi. Tuma asa Yus tímia nuna nekaamiyai. Yus Tawitian chicharuk tímiyai "Ame akupniuitme. Nekas tájame, ukunam ame iniannamurminian Kristu akiiniattawai. Niisha Akupin anainiaktatui, ame áintsan." Nuna Yus táman Tawit nekaamiyai. ³¹ Neka asa, túruntsain Tawit, wainkia nútiksán, Kristu nantaktintrin áarmiyai. Kristu túrunatniurin chicharuk tímiyai "ni wakanincha jákatniunam ikiukchatniuyi. Ayashíncha káurtinian tsankatkashtiniuyi." ³² Au Kristun tímia nu Jesusaiti. Nu Jesusnak Yus iniantkimiyai. Nuka iisha neka asar étsereaji. ³³ Yuska, Jesus nankaamantuiti tusa ni untsuuriní apujsaiti. Tura ni Wakanin Jesusan súsaiti, Nii yaunchu tímia nútiksán. Tuma asamtai jusha átum antukurmena nuna, tura ísurmena nunasha Yus suramsaiti. ³⁴ Tawitkia ayashtiuk nayaimpiniam wákachmiyai. Tura nú Tawitíak juna áarmiyai:

"Unt Yus winia Úuntron tímiyai "akupin pujutainium, winia untsuuriní pujustá.

³⁵ Ame nemasrumin nupetkattajai. Nu túruntsain jui pujustá' tímiyai." Nuní áarmaiti Jesusnan, tímiyai. ³⁶ Tura ii, Israer áentsti, Jesus krúsnum maaití, tímiyai. Jú Jesus máamjinia nuna Yuska Uunt Akupin anaikiamiyai. Túrasha Jessusha in uwemtikkiartin Kristuiti. Ashí áentstíram nu pénker nekaatarum" tímiyai Pítiur.

³⁷ Nuna antukar wake mesekarmiyai. Tura Pitruncha chikich akatramuncha aniasarmiyai "Yatsuru, ¿nuinkia ititurkatjik?" tiarmiyai. ³⁸ Tutai Pítrusha chichaak "Atumí tunaarí ikiuktiaj tusarum Yus nekas enentáimtustarum. Tura ashí shuirtiram Jesukrístu naarí pachisrum imiantiarum. Nuinkia atumí tunaarin Yus tsankurtamp Prattarme. Túrunawakrumin Yuska ni Wakanin suramsattarme, tímiyai. ³⁹ Yus tímia nuka atumin túramprume. Atumí uchiríncha tura ashí arant matsatainia nunasha tawai. Kame ii Yusrí áentsun untsuktaj tusa wakerana nuna tawai" tímiyai.

⁴⁰ Nú chichamjai tura nuyasha Pítiur tuke jintintiuk tímiyai "Yajauch shuara asutiátniuri átatna nuyá uwempratarum" tímiyai. ⁴¹ Tuma asamtai nuna antukarmia nuka imianiarumiyai. Nú tsawantaj menaintiú mir (3000) aents Yus-shuar ajasarmiyai. ⁴² Ashí nu shuar Jesusa akatramurí jintintiarum nuna tímiatrusan antukarmiyai. Tura irunar shiir enentáimtunaisar yurumin ármiyai. Túrawar, Kristu enentáimtustin namperin najanin ármiyai. Túrawar Yúsán áujiarmiyai.

Yus-shuar pampararmiania nu

⁴³ Tura Yusa aentsti túrachminian Jesusa akatramurjijai túramiayi ni kakarmarj̄in iniakmastaj tusa. Tuma asamtai ashí aents nuna wáinkiar ashamkarmiayi. ⁴⁴ Yúsan umirkaruka ashí métekrak pujuarmiayi. Tura ashí niiniu armia nuna sunaisarmiayi. ⁴⁵ Ni nunken surukar, ni takakmarj̄incha surukar, atsumainia nuna súarmiayi. ⁴⁶ Tuke tsawantak Yusa Uunt Jeen káuniarmiayi. Tura ni jeencha íruntrar warainiak Kristu enentáimtustin námper najanin áirmiayi. Tura nan̄kaamantu enentáimtumatsuk, yurumkan ajamnainiarmiayi. ⁴⁷ Túrawar, Yusa ti úuntaiti, tu wearmiayi. Tura ashí aents nin shiir enentáimtiarmiayi. Tura Uunt Yus tuke tsawant shuaran uwemtikiar Yus-shuar írúnmanum íkiaun̄ki wémiayi.

3

Wekaicha wekasamiania nu

¹ Chíkich tsawantaj, nantu nun̄kaach ajasmatai, Pítiur Juanjaj, Yusa Uunt Jeen Yus áuj̄satai tusar wearmiayi, Israer-shuar tuke turin armia nútiksaran. ² Tura áishman̄, ni akiiniamurj̄iniā wekaicha amia nu, nūj̄ aa wáitiniam tuke tsawant pujumiayi. Nu áishman̄nasha ni shuarj̄ entsakí júkiar nú wáitiniam apuj̄in áirmiayi, nūj̄ shuar wayan̄ kuítian seat tusar. Nú wáitisha, Shiir Waiti, tutaj̄yayi. ³ Tura nú shutuapsha Pitrun Juanjaj wayan̄ wáinkiamiayi. Wáiniak kuítian seamiai. ⁴ Tura Pítiur Juanjaj apaj̄as ísarmiayi. Tura nú áishman̄nasha chicharuk “Iirsata” tímiayi. ⁵ Aishman̄sha, surustatuapi, tu enentáimias, ímsamiayi. ⁶ Nuyá Pítiur chichaak “Kuítrusha atsawai, tímiayi. Kurisha atsawai. Antsu kuítjaj nan̄kaamas takakjana nuna amastajai. Wats, Nasarénumiā Jesukrístu kakarmarj̄ijaj wajakim wekasata” tímiayi.

⁷ Tinia iniais, Pítiur ni untsuurj̄in̄ achik awajkimiai. Túram ni nawesha, wanusesha kakaram ajasmiai. ⁸ Tura niisha wajaki nantent ajakmiayi. Nuyasha wekasamiayi. Tura Pítrujaj̄sha Juánjaj̄sha Yusa Uunt Jeen wayawarmiayi. Nuik shutuapka wayá nantent nantent ajak Yusa náarj̄in shiir pachimiayi. ⁹ Ashí aents pujuarmia nu, nin wekaan wáinkiarimiayi. Tura ni chichamen anturkarmiayi. ¹⁰ Tura chichainiak “Nuik Yusa Uunt Jeen wáitirj̄in, Shiir Waiti tutainium, nu áishman̄ tuke pujuuya núchakait” tiarmiayi. Tura ni túrunamurj̄in nekaawar, ti ashamkar nusháa enentáimsarmiayi.

Pítiur ujakmiania nu

¹¹ Shutuapka pé̄nker ajasu asa Pítrujaj̄ Juánjaj̄sha pen̄ké tsurachmiayi. Tura aents nūj̄ pujuarmia nu, warinkit tusar, jeáshkirī tséken̄ki wearmiayi. Nuka Sarumún̄na tiniu áirmiayi. ¹² Aents káunkarun Pítiur wáiniak, chicharuk “Israer-shuartiram, ¿urukamtai winiasha imiá írurum? tiarmiayi. ¿lisha pé̄nker asarikⁱ tsuarmajⁱ? ¿li kakarmarj̄ijaj̄inkikⁱ ewekamsamajⁱ? ¹³ Atsá. Antsu Yusa ni Uchirj̄in Jesusan ashí nan̄kaamantu awajsaiti. Ii uuntrj̄ Apraamsha, Isaksha tura Jakupsha enentáimtin armia nú Yusan tajai. Átumka Jesus nakitrarum kapitián Piratuí surukmarme. Tura Piratu akupkataj̄ tau atumsha suritkiarmarme. ¹⁴ Jesus pé̄nker nákak enentáimniuyana nu “akupnakchati” tímiarme. Antsu shuáran main akupnakat tusarum wakerimiarme. ¹⁵ Túrarum iwiaaku átinian Amaana nu maarmarme. Tuma aij̄ Yuska Nin jakamunmayā iniantkimiai. Nuka iisha neka asar étsereaji. ¹⁶ Tura jū aishman̄ jūj̄ ajaana jū tura nékarmena jū, Yusa Uchirj̄ naarj̄ enentáimta asa kakaram ajasuiti. Jesus

enentáimtusú asa nekas péñker ajasuiti. Nusha wáinniu asarum nékarme' tímiayi.

¹⁷ Wats, yatsurtiram, wi nékajai. Atumsha atumí úuntriñjai Jesu-san túramarmena nu nékatsuk túramarme. ¹⁸ Tura nu túramurmijñjai Yus yaunchu tímia nu tímianak umikiurme. Ni Krísturj wáitsatniuya nuna Yuska ashí ni etserniurñn áamtikramiayi. ¹⁹⁻²⁰ Wats, yamaikia tunaaruminiñ kanaktiarum. Túrarum Yúsnumaanñ ayantártarum, tunaarun asakárat tusarum. Túrunawakrumniñkia, atumin uwemtikramprarat tusa Yus yaunchu anaikiamia nuna akupturmaktatrum. Nusha Jesukristu-iti. Tura Niiññjai enentáimin ayampratin átatuí. ²¹ Tura yamaikia Jesukristu nayaimpiniam pujustiniaiti, ashí iwiarnatsaññ. Yuska ukunam ataksha nuñkan shiir awajsattawai. Nuna ni etserniurñn tsáapin enentái takaku armia nuna yaunchu áamtikramiayi. ²² Tuma asa Muisais ii aparñn tímiayi: “Atumi Uunt Yusrj ukunam etserniun akupturmaktatrum, winia akuptukmia núnisanñ. Nuámaktirminiñ achik akupturmaktatrum. Tura nii títiatna nu umirkatarum” tímiayi. ²³ Nánkamas aents nu etserniun chichamen umíachkunka emesnartatuí. Tura Israer-shuarnum páchitkia áchattawai.

Núnisanñ áarmiayi Muisaissha' tímiayi.

²⁴ Pítur tuke chichaak 'ímiata, Yúsnan etserin Samuer jñ tsawantin túratniurñ etserkamiayi. Nuyá ashí Yúsnan etserniusha tuke nuna etseriarmiayi. ²⁵ Etseriarmia nuka atumin túramprume. Tuma asa átum péñker pujustinian Yuska ii uuntriñn Apraáman jñ chichaman susamiayi. “Nekas tájame, ame shuarum akiñniattana nujñ ashí áentsnasha shiir awajsattajai' tímiayi. Tura ii úuntriñn tímia núnaka incha túramji, tímiayi. ²⁶ Ímiata, Yus ni Uchirñn iniantkimiñ nuñ, atumin emka akupturmakmi-arme. Atumsha, atumí tunaariñña kanaktiarum tusa, tura atumin shiir awajtamatsatniun wakerak túramiayi.” Nunak tímiayi Pítur.

4

Pitruncha Juáñnasha kakerkarmiania nu

¹⁻² Pítrusha Juanññjai Yusa chichamen áentsun jintintiniññ pujuarmiayi. Jesu nantakin asamtai aencha nantaktin ániawai, tiarmiayi. Tura chichaak pujuiniññ Israer-patri táarmiayi. Tura Yusa Uunt Jeeñ wainniu úuntriñsha Satuséu aentcha táarmiayi. Taar Pitruncha Juáñnasha kakerkarmiayi, niisha Jesusa nantakmiarñ chichaman jintintinia asamtai. ³ Yamaikia kíawai, kashin iismí tusar achik sepunam enkea iniais-armiayi. ⁴ Tura Pitrun nuik anturkarmia nú aents untsurñ Yus-shuar ajasarmiayi. Nuik Yus-shuaraim tura yamaiyaim iruram ti untsurñ ajasarmiayi. Aya áishmanñkak, señku mir (5000) aents áarmiayi.

⁵ Kashin tsawarmatai Israer-shuara akupniurñ, ni úuntriñsha, tura ni jintinniurñsha Jerusareñnum iruntrarmiayi. ⁶ Nuñsha Anassha, Israer-patri uuntriñ anaikiamu amia nu, tura Kaipiassha, Juañsha, Arejantrusha, tura Israer-patri kapitiantriñ shuarñsha tímian iruntrarmiayi. ⁷ Iruntrar Pitruncha Juáñnasha utitiarum tusar akupkarmiayi. Tura itiarumatai, ajapén awajsarmiayi. Tura aniasarmiayi “Kame yñana kakarmariññjai, yana chichameññai túrarum?” tiarmiayi. ⁸ Tutaí nuyá Pítur, ni enentáin Yusa Wakanñ pimiutkamu asa tímiayi “Akupniutiram, tura úuntirmesha antukturum.” ⁹ Jñ áishmanñ nuik shutuap amia nu péñker ajasmarñ anintrarme. Kame itiarum péñker ajasuit tatsurmek. ¹⁰ Urukamtia

úuktataj. Anintrakrumin iisha paant títiatji, Israernumią shuar ashí nekaawarat tusar. Ju áishman Jesukrístu kakarmaríjaj péñker ajasuíti. Nasarénumią Jesukrístun, átum máamurmena nuna, tura Yus jakamun-maya iniantkimiania nuna tajai, tímiayi. ¹¹ Nú Jesuska kayaa áintsan̄kete. Atumsha jeamniutiram, nú kaya yajauchiiti, tímiarne Jesusna. Túrasha túramaitatā Niisha jeanam emka apujsamua núnisan̄ ajasuíti, tímiayi. ¹² Tura chíkichjaj uwempratin pen̄ké atsawai. Ju nun̄kanam ii chikicha naarj pachisar uwempratin atsaji. Jesuskete ii uwemtikrampratniun Yus suramsamíaj nu” tímiayi Pítiur.

¹³ Pítrusha Juąsha nan̄kamas shuara áintsan̄ ármiayi. Núkap un-uimiarcharu ármiayi. Tura unuimiarchaitiat, arantutsuk etseriarmiayi. Aentsu uuntrj núnaka nekaawar “Nékachuitiat, itiura sapijmiatskesha chichainia” tiarmiayi. Tura, juşa Jesusa nemarin ármiá núiti tiar nekaawarmiayi. ¹⁴ Nuyasha áishman̄ péñker ajasmia nu niijjaj nuj wajamiayi. Tuma asamtai, niisha aj̄ wajakui, Israer-shuara úuntrinkia, péñker ajaschaiti títai tukamá tujinkiarimiayi. ¹⁵ Tuma ásar, iik nuamtak áujmatsatai tusar, Pítrusha Juąsha shutuapsha aa awemartai, tiarmiayi. ¹⁶ Tura áujmatainiak tiarmiayi “Ju Pítrusha ju Juąsha itiuurkatjik. Ju uunt túrunamun Jerusarénum matsatainia nu ashí nékainiatsuk. Wáitaiiti titin tujintiaji, tiarmiayi. ¹⁷ Tura, ashí aents nekaawarain̄ tusar yamaik jiaktai. “Ju Jesusa naarj pachisrum pen̄ké jintintiararap,” titiai” tiarmiayi.

¹⁸ Tura árusan̄ Pitruncha Juán̄nasha shutuapnasha ataksha untukarmiayi. Tura chicharkarmiayi. “Jesusa naarj pen̄ké áujmatsairap. Tura Jesusa túramurj pen̄ké jintintiarap” tiarmiayi. ¹⁹ Tutai Pítiur Juanjaj̄ áimkiarmiayi “Enentáimpratarum. ¿Yus warinia wakera? ¿Iikia Yus umirtsuk atumí chichamen̄ umirkatniukaitiaj?” tiarmiayi. ²⁰ Nekaatarum. Iisha íisjinia nu, tura antukjinia nusha ii etsertsuk pujustin tujintiaji.” Tu áimkiarmiayi.

²¹⁻²² Shutuap̄ péñker ajasmia nu kuarenta (40) uwí nan̄kaamas takakuyayi. Ni péñker ajasmarin̄ aents nekaawar, “juka aentsti túrachminiaitji” tusar Yusa naarin̄ uunt awajsarmiayi. Tuma asamtai aentsu uuntrj Pitruncha, Juannasha asutiátai tukamá aentsun ashamainiak áyatik chicharkar iniaisarmiayi.

Yus-shuar Yusa kakarmarin̄ seawarmiania nu

²³ Pítiur Juanjaj̄ an̄kant ajasar ni írutramurj̄in waketiarmiayi. Tura jeawar Israer-patri uuntrj tura aentsu úuntrişa nin tiarmia nuna mash etserkarmiayi. ²⁴ Nu ujakam antukar métekrak Yúsan áujuk tiarmiayi “Winia Uunt Yusru, Amesha nayaimpisha nun̄kasha najanaitme. Nayaantsasha tura juj̄ írunna nusha najanamiame, tiarmiayi. ²⁵ Tura Tawit ámin umirtamin̄ amia nu ju áamtikramiame: “¿Urukamtai ashí nun̄kanmaya aents charaatum ajainia? ¿Tura Israer-shuarsha urukamtai ántar chichaman enentáimiainia?

²⁶ Uunt kapitían̄ ármiá nuka chichaman jurusarmiayi Uunt Yúsan.

Tura pepuru úuntrişa iruntrar Uunt Yúsan kajerarmiayi. Ni anaikiamurj̄in Krístun nútikan̄ kajerarmiayi.”

²⁷ Tu áarmaiti, Uunta, tura nekasaiti. Erutis apachi kapitían̄trj Punsiu Piratujaj̄ jú péprunam iruntrarimiayi. Niisha yajaya shuarjaj̄ tura Israernumią shuaraim nuim iruntrarimiayi. Ame Uchirmin̄ Jesusan̄ tu-naarmin̄ch kajerarmiayi. Jesuska Ame anaikiamiame, winia takatrun

túrat tusam. ²⁸ Tura ame enentáimjaj*̄* iwíaramamna nu uminkiatniuiti. Tura apachcha Jesusan kajerainia ásar, Ame iwíaramamna tímianak umikiarmiayi. ²⁹ Uunta, iisia kajertamainiaj nu. Jes, Áminiu asakrin áujmatramtsujik. Túmaitkuisha ame chichamem*̄* ii ashamtsuk etserkatin ame kakarmaram amasta. ³⁰ Tura ame kakarmarmijjaj*̄* jaasha tsuártin amasta. Ame Uchiram Jesus tunaarincha nujaj*̄* ii aentsti túrachmin túratniusha amasta. Aents Yusa kakarmarj*̄*n nekaawarat tusam túrata” tiarmiayi.

³¹ Tura Yúsan tú áujas umikmatai nuin*̄* irunar pujuiniajn*̄* úurkarmiayi. Túrunamtai ashí shuara enentáin*̄* Yusa Wakanj*̄* pimiutkarmiayi. Túmaitkiui ashamtsuk Yusa chichamem*̄* etserkarmiayi.

Wíniakete, tícharmiania nu

³² Yus-shuar ajasarmia nu, ti untsuritiat, ashí chikichík enentainiak enentáimainiak, ni takaku armia nuna, aya wíniakete tútsuk, jusha ashí iiniu ainiawai, tiarmiayi.

³³ Tura Jesusa akatramurj*̄*sha, Yus ti yayamu ásar, Yusa kakarmarjjaj*̄* Uunt Jesusa nantakmiarj*̄*n tuke etseras pujuarmiayi. ³⁴ Tura ashí Yus-shuarka nuñkan takakusha jēan takaku armia nusha, núnaka surukar kuítian itiararmiayi. ³⁵ Tura itiaar Jesusa akatramurj*̄*n súarmiayi. Akatramusha susam, niisha atsumainia nuna súarmiayi. Tuma asamtai shuar atsumaka penkē atsuarmiayi. ³⁶ Chikichík shuar, ni naari Jusé, nuñkan takakuyayi. Jesusa akatramurj*̄*sha Jusen chíkich náarj*̄*n apujtusarmiayi, Pirnapín. Nu náarj*̄*sha, shiir enentáimtikkiartin tawai. Tura Pirnapj*̄*sha Riwi áentsuyayi. Tura ni akiiniamurj*̄* núnkenka Chípriiyayi. ³⁷ Niisha ni nuñken surukmiayi. Tura nu kuítian itiaá Jesusa akatramurj*̄*n súarmiayi.

5

Ananíasa tunaari

¹ Tura chíkich áishmañ, ni naari Ananías, ni nuwe Sapirjaj*̄* ni nuñken surukarmiayi. ² Niisha nuñkan suruk kuítian emeenak akanak júki Jesusa akatramurj*̄*n werí takamtsukea nútikias susamiayi. Ni nuwēsha, Sapir, nuna túran nekaamiayi. ³ Túramtai Pítur chichaak “Ananíasa, ¿urukamtai uunt iwianch enentáimin enkemturmatai, Yusa Wakanj*̄*n anañkataj tusam nuñka surukam kuit achikiumna nu akankam ikiurmasam? tímiayi. ⁴ Éntá, nuñkia nuñka áminiuchukait. Surukumna nu kuitcha áminiuchukait. Nusha, ¿urukataj tusamea tu enentaímpram? Amesha aya áentsnum wáitruachume. Antsu Yusnumsha wáitruame” tímiayi Pítur. ⁵ Tutai Ananías nuna antuk nú chichamaik jakamiayi. Tura ashí shuar nuna antuk nekaawar ti ashamkarmiayi. ⁶ Nú turunamtai áishmañ tariar Ananías jakan penuararmiayi. Túrawar iwíarsatai tusar júkiarmiayi.

⁷ Tura Ananíasa nuwe arur, menaintiú ura nankaamasaj*̄* támiayi. Túrash ni áishrj*̄* jakanka nekaachmiayi. ⁸ Támatai Pítur nuwān tímiayi “Turuttia. Átum nuñka surukurmena nuj, ¿kuit itiarumna núnikik surukuram?” tímiayi. Tutai nuwā tímiayi “Ee, núnik surukji.” ⁹ Tutai Pítur tímiayi “¿Urukamtai atumsha Uunt Yusa Wakanj*̄* nekapkamsatai tusarum imiá enentáimpram? Pai, iisiá. Ame áishrumin iwíarsatai tusar júkiaria nu wininiawai. Tura yamaikia amincha juramkiartatu” tímiayi. ¹⁰ Tutai nu chichamaik niisha imia Pitru wajamunam jaka iniaantmiayi.

Aishman wayaj tukamá jaka tepan wáinkiarmaiya. Túramtai júkiar ni áishriniñ ayamach iwiarsarmiayi. ¹¹ Tura ashí Yus-shuar armia nu tura ashí aencha nuna antukarmia nu ti ashamkarmiayi.

Yusa kakarmarjijai túrawarmiana nu

¹²⁻¹⁴ Tura ashí Yus-shuar Yusa Uunt Jeen shikirjin irunin ármiai. Nu shikirjisha, Sarumúnna, tu anaikiamuiti. Tura chíkichmamtinkia nuim iruntratniun ashamiarmiayi. Túmainiyatan, ti péñker ániawai, tu wearmaiya. Tura Yus-shuar Yusa kakarmarjin iniakmasarmiayi. Túra asamtai imiá untsurí aents Yus-shuar ajasarmiayi. ¹⁵ Tura chíkich aents ni shuarj jainia nuna jintiá amamtikiarmiayi. Peakjai júkiar, tampunmasha enkeawar júkiar jintiá ayamach áepsarmiayi. Pítiur nankaamak ni wakanjsha enkemprutmawainti tusar nu shuar túrawarmiai. ¹⁶ Núnisan arantiá shuarsha ti untsurj ni shuarj jáinian tura iwianchrukuncha nu Jerusarénum itiarmaiya. Tura ashí nu táaruka tsuámararmiayi.

¹⁷ Israer-patri uuntri, tura Satuséu aencha niijjai pujuarmia nu suiir iiniak ¹⁸ Jesusa akatramurjin achikiar enkeawarmiai. ¹⁹ Túrasha kashi Uunt Yusa suntarj nayaimpinmaya tara sepú wáitirin uraimiai. Tura Jesusa akatramurjin aa jikiarmiayi. ²⁰ Tura tímiayi “Wetarum. Tura Yusa Uunt Jeen wajasrum Yusjai tuke iwiaaku átinia nu etserkatarum” tímiayi.

²¹ Nuna antukar kashin tsawar káshik Yusa Uunt Jeen wayawar jintintiwarmiai.

Nu túmainiai Israer-patri uuntri, tura niijjai pujuarmia nusha iruntrarmiayi. Tura Israer-shuara uuntri, naamka armia nuna iruntrami tusa untsukarmiayi. Ashí iruntrar akatar akupkarmiayi, Jesusa akatramurj sepunmaya itiatarum tusar.

²² Tura suntarsha sepunam jeariar Jesusa akatramurjin wáinkiacharmiai. Atsawai tukam táarmiai. ²³ Taar chichainiak “Sepú waiti asakamua tímianisan aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayaji tukamar atsá wáinkiaji” tiarmiayi.

²⁴ Israer-patri uuntri, tura Yusa Uunt Jeen wainniu úuntri, nu chichaman antukar, “tsej ausha ¿urutiak nunasha iniaisarat?” tiarmiayi. ²⁵ Nu chichamaik áishman taa tímiayi “Aishman átum sepunam enkeamarmena nu, Yusa Uunt Jeen wajasar áentsun jintintiuk pujuiniawai” tímiayi.

²⁶ Túrunamtai Yusa Uunt Jeen wainniu uuntri ni suntarjijai wear achik itiarmaiya. Túrasha penké aents kayajai tukurmarajj tusar, yajauch awajtsuk itiarmaiya. ²⁷ Tura achik itiaar Israer-shuar naamka pujamunam naka awajarmiayi. ²⁸ Tura Israer-patri uuntri tímiayi “Tisha atumin chicháa chicharu awajsar, Jesusa naarj pachisrum etserkairap tusar akupkachmakajrum. Túrasha, ¿antukurmek? Atsá. Mash Jerusarénum átum etserkamu pampankai. Jes, átum, Jesusan máawarai, in tátsurmek. Nusha in makuutai tusarum tárume” tiarmiayi.

²⁹ Nuyá tutai Pítiur chíkich Jesusa akatramurjijai chichainiak “Tikia aentsjainkia iniankasar Yus emka umirkatniuitji, tiarmiayi. ³⁰ Jesus atumek krúsum máamurmena nuna ii iwiaaku Yusri Nin iniantkimiai. ³¹ Yus ni kakarmarjijai Nin nankaamantu awajarmiayi. Tura nekas Akupniuiti tusa ni untsuurinj apujarmiayi. Tura áentsun Uwentikniuiti.

Israer-shuar enentái yapajíáwar tunaariníá uwemprarat tusa Yus túraiti. ³² Nu tuma asamtai iisha nu nekaar étsereaji. Tura Yusa Wakanísha nuna étsereawai. Túrasha aya Yusa umirkarua nunak ni Wakanín súsaruiti” tímiayi Pítiur.

³³ Tutai nuna antukar ti kajerkarmiayi. Túrawar, maatai tusar wak-eriararmiayi. ³⁴ Tura nuí Israer-shuara uuntri pujumiayi, ni naari Kamarír. Niisha Pariséunam páchitkiauyayi. Tura akupeamun jintinni-uríyayi. Túmakui ashí aents nin shiir enentáimtin ármiai. Tura niisha wajaki tímiayi “Jú áishman̄ aá ishichik wajasarti” tímiayi. ³⁵ Nuyásha irunar matsamarmia nuna chicharuk “Israer shuartiram, jú áishman̄ tú túratai tu enentáimsarumna nu aneartarum. ³⁶ Enentáimsatarum. Nuik áishman̄ Tíútas wantinkiachmakia. Niisha kapitániitjai takul, ku-atru siáñtu (400) shuar nemarkarmiayi. Tura ukunam nin maawar-matai, ni némarkamurísha pisararmiayi. Túrunawar nuní amuukarmiayi. ³⁷ Ukunmasha, iruntrar nekaptarmín tsawantíncha Kariréanmayá Jútas wantinkiachmaka. Tura nincha nútiksāñ ti untsurí nemarkarmiayi. Túman máawarmiayi. Nu túrunamtai nútiksāñ ni némarkamurísha pí-sararmiayi. ³⁸ Jes, tuma asamtai nu áishman̄ aá wajainia nu iniaisatarum. Auka pachisairap. Au tumainia nu aya áentsnaketkuñkia amuukattawai. ³⁹ Tura antsu Yúsnaiktuñkia atumsha amuktai tukamarum tujinkiat-tarme. Aneartarum. Iniaiyachkurmeka nu tumá pujusrum Yusjai máanikchattarmeash” tímiayi Kamarír.

⁴⁰ Tú tutai tímianak umikiarmiayi. Túrasha Jesusa akatramurín untsukar asutiáwarmiayi. Tura chicharuk “Jesusa naari pachisrum penké ishichikisha etserkairap” tiarmiayi. Tú tiar akupkarmiayi. ⁴¹ Jesusa akatramurísha Israer-shuara uuntri pujamunmayá jínkiarmiayi. Tura wáitsamniaitrumé tusa Yuska Jesusa naari pachia asakrin ii natsantin wáitsatniun tsāñkatramkaitji tusar ti shiir enentáimsar wearmiayi. ⁴² Tura Jesukrístunun áujmatsatniun penké iniaisacharmiayi. Antsu tuke tsawant Yusa Uunt Jeñcha tura chíkich jeañmasha páchitsuk etseriararmiayi.

6

Yus-shuaran yainian siati anaikiarmiania nu

¹ Nú tsawantin Yusan umirkaru ti kawēñkar ármiai. Tura tuke tsawant yurumak súsatin ámiayi. Túmakui Yus-shuar Kriaku chichaman chicharmia nu, Israer-shuaran kajeriarmiayi. “Tuke tsawantin yu-rumak súarmena nuí atumí waje ti nukap súarme. Tura íniuka ishichik súarme” tiarmiayi. ² Túruinia Jesusa tuse akatramurí ashí Yus-shuaran irurar tiarmiayi “iisha Yus-Chicham etserkatin iniaisar yuru-mak súsachminiaitji. ³ Tuma asamtai yatsurtiram, atumíñia siati áishman̄ eáktárum yurumkan súsarat tusarum. Pēñker wekainia nu, tura neka shuar, Yusa Wakaní pimiutkamu ainia nu achiktarum. ⁴ Íikia antsu Yus áujkir unuiniakratkir Yusa chichame etserkir wétatji” tiarmiayi. ⁵ Akatramu tiarmia nuna ashí aents enentáimsar pujuarmiayi. Túmainiak Estepañkan anaikiarmiayi. Estepañsha Yusan tuke enentáimtinuiyayi. Tura Yusa Wakanísha pimiutkamuyayi. Chíkich áishman̄kan anaikiarmi-ayi, niisha Jiripi, tura nuyá Purukuru, Nikianúrsha, nuyá Temuñ, Parmenassha, Nikiurássa. Nikiurássa Antiukia nuñkanmayaitiat Israernan-cha ashí umirniuyayi.

⁶ Tura nu siati áishmaṅkan Jesusa akatramurin itiararmiayi. Táarmatai, akatramusha, Yus áujtumar, anaikiaji tusar múuknumsha ni uwejen awantsarmiayi. ⁷ Túrasha Yusa chichamenka tuke pampanki wémiayi. Nuḷ Jerusarénumsha Yus-shuar ti kawenkararmiayi. Tura imia Israer-patrisha untsurí Yus-Chichaman umiriarmiayi.

Estepaṅkan Israer-shuara uuntriin júkiarmiania nu

⁸ Estepaṅsha Yusa waitnenkartutairi pimiutkamuyayi. Tura Yusa kakarmarjsha pimiutkamuyayi. Tuma asa aentsti túrachminian shuar írunmanum túramiayi. Nu shuar Yusa kakarmarin nekaawarat tusa túramiayi. ⁹ Israer-shuar iruntai jea, ni naari Ankantín, ámiayi. Nuyá áishmaṅsha tura Serini nunṅkanmayá áishmaṅsha, tura chíkich nunṅka Arijiantrianmayasha, Serisianmayasha, Ásianmayasha, tímian Estepaṅjai áujmatsatai tusar káutkararmiayi. ¹⁰ Estepaṅ Yusa Wakaní nekatairijjai tímianak chicháa asantai, nu áishmaṅ Estepaṅjai inkiunaikiar nupetkataj tukamá tujinkiararmiayi. ¹¹ Tuma asantai suiir enentáimtuiniak chíkich áentsun Estepaṅkan tsanumprurarar tusar eákararmiayi. Estepaṅ Muisaisnasha Yúsnasha yajauch áujmatui, titiarum tusar akikiarmiayi. ¹² Penké áentsun, tura uunt ainia nunasha, jintintin ármia nujajsha chichaman júsar yajauch enentáimtikrarmiayi. Tura Estepaṅkan jintiá akirtuawar achikiarmiayi. Túrawar Israer-shuar naamka matsarmia nuḷ júkiarmiayi. ¹³ Tura wait chichamtinian itiararmiayi. Niisha taar chicharainiak “Yusa Uunt Jeeṅ ti penker ana nu, tura Yusa akupkamuríncha ju Estepaṅ tuke yajauch chicharui, tiarmiayi. ¹⁴ Nú arantcha ju Estepaṅ tímia nu antukji, tiarmiayi. Estepaṅ chichaak “Nasarénumia Jesuska Yusa Uunt Jeeṅ sáaktiatui, tura nuyá Muisais in ikiurtamkimiaj nunasha yapajíattawai” tímiayi. Nusha Estepaṅ tímia nu antukji” tiarmiayi. Tura nunasha penké ántar tsanumprurararmiayi.

¹⁵ Nuyasha ashí Israer-shuar naamka iruntramunam pujuarmia nu Estepaṅkan iyaj tukamá ni yapin nayaimpinmayá suntara yapiya nuní íran wáinkiararmiayi.

7

Estepaṅ etserkamiania nu

¹ Tuma wáiniak Israer-patri uuntri Estepaṅkan aniasmiayi “¿Ju tuinia nu nekaskait?” tímiayi. ² Tutai niisha áimkiamiayi “Winia úuntrutirmesha, yatsurtirmesha anturtuktatum. Ii Waantu Yusri ii úuntriṅ Apraám wantintiukmiayi. Apraámka Misiuputámia-Kartea nunṅkanam pujai, Aran nunṅkanam wéatsain, nuḷ wantintiukmiayi. ³ Tura wantintiuk tímiayi “Ame nunṅkemsha áminiurmesha ikiukim nunṅka Wi iniaktustatjamena nuḷ wetá” tímiayi Yus. ⁴ Tutai Apraám Misiuputámia-Kartea nunṅkan ikiuki Aran nunṅkanam pujustaj tusa wémiayi. Nuyá ni aparí jakamtai “Arant wetá” tímiayi Yus. Nuna taku ju nunṅkan ii pujajnia juḷ pujsamiai. ⁵ Túrayat nunṅkan ishichkisha súdachmiayi ju nunṅkanam. Antsu “Ukunam amastatjai. Ame jakakmin ame uchirmin susattajai” tímiayi. Tura Apraama uchirí penké atsan nuní tímiayi Yus. ⁶ Nuyasha Yus tímiayi “Ame uchirmesha írara núnisaraṅ chíkich nunṅkanam pujusartatui. Nuḷsha emetamu itit awajtai pujuartatui. Kuaru siántu (400) uwí, tímianu uwí wáitsartatui, tímiayi. ⁷ Túrasha, Wi asutiáttajai ame shuárumin wáitkia núnaka, tímiayi. Túram nuyá nú nunṅkanmayá shiákartatui. Tura

Winia enentáimtursartatui jú nunkanam' tímiayi. ⁸ Yus tuke Apraámnasha chicharuk 'Yamaikia Wíi-shuar áishman'kach akiiniamtai, Wi tímiajna núnismek, sirkunsisiún tutai, shunichirí nuape tsupirkata, tímiayi. Tura chícham Wi yamaikia ámiijai najanaj nu nekas umínkatniuiti tusam nusha túrata" tímiayi Yus. Tuma asamtai ni uchirí Isak akiiniamtai, uchu tsawant nankaasmatai, Apraám nin tsupirkamiayi. Tura Isaksha ukunam ni tuse (12) uchirín ii uuntrí armia nunasha nútiksán túramiayi. ⁹ Tura niisha ni yachín Jusén suir íyarmiayi. Túmainiak Ejiptu nunkanam júkiarat tusar surukarmiayi. Túrasha Yus némarkauyayi. ¹⁰ Tuma asa, ashí ni itiurchatríniá uwentikramiayi. Tura waitnenkartutairíncha nekatairíncha susamiayi. Tuma asamtai Ejiptunam uunt akupin Paraún Ejiptu nunkaa akupniurí ajasat tura ni jeén wáinniurí ajasat tusa anaikiamiayi."

¹¹ 'Tímiatam tsuka tura itiurchatcha ámiayi Ejiptu núnkanam. Tura juí Kanaan nunkanmasha núnisan' ámiayi. Tuma asamtai ii uuntrí yurumkan penké wáincharmiayi. ¹² Tura Jakup, Ejiptunam yurumak ikúisa awai taman antuk ni uchirín akupkarmiayi. Túrasha wekaicha wearmiayi. Wats, ii úntríniun ujaajrume. ¹³ Tura ii uuntrí atak Ejiptunam wéenak Jusesha, wítjai takui ni yachí Jusén nekaawarmiayi. Tura Jusé "Yatsur ániawai" takui Paraún, antuk "au shuarapitia" tímiayi. ¹⁴ Nuyánka Jusé ni yachín chicharuk "Apar itiatarum uchirtuk" tímiayi. Nu shuarsha untsurí, setenta senku (75) matsamarmiayi. ¹⁵ Nuní tutai Jakupsha ni shuaríjiai Ejiptunam pujustai tusar wearmiayi. Tura ukunam nú nunkanman jakamiayi. Tura ni uchirísha ii uuntrí ainia nu, núnisan' nú nunkanman jákarmiayi. ¹⁶ Tura atak ukunam ni shuarí Sikiam nunkanam ni ukunchín júkiar iwíarsarmiayi. Kame Sikiam nunkanam Apraámka yaunchu játsuk Amura uchirí nunken sumakmiayi. Túramtai nuí iwíarsarmiayi' tímiayi.

¹⁷ 'Yus, Apraáman chicharuk "Nekas wi susattajme" tímiania nú tsawant jeatemamtai, Ejiptu nunkanam Israer-aents pampanki ti kawen'karmiayi. ¹⁸ Nu tsawantincha Ejiptunam chíkich akupin naamka ámiayi, tura Jusén nekaachmiayi níi. ¹⁹ Nu akupin ii yaunchu úntrín anañkawar yajauch awajíarmiayi. "Atumí uchirí kuírchich ana nu ajapa ikiuktíarum" tu wémiayi. Pampankarain' tusa tímiayi. ²⁰ Tiri iníaisamunam Muisais akiiniamiayi. Muisaisnaka Yus shiir enentáimtimiai. Tura ni nukurí menaintiu nantu takusmiayi. ²¹ Tura nuyá ajapa ikiuktin jeamtai entsá apujsamiayi. Uunt Paraúnka nawantrí Muisaisan wainiak jukimiayi. Achik, ni uchirínia tímiatrusan' júki tsakatmarmiayi. ²² Tuma asa Muisais unuimiátrauyayi ashí Ejiptu aents nékarmia nuna. Túramurísha chichamesha kakarmauyayi.'

²³ Estepan' tuke étseruk juna tímiayi: 'Nuyá Muisais kuarenta (40) uwí takaku asa Israer áentsun iyutaj tusa wakerimiayi, ni shuarí asamtai. ²⁴ Nuyá we Ejiptunmaya áishman' ni shuarín máatasa pujurun wáinkiamiayi. Tura Muisais ni shuarín ayamprak Ejiptunmaya áishman'kan máamiayi. ²⁵ Wíi turamujai Yuska Israer-aentsun uwentikrattawai, tu nekaamiayi Muisais, Yus timia asamtai. Tura Israer-aencha áintsaran' nékainiawai tu enentáimsamiayi. Túrasha nin'kia nekaacharmiayi. ²⁶ Kashin tsawar Muisais ni shuarí jímiar maani pujuinia wáinkiamiayi. Tura nawamnaikiarat tusa "¿Urukamtai nuamtak yatsumjaisha yajauch awajniarum?" tímiayi. ²⁷ Tutai emka nankaama

nu Muisaisan kárut shitiá “¿Ya amincha ii akuptamin tura ii chichartamin anaitiamkamam? 28 ¿Winiasha maantuátaj tusam wakeramek, yaú Ejiptunmaya áishmañ máamamna nútiksamkea?” tímiayi. 29 Nuna antuk Muisaiska Matiañ nuñkanam pisar, nú nuñkanam kuarenta (40) uwí yajaya áintsañ pujumiayi. Nú nuñkanam pujus, nuatak, jimiará uchin yajutmarmiayi.’

30 ‘Kuarenta uwí nankaamas, nu atsamu nuñkanam Senai náinnium tíjiuch Yusa suntariñ nayaimpinmaya taa Muisaisan wantintiukmiayi. Numi uchich ukat-ukatin keamunam wantinkiamiayi. 31 Muisais, nuna kean wainiak ashamkamiayi. Tura weantuk iistaj tukamá Uunt Yusa chichamen antukmiayi. 32 Yus tímiayi “Wiitjai Yus. Ame úuntrumí Apraáma Isaka, Jakupa Yúsrintjai” tímiayi. Tutai antuk Muisaiska ti kuraimiayi sapijin. Tura íistinian tujinmiayi. 33 Nuyá Uunt Yus tímiayi “Úuntrun shiir awajsataj tusam, ame sapatrum ukuñkiam ikiuktia, wajamna nuí Wi pujakui. 34 Nuyá nekaata, tímiayi. Wíi-aents Ejiptunam wáitias pujuinia nuna wáinkiajai. Tura úutainia nunasha antukjai. Tuma asamtai uwemtikrataj tusan tarajai. Wats, akupkatjame ámin. Ejiptunam waketkitia” Yus tímiayi Muisaisan.’

35 Estepañ tuke étseruk: ‘Jú Muisaisan ni shuariñ “¿Ya amincha ii akuptamin tura ii chichartamin átinniasha anaitiamkamam?” tiarmia nuna Yuska akupniun anak uwemtikrarat tusa awaiñki akupkamiayi. Numiniam ni suntariñ wantintiukmia nuna chichamejai Yuska Muisaisan akupkamiayi, tímiayi. 36 Muisaisaiti Israer-aentsun Ejiptunmayan uwemtikramia nu. Yusa kakarmariñ nekaawarat tusa, aentsti túrachminian untsurín túramiayi Ejiptu nuñkanam. Nuyá Kapaántin Nayaantsanmasha, tura nuyá kuarenta (40) uwitin atsamunam pujuiniaisha ti kakarman iniaktusmiayi. 37 Jú Muisaisak Israer-shuaran chicharuk “Atumíññan nak etserniun Yus ukunam anaikiattawai, winia anaitiukma áintsañ. Tuma asamtai nu shuarsha umirkamniuram” tímiayi. 38 Jú Muisais Israer-aentsjai atsamunam pujumiayi. Senái nainnium Yusa suntariñ níjiaisha pujumiayi. Tura Muisaiska ii úuntriññai pujumiayi. Níiyaiti iwiaaku pujustin chichaman sunasmia nu. In ujatmaktinian sunasmiai.’

39 ‘Túrasha ii yaunchu uuntriñ Muisaisan umirkatniun nakitiarmiayi. Áaniuk imiá umirtaint tusar Ejiptunam waketkitniun wakeriarmiayi. 40 Túmainiak Muisais Yusjai chichastajtsa murá wématai nu shuar Muisaisa yachin Aruñkan tiarmiayi “Ii yusrí najanató, ii nemarsatin. Áaniusha Muisaissha Ejiptunmaya in juramkiyatcha tútsuk weruma” tiarmiayi. 41 Nuyá wáakachia áaniun najanawarmiayi. Túrawar, júiti ii yusrí tusar, kuntinian maantuawarmiayi, nu susatai tusar. Tura ni uwejejai najanamun íisar ti wararsarmiayi. 42 Nuna túruinian wáiniak Yus, iniaisajai taku, níiya kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniuriñ juní áarmiayi:

“‘Israer-aentsu, kuarenta (40) uwitin atsamunam wekaimiarmena nuí, ¿Winiak kuntin maanturtuamarum? Winia surustai tusarum penké túrachurme, tímiayi Yus. 43 Antsu, Muruk naartin ántar-yusa pujamuriñ jukimiarme. Tura chíkich ántar-yussha, ni naariñ Rempañ, yaa áanin najanarum nusha jukimiarme. Júkin asakrumin atumí nuñkeya jukin, tímiaí Papirúnia nuñkan nankaiki akupkatjarme” tímiayi Yus.”

Nuní áarmaiti' tímiayi.

⁴⁴ Estepaṅ tuke étseruk: 'Yus Muisaisan tímiayi "Wi akupeamu chicham ikiunsatin jeá áaniun Wi iniaktusjamna tímiatrusmek atsamunam najánatá" tímiayi. Tutai Muisais Yus tímianak umikmiayi. Nu jeān ii uuntri yaunchu takaku ármiai. ⁴⁵ Nu jeān ni uchirí akintkiar akintkiar wearmiayi. Ukunam, jú nunka achiktin jeamtai, Yuska kapitíán Jusuejai jú nunkanmaya aentsun jiki akupkarmiai. Tura ii uuntri kapitíán Jusuejai winiarmia nu, nu jeāncha jú nunkanam itiar miayi. Tura Tawit uunt akupin náamtsain, ii úntrisha nu jeān takaku ármiai. ⁴⁶ Kame Yus Tawitian yájau enentáimtichmiayi. Tuma asamtai Tawit Yus shiir pujustinian jeān jeamtinian seamiai. ⁴⁷ Túrasha antsu Tawitia uchirí Sarumún Yusa jeān jeammiayi. ⁴⁸ Túrasha aents jeammanuman Uunt Yus pujuschamniaiti. Jes, yaunchu Yusa etserniurí Yus tímia nuna áarchamkia. ⁴⁹ Juna áarmiai:

"Nayaimpikia winia pujutairuiti. Nunkanmasha nawer tarimiui.

¿Warí jeā najatruatai tusarma tarum? tímiayi Uunt Yus.

Tura Wi ayampratniusha, ¿tui aa?

⁵⁰ Wiki winia uwejruijain ashí najanachmakiaj" tímiayi.'

⁵¹ Estepaṅ tuke étseruk: "Tura átumka Israer-shuartirmeka atumí enentáijiai tuke umichuitrume. Atumí kuishisha weaktsui tura Yus nékachua núniniaitrome. Yusa Wakaníjiaisha tuke nemasnaikiaitrome. Tura atumí yaunchu úntrijiai métek túrarme' tímiayi.

⁵² 'Isia, atumí úntrisha Yusa etserniurin tuke kajerin ármiai, tímiayi. Tura nú arant atumí úntrisha Tunaarincha tátatui tu etseru wekaan, máacharmakia. Jes, nútiksarmek yamaisha, Tunaarincha támania nusha atumek anaṅkarum máachmakuram, tímiayi. ⁵³ Tura Yusa suntarí nayaimpinmaya Yusa chichamen susamuitiatrum atumsha penké umikchamarne" tímiayi Estepaṅ.

Estepaṅka jakamuri

⁵⁴ Israer-aencha Estepaṅ tu chichaamu antukar imiá kajerkar nain kátetete awajarmiayi. ⁵⁵ Tura Estepaṅsha imiá Yusa Wakaní pimiutkamuyayi. Tuma asa nayaimpinmaani íimias, Yusa wincharin, tura Yusa untsuurinini Jesusan wajan wáinkiamiayi. ⁵⁶ Tumá wáiniak Israer-áentsun tímiayi "Núá íiskua, nayaimp uranniun wáinjai. Tura Jesusan, Aents Ajasu tutaiya nuna Yusa untsuurinini wajan wáinjai" tímiayi. ⁵⁷ Támaitiat niisha kuishin akiriarmiayi, tura achiktai tusar charáa tiar ashí wajatkiarmiayi. ⁵⁸ Túravar, péprunmaya arant júkiarmiayi. Tura antuk etserkarmia nu pushirin áikiar, natsa Sauru wajamunam au iisti tusar áeprusarmiayi. Tura máawartai tusar kayajai tukurarmiayi Estepaṅkan.

⁵⁹ Tura Estepaṅka tukamaitiat Yúsan áujsamiai. Tura áujuk "Uuntru Jesúsá, winia wakantrusha jurutkitia" tímiayi. ⁶⁰ Tura tikishmar áujuk "Uunta, jú winia túrutainiana jú makuip" tímiayi. Tura nuna ti iniais, jakamiayi.

8

Sauru Yus-shuaran kajerkarmiania nu

¹⁻² Estepaṅkan máawarmatai Sauru, péñkeraiti, tímiayi. Tura áishman Yúsan péñker enentáimta armiania nu, Estepaṅka ayashincha

iwiarsarmiayi, tura aneenak ti uutiarmiayi. Tura nú tsawantaj Yus-shuaran Jerusarénum pujuarmia nuna ti kajerkatin nanċamnamiyai. ³ Sáuruka Yus-shuaran kajerak ti pataat wémiayi. Túmak nuĵ jeá wayá, nuĵ wayá áishmañsha nuwañcha wáinkiañka japiki júki sepunan enċeataj tusa túrimiyai. Tumakui Yus-shuar Jerusarénumiã pisarar Jutía nuñkanam, tura Samaria nuñkanmasha jeawarmiayi. Jesusa akatramurĩkia antsu Jerusarénuman juakarmiayi.

Samaria nuñkanam etserkarmiania nu

⁴ Túrasha Jerusarénumiã aents pisararmia nu, arant wénaksha tuke Yusa chichamen etserkini yujarmiayi. ⁵ Tura Jiripi Jerusarénumiã we tura chíkich péprunam Samaria nuñkanam ámiania nuĵ jeá, chichaak “Yus anaikiamu ana nu Jesusaiti” tu etsermiayi. ⁶ Túrakui aents iruntrar chikichík enentáijjaj Jiripi étseamun titiú pujusar antukarmiayi. Yusa kakarmarĩn nekaawarat tusa aentsti túrachminian túrimia nunasha wáiniarmiayi. ⁷ Ti untsurí aents iwianchruku ármia nuna Jiripi nu iwianchin jĩirki akuptiarmiayi. Tura íwianch jĩiniainiak kakantar charáa tiar jĩiniarmiayi. Tura ti untsurí emearusha shutuapsha péñker ajasarmiayi. ⁸ Tuma asamtai nú péprunmayañka ashí shuar ti warasar pujuarmiayi.

⁹ Tura nú nuñkanam uwishin Semuñ pujumiayi. Nuikkia wi ímianaitjai tusa Samarianmayã aentsun anañniuyayi. ¹⁰ Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semuñsha Yusa kakarmarijjaj áitkiawai.”

¹¹ Tura ti untsurí uwí wawekratmarijjaj anañkarta asamtai, umirkarmiayi nu aents. ¹² Túrasha Jiripi Yusa akupeamurĩn, tura Jesukrístununcha shiir chichaman etserkamiayi. Tura, nuna antukar nuwañsha áishmañsha umikiar imian wearmiayi. ¹³ Semuñsha imia uwishniuitiat Yus-Chichaman enentáimtus imianmiayi. Tura Jiripijjaj tsaniñ wekaimiyai. Yusa kakarmarĩn shuar nekaawarat tusa Jiripikia aentsti túrachminian túrimiyai. Nuna wáiniak Semuñ ti enentáimsamiayi.

¹⁴ Tura Jesusa akatramurĩsha Jerusarénum pujuarmia nuĵ Samarianmayã aents Yusa chichamen umirainiawai taman nekaawarmiayi. Tuma asamtai Pitruncha Juáñnasha nekáa ikiuutarum tusa akupkarmiayi. ¹⁵⁻¹⁶ Tura Samarianmayã Yus-shuarsha aya Uunt Jesusa náarijn imianiarmiayi. Yusa Wakanĩñkia tárachmiayi. Tuma asamtai Pítrusha Juanjaj nuĵ jeawar Samarianmayã Yus-shuara enentáin Yusa Wakaní pimiutkarat tusan Yusan áujtusarmiayi. ¹⁷ Tura áujtua umikiar Pítur Juanjaj ni uwején nú Yus-shuaran awantsarmiayi. Nuĩñkia Yusa Wakaní taramiyai.

¹⁸ Jesusa akatramurĩ uweje awasmanum Yusa Wakaní taramtai, Semuñsha nuna wáiniak, kuitjaj nu kakarman sumaktaj, tímiayi. ¹⁹ Tura Jesusa akatramurĩn chicharuk tímiayi “Winiasha kuitjaj surustarum nu kakaram. Wisha nútiksanak náñkamas aentsnum winia uwejur awantsam Yusa Wakaní tarurat tusan tajai” tímiayi. ²⁰ Tutai Pítur tímiayi Semuñkan “Ámeka kuĩtrumjaj métek menċakatniuitme. Warí, Yus amaana nu ¿kuitjaj sumaktinkiait? ²¹ Yus esetram enentáimtachu asam nu túramu pachistincha penċé tujinkiamé, tímiayi. ²² Enentáimprata. Túram Yus seata. Enentáimtamna nuna Yus tsanċur tamprashtimpiash.

23 Nékajme, tsaankea áintsan yapá enentáimin pimiutramkaiti. Tura tunaarmijn jinkíámua núniniaitme” tímiayi.

24 Tutai Semun áimkiamiayi “Uunt Yus aujtursatarum. Túrutrumna nuna túrunawajj tusan tajai” tímiayi. 25 Nuyasha Jesusa akatramurj Jesusa túramurjn nú áentsun ujakarmiayi. Tura wésar Samaria nunkanam pepru ámunmanka Yus-Chichaman nuj etserkiar, nuj etserkiar Jerusarénum waketkiarmiayi.

Jiripi Yus-Chichaman etserkamiania nu

26 Tura Yus ni suntarjn nayaimpinmayan Jiripincha akuptukmiayi. Niisha chicharuk tímiayi “Wátskea. Juyá jiinkim Jerusarénumiá jintia Enkasa péprunam wea nuní weme, anaraanj wetá. Nú jintiaka atsamu nunkanam nankaamawai’ tímiayi. 27 Tutai Jiripisha wémiayi. Jintiá wesa Itiupianmaya áishmankan wáinkiamiayi. Nú áishmansha Itiupia nunka akupniurjn, ni naarj Kantasen takarniuyayi. Kantaseka núwauyayi. Tura nu áishman ti neka asa nuna kuítrjn írniuyayi. Nú áishmansha Yúsán áujstataj tusa Jerusarénum wéu wáketmiayi. 28 Karetanam enkemar wesa, Yusa etserniurj Isayas aarmia nuna aujki wémiayi. 29 Wats, Jiripi nú jintianam wéakui, Yusa Wakanj nin tímiayi “Nú kareta amayánta.” 30 Tura Jiripisha amayan, Yusa etserniurj Isayasa áarmarjn áujun antuk, chicharuk “¿Aujeamna nu nékamek?” tímiayi.

31 Tutai nú áishman tímiayi “¿Itiurak nekaataj? ¿Yaki jintintruat?” tímiayi. Tura antsu iijajj wetái tusa, Jiripincha enker jukimiayi karetanam.

32 Nu papí áarman áujmia nu júuyayi: “Murikiua áitkiasan jákatniunam júkiarmiayi. Tura uchich murik, ure tsúpiram chichaatsna núnisan niisha chichakchamiayi. 33 Nincha iniatsáarmiai. Túrasha penké chichamnaka tútsuk tsanmakamiayi. Niisha nunkanam iwiaaku pujá maamu asamtai, ¿yaki nuna áujmatkat?” Nuní aarma ámiayi.

34 Kantase takarniurj Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniurj nínkik túmama? ¿Chikichnash ta?” tímiayi. 35 Nuyá Jiripi nu aarman áujtus “Juka Jesusnan tawai” tímiayi. Tura nú arantcha Yus-Chichaman ujakmiayi.

36 Nuyá entsa ámanum nankaamak áishman Jiripin chicharuk “Juj entsá jeaji. Wikia juj imianchamniakaitiaj” tímiayi.

37 Tutai Jiripisha tímiayi “Tuke enentáimjai Jesus nekas enentáimtakminkia túramniaitjame.”

Tutai áishman chichaak “Ee nekasaiti, Jesukrístuka Yusa Uchirinti tajai” tímiayi. 38 Tura, kareta awajas mai jiinkiar entsá wearmiayi. Nui Jiripikia Kantase takarniurjn imiaimiayi.

39 Tura kukar jiinkiar matai Uunt Yusa Wakanj Jiripinkia jukimiayi. Tuma asamtai Kantase takarniurjsha Jiripin wáinkiachmiayi. Túrasha nínkia waras wémiayi. 40 Jiripisha jeachat Asutu péprunam wantinkiamiayi. Tura nuyá jiinki péprunam nuj wayá, nuj wayá Yus-Chichaman etserki we, Sesaria péprunam jeamiayi.

9

*Sauru Jesusan umirkamiayi
(Túramurj 22.6-16; 26.12-18)*

¹ Nuna tumaj, Jerusarénum Uunt Jesusan umirkarmia nuna máataj tusa áujmattan Sáuruka penké iniaichamiayi. Tuma asa Israer-patri uuntri iyutaj tusa werimiayi. ² Tura jeari tímiayi “Papí ame naarmijjai áaram surusta. Wi nuna papí jukin timiaj Tamasku péprunam jean, Israer-shuar iruntainiam wayattajai. Túran nú papijjai Jesusan umirkaru ainia nuna, nánkamsan achikiartatjai. Túran áishmanasha nuwancha achikian jinkian, jui Jerusarénum enkeataj tusan ikiaankattajai” tímiayi. ³ Tura papí susam Sauru jintiá wéaj, Tamasku péprunam nuntumsaj nuj aya aneachma nayaimpinmaya tsáapin jiitsumir téntakmiayi nin. ⁴ Túrunamtai Sauru nunká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukantai yajauch awajtustaj tusam imiá pataaturam?” tímiayi.

⁵ Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wíi aents pataatamna nuj, amek enentáimin yajauch awajmamsame, waaka sankanmiak numin ijiuma núnismek” tímiayi.

⁶ Nuyanka Sauru sapijin kuranki tímiayi “Nuinkia Uunta, ¿wi warinia itiurkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nuj jeawakmin ame túratamna nuna turamiartatui” tímiayi.

⁷ Tura Sáurujai irunar wearmia nu, chichaamun antukarmiayi. Tura áentsnaka penké wáinkiacharmiai. Tuma ásar ti ashamkarmiayi. ⁸ Nuyá Sauru nunká tepá nantakmiayi. Tura wáinmaktaj tukamá wáinmakchamiayi. Tuma asantai chíkich shuar uwejnem enkekiar júkiarmiayi Tamaskunam. ⁹ Nuj jeá menaintiu tsawant íimtsuk tura yurumtsuk penké úmutsuk pujumiayi.

¹⁰ Nuj Tamaskunam Yus-shuar Ananías ámiayi. Nin mesekranam Uunt Jesus tímiayi “Ananías.”

Tutai “¿Warí wakeram, Uunta?” tímiayi.

¹¹ Nuyá Uunt Jesus tímiayi “Wajakim jintia, Naka tutaiya nuj wetá. Nuisha Jutasa jeen jeam, Társunmaya Sáurun éaktaj tusan winijjai, titiá, tímiayi. Niisha Yúsan áujuk pujawai. ¹² Tura juna mesekranam ipiatkamjai Sáurun. Aishman wayá ni uwejéjai ántiawai, ataksha íimit tusa. Nú áishmanka ámetme, Ananías” tímiayi Jesus.

¹³ Táman antuk Ananías chichaak “Túrasha Uunta, ju áishman ame áentsrumin Jerusarénum ti yajauch awajchakait. Ni yajauch túramurín ti untsurí aents ujatainiawai, tímiayi. ¹⁴ Tura yamaisha Israer-patri chicharniun papirín takakui. Tura nujai ame náarmin páchiaj nuna achik jukitaj tusa tímiajaisha tarutramji” tímiayi Ananías.

¹⁵ Tutai Uunt Jesus tímiayi “Áankisha wetá. Ju áishmankan winia etserniur atí tusan achikjai Wi. Niisha Israer-shuarchancha tura kapitíannisha tura Israer-shuarnasha wínian etserin átatui, tímiayi. ¹⁶ Tura Sauru winia náarun páchia asa ti wáitsattana núnaka nin iniaktustajai” tímiayi Jesus.

¹⁷ Tura Jesus táman umirak Ananías Sauru pujamunam wémiayi. Tura jeari wayá uwején awantas tímiayi “Yatsuru Sauru, Uunt Jesus jintiá wantinturmakmamna nusha ame ataksha íimiat tusa, tura Yusa Wakanisha enentáimin pimiutramkat tusa winia akuptukai” tímiayi.

¹⁸ Nu chichamaik ni jiiya namaká saepeya áanin iniaarmiayi. Túrunamtai ataksha íimmiayi. Túruna wajaki we imianmiayi. ¹⁹ Nuyasha

yurumámiayi. Tura yurumásha kakaram ajasmiayi. Tura Yus-shuarjaj Tamaskunam wárumchik tsawant pujusmiayi.

Sáuruka Tamasku péprunam Yus-Chichaman etserkamiania nu

²⁰ Nuyañka Sauru Israer-shuara iruntairin wayá Jesusa túramurin etserkamiayi. Etseruk tímiayi “Nekasaiti, ju Jesus Yusa Uchirinti” tímiayi.

²¹ Nuna ashí anturú pujuiniaka “¿Ausha urukakua aania? tiarmiayi. Entá ju áishmansha Jerusarénum Jesusan enentáimtuinian ti pataatimia núchakait. Tura tímiajajsha nuna achik Israer-patri akupniurjin jukitij tusa tamia núchakait” tiarmiayi.

²² Tura Sáurusha sapijmiatsuk etsermiayi. “Ju Jesus nekas áentsun Uwemtikniuíti” tu etsermiayi. Tura ti paant étserkui, Tamaskunmaya Israer-aents, nekaschaiti titij tukamá tujinkiarimiayi.

²³ Tura ukunam, Israer-aents Sáurun maatai tusar chichaman jurusarmiayi. ²⁴ Tura Sáurusha nu chicham jurusman nekamamiayi. Israer-aents pepru jínmanum tuke tsawajsha, káshisha achikiar maatai tusar jintian akirtiarimiayi. ²⁵ Nuna antukar Yus-shuar Sáurun chiiknum kashi enkeawar itiararmiayi. Pepru tanishnum itiarar awemarmiayi.

Sáuruka Tamaskunmaya Jerusarénum wémiania nu

²⁶ Tura Sauru Jerusarénum jeá Yus-shuarjaj irunratsa wakerimiayi túrasha ninjia ashamiarmiayi. Sáurusha nekas Yus-shuar ajaschaiti tusar ashamiarmiayi. ²⁷ Túmainiajn Pirnapí Jesusa akatramuri matsatmanum jukimiayi Sáurun. Tura nuí ejé tímiayi “Ju Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarin etserkaiti” tímiayi. ²⁸ Tura Sauru Jerusarénum juákmiayi. Tura Yus-shuarjaj irunar pujumiayi. ²⁹ Nuyasha Yus, etserkata tutai, sapijmiatsuk Jesusa túramurin etsermiayi. Tura Israer-shuar Kriaku chichaman chichau ármia nu, nuí pujuarmiayi. Sáurusha nu shuarjaj áujmatsarmiayi. Túrasha nu shuar Sáurun itiur máatjik tusar chichaman juriarmiayi. ³⁰ Tura Yusaj yachi ármia nu, chicham jurusman nekaawarmiayi. Neka ásar Sáurun Sesaria peprunam júkiarmiayi. Tura nuyasha Tarsu péprunam akupkarmiayi.

³¹ Tura Jutianmaya, Kariréanmayasha, Samarianmayasha Yus-shuar shiir tímiajnisan ajasar kakaram ajasarmiayi. Yusan ashamainia ásar, tura Yusa Wakaní yayamu ásar kawenki kawenki wearmiayi.

Pítiur Eneasan yáimiania nu

³² Tura Pítiur Yusaj yachi armiania nuí iráa wekaimiayi. Wekaak Yus-shuar Rítianam matsamarmia nuísha iraumiayi. ³³ Nuísha Rítianam jeá áishmankan Eneas náartinian wáinkiamiayi. Niisha emearu asa wekaicha uchu uwí aya tépenuyayi. ³⁴ Tura Pítiur chicharuk “Eneasa, Jesukristu tsuármawai. Nantaktia. Tura esekmatairam iwiarata” tímiayi. Tutai Eneas nu chichamaik nantakmiayi. ³⁵ Nuna túman wáinkiar Rítianmaya aents tura Sarunmaya aencha enentáimprar Uunt Yusan nemarsarmiayi.

Nuwa Túrkas nantakmiania nu

³⁶ Túrasha Jupe péprunam nuwa Yus-shuar pujuyayi, ni naari Tapitia. Tura nusha Kriaku chichamjainjia Túrkas tuiniawai. Nu nuwasha nuí pujus tuke péñker túriniuyayi. Tura niisha nútiksañ yaj wémiayi. ³⁷ Nu tsawantinik Túrkas sunkuran jateemak jakamiayi. Túrunamtai ayashin nijjarar yakí tesaamunam áepsarmiayi. ³⁸ Jupe péprusha Rítianmaya tíjijuch

ámiayi. Júpenmaya Yus-shuar Rítianam Pítieur pujan nekaawar jimiará áishmankan akatrar akupkarmiayi, Júpenam wari winití tusar. ³⁹ Nui tutai Pítieur níijjai wémiayi. Tura támatai jaka tepemia nui awayáwarmiayi. Nui wayamtai waje pujuarmia nu útkiar Pítrun téntakarmiayi. Túrawar pushirin, Túrkas iwiaaku pujus najankamia nuna iniaktusarmiayi.

⁴⁰ Nuyanka Pítieur aa akupkarmiayi ashí. Tura niisha niniki tikishmar Yúsan áuj samiayi. Nuyasha nuwan jaka tepaan iis tímiayi “Tapitia nantaktia.” Tutai niisha íimi Pítieur wajaan wáiniak nantaki pujusmiayi. ⁴¹ Tura Pítrusha nuwan uwejnium achik awajki miayi. Tura iniais Yus-shuar ármia nuna tura wajencha untsukar Túrkas iwiaaku ajasun iniaktusarmiayi. ⁴² Nu túrunamun ashí aents Jupe péprunmaya nekaawarmiayi. Túrawar untsurí aents Uunt Jesusan umirkarmiayi. ⁴³ Tura Pítruka Jupe péprunam untsurí tsawant nuapen-iwiarin Semunka jeen pujusmiayi.

10

Pítieur Kurniriujai

¹ Sesaria péprunam Kurniriu naartin suntara kapitiantri pujumiayi. Ni suntari Itiaria nunkanmaya ármiai. ² Nu kapitian Kurniriu ni shuarijjai, Yuska nankaamantuiti, tu enentáimtiarmiayi. Tuma ásar Yúsan enentáimtin ármiai. Tura nútiksaa kuftniasha takakchan yáintaj tusa Israer-shuaran súuyayi. Tura tuke tsawant Yúsan áujtiniuyayi. ³ Chíkich tsawantaj, nantu aanuku ajasaj Kurniriu íimiarmiayi. Yusa suntari Yus nayaimpinmaya akupkamu, ni pujamunam utuá “Kurniriuá” tímiayi.

⁴ Kurniriuá tutai, Yusa suntarin ashamak íimia pujumiayi. Tura “¿Warimpiait, Uunta?” tímiayi.

Tutai Yusa suntari tímiayi “Ame seamun Yus anturtamkai. Tura atsumainia nu yayakmin Yus shiir enentáimturmawai” tímiayi. ⁵ Tura Yusa suntari Kurniriuun tuke chicharuk “Wats, áminiuram Júpenam akupkata. Semun, chíkich naari Pítieur, tatí tusam akuptukta, tímiayi. ⁶ Nu Semunsha chíkich Semunjai pujawai. Nuka nuapen-iwiarin Semunkaiti. Tura ni jeesha nayaantsanam ayaamach pujawai, tímiayi. Nui jeawakmin, ame túratamna nuna Semun Pítieur turamtatui” tinea ikiukmiayi. ⁷ Tura Yusa suntari waketkintai, Kurniriuka ni takarnirin jímiaran itiamiayi. Tura suntaran chíkichkiniak nemarsat tusa itiamiayi. Nu suntar ni írutramuriyayi. Tura Yúsan enentáimtiniuyayi. ⁸ Kurniriusha ni túrunamurin ashí ujáa-já awajas Jupe péprunam akupkarmiayi.

⁹ Kashin tsawantaj Kurniriu suntari Júpenam nuntumsaraj, tutupin ai Pítieur jea yakí wáakunam Yúsan áusatajtsa wakamiayi. ¹⁰ Pítrusha ti tsukamak yurumataj tusa wakerimiayi. Túrasha yurumkan iniarainiai Pítieur íkijajtiusmak, ¹¹ nayaimp uranmianum wan karam tarachia áanin tura nuna tsakarín jin kiakman tárún wáinkiamiayi. ¹² Nu tarachnium yajasma irunmiayi. Wekainiusha, nanamtincha, tura napisha enkemiarmiayi. ¹³ Tumaj Yus Pitrun chicharuk “Pitru, wajakim maam yuata” tímiayi.

¹⁴ Tutai Pítieur tímiayi “Atsá Uunta. Ii Israer-shuartikia yajauch yajasma áinia nu tura yúatin surimkiamu ana nuka penké yúchaitji. Tuma asamtai júnaka wikia yuashtatjai” tímiayi.

¹⁵ Túrasha Pitrun atak Yus chicharuk “Wi, penkeraiti, tájana nu, yajachiiti, tiip” tímiayi.

¹⁶ Nuka menaintiá túrunamiayi. Tura nuyasha tarach ataksha nayaimpiniam wakamiayi. ¹⁷ Nuna túrunan wáiniak Pitiur wariniak

áaniuncha wáinkiaj tusa enentáimia pujaj kapitián Kurniriu ayakma armia nu, anintruiniak jeawariayi. ¹⁸ Tura jeawar kakantar untsummiar “¿Semuñ, Pítiur, juñ pujá?” tiarmiayi.

¹⁹ Tura Pítruka ímiarmarjñ tuke enentáimia pujaj Yusa Wakaní chichaak “Menaintiú áishmañ untsurmainiawai, tímiayi. ²⁰ Wajakim akaikim arantusuk au nemariarta, Wi akupkamu asamtai” tímiayi.

²¹ Nuna antuk Pítiur taramiayi. Tura áishmankan Kurniriu akupkamia nuna wajainian wáiniak “Wiitjai Pítiur. Átum eátrumna núitjai. ¿Warí tarintrum?” tímiayi.

²² Tutai niisha tiarmiayi “Iisha kapitián Kurniriu akupkamu taji. Kurniriuka áishmañ péñkeraiti. Yúsan enentáimtiniaiti. Tura Israer-aencha nin shiir enentáimtuiniawai. Níyya winiaji, tiarmiayi. Kame nuik, Yusa suntari, nayaimpinmaya akupkamu, ii kapitiántrñn tímiayi “Pitrñn untsukát akupkata. Nii tatí. Tura nii titiatna nu péñker anturkata” tímiayi. Nuna ii kapitiántrñn takui iisha winiji” tiarmiayi.

²³ Tutai Pítiur jeá awayámiayi. Tura nu kashi nuñ kanararmiayi.

Kashin tsawarar Pítiur níjjaj wearmiayi. Túrasha Júpenmaya Yushuarsha nin nemariarmiayi. ²⁴ Nuyá tsawarar Sesaria péprunam, Kurniriu nákamun jeariarmiayi. Kurniriuka ni shuarñn tura ni nekas amikrñn, nekaatarum tusa untsuk ikiaankamiayi. ²⁵ Tura Pítrusha jeamtai Kurniriu aa jñintiuki Pitrun tikishmatramiayi. ²⁶ Túrasha Pítiur awajki tímiayi “Wajaktia. Wisha aya áentsketjai. Ámea núnisketjai” tímiayi. ²⁷ Tura chichasar jeá wayawarmiayi. Tura wayá, untsurí aents matsatun wáinkiamiayi. ²⁸ Nuyá Pítiur chichaak tímiayi “Amikrua, atumsha nékarme. In Israer áentstinkia, chíkich áentsjaj pachiniarchatniuitrume, tura ni jeencha wayashtiniaitrume in jintinramin turamainiaji, tímiayi. Túrasha Yuska ni enentáimsamurñn wíniaka paant iniaktursayi. Túmaitkiui wikia nánkamas áentsun yajauchiiti, tura auka wapikiaiti, tíchamniaitjai, tímiayi. ²⁹ Tuma asamtai, untsurkurmin, páchitsuk winimjai. Túmaitkiui nekaataj tusan wakerajai. ¿Urukamtai untsurkamarum?” tímiayi.

³⁰ Tutai Kurniriu tímiayi “Kuatru tsawant nankaamasaj tura nantusha juni aj, wikia yurumtsuk Yúsan áujsamjai, kjaraj áujsatina ana nuna. Túran chichaj, áishmañ, ni entsatairí wincharpatniun, naka wajatran wáinkiamjai, tímiayi. ³¹ Niisha chichartak turutmiayi “Kurniriu, Yus ame áujman anturtamkayi. Tura shuar atsumainia yáñmamna nunasha nekarmayi, turutmiai, tímiayi. ³² Tuma asamtai, Jupe péprunam akatramuram akupkata. Semuñ Pítrun itiatí. Nu Semuñ Pítrusha, chíkich Semuñjaj pujawai. Nuapen-iwiarin Semuñkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiai, tímiayi. ³³ Turutkui, wi umikian áentsun wárikmasan ámin akuptukjame utitia tusan. Tura nékaseñ taume. Tuma asamtai iisha juñ Yus ímmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tusar pujaji” tímiayi Kurniriu.

Kurniriu jeen Pítiur etserkamia nu

³⁴ Nuyá Pítiur chichaak “Ayu. Yus ímmianum ashí aents métekrak áiniawai nekas nékajai, tímiayi. ³⁵ Antsu ashí nunkanam nánkamas aents Yúsan umirak péñker tura nuna, Yus nú aentsun shiir enentáimtai, tímiayi. ³⁶ Yuska shiir chichaman Israer-aentsun akuptukmiayi. Nuñ chichaak “shuar Jesukrístu naarñn páchiakka, Yusjaj nawamnaikiatin

átiniaiti, tímiayi. Nú Jesukristu ashí shuara Úuntrinti' tímiayi Yus. ³⁷Túrasha Kariréa nunkanam nan̄kamak ashí Israer nunkanam túrunamia nu paant nékarme. Imiakratin̄ Juan̄ imiaak etserak amukmia nú tsawantin̄ nan̄kamamiayi. ³⁸Tura júsha nékatsrumek, tímiayi. Nasarénumiá Jesus, Yus Anaikiamu asa, Yusa Wakaní kakarmarijijai péñker túriniuyayi. Iwianchruku wáitias pujuarmia nuna péñker awajsamiayi. Yus Niin̄ pujurma asa ashí nuna túriniuyayi. ³⁹Tura Israer-aents matsatkamunam tura imia Jerusaréñ péprunmasha Jesus túramia nu, iisu asar, iisha étseraji. Tura ayu, Nin achikiar krúsnum máacharmakia, tímiayi. ⁴⁰Tura menainti tsawant jeamtai Yus Nin iniantkimiayi. Tura ataksha iwiaintiurtamkachmakaj', tímiayi. ⁴¹Ashí áentsnumka wantinkiachmiayi. Antsu íniak nuik, etserin atarum tusa Yus achirmakmiaj nú áentstiniak wantinturmakmiaji, tímiayi. Au nekas jakamunmayá nantakmiatai iisha Niijjai tsanin̄kiar yurumámji, tímiayi. ⁴²Tura Jesussha in akuptamkaitji. Jesuska “Wiitjai Yus Anaikiamun, tímiayi. Ashí áentsun, júka makuumawai, túrasha júka makuumatsui, Wiki títiniaitjai. Kame ashí áentsun, jaka áinia nuna tura iwiaaku áinia nunasha, Wíkiitjai nuna títinian” tímiayi Jesus. Nusha átum werum ujatruktarum, Jesus turammaji, tímiayi. ⁴³Ya shuarak Jesusa náar̄in̄ pachia nú shuarnaka tunaar̄in̄ tsan̄kurattawai, nuna ashí Yúsnan etserniusha yaunchu etseriarmiayi” tímiayi.

Israer-shuarchan Yusa Wakaní tarurarmiania nu

⁴⁴Tura Pítiur tuke chichaak pujai, tura chikichcha antúu pujuiniñai Yusa Wakaní tarurarmiayi. ⁴⁵⁻⁴⁶Tuma ásar an̄kant an̄kant chíkich chichamjai chichasarmiayi. Túmainiak, Yus ti péñkeraiti, tiarmiayi. Tura Israer-shuar, Yus-shuar armia nuka Pítrujai táarmia nu, nuna antukar ti enentáimsarmiayi. Maa, Yusa Wakanísha Israer-shuarcha ainia nunasha tarurcharaik, tu enentáimsarmiayi ⁴⁷Túmakui Pítiur chichaak “¿Yaki surimkiat ju aents imiantinian? Warí nincha ínia áintsan̄ Yusa Wakaní tarurcharaik” tímiayi. ⁴⁸Nuyá Pítiur, Jesukristu náar̄in̄ imiantiarum tusa akupkarmiayi. Tura nuyasha Pitrunka, niijjai ishichik tsawant pujustinian seawarmiayi.

11

Ni túrunamur̄in̄ Pítiur ujakmiania nu

¹Israer-shuarchasha Yusa chicham̄en umirkarai táman Jesusa akatramur̄isha tura Jutíanmayá Yus-shuarsha antukarmiayi. ²Túmainiak Pítiur Jerusaréñnum jeamtai, Israer-shuar Yus-shuar ármia nu chichainiak ³“¿Urukamtia Israer-aents áiniachusha iyumam? ¿Tura aujai tsanin̄kiam urukamtai yurumámum?” tiarmiayi.

⁴Tutai Pítiur ashí yámankamtaiknumiá túrunamun ujakmiayi. ⁵Chichaak tímiayi “Wikia Jupe péprunam pujumjai. Tura nuñ Yusan auju pujusan ímiarmajai. Tura wan̄karam tarachia áanin̄ kuaru tsakar̄in̄ jin̄kiakma, nayaimpinmayá táarun wáinkiamjai. Tura wi pujamunam jeartimiai, tímiayi. ⁶Tura nuñ iyaj tukaman in̄it yajasman, napincha, nanamtinniasha en̄ketainian wáinkiamjai, tímiayi. ⁷Tura chichaman antukmajai “Pitru wajakim maam yuata” túrutun antukmajai, tímiayi. ⁸Túrutkui “Atsá, Uunta, áanin̄ wapiknaka, Israer-aents yuat̄in̄ surimkiamu ana núnaka tuke yúchaitjai” tímiajai, tímiayi. ⁹Atak nuyá túrutuk “Wi, péñkeraiti, tájana nu, ámeke, yajauchiiti, tiip” turutmiai, tímiayi.

¹⁰ Nunasha menaintiú túrunan wáinkiamjai. Túruna nayaimpiniam mash waketkimiai, tímiayi. ¹¹ Nui túruna pujaj menaintiú áishman Sesarian-maya akupkamu, winia eatainiak wi pujamunam tarutiarmiai, tímiayi. ¹² Tura nui Yusa Wakaní chichartak “Arantutsuk aujai wetá” túrutkui, wémajai. Tura ju sais Yus-shuarjai wi wémajai. Túrunar ashinkiar Kurniriu jeen wayamji, tímiayi. ¹³ Niisha chichaak “Jearui Yusa suntari nayaimpinmaya taa wajan wáinkiamjai, tímiayi. Tura niisha chichartak “Jupe péprunam Semun Pítiur tatí tusam áishman akatram akupkata. ¹⁴ Pítrusha taa, itiura amesha tura áminiurmesha tunaarminia uwemprat-tam nuna turamtatui.” Yusa suntari nuní turutmiayi” tu ujatkamiai Kurniriu’ tímiayi.

¹⁵ Wi chichastasan júaraj, Yusa Wakaní tarurarmiayi, yámankamtaik in tarutrampramaj nútiksán, tímiayi. ¹⁶ Nuiñkia Uunt Jesus timian enentáimpramjai. Niisha tichamka “Juan entsajain imiakratmiayi. Tura antsu Yusa Wakaníñkia imiantinia áintsán atumí enentáin enkemprutmattarme.” Nu timian enentáimpramjai, tímiayi. ¹⁷ Atumsha enentáimpratarum. Uunt Jesukrístu umirkamiai nui, incha Yuska ni Wakanín suramsamiai. Tura in suramsamiai núnisan Yus nincha ni Wakanín súsarumiayi. Nuna tura asamtai, wikia, túrashtiniaiti, Yusan títinkiaitai” tímiayi Pítiur.

¹⁸ Tura Pítiur taman antukar mitiat wáinkiar “Nekasaiti, Israer-shuarchancha ni enentáin yapajjáwarmatai tuke iwiaaku átinian Yuska nin súsaruiti” tiarmiayi. Tusar Yusa náarín ti shiir awajsarmiayi.

Yus-Shuar Antiukía péprunam wearmiania nu

¹⁹ Estepankan máawarmia nui, chíkich Yus-shuarnasha maatai tusar pataatiarmiayi. Túram chíkichkia pisarar Pinisia nunkanam, Chipri nunkanmasha, tura Antiukía péprunmasha wearmiayi. Tura nui jeawar Yus-Chichaman chikichnaka ujatsuk aya Israer-aentsnak ujakarmiayi. ²⁰ Tura niijjai Chipri nunkanmaya pisararmia nu Serini nunkanmayasha Yus-shuar áirmiayi. Nuka Antiukíanam jeawar Israer-shuarchan Uunt Jesusa túramurín ujakarmiayi. ²¹ Tura Uunt Jesus ikiakárma ásar, nú nunkanmaya aents ti untsurí yaunchu túrutairín iniaisar Jesusan enentáimtuiniak Yus-shuar ajasarmiayi.

²² Tura nu chichaman antukar, Jerusarénumia Yus-shuar, ame iyutá tusar, Pirnapín Antiukíanam akupkarmiayi. ²³⁻²⁴ Pirnapísha jeá, Yus nú shuaran uwemtikrarma nuna wáiniak warasmiayi. Pirnapísha péñker áishmankauyayi. Yusa Wakanísha pimiutkamuyayi. Tura Yusan nekas umirkauyayi. Tuma asamtai nu shuaran mash jintintiainiak chicharuk “Tuke enentáimjai umirkarum Yus nemarsatarum.” Tu chicharak ikiuk-miai. Tura nuisha nú arant untsurí aents Yusaj kawenkarumiayi.

²⁵ Nuna turasua amik Pirnapí Tarsu péprunam wémiayi Sáurun wáinkiataj tusa. Tura wáiniak Antiukía péprunam jukimiayi. ²⁶ Tura nui jeawar, nú péprunmaya Yus-shuarjai iruntrar chikichik uwí pujusarmiayi. Yus-Chichaman untsurí shuáran ujaak pujuarmiayi. Tura nui Antiukía péprunmanka Yus-shuaran émkaka, Kristu shuarj, tiarmiayi. ²⁷ Nuyá Yusnan etserin Jerusarénumia táarmiayi Antiukíanam. ²⁸⁻³⁰ Túmainiai chikichik etserin, ni naarj Akaapu, Yus-shuar matsatmanum ajapén wajakí chichasmiayi. Tura Yusa Wakaní nekatairijjai chichaak “Tí tsuka ashí núñkanam átatui” tímiayi. Tuma

asamtai Antiukíanmaya Yus-shuar chichainiak “Jutía nunkanmaya Yus-shuar ainia nu yáíntai” tiarmiayi. Ankant ankant ni wakeriarmia núnik súarmiayi. Tura nú kuítniasha Jutíanmaya Yus-shuara úuntrin akuptukarmiayi. Pirnapísha Sáurusha nú kuítian júkiarmiayi. Tura Akaapu tímia núnisan túrunamiayi, akupin Krautiu pujai.

12

Pitrun sepunam enkeawarmiania nu

¹ Nu tsawantai akupin Erutis Yus-shuaran máataj tusa chichaman jurus áentsrin ishiakmiayi. ² Tura Juanka yachin Jakupun suen tsupirkar máawarmiayi. ³ Nuna tura máawarmatai Israer-aents wáinkiar “júka péñkeraiti” tiarmiayi. Erutissha nuna antuk, Pítrusha achikrum itatarum tusa akupkarmiayi. Núnaka wakapruachu tanta yuatin namper-tin túrawarmiayi. ⁴ Pítruncha achik itiarmatai, Erutis sepunam enkeata tusa akupkamiayi. Tura sepunam suntarsha ankant ankant, kuatru kuatru, ashikia tiasisáis (16) irunar Pitrun téntakarmiayi. Tura, ju jisat nankaasmatai, mantamnatí tusan jiktiatjai aents iruntramunam, tu enentáimsamiayi Erutis. ⁵ Túramu asa Pítruka sepunam pujumiayi. Tura suntarsha mijjatrutsuk iyyarmiayi. Túramunak Yus-shuarka, Pitrun yáíngiat tusar iniaítsuk Yúsán ti áujiarmiayi.

Yusa suntari Pitrun uwentikramiania nu

⁶ Wats, Erutis, kashin jiktiatjai takui, nú kashi Pítruka jimiará suntar wajamunam etema tepes kanarmiayi. Tura jimiará jirujai jinkiamuyayi. Tura chíkich suntarka jínmanum ii wajarmiayi. ⁷ Tumai aya aneachma Yusa suntari nayaimpinmaya taa ajapén wajasmiayi. Túrunamtai jeanmanka tsáapin ajasmiayi. Tura Yusa suntarisha Pitrun páenum antin ishintiarmiayi. Tura jirusha Pitru uweyéya sayat atiniamiayi. ⁸ Tura Yusa suntari tímiayi “Kaki emenmamata. Túram sapatrumsha aweekata” tímiayi. Tutai Pítiur túramiayi. Nuyá chichaak “Pushiram entsarta. Túram nemartusta” tímiayi. ⁹ Tutai Pítiur nemarsamiayi. Túrasha Pítruka, mesekranmaapi júniaya, tu enentáimsamiayi. ¹⁰ Túrasha emka suntar íimia wajan nankaikiarmiayi. Tura nuyasha chíkich suntar íimia wajan nunasha nankaikiarmiayi. Tura nuyasha jíintiinium jiru waiti ámanum jeawarmatai, nú wáitisha íimia-ninki kuat uranmiayi. Túrunamtai jínkiarmiayi. Tura jintiá ishichik wésan, Yusa suntari Pitrun níniak ikiukmiayi.

¹¹ Túram Pítiur enentáimiar tímiayi “Yamaikia nékajai. Mesekran-machuiti. Antsu Uunt Yus ni suntarin nekas akupturkayi. Erutis man-tuataj tusan pujurtana nuyá Yusa suntari winia uwentikrurai. Tura Israer-aents túrutatajtsa wakeriarmia nuyasha uwentikrurai” tímiayi. ¹² Nuna tu enentáimias nekáa, Marí jeen wémiayi. Nú Marisha Juan Márkusán nukuriyayi. Nú jeanam untsuri aents irunar Yúsán auju matsatainiai Pítiur jeamiayi. ¹³ Tura jeá aa wáitin tuntuimiayi, wayataj tusa. Túmakui nuwə uchich, ni naari Rutí, yákit tusa iyumiayi. ¹⁴ Tura jeari, Pítru chichamen anturak ti shiir enentáimsamiayi. Túmak wáitin urattsuk ikiuki, inít matsatainian werí “Pítiur taa wáitiniam wajaawai” tímiayi.

¹⁵ Tutai “Wáurtsmek” tiarmiayi.

Tútaisha núwaka “Atsá nekasaiti” tímiayi.

Tútaisha nú arant “Níchuiti. Antsu ni wakaní túratsuash” tiarmiayi.

16 Tu chichainiajn Pítruka tuke tuntuí wajamiayi. Tura wáitin uraj tukamá Pitrun wáinkiar ashamkarmiyai. 17 Ashamak chichainiakui Pítieur, uweje takúí itiatmamtkiarmiyai. Tura nuyá Uunt Yus sepun-mayan uwemtikramun ujakmiayi. Tura “Ju chicham Jakupu tura chíkich Yus-shuarsha ujaktarum” tímiayi. Nuna t̄i iniais jiinki arant wémiayi.

18 Kashin tsawar suntarsha Pitrun atsá wáinkiar “Chuwa urukakua menkaka. Áyawa urukattajia” tiarmiayi. Pítieur túrunamun nékachu ásar nuna tiarmiayi. 19-20 Túrunamtai Erutis chichaak Pítieur eaktarum tusa akupkarmiyai, túrasha wáinkiacharmiyai. Túrunamtai Erutis suntaran untsukar, Pítrun ísarmia nuna aniasarmiyai “¿Pítieur itiura menkakama?” tímiayi. Niisha áimiainiachkui, nu suntaran mantámnatí tusa akupkamiayi.

Erutis jakamiania nu

Erutissha Tirunmaya tura Setúnmaya áentsjaisha nemasnaikiarmi-ayi. Túmayatan Jutía nunkan ikiuki Sesaria péprunam pujustaj tusa Erutis wémiayi. Sesaria péprusha Tiru péprunam tíjiuchiiti. Setúnmaya aents Tirunmaya áentsjai Erutisa nunkeyan yurumkan súmainia ásar, Erutisjai nawamnaikiatniun wakeriarmiyai. Tuma asamtai métekrak enentáimsar, Erutisa takarniur̄i penker̄i, ni naari Parastu, niijjai emka amikmawar nuyá Erutisan weriar shiir matsamsatniun seawarmi-ayi. 21 Tuma asamtai tsawant jeamtai Erutissha akupin entsatai pushin entsarmiyai. Tura akupin pujutainium pujus áentsun ikiaanak áujmatmiayi. 22 Nūi pujus chichaakui aents untsumainiak tiarmiayi “Ju chichaa pujana júka áenchaiti. Antsu nekaska yúsaiti” tiarmiayi. 23 Tumaj nuyajk Yusa suntari nayaimpinmaya tari Erutisan jaa awajsamiayi. Tuma asamtai nusha aka yuam jakamiayi. Erutissha Yusan waantu awa-jtsuk niñki waantu enentáimtuma asa túruna jakamiayi. 24 Túrunamtaisha Yusa chichamenka nú arant pampanki wémiayi. Túmak̄i ashí núnkanam anturamiayi.

25 Tura Pirnapísha Sáurusha ni takatr̄in amukar Jerusaré̄nnumiá An-tiukíanam waketainiak Juanj Márkusun júkiarmiyai.

13

Yus-Shuar Pirnapíncha Sáuruncha Yus-Chichaman etserkarat tusar akupkarmiania nu

1 Antiukíanmaya Yus-shuarnum Yusnan etserin páchitra ármiayi. Nútiksaj Yus-Chichaman jintinniur̄isha ármiayi. Pirnapísha tura Mukusa Semunsha, nuyá chíkich, Serinianmaya Rúsiusha tura akupin Erutisa tsakatkesha, ni naari Manaen, Sáurusha tímianu ármiayi. 2 Tura chíkich tsawantaj niisha yurumtsuk Yusan áujeak pujuiniaj Yusa Wakaní tímiayi “Pirnapísha, Sáurusha akanturkitiarum, tímiayi. Wi takatan súsaitjiana nuna takasarat tusarum túratarum” tímiayi. 3 Tutai ijiarma Yusan aujsua amikiar, shiir wetarum tusar ni uwején Sáurun Pirnapíncha awantkarmiyai. Túrawar Antiukíanmaya akupkarmiyai.

Chipri nunkanam jeawarmiayi

4 Tura nuyanka Yusa Wakaní akupkam Pirnapísha Sáurusha jíinkiar Serusia péprunam jeawarmiayi. Tura nuyá uunt kanunam enkemprar Chipri nunkanam jeawarmiayi. 5 Juansha yáintaj tusa némarkauyayi. Nūi Saraminia péprunam jeawar Israer-shuar iruntai jeanam wayawar Yus-Chichaman etseriarmiyai. 6 Tura Chipri nunkanam pepuru ainia

nui wáirkutak Papus péprunam jeawarmiayi. Nui jeawar Israer-aents uwishin ni naari Parjesúsan wáinkarmiayi. Ni chíkich náaringkia Erimiasauyayi. Niisha uwishniuiiat, Yúsnan étserajai, tíniuyayi. ⁷ Akupin Serjiu Páurujaí pujuyayi. Nu akupniusha ti pénger enentáimniuyayi. Tura Pirnapin Sáuruncha chichaman akuptukmiayi, taarti tusa. Kame Yus-Chichaman antuktaj tusa wakerak untukmiayi. ⁸ Tura uwishin Erimias nuna nakitiak “Auka péngerchaiti” tímiayi. Akupniusha Yúsan umirkain tusa nuna tímiayi. ⁹ Nuyanka Sauru, ni chíkich naari Papru, Yusa Wakaní pimiutkamu asa, nu uwishniun úmamkemas iis tímiayi ¹⁰ “Ámeka wáitaitme. Anankartiniatme. Yajauchiitme. Maaj, iwianchitme. Tura ashí pénger ana nuka imiá nakitniuitme. Tsej, ¿urukamtai Yusa jintí naka ana nu emeskim weam? ¹¹ Paij, yamaikia Uunt Yus asutiámattawai. Yamaikia amesha jjiimi kusurmatai untsurí tsawant tsáapnin penké íschattame” tímiayi. Tura nú chichamaik jji kusurmatai kirit ímiuk chikichan eamiayi enkeki jurukit tusa. ¹² Nu túrunamtai akupin nuna wáinak, ti enentáimpramiayi. Túruna Uunt Yusa chichamen enentáimtur umikmiayi.

Chíkich Antiukíanam etserkarmiania nu

¹³ Nuyá Juan waketki Jerusarénum wémiayi. Tura antsu Pápruka ni tsaniakmarijjai kanunam enkemprar Pápus péprunka ikiukiar Pirji péprunam jeawarmiayi. Nusha amaini Pampiria nunkanam pujawai. ¹⁴ Nuyá Pirji péprun nankaikiar Antiukía péprunam jeawarmiayi. Nú Antiukíasha Pisitía nunkanam pujawai. Nui jeawar Israer-shuar ayampratin tsawantin, nuka sáwartin, Israer-shuar iruntai jeanam wayawar pujusarmiayi. ¹⁵ Tura nui Yus-Papinium yaunchu áarman áujas aminkiamtai, Israer-shuar iruntai jeanam írniurí Páprun tiarmiayi “Yatsuru, jintiatin chicham takakkurmeka yamaik titiarum. Antukarmi” tiarmiayi.

¹⁶ Tutai Papru wajaki uweje takuimiayi. Tura chichaak “Israer-shuartiram, tura Yúsan umirkataj tusa wakerarmena nu antuktarum, tímiayi. ¹⁷ Ii Yusrj ii yaunchu uuntrin Israer-shuartin achikmiayi. Tura niisha írara núnik Ejiptunam matsatainaij Yuska nin páchiniak uunt awajarmiayi. Yus ni kakarmarijjai nú nunkanmaya ii yaunchu uuntrin uwentikrarmiayi. ¹⁸ Túrasha atsamu nunkanam ii uuntrin kuarenta (40) uwitin Yuska aya kátsuntramiayi. ¹⁹ Tura nuyanka siati áentsun mátsatkainian, Kanaan nunkanam matsamarmia nuna amukarmiayi. Nú nunkan ii yaunchu úuntrin susataj tusa Yus túramiayi. ²⁰ Nuyanka ii uuntri akupniurin, juís tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuaru siántu senkuenta (450) uwí ejemiayi. Samuersha Yúsnan etserin náamtsáin nuna túrimiayi Yus. ²¹ Tura nuyanka áencha juísan nakitiainiak, uunt akupin náamkat tusa Yúsan seawarmiayi. Tuíniakui Yuska Sesa uchirín Saúran anaikiamiayi. Nú Saúra úuntrin kua Pinjamínkiauyayi. Tura Saúrsha kuarenta (40) uwí nú áentsun akupkat tusa Yus tsankatkamiayi. ²² Tura Saúr náamkan ataksha Yus awainkimiayi. Tura nuyá iiksan nú nunkanam uunt akupin atí tusa Tawitian anaikiamiayi. Tura Yuska juna Tawitian tímiayi “Isaí uchirín Tawitian winia enentáir jeamtai achirmakjai. Tura Winia umirtin átatui” tímiayi. ²³ Wats, Tawit weeanmaya Jesusaiti. Tura Yuska Israer-aentsun Uwentikrartinian Jesusan anaitiukmiayi,

yaunchu timiarin uminkiát tusa. ²⁴ Jesuska táatsain Juan ashí Israer-shuaran tunaariniá enentáimtumar imiantinian ujakmiayi. ²⁵ Tura Juansha ni jákatniuri jeatemamtai, chichaak “Átum enentáimtarmena núchaitjai. Wikia Yusa anaikiamuri, Kristu tutai, nákarmena núchaitjai. Antsu Niñkia winia ukunmaruj winittiwai. Tura Niisha wíjjainkia ti nankaamantu asamtaí wikia sapatrincha atitrataj tíchamniaitjai” tímiayi.’

²⁶ ‘Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktaram. Ju uwempratin chichamka íniuiti, tímiayi. ²⁷ Iis, Jesusa túrunatniurin Yuska yaunchu ni etserniurin áamtikrachmakia. Tura ukunam Jerusarénumiá shuar ni akupniurijjai tuke sáwartin nuna áujeatskesha penké nekaacharmiayi. Tuma ásar Jesuska Yusa Uchirinti tícharmiai. Tura, jakatí, tiarmia nuj, Jesusa túrunatniurin, Yus yaunchu chichakmia nuna, tímiatrusaran umikiarmiayi, tímiayi. ²⁸ Jesuska penké tunaamkachunak yamaikia mantamnatí tusar Piratun seawarmiayi, tímiayi. ²⁹ Tura Yusa Papirijn ashí Jesusnan tímia nuna tímiannak umikiarmiayi. Tura nuyá krúsnumiá itiarar iwiarsarmiayi. ³⁰ Túramunak Yus jakamunmayan iniantkimiai. ³¹ Jesuska jakamunmayá nantaki, yaunchu Kariréanmayá Jerusarénum Nijjai irutka wéarmia nuna núkap tsawantin pujus wantintiukmiayi. Nú shuaraiti yamaikia Jesusa túrunamurin etserainia nu’ tímiayi.

³² ‘Iisha núnisrik shiir chichaman Yus yaunchu ii apachrin tiarmia nu étseraeji. ³³ Iisha Israer-weeá asakrin, Yuska Jesusan iniantkimia nujai ii apachrin anajmatramia nuna yamá uminkiaiti. Kame Sarmu Jímiar papinium ju áarmaiti:

“Ámeke winia Uchiruitme.

Túmaitkiui yamaikia winia iwiaakmar susamuitme.”

³⁴ Tura Yuska Jesusa nantakmiarín jintintiak, tura ni ayashí káurchatniun jintintiak, chíkich Sarmu papinium juna áamtikramiai:

“Nekas péñkeran Tawitian anajmatramaj nuna atumin amastatjai.”

³⁵ Tura nú arant, nú paant atí tusa, chíkich Sarmu papinium ju arma awai:

“Yusa, ame Uchiram aneamna nuna ayashí káurтинcha tsankatkash-tatme.”

³⁶ ‘Nekaatarum, yatsurtiram, Yuska Tawitia ayashin tíchamiayi nuna. Tawitkia Yus tímian amuk jakamiayi. Túrasha ni ayashinkia káurmiayi. ³⁷ Tura antsu Yus iniantkimia nuna ayashinkia penké káurchamiayi. ³⁸ Tuma asamtaí, yatsurtiram nekaatarum. Jesusjainkete tunáa asakártin. ³⁹ Tura Muisais yaunchu akupkamia nujai tunáa tsankurnarchamnia nu, yamaikia Jesusjai tsankurnartiniaiti. ⁴⁰⁻⁴¹ Yúsnan etserin juna áarmiayi:

“Enentáimpratarum wishikkiartintiram. Ashamkatarum. Túrarum menkatumpratarum. Wi Yus asan, átum pujarmena nuj, aents túrachminian túratajna nusha penkesh nekaashtatrome, chíkich ujatmainiakuissha.” Tu áarmaiti.

Tuma asamtaí yatsurtiram, anearatum atumin nuna túrutmawairum, Yusnan etserin aarma tana nútiksan.” Nuna chichaak amukmiayi Papru.

⁴² Tura nuyá Papru Pirnapíjjai jünki wéenakuí aents chichainiak “Chíkich sáwartincha jútiksarmek etserkatarum” tiarmiayi. ⁴³ Tura nuyá iruntsua tsenkeenak Israer-shuarsha, tura chíkichkia Israer ajasarusha,

Yúsan umirkatajtsa wakeriarmia nuka, Páprun Pirnapíncha nemarsarmia-
ayi. Niisha nu áentsun chicharuk “Yusa anenkrattairi enentáimtusrum
kakartarum” tiarmiayi.

⁴⁴ Tura chíchich sáwartinia nu péprunmaya ti untsurí aents Yus-Chicham
antuktai tusar tuakarmiayi. ⁴⁵ Tura Israer-shuarka ti untsurí áentsun
tuakarun wáinkar, suir iiniak, ti kajerkarmiayi. Tuma asamtai Páprun
katsekkar “Ju chichaana júka ántar tawai” tiarmiayi. ⁴⁶ Támaitiat Pápruka
Pirnapíjiaí arantutsuk chichainiak tiarmiayi “Israer-aentstirmin, atu-
min emka Yus-Chicham ujaktiniuji. Túrasha átum támaitiatrum nakitra-
marme. Tura atumsha nakitia asarum, Yúsnum tuke iwiaaku pu-
juschamnia ajasurme, tímiayi. Tuma asamtai iikia yamaikia Israer-
aencha ujaktai tusar weraji, tiarmiayi. ⁴⁷ Nu túratarum tusa, Uunt Yus
akuptamtsujik. Jes, ni Papiriin júna tawai:

“Israer-shuarcha Winia nekarawarat tusan anaitiukjame. Tura ashí
nunkanmaya aents uwemprarat tusan akuptajme.”

Tu áarmaiti” tímiayi. ⁴⁸ Nú chichaman antukar Israer-shuarcha ti
wararsar “Uunt Yus tana nuka imiá péñkeraiti” tiarmiayi. Tura,
tuke iwiaaku pujusmin armia nu Yus-shuar ajasarmiayi. ⁴⁹ Tú tu-
makí Yus-Chicham nú nunkanam ashí jamarmiayi. ⁵⁰ Túrasha nuwan,
Yúsan péñker enentáimtuinian tura péñker wekainian, Israer-shuarka
yajauch enentáimtikrarmiayi. Áishman penkerí ármia nunasha, yajauch
enentáimtikrarmiayi. Túram Páprun Pirnapíncha katsekkar, chichaman
iruntar najatawarmiayi. Tú-turukiar ní nunkeya júiki awemarmiayi.
⁵¹ Túram Papru Pirnapíjiaí, ju aentska yajauchíiti tusar, wéenak naweyan
nunkan akakekiar ikiukiarmiayi. Túrawar Ikiuniu péprunam wearmiayi.
⁵² Yusa Wakanísha pimiútkamu ásar Yus-shuarka ti warasarmiayi.

14

Ikiuniu Péprunam túrunamia nu

¹ Ikiuniu péprunam Papru Pirnapíjiaí jeawar Israer-shuar iruntai
jeanam wayawarmiayi. Túrunawar Yus-Chichaman etserkarmiayi.
Túram ti untsurí Israer-shuar ármia nu, Israer-shuarcha ármia nusha
Yúsan umirkarmiayi. ² Tura chíchich Israer-shuar, Yúsan umirkacharu
ármia nu, Yus-shuaran kajerkarat tusar Israer-shuarchan yajauch
enentáimtikrarmiayi. ³ Tuma asamtai Papru Pirnapíjiaí nú nunkanam ti
nukap tsawant pujusarmiayi. Tura Uunt Yúsan enentáimtuinia ásar, aran-
tutsuk Yusa waitnenkratairín etserkarmiayi. Tura, etserinia nu winia
kakarmarjainti tusa, Yuska aents túrachminian najanmamtekiawarmi-
ayi. ⁴ Tura Ikiuniunmaya aentska jímiar kanakarmiayi. Chíchichkia
Israer-shuar tuinia nu nekasaiti, tiarmiayi tura chíchichkia Jesusa aka-
tramurí tuinia nu nekasaiti, tiarmiayi. ⁵ Tura nuyá Israer-shuarchajai
Israer-shuarka chichasar pepru uuntríjiaí chichasarmiayi. Tura Pa-
pru Pirnapíjiaí katsekkar tura kayajai tukurar, yajauch awajsatniun
nankamawarmiayi. ⁶ Túrasha Papru Pirnapíjiaí nuna anturmamkar,
Ristra péprunam wearmiayi. Nuyasha Tirpi péprunam wearmiayi. Nu
péprusha mai Rikiaunia nunkanam pujuiniawai. ⁷ Tura Yus-Chichaman
etserkarmiayi.

Ristra péprunam Páprun kayajai tukurarmiania nu

⁸ Ristra péprunam tunamaru áishman pujumiayi. Ni akiiniamuriya tuke wekaichauyayi. ⁹ Nú áishman Papru chichaamun antúu pujumiayi. Túman Papru úmamkemas nin íismiayi. Niisha, Yusa kakarmarjijai tsuamartatjai, tu enentáimiu Papru nekaamiayi. ¹⁰ Tura Pápruka kakantar chicharuk “Wajakim wewe ajasam wajasta” tímiayi. Tutai áishman wiut kutsuar wajakí wekaimiayi. ¹¹ Papru túramia nuna aents wáinkiar Rikiaunia chichamjai unsumainiak “Yuska áishmanka áanin ajasaru in tarutramarji” tiarmiayi.

¹² Pirnapínkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi. ¹³ Nú pepru jeamunam Júpitir náartin yusa jeen pujumiayi. Tura Júpitir náartin yusa pátriri kukujin iwiarkamun, wáakajai itiamiayi. Tura niisha ni áentsrijjai wáakan maatai tusar pujuarmiayi. Tura tikishmatrar ajamsatai, tiarmiayi. ¹⁴ Tura Jesusa akatramuri Pirnapísha Páprusha nuna nekaawar, auka nakitajai tusar, ni pushirin jaararmiayi. Túrawar aents írunmanum pachiniawarmiayi. ¹⁵ Tura tiarmiayi “Shuara, ¿urukamtai áitkiarum? Iisha yúschaitji. Atumea áankiitji, tiarmiayi. Penké ántrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nunkancha, nayaantsancha, tura ashí nu írunna nunasha najanaiti, tiarmiayi. ¹⁶ Jes, aents ni enentáimmiarijijain wekasarat tusa Yuska yaunchu tsankatkamiayi. ¹⁷ Tuma ain shuaran pénger awajsamujai Wiitjai Nekas Yus tusa paant awajmamsamiayi. Kame yumi yutuktinian nayaimpinmayá akupturmaji. Tura ejemamar warasarmí tusa yurumak nerektinniasha súrarni” tímiayi.

¹⁸ Túrashá Pápruka tímianu támaitiat, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

¹⁹ Tura nuyá Antiukíanmayá Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutai Páprun kayajai tukurarmiayi. Tura jakayi tiar péprunmayá japiki júkiar arant áepsarmiayi. ²⁰ Túrashá Yus-shuar Páprun tariar téntakarmiayi. Túram nuínkia Papru wajakí wé ataksha péprunam wayamiayi. Tura kashin tsawarar Papru Pirnapíjiai Tirpi péprunam wearmiayi.

²¹ Tírpiniun pujusar uwempratin chichaman etserkarmatai untsurí shuar Yúsan umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha waketkiarmiayi. ²² Waketainiak “ashí Yus tana nu tímiatrusrumek tuke umirkatarum” tuiniak Yus-shuaran ikiakármayi. Tura nin tiarmiayi, “Yusa akupeamuriin pachiinkiatat takurkia ti wáitsatniuitji.” ²³ Tura Yus-shuar írunmanum Yus-shuaran wáinniun anaikiarmiayi. Yurumtsuk Yúsan áujsar chicharainiak, “umirkarumna nú Yus iirmasarti” tiar ikiikiarmiayi.

Yaunchu jíinkiarma nú Antiukíanam waketkiarmiayi

²⁴ Nuyá Pisitia nunkanam nankaamakiar Pampiria nunkanam jeawarmiayi. ²⁵ Nuí jeawar Pirji péprunam Yus-Chichaman etserkar nuyá Ataria péprunam wearmiayi. ²⁶ Nuí kanunam enkemprar, yaunchu jíinkiarma nú Antiukía péprunam waketkiarmiayi. Páprusha Pirnapísha tuke jíintsain nú Antiukíanmayá Yus-shuar chichainiak, Yusa takatritúráttarmena nuna Yus waitntramak yáinmakarti, tiar akupkarmiayi nuikí. ²⁷ Nú Antiukíanam jeawar, Yus-shuaran irurar, ashí Yus nin

yáin_{ki}armia nuna ujakarmiayi. Tura nútiksáñ Israer-shuarchan Uunt Yus uwemtikrataj tusa untsukmia nunasha ujakarmiayi. ²⁸ Tura nuyá Yus-shuarjaj Papru Pirnapíjaj núkap tsawant pujusarmiayi.

15

Jerusarénum Yus-shuara úuntríjaj iruntrarmiania nu

¹ Nu tsawantin áishman Israer nunkanmaya wear, Antiukíanam jeawar Yus-shuaran jintintiainiak “Muisais tímia nútiksarmek tsupirnaktin ana nu túrachkurmeka uwemprashtatrumé” tiarmiayi. ² Tuma asamtai Papru Pirnapíjaj, núchaiti tusar, nú áishmanjaj ti kakaram chicharnaikiarmiayi. Túrasha nuu enentáiniak enentáimsatniun tujinkarmiayi. Tuma asamtai Antiukíanmaya Yus-shuar Páprun Pirnapíncha, atumsha chíkich áentsjaj Jerusarénum wétarum tusar akupkarmiayi. “Tura nuj Jesusa akatramurísha Yus-shuaran wáinniusha iniasrum itieurmainkit tusarum péñker nekaatarum” tiarmiayi. ³ Papru Pirnapísha akupkamu ásar wéenak Pinisia nunkanam, Samaria nunkanmasha nankaamainiak Israer-shuarcha Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

⁴ Tura Páprusha Pirnapísha Jerusarénum jeawarmatai Jesusa akatramurísha Yus-shuara wáinniurísha tura penké Yus-shuarsha itiwarmiayi. Tura niisha túrunamia nuna mash etserkarmiayi. ⁵ Túrasha Pariséu aencha, Yus-shuar ajasarmiania nu, wajakiar chichainiak “Muisais tsupirnaktin akupkama nuna tura nú arant ashí Muisais tímia nunasha Israer-shuarchasha umirkatin ániawai” tiarmiayi. ⁶ Nuyasha Jesusa akatramurísha Yus-shuaran wáinniusha nu chichaman nekaatai tusar iruntrarmiayi. ⁷ Chichasua umikiarmatai Pítur wajaki tímiayi, “Yatsurtiram, Yus nuik winia chichartak “Israer-shuarchasha winia chichamprun antukar umikiarat ujakarta” tu anaitiukmia nu nékarme. ⁸ Tura Yus Niñki ashí aentsu enentáin neka asa, Wíi shuar ajasmin ániawai tusa, ni Wakanin Israer-shuarchancha susamiayi, in suramsamij nútiksáñ. ⁹ Yus incha aushatka awajtamsachmaji, tímiayi. Antsu métekraketji. Tuma asamtai niisha Yúsán enentáimtuiniakui, Yuska enentáiyán ni tunaarín japirarmaj, tímiayi. ¹⁰⁻¹¹ Tura iikia nékaji niia áantsarik Jesukrístu waitnenkartutairíjaj uwempraitji. Nuñkia çurukamtia Yus uwempraru ániawai tajsha, átum Muisais yaunchu akupkama nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsáñchakait. Warí, ii úuntrísha tura iisha ashí Muisais tímia nu umiktin tujinkiamji. Tuma asamtai, çurukamtai nú káarkasha Israer-shuarchasha áentskatin wakerarum?” tímiayi Pítur.

¹² Pítur nuna tutai Pirnapísha Páprusha chichainiak, “Israer-shuarchasha ni kakarmarín nekaawarat tusa aentsti túrachminian túratniun Yuska ti yáinmakmaji” tú ujuam mitiat wáinkiar antúu pujuarmiayi. ¹³ Nuna ujasua amikmatai, Jakupusha tímiayi “Yatsurú, antuktarum. ¹⁴ Nuik túrachman Yus túramia nuna ii yachi Semun Pítur ujatmakji. Júiti: Yuska Israer-shuarcha waitnentak Winia ajasarat tusa chikishtarchiniak achikiuiti” tímiayi. ¹⁵ Jusha Yúsán etserin yaunchu áarmia nu tímiatrusáñ túrunayi. Júiti arma:

¹⁶ “Israer-aents meserar, jeá sáanakniua áintsáñ ániawai. Tura ukunam ataksha tana, Tarwitia jeen sáanaki ana nuna, ataksha najanattajai. Juakai nuna achikian ataksha awajrattajai. ¹⁷ Ashí nunkanmaya

aents, Israer-shuarcha ainia nu, winia náarun pachinia nu, Winia eátkarat tusan túrattajai. ¹⁸ Uunt Yus nuna yaunchu ujakmiayi.”

Tu áarmaiti’ tímiayi.

¹⁹ ‘Tuma asamtai, yatsurtiram, wi tájarne: Israer-shuarcha Yus-shuar ajasaru áiniana nu, imiatik awajsachmi. ²⁰⁻²¹ Iimiatarum, ashí péprunam Israer-shuar iruntainiam yáunchuyan tuke sáwartin Muisaisa áarmarín jintintiainiatsuk. Tuma asamtai, áyatik áatratai ju “Ántar-yus susamu ana nu iniaisatarum. Ántar-yusan susamu asamtai yajauchiiti. Tura tsanirmawairap. Tura kajemtikramua nu yuawairap. Tura numpasha umarairap.” Tu áatratai’ tímiayi Jakupu.

²² Nuyá Jesusa akatramurísha Yus-shuaran wáinniusha nuyá ashí Yus-shuaraim enentáimsarmiayi. “Papru Pirnapíjiaí wéakui, shuar níijiaí nenakar Antiukíanam akupkatai” tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar ármiayi. ²³ Tura níijiaí ju papin áarman akupkarmiayi:

“Iisha Jesusa akatramurí tura Yus-shuara wainniurí tura ashí Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papí akupeaji. ²⁴ Juyá aents ii chichamejainchu atumíin jeartamarai. Túrawar, tsupirnaktin ana nu, tura ashí Muisais akupkamia nu túratarum, turammarme. Nunasha ni chichamejain turamarmayi. Nu chicham atumsha antukrum nushá enentáimprarum “entá nuyanka itiurkatjik” tárume. ²⁵ Tuma asamtai nu nekaar, iisha métekrak enentáimsar, jimiará áishman akupkatin anaikiamji. Ju áishman ii aneamu yachí Páprujaí Pirnapíjiaísha atumin írmasarat tusan akupeaji. ²⁶ Papru tura Pirnapísha ii Uuntrí Jesukrístunam surumakarmiayi, ni takatrísha tsuumai ain túrami tusan. ²⁷ Níijiaí Jútassha tura Sérassha akupeaji. Ii chichaaajnia nuna niisha ni wenejái atumin ujatmakar-tatui. ²⁸⁻²⁹ Kame túratin asamtai iisha Yusa Wakaníjiaí ju áartin enentáimsaji. Naman ántar-yus susamu ana nu yuawairap. Tura numpasha umarairap. Kajemtikramu ana nusha yuawairap. Tura penké tsanirmawairap. Nuyasha chíkichkia nú nankaamas tíchattaji. Tura antsu nu iniaisarmeka, péñker áatrume. Ayu, Yus wáitmakarti.” Tu áarman akupkarmiayi.

³⁰ Tura Antiukíanam akupkam wearmiayi. Nui jeawar Yus-shuaran irurar, papin súsarmiayi. ³¹ Tura Antiukíanmaya Yus-shuarsha nu papin áujsar, péñker jintíamu chichaman áarman wáinkiar, ti shiir enentáimsarmiayi. ³² Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakáarmiayi. ³³ Tura nui ishichik tsawant pujusarmatai, Yus-shuarka, péñker wakеткиtarum, tiar akupkarmiayi. ³⁴ Tura Séras juáktinian wakerukmiayi. ³⁵ Páprusha Pirnapíjiaí juakarmiayi Antiukíanam. Niisha chíkich aentsjai Yus-Chichaman étseruk pujuarmiayi.

Papru atak Yus-Chichaman ipiampártasa wémiania nu

³⁶ Nuyá ukunam Papru tímiayi Pirnapín “Ashí péprunam iisha Yus-Chicham etserkamaj nui Yusai ii yachí ainia nusha urukák pujuinia iyutai” tímiayi.

³⁷ Pirnapikia Juan Márkusana iijiaí winiti tusa wakerimiayi. ³⁸ Tura Pam-piria nunkanam Juan Márkussa niisháa weu asamtai tura Yusa takatrín

iniaisa asamtai, Pápruka ayatniun nakitrarmiayi. ³⁹ Papru Pirnapíjjai ti kakannairar kanakarmiayi. Tura Pirnapíkia Márkusan ayaki Chípriniam wémiayi. ⁴⁰ Pápruka Sérasan ayaki wéakui Yús-shuar Yus yáinmakarti tinia akupkarmiayi. ⁴¹ Tura Siria nunkanmaani wekaráktak, Yus-shuaran ikiakárkutak Sirisianam jeamiayi.

16

Páprusha Sérasjai Timiutéun júkiarmiania nu

¹ Papru Sérasjai Tirpi pepu írikutak Ristra péprunam jeawarmiayi. Tura nuí Rístranam Yus-shuaran wáinkiarmaiya, ni naarj Timiutéu. Ni nukuríñkia Israer-shuar Yus-shuarauyayi. Tura ni aparíñkia Kriaku áentsuyayi. ² Tura Ristra péprunmayá Ikiuniu péprunmayasha Yus-shuar ármia nu, Timiutéu péñker wekaawai, tiarmiayi. ³ Kame Pápruka Timiutéun uyuuntusat tusa wakera asa, Timiutéu aparj Kriaku-apachin nekaawarmatai Israer-shuar nuí pujuarmia nu yajauch enentáimpraraín tusa tsupirmantikiamiayi. ⁴ Tura nuyá Papru Timiutéujai ashí péprunam nuí sétur nuí sétur wéenak Jesusa akatramurisha Yus-shuaran wáinniusha Jerusaréñnum nuik jintintian umiktarum tusa ujarkutak wearmaiya. ⁵ Tu ujamu ásar Yus-shuar nú arant Yúsan enentáimturar kakararmiayi. Tura ashí tsawant kawenki wearmaiya.

Papru iimiarmia nu

⁶ Tura Yusa Wakanjia Páprun Yus-Chichaman Asia nunkanam ujakinian tsanatkachmaiya. Tuma asamtai Pirijia nunkanam tura Karasea nunkanam ajrikutak, ⁷ Misia nunka jeatniunam jeawarmiayi. Túrunawar “Pítinia nunkanam wetai” tiarmiayi. Túrasha Yusa Wakanj nujsha wétinian suritkiarmiayi. ⁸ Tuma asamtai Misia nunkanam menantki Truas péprunam pachiniawarmiayi. ⁹ Nuí jeawar Papru kashi iimiarmiayi. Masetúnia nunkanmayá áishmanjan wajan wáinmaiya. Nu áishman Páprun chicharuk “Winitritia. Yáintkiamnium” tímaiya. ¹⁰ Nuyanka tu iimiarmatai, wisha Páprujai wetai tusar iwiarnarmiaji. Tura Yus incha nú nunkanam ni chichame etserkat tusa ti nekas untsurmakrin wéaji, tímaiji.

Jiripius Péprunam túrunamia nu

¹¹ Tura nuyanka kanunam enkemprar Truas péprunmayá jíinkir Samutrásia nunkanam jeamiaji. Tura kashin tsawar nuyanka katjarar Niápuris péprunam jeamiaji. ¹² Tura Niápurisnumiá náwek Jiripiusnum jeamiaji. Nuí Jiripius péprunmanka Rúmanmayá aents matsamsa ármiaiya. Tura nú péprusha Masetúnia nunkanam nekas uunt pepriyai. Tura nujsha seturmaji. ¹³ Nuyá sáwartin tsawarmatai pepu ikiukir entsá supichik wémaiya. Yus áusatniun iruntrarmia nuí pujusar, nuwá iruntrarmia nu Yus-Chicham ujakarmiayi. ¹⁴ Nuí Tiatira péprunmayá nuwá, ni naarj Ritia wáinkiamiya. Niisha tarach yamakain péñkeran súriniuyayi. Yúsnasha shiir awajniuyayi. Yus-Chichaman Papru etserkama nuna niisha péñker anturkamiayi. Túman, Uunt Yus Papru chichaamun umirkat tusa ni enentáin takasmaiya. ¹⁵ Túruna nú nuwá níniurijjai imianmaiya. Tura nuyasha chichaak “Yus-shuar nekas ajasai túrutkurmeka winia jearuí winitiarum” tímaiya. Tura nuí jeawakrin setumtikrampramiai.

¹⁶ Tura nuyá ukunam Yus augsatai tusar wekaamar nuwach nekaamin-iwianch enkemtuamu inkiunmakmiaji. Nu nuwachikia

misatkauyayi. Niisha nékamkui nérenniurjsha ti kuitriniawarmiayi. ¹⁷ Tura nú nuwäch incha Pápruncha pataaturmamiayi. Tura kakantar untsumuk “Ju áishmansha nekas Uunt Yúsán umirkaru ániawai. Tuma asa niisha atumin uwempratin chichaman ujatmarme” tímiayi. ¹⁸ Tura nú nuwächisha ti núkap tsawant tu wekaimiayi. Titmakui, Papru ayanmar iwianchin chicharuk “Jesukristu naarijijai tájame: jíinkitiá ni enentáiyá” tímiayi. Tutai íwianchkia nú chichamaik jíinkimiayi.

¹⁹ Tura nuwächí nérenniurjsha, íwianch jíiki awematniun nekaawar, Páprun Sérasnasha kakerak achikiar pepru uuntri íisarát tusar ajapén júkiarmiayi. ²⁰ Tura pepru úuntriin ejeniar tiarmiayi “Ju áishman Israershuar ániawai. Tura in páchim enentáimtikramainiayi. ²¹ Tura iisha Rúmanmayá aents árin, ii túrachminian, iikia asumprachman jintintra-mainiayi” tiarmiayi. ²² Tura nuyánka ashí aents Páprun Sérasnasha kakerkarmiayi. Túramtai pepru uuntri chichainiak “Pushiri áitkiarum numijjai asutiátarum” tiarmiayi. ²³ Tura nuyá ti asutsua amikiar sepunam enkeawarmiayi. Tura sepú-iinian chicharuk “Ti pénger iistá pisararain” tiarmiayi. ²⁴ Nu chichaman antuk, sepú-iin ti inít awayámiayi, tura nawén numi najanamujai tee chanuntamiayi. Tú tura ikiukmiayi. ²⁵ Tura kashi ajapén Papru Sérasjai Yusan áujainiak kantampriarmiayi. Tura chikich enkeamusha nuna antúu pujuarmiayi. ²⁶ Tu pujuiniiai aya aneachma ti kakantar uurkamiayi. Tura sepusha muchitramiayi. Túrunamtai sepú wáitirjsha ashí urantrarmiayi. Tura aents jirujai enkekar jinkiamusha mash atiniakarmiayi. ²⁷ Túrunamtai sepú-iin shintiarmiayi. Tura wáitisha mash uranar aan wáiniak, enkeamusha jíiniar shiákchariash tusa ni puniariniak ukuiniak máamattsa pujumiayi. ²⁸ Tura Papru untsuak “Amék yajauch awajmamsaip. Ashí pujuiniiai” tímiayi.

²⁹ Tutai sepú-iincha jinia ekeemak tsékenki wayamiayi. Tura Papru Sérasjai pujamunam kuránki jearmiayi. ³⁰ Tura aa jíiki aniasmiayi “Uunta, ¿warí itiurkattaj uwemprataj tusana?” tímiayi. ³¹ Tutai niisha tiarmiayi “Uunt Jesukristu nekas enentáimtustá. Túrakmeka amesha, tura áminiurmesha uwemprattarme” tiarmiayi. ³² Tura nuyá ashí ni jéen pujuarmia nunasha Yus-Chichaman ujakarmiayi. ³³ Tura tsawant iranakai sepú-iincha Páprun Sérasjai numpamnamurin nijiararmiayi. Túramtai nuyasha sepú-iincha nuarjijai uchirjijai imianirmiayi. ³⁴ Túramtai nuyasha ni jéen júkiarmiayi. Tura nujsha ayurawarmiayi. Tura sepú-iincha niiniurjijai Yus-shuar ajasu ásar ti shiir warasarmiayi.

³⁵ Kashin tsawar pepru uuntri, Páprun Sérasjai akupkata tusar sun-taran sepú-iinian akuptukarmiayi. ³⁶ Tura nuyánka sepú-iin Páprun tímiayi “Yamaikia pepru uuntri chichaman akupturmakai, átum wétinian. Tuma asamtai yamaikia péngerak jíinkitiarum” tímiayi. ³⁷ Túrusha Papru sun-taran chicharuk tímiayi “Warí, iisha Ruma aents árinin, niisha chichaman iwiartsuk ashí shuar íimiainiain asutiámamji. Túrawar sepunam enketmamji. Tura ¿urukamtai yamaikia uuk akuptamkataj tusa wakeruinia? Atsá. Antsu uuntcha níngki taar jíirmaktiai” tímiayi.

³⁸ Tutai suntarsha wakеткиar nuna ujakarmiayi pepru úuntrin. Tutai niisha ti ashamkarmiayi Ruma aentsun nekaawar. ³⁹ Túmak ashamainiak Páprun Sérasan weriarmiayi tsanškurturatum titiai tusar. Nuyasha sepunmayá jíikiar “Yamaikia wáitneasrum wetarum” tiarmiayi. ⁴⁰ Papru Sérasjai nuyá jíinkiar Ritia jéen wearmiayi. Tura Yus-shuaran ikiakárar ikiukiarmiayi.

17

Tisarúnikianam charaatum ajarmia nu

¹ Papru Sérassha wéenak Ampipuris péprunam Apurunia péprunmasha nan̄kaamakutak Tisarúnikia péprunam jeawarmiaiyi. Nūj Israer-shuara iruntai jēe ámiayi. ² Tura Pápruka nuna tuke túrin asa nu jēanam wémiayi. Tura nūjsha menaintiu sáwartin Yus-Chichaman paant etsermiayi. ³ Tura Páprusha Yus-Chicham tana tímiatrusan̄ jintintiarimiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikiamur̄in Kristu tútain tájarne” tímiayi Papru.

⁴ Nuna takui Israer-aents chikishtarchik umikiarimiayi. Túrawar Paprujāi Sérasjāisha tsaniñkiarimiayi. Tura Kriaku aencha ti untsur̄i Yúsan umirkarimiayi. Tura nuw̄a pen̄ker̄i armia nusha nútiksaran̄ umikiarimiayi. ⁵ Tura Israer-shuarka Yus-shuar ajascharmia nu, Páprun Sérasnasha suiir ísarmiaiyi. Túrawar chíkich yajauch áishman̄ naki yujáu armia nuj̄ai chichasar nu peprunam charáa charáa ajarmiaiyi. Tura Páprun Sérasnasha achikiar aentsu úuntriñ suruktai tusar Jasun̄ka jēen árenkarimiayi. ⁶ Túrasa Páprun Sérasnasha awetrar, Jasun̄kan tura chíkich Yus-shuarnasha achikiar japirkutak júkiarimiayi. Tura pepru úuntriñ jūniak tiarimiayi “Jū áishman̄sha ashí nun̄kanam charaatum ajá wekarmia nu yamaikia tímiajāi tarutramarji. ⁷ Tura jū Jasun̄ ni jēen itiaarimiayi. Tura niisha ashí mash Rúmanmaya uunt akupni chichamen nakitiainiawai, tiarimiayi. Tura jes, chíkich akupin awai, tuiniawai. Niisha Jesusaiti, turamainiaji” tiarimiayi. ⁸ Nu chichaman antukar, aents nūj pujuarmia nu, úuntriñmiak charaatum ajarmiaiyi. ⁹ Tura Jasun̄ chíkich Yus-shuarjāi Papru nekas awemattaji tusar, paj, kuit ikiuaji, tiarimiayi. Nuna takui pepru uuntriñ nin akupkarimiayi.

Piríanam

¹⁰ Nuiñkia nú kashi Yus-shuar Páprun Sérasnasha Piría péprunam akupkarimiayi. Tura nūj jeawar Israer-shuar iruntai jēanam wearmiayi. ¹¹ Piríanmaya aentska Tisarúnikianmaya áentsjāiñkia nan̄kaamas péñker enentáimkia ármiayi. Tuke enentáij̄ai Yus-Chichaman ántiarimiayi. Túrawar tuke tsawant imia niñkisha Papru tana nuna nekasashit tusar Yusa papir̄in ii wearmiayi. ¹² Tuma ásar untsur̄i shuar Yus-shuar ajasarmiaiyi. Tura Kriaku aents nuw̄a pen̄ker̄i armia nusha áishman̄sha umikiarimiayi. ¹³ Túrasa Tisarúnikianmaya Israer-shuarka Papru Yus-Chichaman Piría péprunam étserun antukar nūj weriar charaatum awajiarimiayi. ¹⁴ Túmainiakui Yus-shuar Páprun árutsuk nayaantsanam akupkarimiayi. Tura Séraska Timiutéuj̄ai nuiñ Piríanam juakarimiayi. ¹⁵ Tura Páprun nemariarmia nu Atenas péprunam nin ejeyarimiayi. Tura niisha waketainiakui, Papru chichaman akatar akupkamiayi, Sérassha Timiutéusha wárik winiartí tusa.

Atenasnum

¹⁶ Tura Papru Atenas péprunam pujus Sérasnasha Timiutéuncha nákamiayi. Nūj nú péprunam ántar-yus ti írunkui Páprusha kúntuts enentáimmiayi. ¹⁷ Tuma asa Israer-shuar iruntai jēenam Israer-shuarjāi tura chíkich aents Yúsan enentáimtiarmia nuj̄ai chichasmiayi. Tura tuke tsawant pepru ajapén aentsjāi in̄kiunaikiar chichasarmiaiyi. ¹⁸ Nuyá chichaman jintin chíkich naar̄i, ipikiuriu, armia nu, tura chíkichcha, ni

naari, estuikiu, armia nusha Páprun áujmatsarmiayi. Chikichcha tiarmiayi “Imiá chichamtincha jusha waritramtajik.” Tura chikichcha tiarmiayi “Yajaya yusnan etserniuchuashit.” Páprusha Jesusa túrunamurin tura aents jakamunmaya nantaktinian étserkui nuna tiarmiayi. ¹⁹ Nuyanka aents iruntainiya, naari Ariupaku támanum Páprun júkiarmiayi. Nuisha tuke irunin árimiayi. Nuí Páprun aniasarmiayi “Iisha ame yamaram támena nu nekaatai tusar wakeraji, tiarmiayi. ²⁰ Amesha nusháa chicham jintiniaitme. Túmaitkiui ju chichamsha warintiuak tusar nekaatai tusar wakeraji” tiarmiayi.

²¹ (Atenasnumiá aencha tura chikich nunkanmaya shuar nuí pujuarmia nusha aya yamaram chicham amia nunak ántiarmiayi. Tura aya nunak áujmatarmiayi.) ²² Nuyanka Papru Ariupakunam ajapén wajaki tímiayi “Atenasnumiá áishmantiram, wi nékajai, atumsha atumi yusrí ainia nuyá tsurakchamniaitrumé, tímiayi. ²³ Kame wi nuik atumí yusrí enentáimtutainiam ístaj tukaman nuí jeachin iwiamun, JU NEKAACHMA YUSNAITI, tu áarman wáinkiamjai. Wátsek, ju Yus átum nékachiatrum tikishmatrumna nuna ujaktajrumé’ tímiayi.

²⁴ Nekaatarum, nu Uunt Yuska ashí nunkan tura nuí írúnna nuna najanaiti. Tura Niisha nayaimpin nunkancha nérenniurinti. Tura aents najanamu jeanam nú Yuska pujuchuiti. ²⁵ Niisha aents yáinkiat tusa atsumatsui. Warí, imia-niníki Niisha ii iwiaakmarin, ii mayattairincha tura ashí írúnna nunasha súramtsujik, tímiayi. ²⁶ Nekaatarum. Nuu numpanmayanak ashí áentsun najanamiayi ashí nunkanam matsamsarat tusa. Tura Yuska ii tsawantrin nekapmaiti; ii pujustinniasha nútiksang nakakmiayi. ²⁷ Winia éátkar wáitkiarat tusa Yus nuna túrayi. Túrusha Yus jeashtaka pujurtamtsuji, tímiayi. ²⁸ Jes, iisha Yusjai iwiaakji. Yusjai muchitijai. Tura Yusjai ii kakarmari takakji. Nútiksang atumí papí-aintri tíchamka “Ashí incha Yus najatmaitji.” ²⁹ Tura iisha Yus najatma asakrin kuri najanamusha, yúsaiti, tu enentáimsashtiniatiji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsashtiniatiji, tímiayi. ³⁰ Aents Yúsán nékainiachuk túrawarmiania nuna Yuska yáunchuka pachischamiayi. Túrusha yamaikia Yus ashí aentsun chicharuk “Tunaaruminiá enentáimpratarum” túramji, tímiayi. ³¹ Yuska áishmankan anaikiatiti. Nú áishman ashí aentsti, yáki pénkeran túriniait, yáki yajauchin túriniait núnaka nekarmattaji. Nú áishman Yus akupkamun tuke enentáimtakui Yus nin anaikiatiti. Tura tsawant nú túrunatin átatna nuna Yus Niníki achikiuiti. Túrusha nekas anaikijai tusa, tura ashí áentstiram nekaatarum tusa nú áishmankan jakamunmaya iniantkimiayi” tímiayi Papru.

³² Tura nuna jakamunmaya nantaktinian áujmatun antukar chikichcha wishikiarmiayi. Tura chikich “Yamaikia máakete. Antsu chikich tsawantin antukmi” tiarmiayi. ³³ Tutai Papru iniaisamiayi. ³⁴ Tura chikich aentska Papru táman umikiar nin nemarsarmiayi. Nuisha Tiuníseu páchitkiauyayi. Niisha Ariupaku áentsuyayi. Tura nuyasha nuwa, ni naari Támaris, tura chikich aencha nútiksasang nemariarmiayi Páprun.

18

Kurintiu péprunam

- ¹ Nuyanka Papru Atenas péprun ikiuki Kurintiu péprunam wémiayi.
² Tura nuí Israer-shuaran ni naari Akiran wáinkiamiayi. Akiraka Puntu

nun̄kanam akiiniauyayi. Tura ukunam Itiaria nun̄kanam pujaj̄i uunt akupin Krautiu ashí Israer-shuaran Ruma péprunmaya awemarmiyai. Rúmaka Itiaria nun̄kanmaiti. Nūj̄ awemamu ásar Akira Kurintiuman nuik támiyai nuwē Pírisírajaj̄. Tura Pápruka Akiran chichastaj tusa werimiyai. ³ Akirasha Páprusha mai juna takau ármiyai, tarach ti núparman jēa najantain najanin ármiyai. Tuma asamtai Papru Akiraj̄ seturmiyai nu takat túrawartai tusa. ⁴ Tura tuke sáwartin Papru Israer-shuar iruntai jēan wéuyayi. Nūj̄sha Israer-aentsun Kriaku-aentsnasha nútiksaran̄ Yus-Chichaman ujakar enentáimtikrarmiyai.

⁵ Tura nuyá Séras Timiutéujaj̄ Masetúnianmaya táarmatai Pápruka mijiatrutsuk Yus-Chichaman étserek “Yusa anaikiamur̄i Kristu, atum nákarmana nu Jesusaiti” tímiyai. ⁶ Tura támaitiat nú chichaman nakitiarmiyai. Túmainiak Páprun katsekkarmiyai. Tuma asamtai Papru, nuin̄kia ikiuajrume tusa, ni pushir̄in pear tímiyai “Atumek makuumarme. Tura wikia Yusaj̄ makuumatsjai. Yamaikia Israer-shuarcha ainia nuna Yus-Chichaman ujakartaj tusan werajaj̄” tímiyai.

⁷ Tura nuyanka Israer-shuar iruntai jēanmaya jiin̄ki, Yúsan enentáimtin áishman̄ Justu jēen wémiyai. Ni jēenka Israer-shuara iruntai jēen ayamach pujumiyai. ⁸ Israer-shuar iruntai jēa chicharniur̄i, Krispu, Uunt Jesusan nekas enentáimturmiyai. Túruna nuar̄jijaj̄ uchir̄jijaj̄sha Yúsan umirkamiyai. Tura chíkich aencha Kurintiumaya armia nu nútiksaran̄ Yus-Chichaman antukar, Jesusan enentáimtusar imianiarmiyai.

⁹⁻¹⁰ Nuyá Uunt Yus Páprun mesekran ipiatkamiyai. Chicharuk “Penké ímiatik awajtamsachartatui Wi ámijaj̄ pujaku. Ju péprunmasha untsur̄i aents Winia ajasartin írunui. Tuma asamtai ashamtsuk winia chichamur tuke etserkata” tímiyai Yus.

¹¹ Tura nūj̄ Kurintiu peprunam jimiará uwí ejesattuk Yus-Chichaman étserek pujumiyai. ¹² Tura Kariun̄, Akaya nun̄ka akupniur̄i anaiki-amu aj̄, Israer-aents Páprun kajerarmiyai. Tura kajerainiak akupniunam irunturarmiyai. Túrawar Páprun júkiar ejeniarmiyai. ¹³ Tu túrawar akupniun chicharainiak “Ju áishman̄ Yúsan umirkatniun Muisais akupkama núnaka íkias ausháa jintíawai” tiarmiyai. ¹⁴ Tura Páprusha chichastaj táunak, Kariun̄ka Israer-shuaran tímiyai “Jusha nekas tunáa túrakuin̄kia, tura akupniun umirchakuin̄kia, tárumna nuna anturkaintjarne. ¹⁵ Túrash aya chichamnak tura aya náar̄iniak atumí uuntr̄i akupkama nunak tau asamtai, atumek nuámtak ístarum tájarne. Wikia nu chichamnum pachinkiatniun nakitajaj̄” tímiyai. ¹⁶ Taku āa j̄iikmiyai. ¹⁷ Tura nuyanka Kriaku aents Israer-shuar iruntai jēa úuntr̄in Sústinisian achikiar awatiarmiyai akupniusha ímmianuman̄. Túrash aya akupin Kariun̄ka túranak penké pachischamiyai.

Papru Antiukíanam waketki, nuyá atak Yus-Chichaman ipiampartasa wémiania nu

¹⁸ Tura ni jēen waketkiarmatai, Papru nu péprunam untsur̄i tsawant pujusmiyai. Tura nuyasha ukunam Yusaj̄ yachi ármiania nuna áujas ikiuak Pírisírajaj̄ ni aishr̄i Akirajaj̄ Senkrea péprunam wearmiyai. Nūj̄ Israer-shuar túrutain umiák Papru ni intiashin awampramiyai, nuik Yúsan tímiyai nuna yamá umiájai tusa. Nūj̄nkia kanunam enkemprarmiyai Siria nun̄kanam waketkitiai tusar. ¹⁹ Tura nuyá Ipiisu péprunam jeawar Pápruka Pírisíran tura Akiran ikiukmiyai. Tura

Israer-shuar iruntai jeanam wayá Israer-shuar irunar pujuarmia nujai chichasmiayi. ²⁰ Tura niisha Páprun juin pujustá tusar seawarmiaiyi. Túrasha támaitiat, tujintiajai, tímiayi. ²¹ Nuyanka áujas ikiuak “Wisha Jerusarénnum námper átatna nuna pachiintiuktiniaitjai. Tura Yus akuptakuinkia atak tatajai atumin ístaj tusan” tímiayi. Tura kanunam enkemar Ipsiunmayá jíinkimiayi.

²² Nuyá Pápruka Sesaria péprunam jeá, nuyanka Jerusarénnum wémiayi, Yus-shuaran nuj áujataj tusa. Tura nuyá Antiukíanam wémiayi. ²³ Tura Antiukíanam ishichik pujus ataksha weak Karasea nunkanam tura Pirijia nunkanmaani wekaráktak wémiayi. Tura weak Yus-shuar mat-sarmia nuna chicharak ikiakármiaiyi.

²⁴ Tumáa pujai Arijiántria péprunmayá Israer-aents Apurus Ipsiun péprunam jeamiayi. Niisha Yusa yaunchu papirin ti pénger nekaamiayi. Etserkatniuncha ti nékauyayi. ²⁵ Uunt Yus tímia nunasha unuimiátrauyayi. Tura tuke enentáijjai chichasmiayi. Jesusa túramurin pénger jintinniuyayi. Túrasha aya Juan imiakratmanak nekaamiayi. ²⁶ Ju Apurus arantutsuk Israer-shuar iruntai jeanam chichamiayi. Tura Pírisíra Akirajai ni étserman anturkar, nincha akanki júkiar Yusa chichamen ni nekaachmia nuna núkap jintintrarmiayi.

²⁷ Nuyá ukunam Apurus, Akaya nunkanam wétaj takui, Ipsiunmayá Yus-shuar yáinkiar papí áarar atakas akupkarmiayi. Nú áentsnum péngerak jeat tusar túrawarmiaiyi. Tura Akayanam jeá, nú áentsun Yusa waitnenkratairjijai uwempraru ármia nuna ti yáinkiararmiayi. ²⁸ Tura Apurus Israer-aentsjai paant chichasmiayi. Túrasha Yusa Papirijjai, Jesussha nekas Yusa anaikiamurinti tusa paant jintiak nincha nupetkamiayi.

19

Papru Ipsiunam jeamiayi

¹ Tura Apuruska Kurintiunam pujai Pápruka náinniumaani wekaráktak, Ipsiunam jeamiayi. Tura nuisha Yus-shuaran wáinkiamiayi. ² Tura aniasmiayi “Atumsha Yus-shuar ajasmarmena nuj, ¿Yusa Wakaní atumí enentáin enkemturmakaitrum?”

Tutai niisha tiarmiayi “Atsá. Iikia nuka penke áyatkisha ántichuitji Yusa Wakaní awai támaka” tiarmiayi.

³ Tutai Papru aniasmiayi “Entá, ¿nuikia atumsha warí enentáimsarme imianmiarum?” tímiayi.

Tutai niisha tiarmiayi “Juan jintintramamij nu iisha enentáimsar imianmijai” tiarmiayi.

⁴ Tutai Papru tímiayi “Juansha, tunaarminiá enentáimprarum imiantiarum, tichamka. Nuyá tichamka, winia ukuruj winittiana nu nekas enentáimtustarum. Niisha Jesus Yusa anaikiamurinti, tu ujamakchamka” tímiayi Papru.

⁵ Nuna antukar niisha Uunt Jesusa náarin enentáimtusar ataksháa imianiararmiayi. ⁶ Tura Papru ni uwejejai nin antiñmatai Yusa Wakaní tarurarmiayi. Túram chíchich chichamjai chichasarmiayi. Túrunawar Yus-Chichaman etseriararmiayi. ⁷ Nusha tuse (12) áishman ármiaiyi.

⁸ Tura nuisha menaintiu nantutin Papru Israer-shuar iruntai jeanam werí Yusa akupeamurin pachis arantutsuk etsermiayi. Túrak nú áentsun ujaak Yúsnan nekasaiti tu enentáimtikrarmiayi. ⁹ Tura chíchichka ni

enentáin ti ikiatsuárarmiayi. Túrunawar umiktinian penké nakitiainia ásar aents ántamunam Yusa jintin penké yajauch chicharkarmiayi. Tuma asamtai Papru Yus-shuarnaka akanki yaruak Tiranu iskuirarijn tuke tsawant Yus-Chichaman ujaarmiayi. ¹⁰ Nuna túruki jimiará uwi et-serkamiayi. Túramu asamtai ashí Asia nunkanmaya aents Israer-shuar tura Israer-shuarcha Uunt Jesusa túramurjn antukarmiayi. ¹¹ Tura aentsti túrachminian túrat tusa Yuska ni kakarmarjn Páprun susamiayi. ¹² Jáanchniasha pushincha Papru antinman júkiar, nánkamas jaa shuaran ejetim, nú jaa shuarsha nuna antiñkiar péñker ajaarmiayi. Iwianchrukusha nuna antiñkiar, íwianch jíinkimtai ankant ajaarmiayi.

¹³ Tura chíkich Israer-aents uwishin ármiayi. Tura niisha chíkich chíkich péprunam wear iwianchrukun iwianchrjn jíirki akuptin ármiayi. Tuma asa niisha Jesusa náaríjjai iwianchin jíiktiai tusar, iwianchin chichartu-
iniak “Nu Jesus Papru ujaana nuna náaríjjai jíinkitiarum tájarme” tiarmiayi. ¹⁴ Tura Israer Patri uuntrj Esewia náartin, siati uchirj ármiya nu, nuna túriarmiayi. ¹⁵ Túrasha Jesusa náaríjjai jíinkitia, tuiniakui, iwianchcha tímiayi “Jesusnaka nékajai. Tura Pápruncha nékajai. Tura atumsha, zyátsukaitrum?” tímiayi. ¹⁶ Nuna tinia iwianchruku áishman tsékenki nú áishmankan kakaram katsumak nupetkarmiayi. Túram ti katsumam niisha misú tura numpamnawar jíinkiar pisararmiayi. ¹⁷ Nusha Ipiisu péprunam túrunamiayi. Túrunamtai Ipiisu péprunmaya Israer-shuarsha tura Israer-shuarchasha nuna túrunamun nekaawar ti ashamkarmiayi. Tura Uunt Jesusa náarjn shiir awajsarmiayi.

¹⁸ Túmainiai untsurj shuar Yúsan umirkaru Yus-shuar ajatsuk tunáa túrawarmia nuna paant ujakarmiayi. ¹⁹ Tura untsurj uwishniunmawarmia nu, waweokratai papí ármiya nuna itiararmiayi. Itiar, júka iniaiyaji tusar, ashí íimiainiajn áesawarmiai. Nú papí áesawarmia nuna kuítrisha senkuenta mir (50.000) nankaamasauyayi. ²⁰ Tu túrunamtai Uunt Yusa chichame pampanki tura nupetmaki wémiayi.

²¹ Tuma asamtai nuyasha Pápruka Masetúnia nunkanam Akaya nunkanmasha irautjai tu enentáimsamiayi. Tura nuyasha Jerusarénnum waketkitjai, tímiayi. Tura nuyá ukunam Ruma péprunmasha wetajai, tu enentáimsamiayi. ²² Masetúnia wétin asa Papru ni tsaniakmarjn Masetúnia nunkanam emka akupkamiayi. Timiutéun Erastujaj akupkarmiayi. Tura niñkia Asia nunkanam seturmiayi.

Ipiasiunam ti charaatum ámiania nu

²³ Pápruka tuke Ipiasiunam pujaj, nuyá aents Yus-Chichaman naki-tiainiak charaatum ajarmiayi. ²⁴ Iis, nuj Ipiasiunam kaya-yusa jee ámiayi. Nu yus núwauyayi, Tiana naartin. Tura áishman, Timitriu naartin, nú jean nakumak uchichin najanniuyayi kuitjai. Tura niisha nú takatjai ti kuítrintin ajasmiai. Tura chíkich áishman nú takatan takarmia nunasha ti kuítrintin awajsarmiayi. ²⁵ Timitriusha níjjaj takarmia nuna ikiaanak, chikichnasha níjjaj métek-taku takarmia nunasha ikiaanak níjjaj charaatum ajarmiayi. Timitriusha tímiayi “Winia írutramutiram antuktarum. Iisha ju takat takaajnia jujaj ti kuit achíatsjik. ²⁶ Tura atumsha ju Papru wáintrumna nu tura ántarmena nu chichaak “Ashí aents najanam yuska ántar ániawai” tatsuk. Nuna tau asa, juj Ipiasiunam, tura arant ashí Asia nunkanam, ni yúsrjn iniaisarat tusa enentáimtikrarai. Tuma asamtai untsurj aents, ii yusrj Tiánan ikiuiniak, Papru tana nuna

umirainiatsuk. ²⁷ Papru tu étserkui, iisha itiurchat pujuschattajik. Kuit ii achiaj nuka menkakashtatuak. Tura nú arantcha ii yusrj Tiana jeen shuar iniaisachartatuak. Tura nuyá Asia nunkanmayasha tura ashí nunkanmayá aentcha, ii yusrj Tiana shiir awajainia nuna yapajjáwar aun nakitrachartatuak” tímiayi Tímitriu.

²⁸ Nuna antukar aentcha ti kajekar charaatum ajarmiayi. Túmainiak “Ipisiu shuartikia, aya Tianak wakeraji” tu unsummiarmiayi.

²⁹ Nuñkia aents páchim enentáimprarmiayi. Túmainiak Masetúnianmaya Kayuncha Aristárkuncha Páprun nemanin ármia nuna achikiar japirkutak iruntai jeanam júkiarmiayi. ³⁰ Tura Pápruka iruntai jeanam wayá chichastaj taun, nuyá Yus-shuar ármia nu, nuna suritkiarmiayi. ³¹ Tura Asia nunkanmaya uuntri, Páprun amikri ásar, añkia wayawain tusar chichaman akuptukarmiayi. ³² Túrasha irunar pujuarmia nu, páchim enentáimprar, chíkichka nusháa unsummiarmiayi. Tura chikichcha nútiksaran ausháa unsummiarmiayi. Tura chíkichka ti untsurj, nekaachar “wariniak irunturara” tiarmiayi. ³³ Chikich nuj wajarmia nu charaatum amia nuna Israer-shuaran Arejántrun jintintrar eem shitiawarmiayi. Arejántrusha Kayun tura Aristárkuncha ayampruktinian wakerak takamatsatarum tusa uwején takuimiayi. ³⁴ Túrasha aents iruntrarum nu, júka Israer-shuaraiti tusa nekaawar, nú arant charaatum ajainiak “Ipisiu shuartikia aya Tianak wakeraji” ímia-imiatainiakua tí nukap pujursarmiayi.

³⁵ Ipisiu pepru papí-aintrisha áentsun itiatmamtik tímiayi “Ipisiu shuártiram antuktatum. Ii uunt yusrj Tiana jee ístina íchukaitiaj. Tura ni nakumkamurjsha nayaimpinmaya iniarmiania nusha íschatniukaitiaj. Tura nunasha ashí aents paant nékainiatsuk, tímiayi. ³⁶ Warí, núnaka ashí aents nékainia asamtai atumsha itiatkatarum. Túrarum enentáimtsuk yajauch túrawairap, tímiayi. ³⁷ Ímiatarum. Ju áishman átum itiarumna nu, ii yusrin yajauch chicharkacharai. Tura ni jeen yajauch awajsacharai. ³⁸ Wats, Tímitriu tura niijjai takainiana nu tunáa túramun ujaktai tusar wakeruiniakka pepru penkerin werishtinkiait. Nuñkia máimtek iwiainiakartí. ³⁹ Tura chíkich chicham ákuñkia péñker iruntrarum iwiaratarum. ⁴⁰ Kame ju yamá túrunamun nekaawar Rúmanmaya kapitían “Ii uunt kapitíantri yajauch awajsatai tusarum túrachurmeash” turamchatjia. Warí, niisha “¿Urukamtai charaatum ajarum?” takuisha, áimkiatin penké tujinkiattaji” tímiayi. ⁴¹ Tura papí-aint nuna tuasua amik “Áukete. Wétarum” tímiayi.

20

Papru Masetúnia nunkanam Krisia nunkanmasha wémania nu

¹ Charaatum ajasua amikiarmatai Papru Yus-shuaran untsuk Yusnan jintintrataj tusa ikiaankarmiayi. Tura áujas ikiuki Masetúnianam wémiayi. ² Nú nunkanam wekaráktak, Yus-shuaran jintintrar ikiakáarmiayi. Tura nuyasha Krisia nunkanam jeamiayi. ³ Nuñ menaintiu nántuk pujusmiayi. Tura nuyanka kanujai Siria nunkanam wétasa pujus Israer-shuar chícham jurusman anturmamak “antsu nunkan Masetúnianmaanij wetajai” tímiayi. ⁴ Tura Píríanmaya áishman Súpater naartin Páprun atampriimiayi. Tura Tisarúnikianmaya Aristárkusha Sekuntusha Tírpínmaya Kayusha Timiutéusha Asianmaya Tíkikiusha, Trújimiusha ashí nu shuar Jirípius peprunam Páprun atampriarmiayi. ⁵ Túrawar niisha emki

wear Trúas péprunam jeawarmiyai. ⁶ Tura iisha wakapruachu tanta yutai jisat amuukamtai, iisha Jiripius péprunmaya jíinkir, kanunam enkemprar Masetúnia nunkanmaya jíinkimji. Tura senku tsawant nankaamasmanum emki wearmia nu amaiyanankarmiaji Trúasnum. Tura nuisha siati tsawant pujusarmiaji.

Trúas péprunam túrunamia nu

⁷ Tura tumiñtin kíarai Jesukrístu enentáimtusar yurumátai tusar iruntrarmiaji. Tura Papru Yus-shuaran jintintramiyai. Kame Pápruka kashinkia wétin asa chichaa-chichaakua kashi ajapén ejemiayi. ⁸ Tura yakí menaintiu pátaranam, tesaamu ámia nuí iruntrarmiaji. Nuisha ji ekemarma untsurí irunmiayi. ⁹ Tura nuisha natsa Eutikiu, áankamunam ayamas pujusmiayi. Tura Papru ti esaram chichaakui nu nátsasha kari pujumiayi. Tumáa pujus kanaki yakí pátanmaya akaiki iniaamiayi. Tura penké jakan júsarmiyai. ¹⁰ Tura Papru akaatuki tsuntsumprua miniakkamiayi. Tura Yus-shuaran chicharainiak “Ashamkairap. Ataksha iwiaakui” tímiayi. ¹¹ Nuyá ataksha Papru wakamiayi. Tura tañtan puukar yurumáwarmatai, tuke chichaa-chichaakua tsawantmarmiyai Papru. ¹² Eutikiuncha iwiaakun ni jeen júkiarmiyai. Tura ashí aents shiir enentáimsarmiyai.

Miritiunam wearmiyai

¹³ Wats, Papru Asun péprunam nunkan we jeatajtsa wakerimiayi. Tura incha, átumka kanunam wétarum, turamkurin, iikia emkir wémaji Asunnum. ¹⁴ Nuí Asunnum inkiunaikiar, Páprusha kanunam enkemprantai, Mitiríniniam jeamji. ¹⁵ Tura nuyá jíinkir, kashin tsawarar Sámus péprunam jeamji. Tura nuyanka Trujiriunam jear ayampramji. Nuyasha kashin tsawarar Miritiunam jeamji. ¹⁶ Pápruka Jerusarénum wari wétajtsa wakerimiayi, pintikiustís naartin jístatin pachíinkiatat tusa. Tuma asamtai, Asia nunkanam ti núkap pujustinian nakitiak “Ipisiunam wéhattajai” tímiayi.

Papru Ipisiunmaya úuntrin áujsamiania nu

¹⁷ Túrasha Papru tuke Miritiunam pujus, Ipisiunmaya Yus-shuara úuntrin winitiarum tusa untsukarmiyai. ¹⁸ Ni taarmatai Papru tímiayi “Atumsha wi Asia nunkanam pujusan itiura túraj nu nékarme. ¹⁹ Atumjai tuke tsawant pujumaj nuí, nankaamantuchu enentáimtumasan, úutchim winia Úuntrun takatrin takasmiajai. Tura Israer-shuar yajauch awajtustinian wakerutainiajn tuke takasmiajai. ²⁰ Ashí penker ana nu nekaatarum tusan mijiatrutsuk jintintiamjarme. Iruntramarmena nuí tura ankant ankant atumí jeen pujumarmena nuisha Yus-Chichaman ujakmajrume, tímiayi. ²¹ Tura Israer-shuarnasha Israer-shuarchancha nútiksanak, enentai yapajjárú Uunt Jesukrístu umirkatarum, tímiajrume. ²² Tura yamá Jerusarénum wéajai, Yusa Wakaní túrutkui. Nuisha túrunatana nunasha nekamatsuk wéajai. ²³ Tura Yusa Wakaní iniakturkui juna nékajai, ashí pepru wi jeattajna nuí enketátai tusar nákarainiawai. Tura ti wáitsatniun nekapsattajai. ²⁴ Kame wikia jákashatjash. Túrasha warí winia itiurtawa. Wikia Yusa jintiñ warasan wekasataj tusan wakerajai. Yusai wea-wéakuan jáakun iniaisataj tajai. Tura nuyá takatan Uunt Jesus surusmia nuna penker amuktaj tusan wakerajai. Jes, Jesus chichartak “Yus wáitnenkartana nú chicham etserkata” turutchamka’ tímiayi.

25 ‘Tura, yatsurtiram, ashí Yúsna atumin paant ujakjarme. Yamaikia wíniaka atakka wáitkiashtatrum. 26-27 Nekaatarum, ashí Yusa wakeramurín wisha penké úurtsuk ujakjarme. Tuma asamtai atumin títiajtsan wakerajrume, chíkíchí shuara wakaní jinium wéakuisha wikia penké makuumashtatjai. 28 Tuma asamtai emka atumek ímiastarum. Túrarum nuyá chíkích Yus-shuar íistarum. Yus-shuaran wáinin ajastarum tusa, Yusa Wakaní achirmakurme. Yus-shuar ainia núnaka ni numpejain Uunt Jesus sumakchakait. 29 Kame wi wématai, chíkích táartatui. Núnaka nékajai. Tura niisha, Yus-shuaran amukartajtsa wakeriartatui, uunt yawaşa murikiun amuinia áintsan. 30 Túrasha nemartusarat tusar wakeruiniak atumíiniñ wait chichaman unuikiartin wantinkiertatui. 31 Tuma asamtai yatsurtiram, aneartarum. Wisha menaintiú uwitin tsawajsha káshisha útchím ankant ankant unuiniamajrumna nu kajinmatkiirap’ tímiayi.

32 ‘Pai, yamaikia, yatsuru, Yus yáinmakarti. Yusa anenkrattairí nékaitrumna nú chichamsha kakarmaiti. Nú chicham átum katsuáar kakaram wekasatniun yainmakarti. Kame nú chicham atumí enentáin pujakui, Yus ni shuarin matsamsatniun anajmatramia nuí pachí-inkiatarme. 33 Wats, wisha chíkíchí shuara kuítrin wariríncha wakerutkachuitjai. 34 Antsu winia uwejrui takasan wi atsummiaj nuna sumarmakmajai. Tura winia írutkamuru atsumamuríncha wiki sumakmiajai. Nuka paant nékarme. 35 Kame átum takasrum, atsumainia nusha yáinjarum tusan jintintiajrume. Wats, Uunt Jesusa chichame enentáimsami. “Achiana nujainkia nankaamas, súana nuka shiir waraawai” tíchamka” tímiayi.

36 Nuna tuasua amik Papru tikishmarmiayi. Tura ashí níijiai iruntrarmia nú shuar Yúsna áujsarmiayi. 37-38 Tura Papru nuik chichaak “Atakka wáitkiashtatrum” tíniu asamtai, ti kúntuts pujuiniak, útchím Páprun miniaksarmiayi. Túrawar kanunam ejeniarmiayi.

21

Papru Jerusarénum wémiania nu

1 Tura nuyá Yus-shuar aujsa ikiukir kanunam enkempramji. Tura ínkiuasmak Kus péprunam jeamji. Tura kashin tsawárar Rútas péprunam jeamji. Tura nuyanka Patara péprunam jeamji. 2 Tura nuí Pataranam pujusar, chíkích kanu Pinisia péprunam wea wáinkiamji. Túmakui nuí enkemprar wémaji. 3 Nuí wésar Chipri nunakaka wáinkiamji. Chíprikia menanmaani aa ikiuakur Sírianam jeamji. Kánuka Tiru péprunam jea pujustiniuyi, káarak núkap ikiuktin akui. Tuma asamtai iisha Tírunam jea kanunmaya jíinkir péprunam wayamji. 4 Nuí Yus-shuar wáinkiar nuín siati tsawant pujusmaji. Tura Yus-shuaran Yusa Wakaní ujakam Páprun chicharainiak “Jerusarénumka wéchatniuitme” tiarmiayi. 5 Tura siati tsawant nankaasmatai jíinkimji. Ashí Yus-shuar ármia nu núwentuk uchirtiuk nemartamkamji, péprunam iniankatmaktiai tusar. Káanmatkanam jea tikishmarar Yus áujsamji. 6 Tura nu amikiar nuínkia áujnaisar ikiukiarmaji. Tura iikia kanunam enkemprakrin ninikia ni jeen waketiarmiayi.

7 Iisha Tirunamaya entsak wea-wéakuar Turumáitianam nuín jíntramji. Tura nuí yearsha Yusai yachí ármia nu chichasar nuín chíkíchí tsawant pujusmaji. 8 Kashin tsawárar nuyá jíinkir nunkan weri

Sesaria péprunam jeamji. Nuĵi Jiripi jeen jear pujusmaji. Jiripikia Yus-Chichaman etserniuyayi. Nuik Jerusarénnum siati áishmaṅkan Yusa takatrĭn wáinkiarat tusar anaikiarmia nú Jiripiiti. ⁹ Jiripisha kuaru takwantrĭn yarumkauyayi nuatnakchan. Niisha Yusa chichamen etserin ármiai. ¹⁰ Tura iisha Jiripi jeen wárum tsawantak pujarin Jutia nunṅkanmaya aents Yusa etserniurĭ, Akapu náartin támiayi. ¹¹ Niisha taa Papru emenmamkarĭn achikmiayi. Tura achik ninĵi ni nawen tura uwejéncha jinĵiamamiayi. Nuna tura tímiayi “Yusa Wakanĭ tawai, juna emenmamka nérenniurĭn Israer-aents jútikia jinĵiáwar Israer-shuarchanum surukartatui, tawai” tímiayi. ¹² Iisha nu antukar Papru tímiaji “Jerusarénnumka weep.” Sesarianmaya Yus-shuarsha núnisan Páprun tiarmiayi. ¹³ Tutai Papru tímiayi “¿Urukantai útkuram winia enentáurĭ kúntuts awajtarum? tímiayi. Wi Jesusna asamtai Jerusarénnum jinĵiatainiakuisha mántuiniakuisha ashamatsjai” tímiayi. ¹⁴ Tura iisha Papru emetatai tukamar tujinkiar “wats, nuinĵia Uunt Yus wakera nu tímianak atĭ” tiarmaji.

¹⁵ Nu tiri iniaisar iwiarnarar Jerusarénnum wémaji. ¹⁶ Chĭprinmaya yaunchu Yus-shuar Manasuñ ni jeen Jerusarénnum takakuya nuna ikiatmastinian wakerimiayi. Tuma asamtai Sesarianmaya ishichik Yus-shuar nemartamainiak Manasuñnasha júkiarmiayi.

Papru Jakupu jeen irastajtsa wémiania nu

¹⁷ Tura iisha Jerusarénnum jeawakrin, nuĵi warasar Yus-shuar ti shiir áujtamsarmiaji. ¹⁸ Tura kashin tsawar Papru ímiak Jakupu jeen wémiaji. Nuisha Yus-shuara uuntrĭ matsamarmiayi. ¹⁹ Páprusha áujas amik, Israer-shuarchanum ni étsermajai Yus túramia nuna yámankamtaikniumia júki chikichkimas ujakar ujakar awajsamiayi. ²⁰ Papru taman antukar “Yus ti péñkerchakait” tiarmiayi. Tura Páprun ju chichaman tiarmiayi “Támena nu péñkeraiti, yatsurú, túrasha Israer-shuar timiá untsurĭ Yus-shuar ajasu ániayat, “ashí Muisais akupkamia nu umiktiniaitji” tuiniawai. ²¹ Nú arant yajaya aents taar, chichartamainiak “Pápruka nusháa jintintui, turamainiawai. Israer-shuar chĭkich nunṅkanam pujuinia nuna Muisais akupkamurĭ umirkashtin Pápruka jintintui, turamainiawai. Israer-shuarti tsupirnaktin ana nu túrashtinian tura ashí Israer-shuar túrutai iniaisatniun Papru imia Israer-shuaran jintintui, turamainiawai.” ²² Wátsek, yatsuru, nuinĵia iturmainĵit. Ame tátinrumin aents nekaawarka juĵi kajertamainiak káutramkachartatuak. ²³ Wats, antsu nuinĵia, ju túrata yatsuru. Juĵi kuaru áishmañ Yusan yaunchu tiarmia nuna umiktasa pujuiniawai. ²⁴ Nii júkiarta. Túram niisha Muisais akupkamia nuna umikar nijiaamainiakui, amesha nijiaamarta. Núnismek kuítniasha ni susatin ana nu amesha akikmatkarta. Niisha ashí umikarmatai, ni intiashĭn awampratĭn áchattawak. Nu áishmaṅka intiashĭn awampran Israer-aents wáinkiar, anturtamkarainia nu, nekaschaiti, turamartatui. Antsu, Pápruka Muisais akupkamia tímianak túrawai, turamartatui. ²⁵ Túrasha yatsuru, nekaata, Israer-shuarcha Yus-shuarka papĭ yaunchu akuptukmiaji. Israer-shuarti túratĭn ana nu ashí mash túratarum tátsuji, tu áatramji. Tura antsu namaṅken máawar ántar-yusan samu yúashtiniaitrumé, tímiaji. Tura numpasha umarchatniuitrumé, kajemtikramusha yúashtiniaitrumé. Tura tsanirmashtiniaitrumé. Tu áatramji” tiarmiayi.

Páprun achikiarmiania nu

²⁶ Nuyá tiniu asamtai Papru nú kuartru áishmaṅkan júkiarmiayi. Tura kashin tsawarar nímiak níjiaamararmiayi, Muisais timia nútiksaraṅ. Tura Yúsan tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt Jeen wayamiayi. ²⁷ Túrasha nu siati tsawant amusattuk ajatemsai, Ásianmaya Israer-aents Paprun Yusa Uunt Jeen pujan wáinkiararmiayi. Túrawar charaatum ajakiar Páprun achikiarmiayi. ²⁸ Achikiar untsumainiak “Israer-shuártiram in yáinmaktarum. Ashí nuṅkanam Muisais akupkamuríncha Israer-shuarti túrutairíncha, ju Yusa Uunt Jeencha yajauch chicharea nu achikji, tiarmiayi. Warí, Kriaku áentsun awayáshtinia nuna awayá nujai yamá ju Jeencha yajauch awajturmají” tiarmiayi.

²⁹ Jes, nuik Ipiasiunmaya Trúpimiu Páprujai péprunam wekaan wáinkiaruyi. Wáinkiaru ásar, Yusa Uunt Jeen wayayi, tu enentáimsar tiarmiayi. ³⁰ Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt Jeeya júkiarmiayi. Túrawar wáitíncha nú chichamaik epenrarmiayi. ³¹ Tura maatai tsatar matsamtuiniájí suntara kapitíántri Jerusarénumiá aents ashí charaatum ajanian antukmiayi. ³² Kapitíáncha ní suntarín tura sarjentuncha irur tseke weriarmiayi aents pujuarmia nuí. Aencha suntaran tura kapitíánin wáinkiar, Páprun asutíniayat iniaisarmiayi. ³³ Kapitíánka Páprun jeari achikmiayi. Tura jimiará jirujai jinkiarmiayi. Nuyasha aniasmiayi “¿Niisha yait? ¿Warinia túrait?” tímiayi. ³⁴ Túrasha aencha untsurí chichaman untsummiarmiayi. Túmainiakui kapitíáncha penké nekaachmiayi. Tuma asamtai Páprunka suntar pujamunam júkiarmiayi. ³⁵ Tura suntar pujamunam wáitíniam jeawar Páprun entsaki júkiarmiayi aents imiá kajerainia asamtai. ³⁶ Tura aencha ukunmaani pataakar, mantamnatí, tu untsummiarmiayi.

Papru chichastinian seamiania nu

³⁷ Tura Papru suntarnum awayám, Páprusha kapitíánin Kriaku chichamjai chichaak “Wi ishichik chichasaintjame” tímiayi.

Tutai kapitíán chichaak “Warí, ¿amesha Kriaku chicham chichastin nékamek? tímiayi. ³⁸ Nuínkia amesha ¿Ejiptunmaya shuárchakaitiam? ¿Nuik kuartru mir (4000) aents, maṅkartin tutai atsamunam yaruakchamkam? ¿Kapitíánjai meset najanataj tusa túrachmakum?” tímiayi.

³⁹ Tutai Papru tímiayi “Núchaitjai. Antsu wikia Israer áentsuitjai. Sirisia nuṅkanam uunt pepru Tarsu náartin ana nuí akiiniaitjai. Tura wait-neasam ju aents chichastin tsáṅkatrukta” tímiayi.

⁴⁰ Tura kapitíán, ayu, tutai, Papru watainium wajas, mitiat pujastarum tusa uwején takuimiayi. Tura aents itiatkarmatai Israer-chichamjai chichasmiayi.

22

Papru áentsun timia nu

¹ Papru chichaak juna tímiayi: “Yatsurtiram, tura úuntur árumna nu antukturum. Wikia Pápruitjai. Kíishtumaktaj tusan títiatjana nu wait-neasrum anturtukturum” tímiayi. ² Tura Papru Israer chichaman chichaakui, aents nuna antukar nú naṅkaamas itiatkarmiayi. ³ Nuí Papru chichaak “Wikia Israer-shuaritjai. Tarsu pepru Sirisia nuṅkanam

ana nu*j* akiiniaitjai. Túmaitiatnak ju*j* Jerusarénum tsakaruitjai. Tura unuikiartin Kamaríran chichamen unuimiaruitjai. Tuma asan ii uuntri akupkarmia nuna ashí umirkaitjai. Tura átum yamá túrarmena nuna wisha nútiksanak Yusna ana nuna tuke enentáijjai wakerukuitjai. ⁴Tura Jesusan umirkaru ármia nuna máataj tusan pataatukni wekaimijai. Túran áishman kan nuwancha achikian sepunam enkeataj tusan túrimiajai. ⁵Israer-patri uuntrisha Israer-shuara uuntrisha Tamaskunam íi-shuar susatá tusar papin ataktusar akuptukarmia nuna niñkia nékainiawai. Jesusan umirkarun achikia ikiaankan ju*j* Jerusarénum asutniáwarat tusan werimjai' tímiayi.

(Túramur*j* 9.1-19; 26.12-18)

⁶Tura wi jintiá wéai Tamaskunam jeastatuk ajasai nantu tutupin ai aya aneachma nayaimpinmaya newaat wajantrunmiayi. ⁷Túrunamta wisha nunká iniaarmajai. Nuyanka chichaamun antukmajai. Chichartak "Sauru, Sauru, ¿urukamtia imiá pataaturam?" turutmiai.

⁸Takui wi aniasmajai "¿Amesha yáitiam, Uunta?"

Tutai "Wikia Nasarénumia Jesusaitjai. Ame pataaturmena nútijai" turutmiai.

⁹Wijjai pujuarmia nu, newaat wajantun wáinkiar ti ashamkarmai. Túrasha niñkia túrutun antukcharmai. ¹⁰Tura wi tímiajai "¿Nuiñkia, Uunta, warí ititurkattaj?" tímiajai.

Tutai Uunt chichartak "Wajakim Tamaskunam wetá. Nuisha ame túrattamna nuna ujatmakartatui" turutmiai, tímiayi. ¹¹Kame wikia nú newaat ajakun íisan jiru kusurmai. Tuma asamta winia tsaniakmar enkeki jurukiar Tamaskunam ejetiarmai' tímiayi.

¹²Papru tuke aujmatki wéawai. "Tura nu*j* Tamaskunam áishman Ananias pujumai. Niisha Yúsan aneak, Nuisais akupkarmia nuna umirkauyi. Tura nú péprunmaya Israer-shuar ármia nu nin péñker enentáimtiarmiai. ¹³Nú Ananías winia íirsataj tusa támai. Taa turutmai "Yatsuru Sauru, péñker iimtia." Túrutkui nú chichamaik péñker íimmiyai. Túrunan Ananíasnasha wáinkiamjai. ¹⁴Tura Ananías chichaak "Iwiaaku Yus, winia wakeramurun nekartuat tusa winia Uchirnasha, tunaarincha nuna, íisat tusa, winia chichampruncha antukat tusa ámin yaunchu Yus anaitiamkaiti. ¹⁵Amesha Papru, Yusna ana nu íisumna nusha antukumna nusha ashí aents ujakartatme. ¹⁶Tuma asamta yamaisha ¿warí nákam? Tunaarun asakátrurat tusam Uunt Jesus enentáimtusam weme ni náari pachisam imiantia" turutmai.'

¹⁷Tura Jerusarénum waketkin Yusa Uunt Jeen wémajai Yúsan áujsataj tusan. Nu*j* íimiarmaidai. ¹⁸Nu*j* Jesus chichartak "Ju*j* Jerusarénum Wí túramur etserkattamna nuna antukchartatui. Tuma asamta wari jíinkim wetá" turutmiai.'

¹⁹Túrutkui wi tímiajai "Túrasha Uunta, juyá aents wi Israer-shuara iruntai jeen wayan Ámin umirtamkarmia nuna nu*j* matsatun achikian awatin sepunam enkeawarmia nuna nékainiawai. ²⁰Tura nuyá Áminiu etserniun Estepankan máiniakuisha wisha wajamjai. Túruiniakui, "péñkeraiti" tímiajai. Nú arantcha ni pushirín íirsamjai" tímiajai.'

²¹Túrasha Uunt Jesus winia turutmai "Wetá. Israer-shuarcha matsatania nu*j* akupkatjame" turutmai" tímiayi Papru.

Suntara kapitíántriin túrunamia nu

22 Nuĵ matsamarmia nu, núnaka antukarka untsumtan juáriarmiayi. “Juĵka mantamnatí. ¿Urukamtaik iwiaakusha pujusat?” tiarmiayi. 23 Tura aentska Paprun kajerainiak, ti untsumainiak pushirĵn tujaat ajapawar nunĵkancha nanĵkimkiamaiĵka ajarmiayi. 24 Tura kapitían nuna wáiniak Páprun suntar pujamunam awayámiayi. Tura suntaran chicharuk “Átum asutiárum áimtikiatarum. ¿Urukamtaik aents nin kajerainiak imiá untsumainia? Nekaatarum” tímiayi. 25 Tura Páprun asutiátaĵ tusar ĵinĵkiárar awajsam Pápruka kapitíanin chicharuk “¿Rúmanmaya aents áyatik asutiámniakait, ni túramurĵ nekartsuk?” tímiayi.

26 Nuna táman antuk kapitíanĵa uunt kapitíanin ujaktaj tusa werí chichaak “Maaj, túrataj tamena nu anearta. Ju áishman Rúmanam pachitkaiĵi” tímiayi.

27 Nuna antuk uunt kapitían Páprun werí aniasmiayi “¿Amesha nekasmek Rumanam pachitkaitiam?” tímiayi. Tutai Papru “Ee” tímiayi.

28 Tutai “Wikia ti kuĵtían akikmakmiaĵai Rúmanam pachiiĵnkiatniun” uunt kapitían tímiayi.

Tutai Papru tímiayi “Túrasha winia aparka Rúmanam pachitkia asamtai, wisha Rúmanam pachiiĵnkian akiinĵiaitĵai” tímiayi.

29 Nuna takui Páprun asutiátaĵ tiarmia nuna wárik inĵiaisar ĵiĵniar wearmiayi. Tura imia uunt kapitíanĵa Rúmanam pachitkian ĵinĵkiá asa ashankamiayi.

30 Tuma asa kashin tsawar uunt kapitían, urukamtaik Páprun imiá kajerainia, nekaataj tusa wakerak Paprun werí ĵinĵkiámun atirmiayi. Tura Israer-patrĵ uunĵrĵn chĵikich naamka armia núĵaĵisha ikiaankamiayi. Tura nuĵnĵkia ni matsatmanum Páprun itiar ajapén awajsamiayi.

23

Israer-aentsu Úunĵrĵn Papru timiania nu

1 Papru Israer-patrĵ naamkarĵn úmamkes iis “Wíi shuartiram antuktarum. Úchichik tuke yamaisha Yus ímmianum péĵker wekainuitĵai” tímiayi.

2 Papru nuna takui Israer-patri uunĵrĵ Ananías, ni suntarĵn Papruĵ ayamas puĵuarmia nuna “Wenunam awatiarum” tímiayi.

3 Tutai Papru tímiayi “Tsej, ĵimiará chichamtinia ímiatá, Yus amincha asutiámattawai. Muisais akupeana nuna umiatsui tusam yajauch turutattsam pujame. Entá, ¿nuĵnĵkia urukamtia Muisais tímia nuka inĵiaisam ame suntarum winia asutiátarum tame?” tímiayi.

4 Tura nuna takui nuĵ wajarmia nu Páprun tiarmiayi “¿Maaj, amesha Patri uunĵrĵ imiá yajauchisha chichaream?”

5 Tutai Papru tímiayi “Yatsuru, wisha Patri uunĵrĵ áutskaitia tíchamĵai. Nékaitkiunka núnaka tíchaĵajai. Kame wisha nékajai, Yus-Chichamnum tawai “Atumí uunĵrĵ yajauch chicharkairap” tawai” tímiayi.

6-8 Israer-aentsu úunĵriya ĵimiará írutka árimiayi. Satuséu aents tura nuyá Pariséu aents nusháa írutkan Pápruka nekaamiayi. Kame Satuséu aentska, ĵakamunmaya nantaktinĵa Yusa suntarĵsha aentsu wakanĵsha tura iwianĵhĵa atsawai, tiniu árimiayi. Antsu Pariséu aentska, nuka ashí awai, tiniu árimiayi. Nuna nekáa Papru kakanĵtar chichaak “Wikia Pariséu áentsuitĵai. Wíi shuarsha Pariséu ániawai.

Wikia ashí shuar jakamunmayá ukunam nantaktin átatui tu jintiamun, nekaatai tusar itiararmiayi” tímiayi. Tura Papru nuna takui Pariséu aents tura Satuséu aencha nuámtak kajernaikiarmiayi. Túrunawar kánasarañ nusháa nusháa enentáimprarmiayi. ⁹ Nuiñkia ashí aents charaatum ajararmiayi. Tura Israer-shuara jintinniuri Pariséunam írutka armia nu wajakiar tiarmiayi “Ju áishman tunaan penké túrichuiti. Yusa suntari chíkich wakancha nin nekas chichaschamashi. ¿Ya neka?” tiarmiayi. ¹⁰ Ti charaatum ajainiakui suntara kapitíantri Páprun achiarchartimpiash tusa suntaran untsuk, “Jiiktiarum, túrarum suntar pujamunam awayátarum” tímiayi. ¹¹ Nuyá kashi Papru Uuntri mesekra ípiatuk “Kakaram ajasta, Papru. Juí Jerusaréñnum winia ujakarumna núnismek Rúmanmasha ujaktatme” tímiayi.

Páprun máatniun wakeriarmiania nu

¹² Nuyá kashin tsawarmatai Israer-aents Páprun maatai tusar chichaman jurusarmiayi. “Papru máachkurkia yurumtsuk tura penké úmutsuk matsamsattaji. Máachrikia yajauchiniam yumiñkramu atai” tiarmiayi. ¹³ Nuna tiarmia nuka kuarenta (40) nankaamas ármiayi. ¹⁴ Tura Israer-patri úuntrin tura Israer-aentsu úuntrincha weriar “Papru máachkurkia penké yurumtsuk pujustaji. Máachrikia yajauchiniam yumiñkramu atai” taji. ¹⁵ Tuma asamtai ashí Israer-patri naamkarjijai suntara kapitíantri seatarum, Papru tatí tusarum. “Kashin Papru itiata, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar niñkia táatsaín nákatatji” tiarmiayi.

¹⁶ Tura Papru awe nú chichaman antuk suntar pujamunam taa Páprun ujakmiayi. ¹⁷ Tuma asamtai Pápruka suntara kapitíantrin untsuk “Ju uchi uunt kapitíannium jukitia. Niisha chichaman takakui” tímiayi.

¹⁸ Kapitíancha uchin uunt kapitíannium ejé tímiayi “Papru enkeamu pu-jana nu winia untsurak “Ju uchi uunt kapitíannium jukitia. Chichaman takakui” túrutui” tímiayi.

¹⁹ Uunt kapitíancha nú uchin enkeki arantach jukí chicharuk “¿Warí turuttiaj tame?” tímiayi.

²⁰ Tutai uchi tímiayi “Israer-aents Páprun chichaman jurusarai. “Papru túramuri ti paant nekaatai tusar kashin Israer-shuara uuntrin ejetarum” turamartatui. ²¹ Tura amesha nuna takui anturkaip. Kuarenta (40) nankaamas jintiá akirtua pujurainiawai. Tura “Papru máachkurkia yurumtsuk tura úmutsuk matsamsattaji” tuiniawai. Tuma asamtai yamaisha ámin tití tusa nákarmainiawai” tímiayi uchi.

²² Tura uunt kapitíancha uchin chicharuk “Ame túrutmena nu chíkich aents penké ujakaraip’ tímiayi. Nuna ti, uchin akupkamiayi.

Akupin Piriksai ejetiarmiania nu

²³ Nuyanka uunt kapitíancha chíkich kapitíanin jímiarán itia chichaak “Urum, kashi ajapén ajastatuk ai, untsurí suntar ikiaankarta. Jimiará sián (200) aya náwek, setenta (70) kawainium eketka, nuyá chíkich jimiará sián (200) nánkijijain Sesaria nunkanam wétin iwiarata. ²⁴ Páprusha kawainium ekemkatin iwiarturta. Túrarum penkerak ejetarum akupin Piriksai” tímiayi. ²⁵ Tura niijiai ju chichaman áatrak akuptukmiayi:

²⁶ “Ti penker akupin Piriks, wikia Krautiu Rísias ju papin áatjame. ²⁷ Israer-aents ju áishman kan maatai tusar wakeruiniak achikiarmiayi. Tura niisha Rúmanmayá áentsuitkui wikia nuna nekaan suntarjai

werin jukimjai. ²⁸ Wikia ¿urukamtaik achikiaruit? tusan Israer-patri naamkarin jukimjai nin. ²⁹ Páprunka ii uuntri akupka-murin umiatsui tusan nin kajeriarmiayi. Pápruka yajauch túrachu asa mantamnachminiuyayi. Sepunmasha enkemachminiuyayi. ³⁰ Tura wisha Israer-aents nin máatniun chichaman jurusman nekaan amiin akuptajme. Nuyasha nin kajerainia nunasha tajai “Atumsha Piriksaj werum átum warinma kajerarum nu títiarum” tajai. Ayu. Júchiniak tájame.” Nuna tu áatar akuptukmiayi.

³¹ Tura suntarsha ni uunt kapitiántri tímia nútiksaran Páprun kashi júkiarmiayi Antipatris péprunam. ³² Kashin tsawarar suntar aya náwek wearmia nuka waketrarmiayi. Tura kawainium eketrainiaka Páprujaj wearmiayi. ³³ Sesaria péprunam jeawar papin Piriksán súsarmiayi. Tura Pápruncha nuí ejeniarmiayi.

³⁴ Akupniusha papí aujsua amik Páprun aniasmiayi “Amesha, ¿tuí akiiniaitiam?”

Tutai “Sirisia nunkanmayaitjai” tímiayi.

³⁵ Nuna takui akupin tímiayi “Wátskea kajertamainia nu taar tura-mainiakui anturkatjame” tímiayi. Tura nuyañka uunt akupin Erutisa jeen awayá apujsamiayi, suntar ísarat tusa.

24

Papru Píriksaj áujmatsamiania nu

¹ Tura senku tsawant nankaamasaj Israer-patri uuntri, ni naari Ananías, Sesarianam támiayi. Tura Israer-aentsu uuntri tura ti unuimiaru chichamtincha, ni naari Térturu nujaj táarmiayi. Ju aents Páprun kajerainia ásar akupniunam wearmiayi. ² Nuí Páprun itiarmatai Térturu chichatan juarmiayi. “Uunt akupin Píriks, amesha yaimiu asakmin iisha shiir matsatainijai. Tura imiá neka asakmin ashí aents tímiatrusrik matsatainijai. ³ Tuma asakmin iisha ashí matsatmanum tuke tsawant ti shiir yumisamajme, uunta. ⁴ Tura amesha ti núkap chicham antuktin nakitiatspash. Tuma asamtai antsu ishichik waitneasam anturtukta, tímiayi. ⁵ Ju áishman Papru, sunkura utsukratniua núniniaiti. Niisha ashí nunkanam mesetan najanatniun Israer áentsun ikiakáiniaiti. Tura Jesusa aentsri, Nasarénu tuinia nuna úntrinti. ⁶ Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntri tana nujaj métek asutiátaí túsar wakerimji. ⁷ Túrarin nuyañka kapitián Rísias taa tapit achik jurutramkimijai. ⁸ Tura atumek akupin Piriksaj werum nuí aujmatkatarum, turamaji, tímiayi. Tuma asamtai amesha Píriks, Papru aniasta. Nuinika ii tájinia nu nekasaiti, nu nekaattame” tímiayi Térturu.

⁹ Tura Israer-aents pujuarmia nu “Nekasaiti ashí ni tana nu” tiarmiayi.

¹⁰ Nuyá Píriks, uwejejaj, Papru chichasat tusa iniaktusmiayi. Túram Papru tímiayi “Amesha uunta, ju aentsu akupniuri ti untsuri uwitin pujusuitme. Tuma asamtai nuikia shiir enentáimsan páchitsuk chichasatjai. ¹¹ Wats, wi túramur nekartuata. Yúsan áujsataj tusan Jerusarénnun wi wémajna nu tuse (12) tsawant nankaamasaj. ¹² Nuisha yajauch áujmatki weaj wáitkiacharmaj. Yusa Uunt Jeencha tura Israer-shuara aujtai jeencha tura pepru jintianmasha áentsnum charáa charáa ajá wekaaj penké wáitkiacharmaj, tímiayi. ¹³ Ju aents juí matsatainia nu wíniaka penké turutchamnia áiniawai. ¹⁴ Túrasa juna paant ujaajme. Jesus yamarman jintána nuna umíajai. Kame Israer-aentska wáitaiiti tuinia

nuna wikia umíajai. Túrasha nuna túran ii uuntri Yusri akupkamia nunak umiktasan pujajai. Jes, ashí Muisais aar akupkamia nuna tura ashí Yúsnan yaunchu etserin aar akupkarmia nunasha uminiaitjai. ¹⁵ Tura jakaasha nantaktin átatui, tajai. Warí, péñker aents nútiksañ yajauch aencha nantakiartatui imia Israer-shuar tuiniatsuk. Tura wisha nútiksának túrunatniuiti tajai. ¹⁶ Tura wisha tiniu asan, wikia winia enentáruj Yus ímmianum makuumatsuk wekasataj tajai. Tura áentsnumsha nútiksának penké makuumatsuk wekaajai' tímiayi.

¹⁷ "Tura, uunta, untsurí uwitin chíkich chíkich nunkanam wekaasuan amikian winia shuaruj támajai. Kuítrinchan kuítian susataj tusan tura Yusa kuítríncha nin susataj tusan támajai. ¹⁸ Túran wisha, Muisais jintinmia nútiksának nijiaamaran, Yusa Uunt Jéen pujumiajai. Untsurí aents charaatum ajainiasha atsumiayi. Nuí wiki pujái Ásianmayá Israer-aents wáitkiarmiayi. ¹⁹ Tura wi yajauch túraitkuñkia winia wáitkiarainia nu táchatniukait ámin ujatmaktasa. ²⁰ Túrachkuñkia juí pujuinia nu, Israer-patri naamkari matsatmanum wi pujumajna nuí yajauch túramun nékainiakka turutiarti. ²¹ Kame, ""jakamunmayá nantakminiaiti" tau asamati makuurtiajtsarum pujarme" matsatmanum tímiaj nuí tu-turchartimpiash. Nú arantka yajauch túramun penké nekartuacharmai" tímiayi Papru.

²² Tánan antuk Píriks, Kristu shuari túramun paant nekáa, áanik ini-aisamiayi. "Antsu kapitíán Risias támatai nuñkia nu chichaman nekaatjai" tímiayi. ²³ Tura nuyá suntara kapitíántrín chichaak "Ju Pápruka tuke emetnati. Tura ishichikia ankant apujsatarum. Tura nuyá ni amikri taa yáintaj takui suritkiairap" tímiayi.

²⁴ Tura nuyá chíkich tsawantaj ataksha Píriks ni nuwejaj Tursirajaj támiayi. Núwenka Israer-shuarauyayi. Pírikska "Papru itiatarum' tímiayi. Papru Jesukristunun étserkui antimiayi. ²⁵ Tura Pápruka yajauchiniam wekasashtincha naka wekasatniuncha, tura ukunam Yus tunáa áentsnaka asutiátniuiti takui Pírikska ashamak tímiayi "Antsu yamaikia máakete. Tura ataksha wi ankant pujakun untsukmijiam" tímiayi. ²⁶ Tura, ankant ajastaj tusa Papru kuítian akirkashtimpiash, tu enentáimias, Píriks tuke untsúu wémiayi, chichastai tusa. ²⁷ Tura nuyánka jimiará uwí nankaasmatai Píriks akupin náamkam ajapnamiayi. Tura chíkich aents, ni naarí Pursiu Jistu akupin náamkamiayi. Tura Pírikska, Israer-aents péñker enentáimtursarat tusa wakerak, Páprun sepunam tuke ikiukmiayi.

25

Papru Jístujai áujmatsamiania nu

¹ Jístusha akupkatin takatan nankaamataj tusa Sesaria péprunam támiayi. Tura menaintiú tsawant nankaasmatai nuyá we Jerusaréñnum jeamiayi. ² Nuísha Israer-patri uuntri tura Israer-aentsu penkerísha Páprun tsanumprurtai tusar Jístun weriarmiayi. ³ Tura tiarmiayi "Waitneasam Páprusha Jerusaréñnum akupkata" tiarmiayi. Jintia maatai tusar wakeruiniak nuna tiarmiayi.

⁴ Tutai Jistu tímiayi "Atsá. Páprusha Sesaria péprunam sepunam enkeamu pujawai. Tura wikia nuí wárik waketkittijai" tímiayi. ⁵ Nuyá nin tímiayi "Atumsha penkerí árumna nu, wijiaj Sesarianam

wétiniaitrumé. Tura nú áishman̄ka tunaarī ákuin̄kia nūsha títiniaitrumé” tímiayi.

⁶ Jístuka Jerusaré̄nnum ishichik tsawant pujusmiayi. Kame uchu tsawant tura tias tsawantcha pujuschiawash. Nuyá ataksha Sesarianam waketkimiayi. Tura nū jeá kashin tsawar, akupin pujutainium pujus “Papru itiatarum” tímiayi. ⁷ Tura Papru wayamtai, Israer-aents Jerusaré̄nnumiā taarmia nu káunkarmiayi. Túrawar ti nukap chichainiak “Tunáa túraiti Pápruka” tu tiarmiayi. Túrasha pen̄ké uyumamtikiacharmiayi.

⁸ Pápruka chichamprumak tímiayi “Wisha tunaan pen̄ké túrachuitjai. Israera uuntrī áarmarin̄cha umirkaruitjai. Tura Yusa Uunt Jēncha yajauch awajsachuitjai. Tura uunt kapitianiasha yajauch pen̄ké chicharkachuitjai” tímiayi.

⁹ Jístuka Israer-aents pen̄ker enentáimtursarat tusa wakerak, Páprun tímiayi “Wakerakmīn̄kia Jerusaré̄nnum wemí. Wisha nū ame túramurmin nekaatjai” tímiayi.

¹⁰ Tutai Papru tímiayi “Amesha paant nékame, Israer-áentsnum tunaan pen̄ké túrachjai. Tuma asamtai Rúmanmayā uunt akupniun wisha winia túramurun ujaktiniaitjai, nekartuati tusan. ¹¹ Wisha jakamnia tímianu tunáa túranka, jákatniuncha ashamatsjai. Tura antsu turutainia nu nekaschaitkiuin̄kia wíniaka Israer-shuarnum surunkachminiaitjai tajai. Tuma asamtai seajme, wí túramun uunt akupin Sésar nekartuati” tímiayi.

¹² Tutai, nuyá ni írutramurijjaī chichasua amik, Jistu Páprun tímiayi “Uunt akupniuj̄ wétaj tusam seame. Tuma asamtai nū wétatme” tímiayi.

Papru uunt akupniujaī áujmatsamiania nu

¹³ Tura ishichik tsawant nan̄kaasmatai akupin Akripia ni nuwejaī Pirinésejaī Jístun áujsatat tusa Sesarianam wearmiayi. ¹⁴ Tura untsur̄i tsawant pujusarmiayi. Tura nū pujuiniāi Jístuka Papru túrunamun akupniun ujaak tímiayi “Jūi áishman̄ pujawai. Píriks nin achik en̄kea ikiukmiayi, tímiayi. ¹⁵ Kame wikia Jerusaré̄nnum pujaī Israer-patri uuntrī tura Israer-aentsu úntr̄isha, Papru yajauchin̄ túraiti tusar káutrukarmiayi, tímiayi. Mantamnī tusam akupkata, tu seattiarimiayi. ¹⁶ Takui wi tímiajaī “Iisha Rúmanmayā áentstikia chicham nékatsuk, mantamnati tusar akupeatsji. Tsanumpruinia nu, emka táartin áiniawai. Tura nuyá chichamprumatsain̄ mantamnati tusar akupeatsji iisha” tímiajai. ¹⁷ Tiniu asan, táarmatai, wikia nákatsuk kashin tsawaran akupin pujutainium pujusan, Papru itiatarum tusan akupkamjai. ¹⁸ Tura Páprun tsanumprurtai tusar taar chichainiaksha, wi enentáimmiajna núnaka tícharmiayi. ¹⁹ Antsu áyatik Yus umirkar túmatairin̄ Papru nuna túrachai, tiarmiayi. Tura nuyasha áishman̄ Jesus naartin̄ nantaki iwiaakūi tawai Pápruka, tiarmiayi. Nunak tiarmiayi. ²⁰ Tura wikia nú chichaman túratniun nékachu asan, Páprun aniasmajaī “¿Amesha Jerusaré̄nnum wétaj tusam wakeramek? Nū nu chichaman nekartamawarti” tímiajai. ²¹ Túrasha “Atsá. Jūin̄ pujustajai. Rúmanmayā uunt akupin Akustu Sésar nekartuati” tímiayi Papru. Takui, “nūn̄kia tuke sepunam pujustá. Tura wi ukunam uunt akupniun akuptuktatjame” tímiajai” tímiayi Jistu.

²² Nuyá Akripia chichaak “Wisha itiorsanak nu áishman̄ chichamun anturkaj” tímiayi. Tutai Jistu tímiayi “Amesha kashinkia anturkatame”. ²³ Tura kashin tsawar Akripia Pirinésejaī taar, iwiaa-iwiarmamu

ajas wayawarmiayi. Suntara úuntrijiai tura nú péprunmaya úuntrijiai wayawarmiayi. Tura nuĵi Jistu, “Papru itiatarum” tímiayi. ²⁴ Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju áishmanĵistarum. Ti untsurĵi Israer-aents Jerusarénumsha tura juĵi Sesarianmasha ju áishmanĵkan Páprun kajerainiak yajauch chichartuinĵawai. Tura tuke iniaitsuk, mantamnatniuiti, turutainĵawai. ²⁵ Túrasha wĵijaiĵkia tunáa jakamnianka túrachuiti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai. ²⁶ Tura wariniak uunt akupniun áatrataj nuna nékachu asan, Páprun atumin itiarjarme. Tura nekaska, Akripia, ame iniasta tusan itiarjame. Túrarakmin wi wariniak áartaj nuna nekaatjai. ²⁷ Warĵi wisha, ni yajauch túramurĵin áattsuk, uunt akupniunam akupkashtiniaitjai” tímiayi.

26

Papru Akripiaĵi chichamprumakmiania nu

¹ Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takuí chichatan juarmiayi. ²⁻³ Chichaak tímiayi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajnia nusha nékame. Tuma asamtai yamá wisha ámin chichamprumaktaĵ tau asan shiir enentáimjai. Israer-aents turutainia nuna mash ujaktatjame. Waitneasam péñker anturtukta’ tímiayi.

Papru ni yaunchu túrutairĵin ujakmiania nu

⁴ ‘Wi úchichik winia nunĵkaruĵi tura Jerusarénumsha pujusan wi túramajna nuna ashí wĵi aents Israer ainia nu nékainĵawai. ⁵ Pariséu ajasan, ni akupeamurĵin iturchat aiĵn ashí takamtsuk tuke umirniuitjai. Nunasha nékainĵawai tura wakeruĵiniakka etserkamnia aintui. ⁶ Túrasha wikia, jakamunmaya nantaktin átatui, tiniu asamtai wĵiniaka emetru-awar itiararmiayi. Túrasha núnaka Yuska ii úuntrĵin yaunchu tímiayi. Yus tímia nuna túrunattawai wisha tiniu asamtai itiararmiayi, tímiayi. ⁷ Tura ashí mash Israer-shuarti, tuse (12) aents matsatka ájinia nu, ju nantaktin chichaman Yus tímia nuna túrunati tusar nákinĵai. Tuma asar Yus áujkurĵi, tsawaiŵsha káshisha nú enentáimtuiniĵai. Tura wisha nú chichamnak enentáimta asamtai wĵiniaka kajertuiniĵawai, uunt Akripia. ⁸ Warĵi, atumsha “Yus jakancha iniantkimniaiti” tátsurmek’ tímiayi.

⁹ ‘Tura wisha yáunchuka Nasarénumĵi Jesusnan umirkaruka kajerkatniuiti, tu enentáimniuyajai. ¹⁰ Tura Jerusarénum Yus-shuar ármia nuna kajerkarmĵajai. Israer-patri uuntri chichamejai untsurĵi áentsun Jesusnan umirkarmia nuna sepunam enĵkeamĵajai. Tura nú shuaran máiniakuisha wikia péñkeraiti tu wémiĵajai. ¹¹ Tura Israer-shuara iruntai jeĵen wayan ti asutiármĵajai, Jesusnan umirkatniun iniaisarat tusan. Tura imiá kajerkaran chíkich nunĵkanmasha pataatu wearĵiaĵai achiktaj tusan’ tímiayi.

Tamasku jintianam túrunamun ujakmiania nu

(Túramurĵi 9.1-19; 22.6-16)

¹² ‘Tura Israer-patri uuntri tsanĵkatrukmatĵai, papin ni surusarmia nuĵai, Tamasku péprunam wétaj tusan jíinkimĵajai. ¹³ Tura, uunta, nantu tutupin ai, jintiá wéai newaat ajaki ti tsáapin, tsawái nantujai nanĵkaamas etsantrumiayi. Tura wĵijai wearĵia nuna nunasha núnisaran

etsantrurarmiayi. ¹⁴ Tura túrunamtai ashí nunká tepetar wáinkiarmai. Wiki Israer-chichamjai túrutun antukmajai “Sauru, Sauru, çurukamtai imiá pataaturam? Amek enentáimin yajauch awajmamsame, wáaka sankanmiak numin ijiuma núnismek. Wíi aents kajera asam túruname” turutmai.’

¹⁵ “Túrutkui wisha “¿Amesha yáitiam, Uunta?” tímiajai.

Tutai Uunt turutmai “Wisha Jesusaitjai, ame pataatamna nútjai. ¹⁶ Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamnium, turutmai. ¹⁷ Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakui, tura chíkich aents kajertamainiakui ayampruktatjame, turutmai. ¹⁸ Péñker jintintiata tusan akupeajme. Kame aencha kiritniumiá jíinkiar tsáapninium wekasarat tusan, tura iwianchin umirtsuk Yúsan umirkarat tusan akupeajme. Tura Winia enentáimtursarmatai Wisha ni tunaarín tsankurattajai. Nuna túran Yusna ajasaru áiniana nujai apujstatajai.” Nuna Jesus turutmai’ tímiayi.

Papru mesekrampra umikman ujakmiania nu

¹⁹ “Tuma asamtai, uunt Akripia, Uunt Jesus nayaimpinmayá wantinturak turutmia nuna umirkataj tusan pujajai. ²⁰ Enentai yapajíawar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusarénnumián, Jutía nunkanmayancha tura nútiksanak Israer-shuarchancha nuna ujakarmiajai. Tura ujainiakun “Yus-shuar ajasmarum paant ajasat tusarum, péñker túratarum” tímiajai ashí shuaran. ²¹ Tura wi Yusa Uunt Jeen pujái, Israer-shuar achirkar emetruawar mántuatai tukamá tujintrukarmiayi, Yus winia yaintiu asamtai. ²² Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura péejchach ainia nunasha ujainiajai. Tura Muisaíssa, Yúsnan etserniusha tiarmia nunak étsereajai. Nú arantka tátstujai. ²³ Kristuka wáitsatniuyayi, tura jakasha émak nantaktiniuyayi, ii uuntri tiniu ármiayi. Tura Krístuka nantaki Yusa chichamen í áentsun tura Israer-shuarchancha nútiksan ujaktiniuyayi. Nuna tu tiarmiayi. Tura núnaka wisha tu ujainiajai” tímiayi Papru.

Papru Akripian Yus-shuar awajstataj tusa wakerimiania nu

²⁴ Tura nuna takui Jistu kakantar tímiayi “Maaj, Papru, wáurme. Imiá unuimiatu asam wáurkame” tímiayi.

²⁵ Tutai Papru tímiayi “Atsá uunt Jistu, wáurtsujai. Antsu wi tájana nuka ti nekasaiti. ²⁶ Wi tájana nuna, uunt Akripia juí pujana nuka nékawai. Tuma asamtai arantutsuk nin chichareajai. Kame ju túrunamu ti paant asamtai niisha nékawai, tajai” tímiayi.

²⁷ Nuyá Akripian chicharuk “Yaunchu Yúsnan etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiayi.

²⁸ Takui Akripia chichaak “Maaj, ishichik awajtame Papru, Yus-shuar ajastin” tímiayi.

²⁹ Tutai Papru tímiayi “Tura ishichík chichamjaisha untsurí chichamjaisha, amesha uunt Akripia, tura ashí winia anturtukurmena nu, wijíai métek ajasúk tusan wakerajai. Tura antsu wia núnisan jíinkiamua núnaka wakeratsjai” tímiayi.

³⁰ Papru nuna tuasua amikmatai akupniusha, uunt kapitiáncha, Pirinísesha, tura nuí ashí pujuarmia nu wajakiarmiayi. ³¹ Tura arant wear, túrunamun chichasarmiayi. Tura tiarmiayi “Ju áishman mantamnamnian tunaamkachuiti tura penkesha sepunmasha enkeachminiaiti” tiarmiayi.

³² Tura Akripia Jístun tímiayi “Ju áishman “uunt akupin nekarati” tíchaitkuinkia akupmai makuitji” tímiayi.

27

Páprun Rúmanam akupkarmiania nu

¹ Tura Páprun Ruma péprunam akupkatniun enentáimsarmiayi. Rúmaka tímiai, Itiaria nunkanam pujawai. Wisha Páprujai wémiajai. Pápruncha tura chikichnasha achikma ármia nunasha Akustunu tutai suntara kapitiántrijjai nenakar akupkarmiayi. Nú kapitiáni naari Júriuiti. ² Tura Atramitiunmaya kanu Asia nunkanam pepru ármia nuí wétasa pujumia nu enkemprarmiayi. Tura Tisarúnikianmaya áishman, ni naari Aristárku, in páchitkiauyayi. Tisarúnikiasha Masetúnia nunkanmaiti. ³ Nuí enkemprar kashin tsawarar Sitiun péprunam jeamiaji. Nuí jeawakrin kapitián Juriu, Páprun waitnentak tímiayi “Ame amikrumijn wetá. Au írmasarti” tímiayi. ⁴ Tura Sitiunnumia jínkir, kanujai wesar nase tukumpramprakrin Chipri núnkaka menanmaani aa ikiukmiaji. ⁵ Tura nayaantsanam wesar Sirisia tura Pampiria nunkanam ayamchik nankamakir Mira péprunam jeamiaji. Nuka Risia nunkanmaiti. ⁶ Nuí jear nú kanu ikiukmiaji tura chíkich kanu Arijiántrianmaya taa Itiaria nunkanam wétasa pujumia. Nú kanunam suntara kapitiántri, enkempratarum, turam-miaji. ⁷ Tura untsurí tsawant yáitmataik we-wémiaji tura ti wiántkar Nítionam jeastatuk ajasmiaji. Tura nuísha nase tuke tukumkarta asamtai Sarmun nunkanam ayamchik nankaamakir, Kritia nunkanam áawinini ayamchik wémiaji. ⁸ Tura Kritia nunkanam ayamchik wesar itiurchat akui wáitsar wea-wéakuar “Shiir Pujutai” tutainium jeamiaji. Nusha Rasea péprunam tíjiuchiiti. ⁹ Yáitmataik wea asar ti táasmaji. Tura yumi yututai jeatema asa ti tsúumainiuyayi nayaantsanam wétin. ¹⁰ Tura Papru chicharuk “Amikru antuktarum. Wi nékajai, yamaí wéakrikia ti tsúumainti. Kanusha tura káarak kanunam enketainia nusha menkarattawai. Tura iisha núnisrik kajinchatjiash” tímiayi. ¹¹ Suntara kapitiántrinkia Páprunka anturtsuk, kanú wianniurjin kapitiántrincha tura kanú kapitiántrincha chichamen anturkarmiayi. ¹² Tura nuí Shiir Pujutai tutainium yumitin pujustin penkerchaitkui “Nuinkia juyanka wéartai. Pinise péprunam jeamainchuashit” ashí tiarmiayi. Nú péprusha Kritia nunkanam nayaants ayamach pujawai. Nú péprunam yumitin pujustinian wakeriarmiayi, arakia nunkaani kakaram nase nú péprunam jeachu asamtai.

Tsúumainium wekasarmiania nu

¹³ Tuma asamtai ukunam nase nunkaaniá tápiriri ajakui, ii wétin yamaikia penkeraiti, tu enentáimsarmiayi. Túmakui kanu emetai jiru júsar jínkir Kritianam ayamchik wearmiaji. ¹⁴ Túrasha árusan arakia kakaram nase, Nuristi tuinia nu tukumpramiayi. ¹⁵ Nase kanun tukumpra asamtai iisha atsantratin penké tujinkiamiaji. Túmakui, áankisha juramkitiai tusal iniaisamiaji. ¹⁶ Tura Kritia nunkanam áawinini nankaamakur nuinkia nase ishichik mijiantmatai, uchich kanu japikir wémiaj nu ti

takasar uunt kanunam enkermiaji. ¹⁷ Tura enkerar chapikjai uunt kanun jinkiáarmiaji wewe najanatai tusar. Tura náikim mukutniunam, Serti tutainium nase juramkishtajiash tusar, kanunam yaki tarach aan itiararmiaji. Nu tarach nase útsuktin tusar nenarma armiaji. Túrawar áyatik nase juramkitiai, tiarmiaji. ¹⁸ Tura kashin tsawarmatai nasesha chíchimisha tímiatrusan kakaram aa asamtai kanunmayan káarak irunmia nuna nayaantsanam ajapawarmiaji. ¹⁹ Menaintiú tsawant nankaasmatai iisha ii uwejejai kanunam káarak iruniarmia nusha entsá utsankarmiaji. ²⁰ Tura untsurí tsawant tsawajisha etsantrachmiayi tura káshisha yaasha tsaparcharmiaji. Tura nasesha ti kakantar tukumpramkurin “Yamaikia uwempratin atsawai” tiarmiaji. ²¹ Tura iisha ti untsurí tsawant yurumtsuk matsatu asakrin, Papru ajapén wajaki tímiayi “Amikru winia nuik Krítianmayan ka jíintsuk anturtukuitkiurminkia yamá ju itiurchatnum pujutsuk tura emenkatmatsuk pujuajaji’ tímiayi.’

²²⁻²⁴ ‘Yamá kashi winia Yusru suntari nayaimpinmaya wantinturkayi. Nú Yúsan umirkaitjiana nu akupturkayi. Tura nu taruti “Ashamkaipia Papru, turutui. Amesha Ruma péprunam uunt akupniunam jeattame. Tura chikichnasha ámijjai kanunam enketainia ásarmatai uwempratniun Yus tsankatkarai” turutui. Tuma asamtai, amikru, shiir enentáimsatarum. Atumsha mash uwemprattarme. Túrusha kánuka mesertatui. ²⁵ Wisha winia Yúsrin nekas enentáimtajai. Yusa suntari turutainia nuna nekas tu túrunattawai, tajai. Tuma asamtai kakartarum. ²⁶ Tura chíchimisha nunka uchich pújakmanum nuj patatmittiaji” tímiayi.

²⁷ Ayu, katurse (14) tsawant nankaasmatai nú kashi Atria nayaantsanam jeamiaji. Nuñ nase nankamás juram wémiaji. Nuyanka kashi ajapén wiantin armia nu nunka ámunam jeateman nekaawarmiaji. ²⁸ Tura urutmá kúnakit tusa nekapmamiayi. Túram tráinta sais (36) mítruuyayi. Nuyasha ékemasn ataksha nekapmamiayi. Nuñkia painti siati (27) mítru nekapmamiayi. Tuma asa nunká anumsatuk ajasun nekaawarmiaji. ²⁹ Tura kayanam ijuukajai tusar ashamañiak kuatru jirun kijinian chapikjai kanú senkarin jinikiáwar entsá ajunckarmiaji. Kijin asamtai, inít tepeámtai nase juramkichmi tusar túrawarmiaji. Tura wake mesekar, tsawarti tusar matsamarmiaji.

³⁰ Tura matsatainijai wiantin armia nu, iikia uchich kanunam enkemprar pisarchatjiash tu enentáimsarmiaji. Túmainiak kanú nujinia chíkich jirun ajuntai tawa nútiksaran uchich kanun ajuntai tusar pujuarmiaji. ³¹ Tura tuma wáiniak Papru suntara kapitíántrin tura ni suntarincha ujakmiayi. “Ausha uunt kanunman enketainiachkuñkia atumsha uwemprashtatume” tímiayi. ³² Tutai suntarsha uchich kanú chapikrin tsupirkar entsá ajunckarmiaji.

³³ Tura kashin káshik Papru ikiakártasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumtsuk pujarme. ³⁴ Seajrume, ishichkisha yurumárum kakaram ajastarum, uwemprataj tusarum. Iimiata, nekaatarum, imiatkisha túmatsuk péemkattarme” tímiayi.

³⁵ Nuna tuasua amik Papru apatkun achik Yúsan yuminsamiayi ashí ímmianuman. Tura puuk yuamiayi. ³⁶ Tura apatkun yuan wáinkiar, ashí aents shiir enentáimsar yurumáwarmiaji. ³⁷ Nusha ashí aents irurmaka jimiará sián nuyá ataksha setenta sais (276) ármiaji. ³⁸ Yurumáwar

ejemakar, yurumkanka entsá utsan̄karmiaiyi, uunt kanu wampú ajasat tusar.

Kanu pen̄ké meserミアnia nu

³⁹ Tura tsawarmatai wiantin armia nu, nun̄kan nekaacharmiaiyi. Túrasha én̄kentamunam káanmatak aan wáinkiar “Ai kanu anuntai” tiarmiaiyi. ⁴⁰ Nuyá jiru entsá ajuñman chapikr̄in tsupirkar entsá ikiuikiarmiaiyi. Tura kanait jin̄kiárma ármia nuna chapikr̄in tsupirkarmiaiyi. Tura tarach kanú nujiin amia nuna nenakarmiaiyi. Túram kanu káanmatkanam anumsatuk ajasmiyai. ⁴¹ Tura wainchi jímiar ámunam jeá kanu entsá wayá tepeamiyai. Tura kanú sen̄karin̄kia chíchimi yakí takuir ajiamu asa kupintramiyai. ⁴² Suntarsha, achik júamu armia nú shuaran máataj tusa wakeriarmiaiyi, yukuak pisararain̄ tusar. ⁴³ Tura kapitian̄cha Páprun uwemtikrataj tau asa nuna túratniun tsan̄katkachmiyai. Antsu chichaak “Emka yukuaktin nékarmena nu yukuakrum péemkatarum, tímiyai. ⁴⁴ Nuyá chíkichkia kanunmayá numi, kame nán̄kamas numi achikrum awamkarum péemkatarum” tímiyai. Tu túrawar ashí iwiaakuk jíinrarmiaiyi.

28

Marta nun̄kanam túrunamia nu

¹ Tura ashí iwiaakuk jíinrar, nu nun̄ka Marta naartin nekaami-aji. ² Tura nūj matsamin armia nu, shiir awajtamsarmiaji. Tuma asamtai iisha tsetsema asakrin, tura yumisha yútakui, uunt jinia iki-apárrarmiaiyi. Tura “anamaitiarum” turammaji. ³ Pápruka jinia kukarun ikiaan̄akjiniun pataamiyai. Túmawaj napi tsuéran ashamakjiinki, Papru uwejen̄ nemaramiaiyi. ⁴ Tura nú nun̄kanmayá aents, Papru uwejen̄ napi nemaran wáinkiar “Ju áishman̄sha shuáran majchuashit, tiarmiaiyi. Nayaantsanmayá uwempraitiatan̄ ni yusr̄i iwiaaku átinian suritiawai” tiarmiaiyi. ⁵ Páprusha ni uwejen̄ pear napin jinium awan̄miyai. Tura pen̄keshá yajauch ajaschamiyai. ⁶ Tura niisha eárchatpiash tusar ii pujuarmiaiyi. “Túmatkeshá jaka inianchatpiash” tiarmiaiyi. Túrasha ti núkap pujussha pen̄ké najaweachmiyai. Túrunamtai, nuin̄kia nusháa enentáimprar “Pápruka yúschashit” tiarmiaiyi.

⁷ Nú nun̄kanam aentsu pen̄keri ámiyai ni naari Pupriu. Nú Pupriu ni jeen in itiaarmamiaji. Tura menaintiú tsawant yurumkan̄cha suramsarmiaji. ⁸ Tura nūj pujarin Pupriu apar̄i tsuer, numpajai ijiarki jáamiyai. Túmakui Papru weri iyumiyai. Tura Yúsan áujtus amik uwejen̄ nin awantkamiyai. Túram pen̄ker ajasmiyai. ⁹ Nu túramun nekaawar, nú nun̄kanmayá aents jaa armia nu tariar, niisha pen̄ker ajasarmiaiyi. ¹⁰ Túram incha ti shiir enentáimturmasar núkap ajampramsamiaji. Túram ukunam ii wétin jeamtai ashí ii atsumamun suramsarmiaji.

Rúmanam jeawarmiania nu

¹¹ Ii wétsuk nú nun̄kanam menaintiú nantu pujusmiaji. Tura nuyá chíkich kanunam en̄kempramiaji. Nu kanusha Arijián̄trianmayá yaunchu tau menaintiú nantu yumi yútakui nūj pujumiyai. Nú kanu nujiin̄ numiyus najankamu jímiar ekemarmiaiyi, ni náarin̄kia Kástur tura Púruks. ¹² Iisha nūj en̄kemprar weri Serakúsa péprunam jeamiaji. Nūj menaintiú tsawant pujusarmiaji. ¹³ Tura jíinkir nuyán̄ka nayaantsa ayamach weri Rijiu péprunam jeamiaji. Nūj kanarmiaji. Tura kashin anariá nase

suut umpuunti támiayi. Tuma asamtai nú kashinkia Putiuri péprunam jeamiayi. ¹⁴ Nuĭ jeawakrin Yus-shuar pujuarmia nu, ni jeen juramkimi-aji. Tuma asamtai nuĭn chikichkí tumin̄ pujusmiayi. Tura nuyanka nuñkan Rúmanmaani wémiayi. ¹⁵ Tura Rúmanmaya Yus-shuar, ii jeatniurĭn neka ásar jintiá in̄kiumkantai tusar winiarmiayi. Chíkichkia Apiu pepu támanum táarmiayi, tura chíkichkia, Menaintiu jea tutainium táarmiayi. Nuna káunkan wáiniak Papru shiir enentáimias Yúsan yuminsamiayi.

¹⁶ Tura ii Rúmanam jeawakrin kapitián Juriu achikia yarumman Rúmanmaya uunt kapitiánin ejetimiayi. Túrasha, Pápruka jea ikiamas niisháa pujustí, tiarmiayi. Tura Páprun ísat tusa chikichík suntarnak ni jeen apujtusarmiayi.

Rúmanam Papru Yus-Chichaman etserkamiania nu

¹⁷ Nuyá menaintiú tsawant nan̄kaasmatai Pápruka Rúmanmaya Israer-aentsu pen̄kerĭn untsuk ikiaanak “Yatsurtiram antuktaram. Wisha Israer-áentsun yajauchin pen̄ké túrachmiajai. Tura ii uuntri akupkarmia nunasha yajauch chicharkachmiajai. Tuma aĭn Jerusarēnum winia achirkar Rúmanmaya áentsnum surutkarmiayi. ¹⁸ Tura nu aencha winia anintsar, akupkatai, turutiarmiayi, wisha pen̄ké yajauchin, mantamnamnia tímianu túrachu asamtai. ¹⁹ Túrasha Israer-shuarka “Atsá, akupkairap” turutiarmiayi. Nu tuma asamtai, “antsu uunt akupin nekarati” tímiajai. Wikia wíi shuara tunaarĭn kapitiánin ujaktinian táchaitjai. ²⁰ Tuma asamtai, yatsurtermin, atumin untsukjarme chichastaj tusan. Yusa anaikiamurĭ, Israer-shuarti nákjania nu táwiti wí tu étserkui, juĭ achikiar jin̄kiámu pujajai” tímiayi Papru.

²¹ Tutai niisha tiarmiayi “Íisha Jutía nuñkanmaya aentsti, ame yajauch túramu papí pen̄ké wáinkiachuitji. Tura ii shuar nuyá táarainia nusha “au yajauch túraiti” tu ujatmakcharmaji. ²² Túrasha ashí nuñkanam yamaram chichaman jintinian yajauch chicharainiawai tama antukji. Tuma asamtai amesha nu warintia enentáimtam nekaatai tusar wakeraji” tiarmiayi.

²³ Nú tsawantai iruntrami tiarmia nú tsawant jeamtai, ti untsurĭ aents Papru pujamunam iruntrarmiayi. Papru jintintiainiak Muisais yaunchu aar akupkamia nujai tura chíkich Yúsnan etserniu aarmarĭjĭaisha, Jesus nekas Yusa Anaikiamurĭnti tusa paant jintintiawarmiayi. Nuna tura káshik nan̄kaama Yus akupeamunam pachiinkiatniun étse-étserkua kjarai iniaisamiayi. ²⁴ Tura Pápru táman antukarmia nu, chíkichkia, nekasaiti tusar umikiarmiayi. Tura antsu chíkichkia, nekaschaiti tusar umikcharmiai. ²⁵ Chikichkí enentaikⁱ enentáimsatin atsá asamtai, jin̄ki weartasa pujuarmiayi. Túmainiakui Papru chichaak “Nékasen̄ Yusa Wakanĭ yaunchu Yúsnan etserniu, Isayas naartin áarmarĭjĭai ii úntrin̄ chicharuk juna tímiayi:

²⁶ “Ame weme au aents juĭ titia:

“Ántutka ántakrumsha nekaashtatrumē,

Íitkia iyakrumsha wáinkiashtatrumē.

²⁷ Warí, au shuara enentáĭ katsuarai;

Kuishĭjĭai ántaksha ántichua núnin áiniawai,

Jiisha epetkamua áanin áiniawai,

Iyaksha wáinkiaĭn̄ tusa, ántaksha antukaiĭn̄ tusa

Enentáimkiusha nekaawaiĭn̄ tusa,

Winí uwempraĭn̄ tusa, tura Winí tsuamaraiĭn̄ tusa túrunayi”.

Nuní áarmaiti. ²⁸ Tuma asamtai, nekaatarum. Yamaikia Yusaj uwempratin ana nuna Israer-shuarsha susamuiti. Tura nin̄kia nekas umikiar-tatui” tímiayi. ²⁹ Tura Papru nuna t̄i iniaisamtai Israer-shuar nuamtak núkap chicharnaiyasua wearmiayi.

³⁰ Tura Pápruka nuin̄ jea ikiamsamunam jimiará uwí pujusmiayi. Tura ashí aents nin iyutaj tusa wearmia nuna ni jeen itiaamiayi.

³¹ Tuma asamtai Papru arantutsuk urukuk Yus akupeamunam ati, Uunt Jesukrístu túramur̄incha ashí etserkamiayi. Nútiks̄an̄ etserkatniuncha Páprun penké suritkiacharmiayi.

Papru RÚMANMAYA SHUARAN papí akuptukma

Papru Rúmanmaya Yus-shuaran áatramania nu

¹ Wi Papru Jesukrístu takarniuitjai. Núnisañ Yus achirak ni Shiir Chichamen etserkat tusa akatar akuptukmiayi.

² Nu Chichamun Yus yaunchu “akupkattajai” tímiayi. Núnaka Yúsnan etserin Yus-Papinium paant ujakarmiayi. ³ Nu Chichamnum Yus ni Uchirín áujmatui. Ayashijjainkia Tawit weeanum akiiniamiayi. ⁴ Tura ni tishiir wakanjjainkia Yusa Uchirínti. Tura ti kakarmaiti. Jakamunmaya nantakmiajai nekas Yusa Uchiría nu, paant nekanamiayi. Niisha ii Uuntri Jesukrístuiti. ⁵ Ni túramujai Yus shiir enentáimturuk nu Shiir Chichaman etserkat tusa akuptukmiayi. Núnisañ ashí nunkanmaya shuar nu chichaman umirkar Jesusa náarin shiir awajsarat tusa akuptukmiayi. ⁶ Atumsha nuyá shuaraitrume. Tura Jesukrístunu ajasarat tusa Yus achirmakuitrume.

⁷ Ashí Yus aneamutirmincha Rúmanam matsatrum nuna ju papin áateajrume. Yus ti péñker awajtamsatniun wakerutmarme. Ii Aparí Yussha ii Uuntri Jesukrístusha waitnentramainia ásar imiatkinchanum ti shiir pujustinian yainmakarti.

Papru Ruma péprunam irautinian wakerimiania nu

⁸ Émkasha, átum Yus nekas enentáimtamun ashí nunkanam áujmatenan nekaan Jesukrístun pachisan Yúsan ti shiir yuminsajai. ⁹ Tuke enentáirjai Yusa Uchirín ashí shuarnum etsertajai. Túrakui wi atumin ti Yus aneamutirmincha Rúmanam matsatrum nuna ju papin áateajuke áujtamun Yus nékarui. ¹⁰ Ashí tsawant ni wakerutakuíñkia íitjarum tusan Yúsan sejai. ¹¹ Nekas íitniun wakerajrume. Nui jean wakanmin yainkian Yusjai kanakchamin ajasúk tusan wakerajrume. ¹² Kame atumsha tura wisha Yus nekas enentáimtuinia asar mai ikiakánai ajatai tusan wakerajai.

¹³ Yatsurú, tuke íitjarum tusan wakerimjiarme. Túrasha iyatsjarne. Kame Yus-Chichaman ujaakun chíkich shuarnuma áintsañ atumúincha Yus kakaram takasman wáinkiatniun wakerajai. ¹⁴ Wikia Yus akuptuku asantai ashí shuaran ujákártiniaitjai. Unuimiaruncha tura unuimiarchancha, ti nékainia nunasha tura nékachuncha, métekrak ujakartini-aitjai. ¹⁵ Tuma asan atumniasha Rúmanam pujarmena nunasha Uwempratin Chichaman ujaitjarum tusan pujajai.

Uwempratin Chicham kakarmaiti

¹⁶ Nu Shiir Chicham Yusa kakarmarjjai ti kakaram asa ashí shuaran uwemtikramniaiti. Tuma asantai natsantatsjai. Nekas Israer-shuarnasha tura chíkich shuarnasha núnisañ uwemtikramniaiti. ¹⁷ Nu chichamnum Yus enentáimsamia nu páantaiti. Júiti: Áyatik Yúsan nekas enentáimtuiniakui Yuska “péñkeraitme” tímíniaiti. Yus-Papiniumsha núnisañ tawai: “Yúsan nekas enentáimta nuna Yus “péñkeraitme” tutai tuke Yusjai shiir wekasattawai.” Tu áarmaiti.

Aentsu tunaari

¹⁸ Shuar nekas chichaman nakitrar yajauchin túrataj tusar suriimiainiawai. Túrawar tuke tunaarintin áiniawai. Nu shuaran Yus ti kajerkar ti asutiátniun nayaimpinmaya paant awajsaiti. ¹⁹ Tura nu shuarka ashí Yusna nekaamnia nuna Yus paant awajsa asamtai penker nékainiawai. ²⁰ Kame yámankamtaikniumiá Yus wáinchataitiat ni najanamurijjaj júka paant nekaamniaiti: Nekas Yus asa tuke kakarmaiti. Nusha ti paant asamtai nu shuar tsankurnarchartatui. ²¹ Yúsán nékainiyat shiir awajsharmiyai tura yumínsacharmiyai. Tuma ásar aya ánta nunak enentáimtuiniak ni enentáí tunaajaj piakai. ²² Tura ti nekajaj tuíniyat enentáimcha núnin ajararai. ²³ Túmainiak jákachmin Yus imiá shiira nuna iniaisar shuar jakamnia nakumkamun shiir awajenawai. Tura nu arant nanamtinnisha napincha kuntinnisha yajasmáncha nakumkar nuna shiir awajenawai.

²⁴ Nu asamtai imiá yajauch enentáimiainiakui “áanik asati” túmiyai Yus. Túramtai ti natsanmainian túrunainiawai. ²⁵ Yusna imiá nekasa nuna nakitrar antsu wait-chichaman anturkar nuna túrin áiniawai. Tuke Yúsak shiir awajsatniun iniaisar antsu ni najanamun tikishmatainiak shiir awajenawai. “Antsu tuke Yúsak shiir awajnasti” tajaj.

²⁶ Nuna túrin ásarmatai Yus natsanmainia nuna wakeruktinian tsankatkarmiyai. Túramtai nuwasha áishmanjaj tsanintinian nakitrar nuamtak yajauch awajnainiawai. ²⁷ Núnisan áishmansha nuwajaj tsanintinian iniaisar nuamtak áishmankak tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayashí wáitsatniunak sumamawarmiyai.

²⁸ Tura tuke Yúsán nakitiainia asamtai ti yajauch enentáimiainiak penké túrachminia nuna túrawarti tusa Yus tsankatkarmiyai. ²⁹ Nu shuar ti tunaajaj piaku áiniawai. Tsanirmausha aya kuítniak wakerincha tura yajauch awajin áiniawai. Nu arantcha awakmakun kajerniusha mankartincha tuke máanaincha anankartincha penkercha awajkartincha, tsanumniusha áiniawai. ³⁰ Nu arantcha chikichnasha yajauch áujmatin áiniawai. Yúsnasha nakitiainiawai. Áimniusha áiniawai. Tura “penkeraitjai” tiar nankaamantu enentáimtumainiawai. Tunáa túratniun eainiawai. Aparincha nukuríncha umirainiatsui. ³¹ Enentáincha áiniawai. Tana nuna umichu áiniawai. Anenkartichu ásar waitnenkartichu áiniawai. Tsankurcha áiniawai. ³² Yuska “Shuar nuna túrinkia jákatniuiti” taman nékainiyat tuke túrukin wénawai. Tura nu arantcha chikich yajauch túramtai ti shiir wararenawai.

2

Shuar tunáa túramun Yus paant nékawai

¹ Amsha enentáimtumastá. “Shuar nu yajauchin túrana nu imiá tunáa shuaraiti” tákumka amsha métek túrakum imiá nekas sumame. ² Yuska nu tunaan túrin áinia nuna súmantikiashtinkiait. ³ Amsha nuna túrin “imiá yajauchiiti” táyatam amsha métek túrakminkia Yus sumamtikiattana nuyá ¿itiurak uwemprattam? ⁴ Yus ti waitnentrama asa nu tunáa ikiukim Nin enentáimtustinian katsuntramuk nákarmawai. Tura penker asa wárik asutiámchakui sumamashtinaitjai ¿tu enentáimtumamek? Tu enentáimkium ni waitnentrammarj ántar awajsaitme. ⁵ Tura tunaarum enentáimtutsuk tuke túrakmeka súmantikiatin tsawantaj ti tunáa irutmampramujaj ti asutniáttame. ⁶ Nu tsawantaj ni túramujaj métek Yus ashí shuaran akirartatui. ⁷ Shuar tuke penker túrak

ashí shiira nunasha tura tuke amuukachmin ainia nunasha wakeruini-
ana nuna Yus tuke iwiaaku Niiijai shiir pujustinian sústartatui. ⁸ Antsu
pénkera nuna wakerutsuk antsu aya yajauchin wakeruiniak Yúsan naki-
tiainia nuna Yus ti kajerak asutiáwartatui. ⁹ Nekas Israer-shuarsha
tura núnisan Israer-shuarchasha tunaan túrin áiniakka ti wáitsartatui.
¹⁰ Antsu nekas Israer-shuarnasha tura núnisan Israer-shuarchancha
pénker túrin áinia núnaka Yus ti shiir imiatkinchanum apujstartatui.
¹¹ Yus ashí shuaran akantsuk mai metek iyawai. ¹² Shuar Mui-
sais akupkamun nékatsuk tunaan túraka aya júnisan sumamawartatui.
Tura shuar Muisais akupkamun nékayat tunaan túranka nu akupka-
mujai sumamawartatui. ¹³ Akupkamun aya antukarua nuka Yusai
pénker áiniatsui antsu antukar umirainia nuna Yuska “pénkeraiti” tawai.
¹⁴ Israer-shuarchaka Muisais akupkamun takakainiachkusha aya ni
enentáijiai nu akupkamun umirainiak ¹⁵ nu umireamujai Yus nu akup-
kamun ni enentáin ikiursarua nuka paant nekaamniaiti. Nujai métek
túruiniak shiir enentáimiainiawai. Tura métek túruiniachkunka pénkercha
enentáimiainiawai. ¹⁶ Wi Uwempratin Chichaman étsereaj nu ashí shuar
uukrishá túramun ashí paant awajstartatui. Tura nuna etserkatniun
Jesukristun anaitiukmiayi. Nu tsawantai tunaan túrin sumamawartatui.

Israer-shuarsha Muisais akupkamun umircha áiniawai

¹⁷ Ámeka “Tura Israer-shuaraitjai. Muisais akupkamun takakkui
winia Yúsruka ti shiir enentáimturui, tátsumeash. ¹⁸ Yus wakeramuncha
nékajai. Tura akupkamun nekaan pénkera nuna wakerajai, tátsumeash.
¹⁹ Wakannium kusuraru áinia nunasha jintintiamniaitjai. Tura
tsáapninan nekamtikiawarminiaitjai, tátsumeash. ²⁰ Akupkamu
ti penker neka asan nekasa nuna unuimiaruitjai. Tuma asan
nékachuncha ántuiniachuncha jintintiamniaitjai” tátsumeash. ²¹ Pai,
chíkichka unuiniatmesha ¿urukantai imia ámeka unuimiatsum?
“Kasamkashtiniaiti” tu étsereatsmek. Táyatmesha ¿urukantai ámeka
kasamam? ²² “Tsanirmashtiniaiti” tátsumek. Enta, ¿urukantai
ámeka tsanirmam? “Ántar-yusan nakitijai” tátsumek. ¿Urukantai
ámeka nu yusa jeenia kasamam? ²³ Akupkamun takakjai tusam
shiir enentáimtumayatam nu akupkamu umireachkum Yus yajauch
awajeatsmek. ²⁴ Yus-Papiniumsha núnis áarmaiti: “Átum pénker
umirchamujai Israer-shuarcha Yúsan yajauch chicharainiawai.”

²⁵ Muisais akupkamia nu ashí umireakmeka nii timia núnismek
tsupirnaktin pénkeraiti. Tura takamtsuk umireachkumka tsupirnakcha
núnisketme. ²⁶ Chíkich shuarsha tsupirnakchaitiat Muisais akupkamun
umireakka tsupirnaksha tsupirnakua áintsanquete. ²⁷ Nu shuar
tsupirnakchaitiat akupkamun ashí umireak atumin tsupirnakutirmin
akupkamu takakuitiatrum umircha asakrumin súmamtikramawartatui.
²⁸⁻²⁹ Kame nekas Israer-shuarka aya pátatkechu antsu tuke
enentáijiai Yúsnan wakera núiti. Núnisan nekas tsupirnaktkia aya
ayashjiainchuiti antsu enentáiniam shiir átinia núiti. Nekas akupkamu
aya áarchamuiti antsu nekas enentáijiai umirkamua núiti. Nekas tú tura
núnaka aents shiir enentáimtuiniachkuisha Yus shiir enentáimtai.

3

¹ Núnis aisha Israer-shuar ainia nu ¿warí pénkernak takakainia? Tura
tsupirnaktkincha ¿wariniak yayá? ² Tí pénkeraiti. Warí, émkaka, Yus ni

chichamen Israer-shuaran súsacharmakia. ³ Kame chíkich chíkich umichu áiniakui Yus tsan̄katkamia nuna nú shuaran súsachmatain̄kia nuikia “Yus umichuiti” ¿títinkiait? ⁴ Pén̄kea. Antsu Yuska nekas túratniua nujai métek ashí túriniaiti. Shuar umichu áiniakuisha ni támarin̄ mash umiktatui. Ni tamajai shuáran wáitrin̄ awajeakka nusha péñkeraiti. Núnisan̄ atí. Yus-Papisha métek tawai:

“Támena nuna “imiá nekasaiti” tiartatui, tura súmamtikramataj tuíniakuisha nupetmaktatme” tawai.

⁵ Nu arantcha, “Wi tunaan túramujai Yus imiá péñkera nuna paant awajeakka ¿urukantai winia asutiua? ¿Nuka péñkerkait?” tíchatapash. (Kame aents chichainia núnisnak tajai.) ⁶ Warí, Yus péñkerchaitkiun̄ka ¿itiurak ashí shuara tunaar̄in súmamtikiawarat? Kame imiá péñkeraiti.

⁷ Núnisan̄, “Wi umirkachmajai Yus tuke umiiniana nuna paant awajeakna nuikia nujai in shiir awajsamta ¿urukantai “tunaitme” túruta?” tíchatapash. ⁸ Warí, “tunáa túramujai Yúsan péñker awajeajai,” tú nekas enentáimpramniatkiuin̄kia shuar nuik̄ia “Wats, ashí péñker áti tusar tunáa túratai” t̄imin̄ ainti. Kame chíkich shuar in kajertamainiak “nuna jintinti-ainiawai” túramji. Nu shuar sumamawartin̄ áiniawai.

Ashí shuar tunáa túraitji

⁹ Nuikia Israer-shuartikia chikichjai nan̄kaamas ¿péñkerkaitiaij? Peñkesh̄a. Warí, Israer-shuartisha Israer-shuarchajaīsha ashí métekrak tunaan túrin̄ áiniawai. Núnaka jú áarmajai paant awajsaitjai. ¹⁰ Yus-Papisha núnisan̄ tawai:

“Péñkeran túrin̄ chikichkisha atsawai.

¹¹ Yúsnan nekaatniun̄ nakitiainiawai. Yusnasha eainiatsui.

¹² Yusnumia kanakiar men̄katatniunam wénawai. Chikichkisha péñkeran túrin̄ pen̄ké atsawai.

¹³ Ashí yajauch chichainiak iwiarsamu yama urainiua núnisan̄ áiniawai. Ni chichamejaī tuke anan̄kartin̄ áiniawai. Chichame napia áintsan̄ najamin̄ áiniawai.

¹⁴ Aya yajauchin kakaram áujmatin̄ áiniawai.

¹⁵ Máataj tusa wárik yujarin̄ áiniawai.

¹⁶ Aya ti itiurchat ti yajauch awajin̄ áiniawai.

¹⁷ Shiir pujustinian̄ nékainiatsui.

¹⁸ Ishichkisha Yúsan ashamenatsui.”

¹⁹ Yaunchu akupkamun̄ umirkatin̄ ainia nú shuar aya tákamtak umirkatin̄ áiniawai. Tuma asamtai ashí shuar umirkachu áarmatai Yus nujai súmamtikiawartatui. Túrakui niisha pachischamin̄ áiniawai. ²⁰ Akupkamuka aya ii tunaar̄in̄ paant awajturmajai. Tuma asamtai akupkamu péñker umirkatniujai Yus “péñkeraitme” turamchamniatji.

Aya Yus shiir enentáimtusar uwempramniatji

²¹ Yus-Chicham yaunchu áarmanum itiura Yus in “péñkeraitme” túramminiaitaī nuna paant tawai. Kame akupkamujain̄chuiti. ²² Antsu iisha ashí shuarsha núnisan̄ aya Jesukristu shiir enentáimtakrin̄ Yus “péñkeraitme” túramminiaitji. ²³ Kame ashí shuarti tunáa túraitji. Tuma asar Yusjaī métek péñker ajastin̄ pen̄ké jeatsji. ²⁴ Tura Yus in waitnentrama asa kuifchajaī “péñkeraitme” túramji. Jesukristujaī uwemtikrampra asa túramji. ²⁵ Tura Kristun̄ akupkamiayi ni jakamujaī ashí tunaan asakátratniun̄. Túramtai shuar Nin̄ nekas

enentáimtuiniakui Yus tsan̄kuramniaiti. Yaunchu tunáa túramun katsunteak enentáimtuschamiayi. Yamái tsan̄kuramnia nuna yaunchu nekáa, nuna túramniuyayi. ²⁶ Tura yamaii tunaancha tsan̄kureak ashí shuar Jesusan nekas enentáimtuinia nuna “pénkeraitme” tuke tíminiaiti. Kristu jakamujai nuka paant ajasai.

²⁷ Nújainkia ii péñker ajasjinia nu “winia kakarmarjai túrunajai” tíchamnia asar ¿nan̄kaamantu enentáimtumarminkaitiaj? Penkesha. Warí, akupkamu umitsuk aya Kristu nekas enentáimtakrin Yus “pénkeraitme” túramji. ²⁸ Nujai páantaiti. Akupkamu umirtsuk aya Jesukrístu shiir enentáimtakrin Yus “pénkeraitme” túramminiaitji.

²⁹ Warí, Yuska Israer-shuarnasha tura núnisan Israer-shuarchancha mai ni Yúsriñchukait. ³⁰ Kame aya chikichik Yúschakait. Tura tsupirnakuncha tsupirnakchancha mai metek aya Jesukrístun nekas enentáimtuiniakui “pénkeraitme” tíminiaiti. ³¹ Shuar Yúsan shiir enentáimtamujai péñker ajastin áiniakui nujai ¿akupkamu ántar awajsamukait? Atsá. Antsu nuna nan̄kaamas umirkatin awajsamuiti.

4

Apraámsha Yúsan shiir enentáimtamujai péñker ajasmania nu

¹ Ashí Israer-shuara uuntri Apraám enentáimtustai. Niisha ¿itiurak Yusjai péñker ajasma? ²⁻³ Ni péñker takasmajai Yusjai péñker ajasuitkiun̄ka nan̄kaamantu enentáimtumarainti. Antsu Yus-Papí tawai: “Apraám Yúsan shiir enentáimtakui Yus “pénkeraitme” tímiayi” tawai. Nu túramu asa Apraámsha Yus ímmianum nan̄kaamantu enentáimprachminiaiti. ⁴ Shuar íniamna nu takasmatai ¿aya tsan̄ka asam akiktatmek? Warí, ni takasmanum páchitsuk akikchatniukait. ⁵ Antsu shuar ni péñker turamuri enentáimtsuk áyatik “Yus tunáa shuaran péñker awajniuiti” tu enentáimtakui Yuska tsan̄ka asa “pénkeraitme” tawai. ⁶ Tura péñker túrachunak Yus “pénkeraitme” takui nu shuar shiir warasminiaiti. Núnisan̄ tawai uunt akupin Tawit:

⁷ “Shuar ashí ni tunaarjin Yus asakátar tsan̄kuramu ana nuka shiir enentáimpramniaiti.

⁸ Uunt Yus ni tunaarjin enentáimtachma asa ti warasminiaiti.” Tu tímiayi Tawit.

⁹ ¿Aya tsupirnakukeash warasminiait? Tura tsupirnakchasha waraschamniakait. Warí, Apraám Yúsan shiir enentáimtakui Yus “pénkeraitme” tímiayi. ¹⁰ Tura Apraám tuke tsupirnat̄sain̄ Yus nuna tímiayi. Emka Yus “pénkeraitme” timia nú ukunam Apraám tsupirnakmiayi. ¹¹ Apraám tsupirnat̄suk Yúsan shiir enentáimtusmatai Yus “pénkeraitme” tusa “tsupirnak̄tiniaitme” tímiayi. Nújainkia ashí Yúsan shiir enentáimtuinia nú shuar tsupirnat̄skesha Apraám weeá ániawai. Tura nu shuaran Yus “pénkeraitme” tawai. ¹² Tsupirnakusha aya tsupirnak̄u asa Apraám weeá ániatsui antsu nu arant Apraámjai métek Yúsan shiir enentáimtuinia nuka Apraám weeá ániawai. Kame Apraám tuke tsupirnat̄suk Yúsan shiir enentáimtusmiayi.

Yus shiir enentáimtamujai Nii timia nu uminkiattawai

¹³ Yaunchu Apraáman Yus chicharuk “Amincha amée weeá shuar-nasha jú nun̄kan susattajai” tímiayi. Nunasha Apraám Yus akupkamun umireakui tíchamiayi. Antsu Apraám Yúsan nekas enentáimtakui Yus “pénkeraitme” taku nuna tsan̄katkamiayi. ¹⁴ Kame aya akupkamun

umirniun súsatniutkiuñkia nuikia Yus enentáimtustin ántraiti. Tura Yus Apraáman timia nusha ántraiti. ¹⁵ Akupkamu akui shuar umirkachka ti asutniáshtatuak. Tura atsakuñkia ¿asutniátniukait? ¿Itiurak umirtsuk ikiuqtñ?

¹⁶ Tuma asamtai Yus ti anenkartin asa Nin nekas enentáimtuinian ashí tsankatkaiti. Nújainkia Apraám weeasha Yus Apraáman timia nuna páchtsuk wáinkiártatui. Iisha Apraámjaj métek Yus nekas enentáimtakur ní weeaitji. Tuma asamtai Muisais akupkamun umirniuncha tura umirniuchuncha mai metek ashí in Yus ashí Apraáman timia nuna tsankatramkattaji. ¹⁷ Kame Yus-Papinium Apraám áatramuuti: “Untsurí shuarsha amée weeá ajasartatui.” Nu asamtai iisha Apraámjaj métek Yus shiir enentáimtakrinkia Yus incha Apraám weeá áintsan íirmaji. Nú Yuska ti kakaram asa jakancha iwiaaku awajniuiti; tura atsana nunasha ana nútksan nájanui.

¹⁸ Yus “ti pampanatme” takui Apraám ti uuntach áyat Yus timian enentáimtak yajutmartinian nákasmiayi. Nujaj untsurí shuar ní weeá ajasarmiayi, Yus timia áintsan. ¹⁹⁻²⁰ Apraámsha sian (100) uwí takakuiat tura ni nuwé Sarasha júretsuk uunt ajasmataisha tuke iniaitsuk Yus tímia nuna nekas enentáimtusmiayi. “Yus nekasash ta” tútsuk shiir awajsamiai. Nujajsha nuna nankaamas kakaram ajasmiayi. ²¹ Tuma asa “nekas Yus tana nuna páchtsuk umiktatui” tu enentáimpramiayi. ²² Nu asamtai Yus “pénkeraitme” tímiayi.

²³ Tura Yus nekas enentáimtamunam Yus “pénkeraitme” tana nu aya Apraámnak áatrachmaiti. ²⁴⁻²⁵ Antsu incha túramji. Iisha núnisrik ii Uuntri Jesús nekas enentáimtakrinkia Yus incha “pénkeraitme” turamtatji. Jesuska ii tunaarin jarutramkatniun surunkamiayi. Tura nujaj Yus in “pénkeraitrume” taku Jesusan ataksha iniantkimiayi.

5

Yus “pénkeraitme” túramkurin shíiraiti

¹ Tuma asamtai Yus nekas enentáimtakrin Yus “pénkeraitme” túramji. Nujaj iisha Yusjaj shiir nawamnaikiar pujaji. Núnaka ii Uuntri Jesukrístu ni jakamujaj sumartamkamiayi. ² Tura Nii shiir enentáimtakur Yusaj weankaitji. Tura Kristu jarutramkakin Yus ti anenmaji. Tura tuke anenma asakrin Niijjaj métek shiir ajastin nákakur waraaji. ³ Nu arantcha yamá ititurchat pujayatrik nu ititurchatjaj unuimiartatji tusar waraaji. Katsuntratniuncha unuitiamji. ⁴ Tura nu unuimiarar ii katsuntram paant átatui. Tura nuyá Yus ti shiir awajtamsattajnia nuka shiir enentáijjaj nákastatji. ⁵ Nu ti shiir enentáimsar nákamujaj ananmamtsuji. Yuska ni Shiir Wakanin ii enentáin pujurtamuk ni anenkartutairin ti paant awajturmajji. Tuma asamtai Yus túratin nákaajnia nu imiá nekas wainkiattaji.

⁶ Iikkia penké uwemprachmin asakrin tsawant jeamtai Kristu ashí shuara tunaarin jarukmiayi. ⁷ Shuar chíkich shuaran uwemtikratniun ¿jaruktatuak? Péñker shuar ain jarukchattawai. Kame ti penkeraitkiuñkia jarukchaintiash. ⁸ Antsu ii tuke tunáa árinin Kristu jarutramkamiayi. Nujaj in ti anenmajnia nuna ti paant iniakturmajji. ⁹ Tura ni numpejjaj tunaarincha awajsamu asar imiá nekas Yus asutiámatniua nuyá uwempraitji. ¹⁰ Yusa nemasri áyatar Yusa Uchirí jakamujaj yamaikia Yusjaj shiir nawamnaikiar pujaji.

Nu arant nuǵkia Kristu tuke iwiaaku asa iijjaj tsaniñkiu asa ashí yajauchinmayá uwemtikramar tuke shiir awajtamsattaji. ¹¹ Ii Uuntrj Jesukrístu jakamujaj Yusjaj shiir nawamnaikia asar ti waraaji.

Ataᅇsha tura Krístusha túrawarma

¹² Ayu. Yámankamtaik emka áishmaᅇ Ataᅇ niᅇki tunaan túramtai nú tunaajaj ashí shuar tunaarintin ajasarmiayi. Tura ashí tunaarintin ajasar mash jákatin áiniawai. ¹³ Akupkamu atsakuñkia umirkachma nekaachminiaiti. Tuma aiᅇ Muisais akupkamu atsaisha tuke tunaan túrin ármiai. ¹⁴ Ataᅇ pujumia nuyá Muisais tuke akupeatsaiᅇ shuara tunaari paantcha aiᅇ ashí shuar tunaan túrawar jákarmiayi. Kame ni tunaari Ataᅇna áintsachauyayi. Ataᅇka Yus akupkamu paant ujakman umirkachmiayi. Antsu nu shuar Yus akupkamu paant nekainiachiataᅇ tunaan túrin áiniak jákarmiayi. Tura Ataᅇka Krístujaj apatkar enentáimpratai.

¹⁵ Ataᅇ tunáa túramia nujaj apatka iisam, Yus in tsankatramaj nuka nankaamas péᅇkeraiti. Kame Ataᅇ niᅇki tunaan túramujaj ashí aents untsurj armia nu, tunaarintin áiniak, jákarmiayi. Tura Yus in ti anenma asa chikichik áishmaᅇnjjaj nuna nankaamas tí shiiran tsankatramaji. Jesukrístujajñkia untsurj shuaran uwemtikrar ti shiiran tsankateawai.

¹⁶ Ataᅇka tunaari imiá yajauch aiᅇ nuna nankaamas péᅇkeran Yus tsankatramkaitji. Iis, aya chikichik tunaan túramujaj aents sumamawarmiayi. Antsu Yus uwempratniun tsankatramaj nújjajñkia ti untsurj tunaan asakáruiti, tura “péᅇkeraitme” túramji. ¹⁷ Chikichik áishmaᅇnjjaj tunaan túramujaj aents jákatin áiniawai. Tura nuna nankaamas chikichik áishmaᅇnjjaj Jesukrístu túramujaj ti shiir pujustatji. Kame Yus ti anenma asa ii péᅇker túratsriniᅇ “péᅇkeraitrume” túramji. Nu asamtai yamaram iwiaakmanum kakaram ajaji.

¹⁸ Ataᅇ tunaan túramujaj ashí tunaarintin ajasar jákarmiayi. Núnisaᅇ Jesukrístu péᅇker túramujaj ashí shuar Yus “péᅇkeraitme” timia nuka yamaram iwiaakmajaj tuke pujusartatui. ¹⁹ Núnisaᅇn chikichik áishmaᅇnjjaj umirkachmajaj untsurj tunaarintin ajasarmiayi. Tura chikichik áishmaᅇnjjaj umirkamujaj untsurj shuar péᅇker awajnasarmiayi.

²⁰ Wats, tunáa ti paant atí tusa Yus ni akupkamurjñ susamiayi. Túrasha ti tunáa pampaakui Yus nuna nankaamas waitnentramak nu tunaan asakátramji. ²¹ Shuar tunaan túrin ásar jákatin ármiai. Tura núnisaᅇn ii Uuntrj Jesukrístu túramujaj Yus in “péᅇkeraitrume” túramkurin iisha tuke iwiaaku pujustiniaitji.

6

Krístujaj jaka asar tunáa túrachminiaitji tura Krístujaj tsaniñkiu asar iwiaakuitji

¹ Núnisaitkiuñkia Yus nankaamas waitnentrampratai tusar ¿tunáa túrattajik? ² Péᅇkea. Warí, iikia tunáa túrashtin jákaitji. Jáka ¿itiurak tunaan túramniat? ³ Imianniutikia Krístujaj tsaniñkiu asar imianir Niijjaj métek jaka áintsar aji. ⁴ Tura imianir Krístujaj jaka áintsar métek iwiarناسuitji. Tura Yus ti kakaram asa Krístun jakan iniantkimia núnisaᅇn incha nu kakarmajaj yamaram enentáijjaj péᅇker wekasatniun iniantamkimi-aji.

⁵ Krístujaj tsaniñkiu asar Niijjaj métek jaka áintsanketji. Tura núnisaᅇn Niijjaj métek nantaktiniaitji. ⁶ Yaunchu enentáimtañkia Krístujaj métek

jaka asamtai ii yajauch wakerutain emen^kátrutmakuitji. Tuma asamtai yamaikia pen^{ké} umirkashtiniaitji. ⁷ Kame [¿]jákaka itiurak tunaan túrat? Yamaikia an^{kant} ajasuitji. ⁸ Iisha nekas Krístujai jákai^tkiurkia Niijjai métek tuke iwiaaku pujustin enentáimji. ⁹ Kame Krístuka chikichki jaka nantakin asa atakka jákashtatui. Túmaitkiui atakka ajakrachminiaiti. ¹⁰ Kristu chikichki jaka asa ashí tunaajai itit awajsachmin ajasuíti. Tura yamaikia iwiaaku pujá asa Yúsan shiir awajsatniun pujawai. ¹¹ Atumsha núnisrumek jaka áintsarum tunáa túrachmin enentáimtumastarum. Antsu ii Uuntri Jesukrístujai tsaniñkiu asarum iwiaaku pujakrum Yus shiir awajsatarum.

¹² Nu asamtai tunaaka ayashmijn akuptamkashtiniaitume. Ayashí wakeramuri umirkashtiniaitume. An^{kant}aitume. ¹³ Atumi ayashí tunaan túrat tusarum ikiasairap. Antsu jakamunmayá nantakin asarum Yus wakeramu túratin surumaktarum. Tura ayashmisha aya péⁿkernak túratí tusarum Yus íktustarum. ¹⁴ Akupkamu umirkatniujai iwiaaku pujatsrumek. Antsu atumin Yus ti anenma asa yamaram iwiaakman suramsaitume. Tuma asamtai yamaikia tunaaka nupettamkachminiaiti.

Tuke umireajnia nuna takarniurintji

¹⁵ Nuikia akupkamu umirtsuk antsu Yus ti anenma asakrin iwiaaku pujakur ¿“Páchitsuk tunaan túramniaitjai” títiatjik? Péⁿkea. ¹⁶ Tuke umireajnia nuna takarniurintji. Nuka nékatsrumek. Tura ni takarin ajasam umirkatniuitme. Tuma asamtai tunáa umirkurkia ni takarniurintji tura umirkar jakattaji. Tura Yus umirkurkia péⁿker wekasattaji. ¹⁷ Atumsha yáunchuka tunáa umirniuitiatrum ikiukrum yamaikia nekas chicham antukurmena nu nekas atumi enentáijjai umirkaitume. Tuma asamtai Yus ti yumiñsatniuiti. ¹⁸ Yamaikia tunaanumiá an^{kant} ajasu asarum ti péⁿker wekasatniunam pachiinkiaitume. ¹⁹ Paant nekaak tusan takarniun pachisan tájarme. Wats, yaunchu atumi ayashí muj^jmiainian tura ashí yajauchin túrat tusarum tsan^kamakmarme. Núnisrumek yamaikia atumi ayashí péⁿkeran túrat tusarum tura tuke Yusjai shiir wekasat tusarum tsan^kamaktarum. ²⁰ Atumsha tunáa umirniuyarme nuikia péⁿker wekaichauyarme. ²¹ Tura nújajsha ¿warí péⁿkerna yáinmakmarum? Iista, yamá natsanmainchakait. Nusha jákatniunam júawai. ²² Antsu yamaikia, tunaanumiá uwempra asarum Yus umirniuitume. Antsu júka Yusjai shiir wekasatniunam júawai tura nuyá tuke iwiaaku pujustatume. ²³ Tunáa takarkumka tuke jákatniun akirmaktatui. Antsu Yuska iikia takaatsriniñ pen^{ké} ántar tuke iwiaaku pujustinian suramsattaji. Ii Uuntri Jesukrístujai tsaniñkia pujá asakrin nuna túrutmattaji.

7

Akupkamujai an^{kant}aitji

¹ Enentáimpratarum yatsuru. Jáka akupkachminiaiti. Aya iwiaakna nu akupkamniaiti. Nu paant nékatsrumek. ² Wats, nuwá nuátkamu ni aishri iwiaakkui niijjai tsaniñ pujustiniaiti. Tura aishri jakamtai an^{kant} ajawai. ³ Tuma asamtai aishri iwiaakain chikich áishmanjai tsaniakka tsanirmawai. Tura ni aishri jakamtai chikich áishmanjai páchitsuk nuatnakminiaiti tura nuikia tsanirmatsui.

4 Núnisrumek atumsha, yatsuru, Kristu ayashí muchitmarí ajasu asarum akupkamu emettachmin jaka áintsarum ajasuitrume. Túrakrum Krístujai nuatnaikiatin áintsarum ankantaitrume. Niisha jakamunmaya nantakniuiti. Yamaikia Krístunu ajasu asar Niijjai tsaniñkiar Yus wakeramu péñker túratniuitji. 5 Yaunchu wakerutai umirniuyaj nuí akupkamu enentáimtusar nuna nankaamas yajauchia nu wakerimji tura jákatniunam juramkimji. 6 Antsu yamaikia akupkamu emettachmin jaka asar ankant ajasuitji. Túrunar akupkamu yaunchu áarma nu ini-aisar yamaikia Yusa Wakaníjjai tsaniákur yamaram iwiaakmajai péñker wekasamniaitji.

Winia enentáirui tunáa ana nu

7 Núnisaitkiuinikia “Akupkamu yajauchiiti” ¿titiajiash? Atsá. Warí, akupkamuka tunaan ti paant awajeawai. Akupkamu “Chikichna wakerukaip” táchakuinikia wakerukchajai. 8 Tura nu akupkamun enentáimtakui winia enentáirui tunáa ana nu ashí yajauchin ti wakerumtikrimiayi. Kame akupkamu atsakui tunaan ti enentáimtichaintjai. 9 Yaunchu akupkamun nékachkun náñkamsanak enentáimniuyajai. Tura akupkamun nekaan tunaan nekaamjai tura jaka áintsanak ajasjai. 10 Tuma asamtai akupkamujai péñker wekasatniuitiatan umirkatniun tujintiakui aya jákatniunam jurukni. 11 Kame tunáa wakerutainkia nu akupkamujai anañkrua péñker iwiaaku pujustinian surutsuk nu akupkamujai jákatniunam jurukmiayi.

12 Tuma asamtai akupkamuka Yusna asa ti peñkeraiti. Yajauchichuiti. 13 Nuikia ¿péñkera nu jákatniunam júrawak? Atsá. Antsu tunáa wakeruktin jákatniunam jurukmiayi. Nuna tura asa tunáa imiá yajauchia nu nekaamniaiti. Tura tunáa wakerutai péñker akupkamujai jákatniunam jurukmiatai, nujai Yus “tunáa wakerutai imiá yajauchiiti” tusa paant awajsamiayi. 14 Akupkamuka Yúsnaiti. Nu paant nékaji. Antsu wikia ayashna nuna wakerakun tunaan umireajai. 15 Kame túrajna nuna itiurchat enentáimtajai. Péñker túratniun wakeraj nuna túratsjai. Antsu nakitiaj nuna nekaska túriniaitjai. 16 Akupkamu péñkeran nekaan umirkatniun wakerajai. Túrayatnak umirchaitjai. 17 Tuma asamtai wíchaitjai tunaan wakerakun túrajna nuka. Antsu winia enentáirui tunáa wakerutai pujá asa nu túrumtikriniaiti. 18 Yaunchu enentáimtai winia enentáirui pujana nu penké yajauchiiti. Nuna ti paant nékaji. Tuma asamtai péñker túratniun wakerayatnak penké tujintiajai. 19 Péñker túratniun wakerayatnak túratsjai. Antsu tunaan nakitiaj nuna túrajai. 20 Nu asamtai nakitiaj nuna túrakun wíchaitjai antsu winia enentáirui tunáa wakerutai pujana nu túriniaiti.

21 Júnisaiti. Péñker túratniun wakerakun aya tunaan ínkiuajai. 22 Nekas enentáijjai Yusa akupkamurin wakerajai. 23 Tumaj yaunchu enentáimtai winia enentáirui pujurtak nupettawai tura nekas wakeraj nuna akirturui.

24 Maa, ti waitiajai. Jú ayash wakeramujai jákatniunmaya ¿yaki uwemtikrurat? 25 Yuska ii Uuntrí Jesukrístujai túrutmamniaitji. Tuma asamtai Yúsan ti yumínkijajai. Ayu. Winia enentáirjai Yus akupkamun umirniuitjai. Antsu winia ayashrujai tunaan umireajai.

8

Yusa Wakaníjjai péñker wekasatin

¹ Jesukrístujaj tsanínkiarun Yuska “tunaan túrawar jákatniunam wémin áiniawai” tatsui. Nu shuar ni ayashí wakerana nuna umirtsuk Yusa Wakaní wakerana nuna umirainiawai. ² Jesukrístujaj tsanínkiu asakrin Yusa Wakaní nekas iwiaaku awajtamaitji. Tuma asamtai tunáa túratniunmaya tura jákatniunmayasha ankant ajasuitji. ³ Ayash wakerutainkia, wi akupkamun enentáimtakui, nuna nankaamas tunaan wakerumtikrimiayi. Tuma asamtai akupkamuka yáinkiachminiuyi. Antsu akupkamu tujinkiamia nuna Yus túraiti. Ni Uchirín ayashtin awajas tunaan jarukat tusa akupkamiayi. Tura nujaj ayash tunáa wakeramun nupetkamiayi. ⁴ Túramtai ii yamaikia ayash wakerana nu umirtsuk tura Yusa Wakaní wakeramu túrar akupkamu tana nu umirniuitji. ⁵ Ayash wakeramun umirainia nu, ayashnia nunak enentáimtuiniawai. Antsu Yusa Wakaní wakeramun páchinia nuka Yúsnan enentáimtuiniawai. ⁶ Ayashnia nuna enentáimtuinia nú shuar jákatniunam wénawai. Antsu Yúsnan enentáimtuinia nuka Yusjaj shiir nawamnaikiar tuke pujusartatui. ⁷ Aya ayash wakeramun enentáimtuinia nú shuar Yusa nemasrí áiniawai. Yus akupeamun nakitiainia ásar ni taman umirkatniun penké jeainiatsui. ⁸ Tuma asamtai shuar ni ayashí wakeramurj warareakka Yúsan shiir awajsachminiaiti.

⁹ Tura átumka ayash wakeramu umirtsuk tura Yusa Wakaní pujurtamkurmin ni wakeramu enentáimtiniaitruime. Ashí shuar Krísturtin ainia nu ni Wakanin takaku áiniawai. Takakchaitkiunka nuikia Krístunuchuiti. ¹⁰ Tura Kristu atumin pujurtamkurminkia atumí ayashí tunaajaj jakamnia ain Yus “pénkeraitme” túramu asamtai atumí wakanínkia nekas tuke iwiaakuuti. ¹¹ Yus Jesukrístun jakan iniantkimiayi. Tuma asamtai ni Wakaní atumí enentáin pujurtamkurminkia Jesusan iniantkimia núnisanu nu Wakanjaj yamaram iwiaakmajaj iniantamkittiarne.

¹² Tuma asamtai, yatsuru, ayash wakeramu penké umirkashtiniaitji. ¹³ Ayash wakeramu umirniuitkiurmeka jakattarme. Antsu Yusa Wakaní pujurtamkurmin ayash wakeramu nupetkarmeka pénger wekasarum nekas iwiaaku áatrume.

¹⁴ Ashí shuar Yusa Wakaní timiajaj métek wekainia nu, nu shuar nekas Yusa uchirinti. ¹⁵ Yusa Wakaní in pujurtamkurin Yusa uchirí ajasar sapijmiatsuk Yusaj weamkar “Aparú” tímimniaitji. ¹⁶ Nu Wakan “nekas Yusa uchirínme” ii enentáin túramji. ¹⁷ Tura ni uchirí ajasu asakrin Yus tímia núnisanu ashí Niiniun suramsattaji. Krístun ashí susattana núnisanu incha suramsattaji. Yamái Krístunu takaakur wátiakrikia ukunam Krístujaj métek ti shiir awajnastatji.

¹⁸ Maa, yamá ti wátiakrishna ukunmanka nayaimpiniam ti shiir pujakur nu wáitsamu kajinmatkittiaji. ¹⁹ Tsawant jeamtai Yus ashí ni shuarin Niijaj métek ti shiir awajsartatui. Nuin nekas Yusa uchirí ainia nu ti paant nekanattawai. Nu tsawantan wáinkiatniun ashí Yus najanamu íranna nu ti nákiniawai. ²⁰ Ashí Yus najanamia nuna yámankamtaik ti pénger najanamiayi. Túrasha yajauch ajasmiayi. Nusha ní neaskeka túrunachmiayi. Antsu Yus ukunam ataksha iwiarnartin atí tusa tunáa wayamunam yajauch ajasat tusa tsankatkamiayi. Tuma asamtai iwiarnartin tsawantan nákwai. ²¹ Nu tsawantaj ashí Yus najanamu emesnartinniumiá uwemprartatui. Tura ashí Yus najanamuka

shuar Yusa uchirí ajasarua nujai métek shiir awajnasar ankant ajasar-tatui. ²² Yamaisha ashí Yus najanamu ainia nu, nuwá jatema wáitia nunis ti wáitiainiawai. ²³ Yus najanamuka ashí wáitiainiawai. Iisha Yusa Wakaní takakiatar ti wáitiaji. Tura Yusa Wakaní takakkur ashí Yus suramsattajnia nu nékaji achiktin. Tuma asar nekas Yusa uchirí paant awajnastin tsawant nákaji. Nuisha ii ayashísha ankant awajnastatui. ²⁴ Nu tuke enentáimtuki wéakur takamtsuk uwemprattaji. Yamái nu wáinchiatar tuke nákaji. Warí, ¿wáinjinia nu nákajik? ²⁵ Tuma asar tuke waincha asar katsuntrar nákaji.

²⁶ Nu arantcha ii kakarmachu nekapeakrin Yusa Wakaní yáinmaji. Kame Yus áujsatniusha nékachkurin in yáinmaji. ¿Warí seattaji tura itiur seatjik? Nu nékatsji. Tura itiurchat pujakur ti wáitiakrincha Yusa Wakaní in áujturmajji. ²⁷ Tura Yus ii enentáin enentáimtaj nuna nékai. Tuma asa ni shuari asakrin ni Wakaní ni wakeramujai métek seatramkurin ántawai.

Ti nupetmakuitji

²⁸ Yus anea asakrin ashí nankaatamjinia nujai Yus pujurtamji. Tura nujai péñker awajtamji. Nu paant nékaji. Tura Ni wakerimia núnisan Ní shuar awajtamaitji. ²⁹ Yámankamtaiknumia in nekarmak ni Uchirí Jesukristujai métek ajasat tusa achirmakmiaji. Nujai Yusa uchirí untsurí ajasji. Tura Kristu ii iwiajrinti. ³⁰ Tura Yus achikmia nuna Niiniu awajsamiai. Tura nu shuaran “pénkeraitrume” tímiyai. Tura ti shiir awajsamiai.

³¹ Wats, nuikia Yus in yáinmakrin ¿yaki in nupettamkattaji? ³² Ni Uchiríncha suritrakchamiaji antsu in jarutramkat tusa akupturmakmiaji. Tura asa ni Uchiríjia métek ti shiira nuna ashí suramsash-tatjik. ³³ Yus achikmia nú shuaran ¿yaki sumamtkiat? Yus Ápaka “pénkeraitrume” tiniu asa penké túrashtatui. ³⁴ Tura ¿yaki “jiniun apenáti” titi? Warí, Kristu penké túrashtatui. Antsu nu shuaran jarukmiaji. Tura nantaki Yusa untsuuriñ ekemas in áujturmajji. ³⁵ Kristu ti anenma asakrin in akantamkitin atsawai. Wáitiakrisha, itiur-chat ínkiuakrisha, shuar áintramkurnisha, tsukamakrisha, entsatai at-sakuisha, tsúumainjaisha, tura mantamnakrisha, nujai “Kristu anentsui” tíchamniaitji. Nuka Kristu anenkrattairiya akantamkitin jeatsui. ³⁶ Yus-Papniumsha júnis áarmaiti:

“Amée-shuar asar tuke mantamnatin pujaji. Murik máatniua áintsan enentáimturmajji.”

Tu áarmaiti.

³⁷ Tuma aín Kristu in anenma asakrin Niijia ti nupetmakuitji. ³⁸ Kristu anenkrattairiya akantamkitin penké atsawai. Nuna ti paant nékajai. Jákatniusha, iwiaakmasha, nayaimpinmaya suntarsha, ashí nayaimpin-masha tura nunkanmasha akupin ainia nusha, yamá írunna nusha, ukunam átatna nusha, ³⁹ yaki írunna nusha, nunká írunna nusha, kame ashí Yus najanmu írunna nusha Yusa anenkrattairiya penké akantam-kichminiaitji. Yusa anenkrattajsha ii Uuntri Jesukristu túrunamujai paant wainji.

9

Yus Israer-shuaran ni shuari arti tusa achikiarmiania nu

¹ Yamái tájana nu Kristu shuari asan imiá nekasn wáitnutsuk tájai. Winia enentáirsha tura Yusa Wakanísha “nekas tawai” turutainiawai. ² Israer-shuaran waitnentakun ti kuntuts enentáimjai. ³ Wíishuar ániakui Kristunmaya kanakin yumiñnaraintjai nujai wíishuaran yáimniaitkiunka. ⁴ Israer weeá shuar ániawai. Tura ni uchiría áinis Yus achikiaruiti. Yusa wincharísha niijjai pujumiayi. Yaunchu Chicham ni weatríjjai iwiaramuncha tura Muisais akupkamuncha susamiayi. Tura Yusa Jeen Nin shiir awajsatniun jintintiamiayi. Tura ukunam shiir tsankatkattana nunasha ujakmiayi. ⁵ Ni weatrín Yúsan ti péñker enentáimtin irunmiayi. Kristusha aents ajas nú shuar num akiiniamiayi. Krístuka Uunt Yus asa tura ashí akupin asa Niñki tuke shiir awájñastí. Núnisan atí.

⁶ Kame Yus ashí Nii timia nuna Israer-shuaran súsachmataisha nujai “Yus timia nu uminkiachuiti” tíchamniaiti. Antsu junis enentáimpratniuiti: ashí Israer weeá áiniayatan Yusjai ísmaka ashí nekas Israer-shuar ániatsui. ⁷ Núnisan Apraám weeá shuarsha ashí nekas ni shuar ániatsui. Íis, Yus Apraáman tímiayi “Aya Isak pampañma amee shuarum ártatui.” ⁸ Nujai páantaiti. Shuar aya Apraam weeá akiinia asa Yus timian wáinkiashtiniaiti. Antsu Yus timiajjai métek akiinia nu nekas Apraám weeá shuar ániak Yus timian wainkiattawai. ⁹ Kame Yus Apraáman tímia nu júiti: “Tsawant jeamtai jeartiatjame, tura ame nuwem Sara uchin takustatui.” Tu tímiayi.

¹⁰ Nu arantcha, ii weatrí Isaka nuwe Ripikia jimiampramiayi. ¹¹⁻¹³ Nu uchisha akiiniainiatsain péñkernasha tura yajauchincha túruiniatsain Yus Ripikian tímiayi: “Iwiairia nu ni patain umirkattawai.” Ataksha núnisan Yus ni Papiríin chichak “Jakupan aneakun Esaun nakitramjai” tímiayi. Nujainkia páantaiti. Yus wakerak aya ni enentáijjain shuaran achikminiaiti. Nu shuar túrunamu enentáimtutsuk túramniaiti.

¹⁴ Túriniaitkiui “Yus péñkerchaiti” ¿titiyajish? Atsá. ¹⁵ Yus Muisaisan júnis tímiayi: “Wi wakerajna nunak waitnentrattajai.”

¹⁶ Tuma asamtai shuar ti wakerakuisha tura kakaram takaakuisha aya nujai Yus waitnentatsui. Antsu aya ní enentáijjain wakerak waitnentawai. ¹⁷ Ataksha Yus-Papininum tawai “Yus Ejiptu nunka akupniurín tímiayi

“Ámijjai ashí nunkanam winia kakarmarun nekaawarat tusan uunt akupniun awajsamjame” tímiayi” tawai.

¹⁸ Tuma asamtai Yus Nii wakera nuna waitnentawai. Túrasha Ejiptu akupniurín túramia núnisan Nii wakera nú shuaran enentáin kátsuram awajtawai.

¹⁹ Tura “Núnisaitkiuinikia ¿urukamtai shuaran Yus súmamtikia? turutchatapash. Nii wakerakuinikia ¿itiurkattajik?” turutchatapash. ²⁰ Warí, aents asam Yusjai ¿tunaiminkiaitiam? Nuwá piníñkian náñankui núweka “¿urukamtai júnis najatam?” tíminkiait. ²¹ Nuwá wakerakka nu nuwejai amamkuncha tura yukunnasha nusháa takakmastinian mai najanachminkait.

²² Yajauch shuar ti asutiátin ániak emesnartinnium wétin ániawai. Yus nu shuaran asutiá ni kakarmarín iniaktustaj tayat ti katsuntramiayi. ²³ Tura katsunteak ni anenkrattairín iniakmasmiayi. Nú arant nuikia in waitnentrak shíir enentáijjai péñker awajtamkur ni anenkrattairí

ti paantchakait. Nekas shíir enentaijjai péñker ajasat tusa yaunchu iwiartampramiaji. ²⁴ Tura incha, Israer-shuarnumiasha Israer-shuarchanumiasha, ni shuari ajasat tusa achirmakmiaji. ²⁵ Núnisan yaunchu Yúsnan etserin Useas Yus-Papinium tawai:

“Wíshuarchan Wíshuar awajsattajai. Aneachmancha aneamu awajsattajai.

²⁶ Tura Yus “Wíshuarchaitrume” tímia nú shuaran “Nekas iwiaaku Yusa uchiríniuitrume” ukunam títiatui.”

Tu áarmaiti. ²⁷ Antsu Isayas Israer-shuaran páchis tímiayi:

“Israer weeá ti nankaamas untsurí áiniayat penké ishichik uwemprartatui. ²⁸ Kame Yus yajauchin akupkataj timia nuna takamtsuk wárik umiktatui.”

²⁹ Núnisan Isayas ataksha tawai:

“Ashí akupeana nú Yus in waitnentrachakurniñkia Sutuma péprusha Kumura péprusha takamtsuk jákarmia núnisan jákaaji.”

Israer-shuar uwempratin chichamjai tujinkiarmania nu

³⁰ Wátsek, Israer-shuarcha, Yus iisam ni túramurijjai “pénkeraitji” tu enentáimtumainiachunak, Yuska, Nii enentáimtusam, “pénkeraitrume” tímiayi. ³¹ Antsu Israer-shuarka péñker akupkamun umiktinian wakeruiniayatan tujintiainiakui nujai péñker ajastinian tujinkiarmai.

³² ¿Urukantai tujinkiarma? Yúsan enentáimtutsuk aya ni péñker túramujai péñker ajastinian enentáimtuiniak tujinkiarmai. Krístun enentáimtustinian nakitiainiak shuar kanKapen awankemtuktinia núnisan iniararmai. ³³ Tura kaya tukumkar iniarmaniakait. Nu asantai Yus-Papinium Krístun pachis tímiayi:

““Seun péprunam kayan ikiuajai, tawai Yus. Nu kayanam Israer-shuar tukumkar iniarartatui. Antsu Nin shíir enentáimtuinia nú shuar natsaarchartatui” tawai.” Tu áarmaiti.

10

¹ Yatsuru, Israer-shuar uwemprarat tusan ti wakerakun Yúsan áujtajai.

² Maa, uwempratniun nékachiatan Yúsan shíir awajsatniun ti wakeruiniawai. ³ Túmaitiat shuaran Yus péñker awajsatniun nékachu ásar aya ni péñker túramujain péñker ajastinian wakeruiniawai. Tuma ásar Yus péñker enentáimtamujai péñker ajastinian jeacharai. ⁴ Aya Krístu enentáimtamujai péñker ajastin asantai akupkamu umirkatniujai péñker ajastin ántrai.

⁵ Akupkamujai péñker ajastinian pachis Muisais tímiayi: “Nuna takamtsuk umirniuka nujai péñker pujustatui.” Tu áarmaiti. ⁶ Antsu Krístun enentáimtus péñker pujustinian pachis shuar juna tímiaitai: “Ti itiurchata áinis “¿Yaki nayaimpiniam waka Krístun itiarat?” tiirap,” tawai. ⁷ Tura ¿Yaki jakamunam we Krístun iniantkit?” tiirap” tawai. ⁸ Tura junasha tawai: “Yus-Chicham yúpichuch umirkamniaiti. Aya enentáimjai enentáimtakum wenumjai ujaktinaitme.” Nu Chicham “Yus enentáimtuiniaiti” tawai. Nu Chicham tuke étseraj núiti. ⁹ Yus Jesusan jakan iniantkimia nu enentáimtakum tura wenumjai “Jesus winia Úntruiti” takum uwempratme. ¹⁰ Kame Krístu enentáimtakmin Yus “pénkeraitme” turamtatui nuyá wenumjai “Jesukrístun enentáimtajai” takum uwempratme.

11 Ataksha Yus-Papinium tawai: “Nin shiir enentáimtuinia nú shuar natsaarchartatui.” 12 Tuma asamtai ashí shuar, Israertisha Israerchasha, mai metek Yúsán shiir enentáimtuinia nuna Yus ti aneak ashí péñkeran súawai. Tura ashí métek ni Úuntrinti. 13 Nu arantcha “Ashí shuar Uuntan áujea nu uwemprattawai” yáunchu Krístunun tu áatramuiti. 14 Tura Krístun enentáimtuiniachusha çitiurak Nin áujarat? Tura Krístun nékainiachusha çitiurak Nin enentáimtusarat? Tura Yus-Chicham ujaachmasha çitiurak nekaawarat? Shuar Yus-Chichaman ujaktiniaiti. 15 Tura akupkachmasha çitiurak Yus-Chichaman ujakarat? Tura shuar Yus-Chichaman etserkataj tusa wéana nuna Yus-Papinium tawai: “Shuar Yusa Shiir Chichamen etserki weana nu ti shírchakait.”

16 Tura ashí shuar uwempratin chichaman ántuiniayatā umirainiat-sui. Isayassa yaunchu aak tímiayi: “Uuntá, çyaki ii étserman antukaruit?”

17 Paantchakáit. Kristu túramu ujakam antuktiniaiti. Tura antukar Krístun shiir enentáimtustiniaiti.

18 Tura çIsraer-shuar Yus-Chichaman antukcharu ásarā Yúsán enentáimtuscharma? Atsá. Warí, Yus-Papí tawai: “Ashí nunkanam ni chichame antunkaiti.”

19 Tura “Israer-shuar nu chichaman antukariat çpaant nekaawarmaashi?” inintrusminiaiti. Tura nekas nekaawarmai. Tuma asamtai Muisais tawai: “Israer-shuarchan nékachu ainiana nuna shiir awajeakun akajkattajrume.”

20 Nuyá Isayas ashamtsuk áarmiayi:

“Eatkacharua nu wáitkiarmiayi. Inintruiniatsāin wantintiukmiajai.”

21 Tura Israer-shuaran áujmatuk tímiayi:

“Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui.”

11

Chíkich Israer-shuarsha uwemprartatui

1 Tura Israer-shuar Yúsán umiiniachkui çYus nin iniaisaashit? Péñkea. Warí, wi Israer-shuarchakaitiaj. Wi Apraámsha tura Pinjamin weeá akiiniachukaitiaj. 2 Yámankamtaikniumiā Yus Israer-shuaran ni shuar arti tusa achikiu asa yamaikia iniaiashtatui.

Ti yaunchu Yúsán etserin Erías Israer-shuaran pachis Yúsán áujtak tímiayi: 3 “Uuntrú, naman awasar Yus sútaincha mash saqkiaiari. Áminiu etserniuncha mash máawarai. Tura wiki juakjai. Tura winiasha “mantuatai” turutainiawai.” Tu áujsamiai.

4 Tura Yus ayak tímiayi “Siati mir (7000) áishmankan Israer-shuarnumiā apujtumsaruitjai. Nu shuar ántar-yus Páaran tikishmatrachu áiniawai” tímiayi Yus.

5 Núnisan yamaisha Yus ti waitnentainia asa ashí Israer-shuarnumiā ni shuarin achikiuiti. 6 Yus ni enentáijjāin waitnentak túraiti. Nú shuar péñker tura asamtai waitnentatsui. Yus aya péñkernak waitnentakka nuikia waitnenkratchainti.

7 Ayu. Nuikia ashí Israer-shuar péñkeran eakarū aīn aya Yus achikmia nú shuar wainkiarmiayi. Antsu ni achikchamuka nuna nankaamas nekaachmin ajarar kusurua núnin awajnasarmiayi. 8 Yus-Chichamsha núnisan tawai: “Yus enentáimchatai enentáin súsarmiayi. Wáinmashtai

jiincha tura ántushtai kuishniasha súsarmaiya. Yamaisha núniskete.”

⁹ Tawitcha yaunchu aak tímiayi:

“Tuke tunáa túrin ásar namperan najanainiaksha achinkiar ti asut-niáwarti.

¹⁰ Ni enentáin kusurarti tura wainmakcharti. Itiurchat ana nusha, káarak kijinia áintsan, tuke áentskatá.” Tu áarmiayi.

Israer-shuarcha uwempramin áiniawai

¹¹ Watsek, Israer-shuar kayá tukumkar ¿tuke iniaararuk áinia? Atsá. Antsu Israer-shuar umirkachmajai Israer-shuarcha yamaikia uwempratin jeainiawai. Nujai Israer-shuarsha nujai métek uwempratniun enentáimsartatui. ¹² Israer-shuar umirkachmajai ashí shuar, Israercha ainia nusha, uwempramnia ajasarmiayi. Nuna nankaamas Israer-shuar atak Yúsan enentáimtuiniak uwemprarmatai nujai ashí shuar ti penker ajasartatui.

¹³ Israer-shuarchatirmea, atumin uwempratin chichaman etserkatiun Yus akupkamu asan nu takatan ti takaajai. ¹⁴ Nuna túrakun átum uwemprarmena núnisan niisha, wíishuar ainia nu, nuna íisar uwemprarat tusan wakerajai. ¹⁵ Kame Israer-shuaran iniaisamujai ashí shuar Yusjai shiir nawamnaikiarmatainkia nuikia atak nin achikmajai jakamunmayá nantaktinia áintsan ti shiir átatui. ¹⁶ Emka apatuk ana nu Yus súakur yuminsamuitkiunka nuikia ashí apatkunam Yus yuminsamuiti. Núnisan numí kankapé penkeraitkiunka numi takamtsuk penkeraiti.

¹⁷ Yuska chikich chikich Israer-shuaran, numí kanawen tsupik ajapnia áinis, iniaisamiayi. Tura nuyá atumin niisháa numinmayá árumnin nu numiniam anujtamkamarme. Nujai penker numijiai tsanínkrum nu kakarmajai iwiaakrume. ¹⁸ Tura kanawé tsupikmajai nankaamantu enentáimtumasaip. Warí, ame kakarmarmijiai numi wajatsui antsu ni kakarmarjijai iwiaakme.

¹⁹ “Túrasha wi anujnaktinian kanawen tsupikchamka” tíchainmeash. ²⁰ Nekasaiti, túmaitiat niisha Yúsan enentáimtuiniachu ásar tsupinkiarmaiya. Atumsha aya Yus nekas enentáimta asam anujnakuitme. Tuma asamtai nankaamantu enentáimtumatsuk aya anearta. ²¹ Yus nekas kanawé penkercha túrawarun tsupikkia páchitsuk amincha tsupirmakchamniakait. ²² Iista, Yus atumjai ti tsánkaiti tura Israer-shuar umichua nuna ti wari asutiaiti. Tura penker wáinmamkata. Yus tuke nekas enentáimtachkurminkia atumniasha páchitsuk tsupirmaktatume. ²³ Núnisan Israer-shuar ataksha Yúsan enentáimtuiniakui páchitsuk ataksha anujkachminkait. Nekas túrattawai. ²⁴ Túram Israer-shuarcha asam niisháa numinmayá tsupikiar penké numiniam anujnakuitume. Nuna tura asa nekas ni kanawé tsupikia ajapamun páchitsuk atak anujkamniaiti.

Israer-shuarsha uwempratin áiniawai

²⁵ Yatsurú, nankaamantu enentáimtumarárum tusan yaunchu nekaachman ujaajrume. Júiti: Israer-shuar numianka chikich chikich Yúsan nekas enentáimtustinian nakitiainiawai. Tura aya Israer-shuarchasha Yus-shuar ajasarat tusa túrunamiayi. ²⁶ Tura Israer-shuarchasha ti untsurí Yus-shuar ajasarmatai nuyá Israer-shuarsha ashí uwempratataui. Tuma asamtai Yus-Papí tawai:

“Seúnnumiá Uwentikkiartin tátatui. Israernumiá tunaan asakátrattawai.

27 Jǘ Chichamnasha niijjai najanattajai: ni tunaarín asakturtatjai.”

28 Uwempratin chicham atumsha nekaatarum tusa Israer-shuaran Yus ni nemasrǐ awajsaruiti. Tura yaunchu ni weatrín achikiu asa nincha tuke anenawai. 29 Kame Yus amáa nuna ataksha ataątsui. Shuaran achiksha atak iniaiyatsui. 30 Átumka yaunchu Yus umirchayarme. Tura yamaikia Israer-shuar umirainiachkui Yus atumin waitnentramarme. 31 Núnisan̄ nii yamaikia Yúsan umirainiatsui. Tura atumin waitnentrampramarum núnisan̄ nincha waitnenttrattawai. 32 Nujai ashí métek sumamtikiak métek waitnentrar uwemtikrattawai.

33 Maa, Yus imiá shiirchakait. Tí nekachukait. Ni túramu penké nekaachminiaitji.

34 “Uunt Yus enentáimmian ǔyaki neka? Tura ǔya Nin unuiniaruit. 35 Yaki Nin péńkeran susa shiira nujai yapajniuit?” Tu áarmaiti.

36 Ashí najanamu ainia nu Yus najanamu ániak Niiniu ániawai. Tura Nin shiir awajsatniun najanawarma ániawai. Yus tuke iniaitsuk shiir awájnástí. Núnisan̄ atí.

12

Yusaj surumaktarum

1 Atumsha Yus-shuar árumna nu, atumek Yusaj surumaktarum. Yus ti anenma asakrumin nuna seajrume. Yaunchu Israer-shuar ni waakarín maa Yúsan suu ármiai. Atumsha núnisrumek iwiaaku árumna nuññ Nii túrutataj taku túrutati tusarum tuke enentáijjai Yusaj tsan̄kamaktarum. Yusaj íisam ti shiir atí tusarum túratarum. Nu túrakrumka pátatkechu antsu ti nekas enentáimjai Yus shiir awajin átrume.

2 Chíkich shuar aya jǘ nun̄kanmaya ana nuna enentáimtusar wekainiawai. Tura átumka nu túrawairap. Antsu Yus winia enentáimmiarun yapajtiurat tusarum tsan̄katkatarum. Nu túrakrumka Yus wakera nu nekaatarume. Ni wakeramusha yajauchichuiti antsu imiá nekas péńkeraiti.

3 Yus winia waitnentrak akatar akuptuku asamtai juna tájarme. Atumek wíkitiajtai tu enentáimtumatsuk jeamna nujai métek enentáimtumasta. Yus enentáimta asakmin takastinian suramsana nujai apatkam nekaamata. 4 Ii ayashǐ chíkichkiitiat ii muchitmarǐ untsurǐinti. Tura métekrak muchitiániatsui. 5 Núnisrik iisha, Yus-shuarti, ayashǐ muchitmarǐya áintsarik untsurǐitiatar chíkichik ayashtinia áintsar takaaji. Nusha Kristujai tsan̄kiu asar áitkiamuitji. Túramu asar nuamtak atsumnaiyaji.

6 Ii túratniun Yus nusháa nusháa súramji Nii wakera nujai métek. Wats, Yus ámin suramsamna nu túratniuitme. Yus ni chichamen etserkatniun suramsaitkiuñkia Yus enentáimtakum unuimiarmam nujai métek etserkata. 7 Chíkich shuar yáintinian Yus suramsaitkiuñkia nekas enentáimjai yáintá. Unuiniartiniaitkiumka yawętsuk unuiniarta. 8 Chíkich shuar ikiakártiniaitkiumka nekas péńker ikiakárta. Súsatniuitkiumka shiir enentáijjai ementutsuk súsarta. Shuaran wáinin atí tusa Yus apujtamsaitkiuñkia ti enentáimsam túratá. Tura shuar itiurchat pujuinia nu yáintinian Yus suramsaitkiuñkia shiir enentáimsam túratá.

Yus-shuar túratniua nu

9 Nekas enentáijjai mai anenai ajatarum. Yajauch nakitrarum péńkera nu túratarum. 10 Nuamtak yachi asarum núnisrum mai anenai ajatarum. Chíkich wijjai nan̄kaamas úuntaiti tu enentáimtunaistarum.

11 Nakittsuk kakaram ajasrum ashí enentáimjaj*ii* Uuntri wakera nu túratarum.

12 Ukunam Yus tsan̄katramkattajnia nu enentáimtusrum warastarum. Wáitiakrumsha katsuntratarum. Tuke iniaitsuk ashí túrunamujaj Yus áujasatarum.

13 Yus-shuar atsumainia nujaj yáin̄tarum. Írarsha péñker itiaatarum. 14 Yajauch awajtamainia nu shiir awajsatarum. Yus yajauch yumintsuk nu shuaran péñker túrawarat tusarum seattiarum.

15 Warainia nujaj warastarum. Kúntuts pujuinia nujajsha úttiarum.

16 Chikichik enentáijjaj métekrak shiir enentáimtunaitiarum. Nan̄kaamantu enentáimtumasairap. Antsu péjchach ajastarum. “Ti nekajaj” tu enentáimtumasairap.

17 Shuar ámin yajauch awajtamkuisha nincha yapajkiataj tu enentáimsáip. Aents ísam péñker áminia nu amesha tuke túratá.

18 Ame jeamna nujaj ashí shuarjaj nawamnaikiam wekasata. 19 Yuska ni Papirjin̄ juna áamtikramiayi: “Wíitjaj tunaan asutiátniun. Wisha yapajkiattajaj” tawai Uunt Yus. Tuma asamtai yatsuru, kajertamkuisha atumsha yapajkiairap. Antsu yajauch awajtamkana nuna Yus ístí. Yus asutiáti. 20 Tura nu arantcha tawai: “Ame nemasrum tsukamakuisha ayurata. Kitiamakuisha umartin susata. Nu túrakum péñker ajachua nu iniatsaartatme.” 21 Yajauch nupettamkajin̄. Antsu péñker túrakum yajauchia nu nupetkata.

13

1 Akupniunka ashí shuar umirkatniuiti. Akupniuka Yus apujsamuiti. Yus apujdachma akupin atsawai. 2 Tuma asamtai shuar akupniun umirt-suna nu, Yus apujsamun umireachu asa nekas asutiátniuiti. 3 Kame akupniuka péñker shuar sapijmiakarat tusar apujdachma áiniawai. Antsu yajauch shuar ashamkarat tusar apujsamu áiniawai. Nii ashamt-suk pujustin wakerakmekka péñker túratá. Túrakminkia akupin shiir enentáimturmartatui. 4 Yainmakat tusa Yus apujsamuiti. Antsu yajauch túrakmekka akupin nekas ashamkatniuitme. Warí, Yus ántar apujdach-maiti. Tunáa shuaran asutiátniun Yus apujsaiti. 5 Nu asamtai akupin tuke umirkatniuiti. Aya asutiúwajin̄ tusar umirkashtiniaitji. Antsu shiir enentáijjaj wekasatin umirkatniuiti. 6 Tuma asamtai núnisan̄ akupniun kuit súsatniua nu páchitsuk susatarum. Nu takatan pujursarat tusa Yus apujsaruiti.

7 Ashí túratniua nu túratarum. Akiktiniaitkiumka páchitsuk akikta. Akupniusha uuntcha ashí núnisan̄ írunka nusha shiir enentáimtikratarum. 8 Kuitjaj tumashrintin airap. Antsu mai anenai tuke ajatarum. Chikich shuar aneakum nin péñker túrattame. Túram ashí akupkamu páchitsuk umirkattame. 9 Akupkamusha tawai: “Tsanirmawaip, man̄kartuawaip, kasamkaip, chikich shuar tsanumpruraip, chikichna wakerutkaip” tawai. Tura nusha ashí chikichik chichamjajin̄ tminiaiti: “Ame ayashim aneam núnismek ashí shuar aneata.” 10 Shuar chikich shuaran aneakka yajauch awajsashtatui. Tuma asa akupkamun ti shiir umirkattawai.

11 Ii yámankamtaik Yus nekas enentáimtusmiaj nuj “Ii ti shiir ajasar tuke uwempratin ukunam átatui” tu enentáimprachmashiaj. Antsu yamaikia nu tsawant yuntumsamtai ashí túrajnia nujaj shintiarar enentáimpratniuitji. 12 Tuke káshiitiat tsawaatempaip. Ii Uuntri Kristu jú tunáa nun̄kanam tátin ishichik ajasai. Tuma asamtai ii túrutairj kiritniua

núnisañ yajauch túrutai ana nuka túrutsuk tsáapninium péñker wekasatin kakaram ajastai. ¹³ Túratniua nujai métek wekasatai. Tsawaj wekaakur kiritniunam uumkar tunáa túrutai túrashtai. Nampetsuk, yajauch warart-suk, tsanirmatsuk, jianaitsuk, tura kajernaitsuk aya péñker túratái. ¹⁴ Ii Uuntrj Jesukrístu túramia núnisrik túratái. Tura ii ayashí wakeramu umikiat tusar tsañkatshtiniaitji.

14

Ame yatsum kakantraip

¹ Shuar Yúsan ishichik enentáimtana nu itiaatarum tura kakantrairap. ² Iis, chikichka ashí yuamniaiti tuiniawai. Tura chikichcha, Yúsnan awajirar, naman yúashtiniaiti tuiniawai. ³ Tura ashí yúa nuka naman ken yúatsna nuna wishikrashtiniaiti. Núnisañ ashí yucha nu ashí yuun kakantrashtiniaiti. Warí, núnaka Yus ni shuarin awajsachukait. ⁴ ¿Ámeke timiataash péñkeraitiam chikich shuar kakantinia? Antsu ni úntrin ni péñker túramuncha tura yajauch túramuncha íschatniukait. Enentáimpratá. Yus kakaram asa nin péñker awajsamniaiti.

⁵ Chikichcha enentáimpratái. Chikich shuar tsawantan achikiar “Jú tsawantaj Yus nankaamas shiir awajsatniuiti” tuiniawai. Chikichcha ashí tsawantan métek enentáimtuiniawai. Ayu, tura ni enentáimtamun nekas paant nekaatniuiti. ⁶ Chikichik tsawantan enentáimtakka Yusan shiir awajsatniun túrawai. Tura ashí métekrak enentáimtakka Yúsan shiir awajsataj tusa túrawai. Yurumkajajsha ashí yúana nu Yúsan yuminkias shiir awajsataj tusa túrawai. Núnisañ ashí yúatsna nusha Yúsan yuminkias shiir awajsataj tusa túrawai.

⁷ Iiklia ii enentáijjain iwiaaktsuji. Tura jáakrishá ii enentáijjain jaatsji. ⁸ Kame iwiaaku pujakrishá ii Uuntrj Kristu shiir awajsatái tusar pujurji. Tura jáakrishá tuke Níiniuitji. Nu asantai iwiaaku pujakrishá tura jakarsha tuke Krístunuitji. ⁹ Kame jakancha iwiaakuncha ashí ni Uuntrj ajastaj tusa Kristu jaka nantakmiayi.

¹⁰ Tura ¿urukamtaí ame yatsum “yajauchiiti” tame. Urukamtaí naki-tiam? Warí, ashí iikia ii túramu paant awajnasat tusar Kristuj naka wajastatji. ¹¹ Nu asantai Yus-Papinium tawai:

“Wi nekas iwiaaku pujá asan ashí Winí tikishmatrurartatui. Tura ashí “Yus asa tuke péñker túriniaiti” túrutiatatui” tawai.” Tu áarmaiti.

¹² Tuma asantai iisha chikichik chikichik ashí ii túramu Yus paant ujakartatji.

Ame yatsum tunaanum ajuaraip

¹³ Nu asantai “yajauch túriniaiti” tu áujmatnaisashtiniaitji. Antsu ii yachj tunaanum ajuarchatin ti enentáimturtniniaitji. ¹⁴ Jesukrístu jintintiamu asan juna nékajai: Yus najanamuka péñkerchaka atsawai. Ashí túramniaitjai. Túraschá shuar chichaak “Nu túrushtainti” táyat nuna túrakka níijjai tunaiti. ¹⁵ Tuma asantai shuar chichartamuk “Nu yúakminkia Yusjai péñkerchaiti” tai, ame yúakminkia nu shuar itiurchat enentáimsashtatuak. Tura niisha tunaanum iniaar menkakamniaiti. Nu shuar aneakum túratsme. Enentáimpratá. Aya ame yuamna nujain ame yatsum Kristu jarukmia nu emenkakaip. ¹⁶ Tura “yuamniaitjai” táyatam wi yúakui yajauch áujmatrusarain tusam iniaisata. ¹⁷ Kame Yus umirkatin yurumátniujajsha umartinjajsha enentáimtuschatniuiti. Antsu

Yusa Wakanjijai shiir wekasar Yusjai tura shuarjai nawamnaikiar ti péñker wekasatniuitji. ¹⁸ Ashí shuar Krístun núnis umireakui Yussa tura chíkich shuarsha péñker enentáimtuiniawai.

¹⁹ Nu asamtai tuke shiir pujusminia nu túrakur Yusjai kakaram ajastin yáiniaiktai. ²⁰ Yus iisam ashí yuamniaitji. Antsu ame yuamna nujai chíkich shuar tunaanum ajuartín tunaiti. Tuma asamtai ame yuam nujai Yus nu shuara enentáin takarsamu emesraip. ²¹ Nu túrastin nuikia naman yúashtincha karía umarchatniusha péñkeraiti. Warí, túrushtaijjai ame yátsum itiurchat enentáimtikram tunaanum ajuarchatapash. Tura nu shuar Yúsan nekas enentáimtuschanmia ajastatui. Nuka atsutí. ²² Ame Yus nekas enentáimtakum ashí túramniaitkiumka Yúsak wararsata. Shuar Yus íimianum shiir enentáijjai mash túramnia nu nekas shíiraiti. ²³ Tura araantushim yua nuka Yúsan shiir enentáimtutsuk yua asa sumamat-tawai. Kame ashí Yus shiir enentáimtutsuk túramu tunaiti.

15

Chíkich shuar wakeramuk enentáimtustiniaiti

¹ Yusjai katsuaru ájinia nu iik enentáimtumsuk kakarmachu ainia nu yáintiniaitji. ² Chíkich shuar wakeramu enentáimtustiniaitji. Tura Yusjai nu nankaamas shiir wekasatniun yáinminiaitkiui túratniuitji. ³ Krístusha ní wakeramun túrachmiayi. Antsu Yus-Chicham tana núnisañ chikichnan enentáimtusmiayi. Nu asamtai Yúsan umirin asa wáitiak timia nu áarmaiti: “Ámin katsekramainiak Winiaja katsekrukarmiyai.” ⁴ Núnisañ ashí yaunchu Yus-Papinium aarma in jintintramatniun áararmiyai. Nujai atsañtamkurin shiir wáinikiattajnia nuka katsuntrar nákastatji. ⁵ Yus atsañtamar katsuntratniun jintintramji. Tuma asa Jesukrístu túramia áintsañ atumniasha chikichik enentáijjai enentáimtunaisar pujustinian yáinmakartí. ⁶ Nujai ashí métekrak Yus shiir awajsattarme. Niisha ii Uuntri Jesukrístuncha Aparínti.

Israer-shuarchanmasha Uwempratin Chicham etserkamu

⁷ Tuma asamtai chíkich shuarjaiisha shiir awajnisatarum. Kristu núnisañ Yúsan shiir awajsat tusa incha shiir awajtamsamijai. ⁸ Juna taji. Kristu Israer-shuaran yáintaj tusa támiayi. Tura Yus ti yaunchu nuna weatrin “túrataj” timia nu uminkiat tusa támiayi. Nujai Yus timia nuna umikmia nu nekaamniaiti. ⁹ Tura nu arantcha Israer-shuarchasha Yus waitnentrartín áarmatai nin shiir awajsarat tusa támiayi. Tura Yus-Papisha tawai:

“Ámin kantamprakun ashí shuarnum shiir awajsattajme.”

¹⁰ Tura nu arantcha tawai: “Ashí nunkanmaya shuarteram ashí Israer-shuar Yúsna ainia nujai warastarum.”

¹¹ Tura ataksha tawai: “Ashí aents ii Úuntriñ shiir awajsarti. Tura ashí shuarsha Nin “Ti úuntaiti” tiartí” tawai.

¹² Isayassha áarmiyai: “Tawitia aparí Isai weatriya akupin akiinkiat-tawai. Niisha ashí nunkan akupeakui ashí shuar niiniak shiir enentáimtusartatui.” Tu áarmaiti.

¹³ Yus ashí shíiran suramsattakrin nu shiir nákJai. Tuma asamtai Nii nekas enentáimtakrumin warasa shiir pujustinian yamá suramsati. Nuyá Yusa Wakanj kakarmarijjai ti shiir enentáijjai katsuntrarum, nu nákastarum.

¹⁴ Yatsurú, atumsha anenainiaitrumé. Tura ashí Yusna nekaarum nuamtak chicharnaikiatin nékarme. ¹⁵ Tuma aḡn kajinmatkiḡrumé tusan ataksha ti paant áakun jú enentáimtikeajrume. Yus winia waitnentrak ni Chichamen etserkat tusa akuptakuí nuna áatjarme. ¹⁶ Kame Jesukrístu Israer-shuarchanum Yusa shiir chichamen etserkat tusa akuptukuiti. Nuna túrakun Israer-shuarchan Yusa Wakaníjḡjḡ shiir awajsamu ásarmatai Yusaj juiniajai. Tura Yussha shiir enentáijḡjḡ itiai niawai.

¹⁷ Jesukrístu yaintiu asamtai Yusna takarsamaj nuna wararsamniaitjai. ¹⁸ Tura chíkich shuarjḡjḡ Kristu túramun pachischattajai. Aya wi chichasmajajḡjḡ tura wi túramujajḡjḡ Israer-shuarchan Kristu umimtikiamia nunak áujmatsattajai. ¹⁹ Yusa Shiir Wakaní kakarmarḡjḡjḡ aents tujintiamun túran ashí shuaran Jerusaréḡjḡ péprunam nanḡkaman etserkin Iririkiu nuḡkanam ejekamjai. Kristu-chichaman ashí nu nuḡkanam etserkaitjai. ²⁰ Nuna túrakun chíkich shuar etserkachmanum Krístunun ántichu áiniamunam Uwempratin Chichaman etserkaitjai. Nujḡjḡ chíkich takasmanum takarsachuitjai. ²¹ Yus-Papisha núnisaḡjḡ tawai: “Chichaman penḡker antukcharuka nekaawartatui. Nin áujmatman anturkacharusha unuimiarartatui.”

Papru Rúmanam wétaj tawai

²² Nuna pujuru asan íitjarum táyatan íichmajrume. ²³ Tura yamaikia juyá takatrun umikian tura yáunchusha tuke íitjarum tiniu asan ²⁴ Ispania nukanam wéakun íistatjarme. Tura atumḡjḡjḡ shiir irasan Ispanianam wéakuí atumsha yaintkiarum shiir akuptukchattarpash. ²⁵ Tura yamaikia kuitjḡjḡ Jerusaréḡjḡnumiḡjḡ Yus-shuaran yáintaj tusan wéajai. ²⁶ Masetúnianmayḡjḡ shuarsha tura Akayanmayḡjḡ shuarsha kuítian irurar Jerusaréḡjḡnumiḡjḡ Yus-shuaran atsumainia nuna akuptuktai tuiniawai. ²⁷ Ti wakeruiniak túrawarmiayi. Nu nekas túrashtinkiait. Israer-shuarnumiḡjḡ Yus-Chichaman antukaru ásar yamaikia ni kuítrijḡjḡ páchitsuk yáinchatniukait. ²⁸ Tuma asamtai jú kuitian súsan umiran nuikia Ispanianam wéakun íiktatjarme. ²⁹ Tura nuḡjḡjḡ winiakun Kristu Shiir Chichamen nuḡjḡjḡ shiir yáintajrum tusan ejeetittiajrume.

³⁰ Yatsurú, ii Uuntrḡjḡ Jesukrístunu asarum tura ni Wakaní pujurtamkurmin anenia asarum Yus áujtursatarum. Núnisrum wíjḡjḡjḡ métek Yusna takastin yaintkiattarme. ³¹ Jutia nuḡkanmayḡjḡ Israer-shuarnumiḡjḡ uwemtikrat tusarum Yus áujtursatarum. Tura jú kuitian júajna nunasha Jerusaréḡjḡnumiḡjḡ Yus-shuar shiir achikiartí tusarum Yus áujtursatarum. ³² Nujḡjḡjḡ, Yus wakerakuḡjḡjḡ, péḡker wampú enentáimsan warasan íittiajrume. ³³ Yus ti shiir pujustinian súana nu atumjḡjḡjḡ tsaniḡjḡ pujurtam-sati. Núnisaḡjḡ atí.

16

Amikmaamun akupramiania nu

¹ Ii umai Jépeka Senḡkrea péprunmayḡjḡ Yus-shuaran yáiniaiti. Ti penḡker Yus-shuaraiti. ² Kristu náariḡjḡjḡ shiir wáinkiatarum. Nuamtak yachí wáinkiatniua núnisrum wáinkiatarum. Niisha chikichnasha tura winiasha ti penḡker wáitin asamtai atumsha ni atsumamusha yaintarum.

³ Pirisirasha Akirasha wíjḡjḡjḡ métek Jesukrístunun takasaru ásar amikmaatainijai. ⁴ Niisha winia uwemtikrurtai tusar jániḡkarmiayi. Tuma asamtai yumḡjḡjḡjḡ. Tura aya wikichu antsu ashí Israer-shuarchanumiḡjḡ Yus-shuar ánia nusha yumḡjḡjḡjḡ. ⁵ Núnisaḡjḡ ashí

Yus-shuar Pirisiran tura Akira jeen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nunkanam emka Krístun nekas enentáimtusmiayi. ⁶ Marisha, atumjai ti takasua nu amikmaatruatarum. ⁷ Tura wíi shuarsha Antrunikiusha Júniassha amikmaatruatarum. Niisha wíjjai sepunam pujusarmai. Wíjjai emka Krístun shiir enentáimtusar chíkich akatramujai nankaamas takasaru áiniawai.

⁸ Ámpriassha Krístunam winia aneamu amikiur asantai amikmaatruatarum. ⁹ Urpanujajisha Jesukrístu takatrí tsaninniuitji. Niisha tura aneamu Estakissha amikmaatruatarum. ¹⁰ Apirissha amikmaatruatarum. Niisha Krístun ti shiir enentáimtamú ti páantaiti. Núnisan̄ Aristúpuru shuarsha amikmaatruatarum. ¹¹ Wíishuar Erutiúnsha tura Narsisu shuarsha Krístu shuari ásar matai amikmaatruawarta. ¹² Tripiniasha tura Tripiusasha Yúsnan takainia ásar matai amikmaatruatarum. Núnisan̄ ii umai Pírsitia Yúsnan ti takasu asantai amikmaatruatarum. ¹³ Rúpusha, nusha ti penker Yus-shuar, tura nukurísha amikmaatruatarum. Niisha wíjjai nekas winia nukurua núnisaiti. ¹⁴ Asínkritiusha, Pirikiuntisha, Érmassha, Patrúpassha, Érmessha, tura ashí níjjai Yús-shuar ainia nu amikmaatruatarum. ¹⁵ Núnisan̄ Jirurukusha, Júriasha, Néreusha, ni umajjajisha, Urimpiassha, tura ashí Yus-shuar níjjai pujuinia nu amikmaatruatarum.

¹⁶ Nuámtaksha shiir aujnaisatarum. Ashí juyá Krístu shuari amikmaatmainiawai. ¹⁷ Yatsurú, shuar nusháa enentáimtuiniak Yus-shuaran akanainiak itiu chat awajenawai. Nu shuar wáinkiarum kanaktiarum. Ni yajauch túramu átum penker takastin unuimiarmena núnischaiti. ¹⁸ Nu shuar ii Uuntrí Jesukrístunun takainiatsui. Antsu ni wakeramun uminiawai. Tura ti shiir chichasar nékachun anankenawai. ¹⁹ Átum umirma ashí shuar nékainiakur ti waraaji. Yajauch túrutsuk aya penker túratin enentáimsarum pujustarum. ²⁰ Yus tuke shiir pujustinian amawa nu ti wárik uunt iwianchin nupetturmaktatui. Tura ii Uuntrí Jesukrístu shiir yainmakarti.

²¹ Timiutéusha, wíjjai takau, amikmaatmarme. Núnisan̄ Rúsiusha, Jausunsha, Susipatresha, mash wíishuar ainia nu amikmaatmarme. ²² Wi, Tersiu asan, Papru chichamen ju papinium áateakun Krístu náariin amikmaajrume.

²³ Káyusha amikmaatmarme. Ni jeen pujaji tura jujisha ashí Yus-shuar irunainiawai. Erastusha ju pepru kuítrin wáinniuiti. Niisha ii yachi Kuártujai amikmaatmarme.

²⁴ Ii Uuntrí Jesukrístu ti shiir yainmakarti. Núnisan̄ atí.

Yus shiir awajsatai

²⁵ Watsek, Yus shiir awajsatai. Niñki nekas kakaram awajtam-samniaiti. Wi Uwempratin Chichamnum Jesukrístunun étsereaj nujai ikiantamprattawai. Nu chicham yámankamtaiknumiá nekaachmanak Yus yamaikia paant awajsaiti. ²⁶ Yaunchu Yúsnan etserin ni áarmanum nu chichaman etserkarmiayi. Tura yamaikia Yus wakerak ashí nunkanmaya shuar Nii enentáimtusar umirkarat tusa nu Chichaman yamaikia paant awajsaiti. Yus amuutsuk tuke pujuwiti.

²⁷ Yúsak Niñki ti neka asa tura Jesukrístu ti penker tura asantai Niñki tuke shiir awájnástí. Nuke atí.

Papru KURINTIUNMAYA SHUARAN Emka papin aar akuptukma

Kurintiunmaya Yus-shuaran Papru áatramiania nu

¹ Wi Pápruitjai, Jesukrístu akatramu. Yus nuna wakerak, ni akatramurí atí tusa anaitiukmai. Wi, ii yachí Sústinisjai, jū papí akupeaji. ² Ashí Yus-shuar Kurintiu péprunam iruntrumna nu jū papí akupeaji. Átumka Jesukrístujai tsanínkiu asarum Yusna árume. Atumsha tura ashí shuar Jesukrístun enentáimtuiniana nunasha Yus ti penker awajsatniun wakerawai. Nincha incha Jesukrístu mai metek Úuntriñti. ³ Yus ii Aparí tura ii Úuntri Jesukrístusha waitnentrainia ásar yainmakarti imiatkinchanum tuke shiir pujustinian.

Ii Uuntri Jesukrístujai tsanínkia pujustin

⁴ Yusan áujkun yuminsan atumin shiir enentáimtajrume. Jesukrístujai tsanínkia pujakrumin Yus shiir enentáimturmawai. ⁵ Jesukrístujai tsanínkia pujakrumin Yus atumin ti yáinmawai ashí penker ana nu enentáimtakrum tuke shiir chichastinian. ⁶ Kristu juna túramniaiti tíchamkaji. Ashí yamaikia uminkiaiyi. ⁷ Tuma asantai ashí Yus súramna nu atsumatsrume. Nu túrakrum ii Uuntri Jesukrístu tatin tuke nákarme. ⁸ Tura iniaitsuk tuke emettamattawai ii Uuntri Jesukrístu támatai atumi tunaarin pachischatin. ⁹ Jesukrístu ii Uuntriñti. Niijjai tsanínkia pujusúk tusa Yus achirmakmarme. Tura Nii tana nuna tuke umiktatui.

Yus-shuar akantramu

¹⁰ Yatsuru, ii Uuntri Jesukrístu naari pachisan, seajrume métek enentáimpratarum tusan. Níisháa níisháa enentáimprairap antsu chikichik enentáijjai métek enentáimsa pujustarum. ¹¹ Átum yajauch chicharnaisarum pujarme. Kruí shuari tu ujatarmatai tájarme. ¹² Kame júnis awai: Chíkich “Wi Páprunuitjai” tuiniawai. Chíkich “Apurusnaitjai” tuiniawai. Chikichcha “Wi Pítrunuitjai” tuiniawai. Chikichcha “Wi Kristu-shuaraitjai” tuiniawai. ¹³ ¿Warí, nuínkia, Kristu akantramukait. Páprusha krúsnum jarutramkamaashi. Tura Papru naari pachisa imiaimiukaitrum? ¹⁴ Atumin untsurí imiaichu asan shiir enentáimjai. Aya Krispu Káyujai jímiarchiniak imiaimjai. ¹⁵ Nújainkia shuar “Papru náarijn imiaimiuitjai” tíchamniaiti. ¹⁶ Maa, nekas, Estepanasa shuarincha imiaimjai tura chíkich wi imiaimiun nékatsjai. ¹⁷ Kristu imiakrattia tusa akuptukchamai antsu uwempratin chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimprarin tusan. Antsu yúpichuch chichaajai Kristu krúsnum jakamuk paant atí tusan.

Kristu Yusa kakarmaríncha ni nekatairíncha paant iniakmasmiania nu

¹⁸ Kristu krúsnum jarutramkamu étsereaji. Antsu Yus-shuarchaka menkaakatniunam wéana nu, “ántraiiti nu chicham” tu enentáimainiawai. Antsu Yus-shuarti, uwempratniunam wéakur, “nu chichamjai Yusa kakarmari takusminiati” tu enentáimji. ¹⁹ Núnisan tawai Yus-Chicham

yaunchu aarma: “Ju nunkanmayan ti neka áiniana nuna chichamen emesrattajai; ti unuimiararu áinianak ántar awajsattajai” tawai Yus ni chichamen. ²⁰ Iis, ju nunkanam uwempratin chicham íruntsuk. Nu chichaman ashí mash Yus ántar awajsaiti. Ti neka áiniana nusha, jintinkiaartin áiniana nusha, ashí ju nunkanmayan unuimiar ti chichastinian nékana nusha, nu shuar mash “wi tájana nujai pénger pujusam uwemprattame” tu enentáimiainiawai. Tura núnaka mash Yus penké ántar najanaiti. ²¹ Aya ni nekamujai aents Yúsan nekaacharmiayi. Núnisan atí tusa Yus túramiayi, timiá neka asa. Antsu ashí aentsun Yus ni chichamejai uwemtikratniun wakerimiayi. Chíkich “ántraiti” tuiniana nu chichamjaink’ Yus Nin enentáimtuinia núnaka uwemtikratniun wakerak túramiayi. ²² Israer-shuar “aentsti túrachminian iniakmasta, wi nekaataj” tuiniawai. Kriaku shuarsha “ti enentáimsam, mash pénger jíkim turuttia wisha métek enentáimprataj” tuiniawai. ²³ Iikia antsu Kristu krúsnum jarutramkamuk étsereaji. Israer-shuarsha “ju chicham natsantaiti” tu enentáimiainiawai. Israer-shuarchasha “ju chicham ántraiti” tu enentáimiainiawai. ²⁴ Tura Yus achikiarma, Niiniu ajasarat tusa, Israer-shuarsha Israer-shuarchasha mai metek “Kristu krúsnum jarutramak Yusa kakarmaríncha ni nekatairíncha paant iniakmasmiayi” tu enentáimji. ²⁵ “Yusa nekatairj ántraiti” tuiniawai aents, túrasha imiá nekas péngeraiti. “Yusa kakarmarísha jeatsui” tuiniawai aents, túrasha imiá nekas kakarmaiti. ²⁶ Enentáimtumastarum yatsuru. Yus achirmakmarime Niiniu ajastinian, tura ju nunkanam ti neka áinia núnisan atumjín ti neka íruntsui. Ti akupniusha ti nankaamakusha atumjín íruntsui. ²⁷ Antsu ju nunkanam nékachua núnis ana nuna Yus achikiuiti ti neka nuna iniatsáartinian. Tura ju nunkanam kakarmachua núnis ana nunasha Yus achikiuiti kakarma nuna iniatsáartinian. ²⁸ Péjchachincha, nakitsamuncha, ánrachincha, Yus achikiuiti ashí nankaamantu írunna nuna amuktinian. ²⁹ Nújainkia chikichkisha Yusjai waantu enentáimprachminiaiti. ³⁰ Tura Yus atumin Kristujai tsanin apujtamsaiti. Tura Kristu enentáimtusar Yus nekas nekatainkia nekaattaji. Kristu enentáimtakrin Yus shiir enentáimturmajj, pénger awajtamji, tura uwemtikramji. ³¹ Yus-Papinium yaunchu aarma núniskete: “Shuar nankaamantu enentáimprataj tákuñka ii Uuntri Yus túramun wararsati.”

2

Kristu krúsnum jakamu etserkamu

¹ Wisha, yatsuru, atumjín jeamaj núj Yus-chichaman ti neka chichainia áintsan tura íwiasanak ujakchamajrume. ² Tura atumjai pujakun aya chikichkiniak nekaatniun enentáimpramjai. Júiti: Jesukrístu, tura Jesukrístu krúsnum jakamu. ³ Nékayatan kakarmachu sapjmiashím jearmiajrume. ⁴ Yus-Chichaman ujaakun ti neka chichainia áintsan nupetkataj tu enentáimturchamajrume. Antsu Yusa kakarmaríncha tura ni Wakaníncha paant iniakmasan Yus-Chichaman ujakmajrume. ⁵ Aentsu nekatairijjai Yus enentáimtuschatniuiti antsu Yusa kakarmari paant nekaarum Yus enentáimtustiniaitrume. Nuní asantai Yus-Chichaman tu ujakmajrume.

Aya Yusa Wakanijjai Yúsnan nekaamniaiti

⁶ Túmaitiat Yusa nekatairj átsuk. Yúsnan unuimiararujaj Yusa nekatairjñ áujmatji. Tura Yusa nekatairjñkia aentsu nekatairj áintsachuiti. Ju nuñkanam akupin ainia nuna nekatairjñchuiti Yúsnaka. Ju nuñkanam akupniuka ishichik pujus amuukachartatuak. ⁷ Yaunchu ju nunka atsajñ Yus in uwemtikrampratniun enentáimpramiayi ti shiir pujusarmi tusa. Ju Yusa enentáimmiari yaunchu nekanachmiayi, tura yamaikia nu nekaar áujmatji. ⁸ Ju nuñkanam akupniuka nuna penké nekaacharmiayi. Nékainiakka ii Uuntri timiá shiira nuna, krúsnum máacharu aayi. ⁹ Yaunchu Yus-Papinium áarchamukait: “Shuar Yúsan aneana nuna Yus ti shíran susattawai. Susattana nuka timiá penker asantai shuar wáinkiachman, antukchamuncha, enentáimtachmancha Yus susattawai” tu áarmaiti. ¹⁰ Tura Yusa Wakanj ii enentáin pujurtamuk Yus suramsattajnia nuna yamá paant jintinramji. Nu Wakancha imia Yus enentáimmiancha mash nékawai.

¹¹ Shuar enentáimna nuna chíkich shuar nekaamniakait. Antsu aya ní enentáijjain nékatsuk. Núnisan aya Yusa Wakanj Yúsnan paant nékawai. ¹² Ju nuñkanmaya aents enentáimiainia nujaj Yusna nekaachminiati. Antsu Yusa Wakanj in súramaj nujaj Yus shiir tsankatramajnia nu nekaamniatji. ¹³ Yusa Wakanj jintinramji Yúsnan chichastinian Nii wakera áintsan. Ni chichamen súramji. Túramtai ii nékamujaj Yúсна étsertsují. Tuma asantai imia Yusna nuka Yusjaj penker wekainia nu jintíají.

¹⁴ Yus-shuarcha Yusa Wakanjñiun ántatsui ántrai tusa. Aya Yusa Wakanj jintintiamniatkiui Yus-shuarcha nuna penké nekaachmin áiniawai. ¹⁵ Antsu Yusa Wakanjñ takaku ashí mash iis, penkera nuna nekaamniati. Nii túrana nunasha chíkich shuar súmamtekiachminiati. ¹⁶ Yus-Papinium yaunchu áarmaiti: “¿Yusa enentáimmiari ya neka. Tura Yúsan ya jintintiamniat?” tu áarmaiti. Tuma ajñ iikia Yus-shuar ájnia nu, Kristu enentáimna núnisrik enentáimji.

3

Páprusha Apurussha Yusa takatrjñ mai tsaniñkiar takainiawai

¹ Tura wikia, yatsuru, nuik aj atumjaj pujakun Yusa Wakanjñ umirniun chichastinia áintsanak atumjaj chichastinian tujinkiamjai. Antsu ayash wakeramu umirin asakrumin Krístunam katsuarcharujaj chichastinia áintsanak atumjaj chichasmajai. ² Uchi kuírach naman ayurachminiati antsu aya umuntsatniuiti. Núnisan aya yúpichuchin ujakmajrume, itiurchat ana nu tujintiakrumin. Tura yamaisha itiurchat ana nu tuke tujintiarme. ³ Tuke ayash wakeramu umirniuitrume. Yajauch enentáimtunaiyakrum tura katsumnaiyakrum akantramuitrume. Nujaj páantaiti átum ayash wakeramu umirniuitrume. Yúsnan enentáimticharujaj métek wekainiaitrume. ⁴ Atumjñkia shuar “wi Páprunuitjai” tuiniatsuk. Chikichcha “wi Apurusnaitjai” tuiniatsuk. Tu chichaakrum ayash wakeramu umirniuitrume. ⁵ Wátsek. Wi Papru ti penkeraashitiaj. Apurussha ti penkeraashit. Antsu iisha aya Yusa takarniurjñtji. Yus-Chicham étserkurin ii Uuntri enentáimtushamkuram. Ii Uuntri takatan chíkich chíkich suramsamajnia nuke takasmajai. ⁶ Wi Yus-Chichaman étserkun arakan araktinia áinis takasmajai. Apurussha entsan ukatramai. Tura Yus nu arakan tsakatmarmai. ⁷ Arakan araana nusha, entsan

ukatna nusha ánrachukait. Antsu Yusak arakan tsakatmaru asa ashí túrachukait. ⁸Arakan araana nusha, entsan ukatna nusha métek ániawai. Túmaitkiuisha takasmajají métek Yus akiktatui. Péñker takasmatainkia péñker akiktatui. ⁹Wisha Apurussha Yusa takatrí mai tsanínkiar takaaji. Tura Yus atumí enentáin takaakui atumsha Yusa núñkea áintsaitrume.

Jeasha enentáimpramniaiti. Yus atumjají takaak jeá jeamtinia áintsan takaawai. ¹⁰⁻¹¹Jeá jeamainiak, emka uunt kaya nunká init ikiursar kaki awajsatin ániawai. Tura nuyanka nu kayanam ekeniar júkitniuiti jeá wewe atí tusa. Wikia jeá jeammin ti unuiniamiarua áintsanak uunt kaya nunká emka ikiustinian nekaan, núnisnak Jesukrístunun emka ujakmajrume. Tura Jesukrístu uunt kaya kaki ikiusma áinis asa Nínkiti núj jeá ekenkatin. Iis, ashí enentáimtustinia nankaamas Jesukrístu enentáimtustiniaiti. Nu asamtai Jesukrístunun emka ujakmajrume. Yus nuna etserkatniun tsankatrukuiti. Wí emka, uunt kaya ikiursatniua áintsan, Jesukrístunun ujakmajrume. Tura nuyanka chíkich shuar ekeniar jeammin ániawai. Tura anearti péñker jeamtinian. ¹²Tura jeá jeamainiak nii wakerak péñker ana nujají jeamminiaiti. Nii péñker jeamtinian wakerak kurijiaisha, kuítjaisha, shírmach kayajajisha jeamminiaiti. Chíkich jeamkuka numijiaisha, kenkujajisha, nukajajisha jeamminiaiti. Núnisan shuar Yúsna takaaak péñker takasminiaiti túrasha nánkamas takasminiaiti. ¹³Tura amukatín tsawant jeakui ashí ni takatrí paant átatui. Nu tsawantajisha Yúsaiya ji átatui tura nu jisha ni takatrí péñkera nunasha tura yajauchia nunasha nekapsattawai. ¹⁴Tura shiir jeamuka tura nu jeasha esaachmatainkia shiir akinkiattawai. ¹⁵Antsu nánkamas jeamuka imianiñki jiniumiá uwemprattawai, tura ni jeamma esaa penké atsuttawai.

¹⁶Enentáimpratarum. Yusa Wakaní atumíin pujá asamtai Yusa Jee ajasuram nu nékatsrumek. ¹⁷Shuar Yusa Jeeñ emeseakuñkia Yus nu shuaran emesrattawai. Yusa Jeeñka timiá shiir asamtai túrattawai. Nu Jeá atumketrume.

¹⁸Ju nunkanmayan unuimiarua núnisrum “ti nekaitjai” tu enentáimtumasrum ananmamawairap. Antsu ju nunkanmayan nékachu áinis ajas Yúsna ti shiir unuimiártiniaiti. ¹⁹Ju nunkanmayá aents nékainia nuna Yus “ántrai” tawai. Yus-Papinium áarmaiti: “Ju nunkanmayan unuimiarun ni enentáimmiajain Yus sumantkiattawai.”

²⁰Tura nu arantcha áarmaiti:

“Uunt Yuska “unuimiaru enentáimmiancha penké ántrai” tawai.”

²¹Tuma asamtai “Páprunuitjai tárugna nusha, “Apurusnaitjai”, tura “Pítrunuitjai” tárugna nusha ántar enentáimprume, nii aya aents ásarmatai. Tu enentáimprarum warasairap. Antsu nekaatarum. Ashí íranna nu atumín yainmaktiniaiti. ²²Páprusha, Apurussha, Pítrusha, ju nunkanmayasha, iwiaakmasha, jákatniusha, yamá íranna nusha, ukunam átatna nusha, mash atumniaiiti shiir yainmaktin. ²³Atumsha Krístunuitrume, tura Krístusha Yúsnaiti.

4

Yus akatramu takatrí

¹Júnisan ashí shuar enentáimturmastiniaitji. Iikia aya Kristu yáintrintji. Kristu akatramurintji Yusna yaunchu nekaachma ana nu yamá etserkatin. ²Wátsek, akatramuka tána nujají métek umiktiniaiti.

3-4 Wi umikmancha umikchamuncha ii Uuntrj̄ Kristu nékawai. Átum enentáimturarmena nusha tura chíkich aents̄ enentáimturainia nusha wíjiañkia ántrai. Imia wíkisha nekamatsjai. Kame winia tunaarun penké wáintsujai tura aya nujaj̄ “pénkeraitjai” tíchamniaitjai. Niñki Yus iirui. ⁵ Tsawant jeamtai ii Uuntrj̄ Kristu atak tátatui. Tura ashí yamáí kiritniunam uukma nuna tura shuar ashí enentáimprarma nunasha paant awajsattawai. Nu tsawant jeatsaj̄n shuar umikiuashit tusarum enentáimtusairap. Tura nu tsawant̄ Yus ashí pénker umikiarun shiir awajsattawai. Pénker umikiuncha ishichik umikiuncha takasmajaj̄ métek Yus shiir awajsattawai.

⁶ Átum “Ju shuar pénkeraiti tura chíkich pénkerchaiti” tu akannáirarum penké tíchatniuitrume, yatsuru. Nuka paant atí tusan “Átum “Wi Páprunuitjai” tura “Wi Apurusnaitjai” tírap” tajai. Antsu aya Yus-Papinium áarmajaj̄ métek enentáimsatarum. ⁷ Ámeka chíkich shuarjaj̄ méteketme. Tura ashí takakmena nusha Yus amasmaiti. Tura Yus amasu asamtai çitiurak áminiukea áintsam nujaj̄ nankaamantu ajai tu enentáimtumam?

⁸ ÇTi kuítrinnia áintsan̄ tura ashí takakua áintsan̄ enentáimtsurmek. In nankaakarum uunt kapitían̄ ajasua áintsan̄ enentáimtsurmek? Nekas uunt kapitían̄ ajasrumka maak. Nuñkia iisha atumjaj̄ akupkaintji. ⁹ Chíkich shuar mash nankaamantu áinis áiniakuisha Yus in ní akatramurj̄n ashí amúamunam apujtamsaitji. Tu enentáimpramniaiti. “Ya-jauch áiniawai, máatái” tu pujurtamji shuar. Tura Yusa suntarisha ashí juyá shuarsha in ístai tusar káutramkaintji. ¹⁰ Iikia atumjaj̄ jeatsji. Kristu shuarj̄ asakrin nékachua áinis enentáimturmaj̄i shuar. Átum antsu Krístunam tí nékachuashitrum. Iikia kakarmachuitji. Átum timiá kakarmaitrume. Átumka ti penkeraitrume. Antsu iikia muíjtiaintji. ¹¹ Tuke yamaisha tsukamaji, kitiámaji, entsartin atsumaji. Katsumpramji. Jeasha atsumaji. ¹² Ii ewejéjaj̄ takaakur ti pimpíaji. Shuar katsekramainiaji túrasha iikia shiir chichamjaj̄ aiyaji. Itiurchat awajtamainiakuiasha katsunteaji. ¹³ Tsanumprutmakrincha tuke shiir chichaaaji. Tsuata áintsarik tuke yamaisha ashí yajauchia núnisan̄ ajapramatniun enentáimturmainiaji.

¹⁴ Atumin aya iniatsaartajtsan̄ juní áattsujrume. Antsu winia aneamu uchirua áintsan̄ jintintjarme. ¹⁵ Atumin Yus-Chichaman ujaakun Yus-shuar ajastinian̄ unuiniamjarme. Nujaj̄ Jesukrístu enentáimtakrumin atumí aparía áintsan̄ ajasmajai. Chíkich shuar Krístunun̄ jintintrámatin̄ timiá untsurj̄ ákuisha aya wiki atumí aparíntjai. ¹⁶ Tuma asamtai wi wekaajna áintsan̄ wekasatarum atumsha.

¹⁷ Nu túratarum tusan winia aneamu uchirun Timiutéun̄ akuptukmajrume. Niisha ii Uuntrj̄ Krístun̄ enentáimtamunam winia uchiruiti tura Krístun̄ enentáimtak tuke shiir wekaawai. Túrasha wi Krístujaj̄ wekaamun ataksha enentáimtikramprattawai. Núiti ashí Yus-shuarnum wena jintíajna nuka. ¹⁸ Papru yamaikia iraishtatui enentáimturainiak chíkich chíkich nankaamantuitjai tu enentáimtumainiawai. ¹⁹ Antsu Yus wakerakuñkia wárik íitjam tusan wakerajai. Nuñkia nankaamantu chichameñ̄ antukhattajai antsu wátskea, ni túramurisha ístái. ²⁰ Yus akupeana nú shuar aya chíchainiatsui antsu Yusa kakarmarj̄n̄ iniaktuiniawai. ²¹ Wátsek, çwarí enentáimprum? Átum tuke núnisan̄ enentáimkiurminkia wi

winin asutiátniuitjarne. Tura péñker enentáimkiurminkia, aneakun shiir chichasminiaitjarne. ¿Atumsha túa wakerarum?

5

Tsanirmamu ti tunaiti

¹ Atumíin shuar ti tunáa tura awai. Ju yamáí ashí nekanaiti. Nu shuar ni aparí nuwé achikiuítí. Timia tunaaka nu tsanirmamu Yus-shuarchanumsha atsawai. ² ¿Nu tunaajaisha tuke nankaamantu enentáimprumek? Antsu úuttiniaitrumé. Nu shuar tunáa túraka atumíiniá akankatniuiti. ³ Ayashur pujachkuisha wi nuí pujáa áintsan nuna tunaarín paant nekaamjai, tura asutiátniuiti tajai. ⁴ Tuma asamtai átum káunkakrumin ii Uuntrí Jesukrístu kakarmaríjjai tura wi nuí pujáa áintsanak, ii Uuntrí Jesukrístu kakarmaríjjai ⁵ nu shuar uunt iwianchnum surunkatniuiti ni ayashi wakeramurí amukati tusa. Nujai ni wakaní uwemprattawai ii Uuntrí Jesukrístu támatái.

⁶ “Iikia péñkeraitji” tárúmna nu ántrai, tunáa atumíin tuke akui. Iis, “Karía ishichik yuminnium enketam mash karimtiktsuk” tiniu ániawai. Núnis átatui ju tunaajai. ⁷ Tuma asamtai nu karía ukartarum yajauch awajturmasajj tusarum. Núnisrum ju tunaanumiá kanakrum péñker átratume. Yaunchu enentái karía núnis amuukatniuiti. Ashí yamarmak yuminia áintsan ajasuitrumé. Tanta wakapruachusha enentáimpratai. Israer-shuar paskua nampernum aya wakapruachu tantan yuu ániawai. Atumí tunaarí atsakui atumsha nu námper-tantaa áintsar péñker ajasuitrumé. Paskua nampertincha Israer-shuar murikiun main ániawai. Núnisan Kristu jaka ii murikría áinis ajasuiti. ⁸ Tuma asamtai iisha paskua námper nájanku pujakur tuke núnisan shiir wekasatniuitji. Tuma asamtai ashí yajauch tunaasha írúnna nuka karía yaunchu nawamua áintsan keté. Nuka atsutniuiti. Antsu nekas ana nuka shiir enentáimsar wekasatniuitji. Nuka yuminia áintsan keté.

⁹ Nuik papin áatramajrumna nuí “Tsanirma shuarjainkia íschatniuitrumé” tímiajrumé. ¹⁰ Ju nunkanam Yus-shuarchaka aya tsanirma, aya kuitniak ikiauwin, aya kasak, aya ántar-yusan tikishmatin ániatsuk. Nú shuarjainkia penké íschatniuitkiurmeka ju nunkanmaya jínkintrume. Núnaka tátsujai. ¹¹ Antsu wi tájana nu júiti, Shuar “Yus-shuaraitjai” tákunka tura tunáa túriniaitkuinkia níjjai íschatniuitrumé. Tsanirmasha, kuítian ikiauwincha, ántar-yusan tikishmatniusha, tsanumniusha, nampencha, kasasha “Yus-shuaraitjai” tákuinkia íschatniuitrumé. Penké níjjai yurumashtiniaitrumé. ¹²⁻¹³ Yus-shuarcha tunaarí pachischatniuitjai. Yus núnaka ístatui. Átumka antsu atumíin Yus-shuar ainia nuna tunaarí ístiniaitrumé. Tuma asamtai nu shuar tunaarintin atumíiyá akankatarum.

6

Yus-shuar nuámtak itiurchat awajnalisarka Yus-shuarchajai nuna iwiarashtin ániawai

¹ Yus-shuarka chíkich Yus-shuarjai itiurchat pujakka kapitánjai chichas iwiarashtiniaiti Yus-shuarcha asamtai. Antsu Yus-shuar írúnna nujai iwiarati. ² Enentáimpratarum. Amuukatin tsawantai Yus-shuarka ashí ju nunkanmaya shuara tunaarí mash nekaawartatui. Tura ashí tunáa nekaatniuitkiurmeka itiur yúpichuchia nu nekaashtatrum.

³ Nu arantcha Yusa suntari túramurisha nekaattaji péñkerashit tusari. Nayaimpiniam túrawarma nekaatniuitkiurkia itiura ju nunkanmaya nu tujinkiattaji. ⁴ Pai, itiurchat ákuñkia Yus-shuar penké tujintiainiana nujai iwiaratarum antsu. ⁵ Natsaruk tusan nuna tájarme. Wari, ¿atumíni chikichkisha atsawak ni yachí itiurchatrj péñker iwiaramnia? ⁶ ¿Urukamtai Yus-shuar ni yachjijai itiurchat pujakka Yus-shuarchanum wea iwiaratniun? ⁷ Atumí itiurchatrj kapitianiunm jukirmeka nujainkia átum tujinkiamu páantaiti. Natsantchakait. Itiurchat ana nusha ¿urukamtai antsu katsuntram asakáatsum? Kasamkamusha ¿urukamtai katsuntram asakáatsum? ⁸ Antsu átumka nuámtak yachjijai itiurchat awajnáiyarme tura kasárnaiyarme.

⁹ Tunáa túrincia Yus akupeamunam pachiinkiachmin ainia nu nékatsrumek. Anannawairap. Ashí tsanirma nusha, ántar-yusan tikishmatniusha, nuamtak áishmanjai tsanirmasha, ¹⁰ kasasha, ashí kuítian ikiauwincha, nampencha, tsanumniusha, yajauch chichainia nusha, chíkich shuaran anankawar atantin ainia nusha Yus akupeamunma nu penké wayashtin áiniawai. ¹¹ Atumíyasha chíkich chíkich nuna túrin armai. Tura yamaikia ii Uuntrj Jesusa kakarmarjijajisha tura ii Yusrj Wakanj kakarmarjijaj atumi enentái shiir ajasuíti, atumsha Yusna ajasurme, tura tuke péñker ajasurme.

Ii ayashj yajauch áchatniuiti

¹² “Ashí túramniaitjai” tiniu áiniawai tura nekasaiti. Tuma ajñ mash yáñkiashtatui péñker wekasatniun. Nekas ashí túramniaitjai tura nánkamas túratniujaj nupetnakchattajai. ¹³ Junasha tiniu áiniawai: “Apatukujaj wakejainchu tura wake apatukujainchu mai ántraití.” Apatkujaj wakesha nekas mai metek enentáimpratin áiniawai tura Yus mai metek amuktatui. Núnisan ii ayashj ii Uuntrj Krístunuiti tura Kristu ii ayashi nérenniuiti. Tuma asamtai ii ayashjijaj tsanirmashtiniaiti. ¹⁴ Tura Yus ii Uuntrj Jesusan iniantkimia núnisan ii ayashíncha nu kakarmarjijaj iniantkittiwai.

¹⁵ Ashí ii ayashjin Kristu ayashímkiaiti. ¿Nu átumka nékatsrumek? Winia ayashrusha Kristu ayashíyá asamtai ¿itiurak nuna tsanirí ayashín najanattaj? Penké túrachminiatjai. ¹⁶ Kame ¿jusha nékatsrumek? Áishman tsanirijaj tsanínkiar chikichik ayashtinia áinis ajainiawai. Núnisan Yus-Papinium áarmaiti: Mai chikichik ayashtinia áinis ajasartatui. ¹⁷ Tura shuar ii Uuntrj Krístujaj tsanínkia mai chikichik wakantin ajainiawai.

¹⁸ Tuma asamtai tsanirmatniunmaya yajáyan wainkiarum tséñtariarum. Chíkich tunáa írussa nu ii ayashínkia ti yajauch awajeatsui. Túrasha shuar tsanirmakka ní ayashiniak yajauch awajeawai. ¹⁹ Yusa Wakanj ame enentáimin pujurtamu asamtai, ame ayashim ni jeente. Nu Wakanjnkia Yus amasuíti. ¿Nuka nékatsrumek? Tuma asamtai ame ayashmi nérenchaitme. ²⁰ Kristu numpejaj sumakma asamtai, ayashmisha wakanmisha Yusna áiniawai. Yusna asamtai ayashmijaj péñker túratniuitme, Yus shiir awájnásti tusam.

7

Nuatkatniusha péñkeraiti, nuatkashtincha péñkeraiti

¹ Ayu. Átum áatrurmarmena nuna yamaikia ujaktajrume. Shuar nu-atteachkusha péñkeraiti. ² Tura ti tsanirmatniun enentáimtuinia ásar

ashí áishman ní nuwenak nuatkati tura ashí nuwá ní áishriní iniumkati. ³ Áishmansha ní áishri asa nuwen túratniua nuna umiktiniaiti. Núnisan nuwasha ní nuwe asa ní áishrin túratniua nuna umiktiniaiti. ⁴ Núwaka níki ní ayashí nérenniuchuiti, antsu ní áishrinuít. Núnisan áishmansha níki ní ayashí nérenniuchuiti, antsu ní nuwénuiti. ⁵ Ni ayashí surit-naikiashtin áiniawai. Tura mai itit awajnaitsuk Yus áusatin wakeruiniak ishichik tsawant kanakmin áiniawai. Tura nuñkia atak tsanin pujustin áiniawai. Túracharmatañkia uunt iwianch, Satanás, tunaanum iniartinian útsukattawai katsuntratniun tujintiakui.

⁶ Ayu. Tura nuna áarayatan nújainkia “ashí shuar páchitsuk nuatkatniúiti” tátsujai. Nuatkatniuitkiumka péñkeraiti. ⁷ Túramtai “ashí wíjjai métek nuatkachuitkiuñkia maak ainti” tajai. Tura Yus ashí shuaran imiá métek najanachuiti. Chikichan nuatkatniun súsaiti, tura chikichan yúpichuch katsuntratniun súsaiti.

⁸ Natsancha wajencha juna tájai, “Wíjjai métek nuattsuk pujusrumka péñkeraiti.” ⁹ Tura katsuntratniun tujinkiarka nuatkarti. Ti katsuntra-chmin nekapeakum nuatkatniun péñkeraiti.

¹⁰ Nuatnaikiarun antsu tájai, “Nuwá nuatkamuka ní áishrin ikiukchatniúiti” tajai. Núnaka ii Uuntri Kristu akupkaiti aya winia chichampruchuiti. ¹¹ Túramtai ní áishrin ikiukkia níki atak nuatnatsuk pujustí tura tsanin pujustinian wakerakka ataksha ní áishrin wakеткиti. Núnisan áishmansha ní nuwen ajapashtiniaiti.

¹² Chikich shuaran juna tájai wikia, ii Uuntri Kristu juna akupkachuiti. Yus-shuara nuwenka Yus-shuarchaitkiuñka tura ní áishrijjai pujustinian wakerakka péñkeraiti; ajapashtiniaiti, tájai. ¹³ Núnisan Yus-shuara aishri Yus-shuarchaitkiuñka tura ní nuwejai pujustinian wakerakka péñkeraiti; ikiukchatniúiti. ¹⁴ Nu nuwaka “Yus-shuarchajai tsanin pujakun Yusjai yajauch ajastatjai” tu enentáimprashtiniaiti. Antsu ní Yus-shuar asamtai ní aishri níjjai pujá asa péñker ajasminiaiti Yusjai. Núnisan núwaka Yus-shuarchaitiat ní aishri Yus-shuaraitkiuñkia níjjai tsanin pujá asa péñker ajasminiaiti Yusjai. Núnisan ní uchirísha péñker ajasmin áiniawai Yusjai. Núnischaitkiuñkia ní uchirí Yus-shuarcha uchiría áintsar ainti. ¹⁵ Tura áishmansha nuwasha Yus-shuarcha ana nu kanaktinian wakerakka túrati. Yus-shuar nujai ankantaiti. Núnisan asati. Tuke máaniaktinian Yus nakitramaji. ¹⁶ ¿Núwaka ní aishri Yus-shuar ajastatna nuna nekas nékawak. Tura áishmansha ní nuwe Yus-shuar ajastatna nuna nekas nékawak? Yus-shuarcha nuka wétinia wakerakka wetí.

¹⁷ Wátsek. Shuarka Yus-shuar ajaska Yus nin najanama áintsan tuke átiniaiti. Pujumia áintsan pujusminiaiti. Núnaka ashí Yus-shuarnum akupeajai. ¹⁸ Iis, Yus-shuar ajasuka Israer-shuaraitkiuñka tuke Israer-shuar atí. Tura Israer-shuarchaitkiuñka Israer-shuar ajastin enentáimprashtiniaiti. ¹⁹ Israer-shuaraitkiumsha tura Israer-shuarchaitkiumsha nuka enentáimtuschatniúiti. Aya Yus tana nu umirkatin nekas enentáimustiniaiti. ²⁰ Yus-shuar ajasuka nuik pujumia áintsan pujusminiaiti. ²¹ Chikich shuara takarniuri asam ti itíurchat pujakmesha itíurchat enentáimpráip. Tura ankant jínkimniaitkiumka jínkitiá. ²² Ankantchaitkiumka ankantaitkiumsha ju enentáimpratá. Takarniuka Yus-shuar ajas tuke chikich shuara takarniurínkiusha shiir enentáimpratniúiti Kristu nin tunaanumiá ankant awajsamtai. Tura shuar takarniuchua nu, Yus-shuar ajas Kristu takarin ajasuiti. ²³ Ti

wáitsamiayi Kristu in ankant awajtamsatniun. Ni numpejai sumakma asarum shuar emetamu áirap. ²⁴ Tuma asantai shuar Yus-shuar ajas nuik pujumia áintsan yamaisha pujústí tura Yusan enentáimtus wekasati.

²⁵ Nuwa natsa túratniua nuna yamaikia áujmatjai. Kristu juna akupkachmai tura Kristu anenkratmarí ti nekapsa asantai wi tájana nu antukminiaiti. ²⁶ Tuma asantai juna tájai. Ti iturchatnum pujá asakrin shuar aya júnisan nuattsuk pujustin péñkeraiti. ²⁷ Nuatkaitkiunka núwem ikiukip. Nátsaitkiunka nuwa eakaip. ²⁸ Tura nuatkunka tunáa túratsme. Nuwasha iniurtukka niisha tunáa túrachuiti. Túrasha nuatnaikiaru itiurchatan ti wáinkiertatui ju nunkanam. Nú itiurchatnumiá wi uwentikraintjai.

²⁹ Yatsuru, juna tájarme. Ishichik tsawant taasai. Juyanka nuatkaru ainia nuka aya ni nuarin enentáimprashtiniaiti antsu Yúsna enentáimtustiniaiti. ³⁰ Núnisan tuke Yúsna enentáimsar útainia nusha uutcha áintsar pujustin áiniawai. Warainia nusha warascharua áintsar pujustin áiniawai. Súmainia nusha sumakcharua áintsar pujustin áiniawai. Ju nunkanmayajainkia itit awajmamsashtiniaiti. ³¹ Núnisan aya jú nunkanam péñker pujustin ti takaschatniuiti. Ashí jú nunkanmayanka amuukatniuiti.

³² Jú nunkanmayajain itit ajaschak tusan wakerajrume. Nátsaka Yúsna enentáimtawai ni wakera nuna umiktinian. ³³ Túrasha nuatkaka ju nunkanman enentáimtawai ni nuarin shiir enentáimtiksa. ³⁴ Núnisan nuwa nátsasha nuatkamusha niisháa enentáimiainiawai. Nuwa natsa Yúsna enentáimtawai ni ayashísha ni wakanísha tuke Yúsjaí shiir atí tusa. Tura nuátkamuka ju nunkanmayan enentáimtawai ni áishrin shiir enentáimtiksa.

³⁵ Atumin yáintajtsan juna tájarme. Itiurchat awajsattsan wakeratsjai antsu shiir wekaakrum itit awajtsuk Yus shiir enentáimtustarum tusan wakerajai.

³⁶ Tura shuar ni nawantri natsan nuatnaikiati tákunka péñkeraiti. Nawantrin natsa tuke apujsatniun nakitia akka surukminiaiti. Nusha tunaachuiti. ³⁷ Tura chíkichka tuke natsan apujsataj tákunka nekas péñkeraiti. Apujsatin itiurchatchaitkiuinikia tura ni nawantri nuatnakchatniuitkiuinikia apujsatniuiti. Apujsanika nekas péñker túraiti. ³⁸ Tuma asantai nuatmantikianka péñker túrayi tura apujsanika nu nankaamas péñker túrayi.

³⁹ Nuwa aishri iwiaaku pujakuinikia tuke niijjai tsanin pujustiniaiti. Tura ni aishri jakantai ankant ajas ni wakera nujai Yus-shuaran iis nuatnaikiamniaiti, ⁴⁰ tura tuke nuatnatskesha nu nankaamas nekas shiir pujustatui. Tú enentáimjai wikia tura Yusa Wakanísha métek tátsuash.

8

Yurumkasha namansha ántar-yusnum susamu

¹ Ayu. Yamaikia yurumkasha namansha ántar-yusnum susamun áujmatsattajai. Jujai túratniua nuka mash nékaji. Tura shuar “ti nékaitjai” enentáimkiunka nujainkia “neka asan nankaamantuitjai” tu enentáimui. Antsu shuar chíkich shuar ane akka nin péñker atí tusa yayawai.

² Shuar “ti nékaitjai” tákunka nekas nekaatniua núnaka unuimiarchaiti.

³ Tura Yúsna aneana núnaka Yus péñker nékawai.

⁴ Wátsek. Ántar-yus susamu yúatin junis enentáimpratniuiti. Yuska aya chikichkiiti. Tura chíkich Yus atsakui, ⁵ aentsu yusrj nayaimpinmasha nunškasha írunna nuka penké ántar ániawai. Kame aentsu yúsrjsha tura úntrisha ti írunui. ⁶ Tura iikia nékaji, aya chikichik Yus awai, nusha ii Aparínti. Ashí írunna nuna najanaiti tura ni wakerana nuna umikiat tusa najatmamji in. Ii Úuntrisha chikichkiiti, Jesukrístu. Niijiaínkia ashí najanamuiti. Tura iisha ni kakarmarijaj*ai* iwiaaku pujaji.

⁷ Tuma asamtaí ántar-yus susamu yuamniaiti tura Yus-shuar awai juna nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka itiurchat enentáimprar “enentáiru*ij* yajauch ajasjai” tiartatui. ⁸ Watsek, yuamujaj*ai* Yus in shiir enentáimtikrampratniun jeatsui. Yuarkia nujaj*ai* péñker áchattaji tura yúachrikia yajauch áchattaji. ⁹ Anškantaitme yúatin wakerakmekka. Tura anearta. Ame yúakmin chíkich shuar itiurchat enentáimna nusha ámin wáitmak yúanka ni enentáin tunáa ajastatui. ¹⁰ Íistá. Ámekka neka asam ántar-yusa jeen wayam tura nu*ij* yúakminkia ame yatsum nu*ij* wáitmakchanpiash. Tura niisha itiurchat enentáimiat ántar-yus susamun yúashtimpiash. ¹¹ Nújaj*ai* nkiea ame nékamujaj*ai* ame yatsum Kristu jaka uwemtikramia nu yajauch ajastatui. ¹² Túramtaí ame yatsum itiurchat enentáimna nu yajauch awajeakum Krístunmasha tunáa túraitme. ¹³ Nu asamtaí winia yatsurun wi yúajna nujaj*ai* yajauch awajeaknaka namañnaka penké yuashtatjai nii tunáa ajasaj*ai* tusan.

9

Kristu akatramu túramnia nu

¹ Ashí Kristu akatramur*ij* túratniua nuna wisha túramniaitjai ni akatramur*ij* asan. Iis, wisha ii Uuntr*ij* Jesusan wáinkiaitjai tura wisha Jesukrístu takatrin takaajai. Winia takatrujaj*ai* átumka Yus-shuar ajasuitrume. ² Chíkich shuar “Kristu akatramur*in*chuiti” túrutainiakuisha átumka winia takatrujaj*ai* Yus-shuar ajasu asakrumin nujaj*ai* wi nekas Kristu akatramur*int*iaj nu paant nekaamniaiti. Tura tu enentáimtursatniuitrume.

³ Ashí shuar “Kristu akatramur*in*chuiti” túrutainia nuna juna tájai. ⁴ Wisha Yus-Chichaman etserkataj tusan shuárnum iraaakun ashí ajampriinia nuna yuamniaitjai tura umarminiaitjai. ⁵ Tura Pítrusha, Jesusa yachjsha, tura chíkich akatramusha irainiak ni nuwen Yus-shuar ainia nuna jukimnia ániawai. Wisha núnisnak túramniaitjai. ⁶ Chíkich akatramuka kuit susamujaj*ai* Yus-Chichaman etserainiawai. Wisha Pirnapísha núnisrik túramniaitjai. Kame ¿aya íchikik takastiniaitjai? ⁷ Suntarka ¿ní kútrijaj*ai*mpiashtakaa? ¿Tsanimpian aráa nu nuna neren yúatsuk. Wáakan wainiua nusha muntsur*in* úmatsuk? Núnisan Yus-Chichaman étsera nusha nú takasmanumia yurumániaiti. ⁸ Aya aents enentáimmian chichaatsjai. Muisais akupkamunmasha métek tawai. ⁹ Muisais akupkamunam áarmaiti:

“Turu takaak jin*ki*iaia saepen pakartaj tusa nájakui ni nu*ij* jin*ki*atáshtiniaiti. Antsu ni wakerak yuati.” Tu áarmaiti.

Tura Yus aya túrunak enentáimprachmiayi jujaj*ai*. ¹⁰ Antsu in jujaj*ai* nekaawarat tusa tímiayi. Jin*ki*aiin araana nusha tura júukmatai saepen pakaana nusha nuna jin*ki*aiin mai yurumátin ániawai. Paant atí tusa Yus nuna áarmiayi. ¹¹ Tuma asamtaí Yus-Chicham atum*in* etserakrin nuyá átum takakrumna nujaj*ai* in ajamsatniuitrume. ¿Nusha itiurchatkai?

¹² Chíkich akatramu atumin irutainiak ajamsamun yuamniaitkuinkia iikia nekas túramniaitji ii etserkamujai Yus-shuar ajasakrumin.

Tura wíka antsu túrachuitjai. Atsumaknasha ashí itiurchat ana nuna katsuntramjai Kristu shiir chichamen etserkui shuar itiurchat enentáimturarajin tusan. ¹³ Ashí shuar ni yúsriniun tuke pujurin ainia nu, ni yusrj jeen írúnna nuyan yurumáiniawai. Tura yus-sutai namañken maawar nuyá yurumáiniawai. ¹⁴ Núnisan Yus-Chichaman etserniua nuka Yúsnan takasu asamtai péñker ajamsatniuiti. Nuna Kristu akupkami-ayi. ¹⁵ Tura wisha ajamsamun yuamniaitiatan tuke winia kuítrujai yurumámjai. Tura yamaisha surúsúk tusan áattsujrume. Antsu nuna túrutsuk jakañka maak aintjai.

¹⁶ Uwempratin chichaman wi étserkun aya nújajin “ti penkeraitjai” enentáimtumatsjai. Kame Yus nuna túratniun surusuncha itiurkatjak. Nuna túrachkunka ti itiurchat pujusaintjai. ¹⁷ Wakerakun étserkunka, warasminiaitjai. Tura nakitiaknasha tuke Yus surusmanka umiktiniaitjai. ¹⁸ Tura jujaj antsu nekas warasminiaitjai: Wi túramnian iniaisan chikichnan takatsuk aya winia kuítrujajin uwempratin chichaman étserjai. Nujaj waraakun akikma áintsankete.

¹⁹ Chíkich shuara takarniuchuitiatan ashí shuara takarniuriya áintsanketjai Kristu shuari untsurj ajasarat tusan. ²⁰ Israer-shuarjaj pujakun niisha Yus-shuar ajasarti tusan Israer-shuara áintsan ajai. Kame Muisaisa akupkamurj umirkatin áiniakui wisha aun umirkashtiniaitiatnak umirniuitjai. ²¹ Tura Israer-shuarchasha Yus-shuar ajasarti tusan, nu shuar Muisaisa akupkamurj umirkashtin áiniakui, wisha nuna umirkashtinia áintsan ajai. Tura Kristu akupeana nuna umirkatin asan nekas Yus akupkamun umirniuitjai. ²² Yusjaj katsuarchasha ti penker Yus-shuar ajasarti tusan wisha katsuarcha áintsan ajai. Chíkich chíkich shuarjaj métek ajajai ishichkisha Yus-shuar ajasarti tusan. ²³ Ashí wi túraj núnaka uwempratin chicham tuke shiir atí tusan túrajai. Tura nu chichamjaj wisha atsumtsuk shiir wekaajai.

²⁴ Shuar nekapnaisatniusha untsurj tséñtin átsuk tura aya chikichik awakmatsuk. Niñki, awakmakun súsatniua nú shiirmachin achiktatui. Núnisrum kakarum ajasrum awakmak shiirmachin achiktinia áintsarum Yusna takastarum. ²⁵ Shuar nakurak nekapnaisatin ainia nuka nupet-maktaj tákunka ashí itit awajea nuna ikiuiniawai. Iisha núnisrik nu enentáijaj Yusna nu takastiniaitji. Nakuruinia nu shuar awakmakun tawasap súsatniua nuna achikiarsha nú tawaspan wárik kajinmatkimniaiti. Antsu Yus in amastatjinia nú tawasap tuke amuukashtatui. ²⁶ Wikia aya náñkamsan tsékeatsjai. Nasejaj maania áintsan máaniatsjai. ²⁷ Antsu winia ayashrun awatinia áitkiasnak umimtikiajai. Túrachkunka chikichan unuiniariatan winiasha awakmakun súsatniua nú shiirmachin Yus surustinian nakitruirainti.

10

Ántar-Yus tikishmatrashtiniaiti

¹ Enentáimpratarum, yatsuru. Yus yaunchu ii úñtrin ashí métek yáñmiayi. Nusháa yurañmijaj jintian nekapruamiayi. Tura ashí ii uuntrj nu yurañmin apapekar wearmiayi. Ashí núnisar Kapañku Nayaantsan Yus akankamunam wekasar katitkiarmiayi. ² Tura Muisaisan umirkar yurañminiam tura nayaantsanam ashí imiaimiu áintsan

ajasarmiayi. ³ Núnisañ ashí mash Yusnumiã yurumkan yuawarmiayi. ⁴ Entsancha ashí mash Yus susamunak umararmiayi. Kame Yus kayan-maya entsan akupkamtai ashí umararmiayi. Krístusha, nú kaya áintsañ, niijjaj tuke weakui ni wakaní atsumamurín Krístunmayaan takusarmiayi. ⁵ Tuma aijn Yus ti yáinmaitiat ni wakeramun umikcharmiayi. Tura ásar ni nunkeñ jeatsuk atsamu nunkanam ti untsurí jákarmiayi.

⁶ Iisha nujaj unuimiartiniaitji. Iikia ni wakeriarmia áintsarⁱ yajauchia nu wakerukchatniuitji. ⁷ Nu asamtai ántar-yus ni túrawarmia áintsarum tikishmatrairap. Iis, jiru yusrí shiir awajenakui Yus-Papinium áarmaiti, “Nu shuar yurumáwar nampekar námper ti najanawarmiayi.” Tu áarmaiti.

⁸ Nii túrawarmia núnisrik iikia tsanirmashtiniaitji. Nuna túrawar paintitres mir (23.000) chikichik tsawantaj jákarmiayi. ⁹ Iisha tunáa túrar “Yus asutiúashtatui” tu enentáimprashstiniaitji. Niisha nuna túrawar napijjaj esaim untsurí jákarmiayi. ¹⁰ Yussha yajauch áujmatsashtiniaiti. Nuna túrawarmatai Yus ni suntarin akupak untsurín maawarmiayi.

¹¹ Yaunchu ii úntrijjaj túrunamu in amúamu tsawantnum pujajnia nuna jintinramat tusa áarmaiti. ¹² Tuma asamtai shuar “Tunaanum iniaarchattajaj” tákunka anearti. Anearchamka iniaarminiaitme. ¹³ Tura ame itiurchatrumka aya amek nekapeatsme. Chíkich shuarsha nu itiurchatjaj métek nekapsatin ániawai. Jusha ti enentáimpramniaiti. Ame katsuntratin tujintiamna nuna nankaamas itiurchatan Yuska péñker asa tsankatramatsui. Antsu itiurchat tarutrammatai, nu itiurchatnum pujamin Yuska uwempratniun jintinramattawai. Nújainkia katsuntrat-tame.

¹⁴ Nu asamtai aneamu yatsuru penke ishichkisha ántar-yus enentaim-tusairap. ¹⁵ Atumsha nékatsrumek. Wi tájana nu nekaschakait. ¹⁶ Kristu jakamu enentáimtustin námper najanar Yus áujeaji Kristu numpen nakumea nu shiir atí tusar. Tura métek umarar nujaj Kristu numpé métek enentáimtaji taji. Tura apatkusha púurarⁱ tura métek yuarⁱ nujaj Kristu ayashí in jarutramkamu métek enentáimtaji taji. ¹⁷ Apatkusha chikichkiitiat púuram untsurí ajatsuk. Iisha núnisrik untsuríitiatar nu apatuk métek yuarⁱ métek enentáimprar chikichik ayashtinia áintsar aji.

¹⁸ Israer-shuartisha enentáimpratai. Yus-sutai namanken yuinia nu, métek yuawar Yusan métek enentáimtuiniatsuk. ¹⁹⁻²⁰ Núnisañ Yus-shuarcha ántar-yus sutai namanken suiniak nekas-Yusan suiniatsui antsu yajauch wakanin suiniawai. Kame ántar-yus ániak penké ántar ániawai, iwiaakuchu ániawai. Nu namansha sutai namanketiat péñker namanquete, yajauchichuiti. Aya junak tajai. Yus-shuarcha ántar-yus sutai namanken suiniakui amesha niijjaj métek yuamka yajauch wakanniasha niijjaj métek enentáimtaji tame. Nu antsu yajauchiiti. ²¹ Kristu numpen nakumea nu úmakrum íwianch susamua nuka umarchatniuitrume. Kristu ayashin nakumea nu yúakrumka íwianch susamua nuka yúashtiniaitrume. ²² ¿Warí, Yus akajkatin wakeramek. Iisha nin nupetkamniashitaj?

Aya aneakur takastiniaitji

²³ “Ashí túramniaitjai” tiniu ániawai. Ayu, tura mash yáintkiashtatui péñker wekasatniun. Nekas ashí túramniaitjai tura mash yáintkiashtatui wakaniar kakaram ajastin. ²⁴ Nú arantcha chíkich yáintincha enentáimpratniuitji. Aya íniuk pachischatniuitji.

²⁵ Naman s^umakum inintrutsuk sumakta. Tura ántar-yusan susamusha yajauchichuashit enentáimtsuk páchitsuk yuata. ²⁶ Ashí ju nun^ukasha tura ashí ír^unna nusha Yús^unachuk ainia. Tuma asamtai péⁿker ániawai.

²⁷ Yus-shuarchasha yurumkan ajampramkuisha ashí mash yajauchichuashit tu enentáimtsuk páchitsuk yuamniaitme. ²⁸ Tura chíkich chichaak “Juka ántar-yus susamu naman^ukete” túramkuin^ukia nuikia yuawaip. Yúakminkia nu shuar it^uirchat enentáimprattawai. ²⁹ Ame páchitsuk yuamniaitkiumnisha nii antsu yúachmin asa it^uirchat enentáimprattawai.

Tura amesha tichatameash “¿Urukamtia nii tujintiakui wi yúachminiait^uaj. ³⁰ Wi Yús^uan yuminsan yúakuisha urukamtia it^uirchat enentáimturainia. Yus yuminsachmakait?” tichatameash. ³¹ Ayu, yúakmesha úmakmesha ashí túramna nusha ashí shuar Yús^uan shiir enentáimtusarti tusan túratá. ³² Tuma asamtai ii túramujai chíkich shuar tunaanum ajuashtiniaitji. Israer-shuarsha, Israer-shuarchasha, Yus-shuarsha ashí yáin^utiniaitji. ³³ Wis^ua ashí shuaran yáin^utinian tuke enentáimjai. Ashí shuar uwemprarti tusan wi wakeraj nuna enentáimtsuk nin yáin^utinian tuke pujurjai.

11

¹ Kristu turamia áintsan takaajai wisha. Atumsha núnisrum wi takaajna áintsarum takastarum.

Nuwa Yusa jeen túratin

² Yatsuru, átum winia tuke enentáimturarum wi tímiajrumna nu umirniuitrume. Tuma asakrumin shiir enentáimtajrume. ³ Nu arantcha ujaajrume. Yus Apa Krístun akupea áintsan^u Kristu ashí áishman^ukan akupeawai. Núnisan^u áishman^usha ni nuwen akupeawai. ⁴⁻⁵ Íj^uja^uin^ukia shuar Yus áujenak tura núnisan^u Yus-Chichaman éts^uerainiak áishman^u etsen^ukrukchatniuiti antsu nuwá múuknum nukumaktiniaiti. Tuma asamtai áishman^u nu^uj etsen^ukrakka natsantaiti. Tura nuwá múuknum nukumakchan^uka natsantaiti. Intiashin tsupimiarua áintsan^ukete. ⁶ Nuwá múuknum nukumaktinian nakitiakka intiashin tsupír^utí nuikia. Watsek, nuwá ni intiashin tsupirtinian nakitiakka, tura awampratnium natsam^uakka múuknum nukumakti nuikia. ⁷ Áishman^ukka Yús^uan nakumeawai. Yusna shiir ana nuna nakúmkáttsa Yus áishman^ukan najanamiayi. Tuma asamtai áishman^ukka etsen^ukrukchatniuiti. Antsu nuwan^uka áishman^una shiir ana nuna nakúmkáttsa Yus najanamiayi. ⁸ Iis, Yus áentsun najaneak nuwan^umaya^u áishman^ukan najanachmiayi antsu áishman^uka ukunchí^uj^uai nuwan^u najanamiayi. ⁹ Nuwan^u yáin^ukiát tusa áishman^ukan najanachmiayi antsu áishman^ukan yáin^ukiát tusa nuwan^u najanamiayi. ¹⁰ Tuma asamtai núwaka múuknum nukumaktiniaiti, nayaimpinmaya^u aencha íisarti tusa. ¹¹ Ayu, tura áishman^u nuwaj^uin^uchu atsuinti tura nuwásha núnisan^u áishman^uja^uin^uchu atsuinti. Yus ju nun^ukan núnisan^u atí tusa najanaiti. ¹² Iis, Yus nuwan^u áishman^unumiá najanamiayi tura áishman^usha nuwan^umaya^u akiiniaiti. Tura Yus mai najanaiti.

¹³ Enentáimpratarum atumsha. Nuwá múuknum nukumatsuk Yus áujsatin ¿pén^ukerk^uait? ¹⁴ Ii shuartinkia áishman^u intiash ajakin natsantchakait. ¹⁵ Antsu núwaka intiash ajakin péⁿkerchakait. Múuknum nukumaktinian susamuiti. ¹⁶ Watsek, shuar tuke umiktinian nakitiakka ju^una nekaati, iisha tura ashí Yus-shuartisha aya tu enentáimji.

Kristu jakamu enentaimtustin nampernum yajauch túramu

17 Yamái áarattajrumna nujajñ shiir enentáimtsjarne. Atum irunkuram yáiniaiktiniaitruma tuke péñker wekasatin. Átum antsu iruntrarum yajauch awajnaiyarme. 18 Wats, Yusa Jeeñ irunkuram atumsháa enentáimprarum kanakurme. Kame tu ujatkarmai. Nekaschashit. 19 Tuke tupartatrumek Yúsnan ti nekana nu shuar paant nekanat tusarnea. Antsu kajernaikiar kanaktin péñkerchaiti. 20 Kanakin asarum Kristu jakamu enentaimtustin nampernum atum iruntrarum yúarmena nu nekas Yúsnachuiti. 21 Iis, ashí ní yurumken itiaawai aj yurumátsa tura chikichan nákatsuk niá niá wari yuattsá wakerawai. Chíkichkia ishichik itiaana nu tsukamawai tura chikichcha nampekarai. 22 Yurumkan ishichik itiaana nu iniatsáarchamek. Atum áitkiarum núnisan Yusa jeeñ yurumáshstiniati. Natsantaiti. Warí, chíkich jeñ átsuk aj yurumátin. ¿Warimpait. Jujajñ shíirash áusjstjarum? Atsá. Jujajñ shiir áusjstiniaitjarne.

Kristu jakamu enentaimtustin námper

23 Ii Uuntri Kristu jintintruama núnaka ujakmajrume. Jútas tuke súratsajñ, nu kashi ii Uuntri Jesus apatkun júki 24 Yusan yuminsamiayi. Nuyá puur tímiayi “Yuatarum. Jusha winia ayashruiti; atumin jarutramkatta núiti. Ju yúakrum Winia enentáimtsarum” tímiayi. 25 Núnisan yurumá umik piniñnasha achik tímiayi “Ju piniñ Yamaram Chichamaiti. Tura winia numpar puármatai Yamaram Chicham nekas uminkiattawai tawai. Ju tuke úmakrum Winia enentáimtsarum’ tímiayi. 26 Tuma asamtai ju apatuk yúakrum tura piniñsha úmakrum ii Uuntri Kristu jakamuri enentáimtarne. Kristu táatsajñ ju tuke túratniuitrume.

Shiir enentajijiai Kristu jakamu enentaimtustin nampernum yuatniuiti

27 Tuma asamtai shuar Yusan enentáimtsuk ju apatkun yuawar tura ju piniñnumiñcha umarar Kristu ayashincha ni numpencha yajauch enentáimta asa tunáa túrait. 28 Nu asamtai ashí shuar ju apatkun yútsuk tura ju piniñnumiñcha úmutsuk ni enentáin iwiaratniuiti Yusjaj. 29 Kristu ayashí jakamu enentáimtsuk yúakka tura úmakka nuna tura asa asutniáttawai. 30 Atumsha tura asarum jaarme tura pimpiruitrume. Chikichcha jákaru áiniawai. 31 Ímia-iik ímiakrinkia Yus in asutiámachaintji. 32 Tura ii enentáin Yus yajauchia nuna wáiniuk asutiámji. Túrachkunka ashí Yus-shuarhajaj súmamtikramawaintji.

33 Tuma asamtai, yatsuru, iruntrar yurumátsa matsatkurmeka nákastarum métek yurumátin. 34 Shuar tsukamakka ni jéeniñk’ yurumáti. Nújajñkia yajauchijijai irunchakrumin Yus asutiámshstatrume. Ayu, chíkich áatrururmena núnaka wi aj jean iwiarattajai.

12

Yusa Wakaní ni shuarin susamu

1 Yusa Wakaní ashí ni shuarin súana nuna yamá ujakattjarne. Nekaatarum, yatsuru. Yus-shuar shiir takasarti tusa Yusa Wakaní juna súsaiti.

2 Yaunchu átum Yus-shuar tuke ajatsuk chíkich shuarjaj métek ántar-yus tikishmatramarme. Niisha ántar-yus ásar áujmattramsachmin ármiai. 3 Tura jújajñ shuar Yusa Wakaní kakarmarjijai chichaana nu nekaamni-aiti. Yusa Wakaníjjajñkia shuar “Jesus yajauchiiti” tíchamniati. Núnisan aya Yusa Wakaníjjajñ “Jesus winia Úuntur asa akuptuktiniati” tíminiaiiti.

4-5 Yusa takatrí íruntsuk. Tura Yusa Wakaníñkⁱ ashí nuna takastinian súsaiti. Tura shuar Yus-shuara Uuntrí chikichik aín ashí Yusa takatrín métek takaatsui. Antsu chikichkin ashí nan̄kaamas péñker takaawai. Yusa Wakanísha nuna shiir takasat tusa súawai. Tura Nii wakera nuna Niñki ni shuarín chikichik chikichik niisháa niisháa súawai. ⁶ Yúskete ashí ni shuarín niisháa takamtikeana nu. Niñki ashí ni shuarí enentáin takaak takatnasha shiir takamtikeawai. ⁷ Yusak túratin súam Yusa Wakaní kakarmarí paant átatui nu takasmanum. Tura ashí shuar ní takatríjjai yáiniaiktin áiniawai. ⁸ Júnaka Yus takamtikeawai. Nékana nu shuarnasha, unuimiarua nunasha Yúsnan ujaktinian súawai. Tura mai shuaran Yusa Wakaní kakarmaríjjai nuna túratniun súsaiti. ⁹ Chikichnasha Yúsán áujenak Yúsán ti enentámtusar nekas itiurchat ana nuna iwiaratniun súawai. Nincha Yusa Wakaní kakarmaríjjai nuna takastinian súsaiti. Chikichnasha jaan tsuártinian súawai. ¹⁰ Chikichnasha aents niñki túrachminian túratniun súawai. Chikichnasha Yúsnan etserkatniun súawai. Chikichnasha shuar wari yajauch wakannia péñker wakaníasha apatka nekaatniun súawai. Chikichnasha niisháa chichaman chichastinian súawai. Chikichnasha niisháa chichasman jintiatniun súawai. ¹¹ Tura ashí shuara enentáin nu Wakanik takaawai. Tura Nii wakera nuna an̄kant an̄kant súawai takastinian.

Ashí Yus-shuar Kristu ayashía áintsan ajainiawai

¹² Iikia Kristu ayashía áintsarⁱ ayashímkiatiji. Kristu ayashí muchitmarísha írunui. Niisha túmaitiat chikichik ayashtiniaiti. ¹³ Tura imianiakrin Yusa Wakaní chikichik awajtamsamji, Kristu ayashía áintsan. Israer-shuarsha, Israer-shuarchasha, ti itiurchat takaana nusha, an̄kant ainia nusha, ashí yamáí chikichik ajasuitji. Tura Yusa Wakaní pimiutkamuitji Niíjjai tsaníñkia pujakur.

¹⁴ Ayashí muchitmarí aya chikichkichiuiti. ¹⁵ Tuma asamtai, winia nawer uwejruchiuitiat tuke winia ayashrunuiti. ¹⁶ Winia kuíshrusha jíiruchiuitiat tuke winia ayashrunuiti. ¹⁷ Wátsek winia ayashur aya jíikitkiuin̄kia ¿itiurak antukaintiaj? Winia ayashrusha aya kuíshkitkiuin̄kia ¿waríjjain̄ nekapsaintiaj? ¹⁸ Nu asamtai Yus winia ayashru muchitmarí ni wakeramunam ikiusuiti. ¹⁹ Chikichik muchitmajain̄ ¿ayash áminkiait? ²⁰ Antsu untsurí muchitma akuisha chikichik ayashkiiti. Iisha núnisrik chíkich chíkich iisháa takayatrik métek takasar Yus wakeramu takamtsuk umíaji.

²¹ Winia jíiru péñker aín winia uwejrúncha wakerishtatjak. Winia muukarsha péñker aín winia nawernasha wakerishtatjak. Núnisan Yus-shuar shiir enentáimtumak ni yachin “atsumatsjame” tíchamniaiti. ²² Antsu ii muchitmarí ishichik enentáimtajnia nu atsakuin̄kia ti atsumawaintji. ²³⁻²⁴ Chíkich muchitmasha, ímiancha nu, shiir iwiarmamtaji. Tura nu muchitmaka shiir íisminia nujai nan̄kaamas péñker wainji. Iis, shiircha nu antsu péñker wainji. Yus ii ayashín núnisan atí tusa najanamiayi. ²⁵ Nujain̄kia ayashí muchitmarí máanaitsuk métek yáiniainiawai. ²⁶ Chikichik muchitmaram najaimiakum ashí ayashniun wáitiatsmek. Núnisan chikichik muchitmaram ayap ajakum ashí ayashniun shiir átsumek.

²⁷ Núniskete Kristu ayashíjjai ayashímkiajⁱ nu. Tura chíkich chíkich ni muchitmarí aji. ²⁸ Ayashniun muchitma írunna áintsan Yus ni shuarín

untsurí takatan súsaiti. Emka Yus akatramu, nuyá ni chichamen etserin, nuyá jintinkíartin, nuyá aents túrachminian túrin, nuyá tsuákratin, nuyá yáinkratin, nuyá akupin, nuyá niisháa chichamjají chicharin, mash írunui. ²⁹ ¿Ashí Yus akatramuk ainia. Ashí Yus-Chichaman etserniuk ainia. Ashí jintinkratniuk ainia. Aents túrachminian ashí túriniak ainia. ³⁰ Ashí tsuákratniuk ainia. Ashí niisháa chichamjají chichamtiniak ainia. Ashí niisháa chichamjají chichasman jintinkratniuk ainia? Atsá. Túmachuiti. ³¹ Túmaitkuinkia péñkera nu takastin wakeruktarum. Tura imiá péñkera nuna juj jintintiatjarme.

13

Aneatin

¹ Ju nunkanmaya aentsu chichamen untsurí chichayatnak tura nayaimpinmaya aentsu chichamencha chichayatnak anenkratchaknaka tampur meserua áintsanak aya ten-ten ajajai. Penké ántranak chichaajai. ² Yus-Chichamnasha ti shiir étseriatnak, túrasha ashí uukmancha tura ashí nekaamniancha nékayatnak, túrasha Yúsan ti enentáimtusan murá umuchiayatnak, anenkratchaknaka penké ántraitjai. ³ Ashí wi takakjana nuna atsumainian súayatnak tura Yus shiir awajsattsan winia ayashrúncha áesawarti tusan surumayatnak tura anenkratchaknaka ántranak túraitjai.

⁴ Anenkartaka wari kajeatsui, tsánkaiti, chíkich shuaran shiir awajniuiti, péejchach asa waantu enentáimtumatsui. ⁵ Anenkartaka natsanta nuna túrichuiti, níniunak enentáimchaiti, kajechuiti, páchichuiti. ⁶ Chikicha tunaarín wararchaiti antsu péñker shuaran wararniuiti. ⁷ Anenkartaka aya katsunteawai. Tsanú chichamnasha nakitiawai antsu aya péñker ana nuna nákwai. Tunáa shuar shiir ajastí tusa tuke nákwai.

⁸ Anenkrattainkia tuke amuukashtiniaiti. Antsu ju nunka amuukmataisha Yus-Chicham etserkatin atsuttawai, tura niisháa chichamjají unuimiatsuk chichastincha amuukattawai, tura ashí nekanamtai unuimartincha atsuttawai. ⁹ Kame yamaikia aya ishichik nékaji. Yus-Chichamsha amutsuk étserajai. ¹⁰ Túra ukunam mash nekanamtai yámankamtaik nekaamuka ántar átatui.

¹¹ Yaunchu wi uchich asan uchichia áintsan enentáimkiun chichasmajai. Antsu yamaikia uunt ajasan uchiniun iniaisaitjai. ¹² Núnisrik yamáí ju nunkanam Yus paant wáintsuji. Íspik kusurunam ímsatniua áintsankete. Antsu ukunam mai métek paant wainniaikiattaji. Yamaikia aya ishichik nékajai. Nuí antsu Yus winia nékara áintsanak nekaattajai. ¹³ Watsek, menaintiu amuukashtin áiniawai. Ju áiniawai: Yus shiir enentáimtustin, shiir ana nu nákastin, tura anenkrattai. Ju menaintiunmasha anenkrattainkia ashí nankaamakuiti.

14

Niisháa chicham unuimiatsuk chichastin

¹ Nu asantai, anenkratin atarum. Tura núnisrumek Yúsnan péñkera nu takastin wakeruktarum. Imiankaska Yus-Chicham etserkatin péñkeraiti. ² Nújainkia niisháa chichamjají unuimiatsuk chichastin péñkerchaiti. Iis, nu shuar chíkich shuarjai chichatsuk aya Yusjai chichaawai. Ni chichame penké antukchamniaiti. Yusa Wakaní nin chichastinian súawai túrasha tana nu nekaachminiaiti. ³ Antsu Yus-Chichaman étsera nuka shuaran yayawai. Shuaran ikiatsuaráta, tura

ikiakártasa, túrasha atsankrattsa yayawai. ⁴ Niisháa chichamjaj unuimi-atsuk chichaana nuka aya níŋki katsuártinian yáinmamui. Antsu Yus-Chichaman étserea nuka ashí Yus-shuaran ikiatsuáwai.

⁵ Atumsha ashí mash niisháa chichamjaj chichastinian wakerajrume. Túrasha nuna nankaamas Yus-Chicham etserkatniun wakerajrume. Aya chichastinjainkia ju imiá péŋkerchakait. Kame chichasma jintiákmeke maak. Nujaj Yus-shuar tsakarartatui. ⁶ Enentaimpratarum, yatsuru. Nuj iraakun aya niisháa chichamjaj chichaaknaka žitiura yáintatjarum? Antsu Yus winia jintintruamuncha tura wi nékajna nunasha étserkunka yáintatjarume. Yus-Chichamnasha tura ashí Yúsnancha jintinkiuuncha yáintatjarume.

⁷ Peemsha tura tumaŋsha wi tájana áintsan áiniawai. Péŋker tuntuíyamuka paant nekaamniaiti. Tura péŋker tuntuíyachkuíŋkia, nu tuntuíyamu nekaachminiaiti. ⁸ Suntarsha mesetnum wéenakui ni kapitiántri ni wakeramun ujaktinian kachun umpuawai. Paant umpuakuíŋkia suntarsha ni wakeramun nekaawartatui. Tura paant umpuachkuíŋkia suntarsha žitiurak mesetnum wétinian iwiarat? ⁹ Atumjajisha núniskete. Nekaachmin chichamjaj chichaakminkia žtámena nuna itiu nekaawartata? Nase chichartsumeash. ¹⁰ Ju nunkanmaya chichamka ti untsurj irunui. Nu chichaman nékacka ashí antukmin áiniawai. ¹¹ Tura chíkich shuara chichamen ántachkunka níjijainkia yajaya apachia áintsanak ajajai. Niisha wíjijainkia yajaya apachia áintsankete. ¹² Tuma asamtai, Yusa takatři ti wakera asarum ashí Yus-shuaran ikjarartatna nú takat nekas wakerukturum.

¹³ Nu asamtai niisháa chichamjaj chichaitkiumka chichasumna nu jintiartin Yus seata. ¹⁴ Niisháa chichamjaj Yusan áujeaknaka nekas winia wakantruujaj áujeajai tura áujsajna nuna nékatsjai. ¹⁵ Antsu wikia júnisan enentáimjai. Yusan áujeakun winia wakantruujajisha áujsattajai tura enentáimtsuk áujsastatjai. Kantamkuncha kantamaj nuna enentáimkiun winia wakantruujajisha kantamattajai. ¹⁶ Amesha shuar iruntramunam aya wakanmijaj niisháa chichamjaj Yus shiir yuminsakmincha nekaachmin asamtai nékachuka ámijaj métek áujsatniun jeatsui. ¹⁷ Ti shiir Yus yuminsam áujeatsmeash tura chíkichka Yusjaj ikiakáatsme. ¹⁸ Ashí átum nusháa chichamjaj chicharmena nuna nankaamas wikia chichaajai. Nuna Yusan yuminsajai. ¹⁹ Túmaitiatnak untsurj chichamjaj chichasan ántumtikiashtinjainkia nankaamas Yus-shuar iruntramunmanka aya senku chichamchijajin tiintjai, paant jintintiwartaj tusan.

²⁰ Yatsuru, uchia áintsarum enentáimprairap. Kuirchia áintsarum tunáa túrashtin enentáimpratarum tura chíkich irunna nujaj uunt enentáimpratniua áintsarum enentáimpratarum. ²¹ Yus-Papinium áarmaiti: “Yajaya shuaran akupkan niisháa chichamjaj chichastatjai. Tura nújajisha anturtukchartatui” tawai Yus.” Tu áarmaiti.

²² Nújainkia páantaiti, nusháa chichamjaj chichastinkia Yus-shuarchan ashamtikiar enentáimtikratniun Yus súsaiti. Yus-shuaran tu enentáimtikratniun súsachuiti. Antsu Yus-Chichaman etserkatniunka Yus-shuarchan enentáimtiktsuk Yus-shuaran yáintinian súsaiti. ²³ Tuma ajn, nékachusha tura Yus-shuarchasha Yus-shuar iruntramunam wayanka tura ashí niisháa chichamjaj chichainianak wáinkianka “mash waurka ajasarai” enentáimturmarchartatua. ²⁴ Tura Yus-Chicham étserkurminkia nékachusha tura Yus-shuarchasha nuj wayanka ashí tárugna nujaj ni

tunaarin íimias enentáimturatui. ²⁵ Nújainkia ni enentáin úumak ana nuna paant wáiniak tikishmatar Yusan shiir awajsattawai. Tura “nekas Yus atumjaj pujawai” títiatui.

Ashí tuke shiir takastarum

²⁶ Ayu, júnisaiti, yatsuru. Átum irunkurmin shuar takastinian Yus nin susamu túratí. Kantamátniuncha, jintintiatniuncha, Yus iwiainiakman ujaktinniasha, nusháa chichamjaj chichastinniasha, nusháa chichasman jintíatniuncha, ashí Yus-shuar Yusjaj tsakararti tusar júna mash takasarti. ²⁷ Nusháa chichamjaj chichainiakka chikichik chikichik chichasarti. Tura jimiarchik menaintiuchiksha chichasarti. Tura ni timianka jintiartiniaiti. ²⁸ Jintiartin atsakuinkia nusháa chichamjaj iruntramunam chichaschatniuiti. Antsu niniki Yusjaj chichasti. ²⁹ Núnisan jimiarchiksha menaintiuchiksha Yus-Chichaman etserkarti. Tura chikich shuar nu*í* iruntrar ni etserkamun enentáimprarti péñkerashit tusar. ³⁰ Tura chikichik chichaakui Yus chikichan nu*í* pujana nuna yamaram chichaman súakuinkia emka chichaa nu iníaisatí. ³¹ Núnisrum Yus-Chicham etserkatin wakerarmena nu chikichik chikichik chichasrum ashí jeattarme. Nújajsha Yus-shuar unuimiarar kakarartatui. ³² Yúsnan étserainia nuka tuke enentáimprar chichastin áiniawai. Enentáimtsuk nánkamsan chichasmin áiniatsui. ³³ Yuska pachimtak chichaman nakitiak shiir chichasmanak wakerawai.

Chíkich nuñkanmasha ashí Yus-shuar iruntramunam túrainia áintsarum túratniuitrume atumsha. ³⁴ Yus-shuar iruntramunam nuwá chichastin surimkiamuiti. Yus akupea núnisan núwaka chichatsuk umin átin áiniawai. ³⁵ Inintrustininian wakerakka ni jeen waketkin ni aishrin nu*í* aniasti. Ashí iruntramunam nuwá chichastin natsantaiti.

³⁶ Jusha enentáimpratarum. Yus-Chicham atumjaj nanñkamnachmai. Núnisan aya atumjiniñ Yus-Chicham jeartamchaiti. Chíkich nuñkanmasha Yus-shuarti túrutai enentáimpratniuitrume atumsha. ³⁷ Atumjín shuar “Yus-Chichaman tuke etserniuitjai” enentáimtumatsuash. Tura chíkich shuarsha “Yusa Wakaní tuke winia akuptaiti” enentáimtumatsuash. Nu shuarka wi áatjarmena nuna enentáimprar “nekas Yúsnan tíniuiti” tiartí. ³⁸ Tu táchakuinkia niisha ántrar áiniawai.

³⁹ Nu asamtai, yatsuru, Yus-Chicham etserkatin wakeruktarum. Nusháa chichamjaj unuimiatsuk chichastincha surimkiairap. ⁴⁰ Túmaitiat antukchamin awajtsuk ashí shiir túratarum.

15

Kristu nantakmia

¹ Ataksha, yatsuru, uwempratin chichaman wi etserkamaj nuna atumin enentáimtikratsan wakerajrume. Nu chichamsha atumsha enentáimturarum tariarurme. ² Nu chichamsha átum ántar enentáimtachkurmeka uwempraitrume. Wi ujakmajrum nu tuke enentáimtaitkiurmeka nekas uwempraitrume.

³ Winia ujatkamunak ujakmajrume. Nu chichamsha ashí nanñkaamas úuntaiti. Júiti nu chicham: Ii tunaarin asakártasa Kristu jarutramkamiaji, Yus-Papinium tana núnisan. ⁴ Tura jakamtai iwiarsarmiayi. Nuyá menaintiú tsawant sawarmanum Yus Nin iniantkimiayi, Yus-Papinium

tana núnisan. ⁵ Nantakisha Pítrun wantintiukmiayi, nuyá ni akatramurín wantintiukmiayi. ⁶ Nuyañka kiniantusa (500) nañkaamas Yus-shuaran wantintiukmiayi. Nú shuarnumiasha ishichik jákaru áiniawai tura untsurí tuke pujuiniawai. ⁷ Nuyasha Sántiakun tura nuyá ashí ni akatramurín wantintiukmiayi.

⁸ Ashí amúamunmasha winiasha wantintiurkamiayi, wi yajauch wekaa ain. ⁹ Wisha Yus-shuaran ti yajauch awajsa asan chíkich Yus-akatramujai ímianchaitjai. Nekas winia péñkerujai ni akatramuríntjai tíchamniaitjai. ¹⁰ Antsu Yus ti shiir anentak winia enentáiruj pujurtus péñker najataiti. Nu asantai winia kakarmarjai takaschaitjai, antsu Yus, anenkartin asa, winia enentáiruj takaakuí ashí ni akatramurín nañkaamas takasuitjai. ¹¹ Tura wi takaakuisha tura ni takainiakuisha mai péñkerkete. Nu chichamka mash étsereaji tura nu chichamsha átum enentáimtusmarme.

Jákaru nantakiartatui

¹² Iisha “Kristu jakamunmayá nantakniuiti” tu étsereaji. ¿Itiur nuikia shuar jakamunmayá nantakchatniuiti tuinia? ¹³ Jakamunmayá nantakchatniuitkiuinikia nuikia Krístusha nantakchaiti. ¹⁴ Tura Kristu nantakchaitkiuinikia ii uajnia nu penké ántraiti, atumsha Kristu enentáimtarmena nusha ántraiti. ¹⁵ Núnisaitkiuinikia iisha “Yus Krístun iniantkimiayi” tákur waitruamji. Iis, nekas jakamunmayá nantakchamniaitkiuinikia nuikia nekas Yus Krístun iniantkichiuiti. ¹⁶ Jaka nantakchatniuitkiuinikia imia Krístusha iniantkichmaiti. ¹⁷ Tura Kristu iniantkichmaitkiuinikia átum Kristu enentáimtamusha penké ántraiti. Tunaarmisha asakárchamu áiniawai. ¹⁸ Núnisaitkiuinikia Yus-shuar jákaru ainia nu tuke menkakarú áiniawai. ¹⁹ Iikia Kristu enentáimtusar tuke Niijjai shiir pujustin nákaji. Tura aya jú nunkanam pujustiniaitkiurkia Kristu ántar enentáimtakrin ashí nañkaamas waitnentrampratniuitji.

²⁰ Antsu imiankas Kristu jakamunmayá nantakniuiti. Ashí ukunam jakanmayá tuke jákashtinian nantakiartatna nuna Nii émtukuiti. ²¹⁻²² Yaunchu Atañ tunáa túramtai ashí shuar jákatin áiniawai. Núnisan yamaikia Krístujain tuke atakka jákashtinian nantakiartiniaiti. Iis, chikichik áishmanjain jákatin nañkamnamiayi. Nuka Atañkayuyai. Núnisan chikichik áishmanjai nantaktin nañkamnamiayi. Nuka Krístuiti. ²³ Yus wakerana nuí Yusna nu mash nantakiartatui: Kristu emka-juukma áintsan émtukim nantakniuiti tura atak jú nunkanam tara ashí ni shuarín júuktinia áintsan iniantkittiwai. ²⁴ Nuínkia mash amuukattawai. Nuí Kristu ashí kapitánniasha, ashí akupniuncha, ashí núnisan jú nunkanam írúnna nunasha nupetak emesrattawai. Krístusha ashí mash ni Aparín susattawai. Tura Yus Apa ashí akupin átatui nuikia. ²⁵ Iis, júnisán átatui. Emka Yus Apa ashí ni nemasrín nupetak Krístun susattawai akupin atí tusa. ²⁶ Tura ni nemasrín nupetak ashí amúamunam jákatniuncha nupetkattawai. ²⁷ Yus Apa ashí Krístun súsaiti ashí akupin atí tusa. Yus-Papinium tu áarmaiti. Tura “ashí Krístun súsaiti” táyat Yus Apancha susamuiti tátsui. Antsu Yus Apa ashí Nin susa asa Niñki súsachmaiti. ²⁸ Tura Yus Apa ashí mash ni Uchirín Krístun nekas susantai Kristu nuikia ashí akupin ajas atak ni Aparín mash awantuki núnisan surumak-tatui. Nuínkia Yuska tuke ashí nañkaamantu átatui.

²⁹ Ayu. Tura shuar jakan enentáimtusar imiantinniasha ¿urukamtia nuna túruinia? Jákaru nantakchatniuncha ¿urukamtai imianainia?

³⁰ Iikia ζurukamtai tuke jániñkiaruitiaj? Nantakchatniuitkiuñkia ántra wáitsaintji. ³¹ Atsá, penké áintsachuiti. Nu asamtaí átum ii Uuntri Jesukrístu enentáimtakurumin wi shiir enentáimtajrume. Tura wisha tuke tsawantin ti itiuřchat pujakun jákatniua áintsan pujajai. ³² Jakamunmaya nantakchatniuitkiuñkia wi ánttranak kajen shuarjai Ipsiunam máaniakuitjai. Maa, uunt yawáa áinis kajen ármai. Wats, núnisaitkiuñkia antsu “yurumár nampektai, kashin jákashtatjik” titiai nuikia.

³³ Anannawairap. “Pénkeraitiatam yajauch shuarjai tsaniñkia wekak-meka yajauch máatrattame” tiniu áiniawai. ³⁴ Tunáa ikuakrum péñker wekasatin shiir enentáimpratarum. Iis, shuar Yúsán nékainiachu tuke awai. Atumin natsařruk tusan tájarme.

Iniantkimiu ayash átatna nu

³⁵ Shuarsha inintruschaimpiash ζjákarusha itiuřak nantakiarat. Nantakiarsha warí ayashniak takusarat? ³⁶ Enentáimtsuk inintrawai. Jĩñkiaí araamsha jaka áintsan amúatsuk. Túrayat tsapaatsuk. ³⁷ Tsapaitniurřsha araatsme antsu trikiu jĩñkiaichisha chíkich áraka jĩñkiaichirřsha araame. ³⁸ Nuyá tsapaakuisha Yus wakerana núnisan ní tsapaitniurřincha súawai. Tura ankant ankant tsapaitniurřincha súsaiti. ³⁹ Núnisan ashí ayash métékcha áiniawai. Áentsnaka niishaaiti. Kuntinniasha niishaaiti. Nanamtinniasha namaknasha niisháa áiniawai. ⁴⁰ Nayaimpiniam yaa írunei tura ju nuñkanam írúnna nujai nusháa ímtin áiniawai. Nayaimpinmayasha nuñkayasha shíirmari nushaiti. ⁴¹ Etsá wincharřsha nantunusha yáanusha mash nushaaiti. Nuamtak yaaksha chikicha wincharĩñkia chikichnajaĩñkia nushaaiti. ⁴² Núniskete jaka nantaktincha. Káurtinnium iwiarsam jákashtinnium nantaawai. ⁴³ Antra nu iwiarnawai, shiira nu nantaawai. Kakarmachua nu iwiarnawai, kakarma nu nantaawai. ⁴⁴ Juyá ayash iwiarnawai, nayaimpinmaya ayash nantaawai. Juyá ayash átsuk. Núnisan nayaimpinmaya ayashsha awai.

⁴⁵ Yus-Papinium nuní áarmaiti:

“Emka áishman ni naari Atan, aents ajas iwiaaku ajasmiayi.” Tu áarmaiti. Ukunmanka, yamaram Atanka áintsan, Kristu, wakan asa, ashí áentsun nekas iwiaaku átinian susamniaiti. ⁴⁶ Nayaimpinmaya ayashkia émkachuiti antsu juyá ayash émkaiti tura nuyá nayaimpinmaya nu. ⁴⁷ Emka áishman nuñkajai najanamu asa nuñkayaiti. Ukunmaya áishmansha ii Uuntri Kristu asa nayaimpinmayaiti. ⁴⁸ Atanka áintsan ainia nusha juyá ayashtin áiniawai. Kristu áintsan ainia nusha nayaimpinmaya ayashtin áiniawai. ⁴⁹ Yamái juyá áiniakur ukunam nayaimpinmaya ayashtin ajastatji.

⁵⁰ Juna tájarme, yatsuru. Ayash númpentin asa nayaimpiniam, Yus akupeana nuj, wayachminiaiti. Iis, káutainkia káurchatniunam wayachminiaiti. ⁵¹ Yaunchu uukma nu yamá nekaatarum. Ashí jákashtatji, túmaitiatar ashí yapajniáttaji. ⁵² Tura pusar muıtsarniñ ti wárik yapajniáttaji. Tura ashí amuukai tusa umpuariatui. Nú umpúamunmasha Yus-shuar jákaru ainia nu atak jákashtinian nantakiartatui. Iisha nuñ yapajniáttaji. ⁵³⁻⁵⁴ Jú kautainkia yamá jákatniuiat káurchamnia ajastini-aiti. Túřasha jákachmin átatui. Nu túrunamtaisha Yus-Papinium arma uminkiattawai:

“Jákatniun Yus nupetak amukuiti. ⁵⁵ ζItiur jákatjik yamaikia. Jákatniusha itiuř nupettamkan mantamataj?” Tu áarmaiti.

56 Yaunchu Yus akupkamu tiniu asamtai shuar tunáa tura jákatniuiti.
57 Yamái antsu ii Uuntri Jesukrístu túramujai jákatniunka Yus nupetkaiti.
Tura incha nujai uwempratniun amaakuí shiir yúmiñkiaji.

58 Nu asamtai, aneamu yatsuru, kakaram ajasrum yawetsuk nankaamas Yusa takatři takastarum. Ii Uuntri Krístujai tsaniñkia takaarum nuka penké ánrachuiti. Nu paant nékarme.

16

Yusa kuitři irurtin

1 Yusa kuitři irurtinkia, Yus-shuaran Karasea nunkanam tímiaj núnisnak atumniasha tájarme. 2 Ashí tumiñtin, Yus súramna áintsam akankam ikiusta. Nujaiñkia wi jeattaj nuĵ yaunchu akankamu mash irurmin átatui. 3 Nuĵ jeancha átum anaiyarmena nu shuaran papijjai Jerusaréñnum akupkattajai. Tura atumí kuítrumin aisha ii yachin sústartatui. 4 Wisha wéminiaitkiuñkia wijjai wéartatui.

Papru irastatna nuĵ

5 Wi Masetúnia nunkanam wétiniaitjai tura nuyá Kurintiunam jeattajai. 6 Nuisha untsurí tsawant pujuschatjash. Ishichik nantusha wéchanianum pujuschatjash. Tura wi atak wéakui atumsha yáintkiarum shiir akuptukchattarpash. 7 Aya wárik nankaamaktinian nakitiajai. Antsu Yus wakerakuñkia untsurí tsawant atumjai pujustaj tajai. 8 Tura juin Ipiasiunam pintikustís nampernum pujustajai. 9 Juinĵkia Yusa takatři tí shiir takastin awai. Tura untsurí shuar wi takaamun nakitiaini-awai.

10 Timiutéu nuĵ jeamtaiñkia, shiir awajsatarum; sapijmiakain. Niisha wijjai métek Yusa takatřiñ takaawiti. 11 Nu asamtai nakitirairap. Antsu yáinkrum winí shiir akupkatarum. Chíkich yachijjai tatí tusan nákaĵai.

12 Apurusnasha chíkich yachijjai winí írmasartí tusan tí seamjai tura penkeshanakiarmai. Kame nii ankant aku nuĵ winishtimpiash.

Áujmamsamu

13 Aneara tariarum Yus nekas enentáimtustarum. Áishmanchakaitrum, kakaram ajastarum. 14 Anenkartamujai mash túratarum.

15 Ayu, yatsuru. Estepanasa shuari ashí emka Akaya nunkanam Yus-shuar ajasarman nékarme. Niisha Yus-shuaran yáintajtsar tuke takainiawai. 16 Niisha tura ashí niijjai métek yáinkiar takainia nú shuar seatmana nu tuke túratarum. 17 Estepanassha Jurtunátusha Akaikiusha atumíyá táarmatai shiir waraajai. Átum yajá pujakrum tujintiarmena nuna túrawarmai. 18 Niisha winia shiir enentáimtikrurarai. Núnisañ shiir enentáimtikramprattarme. Nuní aents tuke shiir enentáimtustiniati.

19 Asia nunkanmaya Yus-shuar amikmáatmainiawai. Akirasha ni nuwe Prisirajajisha ashí Yus-shuar ni jeen Yus-Chichaman irunturarusha Jesusa náariñ amikmáatmainiawai. 20 Ashí ii yachisha amikmáatmainiawai. Nuámtaksha shiir awajnaismum amikmáaniatarum.

21 Wi Papru asan júchiniak winia uwejruijai áaran amikmaajrume.

22 Ii Uuntri Jesukrístun aneachuka yajauchiniam yumiñkramu atí. “Ii Úuntri, wari tatá.”

23 Ii Uuntri Jesukrístu yainmakarti. 24 Jesukrístunu asakrumin atumin ashí ti aneajrume. Nu atí.

Papru KURINTIUNMAYA SHUARAN Ataksha papin aar akuptukma

Kurintunmayq Yus-shuaran Papru áatramiania nu

¹ Wi Pápruitjai Jesukrístu akatramu. Yus nuna wakerakui ni akatramurj anaikiamuitjai. Ii yachj Timiutéujaj Yus-shuar Kurintiu péprunam íruntrumna nuna áatjarme. Kame ashí Akaya nunkanam Yusna ajasurmena nunasha áatjarme. ² Apa Yussha, ii Uuntri Jesukrístusha shiir enentáimturma ásar imiatkinchanum tuke shiir pujustinian yáinmakarat tusan wakerajrume.

Papru wáitsamurj

³ Ii Uuntri Jesukrístu Apari, ii Yusri ana nuna naari uunt awajsa-tai. Niisha ii Aparínti. In waitnentrámaji. Tura Niisha ii Yúsrínti. Tuma asa in tuke atsanámaji. ⁴ Ii wáitajnia nuj Yuska in atsanámaji. Tura in atsanámajinia nútiksarik iisha chíkich shuar wáitainia nuna atsankrarat tusa túrutmaji. ⁵ Warí, Kristu wáitsamurj núkap pachiinkiaitjinia núnisrik ni atsankraturin núkap pachiinkiaitji. ⁶ Tuma asam-tai, wáitajnia nu, Yusa uwentikrampratniurj tura ni atsankratniurj atumsha takustarum tusar wáitajji. Tura Yus in atsanámpramjinia nu, Yusa uwentikrampratniurj tura ni atsankratniurj átum takustarum tusar atsankraturj. Wats, átum uwentikramu tura atsankraturu asarum, ii wáitsajnia nútiksarmek wáitayatrum shiir enentáimsarum kat-suntramniaitrum. ⁷ Tura “túrattawai” tu enentáimtajrume. Warí, átum iijjai métek wáitsaitrum. Núnisañ iijjai métek Yus atsanámatsurmek.

⁸ Yatsurtiram, iikia Asia nunkanam ti ititurchat wáinkiamjinia nu nekaatarum tusar wakeraji. Imiá ititurchat wáinkiar iikia katsuntratin jeachmaji. ⁹ Nu ititurchatnumia “iwiaku jíinkisatati” tu enentáimsamji. Túrasa “iikia tujinchaitji” tu enentáimtumatsuk, antsu jakamunmayan iniannua nú Yúsan enentáimtusarat tusa nu túrunamji. ¹⁰⁻¹¹ Jakamnia ititurchatnumia Yuska uwentikrampramji. Tura yamaisha uwentikrampratajsa pujurtamji. Tura atumsha in Yus áujtakrumniñkia “Yuska tuke uwentikramprattaji” taji. Tura untsurj shuar Yus aujsa asakrumin, ii uwempra asakrin untsurj shuar Yúsan yumñsartatui.

Kurintunam wau wéchatniun Papru ujakmiania nu

¹² Yatsurtiram, ju nekaatarum tusar wakeraji. Ju nunkanam pujusar tura nekaska atumjai pujusar anantsuk tura Yus umirkar wekaimji. Aya ii nekatairijiañ wekaichamji. Antsu Yus in waitnentrama asa péñker wekasatniun yainmakmaji. Nu nekaar shiir enentáimji. ¹³ Áatjarmena nu páantaiti. Átum áusjarum nekaatin jearmena nunak aarjai. Chikichan nekaachminian aatsjai. Péñker nekaatarum tusan wakerajrume. ¹⁴ Ishichik nekayatrumek nú núkap tuke nekaki wetarum tusan wakerajrume. Nuñkia Jesukrístu tátinia nú tsawantaj átum winia shiir enentáimtusattarme. Tura átum péñker wekasa asakrumin shiir

enentáimtustatjarme. ¹⁵ Tura ii shiir enentaimtuniaj nuna nékakun ataksha Yusa waitnenkartutairj nekapsak tusan ataksha atumijn irastinian wakerimjai. ¹⁶ Masetúnia nunkanmaani wéakun írkuta nan̄kaikitjarum tusan enentáimmiajai. Tura wáketkuncha ataksha ístajrum tusan wakerimjai. Túramtai wi Jutía nunkanam weakui átum yáintkiatarum tusan atumin ístinian wakerimjai. ¹⁷ Nuin̄kia ¿urukantai túrachmaj? ¿Pénker enentáimtsukek “wetajai” tímiaj? ¿Wi Yus-shuarcha nunisan, jimiará chichamtiniaiti, tú enentáimtursarumek? ¹⁸ Núchaiti. Yus tana nuna tímiatrusan umíana nútiksarik iikia ii chichame umiktai tusar wakeraji. Jú chichamaik, “Ee, atsá” tátsuji. ¹⁹ Wisha Serpanujai Timiutéujai Yusa Uchirj Jesukristunun ujakmajrume. Niisha jú chichamaik, “Ee, atsá” tíchaiti. Antsu nii tana nuna tuke umíawai. ²⁰ Niijjajsha Yus tana nu tímiatrusan uminiui. Tuma asamtai Jesukrístu enentáimtakur “nii tana nuna nekas túrattawai” tu enentáimji. Tu enentáimsar Yusa naari shiir awajeaji. ²¹ Atumniasha incha ikiakátmajnia nu Yúsaiti. Krístunu ajasu asakrin túrutmaji. Tura anaitiamak Niiniu awajtamji. ²² Tura ukunam ii achiktatjnia nuna, nekas amatatjai tusa Yus ni Wakanin ii enentáin apujturmaj. Nujai Níniuitji tusar paant nékaji.

²³ Atumijn itirchatan wáinkiaij tusan nakitiakun atumí péprurin Kurintionam jeachmajai. Wáitrakuin̄kia “Yus iirsati” tajai. ²⁴ “Aya wi tájana nútiksarmek Yus enentáimtustarum” waantu enentáimtumasar nu titin nakitiaji. Yus nekas enentáimtusmaajai kakaarme. Antsu nekas warastarum tusar wakeraji.

2

¹ Tuma asamtai, atak kúntuts awajsajrum tusan nakitiakun, “atumí tunaari íwiartsurminin jeashtatjai” tímiajai. ² Wi atumin kúntuts awajkuncha, ¿yaki winia waramtikrusat? Aya atumek, wi nuik kúntuts awajsarmena nuke waramtikrusminiaitrum. ³ Wi jeakun atumí tunaari íwiartsurminin kúntuts enentáimsajj tusan nakitiakun, nu papin áarmaj nútiksarak áarmajai. Warí, atumketrum winia waramtikrustin. ⁴ Nekaatarum. Nu papin áarmajai. Kúntuts awajsatjarum tusan áarchamjai; antsu ti aneajrumna nu nekaatarum tusan wakerakun áatramajrume.

Yajauchin túrana nu tsankuratin

⁵ Túrasa kúntuts awajtusmia nu, aya wíniak kúntuts awajtuschamai. Antsu atumniasha ishichik kúntuts awajtamsayi. Patasa chichasajj tusan “ishichik” tajai. ⁶ Kame nu áishman̄kan iruntra chicharkarum wáitkiasmarum nuke máakete. ⁷ Antsu yamaikia tsankuratniuitrum. Shiir enentáimtikratniuitrum. Niisha imiá kúntuts pujus nú arant ajasáin tusarum túratniuitrum. ⁸ Túrakrum nii nekas anearmena nu paant iniaktustarum tusan seajrume. ⁹ Kame “aajna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarme. ¹⁰ Átum tsankurearmena nú shuaran wisha núnisnak tsankureajai. Tura tsankuratin ákuin̄kia, wi tsankurajna nu ashí atumnian enentáimtusan, Krístu ímmianum túrajai. ¹¹ Kame uunt iwianch Satanás in emestampratajtsa wakerana nusha nékaji. Tuma asamtai, túrawain tusar tsankuratniuitji.

Trúas péprunam Papru juákchamiania nu

¹² Krístunu shiir chichaman Trúas péprunam etserkatajtsan jean, ti péñker takastinian wáinkiamjai. ¹³ Túrasha ii yachi Titiun wáinkiachu asan, shiir enentáimsatniun tujinkiamjai. Tura asamtai Trúasnumiã aentsun áujsan ikiukiaran Masetúnia nunkanam wémiajai.

Krístujai nupetkamnaitji

¹⁴ Kristu Jesusjai Yuska incha nupetmamtikramak ewekatmasuitji. Tuma asamtai Nincha ti shiir yúmiñsa pujajai. Tura kukuj' kunjúakui, ashí nékainia núnisan ii etserkamujai Kristu shiir chichamen Yuska ashí aentsun nekamtikiainiawai. ¹⁵ Kristu in pujurtamu asamtai Yusjai nekapsamka iikia kunjúaji. Ii kunjúajnia nuna uwemtikramu ainia nusha tura uwentikrachma ainia nusha nekapramnia ainiawai. ¹⁶ Meñkakatniunam weena nuka ii kunjúajnia nuna jakamnia mejeã nekapramji. Tura iwiaaku átinnium weena nuka iwiaaku átin kunjúã nekapramji. Maa, nu túratniuncha çyaki jeá?

¹⁷ Kame untsurí aents kuítian achiktaj tusar Yusa chichamen yapa-jinia núniskechuitji. Antsu Krístunu ajasu asar, Yus akupkamu asar, Yus ímmianum anañtsuk esetsar étsereaji.

3

Yamaram chícham najanamu

¹ ¿Nu tákurniñkia, “ataksha niñki waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman nekas Yus-Chichaman etserin áiniawai” tusa papí aarma atumin iniaktustinkiaitjai? ¿Chíkich iniaktustin nú papí atumin seatniukaitiaji? ² Atsá. Átumka ii papiria núniskechukaitrum. Ii enentáin nu papí áarmaiti. Tura nú papí áujsatniua núnisan ashí aents atumí túramurj wáinkiar ii etserkamaj nu, Papru nekas Yusa takatrin takaawai tusa nekaamnia áiniawai. ³ Iis, tátsujak. Papí aarma núnisketrume. Nu papí Kristu áarmaiti tura iisha nú papí atumin súaji. Tíntiajainchu antsu iwiaaku Yusa Wakanjijai áarmaiti. Kayanmasha áarchamuiti; antsu shuara enentáin, auka, áarmaiti.

⁴ Kame Krístunu asar, Yus enentáimta asar, nusha tímíniaitji, taji. ⁵ Ju nékaji; imia iik penké tujinkiaitji. Antsu ii túrajnia nu Yus ni kakarmarin súramkurin túraji.

⁶ Yamaram chichaman Yus najanamia nuna, incha péñker etserkatniun suramsaitji. Yaunchu aarma chichamnum, ashí takamtsuk umirkachrikiã tuke jakamniuyaji. Antsu yamaram chichamnum, Yuska ni Wakanjijai yamaram wekasatniun súramji. Yusa kakarmarjijai nu chicham étserji. ⁷ Yaunchu chichamnaka kayanam aar Yus Muisaisan susamiayi. Susamia nuj, Muisaisa yapi ti wincha ajasmiayi. Túrunamtai Israer-shuar ni yapin íistinian tujinkiarimiayi. (Túrasha nu wincha mushatmaki wémiayi.) Túrasha nu chichaman shuar umirkatniun tujintiaku, nu chichamsha aya tuke jákatniunam shuáran ejemiayi. Túmayatañ winchajai susamuyayi. ⁸ Tura yamaram chichaman Yusa Wakanjijai súramna nu, nujai nankaamas shíiraiti. ⁹ Kame mesertinnium ejeana nú chicham winchajai susamuyayi. Tura nujai nankaamas Yúsnum ejeana nú chichamka Yus ímmianum péñkeraiti. ¹⁰ Iista; yamaram ana nu imiã shiir asa, yaunchu wincha amia núnaka mushatmamtikui. ¹¹ Núkap arur pujuschamnia nu wincha áchamkia. Kame tuke átinia nuke nujai nankaamas shíiraiti.

12 Nu nékaur ti paant étserji. 13 Muisais túramia nútiksarik túratsji. Ii uuntri Israer-shuar ni yapin wincha ajas menkaan wáinkiarain tusa tarachjai ni yapin Muisaisa nukumakmiayi. 14 Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarimiayi. Tura yamaisha núnisan yaunchu aarma chichaman áujsam antukar nekaatniun tujintiainiawai. Kristu enentáimtuschatin ni enentáin nukukma nu yapajiáchmaiti. Aya Krístujai nuka yapajiámniaiti. 15 Yamaisha Muisaisa áarmarin áujsar nékainiatsui, ni enentáimmiari nukurkamu asa. 16 Tura aencha ni enentá yapajiá Uuntna ajasmataikia ni enentáimmiariya nukurkamu ana nu jusamuiti. 17 “Uunt” tájini nu, Yusa Wakaníiti. Uunt Yusa Wakaní pujana nuj ankant ajastini-aiti. 18 Nuke asantai, iisha ii yapí tarachjai nukukchamu asar íspikia núnisketji. Uunt Kristu péñkerj iniakmaji. Kristu péñkerj nú núkap takaki wéakur, Krístujai métek ajastasa pujaji. Yusa Wakaníikia nuna túrawai.

4

1 Yus in waitnentrana asa ni chichamen etserkatniun ataktamsaitji. Tuma asantai yawetsuk takaaji. 2 Uuka túratin ana nuyá tura natsanmai ana nuyasha kanakmiayi. Anankatai tusar wekaatsuji. Tura Yus-Chichamjai nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túraji. Wi tájana nuna Yus nékawai. 3 Uwempratin Chicham ii étserjini nu páantaiti. Áyatik menkakatniunam weena nu “páantchaiti” tuñiawai. 4 Uunt iwianch, ju nunká uuntri ana nu, nu aentsu enentáin ukusturuiti. Uunt Kristunu shiir chichaman ii étsermajai tsáapnin enentáimprarin tusa ukustawai. Nu Kristu Yúsan ímiatrusan nakumui. 5 Iisha étserkur, Jesukristu ii Úuntriinti tu étseraeji. Iikia atumí úntriñtji tátsuji. Antsu, Jesus ii uuntri asantai, atumí yáñtriñtji, taji. 6 Yaunchu kiritin aan Yus tsáapin ati tusa tsáapnin awajsachmakia. Nú Yúsaiti ii enentáin tsáapnin awajtamsamia nu. Nu tsáapnijai ni shiirmarin, Jesukristu iniakmia nuna, ashí aents nekaawarat tusar Jesukristunun étseraeji.

Yusak enentáimtusar wekasatin

7 Nu tsáapin imiá péñker ana nuna ii ayashijn Yus ikiusuiti. Tura ii ayashj kakarmachu, nuwe najanamua áanin asantai, warí, kakaram ájini nu Yúsnumiáchukait. Ii aj nuna nekaawarat tusa Yuska ni tsáapniñtrin ii ayashijn ikiusuiti. 8 Tuma asantai ii iturchatrj árentmaku árinñ tuke jñinkimñaitji. “Itiurkatjik” taji, túrasha Yus yáñmaji. 9 Aents pataaturmainiakrincha Yus ikiurmatsji. Emesrataj tukamá tujintiaini-awai. 10 Kame Krístun máataj tusa tuke wakeriarmia núnisan incha tuke mantamataj turamainiaji. Túrasha jákachu asar Kristu kakarmari ii ayashijn iniakmaji. 11 Iisha Jesusna ajasu asar wekaajnia nuj tuke tsawant tsúumainium jasattuk ajaji. Túrar ii ayashj jakamñiaitiat nu ayashñium Jesusa iwiaakmari paant iniakmaji. 12 Iisha Yus-Chicham étserkur ii ayashijn jasattuk ajaji, tuma ajñ atumsha umikiu asarum nekas iwiaaku atin wáinkiarne.

13 Yus-Papiniun yaunchu áarmanum: “Yúsan enentáimtusmajai, tuma asan etserkamjai” tátsuk. Iisha núnisrik Yus enentáimtusar wekaaji. Tuma asar étserji. 14 Yus kakarmaiti. Uunt Jesusan jakamunmayan iniantkimi-ayi. Incha núnisan Jesusjai iniantamkittiaji. Tura atumjai métek ni pujamunam juramkittiaji. Nusha paant nékaji. 15 Atumsha untsurí

aencha Yus-Chicham antukakrumin, Yus yáinmakurme. Tuma asamtai atumsha nútiksarmek Yus yumínsarum pujarme. Nujaj Yusa naari uunt awajsamuiti. Nu nekaar wáitsatin ashamatsji. ¹⁶ Tura yaweatsji. Ii ayashí amuiki wéakuisha ii enentáinkia yamaram ajaki wéawai. ¹⁷ Warí, ukunam tuke shiir pujustatinia nu enentáimtakrikia, ju nunkanam wáitajnia nu, ti itiurchataitiat, aya yamaiya asa tiikia itiurchatchaiti, tura wárik nankaamawai. Túrasha ii itiurchatrijjaj Yuska ti shiir ana nuna amuukachmin ana nuna núkap suramsattaji. ¹⁸ Tuma asamtai wáinjinia nu ti enentáimtatsji. Antsu wáintsujnia nu nekas enentáimtaji. Wáinjinia nusha aya yamaiyati. Antsu wáintsujnia nuka tuke amuukachminiaiti.

5

¹ Wats ju nékaji. Nayaimpiniam ii shiir pujustinian amuukachmin ayashin Yus najanamun ikiurtamsaitji. Aents najanachmaiti nu. Tuma asamtai ii ayashí emesnakuisha warí itiurtamajia. Nuka aaka núnisan amuukamniaiti. ² Ju ayashnium pujusar wáitajai, taji. Yamaram ayash nayaimpiniam pujana nu achiktai tusar wakeraji. ³ Ayashtichu ajasajj tusar, yamaram ayashtin ajastait sar wakeraji. Pushía núnik yamaram ayash in nukurmaktai tusar wakeraji. ⁴ Tura ju ayashjaj pujusar wáitsar pujakur shiir enentáimtsuji. Arut pushí áiktinia núnisrik ju ayash ikiuktiaitsar tátsuji. Antsu yamaram pushí entsartinia núnisrik yamaram ayashnium tuke pujusmi tusar taji. Iista, ju ayash amuukachminkiaiti. Yamaram ayashnium pujusar tuke iwiaaku pujustaji. ⁵ Yamaram ayashintin ajastinian iwiarturmaruitjinia nu Yúsaiti. Tura nekas túrattajai tusa ni Wakanin suramsaitji.

⁶⁻⁷ Ju nékaji. Ju ayashnium pujajnia juinkia Uunt Jesusajj pujatsji. Tuma asamtai, wáinjinia nu ti enentáimtutsuk Yus enentáimtusar tuke shiir enentáimsar wekaaji. ⁸ Tura ju ayashniumia jínkir Uunt Jesusajj tuke pujustait sar wakeraji. Tura túrattaji tu nékaji. ⁹ Tuma asamtai ju ayashnium pujakrishia tura ju ayash ikiukrishia Uunt Jesus tuke waramtiksatatai taji. ¹⁰ Warí, ju ayashjaj ii túramajnia nu ujakam, “pénkeraiti”, “yajauchiiti” Kristu turutit tusar, ashí iisha Uunt Kristuj jeatnuiitji. Tura ii túramujaj métek akirmaktatji.

Krístun waramtiksatatai taji

¹¹ Tuma asamtai ju nékaji: Uunt umirkashtin ti tsúumainti. Nu nekaar ashí shuar Yus-shuaran awajsataj tusar ti takaaji. Tura incha Yus nékarmaji. Tura ii túramuj átumka atumí enentáin paant nékarme, taji. ¹² Ataksha, “wi pénkeraitjai” tusar nu tátsuji. Antsu, ii túramu nekáa asakrumin enentáiniam ana nuna enentáimtsuk aya pátatkea nujaj warainia nú shuar tsanumprutmainiakui yaintkiatarum tusar taji. ¹³ “Wáurkaiti” turamainiajjash. Nusha warí, itiurtamajia. Ashí túrajnia nu, Yus aneakur tura atumin yáintaí tusar túrajai. ¹⁴ Kame ashí ii túrajnia nu Kristu anenkrattairijjaj túrajai. Kame ju nékaji: Kristu ashí shuaran jaruku asamtai, Yus íimmianum ashí iisha jaka núnisaitji. ¹⁵ Kristu ashí shuaran jaruk nantarkimiayi. Tuma asamtai Krístunam iisha iwiaaku pujajnia ju, iik wararmamtsuk, Kristu umirkatnuiitji. ¹⁶ Tura yamaisha aya ni ayashí írsar, “nu shuar pénkeraiti” tura “nu shuar yajauchiiti,” titin tujintiaji. Kame yaunchu aya ni ayashí írsar “Kristu yajauchiiti” tu enentáimsamajia. Tura yamaikia yapajjár, esetsar enentáimkiur “Kristu Yusa Uchirinti” taji.

Krístujaj yamarmaitji

¹⁷ Tuma asamtai, Krístunu ajasúka yamaram najanamuiti. Yaunchu enentáimtaij menkakayi. Antsu núnaka íkias ni enentáimtaij nekas yamarmaiti yamaikia. ¹⁸ Nunasha Yus túraiti. In nawampramkattsa Krístun akupturmakuitji. Tura nu etserkatniun incha ataktamsaitji. ¹⁹ Yuska in tunaarinniutin asutiámatniun nakitiak Krístujaj nawampramkamiaji. Tura incha Yus-shuartin nu ujaktinian ataktamsaitji. ²⁰ Krístunu ataksamu asar, Yuska “winia Uchirjaj nawamnaikiatarum” tusa ii wenejaj atumin seatmarme. Tuma asakrin, Krístu náarjin “túratarum” tájarme. ²¹ Krístuka tunaan penké túrachmiayi. Túmanak ii tunaarijn Yus Krístun makuumiayi. Nuna tura Krístunam makuuchmin awajtamsamiaji.

6

¹⁻² Ni Papirijn Yus yaunchu Isayasan júna tímiayi:

Tsawant jeamtai, ame seatmena nuna anturkamjame. Uwempratin tsawant jeamtaisha yainmajme.

Wats yamaikia Yus seatin jeayi. Yamái Yúsnum uwempratin jeayi. Tuma asamtai, iikia Yusa takatrjn pachitkiajnua nu, Yusa anenkrat-tairj penker achiktaram tusar seajrume. ³ Tura “Papru etserkamurj ántraij” tíarajjn tusar chíkich yajauch enentáimtiktsuk penker wekaaaji. ⁴ Nekas Yusa takarniurjntji nuna paant nekaawarat tusar wáitiatyatrik, atsumayatrik, itiurchatnum pujayatrik shiir katsunteaji. ⁵ Ju itiurchat wáinkiamji: katsumpramkarmaji; sepunam enketmáwarmiaji; charáa-charáa awajtamiarmiaji; takatcha ti itiurchat takasmiaji; kanutsuk pujumiaji; tura tsukasha ti tsukammiaji. ⁶ Tunáa nakitrar wekaaaji; Yus-Chicham unuimiátraitji; shiir enentáijajjajj katsuntrar wekaaaji. Chíkich shuar penker awajeaji; Yusa Wakanj pujurtamkurin shuar nekas aneaji; ⁷ nekas chicham ana nu étsereaji; tura Yusa kakarmarisha nú paant iniakmaji. Tura ni nemasrjn nupettukajjn tusa suntar ni tantarjn júana núnisrik iisha ii nemasrj íwianch nupettamkajj tusar ii Yusrj tuke umirkar wekaaaji. ⁸ Shuar shiir enentáimturmainiakrincha, yajauch enentáimturmainiakrincha, penker chichartamainiakrincha, yajauch chichartamainiakrincha tuke Yusjajj shiir wekaaaji. “Wáitruiniawai” turamainiakrincha tuke nekas chichaaji. ⁹ “Nu aents nékatsji” turamainiakrincha Yusnumka nékanji; jákatin tsúumainnium wekayatrik tuke iwiaaku pujaji; asutiámuitiatrik mantamnatsji. Yusa takarniurjntiaj nu ashí nujajj paant nekaamniaiti. ¹⁰ Kúntuts pujayatrik ii enentáinkia waraaji; kuítrinchaitiatrik chíkich shuar kuítrintin awajeaji; penké takakchiatrik ashí wáinji.

¹¹ Yatsurtiram, Kurintiunam pujarmena nu, ashí paant ujakchamkajrum. Ti aneajrumna nu nékarme. ¹² Wikia atumin paant chichastajtsan wakerajrume; antsu átumka anentsuk paant chichastin nakitrarme. ¹³ Winia uchirua núnisnak chichaajrume; wi tuke paant chichaarjarmena núnisrumek atumsha atumí enentáin ana nu, paant ujatkataram tusan seajrume.

Yusa jeentji

¹⁴ Yus-shuar Yus-shuarchajaj tsaniñktinian enentáimsashtiniaiti. Warí, ¿Yusan umirna nú shuar, iwianchin umirna nú shuarjajj métek enentáimiainiawak? ¿Tsáapnisha kiritjajj máimtek áminkiait? ¹⁵ ¿Krístuka

uunt iwianchjai nawamnaikiamniakait? ¿Yus-shuar Yus-shuarchajai tsanin shiir pujusminkiait? ¹⁶ ¿Iwiaaku Yusa jeencha ántar-yus pujustinkiait? Tura atumsha iwiaaku Yusa jeentrome. Yus Niñki ni Papiriin juna tíchamka:

Niijjai tsaninkia pujusan, niijjai wekasartatjai tura ni Yusrj átatjai; tura niisha Wíi aents ajasartatui.

¹⁷ Tuma asamtai junasha tímiayi:

Nii matsatainia nuyá jíinkitiarum, tura niija kanaktiarum, tawai Uunt Yus; tura yajauch ana nu antiñkiairap. Túrakrumninkia awayattajrume.

¹⁸ Tura atumí Aparj átatjai; átumka winia uchir átatrume. Nuna Wi imiá kakaram uunt Yus asan tajai. Tu áarmaiti.

7

¹ Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashj tura ii enentáisha yajauch ajasain tusar, ashí tunáa ana nuyá kanaktiniaitji. Túrar “Yusak nekas ii úuntriñti” takur, ii ayashjsha, ii enentáisha takamtsuk tuke tsawant Yus íktustiniaitji.

Kurintiumaya shuar enentáimprarmatai Papru warasmiaiyi

² Ataksha nawamnaikiatai. Iikia shuar yajauch awajsachmaji; yajauch jintinrachmaji; anañkachmaji. ³ Makuutai tusan nuna tátsujai. Antsu nuik tíchamkajrum, iwiaaku pujakrishá jakarsha átumka ii enentáin áchitkiarme. ⁴ Araantusuk áatjarne; shiir enentáimjai. Itiurchatnum pujayatnak, atumin enentáimtusán enentairuñ kakaram enentáimsan waraajai.

⁵ Jui Masetúnianum penké ayamprachmaji. Antsu ti wáitsamji. Áentsnumiá itiurchat wáinkiamji, tura ii enentáijiañkia ashamkamji. ⁶ Tura kúntuts pujakrincha Yus ikiakátmartinian nékawai. Tuma asamtai Titiún akupturkamai. Nujaj winia enentáirun ikiakármai. ⁷ Tura átum nii ikiakármarumna nuna Titiu ujatkamai. Nuna antukan ti warasmajai. Titiuka átum írsatin wakerarmena nuna ujatkamai; túrunamia nuna kúntuts enentáimmarumna nusha, tura winia anentu asarum enentáimturumna nuna ujatkamai. Nuna antukan nú nankaamas warasmajai.

⁸ Papi nuik akupkamaj nu áujсарum kúntuts enentáimprarme; núnaka nékajai. Túrasha ii akupmainchu túraitjai tátsujai. Eta, nuikkia tímiajai, túrasha yamaikia tátsujai. Papi áujсарum ishichik kúntuts enentáimprarmna nuna nekaan waraajai. ⁹ Kame kúntuts enentáimprakrumin waraatsjai. Antsu atumí tunaari nekaarum kúntuts enentáimprarm atumí enentáij Yusjai yapajiá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asamtai iikia nu papijjai yajauch awajsachji. ¹⁰ Nekaatarum. Yus wakerana nútiksañ kúntuts katsunteakka ni enentáij Yúsnum yapajiáwai. Nuñkia ni tunaariya uwempraiti. Nuka “túrmainchu túraitjai” tíchamniaiti. Antsu Yusan enentáimtutsuk kúntuts pujakka ni enentáij yapajiáshtatui; yapajítsuk ni tunaariya uwemtsuk jakattawai. ¹¹ Tura iistarum; Yus wakerana nútiksarmek atumí kúntutsrj katsuntearme. Tuma asarum wí áatjarmena nu esettsarum enentáimtusurme. Atumí túramurj ujakatajtsa wakerimiarme. Tura nu tunáa nakitramarme; tura ashamkamarme. Tura yajauchin túramia nu asutiámarne. Tura

winia anentu asarum wi timia tímiatrusrumek turatai tusarum ti wakerimiarme. Nu tura asakrumin pé_ñker túrarmena nu, paant iniakmarme. ¹² Kame yajauchin túramia nuna ni tunaarjín iniaiasat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarme. Tura nú nan_ñkaamas átum Yúsnum in anearmena nu nekamatarum tusan áatramjarme. ¹³ Atum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujatkamtai nú nan_ñkaamas shiir waraaji. ¹⁴ Atumin shiir enentáimtajrumna nuna Titiun ujakmajai. Tura nuna nekas aan Titiu nekaamai. Tuma asantai atumin natsantrachmajrume. Kame atumin tuke nekas ana nuna tímiajrume. Núnisan atumnian Titiun tímiaj nusha nekasauyi. ¹⁵ Tura Títiuka atumin enentáimturmas ti waraawai. “Jiatmaktajtsa winiatsuash” tusarum ti ashamkachurmek. Túmayatrum, nii pé_ñker tati tusarum pachischarme. Tura nii taa seatmarna nu umikiurme. Títiuka nuna enentáimias waraawai. ¹⁶ Tura wikia, átum pé_ñker túramurmin nekaan tura pé_ñker túrawartatui tu enentáimsan waraajai.

8

Yus-shuarti ii kuitrj súsatin

¹ Yatsurtiram, Masetúnia nun_ñkanmaja Yus-shuaran Yus waitnentina nuna yamá ujakatjarme. ² Ti itiurchatnum nekapsamu ainiaawai. Túmayatañ warainiaawai. Tura ti kuítrinha áiniyatañ emeen-tutsuk kuítrinnia núnisañ suiniawai. ³ Juna wi paant nekaan ujaajrume. Niisha wakeramujaj súsatniun jeainia nuna súniawai; tura nú nan_ñkaamassha súniawai. ⁴ Yus-shuaran kuítrinchan súsartaitsa ti wakeruiniak, nu túratniun ti seatmarmaji. ⁵ Tura ii enentáimmiáj nú nan_ñkaamas túrawarmiayi. Emka Yúsnum nin_ñki sumamawarmiayi. Tura Yusa wakeramurj túrattaji tusar incha “yáíntajrume” turammiaji. ⁶ Tuma asantai, “Masetúnia nun_ñkanam kuit júuktin nan_ñkamamamna nu, Kurintiu peprunmasha amukta” tusar Titiu seamiaji. ⁷ Atumsha ashí pé_ñker túratin ti nékarme. Yus enentáimtustincha, unuiniartincha, ju nun_ñkanmaja nekaatniusha, in aneatniusha nuka ashí nékarme. Wats, jusha túratarum. Yus-shuar kuítrinha ainia nu achikiarat tusarum Titiu támatai núkap susatarum.

⁸ Kame atumí úntrja núnisnak akupeatsjarme, túratniuitrume tusan. Antsu chíkich shuar ni kuítrjñ susartasa ti wakeruinia nuna atumin ujakan, atumí anenkrattairj nekaspashi tusan nekapsatajtsa pujajai. ⁹ Ii uuntrj Jesukrístu waitnenkartutairj nékarme. Ashí takakuyayi, tura atumin anenma asa kuítrinha núnisañ ajasmiayi. Ju nun_ñkanam kuítrinha núnis ajasmatai átum nayaimpiniam kuítriniak tusa túramiaji.

¹⁰ Juna enentáimjai. Nuik uwitin, “yáíntatji” tíchamkarum. Tura nu túratin ti wakerimiarme. ¹¹ Nan_ñkamamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum. ¹² Iistarum. Ni kuítrjñ Yúsán nekas susatajtsa wakerakuñkia, nii jeana nuna susat tusa Yus wakerawai. “Jeana nú nan_ñkaamas susati” tátsui Yus.

¹³ Chíkich ti núkap susarum atumnia táasat tusan tátsujai. ¹⁴ Antsu ashí métek takusarat tusan tajai. Iis atumsha yamaikia ti nukap takakrume; nujaj atsuma nu súsatniuitrume. Ukunam chíkich tsawantaj

átum atsumashtarmeash. Nuñkia niisha atumin suramsarti. Nu túratin ákuñkia ashí métek takustin átatui. ¹⁵ Yusa Papirj̄in yaunchu áarman núnis tátsuk:

Núkap takusmia nu ampirchamiayi; tura ishichik takusmia nu atsumachmiayi.

Titu chíkich Yus-shuarj̄aj̄ Kurintiunam wetin ármiai

¹⁶ Tura wi aneajrumna núnisan̄ atumin aneatniun Yus Titiun susamiayi. Tuma asamtai Yús̄an yumĩnsan pujajai. ¹⁷ Iis, wi takui wétinian wakerimiayi. Tura nú nan̄kaamas, atumin anenma asa, ni enentájj̄iain̄ wéawai.

¹⁸ Tura chíkich Yus-shuar Titiuj̄aj̄ akupkatajtsa pujaji. Nu shuar Yusa Chichamen̄ ti pen̄ker etserainakui, ashí Yus-shuar iruntramunam nin pen̄ker áujmatainiawai. ¹⁹ Tura nú shuarnaka ii tsaniakmarj̄ atí tusar ashí Yus-shuar iruntramunam nuna anaikiarmiayi. Iij̄aj̄ kuítian jukiarti tusar anaikiarmiayi. Iis Yusa náarj̄in ashí aents uunt najanawarat tusar tura ashí shuar atumí tsan̄karj̄in nekaawarat tusar nu takat túratsjik. ²⁰ Iis, j̄u kuit ii jukittiajnia nu, núkap asamtai, aents tsanumprutmawaraj̄ tusar; Titiuj̄aj̄ tura j̄u shuarj̄aisha wéaji. ²¹ Yus ímmianumsha, aents ímmianumsha ii naka wekaajnia nuna nekaawarat tusar túraj̄i.

²² Nu jimiará shuarj̄aj̄ chíkich Yus-shuar akupeaji. Yusa takatrj̄in takastasa ti wakerana nu nekas nékaji. Tura átum yáintin̄ ti wakerarmena nuna nekáa niisha atumj̄in jeataj tusa ti wakerawai. Nuna túmak Yusa takatrj̄in takastinian wakerana nuna paant iniakmawai. ²³ Tura aisha chíkich shuar Titiun nekaataitsar aninruiniakuisha, “Titu Papru tsaniakmarj̄inti. Incha yáinmaktajtsa Pápruj̄aj̄ takaawai” titiarum. Chíkich Yus-shuaran nekaataitsar aninruiniakuisha, “Yus-shuar akupkamu áiniawai, tura Kristu náarj̄in shiir awajin áiniawai” titiarum. ²⁴ Tura atumí anenkrattairj̄ ashí Yus-shuar nekaawarat tusarum, nu shuar pen̄ker itiaatarum. Nu túrakrum, atumnia ii shiir tímiaj nu nekasaiti tu iniaktustatrume.

9

Yus-shuaran kuítrinch̄an súsarmia nu

¹⁻² Kame átum Yus-shuar kuítrinch̄a súsatin wakerarme; nuna nékajai. Tuma asan núnaka áatrachminiaitjarne. Atumsha súsatin wakera asakrumin wi nunasha shiir enentáimsan, “Akaya nun̄kanmaȳa shuar nuik uwitinia wakerusmataik yáintinian̄ wakeruiniawai” tusan Masetúnianmaȳa shuáran ujaajai. ³ Tura “kuítniasha súsatniun ti wakeruiniawai” tímiaj nuna, “wáitaiiti” tíaraj̄in̄ tusan nakitiajai. Tuma asan, kuit susatajtsa wakerarum nu iwiaratarum tusan nu menaintiu Yus-shuaran nuna yáinmakarat tusan emka akupenajai. ⁴ Wi ukunam Masetúnianmaȳa shuarj̄aj̄ atumj̄in̄ jean, kuit súsatin tímiarmana nuna iwiarachman wáinkian natsaraj̄ tusan, tura atumsha natsaraj̄irum tusan túraj̄ai. Warí, “súsatniun ti wakeruiniawai” tuke tu wéatsjak. ⁵ Nu tuma asamtai, au takui súarme tu enentáimsarj̄in̄ tusan j̄u Yus-shuaran emka akupenajai. Niisha nu kuítian iwiaratniun yáinmakarti, tajai. Nuñkia wisha Masetúnianmaȳa shuarj̄aj̄ ukunam jeawakrin, nu kuit atumsha nekas atumí enentájj̄iain̄k' súsatin wakerarmena nu nekaamnia átatui.

⁶ Tura junasha paant tájarne: ishichik araana nu ishichik júuktatui. Núkap araana nusha núkap júuktatui. Kuit súsatniusha núniskete. ⁷ Tura

ashí shuar ni enentáin enentáimsana nunak susati. “Nakitiayatnak susatjai” tíchamniaiti. “Turutainiakui susatjai” tíchamniaiti. Shiir enentáimias súana nuna Yuska shiir enentáimtaiwai. ⁸ Ashí péñker ana nuna suramsatniun Yus tujintiisui. Nujai átum atsumashtatume. Tura chikichan yáintin núkap takustatume. ⁹ Yus-Papinium ju aarma awai:

Kuítrinchán núkap susayi;

nuna tura, tuke túratin átatui.

¹⁰ Arakmaun araakan súana nusha Yúsaiti. Tura yurumkan súana nusha Yúsaiti. Niisha átum péñker araatniun suramsattarme. Tura araarumna nujai péñker túratarum tusa araakrumin ipiampartatui.

¹¹ Tuma asamtaí núkap juukma takaku asarum, núkap súsatin jeattarme. Nuñkia súarmena nuna ii uwejeyan chíkich Yus-shuar achikiar Yúsán yumĩnsartatui. ¹² Warí, ju kuit Yus-shuar kuítríncha súakrin ni atsumamuríncha atsumachartatui. Tura nú nankaamas Yúsán ti yumĩnsartatui. ¹³ Nu shuar yáintai tusarum tura ashí Yus-shuar yáintai tusarum súatsrumek. Nujai Kristu shiir chichamen umiarmena nuna nékainiawai. Tura kuítrum emeentutsuk sua asakrumin niisha Yusa náarin uunt awajrsartatui. ¹⁴ Kame Yus atumin ti waitnentrainiakui kuítrum súatsrumek. Sua asakrumin nu shuar atumin ti anenmainiak Yúsán áujturmasartatui. ¹⁵ Tura ashí iisha ii Yusri ti yumĩnsatniuitji! ¿In súramjinia nuna yaki jintíartinian jeá?

10

Papru nekas jintintiamniaiti

¹ Wats, “Papru iijiai pujak péechach ajawai, tura yajá pujak kakaram chichaawai” chíkich shuar turutainiatsuk. Kame imia wiki Papru Kristu anenkartutairijiai juna seatjarum tusan pujajai. ² Atumí weatkamuriya shuar chichainiak “Papru ni tsaniakmarijiai ju nunkanam akupin ajastai tusar wakeruiniak jintintiaiawai” turutainia nuna kíshtumaktajtsan enentáimjai. Wisha atumijn jean kakaram chichaschataj tusan, nu antukairap tu seajrume. ³ Áentstanka nunkanmaya áentsuitji, túrasha jú áents maania aintsar máaniatsji. ⁴ Ju nunkanmaya nan kijiai máaniatsji antsui ii nan kirij Yusa kakarmarinti. Nujai iwianchi kakarmari núpeteaji. ⁵ Ju nunkanmaya aentsu jintiamurinkia tura waantu enentáimtumamurinkia, Yus nekaatniun itit awajea nuka, nu nan kijiai núpeteaji. Tura ashí ju nunkanmaya enentáimsatin yapajniak, emetamu áintsan, Kristun umirkarat tusar nu nan kijiai núpeteaji. ⁶ Nekas umirkatin átum jeawakrumninkia nuñkia umirkatniun tuke nakitiainia nu, Yusa kakarmarijiai asutiáttaji, tajai.

⁷ Atumsha aya pátatek ana nu iiyarme. Wats, shuar nekas Krístunu ajasman nekamaka, núnisan winiasha Krístunuiti tu enentáimtursatniuiti. ⁸ Yusa kakarmarijiai akupeaji tuke tákuncha natsaamatsjai. Nu kakarmán atumin péñker jintintiatarum tusa Kristu suramsaitji. Kame atumin emesratniun suramsachuitji. ⁹ “Ni áarmarijiai awaktamkatajtsa wakerutmaji” tátsurpash. Núchaiti. ¹⁰ “Papru áarmari ti kakaram áiniawai, tura juí pujak kakarmachuiti; tura etserkatniuncha nékatsui” turutainiawai. ¹¹ Wats, tuinia nuka junasha nekaawarti. Yajá pujakur kakaram áajinia núñisrik atumjai pujakrishá kakaram túratatji.

¹² “Wiki imiá péñkeraitjai” tuinia nujai méteketji tátsuji. Ní shuaraitji tátsuji. Warí, niisha imia niniki nekapmamainiawai. Tura ni ai ísar “nu

naŋkaamas péŋkeraitjai” tu wéenawai. Nuna túruiniak netse túruiniawai. ¹³ Antsu iikia, ii nekamatin jeajnia nú naŋkaamas waantu ajaschattaji. Ii takastatinia nuĵ Yus Niŋki jintinramji. Nu arant wéatsji. Kame atumĵin takastinian Yus tsanċatramkaitji. ¹⁴ Tuma asamtai, tájinia nu Yus tsanċatramka nú iniaŋkas túratsji. Warí, iisha emka Kristu chichamejai atumĵin jeachmakajⁱ. “Emka jeamji” tájinia nu ánrar tátsuji. Kame Yus tsanċatramakrin jeamji. ¹⁵ Chíkich takasmanum iikia waantu enentáimtumasar, “ii takatrĵinti” tátsuji. Antsu yamá enentáimtarmena nú naŋkaamas Yus enentáimtustarum tusar wakeraji. Nu túrakrumninkia atumĵin tuke takasminiaitji. ¹⁶ Nuyasha chíkich takaana nuĵ takatsuk átum pujarmena nú arant pujuinia nusha Yus-Chicham ujaktaj tusar wakeraji. Nu túrar chíkich shuar takasma “íiniuiti” tíchattaji.

¹⁷ Tura péŋker enentáimtumastaj tusa wakerakka, Yúsnaítjai tusa péŋker enentáimtumasti. ¹⁸ Warí, niŋki “péŋkeraitjai” tumamna nuka anturkachminiaiti. Antsu Uunt “péŋkeraiti” tana nú shuar nekas péŋkeraiti.

11

Ántar etserniun Papru áujmateawai

¹ Waurua núnisnak chichastatjana nu anturtukaintrumeash. Ee, anturtukarum tusan seajrume. ² Atumniasha Kristunak anajmamtikrajrume. Tura nuwa chíkich áishmanċan nékatsuk ni áishrijainċkⁱ nuatnaiya núnisrumek átum chikicha chichameĵ umirtsuk aya ni chichamenċkⁱ umiakrumin Kristuí ejetaĵ tusan wakerajrume. Nuna túrataĵ tusan atumin akasmataĵrume. Nu akasmaktinian Yus surusuiti. ³ Túrasha íwianch ni nekatairijjai emka nuwa Epan anaŋkamia nútiksanĵ atumniasha Yusa jintiyá awajimtikramar Kristu aneashtinian enentáimtikramprarmatai anaŋkamu aĵrum tusan tsuutajrume. ⁴ Warí, chíkich shuar Jesusnan nusháa étserkamujai táiniakuisha péŋker ántarme. Tura nusháa wakan achikiam, nusháa chichamjai uwempramniaiti tu etserainiakuisha, nekasapitia tárume. ⁵ Kame “Yúsnumiá akatramu asar etserkatin imiá nékaitji” tuinia nujai naŋkaamas nékaitjai, tu enentáimjai. ⁶ Ti péŋker chichastinian nékachiatnak winia nekaatairsha taamtsui. Núnaka ii túramurijjai tuke paant iniakmaji.

⁷ “Akirkata” tútsuk Yus-Chichaman atumin ujakmajrumna nuĵ ĵtunáa túrajak? Átum anċkant ajastarum tusan wikia péejchach ajasu asan, “etserkamunam akirkata” tíchamjarme. ⁸ Antsu atumin yáintaj tusan pujakun chíkich Yus-shuarnumiá kuítian suruiniakui achikmiajai. Nuna túran ni kuítrĵin emeentukmiajai. ⁹ Tura atumjai pujusan atsumaknasha atumniaka seachjarme. Masetúnianmayá Yus-shuar taar, wi atsummiajna nuna surusarmiayi. Nu tuma asamtai tájarme, seachjarme tura seashtatjarme. ¹⁰ Ashí Akaya nuŋkanam nuna ujaktinian suritrukchar-tatui. Nuna tákun Kristu nekasrijjai tajai. ¹¹ ĵUrukamtai nuna taja? ĵAtumin aneachu asanak taja? Atsá. Aneajrumna nuna Yus nékawai.

¹² Túrasha wi túrajna nuna tuke turu wétattjai. “Papru túrana núnisrik túrajĵi” tuinia nuna tíarainĵ tusan túrattajai. ¹³ Warí, niisha Yúsnumiá akatrachma áiniawai. Anaŋkartin áiniawai. “Kristu akatramurĵintji” tumá átaj tusar wekainiawai. ¹⁴ Nusha urukaku túmait tíchamniaiti. Warí, imia Satanáskesha “nayaimpinmayá akatramuitjai” tumá átaj tusa wekaat-suk. ¹⁵ Nuinċkia imia ni suntarĵisha péŋkeran túrawai tumá atai tusar

wekasachartinkiait; túrasha ni amuamurinkia tunáa túriarma nujai métek nekapmá asutiátin átatui.

Papru wáitsamia nu

¹⁶ Ataksha tájarme “wáurkaiti” tu enentáimtursacharti. Kame “wáurkaiti” tu enentáimturiatrumek, chichastin tsankatruktarum. Ishichik waantu enentáimtumastaj tusan wakerajai. ¹⁷ Tura waantu enentáimtumastaj tájana nu, Uunta tsankatramurijjai tátsujai. Antsu waurka núnisnak chichaaajai. ¹⁸ Untsurí ju nuñkanam uunt ajasar ti waantu enentáimtumainiakui wisha ishichik waantu enentáimtumastatjai. ¹⁹ Imiá nékayatrum waurka ainia nu shiir enentáimtusum ánturearme. ²⁰ Niisha atumin takamtikramainiakui, kasartamainiakui, atumí nérenniurí ajainiakui, yajauch chichartamainiakui, yapimin awattamainiakui ashí nu katsuntearme. ²¹ Natsamayatnak tájarme jikia nu túratin kakarmachuují! Wats, niisha araanainiatsna nuna wisha araantatsjai. (Waurka núnisnak chichaaajai.) ²² Niisha Ipríu-shuar ániakuisha wisha núnisnak Ipríu-shuaritjai. Israer-shuar ániakuisha wisha núnisnak Israer-shuaritjai. Apraáma weeatrí ániakuisha pai, wisha núnisnak. ²³ Kristu takarniuríntji, tuiniawai. Wikia aujai nankaamasaitjai. Kame nuna tákun waurka núnisnak chichaaajai. Kame níijjai nankaamas takasuitjai; níijjai nankaamas asutiámuitjai; níijjai nankaamas sepunam enkeamuitjai; ti núkap jániñkiamjai. ²⁴ Israer-shuar chikichí achirkacharmai. Antsu tímiajni senku jea achirkarmai. Tura emka achirkarmia nui awa-awatatku trainta nuiwi ejeyarmiayi. Tura nu tímiajni senku jea achirkarmia nuisha nútiksaj nujai métek awatturarmiayi. ²⁵ Numíijjai menaintiú awatturarmai. Kayajajisha mantuatai tusar chikichí tukurarmai, kanusha menaintiú wayamai wi enkempran wekaimiaj nui. Tura nayaantsanam ajapén chikichik kashi nui pujusan tsawarmajai tura nu tsawantcha tuke pujusmajai. ²⁶ Ti nukap wekasaitjai. Tura entsá wekasan tsúumainian wáinkiaitjai. Tura kasa shuarjajisha, wí shuarjajisha tura yajaya shuarjajisha tsúumainian wáinkiaitjai. Péprunmasha, kampuniunmasha, nayaantsanmasha tsúumainian wáinkiaitjai. Wait Yus-shuarsha yajauch awajtustaj tusar wakeriarmai. ²⁷ Itiurchatnasha ti wáinkiaitjai; takatnasha ti takasuitjai. Ti untsurí kánutsuk pujusuitjai. Tsukamaknasha, kitiamaknasha wáitsaitjai. Ti ijiarmaitjai. Pushir táasmatai tsetsekrú wáitsaitjai.

²⁸ Tura nuna nankaamas, kaarka kijin júkitniua núnisnak Yus-shuar péñker wekainiawash tusan ashí tsawant ti enentáimsan pujajai. ²⁹ Chikichik Yus-shuar kakarmachu pujakuí wisha kakarmachu nekapeajai. Shuar chikichan tunaanum ajuawarmatainkia wisha natsamakun kajekan wáitijai. ³⁰ Maa, waantu chichastin ákuñkia, antsu winia kakarmachu awajtuinia nuna ujakan waantu ajasaintjai. ³¹ Yus, ii Uuntri Jesukristu Aparí ana nu (ni naarí tuke shiir awajsamu atí) wi wáitratsjana nuna nékawai. ³² Tamasku péprunam pujai nu nuñkanmayá akupin winia jinkíá juruktiaj tusa wakerak pepru tanish téntakma wáitirijn suntaran apujsamiaiyi. Aretas uunt kapitíán pujai túramiaiyi. ³³ Túrasha uunt chankinnium enketawar pepru aa tanishri áñkamunam jiki itiararmiayi. Tu uwempramiajai.

12

Papru wáinkiamia nu

¹ Kame wiki shiir chicharmamsatniun nakitiajai. Túmayatnak íimiarjana nuna tura uunt Yus iniaktursamia nuna ujaktiniaitjarne. ² Krístun umirin ana nú áishmañkan nékajai. Nu áishmañ jimiará nayaimpin nan̄kaikin menaintiú nayaimpiniam junakniuiti. Nusha katurse uwí nan̄kaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai. ³ Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai. ⁴ Yus-shuara wakaní shiir pujutainium junakmiayi. Nujsa paant awajsachmin ana nuna antukmiayi. Nii antukmia nú chicham paant awajsatniun suritkiamuiti. ⁵ Nu áishmañka túrunamurí nan̄kaamakuiti tajai. Tura wikia nan̄kaamakuitjai túmamtsuk, kakarmachuitjiana nuna paant ujaajai. ⁶ Nan̄kaamakuitjai túmamtiaj tusan wakeraknaka nekas tîminiaitjai, ántran tíchaintjai. Túrasha túratsjai. Winia túramuruk wáinkiarum winia chichampruk antukrum, waritia enentáimsarum nujai métek enentáimtursatarum tusan wakerajai.

⁷ Wi nayaimpiniam wáinkiamajna nu timiá péñker asamtai ántar waantu enentáimtumaschatniun, jañki mesertinia núnisañ winia ayashruj najaimiatniun sunasmiajai. Nuka wi wáitsatin Satanásnumia akupkamuiti. ⁸ Nuka jurutkitia tusan Úuntan menaintiú seamjai. ⁹ Tuma ain Uunt winia turutmiayi “Átsá. Jaa pujayatmek winia waitnenkartutairjai shiir pujame. Shuar kakarmachun winia kakarmarun Wi suakui ashí aents nu shuara ayashiñ winia kakarmarun wáiniainiawai.” Tuma asamtai, Krístu kakarmarí winia ayashruj paant ati tusan kakarmachuitiatnak araantatsjai. ¹⁰ Tuma asamtai, wi Krístun aneakui shuar katsekruiakuisha, kajertuiniakuisha, winia kuítrusha, kakarmarsha atsain waraajai. Kame ashí itiurchat ana nuj kakarmachuitiatnak kakaram nekapeajai.

¹¹ Wi “péñkeraitjai” túmamkun waurua núnisnak chichaajai. Tura atumsha winia péñker chichartusminiaitiatrumek, túrachu asakrumin tu chichasjai. Warí, wi péñké ántraiiatnak, “ti péñker akatramuitji” tumamainia nú nuñkaachichuitjai. ¹² Atumjai pujumiaj nuj, itiurchat ámanmañ katsuntran takasmiajai. Yuska ni kakarmarín iniakmastaj tusa ti uuntan aents tujintiamun túratniun surusmiayi. Nuñka “Papru nekas winia akatramuruiti” tusa paant iniakmasmiayi. ¹³ Warí, chíkich Yusshuaran yáinmij núnisnak atumniasha yáinmajrume. Áyatik atumin “kuit surusta” tíchamjarne. ¡Nu yajauchiitkiuin̄kia tsankurturtarum!

Papru atak tátinrín ujakmiania nu

¹⁴ Jújain̄kia menaintiú iwiarnarjai atumin íistaj tusan. Tura jeaknaka, “etserkamun akirkatarum” tíchattajrume. Atumí kuítrín wakeratsjai. Antsu atumin wakerajrume. Warí, winia uchirchakaitrum. Uchisha aparín kuítian ikiauntukchatniuiti. Antsu aparí ni uchirín kuítian ikiauntuktiniaiti. ¹⁵ Atumniasha yáintaj tusan ashí takakjana juna ajapawaintjai, tura winia kakarmarnasha ashí emen̄kákaintjai. Wi ti wakeramaitiatrum átumka ishichik wakerutarminiñ túrawaintjai.

¹⁶ Túrasha chíkich shuar chichainiak “Nekasaiti; Papru niñki ii kuítrín jurutramkichmaji. Túrasha anañkartuatniun neka asa in anañkramachmiashia” turutainiatsuk. ¹⁷ ¿Nusha itiura? ¿Shuáran wi

akupkamaj nujaj kuítrumin achikjak? ¹⁸ Atumin írmasat tusan Titium “wetá” tímiajai. Tura nin atampřit tusan chíkich Yús-shuaran akupkamaj. ¿Titiusa kuítrumin juruttramkimkiarum? ¿Wisha niisha mai metek enentáimsar métek takaschamkaj?

¹⁹ ¿Warí enentáimsarum? ¿Átum péñker ániawai turutik tusar nu tájik? Antsu, aneamu yatsurtiram, ii tájnia nu atumin Yúsnum ikiakártajrum tusar taji. ²⁰ Wi atumíjn jeaknasha, wi wáitkiataj tusan wakeraj nuna wáinkiashtatjai, tu enentáimsan itiurchat enentáimjai. Tura atumsha wakerarmena núnisrumek wáinkiashtatrum, tu enentáimjai. Yajauch chicharnaikiatniuncha, yajauch enentáimtunaistinniasha, kajernaikiatniuncha, niñki enentáimtumastinniasha, tsanumpratniuncha, mái-tunai ajatniuncha, waantu enentáimtumastinniasha, yajauch wekasatniuncha, ashí nuna wáinkiashtajash tusan itiurchat enentáimjai. ²¹ Tura wi jeaknasha, átum yajauch túratniusha, tsanirmatniusha tura yajauch ti wakerarmena nu, yaunchu túriniarmena nu, untsurí shuartiram iniaisachurmena nuna nekashtajash. Tura enentáim yapajítsuk tuke tura asakrumin úutchatjash taji. Kame wi átum umikchamun nekaamtai Yus winia iniatsátrattawai tusan tsúumajai.

13

¹ Jujaj menaintiú íistajrum tusan winiajai. Ashí iwiaratin ana nu, jimíará tura menaintiú shuara chichamejai iwiarnartatui. ² Wi atumjai pujachiatnak, atumjai pujáa núnisnak áatjarme. Yaunchu tunáa túrimiarmena nuna tura ashí shuártirmin wi nuik tímiajrumna nuna ataksha tájarme, wi atak tana tunaarum iwiareachkurminkia iniaisashtatjarme. ³ Nuiñkia wi Kristu kakarmaríjjaj chichajna nu nekaattarme. Nu nekaataj tusarum wakeratsrumek. Tura Krístuka kakarmachuchuiti. Antsu atumí enentáin kakaram takaawai. ⁴ Kristu nekas kakarmachua nútiksan krúsnum máamuitiat, Yusa kakarmaríjjaj iwiakuiti. Ayashnium Kristu kakarmachu nekapmia núnisrik iikia kakarmachuitji. Túrashá Yusa kakarmaríjjaj ni takatrí takaaji. Nu atumin iniakmastatji.

⁵ “Nekas Yúsán umirniuashítaj” tusarum nekamatarum. Íimiastarum. Ántar Yús-shuarchaitkiurmeka Jesukrístu atumí enentáin pujurtama nu nekaattarme. ⁶ Tura iikia ántar Yús-shuarchaitji nu nekaatarum tusan wakerajai. ⁷ Tura átum tunáa túrawájrurum tusar Yus seaji. Aents in péñker enentáimtikramprat tusar tátsuji. “Ántar ániawai” túrampriniñ, átum péñker wekasatarum tusar wakeraji. ⁸ Warí, Yusa nekas chichame emesratin tujintiaji. Antsu ii túrajnia nu Yusa nekas chichamejai túrajai. ⁹ Tuma asamtai, átum kakarmaitkiurminkia iikia kakarmachuitiatar shiir enentáimji. Atumsha nekas kakaram ajasúk tusar Yus tuke seaji. ¹⁰ Atumin emesratin Yuska winia akuptatsui. Antsu Yus akuptakuiti atumin ikiakártinian. Tuma asamtai, wi atumíjn jeaknaka kakaram chicharkajjrum tusan winitsuk ju papin áatjarme.

Amikmaawai

¹¹ Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikramprati. Chikichík enentáik enentáimsatarum. Shiir awajnaisarum pujustarum. Tura Yus anenarmena nu, shiir enentáimtikramna nu atumjai pujurtamsattarme. ¹² Yúsnum shiir enentáimtunaisrum amikmaanaisatarum. ¹³ Ashí Yús-shuar ainia nu amikmaatmarme. ¹⁴ Uunt Jesukrístu waitnenkartutairí,

Yusa anenkrattairisha atumin pujurtamsati. Tura Yusa Wakansha
tuke nemartamsarti. Nu atí.

Papru KARASEANMAYA SHUARAN Papí aar akuptukma

Karaseamaya Yus-shuaran Papru áatramiania nu

¹ Wi Pápruitjai, Yus akatramu. Yúsak winia akatturuiti. Shuarka akatturchamai. Yussha chíkich shuáran akupturak akatturchamai, antsu Nun̄ki, Yus Apa, Jesusan jakamunmaya iniantkímia nu, tura Jesussha winia akatturamai Yusa shiir chichamen etserkatniun. ² Wisha, ashí Yus-shuar wijíajai pujuinia nusha, ju papí akupeaji. Ashí Yus-shuar Karasea nun̄kanam pujarmena nu áujsatarum tusan ju papin akuptajrume.

³ Yus Apa tura ii Uuntri Jesukrístusha waitnentramiania ásar yainmakarti imiatkinchanum tuke shiir pujustinian. ⁴ Yus ii Aparí nuna wakera asamtai, Jesus ni ayashin surumak wáitsamiayi ii tunaari asakártinian. Nuna tura ashí tunáa ju nun̄kanam ana nuyá an̄kant awajtamsatai tusa in yáinmaji. ⁵ Tuma asamtai tuke Yus shiir atí. Ayu.

Chíkich uwempratin chichamka atsawai

⁶ Maa, nekasaash timiá wárik Yus ikiukmiarum. Kristu in ti anenma asamtai Yus ni shuari ajastinian in anaitiamkamji. Urukamtaitsuk nuikia imiá wárik ni chichame inaisamarum nusháa chicham umikrum uwemprataj tusarum. ⁷ Wátsek, nekas chíkich chicham penké atsawai shuar umikiar uwempratin. Antsu yajaya shuar atumín taar pénerkercha awajtamaniawai. Tura nusháa chichaman etserkar Yusa shiir chichamen yapajilatniun wakeruinaiwai. ⁸ Tuma asamtai Yus nin yajauchiniam yumínkrattawai. Wisha Yus-Chicham yapajiamun etserkamtaínkia Yus winia yumínkrurtatui. Nayaimpinmaya suntarsha nusháa chichaman wi etserkachmaj nuna étserkuínkia nunsha yumínkrattawai. ⁹ Paant ujakjarme túmaitiatnak ataksha ujaajrume: Nán̄kamas shuar niisháa uwempratin chichaman, wi etserkachmaj nuna étserkuínkia Yus yumínkrattawai.

¹⁰ Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursati tusan nuna tajai. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

Papru júnis Yus akatramu ajasmiayi

¹¹ Antsu nekaatarum, yatsuru. Uwempratin chichaman wi étserjana nuka áentsnumianchuiti. ¹² Aentska ujatkachmai. Unuitiutnasha unuitiurchamai. Antsu Jesukrístuk winia paant jintintruamai.

¹³ Tura wi yáunchu ti yajauchin túramiaj nuka antukchakaitrum. Israer-shuar Yúsnan takainia nútiksanak wisha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme. ¹⁴ Tura kakaram ajasan, ii uuntri yaunchu tiarmia nuna yawetsuk umiktinian ti enentáimpramjai. Tura untsurí shuaran wijíajai métek uunt armia nuna nan̄kaamas Yúsnan takasmajai. Túmaitiatan aya winia úuntrun chichamen ti umirniuyajai. ¹⁵ Túrasha wikia akiintsajin Yus winia achirkamiayi, tura ti anenkratmaríjjajai winia anaitiukmiayi.

16 Nuikia shiir enentáimiuk ni Uchirín paant nekamtikruamai. Tura Israer-shuarchanum ni shiir chichamen etserkat tusa akuptukmiayi. Tuma asamtai chíkich shuaran aniaschamjai. 17 Uunt péprunmasha, Jerusarénumka, wéchamjai winí emkaru Yus akatramujai chichastinian. Antsu wárik Arapia nunkanam wémajai. Tura nuí Yúsan enentáimtasuan atak Tamasku péprunam waketkimjai. 18 Tura menaintiú uwí nankaasmatai, nuyá Pítrujai áujmattsataj tusan Jerusarénum jeamjai. Tura jimiará semanachik pujusmajai Pítrujai. 19 Tura Jakupuncha, ii Uuntri Jesusa yachia nuna, wáinkiamjai. Nú arantka chikichnaka Yus akatramunka wáinkiachmajai. 20 Yus iirui. Wi tájana nu nekasaiti, wáitchaiti.

21 Nú ukunmasha Siria nunkanmasha, Sirisia nunkanmasha wémajai. 22 Tuma asamtai ashí Yus-shuar Jutía nunkanam pujuarmia nu winia nekaracharmai. 23 Aya antukarmai. “Yaunchu in ti áintrammiaj nu yamaikia Yus-Chichaman étseruk wekaawai. Yáunchuka in amutmaktinian wakeriniatiat yamaikia iniaisaiti” tiarmai. 24 Túrawar winia enentáimtursar Yúsan shiir yuminsarmai.

2

Chíkich Yus akatramu Paprun shiir enentáimtuiniawai

1 Tura katurse uwí nankaasmatai wisha Pírnápíjiai Jerusarénum wémajai. Titiuncha jukimjai wijiai. 2 Yus akupta asamtai Jerusarénum wémajai. Tura nuí jean aya Yus-shuara úntrijai áujmattsamjai. “Júnisnak ashí Israer-shuarchan Yus-Chichaman ujainiajai” tímiajai. Takasmajna nusha tura tuke takastin enentáimjiana nusha ántar aín tusan tu áujmattsamjai. 3 Niisha Yus-shuara úntrintiat itiurchat enentáimpracharmai. Antsu chíkich shuarka Titiu Israer-shuarchaitiat wijiai pujakuí niisha Israer-shuar ajastí tusa tsupimiamtikiatniun wakeriarmai. Túrasha tujinkiarmai. 4 Tura nu shuar ántar yachi ániak antuktai tusar wayawarmai. Tura ii chichamen antukar itiurchat awájtámsatai tusar wakeriarmai. Iis, Kristu Jesus in uwentikrampra asamtai ti shiir iisha Yus yúpichuch umáji. Tura nuna nekaawar, atakka, aya yáunchu akupkamu itiurchat ana nujai uwentikrampratniun wakerutmakarmaji. 5 Túrasha penké ishichkisha umikchamji. Antsu atumín Yus-Chicham yapajniátsuk métek jeartamat tusan ni chichame penké anturkachmaji. 6 Nu arantcha Yus akatramu uuntriñkia yamaram túratniunka suruscharmajai. Nincha ashí aents ti neka ainiawai tu enentáimtuiniawai. Kame nu shuar ti nékainiakuiisha ti enentáimtatsjai. Yus ashí shuaran mash métek iyatsuk. 7 Yus akatramu uuntriñsha Yus winia Israer-shuarchan Yus-chicham ujaktinian akuptukma nuna nekarawarmai. Tura Pítruncha akupkamai Israer-shuaran Yus-Chicham ujaktinian. 8 Pítrun Israer-shuarnum akupkama nú Yusak winiasha akuptukmai Israer-shuarchanum. 9 Tuma asamtai Jakupusha, Pítrusha, Juañsha, Yus akatramu uuntri ásar, Yus winia ti paant akuptan nekaawar, winiasha Pírnápínsha, “Ayu, átum, Israer-shuarchanum Yus-Chicham etserkatarum, tiarmai. Iisha Israer-shuarnum Yus-Chicham etserkattaji” tiarmai. Túrawarmatai shiir áujnaisar ii uwejejai achirnaikiamji métek enentáimji tusar. 10 Áyatik “Kuítrincha enentáimtusum tuke yáinatarum” tiarmai. Wisha núnaka ti wakerakun tuke túriniaitjai.

Papru Pítrun chicharkamai

¹¹ Tura nú ukunam wi Antiukía péprunam pujajñ Pítieur tamai. Tura nuj yajauch túramtai, Yus-shuara úuntriniak chicharkamjai. ¹² Iis, Israer-shuar tuiniawai, “Israer-shuarcha Muisais timia núnisan tsupirnakcha asamtai, nu shuarjaj yurumáshtiniaiti” tuiniawai. Túmaitiat Pítieur yurumámnian nékaka, emka Sántiak shuar táatsajñ Israer-shuarchajaj yurumámai. Tura nuyá Sántiak shuar Jerusaréñnumiá Antiukíanam jeawarmatai Pítieur ashamak tsupirnakcha shuarnumiá kanakin yurumáchmai. “Tsupirnakhtiniaitme” tiniu ainia nuna ashamak túramai.

¹³ Tuma asamtai chikich Yus-shuar, Israer-shuar armia nu, Pítrujaj métek emka yurumáwaru áiniayat jimiará enentai takusar ukunam ini-aisarmai. Pirnapísha neka áyat nútiksajñ nupetnakmai. ¹⁴ Tura nuna íisan ashí íimiainiain Pítrun chicharkamjai. Yus Shiir Chicham tana nujaj métek wekasachu ásarmatai tímiajai “Ame Israer-shuaraitiatam Israer-shuarti ikiukim tsupirnakchajaj yurumám Israer-shuarcha áintsamek túrame, tímiajai. Nuikia “Israer-shuarcha Israer-shuartijaj métek wekasatin áiniawai” tiip” tímiajai.

Israer-shuarsha Israer-shuarchasha mai métek Yúsan enentáimtusar uwemprartatui

¹⁵ Iikia nekas Israer-shuaraitji. Israer-shuarcha, tunáa ainia áaniuchuitji. ¹⁶ Túmaitiatar ju nékaji. Akupkamu umíamujaj uwemprachminiaitji antsu Jesukrístu nekas enentáimtakum uwemprattame. Nu nekaar iisha Jesukrístu nekas enentáimtusmaji tunaajainchu atai tusar. Aya Kristu nekas enentáimtusar péñker átajji. Akupkamunka shuar umiktaj táyat, chikichkí shuarkesha nujaj péñker ajaschamniaitji. Nu nekaar antsu Jesukrístu nekas enentáimtusmaji péñker ajastai tusar. ¹⁷ Tura Israer-shuar enentáimprashimpiash, “Wátsek, núnisaitkiuñkia wisha Krístun enentáimtustaj tákunka, emka tunáa shuaraitjai tu enentáimtumastiniaitjai” tíchanpiash. Nuka nekasaiti tura nuyá “Nu asamtai Kristu winia tunáa shuaran najataiti” penké tu enentáimprashiniaiti. ¹⁸ Antsu yaunchu, wi túrashtiniaitjai tímiaj nuna awainkin túratniuitjai tákunka nuikia nekas tunaitjai. ¹⁹ Iista, akupeamun umiktaj tukaman penké tujinkiamjai. Umiktinian tujinkian jaka áintsanak ajasmajai akupeamunam. Antsu Yusjaj iwiaaku pujajai ni wakera nuna umiktinian. ²⁰ Wisha Krístujaj krúsnum jákaitjai. Tuma asamtai yamaikia wikia iwiaaktsujai wi wakeraj nuna túratniun antsu Kristu winí iwiaakui ni wakera nuna túratniun. Tura ju ayashniun pujayatan aya Kristu enentáimtakun iwiaakjai. Krístusha Yusa Uchiríntiat winia ti anentuk jarutkamiayi. ²¹ Yus ti péñker asamtai itiurak “Kristu ántar jakamiayi” titiaj. Iis, aya akupkamun umirkan péñker ajasminiaitkiuñkia, nuikia Kristu ántar jákaayi.

3

Yus akupkamu tura Yus enentáimtustin

¹ ¿Warin aa Karaseanmayatirmea. Waweamukaitrum netse enentáimprarum Yus tama umirkashtin. Kristu krúsnum máamun ti paant étserkun atumin iniahtuschamkajrum? ² Wátsek, aniastatjarme, enentáimpratarum. ¿Warijajñ Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus

enentáimtusrum ni Wakaní achikchamkuram? ³ ¿Tuke nétsekaitrum. Yusa Wakaní emka atumí enentáin wayá takasmatai atumek yamaikia nu takat aya ayashí kakarmarijají umiktin enentáimprarmek. ⁴ Penké ánrarmek wáitsamarum tura antsu ishichkisha unuimiarchamkarum? ⁵ Naka enentáimpratarum. Yus ni Wakanín súramtsuk tura aents túrachminian atumíin ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túraiti.

⁶ Yaunchu ii uuntri Apraám enentáimpratai. Yus-Chicham nin tawai: “Apraám Yúsan enentáimtusmatai Yus “Ayu, péñkeraitme” tímiayi” tawai. ⁷ Iis, nujai páantchakait. Ashí shuar Yúsan enentáimtuinia nuka Apraámjají métek enentáimpraru ásar, ni uchiría áintsan ajasaru ániawai. ⁸ Yamái páantaiti. Yus ashí Israer-shuarchancha tawai “Aya winia enentáimtursarum péñker átatrume”. Israer-shuarchasha nujají péñker ajastinia nuna ti yaunchu neka asa, Apraáman ujakmiayi, “Ámijají ashí aents ti shiir ajasartatui.”

Tu ujakmiayi. ⁹ Tuma asantai ashí shuar Yúsan enentáimtuinia nuke Apraámjají métek péñker ajasar shiir warasartatui.

¹⁰ Antsu ashí shuar “akupkamun umirkan uwemprattajai” tuinia nuka yajauchiniam yumiñkramu ániawai. Yus-Papinium árchamukait “Ashí shuar Yus akupkamun ashí aarma nuna takamtsuk umirkachka yajauchiniam yumiñkramu ániawai.” Tu áarmaiti.

¹¹ Nújajíinkia páantaiti. Akupkamu umirkatniujají péñker ajaschamniaiti Yusjají, antsu aya Yus enentáimtusam péñker ajasam uwemprattame.

¹² Shuar akupkamu umirkatniun enentáimna nuka aya nujají péñker ajastinian enentáimiui; Yúsan enentáimtak péñker ajastinian enentáimtsui.

¹³ Tura Kristu yamaikia uwemtikrampramji. Akupkamun umirkachu yumiñkramuiti tana nuka in túramtsuji. Antsu Kristu in yainmaktin krúsnum jaka yumiñkramu ajasmiayi. Kame áarmaiti:

Shuar jakati tusa numiniam nenasma yumiñkramuiti.

¹⁴ Tuma asantai Jesukrístu jakamujají ashí Israer-shuarchasha Apraámjají métek péñker shiir warasartatui. Iisha núnisrik nu shuarjají Yusa Wakaní, Yus akupkataj timia nusha, achiktatji Yus enentáimtusar.

Yus akupkamu tura Yus túrattana nu anajmarma

¹⁵⁻¹⁶ Iis, yatsuru, Yus Apraáman Chichaman najana anajmatuk,

“Ámijají tura amée weeá akiinkiattana nujajísha ashí aents ti shiir ajasartatui” tímiayi.

Kame ‘amée weeá akiinkiartatna nujají’ tíchamiayi, antsu ‘akiintiatta nujají’ tímiayi. Nuna taku chikichik átinia nuna enentáimpramiayi. Nusha Krístuiti. Aentstisha enentáimpratai. Shuar chichaman najana tura papinium aar nuyá ni naari apujas nuikia nekas yapajítsuk umiktiniaiti. Umitsuk iniaisachminiaiti. Patattasha patattsachminiaiti. ¹⁷ Wátsek, Yus núnisan Chichaman Apraámjají najana, ukunam umitsuk iniaisachminiaiti. Tura Chichaman najanamia nú ukunam, kuaru sianu nuyá trainta (430) uwí nankaasmatai, Yus ni akupkamurín Muisaisan susamiayi. Túramaitiat nujají Yusa yaunchu Chichamen yapajíáchmiayi iniaisatniun. ¹⁸ Tuma asantai Yus timia nuka tuke uminkiatatai, Yus yaunchu Apraámjají Chichaman najana asantai. Nújajíinkia páantaiti, péñker ajastajtsar akupkamu umikrikia shiir pujuschartatji antsu Yus

timia nujaj iikia takatsuk shiir pujustatji. Nuna tsan̄katkamiayi Yus Apraámjaj Chichaman najaneak.

¹⁹ “¿Nuikia Yus urukamtaí akupkamun susamia?” tíchaintmeash. Ayu, Apraám weean, Kristu táatsaj̄n Yus tímía nu uminkiachminiuyayi. Tuma asamtaí nii táatsaj̄n ashí tunaan túrawarmia nu timiá yajauchiiti tusa Yus akupkamun susamiayi. Tura Yusa suntarī j̄u akupkamun ashí iwiarar Muisaisan susar akatrarmiaiyi Israer-shuaran susárti tusar. ²⁰ Antsu chikichik shuar niñki takastinian enentáimkiun̄ka chikichan atsumatsui. Tura Yus aya chikichkiiti. Niñki chikichan akattsuk ashí aentsun Apraámjaj p̄n̄ker awajsatniun Apraáma anajmatar niijjaj Chichaman najanamiaiyi.

Yus akupkamu itiúrkátin

²¹ “¿Tura Yus jimiará chichamjaj chichaawak, tíchaintmeash. Emka Apraáman “Jujaj uwemprattame” tíchamkia, nuyá Muisaisan ni akupkamur̄in súsachmakia?” tíchaintmeash. Tura áintsachuiti. Nekaata, akupkamu umirkatniujaj Yusjaj tuke p̄n̄ker pujusminiaitkiun̄ka nuyá aya akupkamujaj uwempram tunaaj̄in̄chu ajasaintme. ²² Tura Yus-Chicham paant “Ashí tunáa áiniawai” tawai. Nu asamtaí yamaikia ashí Jesukrístu enentáimtuinia nú shuar, aya Yus timiá asamtaí, uwempratatui. ²³ Tura Kristu táatsaj̄n Nin enentáimtusshamniauyayi. Tuma asamtaí Nii táatsaj̄n akupkamuka in emettama pujurtamji aya akupkamu tana nu umirkatin. Tura ukunam j̄u nekanayi: Kristu enentáimtusar uwempratniuitji. ²⁴ Akupkamu, nuika, in waitmakmaji uchin kuírchin wainnia áintsan. Kristu tatí tusa waitmakmaji. Tura Kristu támatai ashí nekas Nin enentáimtuinia nuka Yúsajaj p̄n̄ker áiniawai. ²⁵ Yamái Kristu nekas enentáimtustiniaiti tuma asamtaí yamaikia akupkamu kuírchia áintsan̄ wáitmatsji. ²⁶ Antsu Jesukrístu enentáimtusar, nujaj Yusa uchir̄í úuntmaru ajasuitji. ²⁷ Ashí Kristu náarīn imiaimiutirmeka Kristu áintsan̄ ajasuitrume. ²⁸ Jesukristujaj tsaniñkiu asarⁱ imiá métek aji. Israer-shuar, Israer-shuarcha, ankant ainia nu, ankantcha ainia nu, áishman̄, nuw̄a, ashí mash Jesukristunuitkiun̄kia yamaikia “niishaaiti” tu enentáimprashiniiaiti. Ni shuarī mash chikichik áiniaji. ²⁹ Tura Krístunuitkiurmeka Apraám weeá áintsan̄ ajasurme atumsha. Tuma asarum, Yus Apraáman anajmatramia nu atumsha jurumkitniuitrume.

4

¹ Kuírinniu uchir̄í ashí ni apar̄í takakna nuna niiniu áhattawak ukunam. Tura uchichitkiun̄ka ni apar̄í takarniuriya núkete. ² Tuke uunt ajatsuk ni wáinnia nuna umirkatniuiti. Tura uunt ajasmatai tura ni apar̄í “Ayu” takui nuyá nii antsu ni apar̄íniyu ashí wáinkiatniuiti. ³ Núnisrik iisha úchichik asarkia ashí aentsu akupkamur̄i umirkatniuji. ⁴ Tura tsawant jeamtaí, Yus ni Uchir̄in akupkamiayi j̄u nun̄kanam. Niisha Yúsaitiat nuwanam akiiniamiaiyi. Tura aents ajasmiaiyi. Tura aents ajas yaunchu akupkamuncha umirkatniuyayi. ⁵ Nujaj ashí aents akupkamun umirkatin armia nuna uwemtikrataj tusa támiayi. Tura iisha yamaikia nujaj ni uchir̄í uunt ajasminiaitji. ⁶ Atumsha nekas ni uchir̄í ajasakrumin Yus ni Uchir̄í Wakan̄in atumi enentáin̄ akupturmakuiti. Tura nu Wakan̄ atumi enentáiȳa Yúsan “Aparú” tawai. ⁷ Tuma asamtaí yamaikia aya takarniuchuitme antsu Yus ni uchir̄in najatmaiti ámin. Tura ni uchir̄í asakmin ashí Yus takakna nuna amastatui Krístuiyan̄.

Papru nu Yus-shuaran yáintinian wakerawai

⁸ Yaunchu átum nekas Yus nékachkuram, ántar-yus írunna nu umirkarmarme nekascha yúsak. ⁹ Tura yamaikia nekas Yus nékarme, kame Yus atumin nekarmarme. Núnis asamtai itiuksuk atak aentsu akupkamurí umirkatin enentáimprum. Nujai kakaram ajaschamniaitme tura umikmesha yainmakchattawai uwempratin. ¹⁰ Átumka jísat ti najanearme. Yaunchu jisat najanatin amia nú tsawantcha, nantusha, uwishai, jísat tuke najanearme Yus shiir enentáimtursati tusarum. ¹¹ Ashamajai, atumúin ántrankeash takasmaj tusan. ¹² Yatsuru, wi atumea áintsanak ajaschamkaj; atumsha yamaikia wi wekaajna áintsarmek wekasatarum. Wi nuí pujakui ishichkisha yajauch awajtuscharmarme. ¹³ Antsu nekamarme ayashruí itiuksuk pujayatan Yusa shiir chichamen emka ujakmajrume. ¹⁴ Tura winia sunkur ti yajauch awajtajin atum winia nakitrum muírukchamarme, antsu Yusa suntarí áintsarmek itiamarme. Jesukristu anturkatniua áintsarum anturtukmarme. ¹⁵ Maa, wi nékajai, nuik atumí jiiimi ukuinkiarum surusaarme, túramniaitkiurmeka. Tura shiir enentáimprarmena nusha itiuksukait yamaisha. ¹⁶ Yamaikia nekas chichaman étserkun ¿atumí nemasrí ajasjak? ¹⁷ Chíkich yajaya taaru ti shiir awajtamainiawai tura atumin yainmaktasa áitkiarmainiatsui. Aya winíya akantamkitiai tusa wakerutmainiawai, winia antsu shiir enentáimtursat tusar. ¹⁸ Niisha nekas yainmaktinian wakerutmainiakka atumin shiir awajtamsatin tuke péñker ainti, wi atumjai pujajinsha tura pujatsainsha. ¹⁹ Uchirú, nuwá jurertaj tana núnisnak ataksha wáitijai Kristu atumúin paant atí tusan. ²⁰ Atumjai pujaknaka maak aintjai. Yamái pujaknaka nekas nusháa chichasaintjarme. Itiuksukjarmetsuk nékatsjai.

Akarsha, Sarasha jímíará Chichaman nakumainiawai

²¹ Ayu, “akupkamu umirkatniuiti” táména nu nekaata; akupkamuka júnisaiti. ²²⁻²³ Aarma awai: Apraám jímíará uchirtiniuyayi. Emka ni takarniurí jurermiayi Ismaeran. Nuyá Apraáma nuwé jurermiayi Isakan. Ismaera nukurí Apraáma takarniuríyayi. Tura Apraám Yusan enentáimtutsuk níjjai kanarmatai, ni takarniurí jurermiayi. Tura antsu Isaka nukurínkia takarniurínchuyayi, antsu nekas ni nuwé áuyayi. Ni-isha ti úuntchiniak, Yus “jurertatme’ tímiayi. Tuma asamtai Yus timíajai Isakan jurermiayi. ²⁴ Ayu. Yamái tájana nuka Yusa Chichamen jímíaran nakumui. Ismaera nukurí Akar chikichik Chichaman nakumui. Yaunchu Senái muranam Yus ni akupkamurín áarmiyai Israershuar, takarniua áintsan, umirkarti tusa. ²⁵ Senái murasha Akara nunke Arapianam wajaawai. Akarsha Senái muran nakumak, ashí Israer-shuaran “Akupkamujai uwempramniaiti” tuinia nuna nakumui. Yamaisha Israer-shuara uuntrí Jerusarénum pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsan wáitsar takainiawai. ²⁶ Antsu ashí Yus-shuarti uwempra asar imiankas ankant pujaji. Nayaimpinmaya Jerusarénumiá áentsuitji. Nuyá áentsti tuke ankant pujuiníaji. Nuyá aents asakrin, nu yakiya Jerusaréñka ii nukurí áintsan enentáimpramniaiti. ²⁷ Júnis áarmaiti:

Warasta, misurma, uchi takakchiatmek;
Ti shiir warasta, uchi najawé nékachiatmek.

Nuwa ajapamu uchin jurertatui;

Nuwa áishrinnia núnaka nankaamas uchirtin átatui.

²⁸ Iisha, yatsuru, Isaka áintsarⁱ, Yus timiajajⁱ akiiniaitji. ²⁹ Yaunchu Ismaer Isakan kajerak itiurchat awajsamiayi. Núnisan yamaisha Ismaera áintsan aya ayashnumia ainia nú aents Yusa Wakaníya akiinia nuna yajauch awajenawai. ³⁰ Tura Yus-Papinium áarmaiti:

“Takarniusha, ni uchiríjjajⁱ, ajapam awemata. Nekas péñker nuwa uchiríjjajⁱ tsanin pujuschamniaiti. Aparí kuítríncha achikchamniaiti,” tawai Yus-Papí.

³¹ Ayu, yatsuru, nekaatarum. Takarniu uchirínchuitji antsu ankant pujaji nekas péñker nuwa uchirí asarⁱ.

5

Yusjaj tuke ankant atarum

¹ Kristu uwentikrampramiaji tuke ankant átinian. Tuma asamtai kakaram ajasam tuke ankant pujustá. Ataksha nu itiurchatnum waketkip.

² Wi Papru asan ujaajrume. Átum Muisais timia núnisrume tsupirnakrumniñkia ¿Kristu nuikia warí itiurtamkamniait? ³ Ataksha tájarme, ashí tsupirnakua nu shuar ashí Muisais timia nuna takamtsuk umirkatniuiti. ⁴ Atum “Akupkamu umiakmin Yus shiir enentáimturmastatui” tárumna nu, nu shuartiram Krístujya tupanniutrume. Yusa anenkrattairiya kanakniurme. ⁵ Iikia, antsu, Yusa Wakaníjjajⁱ tura Yus enentáimtakrin Yus shiir enentáimturmastatji, tu enentáimji. ⁶ Nekas Krístunuitkiurkia tsupirnaktin atsumatsji. Antsu aya Yus nekas enentáimtakur ashí anenaitniuitji.

⁷ Atumsha Krístujajⁱ péñker wekaimiarme. ¿Urukamtai nekas Yus timia nu iniaisatin enentáimprum ataksha akupkamunam waketkitin? ⁸ Nú enentai Yúsajyanchuiti. Niijjajⁱ wekasatniunka Yus achirmakuitrume. ⁹ Ju enentáimpratarum: Karía ishichik yuminnium enketam mashⁱ karimtiktsuk. Aneartarum atumsha. ¹⁰ Ayu, Yus yáinmakrumin wi tájana nu nusháa enentáimprashtatrume, nékajai. Tura atumin yajauch áujmatramainia nuna Yus asutiáttawai páchitsuk.

¹¹ Wíkie, yatsuru, yamaisha “tsupirnaktiniaiti” tuke tákuñkia Israershuar yajauch awajtuscharainti. Antsu Kristu jakamun étsereatnak “tsupirnaktiniaiti” tákuñkia kajertukcharainti. ¹² Atumin yajauch awajtamsatin wakeruiniana nú shuar antsu niñki tsupimiakar yajauch awajmamsarti.

¹³ Atumniasha, yatsuru, Kristu tuke ankant awajtamsarme. Tura ankant ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáiktarum. ¹⁴ Ju chichamjajⁱ ashí akupkamu mash uminkiaítawai: Ame ayashim aneamna áintsamek chíkich shuarsha aneata. ¹⁵ Tura aneartarum. Aneniachkurmeka, antsu esanairum mai yunai ajakrumka nuámtak amunaiktatrume.

Ayash wakeramu tura Yusa Wakaní wakeramu

¹⁶ Juna tájarme: Atumí ayashí wakerana nu umikíjjajⁱ tusarum Yusa Wakaní kakarmaríjjajⁱ wekasatarum. ¹⁷ Yusa Wakaní wakerana nuna ame ayashim nakitiawai. Tura ame ayashim wakerana núnaka Yusa Wakaní

nakitiawai. Mai maanai ajainiawai. Túmaitkui péñker wekasataj tuka-mam tujintiame. Páantchakait. ¹⁸ Tura Yusa Wakaní jintinramkuin^ñka, aentsu akupkamurijjaj itit áchattame.

¹⁹ Wats, ayash túramu ti paant ániawai. Ju ániawai: tsanirmatin, wapik túratin, yajauch túratin, ²⁰ ántar-yus ainia nu tikishmatratin, wawekratatin, nemasnaikiatin, katsumnaikiatin, akasmaktin, wari kajektin, nan^ñkaamantu enentáimtumastin, aya niisháa niisháa enentáimsartin, níniunak íistin, ²¹ yajauch enentáimtunaistin, mañkartuatin, nampektin, nampernum aya ti yurumin, tura ti nampen átin. Chíkich nujaj métek ániawai. Nuik ujakmajrumna núnisnak ataksha tájarme: Shuar nuna túrakka Yusaj pujustinian penké tujinkiattawai.

²² Ayu, yamaikia Yusa Wakaní kakarmarjjaj túratin enentáimsatai. Yusa Wakaní ii enentáin pujak, péñker túratniun nerektinia áintsan neremtikramji. Ju ániawai: aneatin, shiir enentáimsatin, Yusjaj tura shuarjaj nawamnaikiar wekasatin, shiir enentáijjaj katsuntratin, chíkich shuar shiir awajsatin, tsan^ñka átin, tana nuna tímatrusan umiktin, ²³ péjchach ajastin, iik íimiasar tunáa túrashtin. ¿Ju túratniuncha yaki surimia? ²⁴ Shuar Jesukristunu ainia nu, ni ayashí wakeramuríncha tura nunisan ni túramuríncha surimiak wekaawai. Ni ayashí krúsnum maatniua áintsan túrait.

²⁵ Yusa Wakaní kakarmarjjaj Yus-shuar ajasu asar, núnisrik Yusa Wakaní kakarmarjjaj wekasatai. ²⁶ “Wats, nekapnaisatai. Wi imiá péñkeraitjai” nuámtak túnaisuk, yajauch enentáimtunáischatniuiti.

6

Yáinniaiktarum

¹ Túrasha, yatsuru, Yus-shuar tunáa túrashtimpiash. Atumsha nekas Yusjaj wekaarumna nu, nu wáinkiumeka, yátsum Yusjaj iwiarat tusarum yáintárum. Tura nan^ñkaamantu enentáimtumatsuk túratarum. Tura amesha nekamata. Tunaanum iniaraj tusam anearam wekasata. ² Káarak kijin akui nuámtak yáiniaiktin átsuk. Núnisrumek atumsha, itiurchatr^ñ akui nuámtak yáiniaiktarum. Túrakrumka Kristu akupeamur^ñ umíarme.

³ Shuar tujintiayat “nan^ñkaamantuitjai” tákun^ñka ananmamui. ⁴ Shuar ní túramuríniak enentáimtumastiniaiti. Níniunak enentáimtumakuin^ñka tura péñkeraitkuin^ñka chíkicha túramur^ñ iirtsuk, antsu níniun péñker iis wararsattawai. ⁵ Iis, ashí ní káarkariniak júkishtinkiait.

⁶ Shuar Yus-Chichaman unuimiatna nu, nu shuar nin jintiana nuna ashí takakna nujaj yáintí.

⁷ Ananmamawairap. Shuar Yúsán anan^ñkatniun tujintiawai. Ame araan^ñ nuna neren^ñ júuktatme. Chíkich nere^ñ áchattawai. Atumi enentáin^ñcha núniskete. ⁸ Iista. Shuar ni ayashí wakeramunak tuke enentáimtakka, jataj nere^ñ áintsan araaiti. Nerekmataj jákatniun júuktatui. Tura Yusa Wakaní wakera nuna tuke enentáimtakka Yusjaj tuke shiir pujustinian júuktatui. ⁹ Nu asamtai péñker túratin yawetkishtiniaiti. Tura pimpitsuk takasar júuktin tsawant jeamtai, páchitsuk júuktatji. ¹⁰ Tuma asamtai yáin^ñmin ákuin^ñka ii jeajnia nu túratniuitji nekaska ii yachi yáin^ñkiartin, Yus-shuar ainia nu. Tura ashí shuarsha yáintinaiti.

Jesukristunu ajarar yamaram akiiniatin nekas péñkeraiti

¹¹ Íimsakua, winia uwejr^ñujaj urutá uuntna áatjarum. ¹² “Nekas tuke tsupirnaktiniaitme” tuinia nuka áyatik shuar shiir enentáimtursartí tusa

tuiniawai. Kristu krúsnum jakamun étsereakuinkia itiurchat awaj-tusarain tusar “tsupirnaktiniaitme” tuiniawai. Shuar “ashí akupkamun umiktajai” tusa, Muisais timia núnisan tsupirnaktiniaiti. ¹³ Pai. Tura nú shuar tsupirnaku áiniayat ashí akupkamun umiiniatsui. Muisais timia nuna ajapén ikiuiniawai. Túmaitiat tsupirnakuk tusa wakerutmainiawai. Áyatik atumin “Pai, niisha tsupimiatkiakji” titiai tusar wakerutmainiawai. ¹⁴ Wikia, antsu, aya ii uuntri Jesukristu krúsnum jakamunak wararsatniun enentáimjai. Tu enentáimkiun Kristu krúsnum jakamia áintsanak ju nunkanmaya ana nuna jaka áintsan páchiatsjai; tunaanum winia útsutkatin atsawai. ¹⁵ Kristunu ajasrikia tsupirnaktincha tsupirnakchaitkiursha mai ántrai antsu yamaram akiiniatin nekas péñkeraiti. ¹⁶ Ashí nekas Yus-shuaran, wi tájana nujai métek wekainia nuna, Yus shiir enentáimias yáinti tuke shiir pujustinian.

¹⁷ Yamaikia itiurchat najatawarain. Jesusa takatři takaakui asutiawarma paant ayashruj chimikma írunui.

¹⁸ Yatsuru, ii uuntri Jesukristu atumin shiir yainmakarti. Nuke atí.

Papru IPISIUNMAYĀ SHUARAN papí akuptukma

Ipisiunmaya Yus-shuaran Papru áatramiania nu

¹ Yus nuna wakerakui Jesukrístu akatramuitjai. Jesukrístu nekas enentámtusurum Yus-shuar ajasrum Ipisiunam pujarmena nuna ju papin áatjarne. ² Yus ii Aparísha tura ii Uuntrj Jesukrístusha waitnentramiania ásar imiatkinchanum shiir pujustinian yainmakarti.

Krístujaj tsanin̄kiu asakrin Yus ti shiira nuna tsan̄katramji

³ Ii Uuntrj Jesukrístu Aparj Yus nekas shiir awajtustiniaiti. Iisha Krístujaj tsanin̄kiu asar ii enentáin ashí nayaimpinmaya ana nujaj warasminiaiti. Túmaitkiui Yus nu waratain ashí suramsaitji. ⁴ Krístujaj uwemprar ti shiir tunaajainchu Nijijaj pujusarat tusa Yus, ju nun̄ka atsaisha, anaitiamkamiaji. ⁵ Yámankamtaiksha incha ti anenmak Jesukrístu túrunamujaj ni uchirj ajasat tusa wakerutmakmiaji. ⁶ Ni aneamu Uchirijaj tsanin̄kiu asakrin nekas ti anenmaji. Nu enentáimsar ti shiir awajsatniuitji. ⁷ Yus ti anenmakrin ni aneamu Uchirj numpé puarmatai, nu jakamujaj ii tunaarj akikmatramak uwentikrampraitji. ⁸ Tura ti anenmak ni enentáimtairin tura nekatairincha suramsamiaji. ⁹ Nujaj shiir enentáimturmak in uwentikrampratniun wakerutmakmiaj nuna, yaunchu nekaachman, yamá paant awajturmaji. ¹⁰ Ashí jú nun̄kanam íranna nunasha tura nayaimpiniam íranna nunasha Kristu ashí akupin ati tusa Yus tsan̄katkattawai. Nunasha Yus yaunchu enentáimturu asamtai tsawant jeamtai ashí uminkiáttawai.

¹¹ Iisha Krístujaj tsanin̄kiu asakrin Yus yaunchu achirmakmiaji ashí Niiniu ana nuna tsan̄katramkatniun. Nunasha, ashí Nii túrana núnisañ, aya Nii wakera asa túramiaji.

¹² Iikia Israer-shuar asar Kristu emka umirkakrin in imiá pen̄ker túrutmamun nekaawar ashí shuar Yúsan ti shiir awajsamín ániawai. ¹³ Núnisañ atumsha nekas uwempratin chicham antukrum Kristu nekas enentáimtusurme. Túrarum Kristu-shuar ajasakrumin Yus ni shiir Wakan̄in akuptuktaj timia nuna akupturmakmai. Nuna tura “nekas Wíi shuaraitrume” tawai. ¹⁴ Yamái Yusa Wakan̄j ii enentáin pujuruk tuke uwentikramji. Tura takas umik nu tsawantaj ashí tsan̄katramkattaji. Tura ii enentáin pujá asamtai Yus ukunam Nijijaisha ashj tsan̄katramkattaj nu paant nékaji. Maa, Yus ti pen̄ker asamtai Nin ashí ti shiir awajsarti.

Papru Yus-shuaran áujtusmiania nu

¹⁵ Átum ii Uuntrj Jesukrístu nekas enentáimtamuncha tura ashí Yus-shuarjaj shiir awajnaiyamuncha antukjai. ¹⁶ Túran shiir enentáimkiun Yúsan áujkun tuke yúmin̄kiajai. ¹⁷ Ii Uuntrj Jesukrístu Aparj Yus ti shiir asamtai Nin áujeakun ni Wakan̄j ni nekatairin suramas ashí jintin-tramawarti tusan sejai. Nujaj nuna nan̄kaamas Yus nekaattarme. ¹⁸ Tura enentáimincha paant enentáimtikramprarti tusan sejai. Nujaj shiir túrutmataj tusa achirmakuitrum nu nekaattarme. Nu arantcha

imiá shíira nu, Yus ni shuarj̄n ashí tsan̄katkattana nusha nekaattarme. ¹⁹ Nu arantcha Yus umirkurin ti kakaram tujincha asa in yáinmaj nu nekaattarme. Tura nu kakaram ti kakaram asamtai ²⁰ nujaj̄ Krístun jakamunmaya iniantkimiayi. Tura nayaimpiniam júki ni untsuurin̄ akupin pujutainium apuj̄samiayi. ²¹ Tura ashí ju nun̄kanam akupin ainia nújaj̄sha tura ukunam nun̄ka átatna nūi akupin áinia nújaj̄sha tura ashí akupin ainia nújaj̄sha tura ashí naarī nékamu ainia nujaj̄sha Yus Krístun ashí nan̄kaamas akupin najanamiayi. ²² Tura ashí írunna nu, Krístun umirkartin áiniawai. Tura Yuska Krístunak ashí Yus-shuara Akupniur̄i awaj̄samiayi. Túramtai Krístu ni shuarj̄ muuké áintsan̄kete. ²³ Tura ashí nun̄kanam Yus-shuar ainia nu Krístu ayashí najanainiawai. Tura Krístu ashí ni ayash̄j̄n pimiutkaiti tura nu arantcha ashí írunna nunasha pimiutkaiti.

2

Yus anenma asa uwentikramji

¹ Átum yajauch túrakrum tunaanum tuke wekaakrum Yúsnumia kanakin asarum jákauyarme. ² Nu tunaanum jú nun̄kanam pujuinia nujaj̄ métek tuke wekainiuyarme. Túrarum uunt iwianchi wakeramur̄i umirniuyarme. Uunt iwianch ashí Yúsan umirainiatsna nuna akatenawai. ³ Ashí iisha núnisrik yaunchu nu shuarjaj̄ métek ii ayashí wakerakmu umirniuyaji. Tura íi enentá̄i wakeramusha umirniuyaji. Tuma asar tura tunaajaj̄ akiinia asar chíkich shuarjaj̄ métek ti kajernakmiaji. ⁴ Antsu Yus ti waitnen̄kartin asa in ti anenmamiaji. ⁵ Tuma asa ii tunaanum tuke jaka pujarnīn Krístujaj̄ métek iwiaaku awaj̄tamsamiaji. Aya ti anen̄kartin asa uwentikrampramiaji. ⁶ Tura Krístujaj̄ métek iniantamkimiaji. Nuyá Jesukrístujaj̄ métek, akupin pujutainium yamaisha apuj̄tamas tuke nupetkatniun tsan̄katramkaitji. ⁷ Nujaj̄ ni ti anen̄kratmar̄incha tura Krístu túrunamujaj̄ waitnentrampramuncha tuke iniaktusmin átatui. ⁸ Jesukrístu nekas enentá̄imta asakrumin Yus waitnentramar uwentikrampraiti. Júka átumkeka túrunachuitrume. Antsu Yuska Niñki kuítchajaj̄ suramsaitrume. ⁹ Shuar ni takatr̄ijaj̄ uwempratniuitkiun̄ka nan̄kaamantu enentá̄imsainti winia kakarmarjaj̄ uwemprajaj̄ tusa. Nu enentá̄imsatniuka atsutí tusa Yuska átumka takaatsrumnīn uwempratniun suramsamiarme. ¹⁰ Yus najanamuitji. Kame Jesukrístujaj̄ tsaniákrin yamaram iwiaakman suramas tuke pé̄nker túratniun najatmamji. Yáunchuk nuna enentá̄imturmasmiaji.

Krístujaj̄ tsaniñkiu asar shiir nawamnaikiar pujaji

¹¹ Nuik ámarum nu enentá̄impratarum. Ashí Israer-shuar ni ayash̄j̄n tsupirnaku ásar ashí Israer-shuarchan, tsupirnakcha áiniakui, pen̄ké Yúsnachua núnis enentá̄imtuiniawai. Tura atumsha Israer-shuarcha asakrumin “tsupirnakcha” turamniuyarme. ¹² Nuik Krísturtinchauyarme. Israer-shuarcha asarum ashí ni túrutair̄isha tura ashí Yus nin tsan̄katkarmasha nekaachuyarme. Tura jú nun̄kanmaya asarum nekas Yusa nu enentá̄imtichuyarme tura shiir pujustin nán̄kamsarum enentá̄impramarme. ¹³ Antsu yamaikia Krístujaj̄ tsaniñkiu asarum, yaunchu Yusaýa yajá pujuwitiatrum, yamaikia Krístu numpé puármatai ni jarutramkamujaj̄ tántaitrume. ¹⁴ Israer-shuarjaj̄ Israer-shuarchajaj̄ nemasmanaikiar ajapén péen̄kramu ámiaji. Tura Krístu nuna sáaki

nawamnaimtikramkamiaji. Tura chikichik shuar najatmamiayi. ¹⁵ Nuiak aya Israer-shuar Muisais akupkamu untsurí armia nuna umirkatin ániak nujají chíkích shuarjají nemasmanianiarmiayi. Tura Kristu jaka nu akupkamun ántar awajas chikichik shuar yamaram awajtamsamiayi. ¹⁶ Núnisan ámiayi. Kristu krúsnun jaka nemasjají mai apattamak chikichik awajtamasa Yusjajísha nawamnaimtikramkamiaji.

¹⁷ Kristu taa nawamnaikiatniun chichaman Israer-shuaran ujakmiayi. Tura nu chichamnak atumin Yus nékachuyarmena nunasha ujaktinian akupkamiayi. ¹⁸ Yamaikia Israer-shuartisha tura Israer-shuarchasha mai metek Kristu túrunamujají tura Yusa Wakaní takaku asar Yusají jeatniuitji. ¹⁹ Tuma asamtai yamaikia chíkích shuar-chaitrume, antsu ashí Yus-shuarjají métek ajasuitrume. Nekas Yusa shuarinrume.

²⁰ Átum uunt jeají jeamma núnisaitrume. Uunt jeají jeamtin, emka kaya apujtuktiniaiti jeají ti wewe atí tusa. Núnisan yaunchu Yúsnan etserniusha tura Kristu akatramurísha Yus-Chichaman etserainiak imiá nekas enentáimtustinia nuna apujtukarmiayi. Tura ashí nujají nankaamas Jesukrístu enentáimtustiniaiti. ²¹ Jeají apujtukmarí Kristu asamtai Njii ti penker ekeniar jeají jeamnaki wéawai. Tura ii Uuntrí Krístujají Yusa Jee ti shiir átatui. ²² Núnisrume atumsha Krístujají tsaniñkiu asarum átum ashí Yus-shuarjají Yusa Jeeya ántsan ajasuitrume. Tura Yusa Wakaní ashí Yushuara enentáin pujú asamtai nekas Yusa Jeeente.

3

Papru Israer-shuarchanum Yus-chichaman etserkatniuya nu

¹ Nu asamtai atumin Israer-shuarchatirmin yáintaj tusan Jesukrístunu étserkun sepunam pujajai. ² Yus anentak Yus-Chichaman atumin etserkatniun akatar akuptukuiti. Nu nékatsrumek. ³ Yus nuna túrutak yaunchu nekaachmancha paant awajtursamiayi. Núnaka ishichik áatraitjarme. ⁴ Nu áujсарum Krístunu yaunchu nekaachman yamaikia paant nékajna nu nekaattarme. ⁵ Nú chichaman yáunchusha chikichik kishesha ujankachmiayi. Túrasha yamaikia Yusa Wakaní Kristu akatramuríncha etserniuríncha nu chichaman paant awajtusarai. ⁶ Nu chicham júi: Uwempratin chichaman umirkar Israer-shuarcha Israer-shuarjají métek Krístujají tsaniñkiaru ásar chikichik shuar ajasartatui. Tura nu arantcha Yus ni shuarin ashí shíiran tsanekatkatniun anajmatrama nuí métek pachiinkartatui. ⁷ Yus ni kakarmarijjají winia yáintiuk tura ti anentu asa nu uwempratin chichaman etserkat tusa akatturmiayi. ⁸ Ashí Yus-shuarjají nankaamas wi péñkercha aijn Israer-shuarchanum shiir chichaman etserkat tusa Yus tsanekatrukmiayi. Krístujajínkia kuitjají nankaamas péñker, enentáimtustin jeatsjinia nu, takakji. Nusha ti shiir chichamaiti. ⁹ Yuska, ashí najana nu, nu enentáimmian yáunchusha etsertsuk yamaikia ashí shuar nu chichaman nekaawarat tusa winia akatturmiayi. ¹⁰ Yamaikia ashí nayaimpiniam pujuinia nuka Yus ni shuarijn túrunamun ísar Yuska imiá neka asa ashí enentáimniua nuna paant nékainiawai. ¹¹ Yus júnis túratniun yáunchuk enentáimpramiayi. Tura ii Uuntrí Jesukrístujají mash uminkiamiayi. ¹² Tura Krístujají Yusají yúpichuch jeaji. Tura Nin nekas enentáimtusar sapijmiatsuk Njii tantamniaitji. ¹³ Tuma asamtai tájarme, atumin yáintaj

tusan sepunam pujakui kúntuts enentáimprairap. Antsu nujaj Yus atumin ti shiir awajtamkurmin átum warasuk tusan wakerajrume.

Kristu ti anenkratniuiti

¹⁴ Nu asamtai ii Uuntri Jesukristu Aparín tikishmatran áujtajrume. ¹⁵ Ashí nayaimpinmasha tura nunḱasha Yus-shuar ájinia nu nekas ni shuari áiniaji. ¹⁶ Yus ti kakaram asa ni Wakanjijai atumí enentáin pujureak ashí ni kakarmariyan atumin suramsarat tusan áujtajrume. ¹⁷ Yus nekas enentáimtakrumin Kristu atumí enentáin pujusat tusan áujtajrume. Tuke yapajítsuk anenkratin átarum tusan áujtajrume. ¹⁸ Túrakrum ashí Yus-shuarjai Kristu anenkrattairi nekaattarme. Imiá uunt asa nanḱantsuk tuke amuukachminiaiti. ¹⁹ Nu anenkrattai ashí takamtsuk nekaachmin ajñ nekaatarum tusan áujtajrume. Nujaj Yus takamtsuk pimiutramkattarme.

²⁰ Nekas Yus shiir awajnasti. Ni ti kakaram asa ii seajnia nuna nanḱaamas tura enentáimprachminia nunasha nanḱaamas iñ pujurtamuk ashí túramniaiti. ²¹ Ashí Yus-shuarjajsha tura Krístujajsha Yusa péñkeri tuke paant wantinin atí. Yus tuke iniaitsuk shiir awajnasti. Núnisan atí.

4

Yusa Wakanjijai tsanñkiar pujakur túratin

¹ Atumsha ni shuari ajastin Yus achikma asarum péñker wekasatarum tájarme. Ii Úuntriñiun étserkun sepunam pujakun seajrume. ² Nekasmiancha ajasrum aneniakrum katsunnairatarum. ³ Yusa Wakanj chikichik shuar awajtamkurmin shiir awajnisarum pujustarum. ⁴ Yusa Wakaninkia chikichkiiti. Tura ashí métek Yus achikma asar métek Nijjai shiir pujustin enentáimji. Iisha Kristu ayashí ayashímkia asar chikichik ayashkiitji. ⁵ Ii Uuntri chikichkiiti. Niñki nekas enentáimtusar métek imiantiniaitji. ⁶ Chikichkiiti Yus, ashí Yus-shuarti ii Aparinti. Ashí akuptamniuitji. Ashí ni shuariñ pujak ii enentáin pujurtamji. Ti nekas ashí mash, Israer-shuartaisha Israer-shuarchasha, imiá chikichik ajasuitji.

⁷ Tura chikichik chikichik niisháa shiir takastinian suramsaitji. Tura Kristu wakerimia núnisan suramsaji. ⁸ Nu asamtai Yus-Papiniumsha tawai:

“Achikman juki nayaimpiniam wakamiayi. Tura shuáran shíran susamiayi.”

Tu áarmaiti.

⁹ Tura “wakamiayi” tana nu ¿warintia? Kristu nayaimpiniam pujá asa yakí wákanḱa emka tárashtinkiait. Nekas nunḱá taramiayi. ¹⁰ Niñki ataksha nekas nayaimpiniam wakamiayi. Nuna tura asa ashí ni shuariñ pimiutkarmiayi. ¹¹ Tura nujaj chikichan akatramun awajsamiayi. Chikichnasha Yúsnan etserniun awajsamiayi. Chikichnasha uwempratin chichaman etserniun awajsamiayi. Chikichnasha Yus-shuara wánniun awajsamiayi. Tura chikichnasha unuikiartinian awajsamiayi. ¹² Túramtai ashí Yus-shuar ni takatrijijai yáiniaikiar ti péñker shuar ajainiakui Kristu ayashí takamtsuk katsuarartatui. ¹³ Nujaj Yus nekas enentáimtamunan Yusa Uchirí ashí métekrak péñker nekaattaji. Nu túrakur katsukir Krístujaj métek péñker ajastatji. ¹⁴ Tura uchía áintsar áhattaji. Úchikia ashí yamaram chichaman antukar

wari yapajjiniawai. Tura anankartinia chichamen antukar waaku áiniawai. Kame nu anankartin shuar ti paant chichayatan ni shiir chichamejai anankatniun pujurenawai. ¹⁵ Antsu nekas aneniakur nekas chicham ujanaiktiniaitji. Túrar Krístujai tsaniñkiar tuke tsakakir ashí péñker túratniujai Niijjai métek ajastatji. Krístuka ashí ni shuari muuké áintsarñkete. ¹⁶ Tuma asa ni ayashin wáinkui ashí nuna muchitmarj péñker yáiniaikiar ashí ni túratniurin shiir takasartatui. Nujai nu ayashnium muchitmarj chíkich chíkich péñker takainiak métekrak shiir tsakartatui. Tura anenainiakui nu ayashsha péñker úuntmartatui.

Krístujai tsaniñkiu asar yamaram iwiaakmanum wekaaji

¹⁷ Ii Uuntrj Krístu íimmianum juna akatjarne: Chíkich aents Yúsan nékachu ásar ántar ni enentáimmiajjain wekainia núnisrum wekasairap. ¹⁸ Ni enentáin kusuru ániak Yusna nuna nekaatniun wakeruiniatsui. Tuma ásar shiir wekasatniun, Yus amaana nuna, nékainiatsui. ¹⁹ Nu arantcha, ni túramurijjai natsamtichu ásar ti yajauchiniam surumakar ashí tunaan wararainiak túrin áiniawai. ²⁰ Antsu átumka núnisrum enentáimtustin unuimiarchamarme. ²¹ Nekas Nii anturkaitkiurmeka tura Jesus nekas tama Krístu unuiniarmaitkiurmeka Nin shiir enentáimtustin unuimiarmarme. ²² Yaunchu enentáimtaimeka ayash wakeramu anankramin ainia nujai piaku asa imía yajauchiiti. Nu enentáimtaimesha yaunchu túrutairmesha ajapa iniaisatarum. ²³ Túrarum péñker enentáimsarum wakannium yapajjatarum. ²⁴ Tura yamaram enentáimtairam emetatarum. Nuka Yusjai métek najanamu asa nekas péñker tura shiira nuna tuke túriniaiti.

²⁵ Nu asamtai chikichik ayashi muchitmarj asarum wáitrusuk nekas chicham chicharnaisatarum.

²⁶ Kajeakrum tunáa túrawairap. Tura nu kajekmasha tsawant takamt-suk áchatniuiti. ²⁷ Uunt iwianch yajauch awajtamsatin tsañkatkaip.

²⁸ Kasasha kasamtsuk kakaram takakmasti. Tura ni uwejjajai péñker takaak atsumainia nú shuarnasha susati.

²⁹ Muijmiai chicham chichasairap. Antsu chichastin akui péñker chicham, chíkich shuar péñker awajsamnia nu chichastarum. Anturtu- inia nuna yáintaj tsarum nu chicham ujaktarum. ³⁰ Yusa Shiir Wakanj kúntuts awajsairap. Warí, Yúsnaiti tusa pujurtamji. Tura pujurtamuk takamtsuk uwemtikramprattaji.

³¹ Ashí yajauch ana nuyá kanaktiarum. Nakitratniusha, kajernaiki- atniusha, tura kakantrar charáa charáa ajatniusha, katsekmaktincha, tsanumpratniusha mash atsutí. ³² Antsu shiir awajkartin ajasrum waitnennairarum, Krístu jakamujai Yus atumí tunaarj tsañkurtampra nútiksarmek tsañkurnairatarum.

5

Yus-shuar túratin

¹ Nekas Yusa Uchirj aneamu asarum Nii tura núnis túratin wakeruk- tarum. ² Krístu in anenmaj núnisrum anenaitiarum. Kame ii tu- naarj akikmaktaj tusa jákatniunam surumakmiayi. Túramtai Yus shiir enentáimtusmiayi.

³ Yusna asarum tsanirnatniusha yajauch túratniusha tura jú nunñanmayaj ikaunñatniusha ishichkisha enentáimtuschatniuitrume.

⁴ Natsanmaincha, ántar chichamsha yainmakchamnia asamtai

chichaschatniuitrume. Antsu Yus shiir yumı̄nsatniuiti. ⁵ Shuar chíkich nuwajaj tsanirmakka tura ashí yajauchin wakerakka tura jú nuñkanmayaan ikiaun̄katniun wakerakka Yusaj Kristu akupea nuı̄ pen̄ké pachiın̄kiachminiaiti. Kame ju nuñkanmayaan ikiaun̄katin ántar-yus tikishmatratniua nujaj méteketete. ⁶ Nu túramniaiti tusar ántar chichamjaj anan̄kramacharti. Warí, nuna túruiniakui Yúsan umirainiachun Yus ti asutiáwartatui. ⁷ Tuma asamtai nu shuar pen̄ké pachischatniuitrume.

⁸ Yáunchuka atumsha kiritniunam wekainiuyarme. Tura yamaikia Krı̄stujaj tsanı̄n̄kiu asarum pen̄ker tsáapninium wekaarme. Shuar tsáapninium wekainia nujaj métek wekasatarum. ⁹ Tsáapninium wekaini-aka shiir awajkartincha tura nekas chichamtincha tura pen̄ker túrin ániawai. ¹⁰ Ii Uuntrī Kristu wakeramu nekaatin wakerukturum. ¹¹ Kiritniunam wekainia nu túramu pachisairap. Antsu nu shuar tsáapninium en̄keatarum. ¹² Ni uuk túruinia nu áujmatsatin natsanmajiniaiti. ¹³ Tura ashí tsáapninium itiamu ashí paant ajawai. Tsáapnikia ashí paant awajeatsuk. ¹⁴ Nu asamtai Yus-Papinium tawai: “Kanáruitme nu shintiártá. Jakamunmayaan nantáktiá. Tura Kristu tsáapin awajturmastatui.”

Tu áarmaiti.

¹⁵ Nu asamtai átum túramu ímiastarum. Nékachu áintsarum pujusairap. Antsu pen̄ker enentáimprarum wekasatarum. ¹⁶ Pen̄ker túratin tsawant wasúrkáip. Tunáa ti pampaatsuk. ¹⁷ Enentáincha áirap. Ii Uuntrī Kristu warinia wakera nu enentáimtustarum. ¹⁸ Nampekairap. Nampeakmeka aya yajauch ajame. Antsu Yusa Wakanı̄ winia enentáiruj takamtsuk pujurtusti, tu enentáimsatarum. ¹⁹ Túrarum Yus shiir enentáimtakrum Yuskanta kantamkirum shiir áujnaisatarum. ²⁰ Ii Uuntrī Jesukrı̄stu náarijjaj ashí irunna nu Yus Apa tuke yumı̄nsatarum.

Yus-shuar túratin

²¹ Yus-shuar asarum nuámtak umirnaikiatarum. Túrakrum Kristu shiir awajsattarme.

²² Núwaka Krı̄stun umirna núnisañ ni áishrin̄cha umirkatniuiti. ²³ Kristu ni shuarın̄ akupeana núnisañ áishman̄sha ni nuwen̄ akupkatniuiti. Kristu ni shuarın̄ ayashimiak ni muuké áintsan̄kete. Tura nin uwemtikiartini-aiti. ²⁴ Nu asamtai Yus-shuar Krı̄stun umirin̄ ániawai. Núnisañ ashí ana nujaj nuwá ni áishrin̄ umirkatniuiti.

²⁵ Kristu ni shuarın̄ ti aneak nin yáı̄ntaj tusa jákatniun surumakmiayi. Núnisrumek áishman̄tirmesha atumı̄ nuwé aneatniuitrume. ²⁶ Kristu ashí ni shuarın̄ ni Chichamejaj tura entsajaj nijjar ní shuar pen̄ker árat tusa jakamiayi. ²⁷ Nujaj ashí ni shuarın̄ tunaarinniuchu tura yajauch máatrachu antsu ti pen̄ker shiir awajas Niinı̄ ejetaj tusa túramiayi. ²⁸ Núnisañ áishman̄ ni ayashın̄ anea núnisañ ni nuwen̄ aneatniuiti. Shuar ni nuwen̄ aneak nujaj ni ayashın̄cha aneawai. ²⁹ ¿Yaki ni ayashın̄ nakitniuit? Antsu pen̄ker wáiniuk áyureatsuk. Kristu núnisañ ni shuarın̄ wainiui ³⁰ ni ayashı̄ asamtai. Kame ni ayashı̄ muchitmarintji. ³¹ “Tuma asamtai áishman̄ ni aparın̄cha nukurın̄cha ikiukin ni nuwejaj tsanı̄n̄kiar chikichik ayashın̄ ajainiawai.” Tu áarmaiti. ³² Nusha Kristu ni shuarı̄jjaj tsanı̄nmán tawai. Nuka yaunchu nekaachma yamaikia nekanaiti, tura ti enentáimturiniaiti. ³³ Tura núnisañ ashí áishman̄tiram atumı̄ nuwé atumı̄ ayashı̄a nútiksarmek aneatniuitrume. Nuwasha ni áishrin̄ umirkatniuiti.

6

¹ Uchitirmesha, Yus-shuar asarum apasha nukusha umirkatarum. Nuka ti péñkeraiti. ² Emka akupkamu “umirkam nekas shiir átatme” tana nu júiti:

“Apasha nukusha umirkata.

³ Túrakmeka shiir átatme tura jú nunkanam untsurí tsawant pujustatme” tawai.

⁴ Atumsha, uchirtintirmesha, atumí uchirí ántarum akajkairap. Antsu Yúsan shiir enentáimtusarat tusarum ti péñker jintinkirum tsakatmar-tarum.

⁵ Takakmautirmesha, atumí uuntri jú nunkanam pujuinia nu ti penker umirkatarum. Kristu umirkatniua áintsarum wishiktsuk ashamakrum tuke enentáijjai takarsatarum. ⁶ Aya wáitmakui shiir enentáimtursat tusarum péñker takarsairap. Antsu Kristu takarniurja núnisrum ashí ame enentáimjai Yus wakera nu túratarum. ⁷ Aya shuárnak yayá nútiksarum takasairap. Antsu ii Uuntri Kristu takarsatniua nútiksarmek ásump enentáijjai takastarum. ⁸ Kame chíkich chíkich ní takasmajai métek akinkiertatui. Ii Uuntri Kristu nu shuar péñker túramujai métek akiktatui.

⁹ Tura atumsha, iniamniutirmesha, atumí takartamu wakaní mántutsuk shiir enentáijjai iniartarum. Nekas enentáimpratarum. Ii Uuntri nayaimpiniam pujana nuna niisha atumjai métek umirainiawai. Tura Yuska ashí shuaran akantsuk métek iyawai.

Yusa kakarmarijiai íwianch taritratatum

¹⁰ Wátsek, yatsuru, ii Uuntri Yusjai tsaniníkiu asarum ni ti kakarmarijiai iwianchjai máanaiktin kakaram ajastarum. ¹¹ Apach máanainiak jiru entsarua núnisrum Yus susamujai entsartarum. Nujai íwianch nupettamkui tariartatme. ¹² Kame Yusna takáa asar penké áentsjai máaniatsji antsu yajauch wakan kakaram írunna nujai máaniaji. Ni-isha jú nunkanam, kiritniunma áintsan, tunaanum wekainia nuna akupin áiniawai. ¹³ Jiru entsartinia áintsarum Yus súramna nu entsar-tarum. Nu entsarmajai itiurchat tsawant taritra nupetkarum tuke tari-aram wajastatume. ¹⁴ Wats, nekas tariartin nekas chicham emenma-matarum. Tura péñker túratniujai jatairum ajaktarum. ¹⁵ Suntar iwiar-nak sapatan aweá áintsarum Yusa shiir chichame etserkatin iwiarnar-tarum. ¹⁶ Nuyasha ashí nankaamas, tantar takustinia áintsan, Yus tuke nekas enentáimtustarum. Nujai íwianch eketrámkamusha uwem-turtatme. ¹⁷ Múukem ajaktincha Kristu uwemtikrampramu múukmiin etsenkrutarum. Tura Yus-Chicham puniáa áintsan achiktatum. Nuka nekas Yusa Wakaní puniarinti. ¹⁸ Yusa Wakaníjiai Yus áujeakrum tuke seatniuitrume. Tura tuke aneara pujustarum wake mesetsuk, tura ashí Yus-shuar ainia nusha Yus áujtustarum. ¹⁹ Núnisan winiasha áujtursatarum. Wi sepunam pujayatan Yus winia chichastinian surusat tusarum seatri-tiarum. Tura wi chichaakun sapijmiatsuk Shiir-chichaman yaunchu nekaachma paant awajsat tusarum áujtursatarum. ²⁰ Yus nu chichaman etserkatniun akuptukuiti. Nuna túrakun sepunam pujajai. Sapijmiatsuk etserkat tusarum Yus áujtursatarum.

²¹ Ii aneamu yachj, Tíkikiu, ashí wi túramun ujatmaktatui. Niisha Ii Uuntri Krístunu etserkatniun ti penker yáinniuiti. ²² Tuma asamtai ii juí pujamun ujatmak ikiantamprarat tusan akuptajrume.

²³ Yus Apasha tura ii Uuntri Jesukrístusha ashí Yus-shuartirmin anenmak shiir imiatkinchanum pujustinian suramsarti. Tura Nin tuke nekas enentáimtustinian suramsarti. ²⁴ Ashí ii Uuntri Jesukrístun tuke enentájjajj aneana nuna Yus shiir yáinti.

Nuke atí.

Papru JIRIPIUSNUMIA SHUARAN papí akuptukma

Papru sepunam pujus Jiripiusnumia Yus-shuaran áatramiania nu

¹ Wi Papru Timiutéujai Jesuskrístu takarín asar ashí Yus-shuar Jiripius péprunam pujarmena nu ju papí akuptaji. Yus-shuaran wainin árumna nussha tura Yus-shuaran yain árumna nussha ashí Yus-shuarsha nunisan Yusna asarum tura Jesukrístujai tsanin̄kiu asakrumin ju papí áateajrume. ² Yus ii Aparísha Jesukrístu ii Úuntrīsha atumin waitnentrmainia ásar imiatkinchanum tuke shiir pujustinian yainmakarti.

Papru Yus-shuaran Yúsan áujtawai

³ Ashí tsawant atumin enentáimtakun Yúsan tuke shiir yúm̄nkiajai. ⁴ Yúsan áujeaknasha ti warasan seatjarme. ⁵ Kame iikia yámankamtaiknumia Yus-Chicham métek yáiniáikiar iniaitsuk takasuitji. ⁶ Yus atum̄in ti péñker awajsatniun nan̄kama asa núnisan̄ Jesuskrístu táatsain̄ tuke shiir awájtámki nekas péñker najatmattarme. Nuka ti nekasaiti. ⁷ Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakui átum yántiarme. Yus ti anen̄kartin asa nu túratniun mai metek tsan̄katrámkaitji. Tuma asamtai atumin júnisan enentáimtustin ti pen̄keraiti. ⁸ Jesuskrístu anen̄krattairijjai wi atumin aneamun Yussha paant nékarui. ⁹ Yúsan áujeakun anearmena nú nan̄kaamas aneak tusan seatjarme. Tura nújajisha ti neka ajasrum ¹⁰ ashí péñkera nu achikiuk tusan Yúsan áujtajrume. Atumin nu túrunamtain̄kia yamaisha tunáajain̄chu pujus-tatrume tura Kristu támatai sumamashtatrume. ¹¹ Núnisan̄ Jesukrístu kakarmarjijjai ashí péñker túrin átatrume. Tura nújai ashí shuar Yúsan ti shiir enentáimturartatui.

Wi ju nun̄kanam aya Krístunak enentáimtakun pujajai

¹² Winin túrunamu itiurchat āin̄ nujai uwempratin chicham nekas pampaawai. Nu nekaatarum tusan wakerajrume, yatsuru. ¹³ Iis, uunt akupniu suntarisha tura ashí shuarsha wi Krístunun etseru asan sepunam pujamun paant nékainiawai. ¹⁴ Ti untsurí Yus-shuar wi sepunam en̄ketman nekaawar ii Uuntrī Jesusan nekas enentáimtusar sapijmiatsuk Yus-Chichaman etserainiawai.

¹⁵ Kame shuar awai winia kajertuiniak tura nan̄kaamantu enentáimtumainiak Krístun páchiniawai. Antsu chíkich shuarka nekas enentáijjai Krístun etserainiawai. ¹⁶ Yajauch shuarka Krístun shiir enentáimtutsuk antsu ashí shuar ní chichamenak anturkar wíi shuar ajarat tusar etserainiawai. Túruiniak wisha sepunam pujakui nu arant itit awajtustinian wakerutainiawai. ¹⁷ Antsu péñker shuar Krístun nekas aneenak etserainiawai. Nu uwempratin chicham imiá pen̄keraiti wi titin asamtai winiasha anentainiak shiir etserainiawai. ¹⁸ Wats, mai metek chíkich yajauch enentáijjai tura chíkich shiir enentáijjai Krístun etserainiakui shiir enentáimjai.

Tura nuna nan̄kaamas shiir enentáimprattajai. ¹⁹ Kame Yus áujtursa asakrumin tura Jesukrístu Wakanísha yaintiu asamtai ti péñker uwempran jiinkittiajai. ²⁰ Nekas juna wakerajai: Natsamtsuk uunt akupniun Jesukrístun paant ujakartinian wakerajai. Nujaj winí Kristu kakarmari pujamu ti paant nekanattawai. Mántuiniakuisha tura mántuiniachkuisha ashamsatsjai. Aya Kristu kakarmari winí nan̄kaamas nekaawarat tusan wakerajai. ²¹ Wíjjaiñkia ju nun̄kanam iwiaaku pujakun aya Krístunak enentáimtakun pujajai. Tura jákatniusha juj pujajnia nuna nan̄kaamas péñkeraiti. ²² Ju nun̄kanam pujakun Uunt Jesusnan takasminiaitjai. Nu asamtai tunatsuk achiktaj nékatsjai. ²³ Wíjjaiñkia itiurchataiti mai achiktin. Jákatniuncha wakerajai Krístujaj tsaniñkian pujastaj tusan. Wíjjaiñkia nu imiá péñkeraiti. ²⁴ Túrasha atumin yáñtaj tusan tuke ju nun̄kanam iwiaaku pujusminiaitjai. ²⁵ Kame tuke pujastatjai nékajai. Núnisnak atumjai pujakun Yus nekas enentáimtakrum nan̄kaamas waraakrum tuke katsuaruk tusan yáñtatjarne. ²⁶ Nu asamtai wi atumjai pujakui Jesukrístu yuminsarum shiir warastatrum.

²⁷ Kristu chichame ti pen̄ker asamtai atumsha aya péñkera nuke túratarum. Wi atumjai pujaknasha tura yajá pujaknasha átum ti shiir túrarmena nuna antuktinian wakerajai. Ashí shuar uwempratin chichaman nekaawar umirkarat tusarum chikichik enentáijjai kakaram ajastarum. ²⁸ Atumí nemasrisha ishichkisha sapijmiamtikramkaraiñ. Nu túrakrumin nu shuar emesratniunam weena nusha tura átum uwempratniusha paant nekanattawai. Núnisañ atí tusa Yus túrait. ²⁹ Krístunu asarum Nii nekas enentáimtustinniaasha tura Niiniu asarum wáitsatniusha Yus anenma asa tsankatramkaitrum. ³⁰ Yus-Chicham pamparat tusar maimetek ti takáa asar wáitiaji. Wi nuik ti takasmaj nu nekamarme. Tura yamá tuke takaaj nusha ántarne.

2

Kristu péejchach ajasmatai Yus ti uunt awajsamiayi

¹ Kristu ikiantamkuisha, ni anenkrattairi atsan̄tamkuisha, ni Wakanj atumjai pujakuisha, anenkratniuitkiurmasha, waitnenkratniuitkiurmasha ² waramtikrustarum. Métekrak takastarum. Mai metek anenaitiarum. Yusa Wakanj atumí enentáin pujá asamtai chikichik enentáik enentáimsatarum. ³ Átum wakeramuk túrawairap. Nan̄kaamantu ajastaj tírap. Antsu péejchach ajasrum chikich shuar atumjai nan̄kaamas péñker enentáimtusta. ⁴ Aya níniak péñker átatna nunak shuar túrashti. Antsu chikich shuar yáñminia nuna túrati.

⁵ Kristu Jesus enentáimpramia núnisrum enentáimpratarum. ⁶ Niisha Yúsaitiat ju nun̄kanam winiak tuke Yusjaj métek átinian emettsuk ⁷⁻⁸ antsu nuna ikuak aents ajas péejchach asa ashí aentsu takarñ ajasmiayi. Tura aentsu ayashñ ayashimiak tura Yúsan umireak jákatniuncha surimiakchamiayi. Maa, imiá tunaarinnia áintsañ krúsnum natsanmainium jakamiayi. ⁹ Túramtai Yus nekas nan̄kaamantai awajsamiayi. Ni náarñcha ashí paant awajsamiayi. ¹⁰ Tuma asamtai ashí nayaimpiniam írúnna nusha, nunká írúnna nusha, tura iwiansamusha Jesusa náarñ antukar tikishmatrartatui. ¹¹ Tura ashí shuar Jesukrístu ashí akupin ajasman paant nekaawartatui. Nújain̄kia Yus Apá kakarmari sha paant nekanattawai.

Yus-shuar kiritniunam keeák tsáapin awajeana áintsañ áiniawai

12-13 Nu asamtai, aneamu yatsuru, wi atumjai pujakui umirtukmar-mena nuna nankaamas yamaikia arant pujakuisha umirtuktarum. Iis, Yus atumí enentáin takaak ní shiir wakeramu wakeruktinniasha tura umiktinniasha pujurtamprume. Nu asamtai atumsha kakaram ajas-tarum Yus ti penker awajtamsatniun wakera nu túrunati tusarum. Tura péejchach enentáimprarum awajirminiaitjai tusarum aneara wekasatarum.

14 Ashí yajauch tunaitsuk tura jianaitsuk wekasatarum. 15 Túrakrum makuumatsuk tunaajainchu áatrume. Antsu Yusa uchirí áatrume. Ju nunkanmasha shuar imiá tunaan túrinjaisha máatrachu asarum kir-itniunam ji keeá áintsan ketrume 16 iwiaaku pujustin chicham paant awajeakrum. Nújai Kristu támatái atumjín ántran takascha asan ti shiir wararsattajrume. 17 Winia takatrujai Yus-shuar ajasakrumin wi jákatniuitkiuncha nújaisha warasaintjai. Atumsha wi waraajna juí núnisrumek warastarum tusan wakerajrume. 18 Atumsha waraakrumin métek wararnaisatai.

Timiutéuncha Epaprutítiuncha Papru ujatkamiania nu

19 Ii Uuntri Jesus wakerakuinkia Timiutéun írmainiarat tusan ti warik akuptuktatjarne. Tura átum shiir pujamu ujateakui warastatjai. 20 Kame Timiutéu wíjjai métek enentáimna áinis chíkich shuar atsawai. Niisha átum shiir pujusuk tusa ti nekas enentáimturmarne. 21 Chíkichka Kristu wakeramun iniaisar ní wakeramunak páchiniawai. 22 Túrasha átumka Timiutéu tuke penker túramu nékarme. Uchi ní aparíjjai takaana áinis Yusa shiir chichame etserkatniun yáintkiaiti. 23 Winia itiurtukartin nuna nekaan Timiutéu írmainiarat tusan akuptuktatjarne. 24 Kame Kristu yáintkiui wíkisha wárik ímniaitjarne.

25 Wi atumaj nuna írsati tusarum Epaprutítu akupturkamarme. Wíjjai métek tsanin takasuiti. Tura métek wáitsaitji. Áunkesha akupkam-nia enentáimjai. 26 Nii jaawai taman átum antukman nekáa, írmaitniun ti wakerutmarme. 27 Maa, nekas ti janinkiamai. Túrasha Yus nin wait-nentramai. Kame winiasha wi juí wáitiakun nii jakamtai nu arant ti kuntuts pujuschatniun waitnentrumai. 28 Tuma asamtai akuptuktinian wakerajrume. Tura atumsha ataksha wáinkiarum waraakrumin wisha ti kuntuts enentáimchakun akuptuktatjarne. 29 Kristu yuminsarum ti shiir warasrum wáinkiatarum. Chíkich shuar níjjai métek penker Yus-shuar ainia nusha shiir enentáimtustarum. 30 Kristu takatrin takaak ti janinkiamai. Átum yáintkiachminia nuna winia yáintkiataj tusa pujus jáninkiamai.

3

Kristu nekaatin ashí nankaamas péñkeraiti

1 Ayu. Warastarum, yatsurtiram, ii Uuntri Kristu ti penker asam-tai nuik áatramajrum nuna ataksha títiatjarne. Ataksha ujam yain-makminiaitkiuinikia wíjjainkia itiurchatchaiti atak enentáimtikratin. 2 Yajauch shuarjai aneartarum. Nu shuar Muisais timia núnis tuke yamaisha tsupirnaktiniaitrume tuiniawai. 3 Antsu iikia ayash tsupir-nakmajai penker átiniaitji tu enentáimatsji. Iikia antsu ii wakaníjjai Yus shiir awajeaji tura Jesukristunu asar Nínki shiir wararji. Nu túrakur Muisais timia nu umintikia iitji. 4 Ju nunkanam írunna nujai waantu enentáimpramniaitkiuinikia ashí shuarjai nankaamas wikia

waantu enentáimtumaraintjai. ⁵⁻⁶ Israer-shuar asan Muisais timia núnisan wi akiiniamtai uchu (8) tsawant nan̄kaamasmatai tsupirtukarmiayi. Israer-shuarnum Pinjamín weeitjai. Winia aparsha nukursha mai Israer-shuar ániakui wi imiá Israer-shuaraitjai. Wisha Pariséu tunia núnisan Muisais akupkamun ti umirin asamtai chíkichka winia sumamtikiatniun tujintrin ármiai. Tura Pariséu asan Kristu-shuarin ti kajerkan áintramjai. ⁷ Ashí nujainkia waantu enentáimtumauyajai. Antsu yamaikia Kristujainkia penké ántar ániawai tajai. ⁸ Ashí enentáimpramnia ákuisha winia Úuntur Jesukrístu shiir enentáimtustin nekas péñkeraiti. Nu asamtai Kρίstunu ajakun wi takusmaj nu muijmiai ajasmatai núnaka iniaisamjai. ⁹ Nuna túran Niijjai tsanin̄kian pujajai. Tura akupkamu umirkatniujai péñker ajaschaitjai antsu Kρίstun enentáimtakui Yus “péñkeraitme” túrutui. ¹⁰ Tuma asamtai ashí nan̄kaamas wakeraj nu júiti: Kρίstun péñker nekaan nekas enentáimtustinniasha tura ni iniantkimiu kakarman takustinniasha wakerajai. Tura Niijjai métek ajastinian wakerakun ni wáitkiamunam tsanin̄tinniasha tura Nii jakamia núnisan jákatniuncha wakerajai. ¹¹ Túraknaka Kρίstujai métek jakamunmayá nantaktiaj tusan wakerajai.

Papru kakaram ajasmiai Kristu wakeramun umiktinian

¹² Kame wakerukuitjia nuna mash umirkachuitjai. Kρίstujai métek nekas péñker shuar ajaschaitjai. Túrasha Kristu Jesus “nuj ejetajam” emka túrutkui, wisha nuj jeataj tusan kakaram ajasan pimpitsuk takaaajai. ¹³ Yatsuru, wisha nuj jeajai tátsujai. Antsu yaunchu túrutain kajinmatkin kakaram ajasan Kristu wakeramunam jeatniun takaaajai. ¹⁴ Tura nuna umikmatai nayaimpiniam Jesukrístujai tsanin̄kian shiir pujustinian Yus surustatui.

¹⁵ Ashí shuar Yusjai katsuaru ájnia nu wi tájana núnis “jeachuitjai” tu enentáimpratniuitji. Tura “jeaitjai” enentáimkiurminkia Yus nunasha atak enentáimtikramprattarme. ¹⁶ Tura aneartarum. Naki pujutsuk jeajnia nujai métek umirkatin pimpitsuk takastiniaitji. ¹⁷ Yatsuru, wisha tura chikichcha wijiiai métek péñker túrajnia nu wáinkiuaram atumsha núnisrumek túratarum. ¹⁸ Tura yajauch shuarsha írunui. Wi nuiksha ti ujakmajrume tura ataksha útkun ujaajrume, nu shuar Kristu krúsnum jakamun mujjaiiniawai. ¹⁹ Tuma ásar emesratniunam akupnakartatui. Ni ayashí wakeramun, ni yusrja ántsan, tuke umirainiawai. Natsanmainian túruiniayat wararainiawai. Tura ju nun̄kanmayanak enentáimtuiniawai. ²⁰ Antsu iikia nayaimpinmayá shuar asar ii Uuntri Jesukrístu in uwentikrampra asamtai nayaimpinmayá tatí tusar nákaaj. ²¹ Nii taa, ii yajauch ayashin yapajjá ni ayashíjjai métek ti shiir awajsatawai. Ashí uunt akupun ajas nu kakarmajai túrutmattaji.

4

Kρίstujai tsanin̄kia wekáa asarum warastarum

¹ Nu asamtai, aneamu yatsuru, ii Uuntri Kρίstujai tsanin̄kiu asarum kakaram ajastarum. Maa, ti aneakun atumin enentáimtakun ti waraajai tura ístajrum tusan wakerajrume. Tawasap achikiar shiir enentaimsatniua núnisnak shiir enentáimtajrume.

² Ewautiancha tura Séntikincha, ii Uuntri Kristu shuarj ásar, mai metek enentáimsarat tusan seajai. ³ Amincha, winia airú, nu nuwá yáin̄kta

tusan seajme. Niisha wi iwiaaku chichaman étsereakui wijjaj métek takasarmai. Tura Krimintisha tura chikichcha wijjaj métek takasarmai. Nuna náarin iwaaku átinnium Yus áatraití.

⁴ Nu asamtai Uunt Jesusjaj tsanin̄kia pujá asarum warastarum. Ataksha “warastarum” tájarne. ⁵ Uunt Jesus tátin ishichik ajasai. Tuma asamtai tsan̄ka enentáí takakrum nu paant nekanati.

⁶ Itiurchat enentáimsatin atumjaj pen̄ké atsutí. Antsu tuke Yus áujkum ashí itiurchatrum ujakta. Atsumamuram Yus seata. Túram Yus yu-miṣata. ⁷ Nuiṅkia atumí enentáí an̄kant átinian, áentstikia pen̄ké nekaachminia nuna, Yus amastatui. Yus atumin an̄kant awajtamsa asa atumí enentáin̄ tura atumí enentáímsamurin̄cha yajauch wayawajin̄ tusa shiir waitmaktatrumé Jesukrístujaj tsanin̄kiu asakrumin.

Ashí péṅker ana nu enentáimsatarum

⁸ Yamaisha yatsuru, júchiniak títiatjai. Yus-shuarti enentáimsatniun chichastatjai yamaikia. Ashí nekas ana nu enentáimsatarum. Tura ashí anturkamnia ana nusha, naka chicham ana nusha enentáimsatarum. Tura yajauch chichamsha enentáimsairap. Tura antsu ashí shiir ana nusha, chíkich shuarnasha péṅker enentáimtusminia nusha, kame ashí péṅker ana nu enentáimsatarum. Nuyásha chíkich shiir anturkamnia ana nusha enentáimsatarum.

⁹ Wi unuiniarmajrumna nu umiktarum. Tura wi túramur ísurmena nu tura antukurmena nusha umiktarum. Túrakrumniṅkia Yuska an̄kant átinian amastaj tusa pujurtamsattarme.

Jiripiusnumia Yus-shuar Páprun kuítian akuptukarmiania nu

¹⁰ Ii Uuntrj̄ Kristu anea asarum winiasha ataksha enentáimturú asakrumin ti waraajai. Kame kajinmatrukmiarme tátsujaj antsu kuítum atsakui yáintkiatin tujin̄kiarmarme. ¹¹ Tura kuítian atsumakun tátsujaj. Antsu wi takakjana nujajin̄ warastinian unuimiáruijtai. ¹² Kuítin̄chati pujustinia nuna nékajai tura ti nukap takustinia nunasha nékajai. Tsukamknasha jéemarnasha, itiarar takustinniasha tura pen̄ké takutsuk pujustinniasha unuimiáruijtai. ¹³ Kristu ni kakarmarin̄ surakui ashí túramniatjai. ¹⁴ Tuma aj̄n̄ atumsha wi atsumamu akupturkarum ti péṅker túramarme.

¹⁵ Jiripiusnumia shuarteram, jū ti péṅker nékarme. Masetunia nun̄kanam Yus-Chichaman etserumtai aya atumek kuit akupturkamiarne. Wi etserkamujaj atumí wakan̄in̄ yáin̄ma asamtai yumis̄sarum akupturkamiarne. ¹⁶ Atumek wi Tisarúnikia nun̄kanam atsumakun pujaisha kuit akupturkamiarne. ¹⁷ Aya kuit akupturkakrumin tu enentáimtsujaj. Antsu nu kuit Yusaj̄ kawentramkaku tusan wakera-jrume. ¹⁸ Epaprutítiujaj akupturkamarum nujajisha atsumamaj nuna nan̄kaamas tiaruncha wáinkiajai. Akupturkamarum nusha ti kuṅkuin̄ Yus susamua áinis ti shiir auyi. ¹⁹ Winia Yúsrusha ti péṅkeran n̄kap takakui. Atumsha Jesukrístunu ajasu asarum Yus seamniaitrumé. Tura Yuska ti takakna nujaj ashí atsumarmena nuna suramsattarme. ²⁰ Ii Aparí Yus tuke shiir atí. Nuke atí.

Amikmaamu

²¹ Winia náaruisha tura Jesukrístu náarin̄cha ashí Yus-shuar ainia nu chícham ujatruktarum. Niisha shiir pujusarti. Wi írutramusha núnisaṅ shiir pujusarti tusa akupturmainiawai. ²² Tura ashí akupin̄ Sésaraj̄

pujuinia nuyá Yusna ajararuka tura chíkich Yus-shuarsha shiir pujusarti
tusa chichaman akupturmainiawai.

²³ Ii Uuntri Jesukrístu atumniasha ti shiir yainmakarti. Nuke atí.

Papru KURUSENMAYA SHUARAN papi akuptukma

Kurusenmaya Yus-shuaran Papru áatramiania nu

¹ Wi Pápruitjai. Yus wakerutak Jesukrístunun etserkat tusa akatra akupkamuitjai. Wisha ii yachi Timiutéujai ² ju papi áarar nuí Kuruse péprunam Kristu péñker umirkarum Yusna ajasuitrumna nu akuptaji. Yus ii Aparí atumin wáitnentaimturma asa yainmakarti imiatkinchanum tuke shiir pujustinian.

Papru Yus-shuaran Yúsan áujtusmianis nu

³ Iisha atumin Yus áujtakur ii Uuntrí Jesukrístu Aparí Yus ashí tsawant yúminíajai. ⁴ Atumsha Jesukrístu ti shiir enentáimtamusha tura ashí Yus-shuar aneamusha antukji. ⁵ Uwempratin chicham nekasa nu antukrum atumsha nayaimpiniam atumnian Yus ti shiir ikiusman wáinkiatái tusarum nákarme. ⁶ Nu chicham ashí nunkanam pampaakui shuara enentáin nereá áinis nusháa ajasar yamaikia péñker túrin áiniawai. Núnisan atumíincha túrunaiti. Yus ti nekas anenkartiniaiti tu etserkamu ántakrumin nu chicham atumí enentáincha nerekmiaiyi. ⁷ Nu chichaman Épapas ujatmakmarme. Niisha iijjai métek takasu asamtai ti aneamuiti. Atumniasha Kristu takatrín ti shiir takartamsaiti. ⁸ Niisha átum Yus-shuar asarum mai anenai ajamun ujatmakmaji.

⁹ Iisha nu antukar Yus ashí tsawant áujtajrume. Yus ni wakeramun ti paant nekaprutmawarat tusar seaji. Ashí Yúsnan ni enentáimtaiijjai ashí Níiniun paant nekaatniun Yus jintintramat tusar seaji. ¹⁰ Atumsha Krístunu ainia núnisrum péñker túrutak tusar seaji. Tura ashí ni wakerana nu umiakrum ashí péñker ana nu, nerektinia áintsarmek, túrattarme. Núnis túrarum Yus unuimiatki wéakrum Nin ti penker nekaak tusar seaji. ¹¹ Yus ti kakaram asa ikiantamprat tusar seaji. Nujai ashí itiurchat ákuisha páchitsuk ti shiir warasrum katsuntrattarme. ¹² Yus ni shuarín tsáapninia nuí ashí péñkeran susattawai. Tura incha nuí pachiinkiatniun tsankatramka asakrin Yus Apa yumínsamniaitrumé. ¹³ Yus iwianchin nupetak íwianch akupeana nú kiritniunmaya uwemtikramar ni aneamu Uchirí akupeana nuí wearmakmiaji. ¹⁴ Ni Uchirí krúsnum jaka ii tu-naarín nijiar tsankurtamar uwemtikrampramijai.

Kristu jakamujai Yusjai nawamnaikiar shiir pujustin

¹⁵ Yus wáinkiachminiaitiat ni Uchirí akiiniamai tura ayashimkiamiaiyi. Túmaitiat ashí najanamua nuna yaunchu pujú asa ashí akupniuiti. ¹⁶ Niijjai Yus ashí nayaimpiniam írunna nunasha nuñká írunna nunasha, ashí wáiniaj nunasha núnisan wáintsuj nunasha mashi najanamiyai. Nu arantcha ashí akupin ju nunkanam írunna nusha, nayaimpiniam írunna nusha, iwianchnium írunna nusha, ashí Niijjai najanamu áiniak Nin umirkarti tusa najanamua áiniawai. ¹⁷ Ashí najanamua nuna yaunchu, Krístuka tuke pujuwiti. Ashí najanamua írunna nuna emestsuk wáinniuiti. ¹⁸ Ashí Yus-shuar métekrak chikichik ayashtinia áinis enentáimkiumka nuna muuke Krístuiti. Tura nu ayashín ni iwiaakmarijjai iwiaaku átinian

súsaiti. Niisha ashí jakamunmaya nantakniujai imiá nankaamantuiti. Nújainkia ashí enentáimpramnia írunga nunasha akupniuiti. ¹⁹ Yus ashí takamtsuk Kristuj shiir pujumiayi. ²⁰ Núnisan Yus Kristu krúsnum jakamujai ashí nayaimpinmasha tura ju nunkanmasha írunga nuna Nijjai nawamnaikar shiir pujusarat tusa wakerukmiayi.

²¹⁻²² Atumsha nuik tunáa túrin asarum atumí enentáin Yusa nemasri ámarne. Tuma asarum yajá wekaimiarne. Antsu Kristu, aentsu ayashín ayashimiak, krúsnum wáitias jakamujai ii tunaari asakármatai yamaikia Yusjai nawamnaikar shiir pujaji. Nujai Kristu in pénger ajasuncha tunaan máatrachmancha tura sumamachuncha Yúsai ejematatji. ²³ Tuma asamtai Jesukristu shiir enentáimtusurum kakaram ajasurum katsuartiniaitrum. Tura uwempratin chicham antukuitrum nuyá kanakchatniuitrum. Ju uwempratin chichaman ashí nunkanam etsernakuiti. Wisha, Papru asan, etserkatniun yaimjai.

Papru ashí Yus-shuaran yáinkratniuiti

²⁴ Atumin wáitiaknasha ti shiir waraajai. Kristu ni shuarin nekas pénger awajsat tusa wáitiana nuí pachiinkia asan waraajai. Ashí Yus-shuar Kristu ayashí áintsan ániakui Yus-shuaran yáintajtsan ayashrujai wáitiakun shiir enentáimjai. ²⁵ Atumin yáinkiai tusa Yus akattur Yus-Chichaman takamtsuk ujakai tusa akuptukmai. Nuna takaakun ashí Yus-shuara yáintrintjai. ²⁶ Yámankamtaiknumia nekaachman Yus yamaikia ni shuarin paant awajsaiti. Nu chichamnasha ujakarai tusa winia akatar akuptukuiti. ²⁷ Nu chichamsha júiti: Kristu atumí enentáin pujak Nijjai métek ti shíiram awajtamsattawai. Nu imiá shiir chichamnum Israer-shuarchasha pachiiniainian Yus ashí ni shuarí nekawaarat tusa wakerimiayi.

²⁸ Iisha Kristu étsereaji. Túrar ashí enentáimtikrar pénger nekaawarat tusar jintintiainiaji. Nujai Kristujai tsaninkiar ashí pénger tsakarartatui. ²⁹ Tuma asamtai Kristu ni kakarmarin tí surakui nekas kakaram takaa-jai.

2

¹ Nekaatarum, yatsuru. Yus-shuaran yáintaj tusan ti takaaajai. Tura atumíncha, Rautiséanmaya shuarnasha, tura ashí winia waitcha ainia nunasha yáintaj tusan ti takaitjai. ² Ashí shiir enentáimtikratniun ti takaa-jai. Núnisan aneniarum chikichik enentáijjai métekrak wekasatarum tusan wakerajrume. Nu arantcha, ashí Yusna ti pénger nekaarum tuke katsuaruk tusan takaaajai. Nujai Kristu ti pénger nekaattarme. Tura yaunchu nekaachman Yus yamá paant awajsaiti. Nuka Krístiti. Tura Nii nekaatin nekas shíiraiti. ³ Tura kakaram ajasam Kristu pénger nekaam ashí shiir enentáimpramnia nusha tura ashí Yusna nekaamnia nusha nekaattarme. ⁴ Atumin chíkich shuar niisháa chichamjai shiir chichartamas anankramawarain tusan nuna tájarne. ⁵ Wi nuí atumjai pujachkuncha nuí pujajna áintsanak enentáimtajrume. Tuma asan átum métek enentáimprurum tura kakaram ajasurum Kristu nekas enentáimturumena nuna ísnaka shiir enentáimjai. ⁶⁻⁷ Nu asamtai átum ii Untrí Jesukristu nekas enentáimtusurum Yus-shuar ajasmarmena núnisrum yamaisha Nii nekas enentáimtusurum Nijjai tsaninkrum ashí túrarum. Nu túrakrum Nii enentáimtakrum tuke tsakaki wétarume. Tura

te tariara wajasrum Yusjaj kanakchattarme. Yus-Chicham núnisan et-
sernakmatai nekamarne. Tuma asarum Yus tuke yumınsarum, núnisan
pénker wekasatarum.

Krístujaj yamaram iwiaakma takakji

⁸ Aneartarum atumsha. Shuar aentsti enentáimmiajajın ashı
ju nunkanmayan enentáimprar tura Krístun enentáimtutsuk
niisháa chichaman áujtamainiak nekaschajajı anankramataj tusa
wakerutmainiawai.

⁹ Krístunam Yus ashı takamtsuk pujuwiti. ¹⁰ Túmakui atumsha Krístujaj
tsanıñkiu asarum ni iwiaakmarı takamtsuk takakuitrume. Krístusha
ashı akupniun akupniuiti. Aentsnumsha iwianchniumsha tura nayaimp-
inmasha ashı akupin írunna nuna akupniuiti. ¹¹ Nu arant átum
ayashnium tsupirnatskesha Krístu shuarı ajasakrumin ashı ayash wak-
eramun, tsupirkatniua áintsan, Krístu ajapamiayi. ¹² Tura atumsha Yus
ni kakarmarıjjajı Krístu jakan iniantkimia nu enentáimtusrum imianmi-
arme. Túrarum Krístujajı métek iwianasmarme. Tura núnisrumek Krístujajı
métek nantakmiarme. ¹³ Nuikkia átumsha tsupirnatsuk atumı tunaarı
tuke akui atumı wakanıın jákauyarme. Tura yamaikia Jesukrístujajı
tsanıñkiu asakrumin Yuska atumı tunaarı tsankur yamaram iwiaak-
man suramsaitrume. ¹⁴ Tura ashı ii tumashrıın sumantikramatin amia
nuna japiruiti. Krístu krúsnum jakamtai ashı akupkamujajı sumantikra-
mamun tsankurtampramıajı. ¹⁵ Núnisan Krístu krúsnum jaka, iwianchn-
ium ashı akupin ainia nuna nupetak ashı íimiainajın inıatsararmiayi.

Nayaimpiniam írunna nu enentáimtustarum

¹⁶ Akupkamunmayajı Yus ankant awajtamsamtai chíkich shuar ame
túramujajı yajauch enentáimturmarajın. Yúamna nujajı, úamna nujajı, uwit-
incha, nantutincha, tura tsawantincha nampermam nujajı chíkich shuar
yajauch áujmatramkuisha çwarı urukatın? ¹⁷ Nu nampernum Israer-shuar
Krístu túrattana nuna nakumainiak túrin ármiayi. Tura Krístu taa imia
Niñki pujá asamtai nakumkamuka ántrai. ¹⁸ Tura shuar “Péejchach
ajasan Yus áujtsuk aya Yusa suntarı shiir awajsatniuiti” túramkuııkia
anturkairap. Nu shuar mesekranam wáinkiamun áujmatenak ántar
nankaamantu enentáimtumainiawai. Aya aentsti enentáimian chichaini-
awai. ¹⁹ Tuma ásar Krístujajı tsanıñkiar wekainıatsui. Krístu ashı akupin
asa ni shuarın Yúsnan jintintiá shiir tsakarat tusa pénker wáiniui. Nu
arantcha ashı ápateak Yus wakerana áintsan chikichik awajeawai.

²⁰ Atumsha Krístujajı jaka asarum aya aentsti enentáimtai
ikiukniuitrume. Nuikia çurukamtai ju nunkanmayajı ana nu tuke
páchiarum? Nii tuinia nu umirkashtiniaiti. ²¹ “Ju antiñchatniuiti,
tuiniawai. Ju yúashtiniaiti. Tura ju achikchatniuiti” tuiniawai. ²² Nusha
çwarı, takasam amuukashtatuak? Kame áyatik aents akupkamu ániawai.
²³ Shuar nu akupkamu umiiniak Yúsnan ti nékaitjai tura Yus shiir
enentáimturui tu enentáimtumainiawai. Nu arantcha péejchach ajasan
winia ayashrun ti asutiájajı tu enentáimtumainiawai. Túrasha ayash
wakeramunka nupeteatsui.

3

¹ Nuikia Krístujajı nantakin asarum nayaimpinmayajı írunna nu
wakeruktarum. Nuı Krístu pujawai Yusa untsuurıni. ² Ju nunkanam

ana nu enentáimtsuk aya nayaimpinmaya ana nu enentáimtustarum.
³ Atumsha Krístujaj tsaniñkrum jakamarme. Tuma asarum Krístujaj tsaniñkrum Yusjaj iwiaaku pujarme. ⁴ Krístukete ii iwiaakmarj. Nii nayaimpinmaya wantinkiuisha atumsha Niijjaj métek wantinkiattarme. Tura Niijjaj métek ti penker áatrum.

Yaunchu iwiaakmasha tura yamaram iwiaakmasha

⁵ Tuma asamtai ju nunkanmaya ana nu ajakratniua áintsarum iniaisarum. Tsanirmatniusha, tunáa wakeruktincha, tura takakna nujaj nankaamas wakeruktincha ántar-yus tikishmatratniua áintsan asamtai iniaisarum. ⁶ Shuar Yúsan umirtsuk aya nuna túrin ásarumatai Yus nin kajerak ti asutiáttawai. ⁷ Atumsha núnisrumek túriniuyarme. ⁸ Tura yamaikia jusha iniaisarum: kajektincha, yajauch wakeruktincha, yajauch túratniusha, katsekmaktincha, yajauch chicham chichastincha, mash iniaisarum. ⁹ Yus-shuar ajasrum yaunchu enentáimtairam iniaisarum. Tura yaunchu túrutairmesha iniaisairume. Tuma asarum nuamtak tsanumprunairairap tura wáitruawairap. ¹⁰ Yaunchu enentai, pushí mamuru áiktinia áintsarum, iniaisairume. Núnisrum yamaram enentái, shiir pushí entsartinia áintsarmek, wekasairume. Tura Yus nu yamaram enentáin najana asa ashí tsawant pujurtawai nuna nankaamas Niijjaj métek shiir atí tusa. Túramtai Yus ti penker nekaki wéaji. ¹¹ Krístuka ashí írunka nujaj nankaamas ashiyaiti. Niiniun pujurui. Tuma asamtai ashí ni shuarj enentáin pujá asamtai nusháa enentáimtunairchatin áiniawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarj ainia nusha tura ankant ainia nusha, Kristu ashí ni enentáin pujakui nusháa enentáimtunairchatniuiti.

¹² Yus atumj anenmak Niiniu arti tusa achirmakmarme. Túrutma asamtai jujaj shiir iwiarmampratniua áintsarum tuke túrin atarum: waitnenkartin, shiir awajkartin, péejchach átin, émtin áchatin, tura kat-suntin átin. ¹³ Kristu atumj tunaarj tsanukuramia núnisrumek nuamtak tsanúkurnáiratarum. Chíkich yajauch awajtamkuisha shiir ksuntram yapajniaitsuk tsanúkurnáiratarum. ¹⁴ Tura ashí nankaamas anenaitarum. Túrakrumka chikichik ajasrum mash penker túrattarme. ¹⁵ Kame chikichik ayashtinia áintsarum ajastarum tusa Yus ni shuarj ajasat tusa achirmakmarme. Tuma asamtai Yusa shiirj atumj enentáin pujurtamsati. Nujaj Yus yumjnsatarum.

¹⁶ Kristu shiir chichame atumj enentáin piakti. Nekas naka enentáimprarum jintinnaiyarum mai ikiakánai ajatarum. Yus kanta kantamárum tuke enentáijjaj Yus yumjnsarum shiir awajsatarum. ¹⁷ Tura takaakmesha, chichaakmesha, kame ashí túramna nuka Jesukrístu shiir awajsataj tusam ni kakarmarijjajin túrata. Túrakum Krístujaj Yus Apa yumjnsata.

Yus-shuar túratniua nu

¹⁸ Nuwáitiram, atumj aishrj umirkatarum Uunt Yus nuna wakerakui. ¹⁹ Áishmantiram, atumj nuwé aneatarum. Atumj nuwejjaj kajernaikiairap. ²⁰ Uchitiram, ame apa nukusha tuke umirkatarum. Nu túrakum Yus shiir enentáimtikstattarme. ²¹ Uchirtintiram, atumj uchirj ti kakantrairap. Ti kakanteamka uchisha ti kuntuts pujus penker wekasatniun nakitchanpiash. Nu túrunawajin tusarum ántararum atumj uchirj kakantrairap. ²² Takarniutiram, atumj uuntrj shiir umirkatarum. Ju

nuṅkanmaya uuntri aṅ aya nii iimkiui shiir enentáimturati tusarum takaschatniuitrume. Antsu Yus enentáimtakrum tuke pēnker takastini-aitrume. ²³ Ashí túramna nu asump enentáijjaj takakmasta. Aya aentsuk yáinginia áintsachu antsu nayaimpinmaya Úuntrum yayá áitkiasrum takas- tarum. ²⁴ Ame Úuntrum Kristu asa nayaimpiniam ashí shiir takustinian tsan̄katramkattawai. ²⁵ Antsu tunáa túrin ni yajauch túramujaj métek akinkiáttawai. Yus ashí áentsun métek iyawai.

4

¹ Úunttirmesha, atumí Uuntri atumin wáiniuk nayaimpiniam pujatsuk. Tuma asamtai atumí yáinma jiatsuk pēnker iniartiniaitrume.

² Yus áujkuram Nii yuminsarum asummiarum iniaitsuk áujstarum. ³ Incha Yus áujtustarum. Kristu-chicham yaunchu nekaachman yamá étserkun sepunam pujajai. Tuma asamtai nuna shiir an̄kant etserkat tusarum áujtursatarum. ⁴ Tura wi paant etserkatniuitiaj núnisan etserkat tusarum áujtursatarum.

⁵ Yus-shuarchajaj shiir túratarum Yus-Chichaman yajauch enentáimturaraj. Kakaram ajasrum tsawant an̄trarum inian̄kasairap. ⁶ Ti shiir chichamtin átiniaitrume tura anturújamin átiniaitrume. Núnisrum chíkich chíkich Yus-chicham paant ujaktin nekaattarme.

Amikmaamu

⁷ Ii aneamu yachi Tikikiu ashí wínian ujatmaktatrume. Niisha wíjjaj métek Yúsnan pimpitsuk ti pēnker takasuiti. ⁸ Nu asamtai ii juj pujajnia nuna ujatmak ikiantamprarat tusan akuptajrume. ⁹ Núnisan ii aneamu yachi Unisemu niijjaj winiawai. Niisha atum wééaiti, tura Yusjaj shiir wekaawai. Nu shuar ashí juj túrunamun ujatmaktatrume.

¹⁰ Aristarku wi sepunam tsaniṅkia pujamur amikmaatmarme. Núnisan Markus, Pirnapí kaná yachia nu, amikmaatmawai. Niisha nuj jeamtai antukmarum núnisrum pēnker wáinkiatarum. ¹¹ Justu Jesus náartin amikmaatmarme. Júchik áiniawai Rúmanmaya Israer-shuar winia Yúsnan etserkatin atutkaru ainia nu. Túmainiak ti shiir ayamtikruiniawai. ¹² Épaprassha, atum weeá, Krístunun etserin asa atumin amikmaatmarme. Niisha ashí tsawant Yúsán áujeak Yusjaj kakaarum tuke shiir Yus wakera nu túrak tusa seatramprume. ¹³ Wisha Épapas atumin ti enentáimturman nékajai. Núnisan Rautiséanmaya shuarnasha tura Iarapurisnumia shuarnasha ti páchiniawai. ¹⁴ Rukas, aneamu tsuákratin, núnisan Témassha amikmaatmarme.

¹⁵ Tura Rautiséanam pujuinia nú Yus-shuarsha amikmaatruatarum. Núnisan Nímpiassha tura ni jēen irunainia nú Yus-shuarsha amik- maatruatarum. ¹⁶ Átum ju papí áujsarum umikrum Rautiséanmasha nuyá Yus-shuar áujsarti tusarum akupkatarum. Tura atumsha núnisan Rautiséanmaya papí támatai atumsha áujstarum. ¹⁷ Tura ju Arkipiu titiarum: “Ii Uuntri Jesus ni takatrin suramsa nu pēnker umikta” tawai, titiarum.

¹⁸ Wi, Papru, winia uwejrujaj júchiniak áatkun amikmaajrume. Sepunam pujajna ju enentáimturatarum. Yus shiir yainmakarti.

Nuke atí.

Papru

TISARÚNIKIANMAYA SHUARAN

Emka papín aar akuptukma

Papru ni tsaniakmarijiai Yus-shuaran áatramiania nu

¹ Wikia Pápruitjai. Wisha Serpanujaj tura Timiutéujaj Tisarúnikianmaya Yus-shuar ajasuíttrumna nuna áatjarne. Atumsha Yus-shuar asarum Apa Yúsnaitrume, tura Uunt Jesukrístunuitrume. Ii Apari Yus, tura ii Uuntri Jesukrístu waitnentrama ásarmatai, ti shiir imiatkinchanum pujustarum, tu wakerajrume.

Tisarúnikianmaya shuar Yus nekas enentáimtusar umirkatniun jintintiarmania nu

² Iisha Yus áujkurkia atumniasha tuke enentáimtusar Yus shiir yu-mínsaji. ³ Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukrístu tatí tusarum tuke tsawant nákarne. Nu neka asar, ii Apari Yus áujkur, nusha ashí enentáimsar áujtajrume. ⁴ Yatsurú, Yus anenmarme. Anenma asa Winia arti tusa achirmakurmena nusha nékaji. ⁵ Enentáimpratarum. Iisha Yúsaj Uwempratin Chicham atumin ujakmajnia nusha aya chíchamjain tíchamji. Antsu nú arant, nu chicham nekasaiti tusar Yusa Wakaní kakarmarijiai tímiaji. Tura átum péñker matsamsarat tusar atumjaj pujusar shiir iruntrar wekasarmiaji. Nusha paant nékarne.

⁶ Atumsha yamaikia íksarmek ii túramiaj nu, tura ii Uuntri Jesukrístu túramia nu túrarme. Itiurchat ajñ Yus-Chicham umikiurme. Tura wáitiatrumek Yusa Wakaní shiir enentáimtikramkui warasrum pujarme. ⁷ Nu túrakrum ashí Masetúnia tura Akaya nuñkanmaya Yus-shuarsha shiir wekasatin jintintiarne. ⁸ Tuma asarum Uunt Yusa chichame ti ipiamparurme. Tuma asantai Masetúnia tura Akaya nuñkanmaya shuar nuna nékainiawai. Tura nú nankaamas Yus nekas umirkarmena nuna ashí aents nékainiawai. Nuna nékainia ásar ii étserman atsumaini-atsui. ⁹ Antsu átum in péñker itiaamun nii íksañ ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusarum umirkarumna nunasha ujatmainiaji. ¹⁰ Tura nuyasha Yusa Uchiri Jesus jakamunmayan Yus iniantkimia nu, nayaimpinimaya tatí tusarum átum nákamuncha ujatmainiaji. Iis, Jesus Nínkiti Yusa kajetáirj tsawantri jeattana nuyá uwemtikrampratin.

2

Yus-chichaman paant ujakarmiania nu

¹ Atumsha nékarne, yatsurú, iisha ántar atumjñ jeachmaji. ² Antsu itiurchat wáinkiaitiatar arantutsuk shiir Uwempratin Chichaman ujakmajrume. Iis, nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitiatan Yus yáintkiui Yusa chichamen ujakmajrume. Nuka atumsha ti péñker nékarne. ³ Warí, iisha Yus-Chicham atumin ujakmiaj nu nekasauyi. Tura yajauch enentáimsan, anankatjarum tusan tíchamjarne. ⁴ Antsu Yus in péñker

enentaimturmas Uwempratin Chicham etserkatarum tusa akatram-pramijai. Tuma asamtai núnisrik étseraeji. Túrashá aya aents waramtik-satai tusar étsertsuji. Antsu Niŋki Yúsak ii enentáin nekartamin asamtai, shiir enentáimtiksatatsar túraji. ⁵ Átumka nékarme, penkesha shíirmach chichasan anan̄kachjarme. Nuyasha, kuit achiktai tusar ántrak chichaschamji. Núnaka Yus nékawai. ⁶ Iisha Kristu akatramur̄intji. Tuma asar ni kakarmarij̄aj̄i akupkatin takakuji. Páchitsuk túramniauji. Túrashá waantu ajastaj tichamji. Nuyá atumsha tura chikichcha in waantu awajtamsataj tákuisha iikia nakitmiaji. ⁷ Antsu uchi kuírchin ni nukur̄j̄ péñker iis tsakatmana áintsarik iikia atumniaka shiir íismajrume. ⁸ Iisha ti shiir aneajrume. Tuma asar Yus-Chicham ujaktai tusar tí wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisach̄aj̄i, atumín ti anea asarⁱ. ⁹ Yatsurú, ii atumaj nu sumarmaktai tusar kakaram takakmasmaj nu ¿kajinmatkintrumek? Atsá. Nékarme. Iis, Yus-Chicham étserkur, tsawaishá káshisha takasmiaji. Nusha, akirkata, t̄ij̄j̄ tusar takakmasmijai.

¹⁰ Yatsurú, atumj̄aj̄i pujumij̄ nūj̄ iisha Yus wakerana nu túrimijai, tura yajauch túrutsuk shiir wekasamijai. Nuj̄aj̄ incha chikichkisha ya-jauch chichartamkatniusha atsumiayi. Nuka atumsha nékarme tura nú arant Yus nékawai. ¹¹ Tura atumniasha an̄kant an̄kant Yúsnum ikiakármajrumna nu nékarme. Tura uchin ni apar̄j̄ átsankeana nútiksarik shiir enentáimtikramajrumna nusha nékarme. ¹² Tura Yús̄j̄aj̄i shiir wekasatarum tímiajrume. Yus nan̄kaamas uunt asa ashí akupeawai. Tura Yus-shuaraitrumna nuna, Winin pachiinkiarat tusa, Yus untsurmarme. Yus untsurma asamtai Níniuitrume. Niiniu asarum Yusa uchir̄j̄a núnisrumek wekasatniuitrume.

¹³ Yus-Chicham ii étserma antukrum, aya áentsnumian̄chaiti tímiarme. Yúsnumīaj̄iti tímiarme. Nu tiniu asarum umirkamarme. Kame nekas tárume. Ii étserjinia nu nekas Yusa chichamente. Átum nu chicham umirka asakrumin, atumí enentáin kakaram ajastinian amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúmin̄kiaji. ¹⁴ Yatsurú, j̄u nekaatarum. Aya atumek wáitiatsrume. Ashí Jutía nun̄kanam Israer-shuar, ni shuar̄in̄ketiat, Yus-shuaran wáitkiascharmakia. Iis, Yus-shuaran Kristu Jesusan umirkaru ásarmatai wáitkiasarmiayi. Yamaikia atumniasha atumí shuar̄in̄ wáitkiarmainiawai. Nuj̄aj̄i Jutía nun̄kanmaya Yus-shuarj̄aj̄i métekrak ajasurme. ¹⁵ Niisha Israer-shuaraitiatan̄ Yus-Chichaman etserin armia nuna nuamtaketiati máawarmiayi. Tura nú weeák Uunt Jesusnasha máawarmiayi. Tura incha āa j̄iiki akuptamkarmijai. Maaj, niisha Yúsan shiir enentáimtikianiatsui. Tura núnisan̄ ashí áentsun kajerainiawai. ¹⁶ Warí, Israer-shuaracha Uwempratin Chicham ujaktaj tákurnisha niisha suritramainijai. Nuna túruiniak yaunchu tunaan túriarmia núj̄aj̄in̄kia nan̄kaamas yamaikia túrawarai. Pai, túrashá yamaikia Yusa kajetair̄j̄i imiá tsumaj̄ ana nūj̄ pujusarai.

Papru ataksha Tisarúnikianam irautajtsa wakerimiania nu

¹⁷ Iisha, yatsuru, ishichik tsawant atum̄ij̄ya kanakir jeachat pujayatrik, atumj̄aj̄isha wáinniaiyachiatrik tuke ii enentáin̄kia enentáimtimjarme. Tuma asar ataksha atumín iistai tusar ti wakerimji. ¹⁸ Nekas winitiait-sar wakerimji. Imia wíkisha winitniun ti nukap enentáimsamjai. Tura iwianchi uuntr̄j̄ Satanás tuke nuna suritramijai. ¹⁹⁻²⁰ Atumsha shiir

wekasa asakrumin iisha ti shiir enentáimsar waraaji. Nu tuma asar Uunt Jesukrístu tántintri shiir enentáimsar nákJai. Nii támatái imiá warastatji. Atumin Yus-shuar awajsa asar, Nii támatái atumsha iijjai Jesus shiir inkiuntatji. Tuma asamtaí nu enentáimsar tawasap achiktinia áintsar waraaji.

3

¹⁻² Iisha ataksha atumin ístaitsar ti wakerimji. Tura tujintiakur iikia Atenas péprunam juákur ii yachi Timiutéu atumin írmainiarat tusar akupkatai, timiaji. Iisha Kristui Uwempratin Chicham etsermiaj nuj, Timiutéuka iijjai métek takasuiti. Tuma asa niisha Yusa takatrin takáa asa atumniasa Yusaj kakartarum turamarti tusar akupkamji. ³ Tura nú arant, itiurchatan wáiniuk iniaisarain tusa ikiakátmararti tusar Timiutéu akupkamji. Yatsurú, átumka nékarme, ashí Yus-shuaraitjinia nuka páchitsuk wáitsatniuitji. Iis, tuma asamtaí atumsha ti nekas itiurchatnum pujarme, Yus-Chicham umirka asarum. ⁴ Iimiatarum, atumjai nuik tuke pujumjinia nuj “iisha wáitsartatji” tíchamkajrum. Iis, túrunachaik. Nuka nékarme. ⁵ Tura atumin íwianch tunaanum ajunmarchariash tusan, wisha kúntuts enentáimsamijai. Tura ánrar takaschajish tu enentáimsamijai. Tuma asamtaí nekaataj tusan ti wakerakun, wisha ti nukap tsawant nákaschamijai. Antsu wárik Timiutéun akupkamijai. Yúsjai péñkerash wekainia tusan, “nu inintrusam ikiiuta” timiajai.

⁶ Tura yamaikia Timiutéu Tisarúnikianmaya waketki tayi. Niisha taa, átum Yus aneakrum shiir enentáimtamuncha ujatmaji. Tura átum in anenma asarum tuke enentáimsar pujamuncha tura ii atumin ístaitsar wakerajnia núnisrumek atumsha incha írmaitiai tusarum wakeramuncha Timiutéu ujatmaji. ⁷ Tuma asamtaí, yatsuru, ashí itiurchat tura wáitsatin wáiniatrik átum Yus shiir enentáimta asakrumin iisha shiir enentáimji. ⁸ Atumsha Yúsjai tariara weká asakrumin, shuar jaa péñker ajas enentáí chinkiana áintsarik enentáimji. ⁹ Yus péñker umirka asakrumin, iisha shiir waraaji. Warasu asar ii Yusri ti yúmiñkijai. ¹⁰ Incha Yus akuptamkurniñkia atumjin timiajaik jeartiai tusar wakeraji. Túrar Yusna nekaatin mash nékatsrum nu jintintiatai tusar tuke ti seaji.

¹¹ Atumjin weri ístinian ii Aparj Yussha tura ii Uuntri Jesukrístusha in yáinmaktai tusar wakeraji. ¹² Atumin ii aneajnia núnisan Yus atumniasa mai anenai ajatniun tura chikichcha aneastinian enentáimtikrampartí. Tura nú nukap anenkrattain Yus amasartí tusar wakeraji. ¹³ Yus ikiakátmakui átum tunáa túrutsuk Yus umirkarum wekasatarum tusar ii Aparj Yus seaji. Ii Uuntri Jesus Níiniurijjai winiak péñker wekaarmin tati tusar taji.

4

Pénker túratniun Yus wakerana nu

¹ Iikia Uunt Jesus akupkamuitji. Tuma asar nu kakarmajaj atumniasha ju túratarum tusan akupeajrume. Atumsha iwiaaku pujarmena nuj Yus shiir waramtiksataram tura tuke péñker túrukum wetarum tusar seajrume. Iisha nuik atumin unuiniarmajrumna nútiksarmek túratarum. ² Uunt Jesusa akupeamurijjai tura nu kakarmajaj atumniasa nuik unuiniarmajrumna nu átumka nékarme. ³ Atumin Yus wakerutmarmena nu júiti: “Shuar aya Winin sumama pujusat tusan chikichkinkesha shuar tsanirmaashti”. ⁴⁻⁵ Yus-shuarcha ainia nu, Yúsan

nékainiachu ásar, aya niŋki enentáimtumasar aya ni ayashí wakeramunak umikтинian wakeruiniak nuwan enentáimtuiniawai. Atumsha núnisrumek túrawairap. Antsu atumsha atumí nuarí péŋker enentáimtusurum shiir aneasrum ayastarum. ⁶ Nú arant, amesha ame yatsum anaŋkam ni nuarí yajauch awajtusaip. Nu túrakrumniŋkia ii tímiajrumna nútiksar Uunt Yus ti kakaram asutiámawartatui. ⁷ Warí, Yus incha péŋkercha yajauch túratarum turamchaitji. Antsu aya péŋkerak túratarum turamji. ⁸ Tuma asamtai shuar ju chichaman nakitiakka áentsun nakitiatsui, antsu Yúsan nakitraití. Tura nu Yussha ni Wakanin amaawiti tunaan túrashtinian.

⁹ Tura yamaikia nuamtak Yus-shuar aneniastin ana nuna ti neka asakrumin áatrashtajarme. Warí, imia Niŋki Yus atumin mai anenai ajatniun jintinramawarmatai nékarme. ¹⁰ Iis nútiksarmek aneniatsrumek ashí Masetúnianam matsatainia nujai. Túrasha, yatsuru, atumí anenkrattairí nú nukap ajasti tusan, seajrume. ¹¹ Yamaikia tímiaj nútiksarmek, yayauchin túruinia nuí wekatsuk, chíkich shuarna pachittsuk, atumí takatriin shiir ankant pujusrum atumí uwejejain takakmá pujutarum. ¹² Átum táasairum tusan tájarme. Túrakrumniŋkia atumniasha chíkich shuar péŋker enentáimturmasartatui.

Kristu tátintri

¹³ Yatsuru, Yus-shuarcha ni shuarí jakamtai “atakká wáinkiashtatjai” tusa ti kuntuts enentáimainiawai. Tuma asamtai atumsha nútiksarmek kúntuts enentáimsairum tusan júna tájarme. Jákaru ainia nu urukawartinkit paant nekaatarum. ¹⁴ Jesus jákayat nantakchamkia. Núnisar Yus Jesusan iniantkin Nin umirkar jákaru áiniana nunasha iniantkittiwai. Paant nékaji nusha. ¹⁵ Tuma asamtai Yus-Chicham nekaprutamnia nuna atumniasha jintintiajrume. Iisha tuke iwiaaku pujarin Kristu táakuisha jákaru ainia nuka ikiuakur émkiishtatji. ¹⁶ Antsu Yus akupeakui, Yusa suntarí uuntri untsumkui tura Yusa kachurin umpuarmatai Uunt Jesukristu untsumuk Yus pujamunmaya tarattawai. Nuŋkia Krístunu ajarar jákaru áiniana nu iwiarsumunmaya nantakiartatui emka. ¹⁷ Tura nuyá iisha Yus-shuar tuke iwiaaku pujajnia nu Krístujai yuraŋminiam ajapén inkiunaikiartatji. Nuní ashí nayaimpiniam ii Uuntri Jesukristujai tuke iwiaaku pujusartatji. ¹⁸ Tuma asamtai ju shiir chicham atumin ujakjana jujai mai ikiakánai ajatarum.

5

¹ Túrasha, yatsuru, ni tátintri waritiŋ tura warí tsawantaj, nuka áatratin atsumatsrume. ² Ni tátintri júnis átin nékarme. Kiritniunam kasá shuar kasamkataj tusa tátatna nu nekaachminiaiti. Núnisar nákatsuk pujuiniaj Uunt Kristu tsawantri jeattawai. ³ Ashí shuar “Pai, yamaikia ti nekas shiir péŋker pujuiniaji” tu matsatainiaj, aya aneachma nuŋka mesertin tsawant jeattawai. Nuwá ajamtin aya aneachma jatema áintsar, nékachmanum átatui. Túmakui pisartin peŋké atsuttawai. ⁴ Túrasha, yatsuru, átumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsar tarutrámashatui. ⁵ Enta, átumka tsáapninium wekáa asarum Yus-shuartirmeka nékaitrume. Iikia kiritniumianchuitji. ⁶ Nu tuma asar, chíkich uruka núnisrik, ii enentáin kanartinia núnisrik “Warí, winia itiurtawik” tíchami. Antsu naka enentáimsar anearmi. ⁷ Iis, kashi kanarchatniukait. Tura nampeena nu kashi nampeenawai. ⁸ Túrasha iikia shiir tsáapninium wekainiaj nuka

naka enentáimprar tuke nampetsuk pujustiniaitji. Suntar ni nemasri anankruawañ tusa anear wekasatniuiti. Tura iisha núnisrik íwianch yajauch awajtamsajj tusar anearmi. Yus enentáimtusar aneetniuitji. Tura núnisrik iisha, ju nunkanmaya uwemprar Yúsaj tuke pujustatji, tu enentáimprar wetái. ⁹ Páantchakait. “Jinium wéchatniuitrume” Yus incha túramji. Antsu ii Uuntri Jesukristujaj uwempratniun tsankatramkaitji. ¹⁰ Niijjaj métekrak iwiaaku ami tusa Jesukristu in jarutramkamiaji. Nu tuma asamtai iisha ii ayashijjaj iwiaaku pujakrishha Niijjaj iwiaakji, tura ii ayashijjaj jáakrishha Niijjaj tuke iwiaakji. ¹¹ Tuma asamtai tuke túrarmena núnisrumek, shiir enentáimtiknaisarum mai ikiakánai ajatarum.

Papru Yus-shuaran jintintiamiania nu

¹² Yatsurú, juna seajrume. Atumjaj pujuinia nú shuar Yúsnan takak-mainiakui shiir enentáimtusarum. Jintinramuk chichartamainiakui umirkatarum. ¹³ Yúsnan takainia ásarmatai ti péñker enentáimtusarum aneestarum. Tura yajauch awajnaitsuk ti shiir nawamnaikiarum matsamsatarum. ¹⁴ Tura junasha seajrume, yatsuru. Takastinian nakitiana nusha chicharkatarum. Tura yaweena nusha ataksha enentáimtikrarum ikiakártarum. Kakarmachu ana nusha yáñtarum. Tura ashí shuarjaj kajetsuk katsuntrarum wekasatarum.

¹⁵ Aneartarum, yatsuru. Chíkich yajauch túrutmamtai amesha nútiksarmek yapajkiaip. Antsu nuka túrutsuk átumka mai péñker awajnai ajatarum. Tura nú arant, ashí nunkanmasha ashí shuarsha nútiksarmek túratarum. ¹⁶ Tuke shiir warasrum pujustarum. ¹⁷ Tuke tsawant iniaitsuk Yus áujtsatarum. ¹⁸ Péñker pujakmesha, itiurchat pujakmesha ashí warí wáiniam nuñsha Yus shiir yuminsatarum. Kristu Jesusaj Yus-shuar ajasutiram nu túratniun Yus wakerawai.

¹⁹ Ji ikiajniaktinia núnisan Yusa Wakaní enentáimin keana nuka tunaajaj téenmamtikiarum ikiajniakairap.

²⁰ Yus jintintrar akupkamu asa péñker chichaman etserainia nu naki-trairap.

²¹ Ashí etserkamu ana nu nekasashit tusarum nekaatarum. Túrarum aya péñker ana nuke achiktarum. ²² Ashí yajauch ana nuyanka kanaktiarum.

²³ Yuska, imiatkinchanum wekasatin amaana nu, atumin takamtsuk shiir awajtamsartí. Tura ii Uuntri Jesukristu táatsañ, atumí wakaní atumí enentaj tura atumí ayashishha mash métek tunaajainchu awajtam-sati. ²⁴ Yus atumin untsurmakmarumna nu tímianak uminiaiti. Nii tana nuna yawetsuk túrattawai.

Amuamunam amikmaatin

²⁵ Ashí yatsurtiram winiasha Yus áujtursatarum. ²⁶ Ashí Yus-shuar árum nu, amikmaaniatarum. ²⁷ Winia Uuntru Jesukristu chichamejjaj juna tájarne. Ju papí ashí Yus-shuar antukarti tusarum ashí iruntramunam áujtsatarum. ²⁸ Íi Uuntri Jesukristu atumin yáinmákartí. Nu atí.

Papru

TISARÚNIKIANMAYA SHUARAN

Ataksha papin aar akuptukma

Papru ni tsaniakmarijiai Yus-shuaran áatramiania nu

¹ Wikia Pápruitjai. Wisha Serpanujai tura Timiutéujai iruntran atumin Tisarúnikianmaya Yus-shuar árumna nuna ju papin áatjarne. Atumsha ii Apari Yusna tura Uunt Jesukristunu ajasuitrume. ² Tuma asakrumin ii Apari Yus tura ii Uuntri Jesukristusha waitnentrama ásarmatai yáinmakar péñker awajtamsarat tusan wakerajrume.

Kristu támatai tunáa shuáran Yus asutiáttawai

³ Yatsurú, átum péñker matsatu asakrumin iisha Yus tuke yúmiñkijai. Átumka Yus nekas enentáimtustin nú núkap nekaakrum wéarme. Tura nuamtak aneniastincha nú núkap nékarme. Nu tuma asantai Yus yumiñsatniuitji. ⁴ Átum Yus-shuar asakrumin chíkich shuar atumin ya-jauch awajtamainiawai. Tura itiurchat wainiu asarum ti wáitjarne. Nu tuma aju átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainiaji. ⁵ “Yusa akupeamuriñ pachiiñkiamniaitrumé” Yus túramprume. Nuñ pachiiñkiataj tau asarum ju nuñkanam wáitjarne. Tura wáitjakrumsha nuna nañkaamas iwiarnaruitrumé nuñ pachiiñkiatin. Kame nújainkia Yus atumin achirmak péñker túrait, nuka páantaiti. ⁶ Núnisan atumin wáitkiarmainia nunasha Yus tímiatrusan wáitkiasartincha nekas péñkeraiti. ⁷ Tura wáitjarmena nusha Yus íjjaiisha ayamtikramprartin péñkeraiti. Ii Uuntri Jesukristu ji keana ímianisan kakaram suntarijjai nayaimpinmaya tara wantinkiamtai, nu tsawantaj Yus ayampratniun suramsartatji. ⁸ Tura nú tsawantajsha Yúsán nékainiatsna núnaka ii Uuntri Jesukristu ti asutiátajtsa tátatui. ⁹ Taa, nincha menkakatniunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nuñ akupeajrume, átum winia umirtukcha asakrumin” nin tiartatui. ¹⁰ Kame Uunt Jesukristu tátin tsawantri jeamtai, ni shuari, ni enentái péñker awajrsaru áinia nu, ni náariñ shiir pachisartatui. Tura Yúsán umikiaru ásar, ti shiir enentáimsar Jesukristun ísartatui. Ii ujakmarumna nu antukrum umirka asarum atumsha nuñ pachiiñkiattarme. ¹¹ Nu tuma asantai ii Yusrin atumin tuke áujtajrume. Yus atumin achirmakuitrumé. Nuñkia Yuska atumí enentáin takas Nii wakera nujai métek awajtamsati, taji. Yus umirka asarum péñker wekasataj tusarum wakerarme. Túrarum Yus enentáimtusum péñker túratin wakerarme. Tura wakerarmena nu umiktin Yuska ni kakarmarijjai yáinti, tu áujtaji. ¹² Átum péñker wekasa asakrumin chíkich shuarsha ii Uuntri Jesukristu náariñ nañkaamantu enentáimtusartatui. Nusha auka ii Yusrj tura ii Uuntri Jesukristu waitnenturmasar péñker wekasatniun yáinmakui túrarme. Túramtai chíkich shuar shiir enentáimturmasartatui.

2

Tuke Tunaarintin wantinkiattana nu

¹ Tura, yatsuru, ii Uuntri Jesukrístu tátatna nuna tura Niijjai inkiunaiktatjinia nunasha ujaktinian wakerajrume. ² Chíkich shuar anan̄kramawar “Uunt Jesukrístu tsawantri jeayi” tu ujatmaktaj tuser wakeruniawai. “Ímiarmaj nujai nékajai” turamainiakuisha, “chícham étserman antukmaj nujai nékajai” turamainiakuisha, tura “Papru papí áarmari nuna takui nékajai” turamainiakuisha, páchim enentáimprairap. Tura sapijmiakairap tusan seajrume. ³ Penké anan̄nawairap. Nekaatarum. Nu tsawant jeatsain̄ Yúsnumiá kanaktin átatui. Tura nú arant, Tuke Tunaarintin, emesnartatna nu wantinkiattawai. ⁴ Niisha aya wíniak enentáimtursarat tusa wakerak, ántar-yusnasha tura nekas Yúsasha shuar tikishmatrarain̄ tusa ti nakitrattawai. Niñki ti nan̄kaamantu enentáimtumas, Yusa nuke ajas, Uunt Yusa Jeen wayáā pujustatui. “Júiti Yus” shuar turutiarat tusa mash túrittiawai. ⁵ Yatsurtiram, wi atumjai pujakun nuna ashí ujakmajrume. ¿Nuka kajinmakniurmek? ⁶ Yámaikikia, ni tsawantri jeatsain̄, Tuke Tunaarintin wantinkiajn̄ tusa surimia nu nékarme. ⁷ Tunaasha yamaisha awai, tura paantcha. Túrasha tunaan surimia nu juramkitniuk taasai nu tunaaka paant átin. ⁸ Nuñkia nu Tuke Tunaarintin wantinkiattawai. Tura Uunt Jesus ni wenejai umpuí aun máattawai. Tara ni wincharijjai nuna amuktatui. ⁹ Nu Tuke Tunaarintin, iwianchi uuntri Satanás akupkam tátatui. Ni kakarmari iniakmastaj tusa, aentsti túrachminian túrak anan̄kawartatui. ¹⁰ Jinium wémin ainia nú shuaran ashí tunáa ana nujai anan̄kawartatui. Nu shuar Yus-Chichaman nekas ana núnaka nakitraru ásar uwemprachmin ániawai. ¹¹ Iis, nekas ana nuna nakitia ásarmatai, ti anan̄mamawar wait-chichaman umirkarat tusa Yuska tsan̄katkattawai. ¹² Warí, niisha ni tunaarín wararainiak, nekas ana nuna nakitraru ásarmatai, Yuska “jinium wétatrume” tiartatui nuna.

Uwempramin ainia nu

¹³ Tura, yatsuru, Uunt Jesus aneamu árumna nu, iisha atumin enentáimtusar ii Yusri yuminsaji. Átum nekas ana nuka umikiurme. Tuma asakrumin Yusa Wakaní atumí enentáin̄ péñker awajtam-saitrume. Nu tuma asamtai yámankamtaikniumiá Yuska “átum uwempramniaitrumé” túramprume. ¹⁴ Nu túrunat tusa Yus wakerutmarme. Krístujai Uwempratin Chicham ii ujakjinia nujai Yus untsurmakmarme. II Uuntri Jesukrístu ti penker pujana nū pachiinkiamniuram tusan ujakmajrume, nú chichaman.

¹⁵ Wátsek, yatsuru, Yusjai katsuartarum. Yus-Chicham etserkamu antukurmena nu, tura wisha áaran akuptukjarmena nusha kajinmatkíirap. ¹⁶ Ii Uuntri Jesukristusha tura ii Apari Yussha ti penker ásar incha anenmatsjik. Tura waitnentrama ásar incha shiir enentáimtikramji. Tura nú nan̄kaamas ii tuke péñker pujustinian ikiurtamsaitji. ¹⁷ Nu tuma asamtai, péñker chichastarum tusa, tura péñker takastarum tusa Jesukristuka shiir enentáimtikramar ikiakátmaratí.

3

Papru “áujtursatarum” tímiania nu

¹ Nunyá, yatsurú, Yusa chichame shiir pampartí tusarum Yus áujtursatarum. Átum Yus-Chicham wakerukmarmena áintsan̄ ashí nun̄kanam wakerukartí tusarum Yus seatarum. ² Tura yajauch shuar,

pénker ana nuna ti nakitiainia nu, incha yajauch awajtamachartí tusarum Yus áujkartustarum. Kame chíkich aents Yúsan umirkacharu áiniawai. ³ Túrasha Uunt Jesusak atumin iniaitsuk wáitmaktatrum. Tura atumin ikiakátmartatrum. Tura íwianch anankramataj takui kíshurtmaktatrum. ⁴ Kame Yus atumin yainmaktatrum, taji. Ii tájinia nu yamáí umíarme. Tura tuke umirkattarme. Nusha nekaar shiir enentáimji. ⁵ Uunt Yus yainmakartí ni anenkrattairin nekaatniun. Kristu itirchatan katsuntramia núnisan atumniasha katsuntratniun Yus yainmaktí.

Takastiniaitji

⁶ Yatsurtiram, antuktarum. Ii Uuntri Jesukrístu chichamejai ju taji: “Nuyá Yus-shuar wi jintinramun nakitiak aya wékana nu ikiuktiarum.” ⁷⁻⁸ Ii túrajnia núnisrumek túratin nékarme. Júiti: atumjai pujusmaj nuí tuke takakmasmiaji. Atumí yurumkarí iisha akikmakar yurummiaji. Atumjai itirchat áchatí tusar tsawajsha káshisha tuke takakmasmiaji. ⁹ Kame iisha, Kristu akatramu asar “yáintkiatarum” tíminiuji; túrasha nu tútsuk, ii túrajnia núnisrumek túratin nekaatarum tusar, iisha tuke tsawant takaamiaji. ¹⁰ Warí, atumjai pujumiaj nuí “Takastinian nakitiana nuka yurumashti” tíchamkaji. ¹¹ Iis, atumjiniá weeá, nánkamas enentáimiainiak tura nánkamas túruiniak penké takatsuk pujuiniawai, túramainiaji. ¹² Nú shuáran ii Uuntri Jesukrístu chichamejai “Tákamtak shiir takakmasartí” tajai.

¹³ Yatsurtiram, yawetsuk shiir túratarum. ¹⁴ Ju papinium ii tájinia nuna, shuar umiktinian nakitiakuinkia “umichuiti” tákuram, ni natsarat tusarum ikiuktiarum. ¹⁵ Túrasha “Yus-shuara nemasrinti” tiip. Áyatik jintintrata, tura Yúsai enentáimtikrata, ame nekas yatsumeá áitkiasmek.

Papru aujsua ikiuamu

¹⁶ Uunt Yuska, imiatkichu enentái susamniaiti. Jú Yus, itirchatnum pujarminin atumin tuke imiatkichu enentáimtikramsarti. Uunt Yuska atumin pujurtamsarti, tajai.

¹⁷ Juí wi Papru juna aajai. Wi papin akupeaj nuí júnisnak winia náarun áaran apujeajai, wíniaiti tusan. ¹⁸ Ii Uuntri Jesukrístu atumin ashí yainmakarat tusan wakerajrume. Nu atí.

Papru TIMIUTÉUN Emka papin aar akuptukma

¹ Wi Papru Jesukristu akatramurintjai. In uwemtikkiartin Yussha tura ii Uuntri Jesukristusha winia akuptuku ániawai. Jesukristujai métek ti shiir ajastai tusar nákaji. ² Timiutéu, ju papin áteajme. Wi ujakam Yusshuar ajasu asam nekas winia uchirua áinkiaitme. Tuma asakmin Yus Apasha tura ii Uuntri Jesukristusha ti anenma ásar waitnentrainiak imiatkinchanum ti shiir pujustinian yainmakarti.

Wait chichamjai anearta

³ Masetúnia nunkanam wéakun “Ipisiu péprunam pujuuta” timiaj núnisnak tájame. Shuar nuu wait-chichaman jintin ainia nu suritkiarta. ⁴ Niisha Israer-shuara weatrin áujmatsamunak tura ni weatri naari ti untsurí irurtinniak Yus-Chichamjai nankaamas enentáimtuiniawai. Nunak áujmatsar tuke ántar tuiniawai. Nu túramuka Yus enentáimtusar Nin shiir umirkatniun yáinmatsji. Tuma asamtai nusha surítkiatá.

⁵ Yus-shuar tuke enentáijjai Yúsán shiir enentáimtusar tura tunáa túrutsuk aya péñkera nuna wakerukar anenkartin ajastin ániawai. Núnisan péñker ajasat tusar Yus-Chicham étseaeaji. ⁶ Chíkich shuar juna iniaisar ántar chichaman áujmatainiawai. ⁷ Yúsán nekachiat “jintinniuitjai” tuiniawai. Tura unuiniainia nuna nekainiatsui.

⁸ Yus wakeramun nekaatin tura tunaan suritkiatin akupkamuka nekas péñkeraiti. Nu paant nékaji. ⁹ Kame akupniuka péñker shuaran itit awajsatniun akupenatsui. Antsu yajauch shuar juna túrin ainia nuna itit awajsatniun akupenawai: Tunáa shuarnasha, umichuncha, Yúsasha tura ashí Yúsáncha nakitiainia nunasha, aparín máinniasha, nukurín máinniasha, kame mankartinniasha, ¹⁰ nuwancha tura áishmanasha tsanirma áinia nunasha, shuaran kasamak juu ainia nunasha, wáitrinniasha, tsanumniuncha, ashí nuna itit awajsatniun akupenawai. Kame ashí péñkercha nuna iwiaratniun akupenawai. ¹¹ Núnisan tawai ti shiir uwempratrin chicham Yus suramsamajnia nu. Nu chichamnaka etserkatniun Yus péñker asa tsankatrukuiti.

Yus waitnenkartin asamtai Papru yuminsamiayi

¹² Ii Uuntri Jesukristu shiir enentáimturu asa Níiniun etserturkat tusa kakarman surusuiti. Túruta asamtai yúminjiajai. ¹³ Wi Yúsán imiá yajauch chicharniuyajai. Yus-shuarnasha áintrarmiajai. Yusnasha katsekniuyajai. Túrin aju Yus winia waitnentrurmiayi. Kame Jesuska Yus Anaikiamun nékachu asan wi túramu yajauchiiti tu enentáimchayajai. ¹⁴ Tura ii Uuntri Jesukristu ti nekas waitnentrurmiayi. Tura Jesukristujai tsaninkia pujakui Yus nekas enentáimtustinniasha tura anenkartin ajastinniasha surusuiti.

¹⁵ Ju chicham ti nekasaiti. Tunáa shuaran uwemtikrataj tusa Jesukristu ju nunkanam taramiayi. Nunasha ashí shuar nekaatin ániawai. Tura wikia ashí shuarjai nankaamas tunáan túriniaitjai. ¹⁶ Ti tunáa aju Jesukristu ti anenkartin ana nu paant nekanati tusa Yus winia waitnentrurmiayi Tuma asamtai chíkich shuar, wijjai métek, Yúsán nekas

enentámtusar Niijjai tuke iwiaaku pujusartatui. ¹⁷ Yus tuke jacha asa tuke iniaitsuk akupniuiti. Wáinchataitiat imiá nankaamas nékaiti. imia Niñki Yúsaiti. Tuma asamtai imia Niñki tuke iniaitsuk ti shiir awajsatniuiti. Núnisan tuke atí.

¹⁸ Uchiru, Timiutéu, yáunchuya Yus-shuar ámin “Ju shuar péñkeran túrattawai” túramarmia nútksam yamaikia kakaram ajástá. Nii timia enentáimsam suntara áintsam Yúsna kakaram takastin asumprurta. Nuna tájame. Tura Yus tuke nekas enentáimtusam tura tunaan túrawaj tusam anearam túrata. ¹⁹ Chíkich shuar tunaajaj anearcharu ásar Yúsan ikiukiarmai. ²⁰ Iminíusha tura Arejántrusha núnisan Yúsan ikiukiarmatai uunt iwianchnium surukarmajai. Nujaj Yúsan ti yajauch chicharsacharat tusan túraitjai.

2

Yus áuj satin

¹ Wátsek, emka seajrume Yus áujeakum Yus yumiñsam ashí shuar yainkiat tusam áujtusarta. ² Imiatkinchanum pujusar Yusjaisha tura áentsjaisha shiir túratai tusar tura ashí akupin ainia nusha péñker akupkarat tusar Yus áujtustiniaitji. ³ Áitkiasar seatin péñker asamtai, uwentikramajnia nú Yus wakerawai. ⁴ Ashí shuar nekas chichaman nekaawar uwemprarat tusar wakerawai Yus. ⁵ Aya chikichik Yus awai. Tura Jesukrístu aents ajas Yusjaj áentsun nawamnaimtikiartiniaiti. ⁶ Ashí shuara tunaarin akikmatkataj tusa jákatniunam Jesukrístu surumakmiayi. Tura tsawant jeamtai nu chicham ashí shuarnum etsernaktiniuyi. ⁷ Nuna túratniun Yus winia akatar akuptukuiti. Israer-shuarcha nekas chichaman enentáimtusarti tusa Yus akuptukmiayi. Krístunu asan wáitrusuk nekas tajai.

⁸ Nu asamtai áishmanka kajetsuk yajauch tunaitsuk antsu péñker enentáijjai uweje takuiniar Yúsan áujsarti. ⁹⁻¹⁰ Núnisan núwaka iwiar-mamuk nekasmiancha péñker enentáijjai entsararti. Chíkich shuar nu nuwan iis temashmarmarincha, sháukrincha, kurimkiamuncha, iwiar-mampramurinja núnaka enentáimtutsuk antsu ni péñker túrunamun enentáimtusarti. Núnisan áchatniukait nuwa Yús-shuar ainia nujaj. Ni péñker túramujaj nekas shiir awajmamsashtinkiait. ¹¹ Núwaka takamtak pujusar umiiniak unuimiararti. ¹² Nuwanaka ashí iruntramunam unuiniartinniasha tura ni áishrin akupkatniuncha suritiajai. Antsu takamtak pujustiniaiti. ¹³ Yus emka áishmankan Atańkan najanamiayi. Nuyá nuwan Épan najanamiayi. ¹⁴ Tura Yus timian umirkach Atańka anannachmiayi. Antsu Épa ananna asa tunaan túramiayi. ¹⁵ Túmaitiat jur-ertin asa, emesnartinniumiá uwempraiti. Tura Yúsan nekas enentáimtak anekartiniaitui tura esetar enentáimuiuk péñker wekasatniuiti.

3

Yus-shuaran wáinin

¹ Shuar Yus-shuaran wáinkiatniun wakerakka péñker takatan achikiuiti. Nuka nekasaiti. ² Tura Yus-shuaran wáinin ajastinian wakerakka chíkich shuar nin yajauch áujmattsachmin átiniaiti. Nuwá apatka áchatniuiti. Niisha péñker esetar enentáimin naka wekasatniuiti. Íranan ni jeen ti shiir itiaatniuiti. Péñker jintinkratin átiniaiti.

³ Nampechusha tura suuir enentáimtichusha átiniaiti. Aya kuítian ikiaun̄katniun enentáimtuschatniuiti. Antsu tsan̄ka átiniaiti. Kajechusha átiniaiti. Chikichnancha wakerutkashtiniaiti. ⁴ Ni shuar̄in shiir akupeakui ni uchir̄isha umin tura shiir awajkartin átiniaiti. ⁵ Kame ni shuar̄in akupkachminiaitkiun̄ka çitiurak Yus-shuaran wáinkiat? ⁶ Yus-shuaran wáinniuka yama Yus-shuar ajasu áchatniuiti. Túmaitkiun̄ka ti nan̄kaamantu enentáimtumak iwianchjaj̄i métek tunaan túrak sumamattawai. ⁷ Yus-shuarchasha nin shiir enentáimtustin ániawai. Núnischaitkiun̄kia nin yajauch chicharainiakui iwianch wárik tunaanum ajuartatui.

Yus-shuaran yain

⁸ Núnisan̄ Yus-shuaran yaincha péñker asamtai ashí shuar nin shiir enentáimtustin ániawai. Nii tana nuna túmatrusan̄ umin átiniaiti. Nampechu átiniaiti. Aya kuítian ikiaun̄katniun enentáimtuschatniuiti. ⁹ Yúsnan ti pen̄ker nekaatniuiti. Tura esetar enentáimsatniuiti. ¹⁰ Emka péñker ístiniiaiti nuyá péñker wekaakka Yus-shuaran yain átiniaiti. ¹¹ Nuwasha péñker asamtai ashí shuarsha nin shiir enentáimtustin ániawai. Tsanumniuchu antsu esetar enentáimiar nii chichaa ímiatrusan̄ umin átiniaiti. ¹² Yus-shuaran yainkia nuwan̄ apatkachu átiniaiti. Tura ni uchir̄incha ni shuar̄incha ashí shiir akupin átiniaiti. ¹³ Yus-shuaran yayak̄ nekas péñker takaakka shiir enentáimtusmin asa páchitsuk Kristu Jesus enentáimtamin arantsuk etserkamniaiti.

Yusna ana nu imiá nan̄kaamas péñkeraiti

¹⁴⁻¹⁵ Wárik ítniun wakerajme. Túmaitiatnak sétaknasha Yus-shuarjaj̄i takastin nekaak tusan̄ juna áatjame. Ashí Yus-shuar, iwiaaku Yusna ainia nu, nekas chichaman tuke emetawar akasmatainiawai. ¹⁶ Maa, imiá nekasaiti, Yus iwiainturmakma ashí nan̄kaamas ti pen̄keraiti. Tura júiti: Yuska aents ajas jú̄ nuñkanam paant wantinkiamiyi. Yus Wakancha “ti shiiraiti” Nin túmiayi. Yusa suntar̄isha Nin wáinkiar̄miayi. Ashí nuñkanam nu etsernakmiayi. Túramtai ashí nuñkanmayá shuar umirkarmiayi. Tura nayaimpiniam waketkimiayi.

4

Amuukatin tsawantin

¹ Yusa Wakan̄j ti paant tawai, amuukatin tsawant jeaakui untsur̄i aents Yus enentáimtustinian iniaisar antsu yajauch wakanin nemarsar íwianch jintiamun anturkartatui. ² Yajauch shuaran anturkartatui. Nu shuar ni enentáí narúa ánin ásar ni tunáa túramun pen̄ké enentáimtichu ániawai. Tuma asa shiir chichainiayatan̄ wáitrin ániawai. ³ Nu shuar nuatnaikiatniun suritiainiawai. Núnisan̄ chikich chikich yurumak yúatniuncha suritiainiawai. Warí, Yus ashí yurumkan najana asamtai Yus-shuar nekas chichaman nékainia ásar Yúsán yumiñsar páchitsuk yuámin ániawai. ⁴ Ashí Yus najanamu péñker asamtai nakittsuk antsu Yusán yumiñsar yúatniuiti. ⁵ Yus-Chicham tana nújaj̄isha tura yuiniak Yúsán yumiñkias áuj̄samuj̄aj̄i ashí péñker ajasuiti.

Jesukristu péñker takarin

⁶ Wi tájamna nu chíkich Yus-shuar jintintiakmeke Jesukrístu péñker takarín átatme. Tura ashí Yus-Chicham péñker jintíamu unuimiaru asam nujaj kakaram ajastatme. ⁷ Antar chichamsha tura netse chichamsha enentáimtutsuk nekas Yusna ana nu túratin kakaram ajasta. ⁸ Kame ayash kakaram awajatsniusha ishichik péñkeraiti. Antsu Yusna nu túratin kakaram ajastinka imiá péñkeraiti. Yamái ju nuñkanmasha yáinmaji tura ukunmasha Yusjaj pujustin asakrin nankaamas péñkeraiti. ⁹ Nu imiá nekas asamtai ashí shuar nuna enentáimtustiniaiti. ¹⁰ Nekas iwiaaku Yus ashí shuaran uwemtikramniaiti, tura ashí Nin enentáimtuinia nú shuaran nekas uwemtikratniuiti. Nu chicham imiá nekasaiti tu enentáimtakur katsekramainiakrincha kakaram takaaji.

¹¹ Nuka ashí ame jintiakum akupkatniuitme. ¹² Ti úuntchaitkiumnisha nakitramprarain. Antsu péñker túrakum Yus-shuar unuiniarta. Chichammijiaisha, túramurmijiaisha, anenkratmarmijiaisha, nekas Yus enentáimtamujajsha, tura esetra enentáimsam Yusna péñker túramujajsha niisha túrawarat tusam iniaktusarta. ¹³ Wi jeatsain Yus-Chicham áujeakum shuar jintintiata. Túram Yus-shuar ikiakárarta. ¹⁴ Yus-shuara uuntri Yúsnan takastin anaitiamak uwején awantramsarmai. Nuna túramainiak “Ju shuar kakarman Yúsnumián takustatui” túramarmia nu, kakaram ajasam tímiatrusam túratá.

¹⁵ Tuke enentáimjai wi tájamna nu enentáimtakmin ame péñker túruki wéamun nekaawartatui. ¹⁶ Túramna nusha tura unuiniamna nusha péñker wáinmamkata. Nu túratin pimpikiip. Nu túrakmeke uwemprattame amesha tura ujainiam nusha uwemtikrattame.

5

Yus-shuarjai itiur túratniuit

¹ Uunta nu kakantraip. Antsu nekas ame apa nútiksamek chicharkata. Nátsasha nekas ame yátsumeá nútiksamek shiir awajarsarta. ² Nuwá úuntchisha nekas ame núkua nútiksamek shiir awajarsarta. Nuwá nátsasha nekas ame umaimia nútiksam shiir enentáimjai péñker awajarsarta.

³ Waje nekas atsumin ainia nusha yáinkiarata. ⁴ Tura waje uchir-tiniaitkiuñkia tura tirankrinniuitkiuñkia, nu shuar wajen wáinkiarati. Emka ni shuarin péñker wáinkiatniun unuimiarati. Ni aparí anemia núnis awañtuiniak shiir wáinkiarati. Núnaka Yus ti shiir enentáimtaawai. ⁵ Nekas waje niñki pujana nu Yúsan enentáimtak tsawajasha káshisha iniaitsuk Yúsan áujeawai. ⁶ Antsu aya wárastiniak wakera nuka iwiaakiat jaka áintsankete. ⁷ Tura wajenka ni shuarj wáinkiarati. Yus-shuaran ya-jauch chicharnaktin atsutí tusam wi tájamna nu ashí Yus-shuar ujakarta. ⁸ Shuar ni jeen pujuinia nuna nekaska wáinkiatniuiti. Tura nuyá chíkich shuárnasha yáintiniaiti. Túrachkuñka Yus tana nuna umiátsui, tura Yus-shuarcha nujaj nankaamas yajauchiiti.

⁹ Yusa kuítrijaj yáinniaiktiniaitkiuñka waje sesenta (60) uwí nankaamas takustiniaiti. Tura chikichik aíshriniak takusu átiniaiti. ¹⁰ Ti paant péñker túrin átiniaiti. Ni uchirín péñker tsakatmaashit, írran péñker táata tíniuashit, nekasmiancha enentáimtumar Yus-shuaran yáiniaashit, wáitainia nuna waitnenniuashit, tura chikichnasha péñker túriniaitkiuñka maak.

¹¹ Tura sesenta (60) uwí takakchaka chíkich wajejai iruraip. Ni ayashi wakeramurj Krístuiya kanamtikiainiawai tura ataksha nuatnaikiatniun

wakeruiniawai. ¹² Tura emka enentáimtiarmia nuna iniiaisar sumamainiawai. ¹³ Nu arantcha nakimiainiak ántar irauwear chikicha iturchatrin áujmatsachminia nunasha áujmatin ániawai. ¹⁴ Nu asamtai waje úchiplik ainia nuka uyurtukar uchin takusarti. Tura nuwá nuatkamu takastinia nuna túrawartí. Tura ni túrunamurijjaj in kajertamainiaj nú shuar ya-jauch enentáimturmarcharti. ¹⁵ Kame nuik chíkich chíkich waje Krístuiya kanakiar iwianchin nemarsaru ásarmatai nuna tájai.

¹⁶ Áishmansha nuwasha Yus-shuar ainia nu ni shuarijn waje ákuinǵia Yusa kuítrin seatsuk nii yaíntí. Nujaj chíkich wajén nekas atsumainia nuna Yusa kuitri yaíntatui.

¹⁷ Yus-shuara uuntri Yus-shuaran péñker wáinkiarua nu, nekas shiir enentáimtustin ániawai. Tura akinkiamniasha ániawai. Nekaska Yus-Chichaman etserkatniuncha tura unuinartinniasha tuke takaaka imiá shiir enentáimtustinaiti. ¹⁸ Yus-Papiniunsha núnisan áarmaiti: Jínkiaia saepen pakartaj tusa turu takaak nájakui ni nuji jínkiatáshtiniaiti.

Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

¹⁹ Chikichik shuarak Yus-shuara uuntri tunaarjn etsertukmatainǵia anturkaip. Antsu jímjarsha menaintiusha tsanumtsuk métek tuiniakui anturkata. ²⁰ Chíkich shuarsha ni tunaarjn ikiuktinian nakitiainia nu, ashí iruntramunam chicharkarta. Chikichcha, nuna íisar, ashamkarti. ²¹ Yussa ii Uuntri Jesukrístusha tura nayaimpin-maya suntarsha íimiainiamunam “túrata” tájame. Ashí shuarjaj niisháa enentáimtutsuk métekrak túrata. ²² Yus-shuara uuntri atí tusam wárik anaikiaip. Wárik túramka chikicha tunaarjn sumamattame. Ashí tunaanum penké pachiiinkiaip.

²³ Wakemjaj jau asam aya éntsak úmutsuk karía ishichik pachimpram umarta.

²⁴ Chíkich shuara tunaari wáitsatin imiá paant ániawai wáitsatin tsawant jeatsain. Tura chíkich shuara tunaarínkia paantcha ániawai antsu ukunam paant nekanawartatui. ²⁵ Núnisan péñker túramusha ti paant ániawai. Tura yamá páantchaitiat tuke paantcha áchammiaiti. Páchitsuk nekanattawai.

6

¹ Takarniutirmesha, atumí uuntri ti shiir umirkatarum. Túrachkunǵia chíkich shuar Yusnasha ii unuiniamuncha yajauch áujmattsartatui. ² Atumí uuntri Yus-shuar ániakka aya Yusjaj yatsum asamtai nakiarchatniuitrume. Antsu nuna nankaamas péñker takarsatniuitrume. Warí, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

Yusna wakeruktincha tura kuit wakeruktincha

³ Shuar ti shiir naka chichaman ii Uuntri Jesukrístunu ana nuna nakitiak antsu niisháa chichaman étserkunǵa ⁴ nu shuar nankaamantu enentáimtumayat ántraiti. Ni enentáimmianak chichaak aya ántar chichaman antumtiknaikiatniun chichaawai. Tura nu chichamjaj nupetmaktaj tusar nankaamas áujmatainiak kajernaikiar tura katseknaikiar péñker enentáimtunaitisuk ⁵ tuke kakannainiawai. Tura tu aujmatnaisatniun wakeruiniana nú shuar nekas-chichaman nékachu ásar aya tunaan enentáimtin ániawai. “Yusna ana nujaj kuítrintin ajasminiaiti” tuiniawai. Nu shuar pachisaip. ⁶ Shuar takakna

nujain waraakka Yusna ana nujaisa waraak ju nunkanmasha tura nayaimpinmasha nekas kuítrinniuiti. ⁷ Iis, ju nunkanam misuk támaji; núnisar misuk jiinkittiaji. ⁸ Tuma asamtai yurumkasha tura entsataisha takakkurkia nujain warasa pujustiniaitji. ⁹ Antsu kuítrintin ajastaj tuinia nu, tunaanum awańkemkar iniainiawai. Tura antra nuna wakerukar itiurchatan wáiniainiawai. Nujai emesratniunmasha jeainiawai. ¹⁰ Kame kuit aneatniuka ashí tunáanum útsutmakminiaitji. Chíkich shuar nuna wakerukar Yus enentáimtustinian iniaisar ti itiurchatjai yajauch awajmamsarai.

Yusna nu túrunat tusam kakaram ajástá

¹¹ Antsu ame Yus-shuar asam nuyá pisarta. Yus nekas enentáimtakup pėnker túrata. Waantu enentáimtsuk Yus pėnker umirkata. Aneakum katsuńtrata. ¹² Yusna nu túrunat tusam kakaram ajástá. Tuke amuicha iwiaakma emetata. Nu túratniun Yus anaitiamkaiti, tura ame Yus nekas enentáimtamun untsurj shuar iruntramunam etserkaitme. ¹³ Yuska ashí iwiaaku átinian súwiti. Jesukrístusha Punsu Piratuń nekas nuna ti paant ujakmiayi. Tuma asamtai Yussha Jesukrístusha írainiamunam nuna tájame. ¹⁴ Ii Uuntri Jesukrístu táatsain wi tájamna nu yapajítsuk tura yajauch chicharnakchamnia pėnker umiktá, tájame. ¹⁵ Tsawant jeamtai Jesukrístu tatí tusa Uunt Yus, imiá pėnker asa, akupkattawai. Nínkiti Yus. Akupniuncha Akupniuiti. Uuntjai nankaamas Úuntaiti. ¹⁶ Iwiaaku átinia nérenniurj Nínkiti. Ti tsáapninnium pujakui nuntumtuachminiaiti. Wáinchatai asamtai shuar pėnké wáinkiacharu áiniawai. Nínki ashí shiir awajsatniuiti tura Nínki tuke ashí akupin atí. Núnisan atí.

¹⁷ Jú nunkanam kuítrintin ainia nusha nankaamantu enentáimtumascharti. Kuitcha yúpichuch menkakamnia asamtai kuítniak enentáimtsusar pujuscharti. Antsu iwiaaku Yus ashí in ti pėnkeran núkap súramaj nuna nekas enentáimtsusarti. ¹⁸ “Pėnker túratarum” tiarta. Tákumin niisha shiir enentáijjai ni takakman ajamsarti. Nuyá nú pėnker túramujai Yusaj ikiáunkartí. ¹⁹ Nuna túruiniak kuítriniawartatui. Núnisan tuke iwiaaku átinian wáinkiaartatui.

Amuak Timiutéun akatramu

²⁰ Timiutéu, ashí ame túratniua nu tuke enentáimturta. Jú nunkanmaya ántar chichainia nu anturkaip. Tura wáitruiniak “wi imiá nékajai” tuinia nusha anturkaip. ²¹ Chíkich shuar nuna umirkar Yusajya kanakiarai.

Wátsek, Timiutéu, Yus shiir yainmakti.

Nuke atí.

Papru TIMIUTÉUN Ataksha papin aar akuptukma

Papru Timiutéun áatramiania nu

¹ Wi Pápruitjai. Yus wakerakui Jesukrístu akatramuri ajasuitjai. Ashí Jesukrístujai tsaniñkiarun “Nekas iwiaaku átinian susattajai” tíniuiti Yus. Tuma asa nuna etserkat tusa akuptukuiti. ² Aneamu uchiru, Timiutéu, ju papín áateajme. Yus Apasha tura ii Uuntri Jesukrístusha ti anenma ásar waitnentrainiak imiatkinchanum shiir pujustinian yainmakarti.

Krístunu takastiniaitjinia nu

³ Tsawajsha káshisha Yúsan áujeakun ámin tuke enentáimtusan ti shiir Yúsan yúminñkijai. Winia weatur túrawarmia nútíksanak Yúsan enentáimtakun ti shiir awajeajai. ⁴ Kanakmiaj nuñ eantramiam nuna tuke enentáimtajme. Ataksha wararnaisatai tusan lítniun wakerajme. ⁵ Yus nekas shiir enentáimtiniaitmena nuna nékajai. Nukuchrum Ruítíasha tura ame nuku Eunisiasha emka Yúsan nekas enentáimtin ármiai. Amesha núnisketme.

⁶ Tuma asakmin tájame: Yusna takasái tusan winia uwejrún ámin awanteakui Yus kakarman suramsamia nujai atak kakaram takasta. ⁷ Yus sápij enentáin suramsachuitji. Antsu kakaram ajastinniasha anenaitniuncha péñker wekasatniuncha suramsaitji. ⁸ Ii Uuntri Jesukrístunu etserkatin natsantraip. Níiniun étserkun sepunam pujamusha étserkum natsantruraip. Antsu Yus kakaram awajtamkui ame étseam nujai shuar yajauch túramainiakui surimiamtsuk wáitsatin enentáimtumarta. ⁹ Ii péñker túrichu árinñ Yus in anenma asa uwentikramar péñker túratniunam apujtamsaitji. Iisha Jesukrístujai tsaniñkiaru asakrin tura Yus nuna túratniun wakerak túramiai. Yaunchu ju nunka atsaisha in tuke waitnentrampromiaji. ¹⁰ Turá yamá in Uwentikkiartin Jesukrístu támatai nu anenmam paant ajasuiti. Niisha jákatniun nupetak emesramiai. Tura uwempratin chichamñai jáchatai iwiaakman paant awajturmaj.

¹¹ Nuna etserkat tusa Yus anaitiukmiai. Tura akattur Israershuarchanum akuptukmiai. ¹² Túruta asamtai ti wáitajai. Túrasha Yúsan nekas enentáimta asan natsamatsjai. Imiá kakaram asa amuukatin tsawant jeatsañ ashí wínian susamaj nuna ti péñker waitruktatui.

¹³ Shiir chichaman jintintiamajmena nuke emetata. Jesukrístujai tsaniñkiu asar Yus nekas enentáimtaji tura nujai anenkratniuitji. Tuke núnismek túrata. ¹⁴ Yus ámin takasat tusa suramsamu shiir takasta. Tura Yusa Wakanñ in pujurtamaj nuna kakarmarññai túrata.

¹⁵ Asia nunñkanmaya shuar mash iniaitiusarmai. Nu nekaachmaashum. Nu shuarnumiá Pijirusha Ermujenessha armai. ¹⁶ Antsu Unisépuru niisháa shuar amai. Ti nukap shiir enentáimtikrumai. Tura wi sepunam pujamuncha natsantrurchamai. Ii Uuntri Kristu ni shuarincha waitnentrarti. ¹⁷ Rúmanam taasha natsantrutsuk eatak wáittsuk iniaitíuschamiai. ¹⁸ Ipiisu péprunam pujarin ti yainmakmiaj nu

paant nékame. Tuma asamtai amuukatin tsawant jeamtai nincha Uunt Yus waitnentrati.

2

Kakaram ajasta

¹ Amesha, uchirú, Jesukrístujaj tsanin̄kiu asam nu kakarmajaj kakaram ajasta. ² Untsurí ántuiniamunam wi etserkamaj nu, shuar umikmin ainia nu jintintiwaram chikichnasha jintintiwarat tusam akupkarta.

³ Ame ti pen̄ker Jesukrístu suntari asam wáitsatin katsunrata. ⁴ Suntarka ni uuntri tana nunak umiktin asa chíkich takatan pachintiuakhatniuiti. ⁵ Núnisañ nakurinha nakurustinia nujaj métek nakurachkun̄ka nekas pen̄keran awakmakun súsatniua nuna achikchamniaiti. ⁶ Ataksha núnisañ shuar ajan takaana nu, ashí shuara nan̄kaamas nuyañ yúashtinkiait. ⁷ Wats, ju menaintiu métek-taku chicham áiniawai. Pen̄ker enentáimtakmin ii Uuntri Kristu paant awajturmastatui.

⁸ Jesukrístu jaka nantakmia nu enentáimprata. Tura Uunt akupin Tawit ni weatri asamtai Jesussha uunt akupin átiniaiti. Núiti wi uwempratin chichaman étsereaj nu. ⁹ Nuna étsereakun sepunam jirujaj jin̄kiamu pujakun wáitijaj. Túrasha Yus-Chicham jin̄kiachminiaiti. ¹⁰ Ashí shuar ni shuari arti tusa Yus achikiarua nuna yáintajtsan ashí iturchatan katsunteajaj. Nujaj Jesukrístujaj tsanin̄kiaru ásar uwemprar tuke shiir pujusartatui Yusjaj.

¹¹ Ju imiá nekasaiti:

Jesukrístujaj jákaitkiurkia Níjjajsha tuke iwiaaku pujustatji.

¹² Wáitiakrishia Níjjaj akupkattaji.

Natsantakrinkia Niisha natsantramprattaji.

¹³ Umichuitkiurniisha Niñkia tuke uminiaiti. Warí, Yuska ni enentáimmiajaj yapajniátsuk tuke umiktiniaiti.

Yusaj natsaaraqaj tusam ashí túrata

¹⁴ Shuar jintintiakum ju enentáimtikrata. Ii Uuntri Yus ímmianum chichamjaj yajauch tunaiyarajin̄ tusam chicharkarta. Nu tunaitin pen̄ké áantrai antsu ántuiniana nuna yajauch awajenawai. ¹⁵ Yus-Chicham tuke enentáimjaj pen̄ker unuimiátram shiir jintintiwarta. Túrakum Yus pen̄ker írsat tusam pen̄ker takarin atá. Túramka Yusaj natsaarchattame. ¹⁶ Jú nun̄kanmayanak ántar áujmatin ainia nujaj kanaktia. Shuar nuna áujmatainiak tunaanum nuna nan̄kaamas wáiniawai. ¹⁷ Ni jintiniamusha sun̄kurjaj métek pampaawai. Iminíusha tura Piritiusha nu shuar áiniawai. ¹⁸ Niisha nekas chichaman iniaisar tura ashí Yus-shuar nantaktincha nan̄kaamasai tuñiakui chíkich chíkich shuar Yúsan naka enentáimtuiniatsui yamaikia. ¹⁹ Túrasha Yus ashí nan̄kaamas enentáimtustinia nuna paant awajsaiti. Júnisaiti: “Uunt Yus ni shuarin̄ nékainiawai,” tura nuyá “Ashí Kristu shuari ainia nu tunaanumiá kanakiarti.”

²⁰ Kuítrinniu jeen kurijaj najanamusha kuitjaj najanamusha írunui. Nújain̄kia ti shiira nu takastin áiniawai. Tura numijaj najanamusha nuwejaj najanamusha írunui. Antsu nújain̄kia nekasmancha ainia nu takastin áiniawai. ²¹ Núniskete Yusa takatríjjaj. Ashí tunaanumiá kanakir pen̄ker wekasar shiira nu takasmin átatji. Kame ashí pen̄kera

nu takasmin asakrin ii Uuntri Jesukristu wakerak péⁿker takata nu pu^jtamsamniaitji.

²² Natsá wakerutai iniaisam esetram péⁿker wekasata. Amesha ashí shuar shiir enentáijjai Yúsan áujena nu^jaj Yus nekas enentáimtakum aneⁿiakum ti shiir pu^justá. ²³ Enentáimtsuk chichainiak aya ántar tunaitinian chichainia nu pachisáirap. Nusha aya némasmanainiawai. ²⁴ Ii uuntri Jesukristu takarniuka chíkich shuarjai nemasmanaikiashtiniaiti, antsu ashí shuarjai péⁿker nawamnaikiatniuiti. Tura waitnentáimturar péⁿker jintintiatniuiti. ²⁵ Tura umircha shuarnasha Yus ni enentáin ya^pajtiakui nekas chichaman shiir enentáimturarat tusa péⁿker enentáijjai jintintiatniuiti. ²⁶ Nu^jaj íwianch ni wakeramu túrawarat tusa achikmaitiⁿ atan uwemprartatui.

3

Amuukatin tsawant jeatemamtai aents ti tunaan túrawartatui

¹ Amuukatin tsawant jeakui ti itiurchat átatui. ² Shuar aya niⁿki enentáimtumasaratui. Kuítian ti wakeriartatui. Nan^kkaamantu enentáimtumamaratui. Yúsnasha yajauch chicharsartatui. Aparin^{ch}a umirkachartatui. Yumiⁿsatniuncha nékachu ártatui. Ashí Yúsnancha enentáimtuschartatui. ³ Aneetsuk waitnenkartichu ártatui. Tsanumin ártatui. Ni ayashí wakeramun katsuncha ártatui. Aya kajen ártatui. Ashí péⁿker túrinia nuna nemasri ártatui. ⁴ Amikrin^{ch}a surukartatui. Arantsuk tunaan túrawartatui. Waantu enentáimin ártatui. Yúsan nakitrar aya ni wakeramunak enentáimtusartatui. ⁵ Yusa kakarmari “ántrai^t” túniak péⁿker umirkachartatui. Túrasha Yúsan umirua núnisar túrawartatui.

Nu shuar penké pachisáip. ⁶ Nu shuarsha shiir chichayatan anaⁿkawar jeá wáiniawai. Tura nuwá esetar enentáimchan nekas tunaarinnium anaⁿkainiawai. Nu nuwá ashí yajauch wakeramujai anaⁿnainiawai. ⁷ Tuma ásar ashí shuara chichamen tuke ántuiniayatan nekas-chichaman nekaatniun tujintiainiawai. ⁸ Yaunchu Ejiptu nuⁿkanam Muisais uunt akupniujai chichaakui jimiará iwishin, Jánissha Jámpri^{ss}ha, Muisaisan kajerainiak “ántar tawai” tiarmiayi. Núnisan ju shuar nekas-chichaman nakitiainiawai. Naka enentáimiainiachu ásar Yúsnan naka jintiatniun penké tujintiainiawai. ⁹ Túrasha nuna nan^kkaamas kuakchartatui. Shuar ti paant ni netse túruiniamurin nekarawartatui. Núnisan nu jimiará iwishniujai túrunamiayi.

Amúak Papru Timiutéun akatramiania nu

¹⁰⁻¹¹ Tura áme^ka wi tímiaj nu umireame. Wi Yus^jaj shiir wekaamusha métek túriniaitme. Wi enentáimmiasha nékaitme. Áintruiniakui wáitsamaj nu nékame. Tura Yúsan enentáimtakun tura aneⁿkrat^kun shiir enentáijjai katsuntramjai. Antiukia péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntri uwemtikurmiayi. ¹² Nekasaiti, shuar Jesukristujai shiir túrataj tákuⁿka ni nemasri áintiam ti wáitsatniuiti. ¹³ Tura ashí anaⁿkartin ainia nusha kame ashí yajauch shuarsha nú yajauch túrukⁱar wétatui. Iwianch^jaj anaⁿkamu ásar chikichnasha anaⁿkiar weartatui.

¹⁴ Antsu áme^ka unuimiam nu imiá nekasaiti tu enentáimtakum tuke emetata. Jintin^tramawarmia nú shuarsha wáitrichua nu nékame.

¹⁵ Úchichinmayan Yus-Chicham nékame. Yus-Chichamka uwempratniun

jintinramniaiti. Nusha “Jesukrístu nekas enentáimtakum uwemprat-tame” tawai. ¹⁶⁻¹⁷ Ni Papirín áarat tusa Yus ni shuarín áamtikramiayi. Ashí shuar ni Chichamen nekaawar péñker túrawarat tusa túramiayi. Tuma asamtai Yus-Papí shuartin unuiniakartin asa imiá penkeraiti. Tunáa túrajnia nu Yus-Papíjjai nekamatniuitji. Tura awajiakrincha Yus-Papí núnaka paant jintinramji. Nuyá naka wekasatniun jintinramji.

4

¹ Ii Uuntri Jesukrístu amuukatin tsawantai Uunt Akupin ajas iwiaakuncha tura jákaruncha ashí péñker túramuncha tura yajauch túramuncha nekaattawai. Tuma asamtai Niisha tura Yus Apasha íimiainiamunam juna akateajme. ² Uwempratin chicham etserkata. Yúpichuchia nuísha tura itiurchata nuísha tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuiniararta. ³ Ukunmanka péñker chichaman nakitrar ii wakeraj núchik nekaatai tusar, shuar teremak péñker pujuschamnia nekapea áintsan, nankaamas unuimiaru atai tusar, nánkamas unukiartinian ti untsurí eakartatui. ⁴ Nekas shiir chichaman iniaisar ikiuiniak ántar áujmatsamun enentáimtusartatui. ⁵ Antsu ámeke tuke péñker túratin wakerakum ashí itiurchat katsuntrata. Uwempratin chicham étserkum takatrum péñker umikta.

⁶ Ishichik ajasai winia iwiaakmar Yusaj surumaktin. Mantamnan nayimpiniam wétin jeatimiai. ⁷ Shuar kakaram maanainia núnisnak tuke kakaram takasmajai. Tséken péñker tseke áintsanak yawetsuk takasmajai. Tura Yus-Chichaman nekas akasmatkun péñker wáinkiaitjai. ⁸ Tuma asamtai tawasap nukajai najanam tsékena susamua áintsan wisha péñker túramunam akinkiaitajai. Tura aya winiak akirkashtatui. Antsu ashí ni tátinian shiir enentáijijai nákainia nunasha nekas péñkera nuna akikiartatui.

Timiutéu túratin akatmamturna

⁹ Wárik iiraitin enentáimturata. ¹⁰ Témas aya jú nunkanmayanak wakerak ajapa ikiuruk Tisarúnikia péprunam weyi. Tura Kresentisha Karasea nunkanam weyi. Núnisan Títiusha Tarmasia nunkanam weyi. ¹¹ Túrawarmatai aya Rúkas wijijai pujawai. Márkus eaka wáinkiam ame itiaititia. Jui ti péñker yainkiamniaiti. ¹² Tura Tikikiunka Ipisu péprunam akupkamjai. ¹³ Tura winiakum nuparam pushí Trúas péprunam Karpu jeen ikiukmij nu takurtuktia. Núnisan nuparam papísha tura nekaska penké papí takurtuktia.

¹⁴ Arejántruka jirujai takawa nu ti yajauch awajtusuiti. Túrutaitkiuisha ni túramujai métek Yus akiktí. ¹⁵ Nu amesha péñker wáinkiatá. Ii étsereamun penké nakitiawai.

¹⁶ Emka akupniunam ayamprumaktaj tusan chichaakui chikichk-isha yáintkiacharmiayi. Antsu sapijmiainiak ikiurkiarmiayi. Yus nu shuaran yajauch enentáimturchara maak. ¹⁷ Tura ii Uuntri Jesukrístu ni kakarmarín surus yaintkiarmiayi. Nujai uwempratin chichaman ashí nunkanam Israer-shuarcha antukarti tusan etserkamjai. Tura núnisan akupniunmayasha ii Uuntri uwemtikrurmiayi. ¹⁸ Tura núnisan ashí yajauchia nuyá uwemtikrurmatai Nii akupeana nuí nayaimpiniam jeattajai. Niñki tuke shiir awajnasti. Núnisan atí.

Amikmaamiania nu

¹⁹ Piriskancha ni áishri Akirancha amikmainiajai. Núnisnak Unisépuru shuarincha amikmainiajai. ²⁰ Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai. ²¹ Michá nantu jeatsain iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

²² Ii Uuntrj Jesukristu ámijiai tsaniñ pujustí. Tura Yus ashí péñker waitmakarti.

Nuke atí.

Papru TITIUN papi áatramu

Papru Titiun áatramiania nu

¹ Wikia Pápruitjai Yusa takarniuri. Tura Jesukristu akatramurintjai. Yus achikma ainia nú shuar niisha antukar Yúsan umirkarat tusan akatramuitjai. Shuar nuna nekaawar péñker wekasartatui. ² Tura nú arant, nú shuarsha tuke iwiaaku pujusarat tusan étsereajai. Nú shuarnasha, nuñkan najantsuk, “uwemtikrattajai” Yus tímiayi. Tura Niisha wáitruatniun tujintiawai. ³ Tura yamaikia, tsawant jeamtai, nuna nekaawarat tusa ii Yusrj uwemtikkiartinia nu, winia chichamur ujakarta tusa, winia akatturmiayi.

⁴ Titiu, wi Yusna étserma umikiu asakmin winia uchirua áitkiasnak papin áateajme. Iis, iijjai métek Yus nekas enentáimtatsjik. Yus waitnentra ma asa shiir awajtamsati tusan wakerajme. Tura ii Aparj Yussaha, ii Uuntrj Jesukristusha, Uwemtikkiartin ana nu, enentáimin imiatkincha awajtamsati, tajai.

⁵ Wats, wi iwiarachmajna nu ame iwiarata tusan Kreta nuñkanam iukchamkajam. Tura “ashí péprunam Yus-shuar írunmanum, Yus-shuaran wáinkiarat tusam shuar anaikiarta” tíchamkajam.

Yus-shuaran wáinin

⁶ Yus-shuaran wáinin júnis atí. Niisha makuuchmin ti péñker wekasatí. Tura chikichík nuwentin átiniaiti. Tura ni uchirisha Yusna ártiniaiti. Tura shuar yajauch chicharsachmin niisha tutupnisañ wekain ártiniaiti. ⁷ Enentáimprata. Yus-shuaran wáinin Yusna ana nuna wáinkiat tusa anaikiamuiti. Tuma asamtai nekas makuuchmin wekasatniuiti. Waantu enentáimtumatsuk, kajetsuk, tura nampechu átiniaiti. Chikichan waitkiau áchatniuiti. Tura anañma kuítrintin ajastaj tusa wakerukchatniuiti. ⁸ Antsu shuar ni jeen írar winiana nuna itiaatniuiti. Tura ashí péñker ana nuna wakerin, esetas enentáimin átiniaiti. Tura ju nuñkanmayá akupeamuncha, núnisañ Yús akupeamuncha umirkatniuiti. Tura niñki ímiastiniiaiti. ⁹ Tura nú arantcha, chíkich shuáran péñker jintintrataj tusa tura Yus-Chichaman nakitin áinia nuna nupetkataj tusa, Yúsnumia nekas chichaman, nii unuimiátramiania nuyá kanakchatniuiti. ¹⁰ Nekaata. Umichu ti irunui. Niisha ántar chichau ásar anañmau áiniawai. Israer-shuar weeanam ti irunui nú shuar. ¹¹ Niisha kuítian achiktaj tusar wakeruiniak, yajauch unuiniarchatniua nuna unuiniainiawai. Nuna túruiniak untsurí shuáran, ni írutkamurijjai yajauch enentáimtikianiawai. Tuma asamtai auka, ni wené epetkatniuiti, ántar chichainiakui. ¹² Warí, imia Krétanmayá chichaman etserin juna tíchamka: “Krétanmayá aentska tuke wáittrin áiniawai. Tura nákitiat ti yurumin áiniawai. Yajasma núnisañ áiniawai.” Nuna tíchamka. ¹³⁻¹⁴ Maa, niisha nékasañ tímiayi. Nu tuma asamtai, Titiu, Israer-shuar ántar tuinia nuna, Yus-shuar anturkachartí tusam, tura nekas chichaman nakitiana nuna akupeamurjín umirkachartí tusam, antsu Yúsan nekas umirkarat tusam, umichu shuar kakaram chicharkarta.

¹⁵ Enentáimprata. Yus-shuarka, ni enentáí chamir ajasu ana nuka, ashí ni wainnia nuna péñkernak enentáimtawai. Tura chíkich shuar, Yúsan umirkachu asa, ni enentáí wapik asa, péñker ana nuna enentáimtustinian tujintiawai. Achapai enentáimiuk, péñkercha ana nuna “péñkeraiti” tawai. ¹⁶ Tura niisha “Yus-shuaraitjai” tuñiyatan, Yúsan umirtsuk niisháa túruiniawai. Tuma ásar mujimiai ániawai niisha. Umichu ásar péñkeran túratniun penké tujintiainiawai.

2

Péñker jintintiatin

¹ Tura amesha, Tituu, péñker chicham etserkata. Yus-Chicham tátsuna nu etserkaip. ² Antsu áishman katsunt Yusna ainia nu, jü jintintrata. Nampechu, náñkamas enentáimcha, esetas enentáimin arti. Yus tana nuna umirin tura anenain arti. Ni iturchatrjín Yúsan enentáimtusar katsuntin arti. ³ Tura núnismek nuwá katsunt Yusna ainia nusha jü jintintrata. Niisha núnisaran Yus-shuarti túramnia nuna péñker túrawartí. Tsanumin tura nampen áchartí. Antsu péñker wekasatniun unuinin arti. ⁴ Niisha yama nuatnakua nuna ni áishrin ni uchiríncha nekas aneetniun unuinarartí. ⁵ Junasha jintintrartí. Esetas enentáimin, péñker wekain ártiniaiti. Ni takatrin péñker takastin ániawai. Ni áishrin umirin ártiniaiti. Tura waitnentin ártiniaiti. Yus-shuaracha Yus-Chichaman yajauch chicharkarajin tusar túrawartiniaiti. “Tu jintintrarta” titiá.

⁶ Nuyá, Tituu, natsa áinia nu “náñkamsar enentáimsarum wekasairap” titiá. ⁷⁻⁸ Tura amesha, Tituu, ashí tsawant péñker wekasatá. Nu natsa wi túramun júkiar nunak túrawarmi tusam, nu túrata. Tura anturtamna nu “nekaschapitia” tijn tusam, esetsam enentáimsam, Yus-Chicham tana nu inuiatrusmek jintintiata. Nú túrakmiñkia, Yus-Chichaman nakitiana nu shuar “Tituu náñkamas chichaawai” titiaj tukamá, natsaamak tujintramkattawai.

⁹ Takarin ainia nu, ni takartairin umirkarat tusam jintintrarta. “Shiir enentáimsarum, yajauch áimtsuk shiir umirkatarum” titiá. ¹⁰ “Kasamkairap, tura anañkawairap. Iis, péñker túrakrumka, takarniuiatrum, shiir tura asarum ii Uwemtikramin Yusrj chichamen shíiraiti, tu enentáimtikrattarme” titiá.

¹¹ Yus in waitnentrama asa ashí áentstin uwemtikramprataj tusa wakerutmaji. ¹² Kame Yus waitnentrama asamtai, tunáa ana nu iniaisatniuitji, nu nékaji. Tura jü nuñkanmayá yajauch ana nu wakerukchatniuitji. Tura antsu jü nuñkanam pujayatrik esetsar enentáimsar anañma wekatsuk tuke tsawant Yus anear wekasatniuitji. ¹³ Túrar ii Yusrj Jesukristu, uwemtikramajnia nu, imiá shiir iwiarnar tatí tusar nákastiniaitji. ¹⁴ Jesukristuka in jarutramkamiaji, ii tunaarjnia uwemtikrampratajsa. Tura, Winia ajaras tuke enentáijiai péñker túrawarat tusa, ii tunaarjin japirtampramijai.

¹⁵ Tituu, anaikiamu asam arantutsuk nu jintintrata. Yajauch ana nuna túrawarajin tusam chicharkarta. Péñkeran túruinia nu ikiakárta. Tura yajauch chichartukarajin tusam tuke péñker wekasata.

3

Yus-shuarti túratin

¹ Titíu, shuar enentáimtikrarta. “Ashí akupin ainia nusha tura chikich uunt akupena nusha antukrum umirkatarum” titiá. “Pénkeran túratin ana nuna páchitsuk túrattajai” tíiniaitrume” titiá. ² “Tsanumprairap, kajernaikairap, antsu shiir enentáimtunaistarum” titiá. Nankaamantu enentáimtumatsuk ashí shuar pé_nker awajsatarum tusam tu jintintrarta. ³ Warí, iisha núnisrik Yus-shuar ajatsuk ná_nkamsar wekaimji, Yuska umirtsuk. Tura íwianch emetamu pempée wekaimji. Tura ii ayashí wakeramu tuke túriniuyaji. Tunaasha túriniuyaji. Chíkich atankittsar wakeriniuyaji. Chíkich shuar kajerkar tura nuamtaksha kajernainiuyaji. ⁴ Tú_rasha Yus in uwemtikkiartin ana nu, anenkratin asa, ni anenkrattairin ashí áentsun iniaktus in uwentikrampramiai. ⁵ Yus in waitnentrama asa, iikia jú_kesha pé_nker túrachma a_nn uwentikrampramiai. ¿Itiurak uwentikrampramiai? Ii tunaarin asakátrampramiai, nijiaaktinia áintsan. Tura Yusa Wakanj pujurtamkurin, ii iwiaakmarin yamarman amasmaji. ⁶ Jesukrístu jakamujai Yus in emeenturmatsuk ni Wakanin suramsamiai. ⁷ In anenma asa nuna túramiayi. Nu_nkia iisha yamaram awajsamu asar tuke iwiaaku átin, ti wakerimiai nu íniuiiti. ⁸ Nuka ti nekasaiti. Tuma asantai Yúsan umirkarmia nu, pé_nker túratniun tuke wakerukarat tusam tuke jintinki wetá. Wi tímiajna nu, pé_nker asantai, ashí aents nuna nekaatniun atsumainiawai. ⁹ Shuar netse áujmatainiakui ameja pachisaip. Tura “aya winia úuntruk pé_nker áiniawai” tu chichasaip. Tura Israer-shuara akupkamurj ititurkit tusa shuar ti áujmatainiakui nusha pachisaip. Ántraiti nuka. Pé_nker wekasatniun yayatsui.

¹⁰ Shuar tsanumprur yajauch enentáimtunaimtikiana nu chicharkata. Ántachku_nkia ataksha chicharkata. Tura penké tujinkiamka j_iiki akupkata. ¹¹ Nujai juna nekaamniaitme: nuna tura asa awajiruiti. Tura ni tunaarini_n jakattui.

Papru wakerana nu

¹² Wisha Artemasan akatran akuptukchatjameash. Nin akupeachkunka Tikikiun akuptuktatjame. Nii jeantai amesha wari winitritia Nekapuris péprunam. Ju_i Nekapurisnum yumí nantu asantai seturan pujuttajai. ¹³ Senas, chichaman ti unuimiaru pujana nu, amikiur Apurusj_ai jeantai, nii atsumtsuk shiir weartí tusam, ame túratin jeamna nu ya_nta. ¹⁴ Iiní Yus-shuar ainia nusha pé_nker túratniun tura atsumainia nunasha ya_nntinian nekaawartí. Ántar pujusar_an tusan nuna tajai.

¹⁵ Ashí wiji_ai pujuinia nu amikmaatmainiawai. Tura ii amikrj Yus-shuar ainia nu amikmaatruata. Atumniasha Yus shiir yainmakat tusan wakerajrume. Nuke atí.

Papru JIRIMIÚNKAN papí áatramu

Papru Jirimiúŋkan papin áatramiania nu

¹ Wi Papru ju papin áaran akuptajme ámin, Jirimiunká. Ii yachi Timi-utéusha juna akupturmawai. Wi Jesukrístu takaru asan sepunam pujajai. Ame iijjai tsaniŋkia takáa asakmin ju papin akuptajme. ² Núnisan ame jeemiin Yus-shuar irunainia nunasha tura ii umaí Apiancha tura Arkipiuncha iijjai ti kakaram takasu asamtai ju papin akuptajrume. ³ Yus ii Apari tura ii Uuntrí Jesukrístu shiir enentáimturma ásar yainmakarti imiatkinchanum tuke shiir pujustinian.

Jirimiúŋ penker Yus-shuar ámiayi

⁴⁻⁵ Ame Uunt Jesus shiir enentáimtakum ashí Yus-shuar ainia nusha aneamun antukjai. Nuna antukan ámin ti shiir enentáimtakun Yúsan áujeakun yúmiŋkiajai. ⁶ Áujeakun chíkich shuarsha ámijjai métek Yúsan nekas enentáimtuiniak ashí penker ana nuna ti paant nekaawarat tusan seajai. Ashí penker ana nuka Jesukrístu shiir awajsamujai takakji. ⁷ Wisha ame anenkratmajai ti shiir enentáimtakun waraajai. Yatsurú, ámijjai ashí Yus-shuarsha shiir enentáimiainiawai.

Papru Unisemun waitnentratniun Jirimiúŋkan seamiani nu

⁸ Nu asamtai kakaram tátsujme. Kame wakeraknaka Kristu akatramu asan “Ju túrata” tímíniatijame. ⁹ Antsu aneakun aya júnisan tájame. Wi Papru úuntach asan tura Krístun takarkun sepunam pujakun ¹⁰ Unisemu waitnentrati tusan seajme. Niisha wi ujakmajai Yus-shuar ajasu asa winia uchirua áintsanċete. Sepunam pujayatan ni aparíya áintsanak ajasjai.

¹¹ Nuikkia Unisemu ántrauyi antsu yamaikia aminiisha winiisha yáimniuiti. ¹² Ataksha awantajme. Wi ti penker aneamu asamtai penker itiaata. ¹³ Wi Yus-Chichaman étserkun sepunam pujajai. Túmakun ame yajá pujakun yáintkiatin tujintiakmin nii antsu wijjai pujus yáintkiat tusan wakerimjai. ¹⁴ Túrasha ámin ujatsuk túrachmin enentáimpramjai. Kame ame wakerakum útsukchamujai “pujusti” tákumniŋkia maak. ¹⁵ Júnissha enentáimpramniaiti. Unisemu ishichik tsawant menċakamai tura yamaikia waketki ámijjai tuke pujus-tatui. ¹⁶ Kame yamaikia emetachma antsu ame aneamu yátsumeá áinis átatui. Nuka ti penkerchakait. Wisha nin ti aneajai. Tura yainmakmin asamtai tura Krístunam ame yatsum ajasu asamtai winia iniankattsam aneashtapash.

¹⁷ Wisha ti penker amikrumchakaitiaj. Tuma asam winia itiaarua nútksam shiir awayáta. ¹⁸ Yajauch awajtamkaitkiuŋkia tura ámijjai tumashitkiuisha wi akiktatjai. ¹⁹ Wi Papru nekas winia uwejrujai juna áaran ti nekas akiktatjame tájame. Túrasha winia tumashitmena nuna páchittsujme. Kame wi ujakam Yus-shuar ajaschamkum. ²⁰ Wátsek, yatsurú, amesha Yus-shuar asam wi seajme jú túrutata. Kristu enentáimtakum shiir enentáimtikrurta.

²¹ Ti penker uminiaitme nuna nékakun júnisan áatjame. Tura wi seajmena nuna nankaamas túrattamna nuna nékajai. ²² Ayu. Átum Yus áujturkurmin Yus winia tsankatrúktatui atumiin iiraitniun. Tuma asantai wi nuj jean pujustin iwiarturata.

Amikmaamiania nu

²³ Épaprassha niisha Jesukristunu étseluk sepunam wiji*ai* pujus amikmaatmarme. ²⁴ Núnisan Márkussha Aristárkusha Témassha tura Rúkassha Yus-Chichaman etserkatniun yáintiainia nusha amikmaatmainiawai.

²⁵ Ii Uuntri Jesukristu atumniasha ti shiir yainmakarti.

Nuke atí.

ISRAER-SHUARAN papí akuptukma

Yus ni Uchiríjaj ni chichamen ujatmakji

¹ Yáunchuka Yúsnan etserniujaj chichas Yus ni enentáimmian ii úuntrin ujakmiayi. Tura untsurí nunkanmasha tura untsurí uwitíncha niisháa niisháa chichas ujakmiayi. ² Antsu ju amúamu tsawantáikia ni Uchirí Jesukrístujajin ashí Niiniu ana nuna ujatmakji. Yus Niijjaj ashí írúnna nuna najana asa mash Nin súsaiti. ³ Níyaiti Yúsán imiá métek nakumeana nu. Tura Níyaiti Yus nankaamas shiira nuna paant awajeana nu. Niisha aya ni chichamejaj kakarma nujaj ashí írúnna nuna wáiniuk emeta pujurui. Tura ii tunaarin nijiatramak akupin pujutainium, Yusa untsuurini, pujusmiayi.

Nayaimpinmaya suntarjaj Kristu nankaamantuiti

⁴ Yusa Uchirí nayaimpinmaya suntarjaj imiá nankaamantu awajnasuiti. Tura ti nankaamantu asamtai Yus nayaimpinmaya suntar nankaamas Nin ti shiir awajtawai. ⁵ Wátsek, nayaimpinmaya suntaran chikichkinkesha juna tútsuk Krístun tímiayi:

“Ame winia Uchiruitme. Túmaitkiui yamáikia winia kakarmarun átakeajme.”

Tura núnisan tímiayi:

“Wi ni aparí átatjaj, tura Nii winia uchir átatui.”

⁶ Tura jú nunkanam ni Iwíajrin akupeak tímiayi:

“Ashí Yusa suntarjaj tikishmatrarti.”

⁷ Nayaimpinmaya suntarnan júnis chicharui:

“Nayaimpinmaya suntarin takartursarat tusa nasea áintsan awajsaiti. Ni suntarin chárpia áinis akupeawai.”

⁸ Antsu ni Uchiríniun tímiayi:

“Ame, Yusá, tuke akupniuitme. Ame akuptairmesha aya péñkeraiti.

⁹ Péñkera nu anenaitme, tura yajauchia nu muíjnuiuitme. Tuma asamtai ashí shuar shiir warartamu asamtai Yus, ame Yúsrum, ashí akupniujaj nankaamas uunt awajtamsaiti.”

¹⁰ Nu arantcha tawai:

“Uuntá, yámankamtaik Ame ju nunka najanamiame. Túram ame uwejmjjaj nayaimpisha najanaitme. ¹¹ Nusha mai amuukarmataisha Ame tuke pujuttame. Tarachjaj métek mamurartatui. ¹² Tura ipijram ikiustatme. Pushiya áintsam yapajjattame. Túrasha Ámeká núnismek átatme. Játsuk tuke pujuttame.”

¹³ Ataksha tímiayi:

“Akupin pujutainium, winia untsuuruini, pujusam nákarsatá. Ame nemasrumin nupetkan Ámin umirtamkarti tusan amastatjaj.”

Núnisan nayaimpinmaya suntaran penké tíchamiayi. ¹⁴ Antsu Yusa suntarjaj wakan áiniak ashí shuar uwemprartatna nuna yáinkiarat tusar Yus akupkamu áiniawai.

2

Anearta. Uwempratin Chicham nakitrashtiniaiti.

¹ Nuikia Kristu ti uunt asamtai ashí Niiniu antukajnia nujaj kanakchatin ti enentáimtustiniaitji. ² Yaunchu nayaimpinmaya suntar Muisaisan súsarmia nú akupkamu nekas uminkiatniuyayi. Shuar umitsuk tunaan túramtai ti kakaram asutniáwarmiayi. ³ Antsu ii Uuntri Krístuka Uwempratin Chichaman emka itiamiayi. Tura imiá nekas tuíniak Nin anturkaru in ujatmakarmaji. Tuma asamtai Uwempratin Chicham nakitiakrikia nuna nankaamas uwemtsuk asutniáttaji. ⁴ Kame nu arantcha, Uwempratin Chicham ujatmainiakrin imiá nekas tuíniawai tusa aents túrachminian kakarman Yus iniakmasmiayi. Núnisan ni Shiir Wakani ni wakerana núnisan niisháa niisháa kakermajaj takamti kewai. Nujaj Yus-Chichama nu paant nekanamniaiti.

Jesukrístu aents ajasmiania nu

⁵ Ayu. Nuik áujmatkur “jú nunka amuukattawai” taji. Tura yamaram nunkanam nayaimpinmaya suntar akupkachartatui. ⁶ Antsu ii akupkat-jajnia nu, Yus-Papinium áarmaiti:

“¿Shuarti warimpiaitaj ame imiá enentáimtitniusha? Kame, ¿shuar warí asamtai pujursataj tamea? ⁷ Ishichik tsawant nayaimpinmaya suntarjaj péejchach awajsamiame. Túram ti shiir nankaamas uunt awajsattame. Ame najanamun ashí akupkati tusam tsankatkattame. ⁸ Ashí nin umirkarti tusam susattame.” Tu áarmaiti.

Yus “ashí nin umirkarti” takui nin umirkashtinkia atsawai. Túrasha yamaikia ashí umirainiaka wáintsuji. ⁹ Tura wáinjinia nu Krístuiti. Niisha aents ajas ishichik tsawant nayaimpinmaya suntarjaj péejchach ajasmiai. Yus ni shuarin ti aneak jarukarti tusa wakerimiayi. Tura ni wáitias jakamujaj yamaikia ti shiir nankaamas Uunt awajsamuiti.

¹⁰ Ashí írunga nu Yus najanamun ásar ni wakeramun umiktin ainiawai. Tura ashí ni uchirjsha ni shírmariin pachiiinkiarat tusa wakerawai. Tuma asa Yuska Jesukrístun, nu shuaran Uwemtiknia nuna, ni waitsmujaj nekas Uwemtikkiartin awajsamiayi. ¹¹ Yusna atí tusa shiir awajsamuncha tura Kristu nin shiir awajea nunasha Yuska mai metek ni Aparínti. Nu asamtai Yusa Uchirj nu shuaran “yatsur” títinian natsantatsui. ¹² Yus-Papinium núnisan tawai:

“Ame náarmin winia yatsurun ujakartatjai. Ashí iruntramunam kantampruattajme.”

¹³ Ataksha ni shuarijjaj métek enentáimtamun tawai:

“Yúsan ti shiir enentáimtustatjai.”

Tura ataksha:

“Yus surusmia nú uchirjaj Yúsan umirkun pujajaj” tawai.

¹⁴ Tura nu uchi aents ásarmatai núnisan Jesussha aents ajasmiai. Tura aents ajas jaka, iwianchin, jatai nérenniurin, ashí emesramiayi. ¹⁵ Tura ti untsurj shuaran uwemtikrarmiayi. Nu shuar yaunchu jákatniun ashamainiak tuke wáitin ármiai. Antsu ni jakamujaj yamá ankant áiniawai. ¹⁶ Maa, imiá nekasaiti, nayaimpinmaya sunteran yáintaj tusa táchamiayi. Antsu ashí Apraám weean, ashí Yus-shuar ainia nuna yáintajtsa támiayi. ¹⁷ Túratin asa penké métek ni yachía áinis ajasmiai. Nujaj in tuke waitnentrampnamniaitji. Tuma asa Yúsnan pujurniu uuntri ajas Yúsan tuke pénger chichartamsamniaitji. Núnisan murikiun maa Yus súsatniua áintsan ni jakamujaj ashí shuara tunaarín tsankurniuiti.

18 Tura imia niŋki waitsa asa tura íwianch nekapsamu asa yamaikia iisha wáitiakrincha tura íwianch nekapramkurnisha yainmakminiaitji.

3

Jesus Muisaisjaisha nankaamantuuti

1 Tuma asamtai, péŋker yatsuru, atumniasha Niiniu atí tusa Yus achirmakuitrume. Tuma asarum Kristu Jesus péŋker enentáimtustarum. Niisha Yus nekas Akatramuyayi. Tura ashí Yus-shuar aजारua nujají Yúsnaŋ pujurniu uuntriŋa núnisaiti. 2 Nu atí tusa Yus anaikiamiayi. Túramtai Kristu nuna ti péŋker takasuuti. Núnisaŋ Muisais ashí Yusa aentsriŋ, Israer-shuar armia nuna ti shiir wainkiamiayi. 3 Túrasha Muisaisjají nankaamas Kristu ti shiir awajnasuuti. Jeajají nankaamas jea jeamniuka nekas péŋkerchakait. Núnisaŋ Kristu Muisaisjají nankaamas péŋkeraiti. 4 Kame ashí jeaŋ shuar jeamtsuk. Tura Yus ashí írúnna nuna najanaiti. 5 Wats. Muisais Israer-shuaran wáiniuk Yusa Jeen takastinia áintsan péŋker takarniuyayi. Tura ni takaak ukunam Yus títiatna nuna etserkatniuyayi. 6 Túrasha Kristu Yusa Jeen takarniuchu asa antsu Yusa Uchiriŋ asa nuŋí ashí akupeawai. Nu jeasha iitji. Tura tuke iniaitsuk kakaram aजार Yus suramsattaj nu wararsar nákastiniaitji.

Yusa shuari shiir pujustin

7 Nu asamtai, Yusa Shiir Wakanj Yus-Papinium tawai: “Yamaikia, Yus tana nu ántakrumka 8 nakittsuk shiir anturkatarum. Israer-shuar yaunchu aents atsamunam wekainiak Yus taman nakitrar Yúsna nekapsar akajkarmiaayi. 9 Túramtai Yus tímiayi “Nuŋí atumí uuntriŋ nekapruser akajtukarmiaayi. Kuarenta (40) uwitin wi kakaram túramun ísarsha nakitrurarmiaayi. 10 Tuma ásmatai nu shuaran kajerkan tiarmajai “Nu shuar ni enentáin tuke awajiniawai. Tura Wi taman umirkatniun nakitiainiawai” tímiyajai. 11 Tura kajerkan nekas tákun “Wijjají shiir pujustinian penké tsanŋkatkachartatjai” tímiyajai” tímiayi Yús.”

Tu áarmaiti.

12 Anearta, yatsuru. Yajauch enentáimsarum tuke iwiaaku Yus enentáimtutsuk kanakiirap. 13 Kame kashinkia tunaajají anaŋnam enentáimin Yúsna nakitrashtapash. Tuma asamtai yamaik tura ashí tsawant ikiakánairatarum. 14 Yámankamtaik Kristu shiir enentáimtusmaj núnisrik tuke iniaitsuk émetekrikia Krístujají shiir tsanŋkiar pujustatji. 15 Nu asamtai Yus-Papí tawai:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum aJarap.”

16 Muisais Ejiptu nunŋanmaja jiiŋkia nú shuar Yusa chichamen anturkariat nakitrarmiaayi. 17 Tura umiiniachkui kuarenta uwi kajerarmiaayi. Tunaan túrawaru ásar untsurí shuar aents atsamunam kajinŋkarmiaayi. 18 Kame umirkacharunka Yus “Wijjají shiir pujustinian penké tsanŋkatkachartatjai” tímiayi. 19 Iis, Yúsna enentáimtachu ásar Niijjají shiir pujustinnium wayatniun tujinŋkarmiaayi.

4

1 Nu asamtai, ii wayatin tsanŋkatkamu áyatar Yusjají shiir pujustinnium páchitkiachu aŋj tusar aneartiniaitji. 2 Yaunchu nu shuaran ujakarmia núnisaŋ incha Uwempratín Chichaman ujatmakuitji. Nu shuar Yúsna

enentáimtutsuk antukaru ásarmatai nu chicham yáincharmiayi. ³ Antsu iikia ni chichame enentáimta asar Yusjaj shiir pujustinnium nekas wayaji. Tura chikichan Yus tímiayi:

“Nu asamtai kajerkan nekas takun “Wijjaj shiir pujustinian penké tsan̄katchartatjai” tímiajai” tímiayi. Kame Yus jú nun̄kan najana umik nuyá shiir pujus ayampramiayi. ⁴ Yus-Chichamnum ayampramun júnis tawai.

“Yus sais tsawant takakmas nuyá tsawantaj ayampramiayi.”

⁵ Tura ataksha tawai:

“Wijjaj shiir pujustinnium wayá ayamprashtatui.”

⁶ Shuar nūj wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiayi. ⁷ Nu asamtai ataksha Yus wayatin tsawantan áanturmaidji. Nusha yamá tsawantaiti. Wats, Israer-shuar ni nun̄ké Yus susamunam wayáwarmiayi. Tura nuna ukunam Uunt Tawit timiajaj Yus ni chichamen ujatmaji:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap” tímiayi.

⁸ Kame ni kapitiántri Jusué Israer-shuaran ni nun̄keen awayá ayamtikraitkiuin̄kia Yus ukunam ataksha tsawantan áanturmachajaji.

⁹ Nujaj páantaiti, ashí Yus-shuar Yusjaj shiir pujusar ayampratin tuke awai. ¹⁰ Yusjaj ayampra nu, ni kakarmarjijaj takastinian ayampraiti Yus ni takatríjjaj ayampramia núnisan̄. ¹¹ Nu asamtai iisha Yusjaj shiir pujustinnium pachiinkichajj tusar Yus shiir enentáimtusar kakaram ajastiniaitji. Israer-shuar yaunchu Yus taman nakitrarua núnis ajaschatniuitji.

¹² Yusa chichame iwiaaku chichamaiti, imiá kakarmaiti. Puniá mai érea núniaitai. Tuma asa shuara enentáin̄ in̄it wayá ashí ni enentáimmian tura wakeramur̄in̄ ti paant awajtawai. ¹³ Yus najanamuka penké Nin umprukchamniaitai. Ashí írunna nu Yus íimmianum misúa áintsan̄ paant áiniawai. Tura ii túramu ashí paant ujakartatji.

Jesus nekas Yúsnan pujurniu úntrinti

¹⁴ Jesus Yusa Uchir̄i nekas Yúsnan pujurniu uuntrī ajas Yusaj wayá iiniun chichartamji. Nu asamtai iniaitsuk tuke nekas enentáimtustiniaitji.

¹⁵ Niisha iijjaj métek ashí tunaanum nekapsamuiti. Túrasha tunaan túrachmiayi. Tuma asa ii tujintiaj nuna paant nékak ii itiurchatr̄in̄ waitnentrāmniuitji. Tura Yúsnan pujurniu uuntrī asamtai ¹⁶ Yús-akuptainium shiir enentáijjaj sapijmiatsuk jeamniaitji. Tura Yus in anenma asa waitnentrāmak itiurchat pujajnia nūj yainmaktatji.

5

¹ Tura Yúsnan pujurniu úntr̄ikia shuar anaikiamuiti tura ni takatr̄i jím̄iaraiti. Yusaj shuárnan chicharsatniuiti. Nuyasha Yus súniamun súsatniuiti tura núnisan̄ naman̄ken maa Yúsán súsatniuiti shuara tunaar̄in̄ asakátratniun. ² Tura Yúsnan pujurniu uuntrī niisha shuar asa ni tujintiamun nékak shuar nékachuncha tura waak yujainia nunasha waitnentrāmniaitai. ³ Tura niisha tujintia asa ni tunaar̄in̄cha ch̄ikichn̄ajaj métek tsan̄kurnarat naman̄ken maa Yúsán súsatniuiti.

4 Shuar ni enentájjiañkia Yúsnan pujurniu uuntri ajaschamniaiti. Antsu Yus nu shuaran anaikiatniuiti. Núnisan Arunkan anaikiamiayi. 5 Núniskete Kristujai. Niisha ni enentájjiañ Yúsnan pujurniu uuntri ajaschamiayi. Antsu Yus Nin anaik nujai shiir awajsamiayi. Tura tímiayi: “Ame winia Uchiruitme. Túmaitkui yamaikia winia kakarmarun átakeajme.”

6 Tura ataksha Yus-Papinium júnis tawai:

“Mirkisetékka Yúsnan pujurin amia núnismek Amesha tuke Yúsnan pujurin átatme.”

7 Kristu jú nuñkanam pujak kakantar útuk Yúsna ti seamiayi. Nin jákatniunmayá uwentikramnia asamtai seamiayi. Tura Yusa wakera-murñ tuke enentájjiañ enentáimtakui Yus anturak ti yáñmiayi. 8 Nujai Kristu Yusa Uchirñtiat ni wáitsatniujai umirkatniun unuimiarmiayi. 9 Nujai ti nekas Uwentikin ajasmiayi. Tura shuar umirainia nuna tuke uwem ataksha Yus-Papinium júnis tawai:

“Mirkisetékka Yúsantikrarminiaiti. 10 Túramtai Yus Nin Yúsna pujurniu uuntri Mirkisetékjai métek awajsamiayi.

Anearta. Yusjai kanakchatniuiti.

11 Ju ti nukap áujmatsatin awai. Túrasha ántichu asakrumin mashi ujakchamniaitjiarme. 12 Átumka yaunchu mash nekaamaintrume. Túmaitiatrum ataksha yaitiás Yúsna jintinruat tusarum atsumarme. Warí, kuirchia núniniaitrume. Kátsuram yútsuk muntsu muntsúatniuitrume. 13 Kuírchikia Uwempratin Chichaman áujenak péñker unuimiainiatsui. Tiñkiamnumiá ásar tujintiainiawai. 14 Apatuk kátsurman aya uunt yuámniaiti. Uunt ainia nuka péñkernasha tura yajauchincha apatkar paant nékainiawai.

6

1 Uunt ajastai. Krístunu ana nuyá aya yúpichuchia nuke enentáimtutsk nu arantcha unuimiartai. Kame emka unuimiartinia nu ju ániawai: shuar ni tunaarñ jákatniunam júana nuna kúntuts enentáimtur Yúsna shiir enentáimtustincha, 2 imiantinnium nekaatniuswai:

“Mirkisetékka Yúsnanha, Yus-shuar yainmanum uweje awantsatniusha, jakamunmayá nantaktincha, tura sumamtikiatin tsawanta nu nekaatniusha. 3 Tura Yus yáinmakrin nuna nankaamas nekaattaji.

4 Shuar Yusna nuna nekaañka tura Yus susamun takakkunka tura Yusa Shiir Wakaní kakarmarñ nekapsaitkiunka 5 tura Yusa chichamencha péñkeraiti nekaañka tura Yusa kakarmari ukunam nunka yamarmanum takastatna nuna yamá nekapeakka, 6 nu shuar nuna nakitiak kanakniaka atak ni tunaarñ enentáimtak ikiuktinian wakerachuk tujinkiattawai. Warí, ní enentájjiañ Yusa Uchirñ krúsnum máiniaiti túrak ashí ímiainiañ natsanmain awajeawai. 7 Nu shuar yajauch nunka ántsañ ániawai. Yumi yútakui péñker nunka arakan péñker tsapatmakka arakmaun yayawai. Túramtai Yus shiir enentáimiui. 8 Antsu janí nupan tsapatmakka nu nunka yajauchiiti. Yus áseak emesattawai.

Yus tsankatramkattajnia nu enentáimtakur kakaram ajaji

9 Aneamu yatsurú, tu chicharkursha, nú shuarchaitrum nu nékaji. Antsu uwempra asarum nú péñker túrattarme. 10 Yus ti péñker asa átum

takasmancha tura ni aneakrum Yus-shuar yainmancha kajinmatkishtatui. Tura yamaisha tuke túrarme. ¹¹ Tura nuik túrarmena núnisrumek tuke iniaitsuk kakaram takasrum ashí Yus tsan̄katramkatta nu wáinkiatarme. Núnisan atí tusar wakeraji. ¹² Nakimtsuk kakaram ajastarum. Niinia nuna Yus ni shuarin susattawai. Tura shuar Yúsan enentáimtak shiir enentáijjai nákakka nuna wainkiattawai. Tu takastarum tusar wakeraji.

¹³⁻¹⁴ Yus yaunchu Apraámjai chichaak “Ti nekas shiir awajsattajme tura ti nukap pampamtikrattajme” tímiayi. Nuna taku imiá nekas tajai tusa tura chíkich Niiijai nan̄kaamas uunt atsakui imia Niñki pachimias tumammiayi. ¹⁵ Tutai Apraám yáitmataik nákas Yus timia nuna wáinkiamiayi. ¹⁶ Shuar “nekas tajai Yus írui” tákun̄ka chíkich niiijai nan̄kaamas úntan páchiawai. Tura tu chichasmatainkia nuyán̄ka imiá nekas tana nu nekaamniati. ¹⁷ Tuma asamtai Yuska “ti nekasan yapájitsuk túrattajai” tusa imia Niñki pachimias tumammiayi. Nujai ni tsan̄katkamun júkiartatna nu shuar Yus ti nekas umiktatna nuna nékainiawai. ¹⁸ Yus pen̄ké wáitruachmin asa áyatik ni tamajai nekasaiti. Nuna arant nuikia imia Niñki pachimias ti íkiakátmaji in. Nujai iisha uwempratai tusar Niini weamkatikia tsan̄katramkattajnia nu ti shiir enentáimsar wáinkiatin nákaji. ¹⁹ Nu enentáimsar kakaram ajaji. Yusaiya in umuchtiakamnia pen̄ké atsawai. Yusai áchitkia asakrin ti kakaram emettamji. ²⁰ Jesussha emka Yusai wayá mash iwiarturmaji. Tura Mirkiseték amia núnisan Niisha yamá tuke amuukashtinian Yúsnan pujurniu uuntri ajasuiti.

7

Mirkiseték amia núnisan Jesussha Yúsnan pujurniu uuntri ajasuiti

¹ Nu Mirkisetéksha Sarem nun̄kanam akupniuyayi. Tura ashí nan̄kamas kakaram Yúsnan pujurniuyayi. Apraám chíkich akupniun mesetjai awakak támatai Mirkiseték jiintiuki in̄kiun̄ ti shiir awájsámiayi. ² Túramtai Apraám nupetmakar kuit jukimiun tias (10) akantuk susamiayi. Mirkisetéka naar̄i tana júka “ti pen̄ker uunt akupin” tawai. Tura Saremka “ti shiir imiatkincha” tawai. Tura Mirkiseték Sarema akupniur̄i asa “ti shiir imiatkinchanum akupin” tawai. ³ Nukurjsha aparjsha Yus-Chichamnum atsawai. Núnisan̄ ni uuntrijsa atsawai. Ni akiinia-mur̄incha ni jakamur̄incha ujaatsui. Tuma asamtai Yusa Uchir̄ia áintsan̄ tuke iniañnakchatniun Yúsnan pujurniu uuntri ajasuiti.

⁴ Mirkiseték timiá uuntauya nu enentáimprata. Ii uuntri Apraámsha nupetmakar kuit jukimiun tias akantuk susamiayi. ⁵ Tuma asamtai Apraám nan̄kaamas úntaiti. Muisais akupkamujai Riwi weeáka Yúsnan pujurin ániawai. Niisha ashí Israer-shuarjai métek Apraám weeá ániawai. Túmaitiat pen̄ké Israer-shuar ni warir̄in̄ tias akantuk Riwi shuaran suu ármiayi. Muisais tu akupkamiayi. ⁶ Túrasha Mirkiseték Riwi weeachunak Apraám tiásan akantuk nin susamiayi. Apraám Yus shiira nuna tsan̄katkamuitiat Mirkisetékan niiijai uunt asamtai susamiayi. Túram Mirkiseték Apraáman shiir awajsamiayi. ⁷ Imiá nekas Mirkiseték Apraáma nan̄kaamas páantin̄ asa Apraáman shiir awajsamiayi. ⁸ Israer-shuarti tias akankamun súajnia nú shuar aya aents ásar tuke pujuschamin ániawai. Antsu Mirkiseték jakamun Yus-Chicham pen̄ké ujaatsui. ⁹ Yamá Riwi weeá shuar kuit akankamun achiktin

áiniawai. Túrasha Apraám Mirkisetékan súakui Riwí weeá nujaj susa áiniawai. ¹⁰ Apraám weeá áiniak ni ayashíá áinis enentáimtusmin áiniawai.

¹¹ Muisais akupkamunam Riwí-shuarnumiá aya Arun weeá shuar Yúsnan pujurin ármiai. Niisha Muisais akupkamu timia nujaj métek penké shuarjaj takasarmiai. Tura Riwí-shuarnumiá Yúsnan pujurniu takatrijaj tunáa nekas asakárminiaitkiunkia Yúsnan pujurin yamarmak, Arun weeachu, anaikiashtin ainti. Túrasha Yus Jesusan, Mirkiseték amia áinis, Yúsnan pujurniun anaikiaiti. Nusha Arun weeachuiti. ¹² Tura Yúsnan pujurin yapajniámtai Muisais akupkamusha yapajniátniuiti. ¹³⁻¹⁴ Nu arantcha, ii Uuntrj Jesukrístu Riwí-shuarcha antsu Jutá-shuarauyayi. Tura Muisais akupkamujaj Jutá-shuarnumiá Yúsnan pujurin atsutniuiti. Antsu nuna takatrin penké túrashtiniuyi. Tuma asamtai nújajsha Muisais akupkamu yapajniátniuiti.

¹⁵ Nú páantcha awajsamniaiti. Wats, Yúsnan pujurin yamarma nuka Mirkisetékaj méteketete. ¹⁶ Niñkia Riwí shuar asa Yúsnan pujurin ajaschamiayi, antsu jákashtin asa nu kakarmajaj Yúsnan pujurin ajasmiai. ¹⁷ Tuma asamtai juna Yus Jesusan áujmatui:

“Mirkisetékka Yúsnan pujurin amia núnímek Amesha iniañnatsuk Yúsnan tuke pujurin átatme.”

¹⁸ Nujaj yaunchu akupkamu penkercha ajasmatai japirmaiti. ¹⁹ Muisais akupkamuka shuáran penker awajsachminiuyayi. Antsu Yus in ti shiir awajtamsattajnia nu nákaji. Nujaj Yusaj ti shiir jeeáitji.

²⁰ Nunasha Yus “nekas tajai” tusa Niñki pachiimias tumammiai. ²¹ Riwí-shuarnumiá Yúsnan pujurin Yusa naari pachitsuk anaikiamu ármiai. Antsu jú Yúsnan pujurniunka Yus imia Niñki pachiimias anaikiamiai. Tura Nin júnis timiayi:

“Uuntka imia Niñki pachiimias tiniu asa penké yapajáshtatui. Niisha “Mirkisetékka Yúsnan pujurin amia núnímek Amesha tuke Yúsnan pujurin átatme” timiayi.”

²² Tuma asamtai Jesuska nekas uwemtikrattajai tusa yaunchu amia nujaj nankaamas penker Chichaman iwiarturuiti. ²³ Yaunchu Yúsnan pujurin untsurj ármiai. Chíkich jakamtaí chíkich tuke takaarmiai. ²⁴ Antsu Jesus tuke jákashtin asa chikichan ikiurkishtatui. ²⁵ Tuma asa tuke iwiaaku pujak ni shuarin tuke Yúsna áujtusminiaiti. Tuma asa shuar Nin enentáimtusar Yusaj weankarun tuke uwemtikramniaiti.

²⁶ Tuma asa Jesus Yúsnan penker pujurin asa ii atsumajnia núkete niisha. Niisha tí shiir asa penké tunaarinchaiti. Ashí tunaariniunmayá kanakniuiti. Tura Yusaj métek Uunt ajasuiti. ²⁷ Niisha yaunchu Yúsnan pujurniu untrj armia núnikchaiti. Yaunchua nuka murikiun máawar ashí tsawant Yúsna suu ármiai. Nujaj emka ni tunaarin nuyá ashí shuara tunaarin asakátin ármiai. Tura Jesuska jákatniunam chikichkí surumak ashí shuara tunaarin asakátramiayi. ²⁸ Muisais akupkamuka penké shuarnak tuke penkercha aijn Yúsnan pujurniu úntrin anaikiaiti. Tura nu ukunmanka Yus, nekas niñki pachiimias, ni Uchirín, tuke penkera nuna, Yúsnan pujurniu úntrin anaikiaiti.

8

Nankaamas penker Chichaman Jesus takartamji

¹ Nekas juna tájame: Yúsnan pujurniu untrj Jesus in ti shiir yainma asa akupin pujutainium Yusa untsuurinj nayaimpiniam pujusuiti. ² Nekas

Yusa Jee nayaimpinma nu aents najanachma antsu Yus najanamuiti. Nui Jesus Yúsnan pujurui. ³ Ashí Yúsnan pujurniu uuntri ainia nu, shuar Yúsnan susamuncha tura naman maar Yus sútaincha Yúsan ashí súsatin ániawai. Núnisan Jesukristusha Yúsan súsatniuiti. ⁴ Juyá Yúsnan pujurin Muisais timia nuna Yúsan yamaisha susamin akui Jesus ju nunkanam pujakka Yúsnan pujurin áchainti. Antsu nayaimpiniam takaawai. ⁵ Yus yaunchu Muisaisan nayaimpiniam írúnna nuna iniaktus tímiayi “Ame wáinkiamna nujai métek ashí najanata.” Túramu asamtai ashí yaunchu Yúsnan pujurin Muisais najanamujai takainia nu aya nayaimpiniam ana nuna nakumkamujain takainiawai. ⁶ Antsu Jesus ti nekasa nujai nayaimpiniam takaawai. Muisais akupkamuka shuáran péñker awajsachminiati. Antsu Yus in ti péñker awajtamsattaji. Kame Yamaram Chichamnum Yus ashí túrutmattajnia nu Muisais akupkamunam ana nuna nankaamas ti péñker ániawai. Tuma asamtai nankaamas péñker Chichaman Jesus takartamji.

⁷ Kame Emka Chicham, Yus Muisaisjai yaunchu najanamia nu, nekas péñkeraitkiuinikia Yamaram Chichaman najanachajai. ⁸ Antsu péñkercha ániakui Israer-shuaran tímiayi:

“Uunt Yus tawai: “Tsawant jeamtai ashí Israer-shuarjai Yamaram Chichaman najanattajai. ⁹ Yaunchu ju shuara uuntri Ejiptunmayá yaruakmijai nui Emka Chichaman najanamjai. Tura Yamaram Chichaman najanattaj nu núnischa átatui. Emka nuna uminiachkui ajapan iniaisarmajai.” Núnis tawai Uunt Yus. ¹⁰ Tura nu arantcha tawai: “Tsawant jeamtai Israer-shuarjai Yamaram Chichaman najanattaj nuka júnis átatui. Wi akupeajna nuna enentain paant enentáimtikrartatjai. Nuyá ni Yusri ártatjai tura niisha Wíi shuar ártatui. ¹¹ Nuiisha Yúsan nekaat tusa jintinnaiyachartatui. Kame ni aisha ni yachisha kame ashí shuar, uchisha uuntcha, ashí nekarawartatui. ¹² Tura ashí ni tunaarincha tsankuraran ni yajauchirin atak penké enentáimtuschartatjai” tímiayi.” Tu áarmaiti.

¹³ Wats, Emka Chicham yajauch ajakui Yus Yamaram Chichaman najaneak pujurui. Tura yajauch ajasua nuka wárik ajapnattawai.

9

Yusa Jee nayaimpinmasha tura ju nunkanmasha

¹ Ayu. Yus shiir awajsatniuka Emka Chicham timia nujai métek túratniuyayi. Tura ju nunkanmayá Yusa Jee weriar Yúshiiir awajsatniuyayi. ² Nu Jeasha júnis tesakmauyayi. Nékatka Shiir Tesaamu tutainti. Nui asutin ekeemakar tsáapin awajtaisha tura misasha Yus iniaktusma tantajai pujuyayi. ³ Nuyá-tesaamuka Imiá Shiir Tesaamu tutainti. ⁴ Nui kunkuin ekeemataisha kurijjai kuerma tura Chícham Aarma Chumpitiaisha pujuyayi. Nusha ashí kurijjai kuérmauyayi. Tura init kurijjai najanamu ichinkian maná yurumak enkemniuyayi. Nuyá Yúsnan pujurniu uuntri Arunka ushukrutairi yaunchu tsapaak jankukmia nusha enkemniuyayi. Nuyá Yus najanamu Chícham Muisais kayanam aarmasha enkemniuyayi. ⁵ Nuna úkurin Kirupín, nayaimpinmayá sun-tara nu, kurijjai nakumkamu wajarmiayi. Nusha Yusa shíirmarin nakumkarmiayi. Tura ni nanapėjai shuara tunaarin ayamprutain nukúakuyayi. Nuna arantka yamá etserkatin atsumatsji.

6 Núnis aa asamtai Shiir Tesaamunam ashí Yúsnan pujurin tuke wáiniak Yúsnan takasarmiayi. 7 Tura Imiá Shiir Tesaamunmanka aya ni uuntrin wáiniauyayi. Tura niisha ashí uwitin aya chikichik tsawant wayamiayi. Wayak ni tunaarisha tura ashí shuara tunaari tsankurnarat tusa Yus súsatniu namanké numpen juu ámiayi. 8 Yusa Wakanj núnis atí tusa nuna mash iwiaramiayi. Tura asa juna paant awajturmaj. Jú nunkanmaya Yusa Jee pujakuí tura aya nuin Yus shiir awajsamniaitki-iuinkia nekas Imiá Shiira nuí Yus pujamunam wayatin tuke itiurchat ainti. 9 Nusha yamáí pujuiniaj nuna enentáimtikrampratniuitji. Shuar Yus shiir enentáimtikratniun namañken maa suñiaksha nu shuar ni tunaaríjaj tuke itit enentáimtumainiawai. 10 Warí, aya yurumatniusha umartincha nijartincha tura ashí núnisan túratniujaj aya pátatek asamtai enentáiniam ana nuna iwiarachmin áiniawai. Antsu Yus nú túratniunka yapajiatniuyayi. Tuma asamtai yapajniátsain túratin áiniawai.

11 Tura yamaikia Kristu táwiti tura Yúsnan pujurniu uuntri ajas Yamaram Chichamnum Yus ti penkeran túrutmatniua nuna pujurturmaji. Niisha ti shiir Yus Jea aents najanachmanum takaawai. Nu Jea ju nunkanmayanchuiti. 12 Tura Kristu Imiá Shiir Tesaamunam namañke numpéjaj wayachuiti antsu ni numpejaink' wayaiti. Tura aya chikichí wayá ii tunaarin asakturmar tuke uwentikrampramijai. 13 Nekas namañké numpesha tura áisamu yun kunmirisha tunáa shuarnum pátatek ukatkamu aya pátatek shiir awajsamniuyi. 14 Túrasa Kristu numpé ii tunaarin penké asakáruiti. Túramtai yamaikia tunáa jákatniunam júana nujaj itit enentáimtumatsuk nekas iwaaku Yus shiir umirkamniaitji. Kristu penké tunaarincha asa tuke jákashtin Wakanj kakarmaríjjaj jákatniunam Yusaj surumakmiayi.

15 Nu asamtai Jesukristu Yamaram Chichaman shiir takarniuiti. Yaunchu Chichamjaj tunáa nekas tsankurachma asamtai Kristu jaka nu tunaancha tsankurarmiayi. Nujaj ashí Yus-shuarti Yus achikma asar Yus tsankatramajnia nu wáinkiar tuke wararsattaji. 16-17 Shuar ni kuítrin akantrattak chichaman najanatniuiti. Tura jáatsain nu kuit akantrash-tiniaiti. Aya nii jakamtai nu chicham najanamum uminkiatniuiti. 18 Nu asamtai Emka Chicham Muisaisjaj najanamusha maamu numpé ukatramujaj akupkamuyayi. Nujajisha namán máatniuyayi. 19 Muisais nu akupkamun ashí shuáran ujakarmiayi. Nuyá ure kapaakujaj tura nupajajisha namañké numpé entsajaj pachimpramujaj ayak akupkamu papincha ashí shuarnasha ukatkarmiayi. 20 Tura tiarmiayi “Ju numpajaj “Chícham Yus akupturmarmena nu nekas umiktiniaiti” tawai.” 21 Nuyá nu numpajaj Yusa Jeecha ashí nuí takastin irunmia nunasha ukatkarmiayi. 22 Nu akupkamujaj penké ishichik numpajainchu shiir awajsamni-aiti. Túrasa numpajainchu tunáa penké asakárchamniaiti.

Kristu jakamujaj tunáa asakárminiaiti

23 Tuma asamtai Muisais najanamum nayaimpiniam ana nuna aya nakumkamu ásar namañké numpejaj shiir awajsamu ármiai. Antsu nayaimpiniam nekas írunna nu, nankaamas kakaram numpajaj shiir awajsatin áiniawai. 24 Kástuka yaunchu Yusa Jee aents najanamunam takastaj tusa wayachmiayi. Nuka nayaimpinmayan aya nakumkamuiti. Antsu nekas nayaimpiniam Yus pujamunam wayá asa in áujturmaj. 25 Yaunchu Yúsnan pujurniu uuntri ni numpejainchu ashí uwitin Imiá Shiir Tesaamunam wajin ármiai. Tura Kástuka untsurí

wayachuiti. ²⁶ Kame untsurí wayatniuitkiuin̄kia ni numpejain̄k' wayá asa yáman̄kamtaiknumiá untsurí jákaayi. Antsu yamaikia ju nuñka amúamunam Kristu chikichkí jákatniunam surumak tunaan ashí asakáruiti. ²⁷ Ashí shuar chikichkí jakar nuyá ni túramun Yusaj nekamatniun nantaktin áiniawai. ²⁸ Núnisan̄ Kristu chikichkí jákatniunam surumak shuara tunaar̄in asakáruiti. Tura atakka tunaan asakártinian wantinkiashtatui. Antsu ni tátin̄trin̄ nákaia nuna uwemtikkratsa wantinkiat-tawai.

10

¹ Muisais akupkamuka ukunam ti pen̄ker átatna núchaiti. Antsu nuna aya nakumeawai. Tuma asa ashí uwitin naman̄ maar Yus sútaijjaisha shuara tunaar̄in asakátrachminiaiti. ² Kame asakátraka shuar nekas shiir awajsamniaitkiuin̄kia Yus naman̄ maar súsatniun atsumachuk iniaisarāayi. Iis, mash tsan̄kuramuitkiun̄ka ni tunaar̄ijjai itit enentáimtumascharainti. Túrawar naman̄ maar Yus súsatniun iniaisarainti. ³ Antsu naman̄ken maar ashí uwitin tuke suñiak nujai ni tunaar̄in tuke enentáimtuiniawai. ⁴ Warí, naman̄ké numpejai ii tunaar̄j pen̄ké asakárchamniaiti.

⁵ Nu asamtai Kristu jú nuñkanam taa Yúsan chicharuk tímiayi: “Naman̄ maar súaisha pen̄ké nakitráme. Antsu ayash iwiam surusuitme. ⁶ Naman̄ áesamusha tura tunaan asakártin naman̄ susamusha wakeratsme. ⁷ Tuma asamtai “Yusrú, tímiajai. Winia áatrurra núnisnak ame wakeramurmin umiktajtsan táwitjai” tímiajai” tímiayi.

⁸ Emka, Muisais akupkamu ajn̄, naman̄ susamuncha, tunaan asakárat tusa naman̄ maar susamuncha, naman̄ áesamuncha Yus ashí nakitraititawai Kristu. ⁹ Nuyá “Yusrú, ame wakeramurmin umiktajtsan táwitjai” tawai. Nuna taku naman̄ maar sútain “Asakáiniaiti” tawai. Tura chikichan ikiuawai. ¹⁰ Jesukristu Yúsan umiruk jákatniun chikichkí surumakmatai Yus in tunaar̄incha shiir awajtamaitji.

¹¹ Tura Israer-shuarnumiá Yúsnan pujurin ashí tsawantaj nú naman̄nak máawar tunaan asakáchunak Yúsan ti suu áiniawai. ¹² Antsu Jesukristuka jákatniunam chikichkí surumak ashí shuara tunaar̄in asakárat atakka pen̄ké jákashtiniaiti. Nuna tura Yusa untsuurin̄j nekas akupin pujutainium pujusuiti. ¹³ Tura Yus ni nemasr̄in nupetak nin umirkarti tusa súsartatna nuna nákwai. ¹⁴ Chikichkí jakamujai ni shuar̄in tuke tunaar̄incha awajsaruiti. ¹⁵ Yusa Wakan̄jsha núnisan̄ tawai. Emka tímiayi:

¹⁶ “Yamaram Chichaman najanattaj nuka júnisan̄ átatui: Wi akupeaj nuna ni enentáin̄ paant enentáimtikrattajai.” ¹⁷ Nuyásha tawai: “Ni yajauch tunáa túramur̄in pen̄ké enentáimtuschatatai.”

¹⁸ Tuma asamtai, ii tunaar̄j tsan̄kuramu asamtai atak in jarutramkatin atsumatsji.

Yus tuke shiir enentáimtusar Yusaj jeartai

¹⁹ Tuma asamtai, yatsurú, Jesukristu numpejai pen̄ker awajsamu asar sapijmiatsuk shiir enentáijjai Imiá Shiira nuí, nekas Yus pujamunam wayamniaitji. ²⁰ Nuí wayatniuka Kristu jaka Yusa Jeen tesaamun júsatniua áintsan̄ ánturmamiaji. Yamaisha tura tuke wayamnia átatui. ²¹ Jesus Yúsnan pujurniu uuntri asa ashí Yus-shuartin

wáitmak pujurtamji. ²² Tuma asamtai, tuke enentáijijai Yus imiá nekas enentáimtusar Yusaj jeartai. Ii enentái Kristu numpejai nijjarma asamtai nekas enentáimtakur ii tunaarijjai itit enentáimtusaschatnuiitji. Tura ii ayashisha péñker entsajai imianniuitji. ²³ Yus tsan̄katramkattajnia nu shiir enentáimtamun iniaitsuk kakaram ajasar tuke emetatnuiitji. Yus tsan̄katramkaitji nuna umiktatui. ²⁴ Péñker anenain tura péñker túrin ajasartai tusar mai yainiaikiartiniaitji. ²⁵ Yusa Jeen Yus-shuarjai tuke iruntratin iniaisashtiniaitji. Chíkich iniainiakuisha iikia tuke iruntratnuiitji. Nuj irunkurkia ikiakánairtiniaitji. Tura Kristu tátin tsawantr̄j ishichik ajasu asamtai nú nukap túratnuiitji.

Anearta. Ti tsúumainti iwiaaku Yusa kakarmarijijai asutniátin.

²⁶ Túrasa shuar nekas chichaman nékayat wakeramurijijain̄ tunaanum wekaakka Kristu jakamun nakitia asamtai chíkich atsawai ni tunaar̄jn asakátratniun. ²⁷ Áyatic ashamak ti tsuumai sumamatin tsawantan nákasminiaiti. Nu tsawantaj Yus ni nemasr̄jn ti kajerak asutiak mash emesrattawai. ²⁸ Shuar Muisais akupkamun umikchamtai tura jímiar shuar menaintiusha etserkarmatai waitnentsuk máatniuyayi. ²⁹ Núnisaitkiuin̄kia shuar Yusa Uchir̄jn wishikiainiakka ni numpencha nakitiainiakka tura Yus nin anea nuna Wakan̄incha katsekainiakka nuna nan̄kaamas asutniáchartatuak. Warí, nii nakitiana nu numpajai Yamaram Chicham nekas umirkatin awajsamuyayi. Tura nújajisha nii ti péñker awajnastiniuyayi. ³⁰ Ii Uuntr̄j Yus júnis tímiayi “Wi asutiátnuiitjai. Wi yapajkiattajai.” Nuyásha tímiayi “Wíi shuara tunaar̄jn ti paant nekarattajai.” ³¹ Ti tsúumainti iwiaaku Yusa kakarmarijijai asutniátin.

³² Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajasrum ashí itiurchat katsuntramarme. ³³ Chíkichtirmeka katseknakmarme tura ashí íimiaiiniamunam yajauch awajnasmarme. Chikichcha nu shuarnum pachitkia asarum itit awajnasmarme. ³⁴ Atumsha sepunam pujuinia nusha waitnentramarme. Tura shiir warasrum kuítrumin atantramainiakuisha katsuntramarme. Nayaimpiniam tuke amuukashtin kuit pachiktin asarum túramarme. ³⁵ Tuma asarum yawetsuk Yus tuke enentáimtusrum kakaram ajastarum. Túrakrum nan̄kaamas akinkiattarme. ³⁶ Atumsha esetra enentáimsarum Yus wakera nu túrakrum Yus atumin amastinia nu wainkiattarme. ³⁷ Kame Yus-Chichamnum áarmaiti: “Tátinia nu ishichik ajasai. Wárik tátatui. ³⁸ Shuar Yúsan nekas enentáimtak péñker wekaak uwemprattawai. Tura iniaiyakuin̄kia nin wararsashtatjai.”

³⁹ Tura iikia iniaisar mesena nú shuarchaitji. Antsu Yus shiir enentáimtusar uwempraitji.

11

Yus nekas enentáimtustin

¹ Yus nekas enentáimtakur “nákajnia nuna, Yus nekas suramsattaji” taji. Tura wáinchaitiatar “nekas wainkiattaji” taji. ² Yaunchu ii uuntr̄j Yúsan nekas enentáimtuiniakui Yus “péñkeraitme” tiarmiayi.

³ Aya Yus enentáimtakur ju nékaji: Yus aya ni chichamejain̄ ashí nun̄kan najanamaiyi. Túramtai ashí wáiniainiaj nu wáinchataijijai najanamu áiniawai.

4 Apir Yúsan nekas enentáimtak Kaínjaj nankaamas péñkera nuna Yúsan susamiayi. Túramtai Yus “pénkeraitme” taku shiir yumínsamiayi. Tuma asamtai Apir jákaitiat tuke enentáimtikramji.

5 Enuksa Yúsan nekas enentáimtak iwiaaku nayaimpiniam junakmiayi. Yus jukimiu asamtai wáinkiacharmiayi. Tura Yus-Chichamnum aarma “Eruk júnatsuk Yúsan ti shiir enentáimtikniuyayi” tawai. 6 Tura Yus nekas enentáimtachkumka çitiurak Nii shiir enentáimtiksatam? Nekas enentáimjaj Yúsan weantuktaj tusam wakerakmekka, emka, Yus iwiaaku pujawai, tu enentáimpratniuitme. Nuyásha, Wi Yúsan eakuinkia Yuska winia yáintkiattawai, tu enentáimsatniuitme.

7 Yus, ‘amaarkatniun akupkattajai” tiniu asamtai, Nuaisha Yúsan nekas enentáimtak, amaarun wáinchaitiat, “túrunattawai” tímiayi. Túrak Yus timiajaj métek uunt kanun najana ni shuaríncha uwentikramiayi. Tura Yúsan nekas enentáimta asamtai Yus “pénkeraitme” tímiayi. Tura ni umirkamujaj chíkich shuar Yúsan enentáimtachun súmamtikiawarmiayi.

8 Tura Apraámsha Yúsan nekas enentáimtak Yus “núñkem ikiukim wetá” tutai shiir umikmiayi. Yus tuke nin súsatniua nú nunkanam wémiayi. Turasha ni nunken ikiuak ni jeatniun nékatsuk jiinkimiayi. 9 Yúsan shiir enentáimtak nú nunkanam Yus nin tsanatkamuítiat írara áinis pujusmiayi. Nuap jeanam pujuyayi. Núnisan ni uchirí Isaksha tura ni tiranquí Jakupsha nuñ tsanatkamuítiatan írara núnisar pujuarmiayi. 10 Kame Apraámka nayaimpinmayá ashirchamin péprunam pujustinian nákasmiayi. Yus nu pepru péñker iwiar jeamka asamtai umuchkiach-miniaiti.

11 Apraáma nuwé Sarasha Yúsan shiir enentáimta asa úuntach áyat ajaprukmiayi. Yus timia nuna umiktatui tau asa uchin takusmiayi.

12 Tura nujaj Apraám ti úuntchitiat ti pampanmiayi. Nii chikichkitiat ni pampanmarí ti untsurí ajasar yaajaj métek tura náikmijaj métek nekapmarchamnia ajasarmiayi.

13 Ashí nu shuar Yus tsanatkamun wáintsuk jákarmiayi. Túrasha Yúsan nekas enentáimtuiniak arantiá wáinkiar warasar shiir enentáimtiarmiayi. Túrawar “ju nunkanam nekas aja íraraitji” tiarmiayi. 14 Íraraitji” tu chichainiak chíkich nuñka eamun páant awajainiawai. 15 Niisha matsatu winíarmia nuñ atak waketkitniun wakeruiniakka páchitsuk waketkiaraayi. 16 Tura antsu niisha nuna nankaamas péñker nunkan nayaimpinmayá nuna enentáimtiarmiayi. Túmainiakui Yuska péprun iwiartur susa asa “wi ni Yusríntjai” títinian natsantatsui.

17 Ataksha Apraám Yúsan nekas enentáimtak “chikichik uchi amasmaj nu, namañkea áitkiasmek maam surusta” takui Apraám Isakan ni uchirín Yus susatniun penké suritkiachmiayi. 18 Kame Yus “Isakjaj ti pampanatme” tau asamtai 19 Apraám “máamtaisha Yus iniantkittawai” tu enentáimpramiayi. Tura Yus ukunam máatiun suritkiamtai Isakan máachiat nekas jákatniunmayá uwempran nantakniua áintsan wáinkiamiayi.

20 Isaksha Yúsan nekas enentáimtak ni uchirín Jakupnasha Esauncha ukunam ni túrunattana nuna ujakarmiayi. 21 Núnisan Jakup Yúsan nekas enentáimtak jatsuk ni tiranqín, Jusé uchirín, shiir túrunattana nuna ujakarmiayi. Tura ti uuntach asa máshtunkrín ushukruma Yúsan shiir awajsamiai. 22 Tura Jusesha jákatniurí ishichik ajatesmatai Yúsan nekas enentáimtak Yus ukunam Israer-shuaran Ejiptu nunkanmayá júkiartatna

nuna ujakarmiayi. Tura jíiniainiak ni ukunchin júkiar Yus tsan̄katkamu nun̄kanam iwiarsarat tusa akupkarmiayi.

²³ Muisaisa aparisha nukurisha Yúsan nekas enentáimtuiniak Muisais ti shírmach asamtai suntar máawarain̄ tusa akiiniamunmayā menaintiu nantu úukarmiayi. Tura uunt akupin akupkamun ashamkacharmiayi. ²⁴ Muisaissha Yúsan shiir enentáimtak uunt ajas Ejiptunmayā uunt akupniu nawantrí uchirí ajastinian nakitrarmiayi. ²⁵ Antsu Ejiptu nun̄kanam ishichkisha tunaan warartsuk Yusa shuarjijaī métek wáitsatniun nan̄kaamas wakerukmiayi. ²⁶ Nujaī Krístun yajauch awajsarmia núnisan̄ niisha wáitsatniuuui. Túrasha ashí Ejiptu nun̄kanam péñker irunmia nuna nan̄kaamas Yus nin ukunam tsan̄katkatta nuna shiir enentáimtusmiayi. ²⁷ Niisha Yúsan shiir enentáimtak uunt akupin kajeramu ain̄ ashamtsuk Ejiptu nun̄kanmayā jiinki wémiayi. Yúsan wáinchiat shiir enentáimtamujaí wainiua áinis kakaram ajas ashí katsuntramiai.

²⁸ Muisais Yúsan shiir enentáimtak yámankamtaik paskua namperan najaneak ashí Israer-shuaran numpajaī ni wáitirin̄ kuérat tusa akupkarmiayi. Nujaī Yus timia núnisan̄ nayaimpinmayā suntar nuna iis nu jeanam iwiairin̄ máatsuk nan̄kaikit tusa tímiayi.

²⁹ Israer-shuarsha Yúsan shiir enentáimtuinia ásar Kapaantin̄ Entsa nakaakamtaí ajapén ti pen̄ker kukarnum katiñkiarmiayi. Ejiptunmayā suntarsha núnisan̄ katiñtaī tukamá jakerarmiayi.

³⁰ Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun téntakarmataí aā tanish sánakmiayi. Nujaī ti yúpichuch nupetkarmiayi. ³¹ Raapsha nu péprunam pujak, Yúsan nekas enentáimtak tsanirmataí áyat Israera suntarin̄ mamikmak wekaan ti pen̄ker itiaá asa chíkich shuar Jerikiúnam matsatua nujaī jákachmiayi.

³² Nu arantcha Yúsan shiir enentáimtin̄ ti írunui. Jeteúnsha, Paraksha, Sañsun̄sha, Jiptísha, Tawitcha, Samuersha, Yúsnan etserniusha nu shuar ármiai. Mash ujaktinian jeatsjai. ³³ Niisha ashí Yúsan nekas enentáimtuinia ásar Yusa kakarmarin̄ niisháa niisháa iniaktusarmiayi. Nuna túruiniak chíkich chíkich nun̄kanmayā aentsun nupetkarmiayi, nuisha péñker akupkarmiayi, tura Yussha ni timia núnisan̄ yaiñkiarmiayi. Uunt yawancha kajeche awajsarmiayi, ³⁴ uunt jiniasha ikiajniakarmiayi, puniajaī mantamnatniuncha uwemprarmiayi. Kakarmachusha kakaram ajaras mesetnumsha ni nemasrin̄cha nupetkarmiayi. ³⁵ Nuwasha ni uchirj jakan iniantkimiun wáinkiararmiayi.

Chikichcha wáitias mantamnewarmiayi. Ti shiir pujustinnium nantaktiai tusar nú tsawantaī uwempratniun nakitrarmiayi. ³⁶ Chikichcha katseknakarmiayi, asutniáwarmiayi, jirujaī jin̄kiawar sepunam en̄kenawarmiayi. ³⁷ Kayajaī tukú mantamnewarmiayi, jímiapetek tsupinkiararmiayi, Yúsan iniaisarat tusa nekapnasarmiayi, puniajaī mantamnewarmiayi. Aya wékainiararmiayi, kuítrin̄cha ásar nuapen entsararmiayi, shuar nincha áintrar wáitnenmai awajiararmiayi. ³⁸ Atsamunmasha, naincha, waanmasha, ashí nun̄kanam wekain ármiai. Nu shuarjain̄kia ju nun̄kanmayā shuar imiá yajauch ásar niijjaī pujumainchu áiniawai. ³⁹ Nu shuar Yúsan shiir enentáimtuiniakui Yus “pénkeraitrume” tiarmiayi. Túmaitiat ni tsan̄katkamun wáinkiacharmiayi. ⁴⁰ Yuska nuna nan̄kaamas péñkeran iwiarturaru asa tura in yamá

pujajnia juna enentáimturma asa niisha iisha mai metek tsanin_{kiar} ti pen_{ker} ajasarti tu enentáimsamiayi.

12

Jesus tuke enentáimtusar tsékentiai

¹ Ashí ju nun_{kanam} túrajnia nuka shuar nakuruiniak tsékena nujai nakumkamniati. Ashí shuar yaunchu Yúsan shiir enentáimtusaruka téntakar írmainiayi. Tuma asamtai ashí kijin ana nusha tura ashí tunaaka itit awajtamaj nusha ajapa iniaisar tura katsuntrar tséken_{kir} jeatai. ² Túmakur Jesus tuke enentáimtusar tsékentiai. Ashí shuarjaj nan_{kaamas} Jesus Yúsan ti nekas enentáimtak aya pé_{nkernak} túramiayi. Tuke nekas awakmakmiayi. Imiá tunáa shuáran krusnum máatin aj_n núnisa_n natsanmainium jákatniun surimiakchamiayi. Antsu ukunam ti shiir warastin átatna nuna enentáimtak nuna ashí katsuntramiayi tura nuyá Yusa untsuurin_j akupin pujutainium pujusuiti.

³ Tunáa shuar Jesusan wáitkiasarmia nu enentáimpratarum. Túrarum pimpitsuk katsuntratarum. ⁴ Átum tunaajaj máaniakrum Jesus túramia áintsarum numpemsha puárchaitrume tura jákachuitrume. Nuisha katsuntrarum jeatniuitrume. ⁵⁻⁶ Yus nekas ni uchir_n chicharkatniua áinis túramprum nu kajinmatkichmashuram. Júnis tawai:

“Uchirú, wi jintin_{tramaj}mena nu kajinmatkip. Asutiámkuisha kúntuts pujusaip. Kame Uuntka Nii aneana nuna jintintiawai. Tura ni uchir_j ajasat tusa achána nuna asutiawai.”

⁷ Tuma asamtai Yus ni uchir_{ja} áinis asutiámkuisha katsuntratarum. Warí, ashí apa ni uchir_n chicharkashtatuak. ⁸ Tura ashí uchin chicharkatniua núnis Yus atumin chichartamchakrumni_{nkia} nekas ni uchir_nchuitrume. Antsu chikichnaitrume. ⁹ Nu arantcha ii apar_j uchich árin_n chichartamkurin umirniuyaji. Nu arant nuikia nekas ii Apar_j nayaimpiniam pujana nu shiir umirkar tuke shiir pujustin wakerish_{tatjik}. ¹⁰ Ii apar_j ishichik ni enentáijjaj wakeramu chichartamniuyaji. Antsu Yuska ti pen_{ker} awajtamsataj tusa nekas atsumajnia nujaj métek chichartamji. ¹¹ Kame nekasaiti, ashí asutiámu yamaikikia waraschamniati, antsu kúntuts enentáimtikramji. Túrasha ukunam nu asutiámujaj unuimij nuka pé_{nk}er túratniun tura shiir pujustinian yáinmaji.

Anearta. Yus tana nu nekas antuktiniati.

¹² Nujaj pimpirarusha tura kakarmachu ainia nusha ikiakártarum. ¹³ Túrarum pé_{nk}er esetta enentáimsarum wekasatarum. Túrarum tujintiainia nusha shiir wekasatin yain_{tarum}.

¹⁴ Ashí pé_{nk}er túrakrum ashí shuarjaj nawamnaikiarum pé_{nk}er wekasatarum. Tunaan túrinkia Yusaj pé_{nk}e jeashtatui. ¹⁵ Aneartarum. Shuar nakitiakuin_{kia} Yus nu shuáran shiir yáin_{tinian} tujinkiat_{tawai}. Nu shuar yajauch enentáimiuk chíkich shuárnasha itit awajas tunaanum útsukartatui.

¹⁶ Tsanirmawairap.

Yusna nusha nakit_{rairap}. Isaka uchir_j Esau pé_{nk}era nuna nakitramiayi. Yus “iwi_{airin} núkap súsatniuiti” timia nuna enentáimtus_{chamiayi}. Tura asa aya ishichik yurumkajaj yapajjámiayi. ¹⁷ Tura nuyá ni apar_j ukunam túrunattana nuna takui Esau tí pen_{keran} wakerimiayi. Tura ti útkuisha ni apar_j nin nakitramiayi tura ni chichasman yapajjá_{tniun} tujinkiamiayi.

18 Atumjainkia Yusna enentáimtusminia nuka yaunchu Israer-shuarjaj ashammain amia núnischaiti. Yáunchuka Yus ni akupkamurin Israer-shuaran súakui Senai muranam jeeármiai. Muranam uunt jisha kiritniusha teesha nasesha ajamiayi. 19 Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiayi. 20 Kame Yus chichaak “Shuarsha tankusha ishichkisha nú muranam najarmatai nuka kayajaj tukurar tura nankijajisha máatniuiti” tímiayi. Nu akupkamu ti ashammai asamtai “chichaschati” tiarmiayi. 21 Wáinkiarminia nu ti tsumai asamtai imia Muisaissha “Ashamakun kuraajaj” tímiayi.

22 Antsu atumjainkia Yusna enentáimtustin nujaj nankaamas péñkeraiti. Átumka nayaimpinmaya Seun náinnium, Jerusaréñ iwiaaku Yus pujutai péprun nakumeana nu jeeáitrumé. Nuisha ti untsurí nayaimpinmaya suntarsha 23 ashí Yus-shuarsha shiir iruntrarú ániawai. Yus-shuarka ashí nayaimpiniam ni naarí anujtukma ásar ni uchirí ániawai. Nuisha Yus, ashí shuaran ti nékana nu, pujawai. Niisha shuáran ti péñker awajsamtaí nu shuar jákar ni wakaní nu shiir pujuiniawai. 24 Nuisha Yamaram Chichaman in takartamajnia nu, Jesus, pujawai. Nuna numpe ukatramujaj ashí shiir awajsaiti. Nu numpasha Apira numpejaj nankaamas péñkeraiti. Kame Apir ántar máamu asamtai yapajmiatrukta titinia áintsan enentáimtaji. Antsu Jesus tunáa shuáran péñker awajartaj tusa jakamiayi.

25 Nuka ti péñker asamtai Yus chichartamprumna nu nekas anturkatniuitrumé. Yaunchu Yus jú nunkanam murá chichaamun anturkachar asutniátniunam uwempracharmiayi. Nuikia Yus nayaimpinmaya chichartamkurin ántachkurkia ishichkisha uwemprashtatji. 26 Yaunchu Yus chichamejaj nunkan úurmamtikiarmiayi. Tura yamaisha tawai “Ataksha aya núnkankechu antsu nayaimpinmasha úurmamtikiattajai.” 27 “Ataksha” tana nujaj “ashí muchitráminia nu amuukartatui” tawai. Tura muchitrachminia nu juakartatui. 28 Yus in akupkatniun tsankatramaj nuka umuchnakchattawai. Tuma asamtai Yus yuminsatniuitji. Yus wakerana núnisrik wishiktsuk shiir enentáimtusar Yus shiir awajsatniuitji. 29 Maa, ii Yúsrinkia kakerkanka uunt jáa nuke áesaa mash emesramniaiti.

13

Yus shiir enentáimtiksatín

1 Nuamtak yachia núnisrum tuke mai anenai ajatarum. 2 Tuke írar shiir itiaatarum. Nuna túruiniak shuar nékachminiak nayaimpinmaya suntaran itiaawaruiti.

3 Sepunam pujuinia nusha atumsha niijaj pujáa núnisrumek waitnentrarta. Wáitkiasarma nusha wisha núnisnak wáitsamniapitjia tusarum waitnentratarum.

4 Nuatnaikiatin péñkeraiti. Shuar ni nuwejaj tsanin pujustin péñkeraiti. Tura nuatkamu ainia nusha chikichan eakchatniuiti. Tsanirmana núnaka Yus asutiáttawai.

5 Aya kuítiak enentáimtusam pujusaip. Yuska “Kanakchattajai tura péñké ikiukchattajme” túramui. Tuma asamtai ame takakmena nujaj shiir enentáimsam “maakete” titiá. 6 Tiniu asamtai arantutsuk ju

túminiaitji: “Winia yainnia nuka Uunt Yúsaiti. Nu asamtai shuar túrutamnia nuna ashamkashtatjai.”

⁷ Atumin Yus-Chichaman jintinramawarmia nu enentáimtustarum. Yúsan shiir enentáimtuiniak péñker wekasarmia núnisrumek atumsha túratarum.

⁸ Jesukrístuka tuke yapajítsuk nuikiya núnisan yamaisha tura ukun-masha tuke núnisan átatui. ⁹ Chíkich chicham niisháa írúnna nu anturkairap. Yus in anenma asakrin kakaram ajasartai. Shuar niisháa yurumkajai enentáiruñ kakaram ajastaj táyat penké yáinçhaiti. Yurumeaj nújainchu antsu Yusa anenkrattairijjai ii enentáin kakaram ajasmini-aitji.

¹⁰ Yáunchu Yúsnan pujurin naman maar Yus susamunmayan yuu ármiayi. Tura iikia Yus-sutaj nusháa ana nu súaji. Nusha Kristu jakamu asamtai yaunchua nu Yúsnan pujurin nuñ pachiinkiachmin ániawai.

¹¹ Israer-shuarnumia Yúsnan pujurniu uuntri tunaan asakártaj tusa namanké numpen júkiar Imiá Shiir Tesaamunan wain ármiayi. Tura nu naman arant áesatniuyayi. ¹² Núnisan Jesussha péprunam arant wáitkianas mantamnamiayi. Nujai ashí shuara tunaarin ni numpejai nijiatkaiti. ¹³ Núnisrik iisha péprunmaya arant wétinia núnisrik Jesusai weri Niijjai métek wishikmain katsuntutai. ¹⁴ Kame ju nunkanam amuukachmin pepru atsawai. Antsu ukunam ti shiir pepru átatna nu nákaji. ¹⁵ Tuma asar naman maar Yus sútsuk antsu shiir chicham súakur tuke Yus shiir yúminkiaji. Tuke núnisar túratat. ¹⁶ Péñker túrakrum takakrum nu ajam-naisatin kajinmatnaikiirap. Nusha ti shiir Yus sútainti.

¹⁷ Yus-shuaran akupin ainia nu umirkarum shiir enentáimtikratarum. Ni takatrin Yúsan ujaktin ásar atumí wakanin shiir wainiainiawai. Niisha itirchatcha antsu wakerumainian túrawarat tusarum shiir yáinçtarum. Nu túrachkumka çitiurak yainmakarat?

¹⁸ Incha Yus áujstarum. Iisha ashí péñker túratin wakeraji. Túraji enentáimji. ¹⁹ Tura Yus áujkuram Yus ataksha atumjai wainniaikiatniun wari tsançkatrukak tusarum seatritiarum.

Amúak shiir chichaawai

²⁰⁻²¹ Imiatkinchanum apujkartinia nú Yus, Jesukrístun jakamunmaya iniantkimia nuka, ni numpé kakarmarjijai ashí péñker ana nuna suram-sarti. Nujai ni wakeramu túrattarme. Tura Jesukrístu kakarmarjijai ashí ni wakeramun in pujurtamas takasti. Ii Uuntri Jesukrístu ashí Yus-shuaran ti péñker Wáinniuiti. Tura ni numpejai Yamaram Chichaman kakaram awajsamiai. Nu Chichamsha tuke mençkashtatui. Aya Kristu tuke shiir awajnasti. Núnisan atí.

²² Yatsurú, kakaram chicharkajrumna ju shiir enentáimjai anturkatarum. Kame ti wárik áatrajume. ²³ Yamaikia ii yachi Timiutéu sepunmaya jiiniki ançkant ajasai. Nuna ujaajume. Wárik támatainkia atumin íitaj tusan winiakun niijjai winittiajai.

²⁴ Atumí úntrisha tura ashí Yus-shuarsha amikmaatarum. Itiaria nunkanmaya shuarsha amikmatmainiawai.

²⁵ Ashí Yus ti shiir yainmakarti. Nuke atí.

SÁNTIAK papin árar akuptukma

Sántiak aarmiania nu

¹ Wi Sántiak Uunt Yúsan tura núnisan ii Uuntri Jesukrístun umirin asan ju papin aajai. Ashí Yus-shuartirmin ashí nuñkanam tsakinmakarum matsatrumna nuna amikmaajrume.

Nekatainikia Yúsnumiãiti

² Yatsuru, ashí itirchat wáinkiumesha tuke warastarum. ³ Iis, itirchatnum pujakrum nekas Yus enentáimtaikiumeka katsuntratín unuimiartatrum. ⁴ Tura tuke páchiachkuram, tuke katsunteakrum, nuikia Yúsjaí ti penker katsuartatrum. Penké atsumashtatrum.

⁵ Átum nánkamsarmek nekaatin tujintiakrumka Yusa nekatairi seata. Shuar seakuí Yuska kajetsuk tura ementutsuk antsu patatas súawai. Tuma asamtai seakminkia suramsattawai. ⁶ Túrasha Yus nekas enentáimtusam, “túratpiash” tútsuk seata. “Cha, nékatsjai surustimpiash” tu seakmeka ánttram seame. Nayaantsa tsukaturí juní taa, atúu wakетки ajatsuk. Amesha áintsamek túmame. ⁷ Enentáimjin núnsketchuinkia, seamna nuna Yus penké suramsashtatui. ⁸ Shuar jimiara enentáimna nuka shiir wekasatniun tujintiawai.

⁹ Yus-shuar, ju nuñkanam kuítríncha ainia nu, Yus shiir awajsamu nujai warasti. ¹⁰⁻¹¹ Tura Yus-shuar kuítrinniuitkuisha péejchach enentáimtikramsha warasti. Iis, nupá kuánkam tura nantu ti sukuam kaar miniatsuk. Kuítrinniuka ántska ánttram seame. Nayaantsa tsukaturí juní taa, atúu wakетки ajatsuk. Amesha áintsamek tánkete. Tuke súrutnak pujurkusha itirchat wáiniuk wárik amuukattawai.

Ii itirchatrí ana nu

¹² Shíiraiti shuar ni itirchatríin nekas katsunteana nuka. Nekapsam jíinkinuka akinkiatniun wáinkiatawai. Iwiaaku átinian, tawasap achik-tinia núnisan, wáinkiatawai Yus ni aneam tsankatka nuna. ¹³ Shuar tunáa túramnia nekapeakka “Yus nuna útsutrutui” tu enentáimprashiniati. Yuska yajauch túramnia enentáimtsui túrasha Niisha penké chikichkinke-sha tunaanum útsuchuiti. ¹⁴ Antsu ni wakeramuríjiaín aents tunaan niníki ikiatmamkaiti yajauch túratniun. Nújaínkia tunaanum útsukmaiti. ¹⁵ Nu yajauch wakeramunmayá tunáa akiiniui. Tura nu tunáa mash amuukamtaí jákatin akiiniui.

¹⁶ Yatsuru, aneakun tájarme, anañmamawairap. ¹⁷ Ashí péñker ana nu, ashí shiir ana nusha nayaimpinmayá Yusak amasuiti. Yus ashí tsáapnia nuna najanaíti. Tura Niin kiritin atsain yapajítsuk tuke tsáapniiti. ¹⁸ Nii wakera asa ni nekas chichamea nujai ni uchirí najatmamji. Tura ashí ukunam átatna nujai ii émkaitji.

Yus nekas shiir awajsatin

¹⁹ Tuma asamtai aneamu yatsuru, wárik chichastin enentáimprairap antsu antuktin emka enentáimprata. Núnisan wárik kajekaip. ²⁰ Kajena nuka Yus péñker wakeramun túratsui. ²¹ Nu asamtai, ashí péñkercha

nu tura ashí yajauch írúnna nusha iniaisata. Tura tuke enentáijjaj Yus-Chicham ame enentáimín araamu anturkata. Tura nu Chicham kakarmaiti uwentikrampratniun.

²² Yus-Chicham umikta. Aya ántukaip. Aya ántakmeka amek anañmamattame. ²³⁻²⁴ Shuar íspikia ímiak ni yapín wapikian wáiniak tura nuyá jáupmitsuk we, ni urukuit nuna wárik kajinmatkishtimpiash. Shuar Yus-Chicham umitsuk aya ántana nuka nujaj méteketete. ²⁵ Yus tana nujaj ankant ajasminiaiti. Shuar íspikia iimia áintsan nekas Yus péñker táman tuke iniaitsuk enentáimtus, nu shuar kajinmattsuk aya antukchattawai antsu tuke umiktatui. Tura ti shiir waras pujustatui.

²⁶ “Nekas Yúsan shiir umirjai” tana nu tura eseer chichaachkunka imia niñki anañmamui tura “Yúsan shiir umirjai” tana nuna ántar tawai. ²⁷ Nekas Yus Apa awajitsuk shiir umirkatin júiti: mitiaikiasha wajesha itiurchatnum pujuiniakuisha yáñtiniaiti tura ju nunkanam ashí tunáa ana nújajsha máatrashtiniaiti.

2

Shuar antra akantrashtin

¹ Yatsuru, ii Uuntri Jesukrístu ti shiir nañkaamantua nu enentaimtatirmeka shuar akantratin enentáimsairap. Shuara enentái enentáimtsuk antsu aya pátatke wáinmena nujaj aents akantram niisháa enentáimturairap. ² Iis, iruntrumna nuí shuar kuítrintin kurí aniyu aweera tura péñker iwiarmampra wayashtimpiash. Tura núnisan chíkich kuítrincha aruta entsaru wayashtimpiash. ³ Tura kuítrinnia nu “Péñkera juí pujusta” tíchatameash. Tura kuítrincha “Atu wajauta, túrachkumsha juí nunkañsha pujusta” tíchatameash. ⁴ Nu tákumka yajauch enentáimpram jimiara enentáijjaj aents enentáimtame.

⁵ Aneamu yatsuru, antuktarum. Ju nunkanam kuítrincha ainia nuna Yus achikiuiti Ní shuar ajarar Nin nekas enentaimtin ajasartinian. Tura ashí nayaimpiniam írúnna nunasha Yus nin tsan̄katkattawai. Ashí shuar Yúsan aneena nuna anajmatra asa nin tsan̄katkattawai. ⁶ Átum antsu kuítrincha natsant awajearme. Iista, kuítrinnia nuka timiá itiurchat awajtamainiatsuk. ¿Nuikia níchuk ainia achirmak kapitíannium japiki júramprumna nu? ⁷ ¿Niñkichuk ainia Kristu naari shiira nuna ántar pachikiar peñké yajauch áujmatainia nu? Tura átumka nuna naari tuke shiir awajkurmin, ashí shuar “Kristu shuari” túramainiawai.

⁸ Yus-Chichamnum ju akupeamu nekas péñkeraiti:

“Ame ayashim aneamna núnismek ame írutramuram aneeta.”

Nu nekas umirniuitkiurmeka maak. ⁹ Nú enentáijjaj kuítrinniajuí chichasminiaiti. Tura nuyá kuítrinchañ shiir chichaachkumka, niisháa enentáimta asam, nu akupkamu umirkachuitme. Tunáa túrame. Núnismek Yusa akupeamurjjaj amek sumamame. ¹⁰ Chíkich akupkamu írúnna nu ashí umikiam tura aya chikichik akupkamu umikchamka nuikia ashí akupkamu umircha ajasume. ¹¹ Iis, Niñki Yúsak chichaak tíchamka “tsanirmawaip.” Tura chikichnasha “man̄kartuawaip” tímiayi. Nu asamtai, shuar tsanirmatsuk túrasha man̄kartakka ni wakeramun umirtsui. ¹² Kristu ankant awajtamsamtaí ii yamá ni akupeamurj yúpichuch umirkamniaiti. Nu asamtai nu akupkamujaj métek wekalkurniñkia Yus “péñker túraitme” turamtatji. Tura umikchakriñkia “péñker umikchaitme” turamtatji. Tura nu enentáimsar péñker

chichasar takasar wekasatniuitji. ¹³ Chikichan waitnentachkuṅka waitnennatsuk asutniáttawai. Tura waitnenkratniuitkiurniṅkia tsawant jeamtai Yus in waitnentramp Prattaji.

Yus enentáimtustin tura umirkatniusha

¹⁴ Yatsuru, shuar “Yusan shiir enentáimtajai” táyat tura péṅker túrachkuṅkia péṅkerashit. Nujaj̄i uwemprattawai. ¹⁵ Wátskea, Yus-shuar, áishmaṅsha nuwasha, entsátáirin tura yurumken atsumashtimpiash. ¹⁶ Tura ame nékayatmek ayash̄i atsumana nu sútsuk tíchatapash “Péṅker wetá, entsatai entsaram túram péṅker yurumáta.” ¿Nu sútsuk tákum péṅkerkai? ¹⁷ Núnisaṅ takatsuk Yus enentáimtustin ántrai.

¹⁸ Tura shuar tíchanpiash, “Chíkich takaawai tura chikichcha Yúsan shiir enentáimtawai. Mai péṅkerchakait” tichanpiash. Wats, ame Yus enentáimtamun takatsuk paant inaktusminiashitiam. Tura wi antsu péṅker takatrujaj̄i Yus enentáimtamun paant inaktustatjai. ¹⁹ Nekas Yus chikichkiiti tu enentáimtame. Nuka péṅker túrame. Túrasha iwianchcha nunasha nékainiawai. Tura umircha ásar ashamainiawai. ²⁰ Netse enentáimpraip. Ashí Yus wakera nu takaachkumka, Yus enentáimtustin ántrai. ¿Nu nekaatin wakeramek? Iista. ²¹ Apraám Yus chicharuk “Winia ti shiir awajtusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritkiacham Yus “Péṅkeraitme” tímiayi Apraám. ²² Páantchakait. Apraám Yusa shiir enentáimtak umirkamiayi. Umirtsuk Yúsan enentáimtakka nuikia ántar enentáimtiayai. Tura umirak Yus enentáimtamun umikmiayi. ²³ Nujaj̄i Yus-Chicham aarma nu uminkiamiayi. J̄uti:

Apraám Yúsan shiir enentáimtusmiayi tura Yus chicharuk tímiayi “Máakete.

Nújaj̄iṅkia tuke péṅker túraitme Wijjaj̄i” tímiayi. Apraámsha nekas “Yusa Amikri” tu náamkamiayi.

²⁴ Páantchakait. Shuar aya Yúsan shiir enentáimtamujainchuk tura péṅker takasmajaj̄isha Yus nin shiir enentáimtawai. ²⁵ Núnisaṅ Raap tsanirmataiyayi. Túmaitiat Israeran suntarin mamikmauta tusar akupkamun ni jeen itiaawar tura úukar chíkich j̄intianam akupak uwemtikrarmiayi. Nuna túramtai Yus “péṅkeraitme” tímiayi nincha. ²⁶ Ayash̄i wakantichuka jákachukait. Núnisaṅ Yus enentáimtustin tura ni wakeramu takaachkurkia, jaka ántsaṅ ántraitji.

3

Ii iniaj̄i

¹ Atum untsurí j̄intiṅkiartin ajastin wakerukairap. Yus in, j̄intiṅkiartin áj̄inia núnaka, nankaamas neka asar, awajiakrin nankaamas Yus asutiámattaji. ² Iis, ashí mash ti awajiatsjik. Tura shuar chichaak, aya péṅkernak chichaakka, nu shuar tuke eseer enentáimniuiti. Tura ayash̄iṅsha tuke péṅker ana nuna túriniati. ³ Kawaisha enentáimpratai. J̄iru wenuchiam ikiursam ni ayash̄i ashí ayantaatsuk. ⁴ Kanusha ti úuntaitiat tura kakaram wéayat ishitiapach wiantaijjaj̄i shuar wakera nuj̄i ayantarmiaiti. ⁵ Núniskete ii iniaj̄i. Timiá ishitiapchitiat awakmaktinia tímianu chichaatsuk. Ji ishichik kapaajaj̄i ashí numi tsaruaku ekeemachamniakait. ⁶ Ii iniaj̄isha jijjaj̄i méteketete. Ashí tunáa piákuiti. Tura ii ayash̄iṅ tunáa túratniun útsutmaji. Túnkuruanmaya jijjaj̄i ikiapármaiti tura ashí ii wekajnia nuj̄i émesewai. ⁷ Shuar ashí yajasman nawamkamin ániawai. Ashí kajen írussa nunasha, nanamtincha,

napincha, tura entsayancha ashí nawamkaruiti. ⁸ Tura iniaikia penké nawamkachminiaiti. Ti yajauch asa penké nupetkachminiaiti. Iniaikia ti taráa tseasaiti. ⁹ Nu iniaijjaj Yus Apa shiir awajeaji tura nu iniaijjaj añ aentsti yajauch chichárnaiyaji. Áentsun Yus Nijjaj métek-taku najanamaitiatar yajauch chicharnaiyaji. ¹⁰ Nu iniaijjaj añ penkersha tura yajauchisha chichaaji. Yatsuru, nuka penké atsutniuiti. ¹¹ ¿Púkununmaya entsa sáawijjaj kusuku jínkimniakait? ¹² Yatsuru, ¿Kushñkiap shuinian nereawak. Munchisha kushñkiapen nerektatuak? Núnisan púkununmaya entsa sáawijjaj kusuku jínkichminiaiti. Ii iniaijjaj núnisan aya penkera nu chichastiniaitji.

Yusa nekatairi

¹³ Shuar ti neka enentái takakna nu, penker túrattawai. Nekas nékaitkiunka péechachia núnis tuke penker ana nuna túrattawai. ¹⁴ Antsu atumí enentáijjaj penké yajauch enentáimtunairum tura atumek penker pujustin enentáimtumarum, nékaitiatam penker túrachiatam “penkeraitjaj” tiip. Nuka wáitrame. Nekaska núchaiti. ¹⁵ Nú enentaikia Yúsaiyanchuiti. Antsu ju nunkanmayaiti, shuara enentáiyaiti, núnisan iwianchnumiaiti nú enentaikia. ¹⁶ Shuarsha yajauch enentáimtunairar tura niñki enentáimtumainiakui, nujaj ashí meseawai tura ashí yajauch ti awai. ¹⁷ Antsu Yusaiya enentái takakua nu júnisaiti: ashí nankaamas emka eseeratin, nuyá nawamkartin, shiir ajá, penker anturnain, waitnenkratin, ashí penker takáa tura anantsuk naka chichamtin. ¹⁸ Eseera enentáimsatniusha shiir takawai ashí shuar penker ana nuna túrawarti tusa.

4

Ju nunkanam írunna nu aneashin

¹ ¿Urukamtaitsuk tuke kajernaikiarum ti máanaisrum pujarum. Mesetnumsha urukamtaí wéarum? Júnisaiti: Atumin yajauch enentái katsuñtrachmin útsutmakrumin tuke máaniarme. ² Wakerarmena nu takustin wakerarme tura nu wakeramu takustin jeachkuram nérentin maarme juruktiaj tusam. Chíkich takakna nujaj itit enentáimtuniarme tura ataitin tujinkiam máanaitrume. Wakerarmena nussha Yus seachu asarum wáintsurme. ³ Tura seakrumsha yajauch searme. Atumí penkerijjaj warastin enentáimiu asarum searmena nussha wáintsurme. ⁴ Jú nunkanmayá wakerakum Yusa nemasrijjaj tsanirma áintsanketrum. Nékatsumek atumsha. Ju nunkanmayan wakerakrikia Yusa nemasrintji. Shuar ju nunkanmayan wakerakka Yusa nemasri ajawai. ⁵ Yus-Chicham juna tawai:

Yus ni Wakaní ii enentáin apujturmasuitji. Nu Wakan in anenma asa ti akasmatramaji, táwai.

Tura nuna ¿ántrankeash ta? ⁶ Tura anenma asa ti yáinmaji. Tuma asamtai Yus-Chicham tawai:

Kajemtinian Yus íistatui tura péechachin Yus nin aneak ti shiir yáintatui, tawai.

⁷ Yusaj ikiumastarum, tura íwianch taritratatum. Túrakrumin íwianch ikiumaktiatui. ⁸ Yúsainí weamkata tura Nii atumin wearmaktatrum. Tunáa shuartiram Kristu numpejaj nijiamartatum. Tura átum, Yussha tura ju nunkanmayasha mai métek wakerarmena nu, atumí enentái naka eseeratarum. ⁹ Atumí tunaarj enentáimsarum kúntuts

enentáimpratarum. Nu kúntutsjaj ti úttiarum. Nuik shiir enentáimprarum wishikmiarumna nuka iniaisarum kúntuts enentáimprarum úttiarum. ¹⁰ Yusjaj péjchach ajasta, túrakmin shiir awajtamsattawai.

“Yajauchiitme” tunaichatin

¹¹ Yatsuru, yajauch áujmatnaisairap. Yus-shuar ni yachin yajauch áujmatas tura yachí tunaari tuke áujmatuk Yus “aneniatarum” tana nuna umichuiti. Antsu umichu asa “nu akupkamu ántrai, umirkash-tiniaiti” tawai nu shuar. Nujaj nu shuar umirtsuk Yus akupkamu nankaamas enentáimtumawai. ¹² Yus Niñki akupkamu najana asa Niñki nu akupkamu umirkamun nekas nekaamniaiti tunaashit tusa. Niñkiti uwentikratniun tura emesratniunam akupkatin jea nu. Amesha yáitiam chikicha tunaari ístincha.

Kashin átatna nuna Yusak nékawai

¹³ Watsek, átum áujmateakrum “Arumsha kashincha nu péprunam weri nuj chikichik uwí takasar kuit achiktatji” tíchattarpash. ¹⁴ Ishichkisha penké nékatsrume kashin átatna nu. Ju nunkanam ii iwiaakmari wárik amúatsuk. Yurankim utsanar tura nantu sukuam mash wárik menkaatsuk. Núnisketji. ¹⁵ Antsu júnis tíminiaitrume: “Yus wakerakuñkia iwiaaku pujakrikia nusha túrattaji” titiarum. ¹⁶ Túrachkurmeka átumka Yusjaj nankaamantu enentáimprume. Tura ashí nu enentáikia yajauchi-iti. ¹⁷ Shuar péñker túratniun nékayat, túrachkuñkia, nuka tunaiti.

5

Kuítrintin enentáimpratniua nu

¹ Kuítrinnitiram ju antuktaram. Ti úttiarum. Ti wáitsatin asarum ti kakantra úttiarum. ² Kuítrum mash mamukarai tura iwiarmampramurmesha mash tinkishap yúkayi. ³ Kurirmesha tura kuítrumsha ashí ijiakmamkarai. Ijiakmampramurjsha ame péñkercha túram nuna paant iniakmawai. Tura jinium áesamua áintsan ame kuítrum yajauch awajtamsattawai ayashmiin. Amuukatin tsawant jeamunam anearchamame antsu ame kuítrum ikiaunkamame. ⁴ Ame takat iniararam ementushim akirarmamna nu “akirkati” turamainiawai. Anearta. Yakiyá Yus, nayaimpinmaya suntara uuntri, nu takartamniu chichamen antukai. ⁵ Ashí ju nunkanam írunna nu wararsaruitrume. Tuma asarum kapunka nuke machararme tura yamaikia máatin tsawant jeayi. ⁶ “Nu shuar tunaiti” tírum tunaachu tsanumprurum máamarme, tura niñkia surim-iakcharmai.

Yawetsuk takastin tura Yus áujsatin

⁷ Nu asantai, yatsuru, nu páchitsuk ii Uuntri Kristu tatin nákastarum. Arakmausha ni arakri péñker tsapaiti tusa yumi yutuktinian shiir enentaijjaj nákatsuk. Yútasua umirmatai esatrumatai júuktatjai tusa nákatsuk. Tura júurmaksha ti waraatsuk. ⁸ Núnisan atumsha katsuntsatarum tura yawekiirap. Kristu tatin yuntumtemayi. ⁹ Yatsuru, nuámtak “ju yajauch túrutui” tunainirap. Tákurminkia Yus írmastatrume. Niñkichukait nuna ístin tura anearta nu Yúsak tíjuch wajatramui. ¹⁰ Yatsuru, yaunchu Yúsnan etserin enentáimpratarum. Tuke ii Uuntri Yus timia nuna shiir etserkarmiayi. Túmaitiat wáitsarmiayi túrasha pachischarmiayi. Núnisrumek enentáimsatarum. ¹¹ Itiurchatan katsuntainia nuka nekas shíiraiti, tu enentáimji. Shuar itiurchatan ti katsuntin ámiayi, ni naarj Jup. Tura

ni itiuurhatrj nan̄kaasmatai Yus ti núkap kuítrj̄n susamiayi. Nu nékatsrumek. Ii Uuntrj̄ Yus ti waitnen̄kratchakait.

¹² Ju ashí nan̄kaamas enentáimtustiniaiti, yatsuru. Ame “ee” tákumka nekas titiá. Tura “atsá” tákumka nusha nekas titiá. Nekas chicham chichaachkumniñkia Yus íirmastatui. Nu asamtai nayaimsha nan̄kasha ashí írunna nusha páchitsuk, aya támena nu tuke nekas atí.

¹³ Wáitakmeká Yus áuj̄sata. Waraakmeká, warasam kantamám Yus shiir awajsata. ¹⁴ Yus-shuurtiram, shuar jáakka, Yus-shuara úuntrj̄n untsukti. Tura niisha taarti. Tura Jesusa naari pachikiar asuitij̄j̄i jaa shuuran ishichik kuerarti. Túrawar Yúsán áuj̄tusarti nu shuuran. ¹⁵ Tura “Yus nuna nekas anturtamkattaji” tu enentáimsar áuj̄sarti. Túrawarmatai jaa shuar péñker ajastatui. Yus nin tsuártatui. Tura tunaan tura asa jáakuñkia Yus nu tunaan tsan̄kurattawai. ¹⁶ Nu asamtai, atumí tunaari paant et-sertunaiktaram. Túrarum Yus áuj̄tunaistarum atumí tunaari tsan̄kurnarat tusarum. Péñker shuar Yúsán tuke enentáij̄j̄i áujeamuriñkia ti kakarmaiti. ¹⁷ Yaunchu Yus-Chichaman etserin ámiayi, ni naari Erías. Niisha iij̄j̄i méteketiat yumi yutukaj̄ tusa Yusa áuj̄santai menaintiu uwí nuyá nan̄kaamas yutukchamiayi. ¹⁸ Ataksha yutukti tu áuj̄santai ataksha yutukmiayi tura araksha ataksha tsapainiarmiayi.

¹⁹ Yatsuru, shuar eseera wekatinmaya kanaakuñkia chíkich nin waketkitniun yaiñti. ²⁰ Shuar tunáa shuuran yajauch wekaan awakeakka jákatniunmaya uwemtikrattawai tura ti untsurj̄ tunaari tsan̄kurnartatui.

PÍTIUR Emka papin aar akupkamu

Pítiiur Yus-shuaran áatramiania nu

¹ Wisha ju papin aajna nu Pítruitjai. Wisha Jesukrístu akatramur-intjai. Israer-shuar Yus-shuar árum nuna atumin ankant ankant tsakinmakarum chíkich chíkich nunkanam matsatrumna nuna áatjarme. Puntu nunkanmasha, Karasea nunkanmasha, Kapatúsea nunkanmasha, Asia nunkanmasha, Pitinia nunkanmasha pujarmena nuna áatjarme. ² Yaunchu Apa Yus, “uwemtikrataj” tímia núnisan achikmaitrume. Tura, Winia ajasat tusa ni Wakanijjai akantamkamiarme. Umirtukat tusa nuna túramiayi. Tura Jesukrístu numpejajsha atumí enentáin atsajkir chamir awajturmasmiarme. Wats, Yus tuke waitnentamar ti shiir awajtamsarat tusan wakerajrume.

Shiir enentáimsar pujustin

³ Wats, Yus, ii Uuntrj Jesukrístu Aparj ana nuna naari shiir awaj-satai. Yussha ti waitnentrama asa, atak akiiniatniun suramsaitji. Jesukrístu jakamunmaya nantakin asamtai, iikia atak akiiniar tuke iwiaaku pujustiniaitiajnia nu arutramji. ⁴ Tura nayaimpiniam ikiurtam-samu ana nuna achikmintrum tusa Yus wakerawai. Nu ikiurtamsamu meserchamnia amuukachminiaiti. Tura nusha yajauchichuiti. ⁵ Yus nekas enentáimta asakrumin ni kakarmarjijai weararme. Tura tuke uwemtikrampratniun, nunka amuamunam paant iniakmastatna nu achikmintrum tusa tuke tsawant ni kakarmarjijai wáitmarme.

⁶ Nu enentáimsarum wararme. Kame ju nunkanam pujakrum itiurchat wáinkiashtarmeash. Tura ju nunkanam pujustin ishichkichukait. Uku-nam péñker pujustaj tu enentáimsarum wararme. ⁷ Enentáimsatarum. Shuar kurin wakerana núnisan atumniasha umirtukat tusa Yus wakerut-mar-me. Aents kurin jinium áesainiawai, aya kurik juakat tusar. Kurin ti wakeruinia ásar, amuukamnia aijn túruiniawai. Atumsha, itiurchat wáinkiarmenta nujai, Yusan nekas enentáimtusartimpiash tusa nekap-samuitrume. Nu enentáimtamur kurijjai nankaamas péñkeraiti. Uku-nam, Jesukrístu támatai, Yuska atumin “péñker túraitrume” turamtajtsa wakerittiawai. Tura “Ashí shuar nuna nekaawar winia naarun uunt awaj-sarat” tusa túrutmattarme. Nu tuma asamtai ju nunkanam nekap-samuitrume, itiurchat wáintrumna nujai.

⁸ Jesukrístu wáinchaiatrum anearme. Tura yamá wáinchiatrumek nekas enentáimtar-me. Tuma asarum ti wararme. Nu warastin nayaimpiniam warastatjina núniskete; nuka paant titin jeatsji. ⁹ Iimiatarum. Uwemtikrurat tusarum Yus umirkachurmek. Nu uwempratrin wainiu asarum waraarme.

Krístujai ii uwempratniun yaunchu etserkarmiayi

¹⁰⁻¹¹ Yus áentsun waitnenta asa, uwemtikrataj tusa tuke wakerimiayi. Núnaka Yúsnan etserin etseriarmiayi. Kristu Wakanj ni enentáin pujuri-armia nu, túruntsain Kristu wáitsatniurin jintiarmiayi. Tura ukunam ni ti shiir pujustintrincha etseriarmiayi. Túrasha “tuu áishmankait Kristu tutaí, tura urutiák túrunat” tusar nu etserin émamkesar anintrusarmiayi. ¹² Tura nü pujuiniajnka túrunashtinian, antsu ti ukunam, ii pujajnia

juj túrunatniun Yus nekaamtikiamiayi. Núnaka Yusa shiir chichameñ ujatmakarmia nú shuar nekaprutmarme. Nú shuar Yusa Wakani, nayaimpinmaya akupkamu ana nuna nekatairijjiaj ujatmakurme. Maa, nu uwempratniun tájana nuna, nayaimpinmaya suntar nekaatai tusar wakeruiniawai, túrasha tujintiainiawai.

Pénker wekasatin

¹³ Tuma asamtai, péñker enentáimsarum tura péñker íimiasrum wekasatarum. Tura Jesukrístu ukunam wantiniak waitnentramprattana nu yawetsuk nákastarum. ¹⁴ Umin uchi áintsarmek yaunchu nékachu asarum wakerimiarmena nu iniaisarum Yus umirin atarum. ¹⁵ Ashí túramurmijjiaj timiá penker wekasatarum. Yus, untsurmakuana nu, péñker asamtai, átumka ni shuarij asarum péñker wekasatarum. ¹⁶ “Wi péñker asamtai atumsha péñker wekasatarum” Yus tana nu ni Papiriin áarchamukait.

¹⁷ “Yus winia Aparuiti” tárumna nu aneartarum. Ashí aentsu túrutairin métek Yus nekaattawai. Nu neka asarum, ju nunkanam pujarmena juj Yus ashamkatarum. ¹⁸ Warí, ánta wekasatniun atumí uuntri jintin-tramarmena nuyá Yus uwentikramprarme. Túrasha kurisha kuitcha amuukamnia ainia nujaj uwentikrachmaitrume. ¹⁹ Antsu Kristu numpe ti shiira nujaj uwentikramuitrume. Nu nékarme. Yaunchu, shuar tunáa túrakui, Yus tímiayi, “murik yajauchichu tunamarcha maarum, Yus sútainiam ikiustarum. Nuna numpen wáinkian, atumí tunaarin tsankurattajaj” tíniuyayi. Núnisan Kristu in jarutramka asa ii tunaariniá uwentikrampraitji. ²⁰ Nunkan nájantsuk áentsun jaruk-tinian Krístun anaikiamiayi Yus. Tura wárik akupkachmiayi. Antsu yamá tsawantin, átum pujarmin, péñker pujusúk tusa wakerak, atumin jarutramkat tusa Krístun akupkamiayi. ²¹ Niijjiaj átumka Yus umirume. Yuska Krístun jakamunmayan iniantki nankaamantu awajsamiai. Yus nekas enentáimtakrum, aya péñkernak túrawai titiarum tusa túraiti. ²² Yus nekas tana nuna, Yusa Wakani yainmakui, umirka asarum atumí wakaniin péñker ajasuitrume. Yus-shuarjaj yajauch enentáimtunaisuk mai anenai ajatai tusarum tura asarum, nekas shiir enentáimtunaisrum mai anenai ajatarum. ²³ Nekaatarum. Yusa chichame umirka asarum atak akiiniaitrum nuka ju nunkanmayanchuiti. Antsu Yusa chichame iwiaaku tuke amuukachmin ana nú chichamjaj tuke iwiaaku átiniaitrum.

²⁴ Ju ayash tuke pujuschamniaiti. Yusa Papiriin junis áarmaiti: Ashí aentsti nupáa áaniuitji. Ii péñkerisha kukuja áaniuiti. Nupa wárik kaawai. Kukujsa núnisan wárik iniaawai. ²⁵ Tura Yusa chichamesha tuke amuukachminiati. Nu Chichamjaj uwemprannia asamtai atumin etsernakuiti.

2

¹ Tuma asamtai, ashí yajauch ana nu iniaisatarum. Anankatin, ántarchichamtin átin, chikichna wakeruktin, ashí tsanumpratniusha iniaisatarum. ²⁻³ Antsu, Uunt Jesukrístu waitnenkartutairi nekapsa asarum, uchi yama akiinia muntsun ti wakeruinia áintsarmek, Yusa chichame aya penkerkea nu ti wakeruktarum. Yusa chichamejaj tuke tsawant tsakakrum tuke uwemprami tusarum túratarum.

Iwiaaku kaya

⁴ Ii Uuntri Kristu kayáa áantsan̄kete. Tura shuar kayan yajauchin nakitiainia núnisan̄ Jesukristun nakitrarmiayi. Tura kayan ti pen̄keran wakeruinia núnisan̄, Yuska, “winia Uchir ti pen̄keraiti” tusa Jesukristun achikmiayi. Atumsha Jesukristu weantukturum. Nii iwiaaku kayaiti. ⁵ Atumsha iwiaaku kaya áantsan̄ketrume. Tuma asarum Yus wijjai ni jeen jeamti tusarum tsan̄kamaktarum. Tura nútiksarmek Jesukristuj̄ atumí iwiaakmar̄i tsan̄kamaktarum, Yus wakera nuna túrutati tusarum. Jesukristuj̄ai tura asarum Yus shiir enentáimtikrume. ⁶ Jesukristunun Yusa Papiriin̄ júnis áarmaiti:

“Iistarum. Kayan ti pen̄keran achikjai” Yus tímiayi. Jeñ emka apujtua-
mur̄i atí tusan Seunnum apujejai.

Nin enentáimtana nu ántar enentáimtatsui. Aarma ana nu pen̄ké kayan chichaatsui. Antsu Jesukristun tawai. ⁷ Yus umirkaitrumna nu, “kaya ti pen̄keraiti” tarume. Tura Yúsán umirainiatsna nuka Yusa Papiriin̄ tana nuj̄ai métek ániawai. Ju áarmaiti:

Jeñ jeamin nakitrarmia nú kaya jeñ emka apujtuamur̄i atí tusa apujamu-
muiti.

⁸ Tura jusha aarma awai:

Tukumak iniaartin kayaiti.

Kame shuar Jesukristunun etserkamun nakitiakka, ¿enentáinium itiur pen̄ker wekasat?

Wats, nú shuar, Kristun umirainiachu ásar, tuke túrunatin asamtai tuku-
mainiawai.

Yusna ajasaru ainia nu

⁹ Tura átumka Yus achikmaitrume. Tura, wínian pujurtursarat tusa yajauchinmaȳa Uunt Yus akantamkairume. Yusna asarum pen̄ker enentáimin ajasurme. Tura Yus sumakmaitrume. Niisha winia pen̄kerun etserturkarat tusa túrait. Kame kiritniunmaȳa jíinkirum ni tsáapnintrin̄ wekasatniun achirmakurme. ¹⁰ Yaunchu nusháa shuar áuyarme. Tura antsu yamaikia Yus-shuar ajasrum, Niiniu ajasurme. Yus-shuar ajatsrumñ̄, ¿ya waitnentrampramia? Antsu yamaikia Yus waitnentramuitrume.

“Yúsnaítjai” tu enentáimsatin

¹¹ Yatsurtirmin̄ tájarme, Yusna ajasrum, ju nun̄kanam írar matsatu asarum, atumí ayash̄i wakerana nu tsan̄katkairap. Ayash̄im wakerana nu túrakmiñ̄kia ame enentáim nuj̄ai yajauch ajastatui.

¹² Yus-shuarchanum pen̄ker wekasatarum. Túrakrumñ̄kia niisha yamáa “Yus-shuar yajauch túruiniawai” ántar tuíniayatan̄, ukunman̄ka, Yusj̄ai in̄kiunaiktin̄ tsawant jeamtai, pen̄ker wekarmena nuna enentáimturmasar, nú shuarsha Yúsán shiir awajsartatui.

¹³ Kristu atumí Uuntri asamtai, ju nun̄kanam akupin̄ áiniana nusha umirkatniuitrume. Uunt akupin̄ ashí akupin̄ asamtai umirkatarum.

¹⁴ Tura ni akupeamur̄i ainia nusha tunaan túruinia núnaka asutiáti tura pen̄keran túruinia núnaka shiir awajsati tusa uunt akupin̄ akupkamu ásarmatai umirkatarum. ¹⁵ Nekas pen̄ker wekaamurm̄ij̄jai enentáimcha ainia nu netse chichaamur̄i itiatmamtkiatarum tusa Yus wakerawai.

¹⁶ Tunaanumiã an̄kant ajasu asarum pen̄ker wekasatarum. Túrasha wi an̄kant ajaschajak tusarum nán̄kamsarum yajauch túrawairap. Antsu Yusna asarum, ni wakera nuna umirkatjai tusarum anearum wekasatarum. ¹⁷ Chíkichcha shiir enentáimtustarum. Yus-shuar ainia nusha

aneetarum. Yus péñker asamtai ashankatarum. Uunt akupin shiir awajnsatarum.

Yus-shuarti katsuntratin

¹⁸ Takarniutirmesha ame úuntrum péñker shiir enentáimturmaksuisha tura yajauchiitkuisha umirkatarum. ¹⁹ Nekaatarum. Ántar wáitkiarmainia nuí, “Yus iirui” tu enentáimsa katsunteakrumka, ti penkeraiti. ²⁰ Yajauch túrawakmin asutiámamtai katsunteakmekka nuísha warin ati. Antsu péñker túrawakmin asutiámamtai katsunteakmekka júka ti penker túrame Yusaj. ²¹ Núnisan túrunatin achikmaitrume. Kristu wáitrutmasmiarme nuí, Wi túraj núnisan túrawarmi tusar wáitsamiayi. ²² Krístuka tunaan penké túrachmiayi. Tura chikichkinkesha penké anañkachmiayi. ²³ Kátsekeamsha Niñkia katsekachmiayi. Wáitkiamsha “yapajmiaktaj” tíchamiayi. Antsu “winia Apar Yus iísti’ tímiayi, Yus péñker túrin asamtai. ²⁴ Kristu Niñki ni ayashin ii tunaarin entsaki krístnum jarutramkamiayi. Tunáa enentáimtusairum tusa, antsu Yusaj péñker wekasamniuram tusa jarutramkamiayi. Atumí enentáin tsuártaj tusa Kristu asutniámiayi. ²⁵ Murik ni pujutairin waketitniun nékatsna ántsarmek atumsha menkaka wekaimiarme. Tura yamaikia atumí wáitmaurin waketitntrume. Atumí wáitmau Krístuiti, atumí enentáin wáinnia nu.

3

Nuatnaikiaru itiuur túratniuit

¹⁻² Tuma asamtai, nuwatiram atumí áishri umirkatarum. Ame-sha péñker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámekka chichaatsminin, niisha Yus-shuar ajastinian wakerittiawai. ³ Nu asamtai aya pátatek iwiarmampratniusha ti enentáimtusairap. Intiash ti penker iwiaratniusha, kuriijai iwiarmampratniusha, pushí ti kuitjai entsartincha ti enentáimtusairap. ⁴ Antsu, “nekas shíirmach ajastaj” tákumka, enentáimin “shiir kajechu átajai” tu enentáimsatarum. Nuka sakarchattawai. Tura nuka Yúsnumka ti penkeraiti. ⁵ Yaunchu núnisarañ nuwá Yúsan enentáimtusarmia nu, tura Yúsan shiir enentáimtikratniun wakeriarmia nu, ni áishrin umirkar nujai ni enentáin shíirmach ajarar pujuarmiayi. ⁶ Atumí weatři Sara ni áishrin Apráaman umirmiayi. Umirin asa, “winia uuntru” tınıuyayi nin. Atumsha péñker túrakrumka tura sapijmiatsuk wekaakrumka, Sarajai métek átatrume.

⁷ Tura áishmanitirmesha Yus wakerana nu nekaarum atumí nuwe shiir enentáimtusurum tsanintarum. Nuwemsha, nuwá asa, áishmanjai métek katsuntrachminiati. Tura niisha, ámijjai métek Yusa waitnenkartutairijjai tuke iwiaaku átinian takusminiati. Tu enentáimta asam ame núwem shiir enentáimtustá. Yus áujkuram itiuurchat atsuti tusarum túratarum.

Yúsnum péñker wekasatin

⁸ Nuyasha ashí Yús-shuartermin tájarme, aya chikichík enentaik atí. Waitnennairatarum. Nekas yatsum aneam núnisrumek anenaitiarum. Aya áminiuk enentáimtutsuk chikichan yáintaj tu enentáimsatarum. ⁹ Yajauch turamainiakuisha “yapajkiataj” tiirap. Katsekramainiakuisha “iikkiataj” tiirap. Antsu “Yus winia shiir awajtsuuti” tu enentáimsarum,

yajauch turamainiana nu péñker awajsatarum. ¹⁰⁻¹² Yus-Chichamnum júnis aarma asamtai nu túratarum:

Uunt Yus péñker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shiir pujustaj tákuñka tura tuke tsawant warastinian wakerana nu, péñker ímiastí, yajauch chichakaj tusa tura wáitruawaj tusa. Tunaanumiá kanaki péñkeran túratí. Tuke enentáijaj shiir átinian eakti.

Tu áarmaiti.

Itiurchat aín péñker túratin

¹³ ¿Yaki yajauch túrutmat péñker turamnisha? ¹⁴ Túrasha péñker túrayatmek wáitiakminkia Yus shiir enentáimtikramprattarme. Tuma asamtai ashamkartutsuk, sapijmiatsuk wekasatniuitrume. ¹⁵ Tura “Kristu winia Úntruiti” tu enentáimtustarum. Tura “¿urukamtia Yus-shuar ajasuitiam?” turamainiakuiasha, péñker áimkiamnium iwiarnarum pujustarum. Waantu enentáimtumatsuk, nin péñker enentáimtikrataj tusam túrata. ¹⁶ “Yúsaj péñker wekasataj” tu enentáimsarum wekasatarum. Yus-shuar asakrumin chíkich shuar ántar áujmatramainia nu ni ántar áujmatramsamun nekaawar natsaararat tusarum Yúsaj péñker wekasatarum. ¹⁷ Yajauch túrakur wáitsatniujajñkia nankaamas, Yus wakerakuñkia péñker túrakur wáitsatniuka ti penkeraiti.

¹⁸ Kristu ii tunaarín asakártaj tusa jarutramkamiaji. Ashí asakárma asamtai atak tunaan jarukchatniuiti. Niisha tunaan penké túrichuiitai, ii tunáa asakrin wáitrutmasmiaji, Yúsnum ejetamtai tusa. Ayashíñkia jakayat ni wakaníjjaj ni ayashí ataksha iwiaaku ajasmiayi. ¹⁹ Ni wakaníjjaj jakáa wakanin emetamu armia nuna etserkataj tusa wémiayi. ²⁰ Nusha yaunchu Nuai uunt kanun nájanuk siantu painti (120) uwi pujurmia nuj Yuska umirtukarat tusa ti nákamaitiat Nuai étserman umikcharmiayi. Nú kanunmasha ishichik, uchu, aents kanunam pujuinian yumíjjaj uwemtikrarmiayi. ²¹ Nu yumi Yus-shuarti imiantinian nakumui. Ii ayashí chamir awajsatai tusar imiantsuji. Antsu ii enentáí péñker atí tusar Yus sear imianji. Nujaj iisha uwemji. Jesukrístu nantakin asamtai, nujaj uwempraitji. ²² Tura Niisha nayaimpiniam weakupin pujutainium Yusa untsuuríni apujsamuiti. Túramtai nayaimpinmaya suntarsha, tura ashí kakaram akupin áiniana nusha Jesukrístun umirainiawai.

4

Ju nunkanam wáitsatin

¹ Kristu ni ayashíin wáitsa asamtai atumsha núnisrumek wáitsatin ákuisha, katsuntratjai titiarum. Ni ayashíin wáitiana nú shuar yajauchin páchiatsui. ² Antsu “iwiaakjana nuñkia Yusa wakeramurín tuke umirkatjai” tu enentáimiui. Ni ayashí wakerana nuna yamaikía páchiatsui. ³ Warí, Yúsán nékainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekrum ti yurumárum, enentáincha ajasrum charaatum ajatniusha, ántar-yusa namperiin yajauch ana nu najanatniusha nusha ashí wakerimiarme. ⁴ Tura surimiatsuk yajauch túrimiarmena nu iniaisa asakrumin, yaunchu atumjaj nuna túrin armia nu, “urukamtai iniaisara?” tusar yajauch áujmatramprume. ⁵ Túrasha ukunam nu aents ni túramurín etserkartatui. Iwiaaku ainia nunasha tura jákaru ainia

nunasha Neka awai. Nii nu aentsun sumamtikiawartatui. ⁶ Túrasha jaka armia nu Yusa shiir chichame ujankarmiayi. Ni ayashiiin ashí shuarjai métek jakamniatiatan̄ Yus iwiaaku pujana núnisan̄ ni wakanii iwiaaku pujusarat tusa ujankarmiayi.

Shuar yáintiniaitji

⁷ Ashí amuukatin jeatemayi. Tuma asamtai péñker enentáimsatarum; túrarum anearum Yus aju pujutarum. ⁸ Aneniamujai untsurj tunaasha tsan̄kuratin awai. Tuma asamtai ashí nankaamas nuamtak anenaisatarum. ⁹ Kajé-kajejainchu atumi jeen itiaaniatarum. ¹⁰ In an̄kant an̄kant shiir awajtam-satniun Yus ti núkap takakui. Tura in shiir awajtam-samujai chíkich shuarsha shiir awajsatarum tusa chíkich chíkich túratniun suramsaitji. Tuma asamtai péñker takaawa áintsarmek Yus amasmania nujai ame írutramuram yaintá. ¹¹ Etserkatniun Yus amasuitkiuin̄kia ame tamena nu, Yus tana nujai métek atí. Chíkich shuar yáintiniaitkiumka Yus amaana nú kakarmajai túrata. Ashí túramna nu Yusa naari shiir atí tusam Jesukrístu náarijajai túrata. Jesukristun ashí aents shiir enentáimtusartí. Tura ashí áentsnum ni kakarmarij tuke atí. Nuna tajai.

Yus-shuarti wáitsatin

¹² Aneamu yatsurtiram, ti waitsatin nekapramsartin jeartampramna nu nusháa enentáimprairap. Wáitsatin támatai, “¿urukamtai waita pujaj?” tu enentáimsairap. Kame túrunamniaiti. ¹³ Tuma aijn̄ shiir enentáimsatarum. “Kristu wáitsamuriñ métek-taku wáitiakun péñkeraiti” tu enentáimsatarum. Ukunam Kristu winchari wáinkiarum timiá warasmi tusarum túratarum. ¹⁴ Krístunu asakrumin katsekkramkachartimpiash. Túmaitkiuisha Yusa Wakanj shiir ana nu atumjijn̄ pujurtamkui shiir awajsamuitrum. Katsekkramainia nú shuar imia Yusa Wakanj̄n yajauch áujmataniawai. Tura átumka Yusa Wakanj̄ shiir awajearme. ¹⁵ Túra atumsha yajauch túrawaj̄rum aneartarum. Mankartana nu, kasamkana nu, tunáa túrana nu, tura chikichna páchiana nusha ni wáitsatniur̄inkete. Atumjain̄kia nu wáitsatniuka atsutí. ¹⁶ Tura antsu Krístunuj̄ti tusar wishikramuk wáitkiarmainiakui natsaarairap. Krístunu asam wáitiatmek, natsamtsuk Kristu naari shiir awajsata.

¹⁷ Yuska ni shuarj̄n nekapsatajtsa nan̄kamatniuiti. Tura nu tsawantcha jeayi. Yus imia in nekapramkuisha Yus-Chichaman umirainiatsna nú shuarsha urukawart̄in̄. Ti asutniáwartatui. ¹⁸ Imia Yus umirjinia nu uwempratniur̄j̄ itiurchataitkiuisha tunaan túruiniana nusha urukawart̄in̄. ¹⁹ Tuma asamtai Yus wakeramujai wáitiainia nu, niisha Yus najanamu asa Yus iirsatí tusa tuke péñker túratí. Warí, Yuska tuke péñker túrichukait.

5

Yus-shuara uuntri túratin

¹ Yamaikia Yus-shuara úuntrītiram, jintintjarme. Wisha núnisnak Yus-shuara úuntrīntjai. Kristu wáitsamuriñ wáinkiaitjai wissha. Tura ukunam ti shiir átatna nuj̄ chíkich Yus-shuara uuntria núnisnak wissha pachiinkiat̄tajai. ² Yus-shuar ame ístiniaitmena nu, péñker iistá, murikiu wáinin ni murikr̄n̄ wainnia áintsamek. Nakittsuk, shiir enentáimsam túrata, Yus wakerana nuke. “Chíkich akupta asamtai túrattajai” tútsuk tura nujaī kufr̄intin̄ ajastin̄ enentáimtsuk nekas wakeritia, Yusa takat̄rī asamtai. ³ Turasha, “Yús-shuara uuntrī ajasan, Yus-shuaran akuptaj̄”

tu enentáimsaip. Antsu shiir túramurmijjaj Yusa murikrj jintintiata. ⁴Nuñkia murikiu wainniu Uuntrj taa wantiniak iwiarmamtai tawasap ti shíirmachia núninian suramsattawai. Aents súana nú shíirmach wari mamurtiniaiti. Tura Úuntrum ámin suramsattana nuka penké mamur-chattawai.

Yus-shuarti umirnaikiatin

⁵Tura natsatirmesha atumí uuntrj umirkatarum. Kame yaunchu Yús-Papinium aarma asamtai ashí Yus-shuartiram nankaamantu enentáimtumatsuk umirnaikiatarum.

Waantu enentáimtuma núnaka Yus nakittiawai. Antsu nankaamantuchu enentáimtuma nuna Yus waitnentak yayawai. Tu aarmaiti.

⁶Wats, Yus timiá kakaram asamtai, amek nekamam, péejchach enentáijjaj enentáimtumasta. Nuñkia tsawant jeamtai ni wakerak Yus ámin penkerj awajtamsattawai. ⁷Yus ámin ti enentáimturmakui ame itiurchatrum ainia nu Yus ashí iiktusta.

⁸Aneartarum tura ímiastarum. Íwianch atumí nemasrj ana nu, uunt yawáa nuke, yanak emesraintiaj tusa eəak tentaa wekaawai. ⁹Tura tuke Yus nekas enentáimtusrum surimiaktarum. Ashí nunkanam Yus-num atumí yachj ainia nu átum wáitiarmena núnisan wáitiainiawai. Nusha kajinmakchatniuitrume. ¹⁰Wats, ishichik tsawant wáitsarmena nu nankaasmatai Yus ataksha penker awajtamsattarme. Tura numi wewe wajana núnisan ikiakátmartatrume. Tura Yus ikiakárma asarum ni jintijn tuke penker wekasattarme. Ju Yus tuke in waitnentramtsujik. Tura iisha Jesukristunu asakrin Nijjaj métek Yus ni shiir pujutainium tuke shiir pujusmintrum tusa achirmakuitji. ¹¹Nú Yúsnasha ashí aents shiir enentáimtusartí. Tura ashí áentsnum ni kakarmarj tuke atí. Nuke ati.

Amiak áujmamsamu

¹²Serpanujaj ju papin ishichik áarmaj nuna akupeajai. Serpanu Yusjaj penker wekaak Yusnum winia yatsur ajasuiti; núnaka nékajai. Yus waitnentrama asa ti yainmakmania nuna enentáimtikeajrume ju papijjaj. Tura tuke ni waitnenkartutairijn wekasatarum tájarne.

¹³Papirúnianmayá atumjaj métek Yus achikma áinia nu amikmaatmarme. Winia uchir Markus núnisan amikmaatmawai.

¹⁴Yusaj yachj ajasu asarum anenaisrum shiir awajnaisatarum. Jesukristunu ajasuitrumna nuna Yus imiatkinchanum pujustinian suramsarat tusan wakerajai.

Nu atí.

PÍTIUR Ataksha papin áarar akupkamu

Pitiur Yus-shuaran áatramiania nu

¹ Wikia ju papin aajna ju Semuñ Pítruitjai. Jesukrístu akatramu asan ni takarniurintjai. Ii Yusrj tura in Uwemtikramin Jesukrístu umirumna nuna atumniasha juna áatjarme. Niisha ashí áentsun métekrak enentáimtin asamtai atumsha iijiai métek Niiniu ajasurme. Nuka ti penkeraiti. ² Yus, tura ii Uuntrj Jesussha nékarmena nú núkap nekaki wéakrumin, Yuska atumin ti nukap yáinmaktatrum tura ti nekas imiatk-inchanum pujustinian suramsattarme. Nuna nekaan tuke núnisañ atí tusan wakerajrume.

Yusaj páchitkia atin

³ Yus uunt asa tura ashí túramnia asa, umirtukat tusa achirmakuitji. Nii neka asar atsumajnia nu wáinkiaitji. Yus-shuarti wekasatniusha, tura Nin aneatniusha ii atsumajnia nuna Yuska kakaram asa suramsaitji. ⁴ Niisha uunt asa tura tujinkiachu asa ni chichameñ suramsaitji. Nu chichamsha ti kakarmaiti tura ti penkeraiti. Nu chichamjai atumsha atumí ayashj yajauch wakerana nuyá uwemprarum, Yusaj páchitkia átinian suramsaitrume. ⁵ Yus umirkarme. Yamaikia juna túrataj tusarum kakartiniaitrume. Ti penker wekasatniuitrume. Nuyá Yusna nekaatniuitrume. ⁶ Nuyá yayauch túrashtin ímiastiniaitrume. Nuyá katsuñratniuitrume. Nuyá Yus shiir enentáimtusurum wekasatniuitrume. ⁷ Tura nuyá ashí shuar shiir enentáimtustiniaitrume. Tura nu nañkaamas ashí shuar aneatniuitrume.

⁸ Ashí nu túrakrumka, tura tuke túrukum wéakrumka, nakiarchattarme. Túrarum ni takatrj émamkesurum takastatrum tura ii Uuntrj Jesukrístu nekas nekaattarme. ⁹ Tura nuna túruiniatsna nuka, kusurua áanin áiniawai. Jesukrístu wakeramurjñ enentáimtuiniatsui. Ni tunaariya uwemprarmia nuna kajinmatainiawai. ¹⁰ Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka penké iniarchattarme. ¹¹ Tura ii Uuntrj Jesukrístu uwemtikramprajnia nu, Nii tuke akupeana nuj, nakittsuk shiir awaintiamattarme.

¹² Tuma asamtai nékarminiñ tura Yusna nekas ana nuyá kanaat-srumniñ tuke enentáimtikratjarme. ¹³⁻¹⁴ Nekaatarum. Winia jákatniurun jeatema nuna ii Uuntrj Jesukrístu ujat kayi. Tuma asamtai iwiaaku pujajna jujk atumin tuke enentáimpratarum tusan jintinratniuitjarme, tu enentáimsajai. ¹⁵ Tura wi jakamtai, wi aajna juna tuke kajinmatkijrum tusan, wi jeajna nuna túrattajai.

Kristu waantu ajasun wáinkiarminia nu

¹⁶ Ii Uuntrj Jesukrístu kakarmari tura ni táratniuri etserkamajnia nu, aya áentsnumia ántar chichamchauyi. Antsu imia ii jiiijai Uunt Jesukrístu waantu ajasu wáinkia asar ukajmajrume. ¹⁷ Tura Apa Yus Jesukristun shiir waantu awajsamiai nuj, ni imia shiir pujutairiya chichaak tímiayi, “Juika winia ti aneamur Uchiruiti. Nin ti wararjai.” ¹⁸ Iisha naint “Yusna” tájnia nuj Niiijai pujá asar nu nayaimpinmayá chichaamu paant antukmajai.

¹⁹ Tura nuna nan̄kaamas ti nekasa nu, Yúsnan etserin yaunchu etserkarmia nusha nékaji. Ju étserma jusha, tsawant tsawaatsain̄ kiritniunam ji keak tsáapin awajeana áintsan̄ asamtai, péñker enentáimta asarum péñker túrarme. Tura Kristu taa, yáñkuam etsantea núnisan̄ atumí enentáin̄ ashí paant awajsattawai. Tura nu tsawant jeatsain̄ nu étserma tuke péñker enentáimtustarum. ²⁰ Tura ju emka nekaatarum. Shuar aya ni enentáimmiarjijain̄, Yusa Wakan̄jijain̄chu, Yus-Chicham urukamtai tu chicháa nuna nekaatniun jeatsui. ²¹ Warí, Yúsnan etserin yaunchu etserkarmia nu, aya ni wakeramurjijain̄ tícharmiayi. Nu áishman̄kan enentáin̄ Yus pujursarmiyai. Tuma asa ni tiarmia nuna Yusa Wakan̄jijaintintiam tiarmiyai.

2

Wait chichaman unuiniainia nu (Jútas 4-13)

¹ Tura Israer-shuarnum wait chichaman etserniusha páchitkiarmiyai. Atumíincha wait chichaman unuiniiau páchitkia ártatui. Niisha awajimtikrampratniun wakeruiniak wáitian ti yajauchin̄ uñkar unuiniarartatui. Tura “Uunt Jesus uwemtikrurmia nusha ántrai” tiartatui. Nuna takui ni amuukatniurjisha wárik jeartatui. ² Tura untsurí shuar ni yajauch túruiniamurjín lírsar métek túrawartatui. Iis, “Yus-Chichaman unuiniaitjai” tuñiyatan̄ imiá yajauch túruiniakui untsurí aents “Yus-Chicham ántrai” tiartatui. ³ Kuítian ti wakeruiniia ásar, wait chichaman unuitiamprar akíam kuítiniawartatui. Tura nú shuar yaunchu Yus jákatniunam sumamtikiawarma ásar, ni amuukatin tsawantri jeatemayi. ⁴ ¿Warí? Yuska ni suntarī nayaimpiniam pujuarmia nunasha pen̄ké tsan̄kurachmiayi. Antsu nayaimpinmayā jinium akupkarmiyai. Tura nekapsatin tsawant jeatsain̄ kiritniunam jinkiamu emetamu pujuiniawai. ⁵ Yáunchuyā shuarnasha Yus tsan̄kurachmiayi. Antsu amuukarat tusa amaarkatniun akuptukarmiyai. Antsu aya Nuain, Yusjai wekasatniun etserin asamtai ni shuarī siati armia nujaī uwemtikramiyai. ⁶ Enentáimpratarum. Sutuma pépruncha tura Kumura pépruncha nayaimpinmayā jin akuptuk Yus mash amukmiayi. Aya yún̄kunmik awajsamiayi. Ukunam nu túrunamun nekaawar, shuar tunáa túratin tsúumainian nekaawarat tusa túramiyai. ⁷ Tura Yus Ráutan uwemtikramiyai. Péñker shuar asa, Sutumanmayā shuar imiá yajauch ásar tunáa túruiniakui, Raut kúntuts enentáimsamiayi. ⁸ Péñker áishman̄ asa, nuyá shuara yajauchirjín wáitianiak, ni enentáin̄ péñker asamtai tuke tsawant kúntuts enentáimiuk wáitmiayi. ⁹ Tura incha tunaan iniakturmakrin, nu tunaanum nupetnakchati tusa Uunt Yus uwemtikrampramniaitji, ni umirka asakrin. Túrasha yajauch shuárnaka nekapsatin tsawant jeakui ti asutniáwarat tusa Yus yámaikikia apujeawai.

¹⁰ Tura Yus akupeana nuna umirkatniun nakitrar ni yajauch wakera-murjín túruinia nunasha Yuska nekas asutiáttawai. Enentáimcha ániawai. Tura ni wakeramurjiniak wakeruiniawai. Niijjaī nan̄kaamas akupin ainia nuna yajauch áujmatainiawai. ¹¹ Warí, imia Yusa suntarī Yusaj matsatania nu, nuna túratniun tsúumainiawai. Nan̄kaamas kakaram tura nan̄kaamas uunt ániayat nu akupniun katsekainiatsui.

¹² Nu áishman̄sha enentáincha yajasma núnin ániawai. Achikiar mantamnatniuk akiinia ániawai. Enentáimtsuk nan̄kamsar yajauchin

chichainiawai. Tuma ásar yajasma núnisan_u jákartatui. ¹³ Chikichan wáitkiamia áintsan_u wáitsartatui. Tuke tsawant ni wakeramunak túruiniak “waraajai” tuiniawai. Tura atumjai_i irunar yurumáiniayatan_u atumin anan_ukramawar warainiawai. Nuka natsantaiti.

¹⁴ Nuwan_u wakerutskeka íniatsui. Tunaan yawetainiatsui. Yúpichuch ainia nú shuaran netse túratniun wakerumtikiainiawai. Kuítian wakeruktinniasha ti nékainiawai. Jákatniunam sumamawaru áiniawai. ¹⁵ Yúsnumaan_i naka wétsuk awajirarai. Peura uchir_i Paraam Yúsnan etserniuiat yaunchu awajimia núnisan_u awajiniawai ju_u shuar. Paraamka tunaan tura, kuítian achiktinian ti wakerukmiayi. ¹⁶ Tura niisha tunáa túratajtsa weai_i Yuska umpuurun chichachun aents chichaana nujai_i métek chichamtikiamiayi. Nuñkia umpuuru timia nujai_i Yúsnan etserin ni netse túratniur_in enentáimiar iniaisamiayi.

¹⁷ Nu áishman_usha yumirmat kuyua núnis áiniawai. Tura núnisan_u yurañmisha k_iariat nase umpuim menkaana nu, yumi ajuarcha ásar, penké ántar áiniawai. Warí, Yús-Chichamjai_i áentsun yainiainiatsui. Niisha imiá kirit ámanum tuke pujustin áiniawai. ¹⁸ Niisha ti chichainiayat ántar chichainiawai. Yajauch túratniujai_i tura ayash wakera nújaisha páchim túriarmia nuyá kanakiarua nú shuaran ataksha tunaanum ajuartajtsa wakeruiniawai. ¹⁹ “Iiya núnis túrakrumka an_ukant átatrume” tu wénawai. Túrasha imia niñki ni tunaari_in emetamu áiniawai. Páantchakait. Shuar warí tunaajaim_u nupetnaka, nuna emetamur_inti. ²⁰ Kame shuar, uunt Jesukrístu uwemtikiartin ana nuna chichamen_u nékainiak ju_u nuñkanam yajauch ainia nuyá uwempra ainia nu, tunáa nupetkam atak yajau-chiniam iniainiakka, nuik pujumia núja_inkia nan_ukaamas yamá imiá yajauch pujuiniawai. ²¹ Yusa akupkamur_in imiá péñkera nuna Yus nú shuarnasha súarmiayi. Túrasha nékainiayat tunaanum waketkiaru ásar ti asatniáwartatui. Tuma asantai, nekas jintia nekaachuitkiñka maak árainti. ²² Tíchamukait, “yawá iyak ataksha yúawai,” tura, “kuchisha imiainiuiat ataksha tsakusnum maajkimiui.” Nu áishman_usha núnisan_u yajauchiniam ataksha wáketainiawai.

3

Uunta tátintri

¹ Aneamu yatsurtiram ju_u papin jimiará áatjarme. Mai papinium winia jintintiamurjai_i atumí chamir enentáin_u enentáimtikratjarum tusan wakerajrume. ² Yúsnan etserin, péñker wekain armia nuna etserkamur_i enentáimturarum. Tura ii Uuntri_i akupkamur_in ni akatramurijjai_i ujatmakarmia nusha enentáimpratarum. Jesukrístu uwemtikrampramaj nuna chichamen_u tajai.

³ Jusha emka nekaatarum. Amuamu tsawantin Yúsnan wishikin wantinkiertatui. Tura niisha ni yajauch wakeramur_in túrusar wekasartatui. ⁴ Tura juna tiartatui. “¿Kóstuka “wi atak tátatjai” timia nusha urukuit? Warí, ii uuntri_i yaunchu kajin_ukiarmia nuyá yapajíáchmaiti. Yus yaunchu ju_u nuñkan najanamia nuyá yamaisha tuke núniskete” tiartatui. ⁵ Túrasha nuñkancha nayaimpincha Yus yaunchu najanamia nuna nekaatniun nakitiainiawai. Yusa chichamejai_i nuñka entsaya jiiñkimiayi tura nuñkasha entsá nanatrawai, Yus timia nujai_i métek. ⁶ Tura ukunam nu nuñkan amaarkamujai_i Yus emesramiayi. Ashí nuna nekaatniun nakitiainiawai. ⁷ Tura Yus tiniu asantai nayaimpisha

nun̄kasha yamáya nuka jijjaj emesnarat tusa ikiusma áiniawai. Yus áentsun nekapsattana nu tsawantaj yajauch aents emesnartatui; tura jisha nu tsawantaj nun̄kancha nayaimpincha áesattawai.

⁸ Tura ju_{sh}a, aneamu yatsurtiram, enentáimsatarum. Uunt Krístujain̄kia chikichík tsawant mir uwiya núniskete; mir uwisha chikichík tsawanta núniskete. ⁹ Uunt Kristu, “atak tátatjai” tana nuna umitsuk men̄kakashtatui. Áyatik áentsti “wau taatsui” taji. ¿Urukamtai wau taatsua? In áentstin nákarmaji. Shuar chikichíkisha men̄kakajin̄ tusa nakitiawai. Antsu ashí shuar enentáin̄ yapajjáwarat tusa wakerawai. ¹⁰ Tú_rasha Uunta tsawantr̄j aya aneachma jeattawai. Kasa aya aneachma kiritniunam taana núnisan̄ tátatui. Nu tsawantin nayaimpisha ipiamta núnis charáa timiatai men̄kakattawai. Tura nu_j ashí ír_{un}na nú_rtiuk esaawartatui. Tura nun̄kasha tura ashí ír_{un}na nusha esaawartatui.

¹¹ Ashí nu emesnartin neka asarum atumsha imiá nekas Yus tuke enentáimtusurum, takamtsuk umirkarum wekasatniuitrume. ¹² Yusa tsawantr̄j wárik tati tusar, jintiá ímprusar nákastiniaitji. Nu tsawantaj nayaimpisha esáa emesnartatui, tura ashí ír_{un}na nú_rtiuk ti tsuer ajas entsamnattawai. ¹³ Tura iikia yamaram nayaimpisha, yamaram nun̄kasha ati tusar nákaji. Nu átatui, tímiayi Yus. Tura nu_jsha aya pen̄kerak átatui.

¹⁴ Nu tuma asamtai, aneamu yatsurtiram, ju túrunati tusarum ná_karmena nu_j, imiatkinchanum wekasam chamir enentáimjaj maku-uchmin Yus wáitkiati tusarum wekasatarum. ¹⁵ Ju nekaatarum. In uwentikramprataj tusa Yus ti ná_karmaji. Ii aneamu yachi Páprusha núnisan̄ Yus ni nekatair̄in̄ susamia tímiatrusan̄ áatramprarmame. ¹⁶ Ashí papí aarmia nu_j Pápruka wi tajana nuna chichaawai. Kame ni áarmar̄i chíkichka ishichik nekaachminiusha áiniawai. Né_kachu ainia nú_rshuarsha, tura Yúsnum tariar_{ch}a ainia nusha Papru áarman yapajjáwar nusháa jintintiainiawai. Tura chí_kich chichamsha Yus-Chichamnumiá ana nuna núnisan̄ túruiniawai. Túmainiakka nin̄ki emesmamainiawai.

¹⁷ Wátsek, aneamu yatsurtiram, túruntsajin̄ ujakjarmena nu neka asarum, yajauch shuar anan̄kramattsá wakerutmainiak awajimtikrurajin̄ tusarum, tura Yusaj tariarurmena nuyá iniarajin̄ tusarum anearum wekasatarum. ¹⁸ Tura ii Uuntr̄j Jesukrístu in Uwentikkiartin ana nu, yamá né_karmena nú_rnan̄kaamas nekaatarum. Tura enentáimin̄ nú_rnan̄kaamas tariarum wetarum. Yamaisha tura tuke, ii Uuntr̄j Jesukrístu náar̄in̄ uunt awájsartí. Nu atí.

JUAN

Emka papin áarar akupkamu

Tuke iwaaku átinia nérentin Chicham ana nu

¹ Ashí nan̄kamamia nú yaunchu Yusa Uchirí tuke pujuuyayi. Nusha iisha anturkaitji. Nekas ii jiijjai wáinkiaitji. Wáinkiarsha ii uwejejaisha antin̄kiuitji. Niisha Yúsán ti paant awajeak, Chícham tíminiaiti. Tura tuke iwiaaku átinia nérennuiti. Nuna áateajrume. ² Iwiaaku átinia nérenniusha paant nekanamiayi, nusha Jesukristuiti. Iisha Nii wáinkia asar nu étsereaji. Tura tuke iwiaaku átinia nérenniurj asa tuke Yus Apajaj pujuuyayi. Tura yamaikia iini paant ajatramsakrin atumniasha ujaajrume. ³ Ii Yus Apajajisha ni Uchirí Jesukristujajisha tsan̄n̄kiar nekas chikichik ajaji. Tura atumsha núnisrumek iiijjai chikichik ajasuk tusar wáinkiamajnia nuna anturkamajnia nunasha ujaajrume. ⁴ Ti shiir warastarum tusan juna áatjarne.

Yus tsáapniniaiti

⁵ Yus imiá tsáapnin asamtai kiritin Niinkia pen̄ké atsawai. Nu chichaman Jesukristu in unuitiamprakrin nuna atumniasha ujaajrume. ⁶ “Niijjai tsan̄n̄kia pujaji” táyatar kiritniunam pujustinia áintsar tunaanum pujakrikia wáitraji tura nekas pen̄ker ana nu túratsji. ⁷ Yuska tuke tsáapninium pujuwiti. Iisha núnisrik tuke tsáapninium pujakrikia nuámtak nawamnaikiar pujuiniaji. Túrakrin Yus ni Uchirí Jesukristu numpéjai ashí ii tunaarj japirtamji.

⁸ “Wi tunaan túrichuitjai” tákurkia ímia iik anan̄mamaji. Nekas ana nu nékatsji. ⁹ Antsu ii tunáarj Yus paant ujakrinkia Yuska tsan̄kurtamprattaji. Tura ii tunaarj in asakátramprattaji. Yuska ti pen̄ker asa Nii tana nuna tímiatrusan̄ umikmin asa túrattawai. ¹⁰ Kame “Tunaan túrichuitjai” tákurkia nujaj “Yus wáitriniaiti” taji. Ni chichamesha ii enentáin pujurtamtsuji.

2

Jesukristu in Yúsán áujturmaidji

¹ Yus-shuartiram, tunaanum iniaarairum tusan ju papí áateajrume. Túrasha Yus-shuar tunáa túramtain̄kia Apa Yusan ii áujturmau awai. Nuka Jesukristuiti. Niisha ti pen̄keraiti. Niisha Yúsán áujturmakui Yusjaj ataksha iwiaarar pujustatji. ² Jesukristu ii tunaarj in asakártaj tusa jarutramkami-aji. Túrasha aya íiniunkechu antsu ashí shuara tunaarj in asakártaj tusa jarukmiayi.

³ Yus tana nu umirkurkia nuikia Yus nekas nékaitji. ⁴ Tura shuar “Yúsán nékaitjai” tayat Yus tana nuna umirchakka wáitrawai. Nekasa nuka ni enentáin atsawai. ⁵ Antsu shuar Yus tana nuna umireakka Yúsán ti shiir aneawai. Túrakur Niijjai tsan̄n̄kiar pujamu nékaji. ⁶ “Yusjaj tsan̄n̄kia wekaajai” tana nú shuar Jesukristu wekasamia núnisan̄ wekasatniuiti.

Yamaram akupkamu

⁷ Yatsuru, yamaram akupkamun áattsujrume. Áyatik yámankamtaiknumiá antukmiarum nunak tájarne. Ashí atumin jintintiamu yaunchu akupkamuiti. ⁸ Túmaitiat nekas yamarna

áitkiasnak áateajrume. Nu akupkamun Kristusha nekas iniakmasmai. Atumincha nu akupkamu nekas paant awajsamuiti. Nujai kiritin menkaatemka asamtai tura nekas tsaapniñkia paant tsaapnirtasa pujakui nu akupkamun ataksháa aateajrume.

⁹ Shuar “tsáapninium pujajai” táyat chíkich Yus-shuaran nakitiakka tuke kiritniumam wekaawai. ¹⁰ Yus-shuaran aneana nu nekas tsáapninium pujawai. Niisha iniaatsuk chikichnasha tunaanum ajuarchamniaiti. ¹¹ Tura shuar chíkich Yus-shuaran nakitiakka kiritniumam tuke wekaawai. Tura kiritniumam iimiu asa itiuraani wea nuna nékatsui.

¹² Uchitirmincha, Jesukristu jakamujai atumí tunaari tsankurnaru asakrumin juna áateajrume. ¹³ Úntirmincha yámankamtaiknumiá tuke pujuuya nu nekáa asakrumin juna áateajrume. Únmarutirmincha uunt iwianch nupetka asakrumin juna áateajrume.

Uchitirmincha, Yus Apa nekáa asakrumin áateajrume. ¹⁴ Úntirmincha yámankamtaiknumiá tuke pujuuya nu nekáa asakrumin juna áatjarme. Únmarutirmincha atumí enentáijai Yus-Chicham umirkarum kakaram asarum íwianch nupetka asakrumin juna áatjarme.

¹⁵⁻¹⁷ Aya áentsnumiá ana nu yakiyanchuiti. Apa Yus súsachuiti. ¿Warimpiait nu? Júiti: ame ayashim wakerana nusha, ame íisam takustaj támena nusha, tura nankaamantu ajastin. Nuka ju nunkanmaya áiniawai. Shuar aya nunak wakerak Yúsnaka aneatsui. Kame ju nunkasha amuukattawai. Ashí nu wakeruktincha ti nekas amuukattawai. Túrasa shuar Yusa wakeramurin umiana nu tuke iwiaaku pujustatui Yusjai. Nu asamtai atumsha ju nunkanam ana nu pachikiairap. Tura aya juyá ana nu aya tákustin enentáimsáip.

Nekas chicham tura wait chicham

¹⁸ Uchirú, amuukatin tsawant jeatemayi. Atumsha Kristu nemasri tátin antukuitrume. Yamaikia untsurí Kristu nemasri wantinkiarmatai amuukatin tsawant jeatemayi. ¹⁹ Nusha ii weeak ármayi. Túmaitiat nekas Yus-shuar ácharmayi. Nekas Yus-shuar ániakka tuke iijai irunar pujuaraayi. Tura jínkiarmatai nekas Yus-shuarcha ainia nu paant nekanamniaiti.

²⁰ Antsu atumniaka Yusa Shiir Wakanin Kristu suramsamtai ashí paant nékarme. ²¹ Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarme. Wáit-chichamsha nekas-chichamsha penké nushaachuk ainia.

²² Wáitrin júiti: Jesusan “Yus anaikiamuka Krístuchuiti” tana núiti. Núiti nekas Kristu nemasri. Yus Apancha ni Uchirincha nakitia asa Kristu nemasrinti. ²³ Yusa Uchirin nakitiainia nu Yus Apajajisha tsanin pujatsui. Tura Yusa Uchirin shiir awajea nu, Yus Apajajisha tsanin pujawai.

²⁴ Yámankamtaiknumiá antukmiarum nu atumí enentáin pujurtamati. Nu túrakrum atumsha Yusa Uchirijajisha Yus Apajajisha tuke tsaninkrum pujustatrume. ²⁵ Jesukristusha Niijai tuke iwiaaku pujustinian tsankatramkaitji.

²⁶ Anankartin írunkui juna áatjarme. ²⁷ Atumniasha Jesukristu Yusa Shiir Wakanin suramsakrumin, nu Wakan tuke pujurtamkurmin shuar jintintramatin atsumatsrume. Antsu Yusa Wakaní ashí jintintramprume. Ni jintintrammasha imiá nekas asa wáitchaiti. Tuma asamtai Nii jintintramna áintsarum Krístujai tuke tsaninkrum pujustarum.

²⁸ Yamaikia, uchiru, Krístujaj tuke tsaniñkrum wekasatarum. Nu túrakrikia Nii támatai natsamtsuk ti shiir inkiunaiktatji. ²⁹ Atumsha Jesukrístu ti penkeru nu nékarme. Núnisan ashí shuar penkeran túruinia nuka Yusa uchirí ániawai. Nusha nekaatarum.

3

Yusa uchirí ániawai nu

¹ Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchirintji. Tuma asakrin jú nunkanmaya Yús-shuarcha nekarmainiatsji. Kame Yusnasha nékainiatsui. ² Aneamu yatsurtirmea, júna tájarne: nekas Yusa uchirí ajasuitji. Kame ukunam urukuk átají nusha nékatsji. Túrasha jú paant nékaji: Jesukrístu támatai imia Nii paant wáinkiar Niijjaj métek ajastatji. ³ Tura shuar shiir enentájjaj nuna nákkaka imia niñki shiir awajmamui Jesukrístujaj métek shiir atajai tusa.

⁴ Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin. ⁵ Jesukrístu ii tunaari asakártaj tusa jú nunkanam támia nu nékarme. Tura Niñkia tunaan túrichuyayi. ⁶ Tuma asamtai shuar Niijjaj tsaniñ wekáa nuka tunaanum wekaatsui. Antsu shuar tunaanum wekaakka nu shuar Krístun wáinchaiti, núnisan nékachuiti. ⁷ Uchiru, shuar anañkramawairap. Péñker túrinkia Krístu ti penker asamtai niisha péñkeraiti. ⁸ Antsu shuar tunaanum wekaana nu iwianchnaiti íwianch tuke tunaan túrin asamtai. Yusa Uchirí jú nunkanam táwiti ashí íwianch túramun emesrataj tusa.

⁹ Shuar nekas Yusjaj akiinia nu tunaanum wekaatsui. Yusa uchirí asa Yusa iwiaakmarijjaj wekaawai. Tuma asa tunaanum tuke wekaatsui. ¹⁰ Shuar péñker túratsna nuka tura Yus-shuaran kajera nuka Yus-shuarchaiti. Nujaj Yusa uchirí ainia nusha tura iwianchi uchirí ainia nusha paant nekaamniaiti.

Mai anenai ajatin

¹¹ Atumsha yámankamtaikniumiá chicham antukmiarum nu júiti: mai anenai ajartin. ¹² Iisha Kañkia áanin áchatniuitji. Íwianch-shuar asa ni yachin máamiayi. Tura ¿rukamtai maamia? Enentaimprata. Nii yajauch asa tura ni yachi péñker asamtai máamiayi.

¹³ Yatsurtiram, jú nunkanmaya shuar nakitramainiakui ti enentáimsairap. ¹⁴ Iikia jákatniunmaya uwempra asarⁱ nekas iwiaaku pujaji. Túmakur Yus-shuar ainia nu aneaji. Nujaj yamaram iwiaakma takakjinia nu imiá páantaiti. Shuar Yus-shuaran aneachkunka tuke jákatniunam wekaawai. ¹⁵ Shuar Yus-shuaran nakitiakka mañkartinia núnisaiti. Tura mañkartinka tuke amuicha iwiaakmanum pujuiniatsui. Nuka nékaji. ¹⁶ Jesukrístu in jarutramka asakrin nujaj nekas in anenmaj nu nékaji. Iisha núnisrik Yus-shuar ainia nu ti aneakur ni yaintai tusar jarukmin átiniatji. ¹⁷ Túrasha shuar chíkich Yus-shuar atsumana nuna takakiat waitnentachkunka nekas ni enentájjaj Yúsán aneawash. ¹⁸ Uchiru, aya chíchamjain anenain áchatniuitji antsu nekas aneniakur péñker túrar yáiniaiktiniatji.

Yusaj natsamtsuk jeamniatji

¹⁹ Jujaj ii Yúsaj sapijmiatsuk jeatniusha tura nekas Yus-shuaraitji nu nekaatniusha nekapmampramniatji. ²⁰ Ii enentái yajauch

túramun enentáimtikramkurnisha Yus iijjaj nan̄kaamas ashí mash nékatsuk. ²¹ Tura, aneamu yatsurtiram, ii enentáí yajauch túramun enentáimtikramchakrinkia Yúsaj sapijmiatsuk jeamniaitji. ²² Tura ni wakeramu túrakrikia tura ni chichamesha umiru asakrin ashí ii seaj nuna suramsattaji. ²³ Júiti Yus akupkamu: ni Uchirí Jesukristu nekas enentáimtustin tura Kristu timia áintsarik shuartisha mai anenai ajartin. ²⁴ Shuar ni chichamen umía nuka Yusjaj tsanin̄ wekaawai tura Yus niijjaj tsanin̄ wekaawai. Mai chikichik ajasu ániawai. Tura Yusa Wakanj̄ ii enentáin̄ pujá asamtai nujaj Yus iijjaj tsanin̄ wekaana nu nékaji.

4

Yusa Wakanisha tura Kristu nemasrj̄ wakancha

¹ Aneamu yatsuru, untsurí shuar wáitruiniak “wi Yúsnan etserniuitjai” tuiniawai. Tuma asamtai ashí shuar “wi Yusa Wakanin̄ takakkun chichaajai” tuinia nu péñker nekapsuk enentáimtusairap. Antsu ísrum nekas Yusa Wakanim̄piashit tura chikich wakaniashit nu nekaatarum. ² Jujaj nekapsarum ya nekas Yusa Wakanin̄ takaka nu nekaattarme: Shuar “Jesus Yusa Uchirí Krístuiat nekas aents ajas ayashimkiamiayi” tana nu Yusa Wakanin̄ nekas takakui. ³ Tura Jesusan tu enentáimtatsna nuka Yusa Wakanin̄ takaktsui antsu Kristu nemasrj̄ wakanin̄ takakui. Kame Kristu nemasrj̄ wakan tátin̄ tama ántichukaitrum. Nu wakan ya- maikia ju nun̄kanam táwiti.

⁴ Uchiru, átumka Yusna asarum Yus atumí enentáin̄ pujawai. Tura ju nun̄kanmayá shuara enentáin̄ íwianch pujawai. Atumijn̄ pujana nuka niijjaj nan̄kaamas kakaram asamtai wáitrin̄ ainia nu nupetkaitrume. ⁵ Niisha ju nun̄kanmayá ásar aya ju nun̄kanmayan̄ áujmatainiawai. Túmainiakui ju nun̄kanmayá shuar ti péñker anturainiawai. ⁶ Antsu iikia Yúsnaiti. Tuma asakrin Yúsna nékainia nu anturtamainiaji. Tura Yúsna chu ainia nu anturtamainiatsji. Nujaj nekas Wakanin̄ takakusha tura wáitrin̄ wakanin̄ takakusha nekaamniaiti.

Yus tuke anenkratniuiti

⁷ Aneamu yatsuru, anenaitin̄ Yúsnumiá asamtai mai anenai ajartai. Shuar anenkratniua nuka Yusa uchirí asa Yúsna ncha nékawai. ⁸ Shuar anenkratcha nuka Yúsna ncha nékatsui. Kame Yuska tuke anenkratniuiti. ⁹ Tuma asa ni Uchirí chikichkiniak ju nun̄kanam akupturmakmiaji. Iisha ni túrunamujaj nekas iwiaaku pujaji. Nujaj Yus in̄ yáinmak ni anenkrattain̄ paant iniakturmasmiaji. ¹⁰ Jujaj nekas anenkrattain̄kia paant nekanamniaiti: ii Yus aneaj núchaiti. Antsu ii ti tunáa árinin̄ Nii aneanchmaitiatan̄ Yuska ti anenma asa ni Uchirin̄ ii tunaarin̄ asakarat tusa akupturmakmiaj nujaj nekas nekanamniaiti.

¹¹ Aneamu yatsuru, Yus núnis anenma asakrin iisha núnisrik mai anenai ajartai. ¹² Chikichkisha Yúsna wáinkichuiti. Túmaitiat mai anenai ajakrikia Yus ii enentáin̄ pujurtamkui Niijjaj métek anenkratin̄ ajaji. ¹³ Yus ni Wakanin̄ suramsa asakrin Yus iijjaj tsanin̄ wekaana nusha tura ii Niijjaj tsanin̄kia wekaajnia nusha, nujaj nékaji. ¹⁴ Yus Apa ni Uchirin̄ ashí shuaran uwentikrarat tusa ju nun̄kanam akupkama nu wáinkia asarí étsereaji. ¹⁵ “Jesus Yusa Uchirinti” tana nu shuarjaj Yus tsanin̄ wekaawai tura niisha Yusjaj tsanin̄ wekaawai. Mai chikichik ajasu ániawai.

¹⁶ Yus in anenmajnia nu ti nekas nékaji. Yus tuke anenkratniuiti. Tuma asamtai shuar anenkartakka Yusjaj tsaniñ wekaawai tura Yussha niijjaj tsaniñ wekaawai. Mai chikichik ajasu ániawai. ¹⁷ Núnisar ti penker anenkartin ajaji. Túrar¹ súmamtikiatin tsawantaj natsamtsuk wajastatji. Kame jü nunkanam pujayatrik Jesukrístujaj méteketji. ¹⁸ Nekas anenaiyamunam sápij atsawai. Antsu nekas anenaiyamunam sápij menkaawai. Aya asutiátin akui sapijmiaktinaiti. Tuma asamtai ántar sapijmiana nu nekas anenkratchaiti.

¹⁹ Yus emka in anenma asakrin iisha Nii aneaji. ²⁰ Tura shuar “wi Yúsan aneajaj” táyat chikich Yus-shuaran nakitiakka nuka wáitriniaiti. Kame Yus-shuaran tuke wainnia nuna aneachkunka çitiurak Yusan wáinchasha aneat? ²¹ Yus incha juna turammiaji: Yúsan anea nu shuar chikich Yus-shuarnasha aneatniuiti.

5

Jü nunkanmayá írrunna nu núpeteaji

¹ Ashí “Jesus Yusa Uchirí Krístuiti” tu enentáimtana nú shuar Yusa uchirinti. Tura aparí aneakriakia ni uchirísha aneattaji. ² Yus Apa aneakur tura Nii wakera nu umirkur Yusa uchirísha ashí aneattaji. ³⁻⁴ Yus aneakur Nii tana nu umiktatji. Ashí Yusa uchiríya nu Yúsan nekas enentáimta asa, ashí jü nunkanmayá írrunna nuna núpeteawai. Nu asamtai Yus tana nu umirkatin itíurchatchaiti. ⁵ Aya “Jesus Yusa Uchirinti” tu enentáimtana nú shuar jü nunkanmayá ana nuna awakkamniaiti.

Jesukrístu “Yusa Uchirinti” tu etserainia nu

⁶ Jesukristu jü nunkanam taa entsajaj imiankui Yus nayaimpinmayá chichaak “Juka winia aneamu Uchiruiti” tímiaiyi. Tura nuyá Jesus jakamtai ni numpé puarmiayi. Entsajaj imianin ni takatrin nankamamiayi túrasha in jarutramak ni takatrin amukmiayi jü nunkanam. Chikichinkia túrutsuk mai metek túra asamtai Yusa Uchiríya nu paant nekanamniaiti. Yusa Wakanísha tuke nekas tiniua nu métek tawai. ⁷⁻⁸ Nu asamtai menaint “Yusa Uchirinti” Jesusan tuiniawai: Nayaimpiniam Yus Apa tura Jesukristu, Chícham aa nu, tura Yus Wakancha; nunkanmasha Yus Wakancha, entsasha tura numpasha. Mash métekrak tuiniawai. ⁹ Aents étserainiakui ántureaji. Nuna nankaamas Yus ni Uchirín tana nu nekas anturkatniuitji. ¹⁰ Yusa Uchirín enentáimtana nú shuar ni enentáincha nékawai. Antsu Yus ni Uchirín timian enentáimtatsna nú shuar Yúsan enentáimtachu asa Yúsan “wáitriniaiti” tawai. ¹¹ Yus ni Uchirín timia júiti: Tuke iwiaaku pujutaj nérenniuiti tura nu iwiaakmancha in suramsaitji. ¹² Yusa Uchiríjjaj tsaniñ wekaana nú shuar, nu iwiaakmajaj iwiaaku pujuiniawai. Tura Yusa Uchiríjjaj tsaniñ wekaatsna nú shuar, nu iwiaaku átinnium pujatsui.

Amuak Yus nekas enentáimtustinian áarmiania nu

¹³ Yusa Uchirí nekas enentáimtakrum tuke amuicha iwiaakmajaj iwiaaku pujarme. Nu nekaatarum tusan juna áatjarne.

¹⁴⁻¹⁵ Yus wakeramujaj métek seakrinkia anturtamji. Tura antur-tamkurin ii seamaj nu nekas takusua nu enentáimpramniatji. Nu neka asar Yus ti shiir enentáimtajji.

¹⁶ Tuná awai jákatniunam júana nu. Shuar nu tunaan túramtainkia Yus áujtustin ántraití. Tura shuar chikich tunaan túrakuinkia nuka nekas Yus áujtustiniaiti. Nekas jákatniunam júatsna nú tunaan túraitkiuinkia

iwiaaku átinian Yus susattawai. ¹⁷ Ashí yajauchⁱ ana nuka tunaiti. Tura jákatniunam júatsna nú tunaasha awai.

¹⁸ Nekas Yusjái akiinia nú shuar tunaanum tuke wekaatsui. Antsu Yusa Uchirí nin ti peñker wainkiui íwianch antiñkiachminiaiti.

¹⁹ Iikia nekas Yúsnaítji tura ashí ju nunkanmaya shuar iwianchnia áiniawai. ²⁰ Yusa Uchirí ju nunkanam taa nekas-Yus aa nuna paant jintinramji. Yusa Uchirí Jesukristujái tsaniñkia wekaakur nekas-Yusa nujáisha tsaniñkiar wekaaji. Nekas-Yus asa tuke iwiaaku átinia nuna nérenniuiti. ²¹ Uchirú, ántar-yus írunna nuí pachiinkiairap. Antsu nujái aneartarum.

Nuke atí.

JUAN

Ataksha papin aar akupkamu

Nekasa nunasha tura anenaitniuncha ujaawai

¹ Wi Juan Yus-shuara uuntri asan ii umai Yus achikma nuna tura ni uchirincha ju papin áateajai. Wisha nekas aneajrume. Tura aya wíkichu antsu ashí Yus-shuar ainia nusha nekas chichaman nekaawaru ásar atumin anenmarme. ² Nekas-chicham tuke amuutsuk ii enentáin pujá asamtai aneajrume. ³ Yus ii Aparisha tura ii Uuntri Jesukristusha, Yus Apa Uchiri asa, atumin anenmak imiatkinchanum shiir pujustinian waitnentramak yainmakarti. Nujai nekas-chicham nekaarum anenaitiarme.

⁴ Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin áiniawai. ⁵ Yamaikia, umaru, tájame: mai anenai ajartai. Yamaram akupkamun áattsujme antsu yámankamtaik antukmiaj nunak tájame. ⁶ Nekas anenkartinia nú shuar Yus akupkamun uminiati. Tura Yus akupkamuka “anenkartin tuke atarum” tawai. Nusha yámankamtaiknumia antukuitrume.

Anenkartincha írunui

⁷ Ju nunkanam anenkartincha ti írunui. Jesukristu nekas aents ajas akiiniamia nuna enentáimtuiniatsui. Nu shuar anenkartin ásar Kristu nemasri áiniawai. ⁸ Nu shuarjai aneartarum. Yajauch shuar ántar yayakrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

⁹ Ashí shuar Kristu jintiamun iniáis “nankaamas nékajai” tana nu, Yúsnachuiti. Antsu Kristu jintiamun umiana nu shuar Yus Apajaisha tura ni Uchirijajisha mai tsanin pujawai. ¹⁰ Shuar Kristu chichamen jintiachu atumí jeen írmástaj tusa jeakui awayáwairap tura “shiir taume” tiirap. ¹¹ Kame nu shuar “shiir taume” tákumka nu shuar yajauch jintiamu jímiareame.

Umíamu chicham

¹² Ti nukap atumjai áujmatsatniun wakerajai. Túrasha ju papinium mashi áatrashtajarme. Antsu imia wiki atumin iyakun jeátjai. Nuyá naka chichasar ti shiir warastatji.

¹³ Ame kaim Yus achikma nuna uchiri amikmaatmainiawai. Nuke atí.

JUAN

Nuyá Ukunam papin aar akupkamu

Kayu ti penker shuaraiti

¹ Wi Juan Yus-shuara uuntri asan winia amikrun Kayun ju papin áateajai. Wisha ti nekas aneajme. ² Aneamu yatsurú, Yusjaj penker wekaakum ame wakanim penker pujana núnisan ame ayashmisha penker atí tusan Yúsan áujtajme. ³ Ame nekas chicham umirman shuar juí taar ujatarmayi. Tura nuna antukan ti warasmajai. ⁴ Yus-shuar nekas chichaman umiiniakui imiá shiir enentáimtuiniajai.

⁵ Aneamu yatsurú, chíkich Yus-shuar ti penker yayame. Kame yajaya yujainia nusha nekas yayame. Nu penkeraiti. ⁶ Nu shuar ame nekas anenamun juí taar Yus-shuar iruntramunam etserkarai. Ataksha irauwenakuí atsumainiana nu súsam shiir akupkarta. Penker wáinkiumka Yus shiir enentáimtikrattame. ⁷ Nu shuar Jesukristun takarsatai tusar wekainiawai. Túrawar Yus-shuarcha ainia nuna kuítrijjai yurumátniun naki-trarmatai ⁸ ii Yus-shuartikia nii atsumainia nu ajamsatniuitji. Nekas chichaman etserainia nu, yainkiartai tusar túratniuitji.

Tiútrepes yajauch túriniaiti

⁹ Ashí Yus-shuar árumna nuna papin akuptukmajrume. Kame nékajai, Tiútrepes nañkaamantu enentáimtumak ii tájinia nuna umiktinian naki-tiawai. ¹⁰ Nu asantai nuí jean ni yajauch túramun etsertuktatjai. Nii ántar ti áujmatuk tsanumprutmaji. Tura nu arantcha Yúsnan takainia nu irainiakui awayáiniatsui. Tura chíkich awayátaj tákuisha suritiawai. Tura nuyá Yus-shuarjai iruntratniun surimiawai.

¹¹ Aneamu yatsurú, nu yajauch túramu jumamkiirap antsu penker túratarum. Penker túrinia nuka Yúsnaiti. Antsu tunáa túrinia nuka Yúsan nékachuiti.

Timitriu penker túriniaiti

¹² Imiá nekas penker shuar asantai ashí shuar Timitriun penker áujmatainiawai. Iisha núnisrik penker shuaraiti tákurin nekas tájinia nusha nékarme.

Umíamu chicham

¹³ Wi ti nukap titinian wakerajme. Túrasha ju papinium mashi áatrashtatjame ¹⁴ wárik ítin asan. Nuí jean chichasmi.

¹⁵ Shiir pujustá. Juyá amikrum amikmaatmainiawai. Ii amikrishá chikichik chikichik amikmaatruata.

JÚTAS papin áarar akuptukma

Jútas Yus-shuaran papin áateawai

¹ Wi Jútas Jakupu yachintjai. Jesukrístu takarin asan ashí Yus Apa ni shuari átinian achikma ainia nuna ju papin áateajai. Jesukristujai tsaninkiaru áarmatai Yus nin wainiainiawai niijjai kanakchatniun. ² Yus ti waitnentramak imiatkinchanum tuke shiir pujustinian yainmakarti. Ti anenma asa túrati.

Ti tunáa shuar írunui
(2 Pítiur 2.1-17)

³⁻⁴ Aneamu yatsurú, iikia mai metek Yus-shuar asar ju uwem-pratin chichaman áatratniun wakerukjarme. Túrasha ti yajauch shuar anankramawar atumín pachiinkiarmai. Niisha “Yus ti anenkartin asamtai páchitsuk tunáa túramniaitji” tuiniawai. Nu arantcha Yus in Akup-tamniuncha tura ii Uuntrj Jesukristuncha nakitin áiniawai. Nu asamtai nu shuaran “yaunchu sumamawaruiti” tímiayi Yus. Tuma asamtai tájarme “Tuke Yus-Chicham yapajíashtinian ashí Yus-shuar akasmatkarat tusar susamuiti. Wátsek, kakaram ajastarum” tájarme.

⁵ Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejiptu nunkanmaya júkiar Nin umirkacharua nuna máawarmiayi. ⁶ Nayaimpinmaya suntarsha ni pujutairin ajapa ik-iukiar Yus susamun umitsuk iniaisarmiayi. Túrawarmatai Yus kiritni-unam jirujai tuke jinikiá sepunam apujas pujurainiawai. Tura Uunt Tsawant jeamtai súmamtikiawartatui. ⁷ Núnisan Sutuma péprusha Kumura péprusha tura tíjiuch péprusha áishmanjajisha nuwajajisha ti yajauch nu-amtak tsanirmanainiakui ti tunaan penké túrachmin ana nunasha túrin áirmiayi. Túmainiakui ashí shuar ashamkarat tusa Yus amuicha jinium asutiáwarmiayi.

⁸ Ayu. Atumín yajauch shuar ainia nu, yaunchu túrunamun enentáimtsuk tuke yajauch enentáimiainiak ni ayashin yajauch awajmamainiawai, Yusnasha nakitiainiawai, tura ashí akupin ainia nunasha yajauch áujmatainiawai. ⁹ Antsu Mikiar, nayaimpinmaya sutara kapitíántrintiat, iwianchjai máaniak Muisaisa ayashin akasmatak “áaniumsha” tu chicharkachmiayi. Antsu áyatik “Yus írmastí” tímiayi. ¹⁰ Túrasha ju shuarka nékainiatsna nuna nánkamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura nújajisha imia niñki yajauch emesmamainiawai.

¹¹ Maa, anearartí. Kaiñ yajauchin túramia núnis tura ásar jákartatui. Tura Parama áinis kuítian ti wakeruiniak imia niñki tunaanum tsankamakarua áiniawai. Tura Kurea áinis ashí akupniun nakitin áiniak kajinkiartatui. ¹² Átum nuamtak anenaitiai-jisat nájankurmin nu shuar chikichan enentáimtutsuk Yusnasha ashamtsuk imia niñki enentáimtumainiawai. Penké ántar áiniak yumi kiär tee ajasua núnin áiniawai. Tura nase umpuin yútutsuk nankamainiawai. Árak nerektin nantutin nerechua áanin áiniawai. Tuma ásar uwemu penké jaka áanin áiniawai. ¹³ Entsa nujan Krak saurin ajekeawai. Nu shuarsha núnisar ni

natsantr̄in natsamtsuk ajekenawai. Tura yaa waakua áanin áiniawai. Tuma ásar nekas kiritniunam tuke menkakatin áiniawai.

¹⁴ Atanka tiran̄kiyayi Eruk. Ti penker Yúsnan etserin asa juna tímiayi “Uunt Yus ti untsur̄i ni shuar̄ij̄iái winittiawai. ¹⁵ Nuyá ashí shuar túrawarman nekaattawai. Tura ashí yajauch shuarnasha ti tunáa túrawarua nuj̄ai tura Yúsan yajauch áujmatsarua núj̄aisha súmamtikiawartatui” tímiayi Eruk. ¹⁶ Nu shuarka pen̄kera nuj̄ai waratsuk “yajauchiiti” tuiniawai. Aya ni ayashí wakeramunak wakeruiniawai. Nan̄kaamantu enentáimtumainiak chichainiawai. Tura chikich shuaran shiir chicharainiaksha aya nii wakera nuna túrutati tusa pen̄ker chichainiawai.

Yus-shuar enentáimtikratin

¹⁷ Tura atumsha, aneamu yatsurú, ii Uuntr̄i Jesukrístu akatramur̄i yáunchu “aneartarum” tiarmiania nusha enentáimtustarum. ¹⁸ “Amúamu tsawant ishichik ajatesmatai shuar Yúsnan wishikrar nakitrartatui. Tura ni yajauch wakeramur̄iniak umíi pujuartatui” tiarmiayi. ¹⁹ Nu yajauch shuar atumín akantamenawai. Ju nun̄kanmayan̄ak páchiniak Yusa Wakan̄in takakainiatsui.

²⁰ Tura átumka, aneamu yatsurú, tuke Yus nekas enentáimtusurum kakaram ajastarum. Yusa Wakan̄i kakarmarij̄iái ashí Yus seatarum. ²¹ Yus ti anenmakui nii wakera nu wakeruktarum atumsha. Túrarum ni anenmamu shiir nekaattarme. Tsawant winiawai, ii Uuntr̄i Jesukrístu in waitnentrama asa tuke shiir Niij̄iái pujustinian amastat̄ji. Nu tsawant naká pujutarum.

²² Mai yapaj̄i ajá ainia nu naka enentáimtikratarum. ²³ Chíkich shuarsha jiniumiá júsatniua áitkiasrum uwemtikratarum. Tura chikichcha ti yajauch ásar matai anearum waitnentratarum. Tura ni pushir̄isha ni tunaar̄ij̄iái maatra asamtai mūjkiatniuiti.

Yúsan shiir awajeawai

²⁴⁻²⁵ Yus chikichkiiti. Ti nekaiti. In uwemtikkiartin asa ni kakarmarij̄iái yainmakminiaiiti tunaanum iniarchatniun. Tuma asa tunaaj̄ai máatrachu awajtamás ni ti shíirmarin̄in ejetamtatrumé. Túrutma ti waramtikramsattarme. Ii Uuntr̄i Jesukrístu túrunamuj̄ai Yuska Nin̄ki shiir awajsatniuiti tura nan̄kaamantu enentáimtustiniiaiiti. Yáunchusha, yamaisha, tura tuke ashí akupin atí.

Núkete.

APUKARÍPSIS Jesukrístu Juánkan paant iniaktusma

Jesukristu paant awajsamu

¹ Jú áarman Jesukrístun Yus ujakmiayi. Wárik túrunatta nuna ni shuarin ujakarat tusa ujakmiayi. Tuma asamtai Jesukrístu ni suntarin akupak ashí winia paant awajtursamai. Wisha Juánkaitjai. ² Yus timia nunasha tura Jesukrístu ujatkamia nunasha tura wi íismaj nunasha ti paant aya nekasa nuna tájai. Penké wáitratsjai.

³ Jú papin áujea nu shuarsha tura núnisan juna ántana nusha nekasa enentáimtuiniakka shiir ártatui. Ukunam átatna nuna ujaawai tura jeatemayi.

Juan siati péprunam Yus-shuar írunun juna áateawai

⁴ Wi, Juan, Asia nunkanam siati (7) péprunam Yus-shuar írunun ju papin áateajai. Yus anenma asa imiatkinchanum shiir pujustinian yainmakarti. Nu Yus tuke yaunchu pujuyayi. Núnisan yamaisha pujawai. Tura nuke winittiwai. Akupin pujutanium Yusa Wakanj siati naka pujurainia nusha shiir yainmakarti. ⁵ Núnisan Jesukrístu shiir yainmakarti. Nii tana nu imiá nekasaite. Niisha emka jakamunmaya yamararam iwiaakmajai nantakniuiti. Tura ju nunkanmaya akupniu Uuntrinti. In anenma asa ni numpejai ii tunaarin nijiatramkaitji. ⁶ Túrutma akupin awajtamsaitji. Tura ni Aparj Yúsnan pujursarat tusa anaitiamkaitji. Nii ti kakaram asa tuke shiir awajnasti. Núnisan atí.

⁷ Wats, Krístuka yuranmijjai winittiwai. Tura íjiuarmia nusha tura ashí shuarsha nuna wáinkíartatui. Túrawar ashí sapijmiainiak útiartatui. Maa, nekasa nuris átatui.

⁸ Krístuka “yámankamtaiknumia amúamunmasha ashí nérenniuitjai, tawai. Wisha A rétranmaya Y rétranam ashí retra áintsaitjai” tawai ti kakaram Uunt Krístu. Tuke yaunchu pujuyayi. Núnisan yamaisha pujawai. Tura nuke ataksha winittiwai.

Kristu ti shiir wincha ajasun Juan wainkiamiania nu

⁹ Wi Juan atumjai métek waitia asan atumí yachintjai. Núnisan nayaimpiniam, Yus akupeana nu, métek jeattaji. Tura katsuntrar nákastinian Jesukrístu mái métek súramji. Yus-Chichamnasha tura Jesukrístu timiancha étsereakun nayaantsa ajapén atentramunam Pátmus nunkanam sepunam apujsamua núnisan pujumjai. ¹⁰ Tumai tumin tsawantaj Yusa Wakanj pujurtakui winia úkuruini kakantar untsunman antukmajai. Kachu umpúamua núnis ti kakarmauyayi.

¹¹ Tura turutmiai “Wiitjai. Yámankamtaiknumia amúamunam ashí nérenniuitjai. Wisha A rétranmaya Y rétranam ashí retra áintsaitjai, tímiai. Tuma asamtai wáinmena ju, papinium áaram Asia nunkanam siati péprunam Yus-shuar írunna nu akuptukarta. Ju peprunam akupkarta: Ípisiusha, Ismirnasha, Pírkamusha, Tíatirasha, Sártissha, Píratírpíasha, tura Rautiséasha.” Tu turutmiai.

¹² Túrutkui yakí túruta tusan apajasan íkman siati shirikip ikiutain kurijjai najanamun wainkiamjai. ¹³ Tura nu ajapén Aents Ajasua núninan wajan wáinkiamjai. Tura pushirísha nawea timiai nuntuaru

entsaruyi. Emenmamkēsha kúriniak netsepnum emenmamauyi. ¹⁴ Tura ni muuke intiashísha murikiu uré nijiamua núnisañ tura micha núnisañ ti paju chírauyi. Tura ni jiiisha jiya núniskeyi. ¹⁵ Ni nawēsha ti wincha asa jiru yan̄kutaku jiamua áinis néwar ajarmiayi. Ni chichamesha ti kakaram asa uunt entsa téter ajá áintsauyi. ¹⁶ Ni untsuurin̄i siati yaan takakuyi. Tura ni weneniasha puniá áinis tsakatskat mai ere awajsamu jínmiái. Ni yapjisha etsa ti etsantuk íschamnia núnisaui.

¹⁷ Nuna wáinkian jaka áintsanak nawēen iniaarmajai. Túrasha ni untsuurí uwejen awaantrus turutmiayi, “Ashamkaip. Wiitjai. Yámankamtaiknumiá amúamunmasha tuke pjuwitjai, timiai. ¹⁸ Wikia tuke iwiaakuitjai. Jakamiajai tura nantakin jákashtinian tuke iwiaaku pujajai. Jákatniuncha tura jaka pujuinia nuna yawir̄in takakkun nérenniuitjai, timiai. ¹⁹ Tuma asamtaí wáinkiamna jusha, yamáí wáinmena nusha, tura ukunam átatna nusha aartá, timiai. ²⁰ Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar írunun nakumeawai. Tura winia untsuuruj̄in̄i siati yaa wainkiam nu, siati péprunmayá Yus-shuaran wáinniun nakumenawai, turutmiái.

2

Ipisiunam chícham áatramu

¹ Nuyá turutmiái ‘Ipisiunmayá Yus-shuaran wáinin ju áatratá: Siati yaan untsuurnum takakna nu tura núnisañ siati shirikip-ikiutai kúrinnan ajapén atenta wekáa nu, tawai: ² “Ashí ame túram nuna nékajai. Ti kakaram takaakum katsuñteamuncha nékajai. Yajauch shuar nawamt-suk awemaitrume. Shuar “Yus akatramuitjai” ántar tuinia nu nekaamarme. Wáitrinia nusha nékaitme. ³ Ti wáitiatmek katsuñtram yawetsuk Winia ti takartusuitme. ⁴ Túrín áminiñ juna títiatjame. Yus aneakum yámankamtaik ti pen̄ker wekainiuyam núnisam túratsme. ⁵ Tuma asam ikiuknium nu enentáimpram yaunchu túriniuyam núnismek ataksha túrata. Túrachakminkia ame shirikpirmin wari jurustatjame. ⁶ Tura ju péñker túriniaitme. Nikiurás shuar nakitniuitrume. Nu shuar “ayash wakeramu páchitsuk túramniaiti” tuiniakui Wisha núnisnak nakitiajai. ⁷ Kuíshtinia nu shuar Yusa Wakan̄j ashí Yus-shuaran timian antukti: Nupetmakunka tuke iwiaaku pujutai numi neren yúatniun tsan̄katkattajai. Nu numi Yus pujana nuj wajaawai.” Tu áartá’ turutmiái.

Ismirnanam chícham áatramu

⁸ Nuyá turutmiái ‘Ismirnanmayá Yus-shuaran wáinin ju áatratá: Yámankamtaiknumiá amúamunam tuke pjuwuwa nu tura núnisañ jaka nantakmia nu, tawai: ⁹ “Ashí ame túram nuna nékajai. Ti wáitiam nunasha tura kuítrinchaitmena nunasha nékajai. Antsu Yusaj̄nkia ti kuítrinniuitme. Tura shuar uunt iwianch Satanása shuar̄j áiniayat “Israershuaraitjai” tuíniak yajauch áujmatramena nuna nékajai. ¹⁰ Ti wáitsattamna nu ashamkaip. Íwianch ashí nekapramsataj tusa atumijn̄ian sepunam en̄keattawai. Nuj tias tsawant wáitsattarme. Jáakmesha tuke Yus shiir enentáimtusakminkia tawaspan nakurin susatniua nútiksanak nekas iwiaakman tuke shiir pujustinian amastatjai. ¹¹ Kuíshtinia nu shuar Yusa Wakan̄j ashí Yus-shuaran timian antukti: Nupetmakuka jimiará jákatniuka waitsashtatui.” Tu aartá’ turutmiái.

Pírkamunam chícham áatramu

12 Nuyá turutmiai ‘Pírkamunmaya Yús-shuaran wáinin ju áatratá: Puniá áinis tsakatskat mai ere awajsamun takakna nu, tawai: 13 “Ashí ame túram nuna nékajai. Uunt iwianch Satanás akupea nuḡ pujayatmek tuke shiir enentáimturmena nuna nékajai. Winia shiir umirtínian Ántipasan máawarmataisha Winia enentáimtursatin ishichkisha iniaitiuschamame. Nusha iwianch pujutainium pujakrumin túrunamai. 14 Túrin ámininḡ juna títiatjame. Atumijiniá shuar yaunchu Yúsnan etserin Param yajauch jintíamun tuke emetainiawai. Niisha Israer-shuaran tunáa awajsat tusa kapitián Parakan unuiniarmiayi. Nuyá Parak Yús-sutai namañken maar yúatniun Israer-shuaran jintintiamiayi. Núnisaḡ ti tsanirmatniun jintintiamiayi. 15 Atumijiniá shuarsha Nikiurás jintíamuncha, Wi nakitaj nuna, iniaisatniun nakitiainiawai. 16 Wats, enentáimpram ini-aisata. Túrachakminkia Wi wari winin winia wenurujya puniá jiinia nujaj máaniaktajai. 17 Kuíshtinia nu shuar Yusa Wakanḡ ashí Yús-shuaran timian antukti: Nupetmakunka maná yurumkan uḡkma nuna ayurattajai. Nuyá kaya pújun susattajai. Nu kayanam yamaram naarḡ aarma átatui. Nunasha chíkich shuarka penké nékatsaḡin aya achía nuke nekaattawai.” Tu aartá’ turutmiai.

Tiatiranam chícham áatramu

18 Nuyá turutmiai “Tiatiranmaya Yús-shuaran wáinin ju áatratá: Yusa Uchirḡ jiiḡ jijiḡ métek keena nu tura núnisaḡ naweḡ jiru yanḡutaku jiamua núnis néwar ajawa nu, tawai: 19 “Ashí ame túram nuna nékajai. Yús shiir enentáimtakum aneam nuna nékajai. Tura katsuntram penker takaamna nuna nékajai. Yáunchujaj nanḡkaamas penker túrame yamaikia. 20 Túrin ámininḡ juna títiatjame. Nu nuwaḡ Jesapír awematsme. “Yúsnan unuiniajai” tinia Wíi shuaran ti anaḡkenawai. Tura ti tsanirmatni-uncha tura ántar-yús-sutai namañken maar yúatniun jintintiainiawai. 21 Niisha ni tunaarḡin enentáimiar iniaisat tusan nákasuitjai. Tura nakiti-awai. 22 Wátsek, sunḡkurmatkiakan peaknum áepsattajai. Tura chíkichcha niijjaj tsanirma ainia nunasha niijjaj métek ti wáitkiastatjai. Ni tunaarḡin enentáimiar iniaisacharmatainḡkia túrattajai. 23 Ni uchirincha mantúattajai. Nujaj ashí Yús-shuar Wíi nekas shuara enentáin nékaitjia nuna nekaawartatui. Atumniasha chikichik chikichik takasmajaj métek akiktatjarne. 24 Tura chíkich shuar Tiatiranmayatiram, nú chicham enentáimtuscharmena nu, “nekas iwianchnia uḡkma” tútaja nu nékachu asakrumin atakka túratniun patatkashtatjarne. 25 Tura Wi jeatsaḡin takakrum nu emetatarum. 26 Nupetmakunka Wi wakeraj nunak tuke initsuk túrana nuna untsurḡ nunḡkanam akupkatniun tsanḡkatkattajai. 27 Winia Apar tsanḡkatrukmiá núnisnak akupkatniun tsanḡkatkattajai. Tura nuwe najanamu jirujaj awati ijiakratniua áinis ti kakarmajaj akup-kattawai. 28 Yanḡkuam káshik jiinia nuna susattajai. 29 Kuíshtinia nu shuar Yusa Wakanḡ ashí Yús-shuaran timian antukti.” Tu aartá’ turutmiai.

3

Sártisnum chícham áatramu

1 Nuyá turutmiai ‘Sártisnumiá Yús-shuaran wáinin ju áatratá: Siati Yusa Wakanḡin takakna nu tura núnisaḡ siati yaan takakna nu, tawai: “Ashí ame túram nuna nékajai. Iwiaakua áintsanḡ wekayatmek Wíjiainḡkia jákaitme. 2 Shintiarta. Kajinia nu umpuím ekeemakta. Kame Yúsjaḡ ísam penker túrichuitme. 3 Yús-Chicham ti shiir enentáijjaj emka antukmam

nu ataksha enentáimpram emetata. Tura tunaarumsha enentáimpram iniaisata. Tura iniaiyachkumniñkia kasa núnisnak nékatsmin jeartiatjame. ⁴ Tura Sártisnum shuar ishichik pushirj wapik máacharu pujuiniawai. Nusha ti penker ániak pushí pújun entsarar Wijjaj wekasaratui. ⁵ Nupetmakuka pushí pújun entsaratui. Tura iwiaaku átinia nu papiniumiã ni naari áarman japirashtatjai. Antsu winia Apar tura ashí nayaimpinmaya suntar ímmianum shiir áujmattsattajai. ⁶ Kuíshtinia nu shuar Yusa Wakanj ashí Yus-shuaran timian antukti.” Tu aartá,” turutmiai.

Piratŕpianam chícham áatramu

⁷ Nuyá turutmiai ‘Piratŕpianmaya Yus-shuaran wáinin ju áatratá: Ti shiir túrin tuke nekasan tana nu, uunt akupin Tawitia yawirj takaku asa uraimtai chíkich penké epenchamniaiti. Tura epenmiatai chíkich penké uraichminiaiti. Juna tawai: ⁸ “Ashí ame túram nuna nékajai. Kakarmachuitiatmek winia chichamur shiir enentáimtakum Winia iníuschaitme. Tuma asakmin wáitin uratjame. Nuna chíkich penké epenchamniaiti. ⁹ Wátsek. Shuar wáitruiniak “Israer-shuaraitjai” tuñiyat uunt iwianch Satanás-shuar ániawai. Nu shuáran, nekas ámin aneajna nuna nekaawarat tusan amjini tikishmatkiararatjai. ¹⁰ Katsunrata tímiaj nu, shiir umirka asakmin Wisha ti wáitsatin ashí nunkanam átatna nuyá uwentikrattajme. Nu wáitsatniujaj ashí nunkanmaya shuar nekapnasartatui. ¹¹ Wárik winittijaj. Takakmena nu emetata. Akinkiatniuitmena nuna chíkich shuar atantramkiaraj. ¹² Nupetmakunka winia Yusru jee tankirin awajsattajai. Tura nuyá penké jñinkichartatui. Tura njin winia Yusru náarin áatrattajai. Tura winia Yusru pépruri náarincha áatrattajai. Nu pépruka nayaimpinmaya yamaram Jerusarénka Yúsumiã tára núiti. Núnisañ winia yamaram náarun njin áatrattajai. ¹³ Kuíshtinia nu shuar Yusa Wakanj ashí Yus-shuaran timian antukti.” Tu aartá,” turutmiai.

Rautiséanam chícham áatramu

¹⁴ Nuyá turutmiai ‘Rautiséanmaya Yus-shuaran wáinin ju áatratá: Wáitrusuk nekasa nunak tiniua nu tura núnisañ ashí Yus najanamun Úuntriya nu, tawai: ¹⁵ “Ashí ame túram nuna nékajai. Tura michaash míchachuitme. Núnisañ tsuërsha tsuérchaitme. Míchaitkiumsha tura tsuéraitkiumsha maak. ¹⁶ Kame míchachu tsuërcha antsu aya tsuétsuëtak asakmin imiutkattajme. ¹⁷ Iis, “Kuíttrinuiitjai, ti irumpraitjai, warinkisha atsumatsjai” tame. Túrasha ashí yajauch, wáitnenmai, kuíttrincha, kusuru, tura misú iyajme. ¹⁸ Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam misú ajasma shiir entsarta. Péñker ímprataj tusam jñinium enketai enkeeta. ¹⁹ Aneajna nuna chichareajai. Nu asantai kakaram ajasam tunaarum enentáimpram iniaisata. ²⁰ Enentáimprata. Shuar wáitniam wajas untsamna áintsanak Wi ámin untsúajme. Winia anturtukam ame enentáimin awaintiakminkia Wi wáintiuattajme. Tura wayan amijjaj yurumáttajaj. Tura amesha Wijjaj yurumáttame. ²¹ Nupetmakuka akupin pujutainium Wijjaj pujustatui. Wisha núnisnak nupetmaku asan winia Aparjaj akupin pujutainium pujusuitjai. ²² Kuíshtinia nu shuar Yusa Wakanj ashí Yus-shuaran timian antukti.” Tu áartá,” turutmiai.

4

Nayaimpiniam Yúsan shiir awajenawai

¹ Nu nan̄kaasmatai nayaimpiniam waiti uranniun wainkiamjai. Tura nuyá kakaram untsunnan antukmajai. Nuik kachujaj métek kakaram chichartukma nu turutmiai “Juí yakí wakatá. Ukunam átatna nuna iniaktustatjame” turutmiai.

² Nu chichamaik Yusa Wakan̄i akantukmiai. Túrutamtai nayaimpiniam akupin pujutainium pujan wainkiamjai. ³ Niisha jaspi kayasha tura kurnarínia kayasha nujaj métek ti wínchaui. Akupin pujutain tuntiak téntakuyi. Nusha ismirarta kayajaj métekeyi. ⁴ Chíkich paintikua-tru uunt púju entsarainian tura kurin etsen̄krakainian, nuí pujuinian wainkiamjai. ⁵ Auptainiumiá peemsha ipiamtasha untsummasha jíiniarmai. Tura nu pujutainium naka siati shirikip kearmai. Nusha siati Yusa Wakan̄inti. ⁶ Núnisan̄ nu pujutainium naka nayaantsa áanin ti saar amai.

Nu pujutainium wakenmaanisha niisháa tan̄ku kua-tru téntakar ármiai. Ukur̄inisha tura eemsha jíi irunmiai. ⁷ Emka tan̄ku úunt yawáa áanniuyi. Chíkichka turu uchichia áanniuyi. Tura chikichcha shuara yapiá áanniuyi. Tura chíkichka churuwia nanamua áanniuyi. ⁸ Nusha sais nanamtin áрмаi. Tura jíisha ti irunainiak ashí wainmarmai. Káshisha tsawaisha tuke iniaitsuk juna tiniu armai:

“Ti nekas péñkeraiti Uunt Yus. Ashí nan̄kaamas kakarmaiti. Tuke yaunchu pujuyayi. Núnisan̄ yamaisha pujawai. Tura ataksha juke winittiwai” tiniu armai.

⁹ Tura uunt pujutainium pujana nu tuke iwiaaku pujú asamtai nu tanku ti shiir awajsar yúmin̄kiak pujuriarmai. ¹⁰ Túruiniakui paintikua-tru uunt tuke iwiaaku pujun tikishmatainiak ni etsen̄krutair̄in naka áepuiniak tuiniawai:

¹¹ “Úuntá, ii Yús̄inme. Tuke shiir awajmainme. Ashí nankaamas kakarmaitme. Amek ashí írunna nu najanaitme. Tura aya wakerakum najanamame. Ame wakerakmin irunainiawai” tuiniawai.

5

Murikkia papin urakminiaiti

¹ Nuyá akupin pujutainium pujuya nuna untsuur̄in papí penuarma áanniun wainkiamjai. Nu papisha initiaan̄isha tura pátatkesha áarmauyi. Tura urakchamnia atí tusa siati anujtukmajaj kaki peekmauyi. ² Tura nayaimpinmayá suntar ti kakarma nu, ti kakantar inintran wainkiamjai. Niisha tímiai “¿Ya akupniuk ju papin kaki anujkamun jaak urakminiait?” ³ Tura nayaimpinmayásha nun̄kanmayásha tura jakamunmayásha chikichkisha nu papin urakmin atsumiayi. Áujtsuk íistin̄niasha tujinkiarmai. Tímianu akupin atsumai. ⁴ Nu papin uraktincha tura áujsatniusha, kame íistin̄cha atsakui ti útmiyajai. ⁵ Nuyá chikichik uunt turutmiai “Ti útíp. Israer-shuarnumiá Úunt-yawá, Jutá weeá awai. Niisha uunt akupin Tawit weeaiti. Nupetmaku asa nu papí siati anujtukman jaak urakminiaiti.”

⁶ Nuyá uunt pujutaiya nuí tura kua-tru tan̄kunam ajapén tura úuntnum ajapén Murik wajan wainkiamjai. Maamua áintsan̄ketiat iwiaakuyi.

Kachurísha siátiyi. Ni jiiísha siátiyi. Nusha Yusa Wakanj siati ashí nunkanam akupramua nuuyi. ⁷ Nu Murik we nekas uunt Akupniun untsuurínian nu papin achikmiayi. ⁸ Tura papin achikmatai kua-tru tañkusha tura paintikuatru uunt arma nusha Murikiun tikishmatrarmiayi. Ashí uunt arpa tuntuítaiin takaku armai. Tura ashí kunkuin enketain kuri najanamun takaku armai. Nu kunkuin Yusshuar áujsamuiti. ⁹ Ju yamaram kantancha kantampriarmai:

“Amek imiá nankaamas akupniuitme. Amek papí achikiam anujtkumarí jáakminiaitme. Yus-sutai namankea áinis mantamna asam túramniaitme. Ashí nunkanmayá shuarnumiásha Yusna árat tusam ame numpemjai in sumakmiame.

¹⁰ Turam akupin awajkartusuitme tura núnisan ii Yúsriniun pujurin awajkartusuitme. Tuma asakmin akupin ajarar ju nunkanam akupkattaji.” Tu kantamainiawai.

¹¹ Tura untsurí nayaimpinmayá suntar uunt pujutaincha tañkuncha tura úuntnasha éñkekawarun wainkiamjai. Nusha nekapmarchamnia ti untsurí armia nu ¹² kakantar tiarmai:

“Murik mantamnamia nu akupin ajar ashí kakarmancha, kuítniasha, nekaatniuncha Niñki achikminiati. Tura nupetmaku asamtai yumínsar Nin ti shiir awajsatín áiniawai.” Tu tiarmai.

¹³ Núnisan ashí Yus najanamu, nayaimpiniam írunna nusha, nunkanam írunna nusha, nunká inít írunna nusha, nayaantsanam írunna nusha, tuínian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiniawai.

¹⁴ Tura kua-tru tañkusha “Tuke núnisan atí” tiarmai. Tura paintikuatru uuntka nekas tuke iwíiaaku pujá nuna tikishmatar shiir awajsarmai.

6

Murikkia siati anujtukman jaakmai

¹ Wi iyakui Murikkia chikichík anujtukman jaakmai. Túramtai chikichík tañku ipiamtajai métek kakantar untsunmun antukmajai. “Winim iitiá” turutmiai. ² Túrutkui kaway pújun wainkiamjai. Nuí ekeemia nu tishimkiun takakuyi. Akuptai tawaspasha susamuyi. Tura tuke nupetmaktinian jíinkimiai.

³ Nuyá Murik anujtukma jímiarar jáakmatai tañku jímiara nu “Winim iitiá” turutmiai. ⁴ Túrutkui chikich kawai kapaakun wainkiamjai. Nuí ekeemia nuna puniá úuntan susamuyi. Nusha shiir pujuscharat tusa ashí jú nunkanmayá shuaran máanaimtikiatniun akupkamuyi.

⁵ Nuyá Murik anujtukma menaintiun jáakmatai tañku menaintiua nu “Winim iitiá” turutmiai. Túrutkui kaway mukusan wainkiamjai. Nuí ekeemia nusha kijin nekapmatain takakuyi. ⁶ Tura kua-tru tañku ajapénia chichaamun antukmajai. “Tsawant takamtsuk takaakmesha apatkuka penké ishichik sumakmin átatme. Tura núnisan machasha nijiamchisha amuukacharat tusam péñker wáinkiata.” Tu timiai.

⁷ Nuyá Murik anujtukma kuátrun jáakmatai tañku kua-trua nu “Winim iitiá” turutmiai. ⁸ Túrutkui kaway yan-kun wainkiamjai. Nuí ekeemia nusha Jákatín náartiniuyi. Tura nuna úkurin Jatai nemararak winimiai. Nusha ashí nunkanmayá shuar kua-tru akankamunmayá chikichkin

máatniun akupkarmauyi. Nusha mesetjaisha tsukajaisha sunkurjaisha tura yajasmajai máawarmai.

⁹ Nuyá Murik anujtukma sénkun jáakmatai Yus-sutai kunkuin ekemtai wakenmaanĭ ísmajai. Túran Yus-Chichaman etserainiakui máawarma wakanĭn wainkiamjai.

¹⁰ Nusha kakantar untsumainiak tiarmai “Uuntá, ti penker asam támena nu umíatsmek. ¿Urutiak nunká pujuinia nú shuar ĭi mantamnemunam yapajmĭátruktam?” tiarmai.

¹¹ Tuíniakui pushĭ pújun susar tiarmai “Chikichcha Krĭstunun etserainiakui mantamnatin áiniawai. Nu náakrum ishichik ayampratarum” tiarmai.

¹² Nuyásha Murik anujtukma sáisan jáakmatai ti úurun wainkiamjai. Tsawai-nantusha itirchat ajasua áintsan mukusa ajasmai. Kashĭnantusha numpá áintsan ajasmai. ¹³ Tura yaasha wampú nere nase umpuim ti majúwa áintsan kákekarmai. ¹⁴ Nayaimpisha papĭ penuara júamua áintsan menkakamai. Tura naintcha yajá apujnasarmai. Tura nunkasha nayaantsanam ajapén atentrainia nusha yajá apujnasarmai. ¹⁵ Tura jú nunkanam akupin ainia nusha náinnium wear kayá wáanam uumkarmai. Nijjaisha ashĭ shuar, uuntcha, kuĭtriniusha, suntara kapi-tiántrisha, ashĭ kakaram ainia nusha, tura takarniusha ankant ainia nujai náinnium wearmai. ¹⁶⁻¹⁷ Túrawar náinniasha kayancha tiarmai “Asutniátin tsawant jeayi. ¿Yaki aun katsuntrat? Nu asamtai saanakim in yutukratata. Túrarum Murik ti asutiámataj nuyásha tura akupin pujana nuyásha uukratkatá” tiarmai.

7

Israer-shuarnumiá anujturma armia nu

¹ Nu nankaasmatai kuaru nayaimpinmayá suntar, nunkaa kuaru yantamén wajan wainkiamjai. Nusha kuaru nase kukarsha, nayaantsanmasha tura kampunniunmasha nasenkacharat tusar waja-tiarmai. ² Kame kukarsha tura nayaantsanmasha yajauch awajsatniun akupkamu armai. Tura chíkich suntarnasha nantu tátainmaaniá winian wainkiamjai. Tuke iwiaaku Yusa anujtutairin takakauyi. Nusha kuaru suntaran kakantar untsuak tímiai, ³ “ĭi Yusrĭ takarĭn ainia nu nijiaĭnium áarar anujtatsrinĭn kukarsha, nayaantsasha, tura kampunniusha nasejai yajauch awajsairap” timiai.

⁴ Tura tímiajni untsurĭ aara anujtukman antukmajai. Ashĭ Israer-shuar tuse (12) shuar weeá ainia nuyá chikichik sianĭtu kuarenta kuaru mir (144.000) armai. ⁵ Jutá weeanmayá tuse mir (12.000) anujtukma armai. Rupĭn weeanmayásha tuse mir anujtukma armai. Kat weeanmayásha tuse mir anujtukma armai. ⁶ Aser weeanmayásha tuse mir anujtukma armai. Niptarĭ weeanmayásha tuse mir anujtukma armai. Manasés weeanmayásha tuse mir anujtukma armai. ⁷ Semeunĭ weeanmayásha tuse mir anujtukma armai. Riwĭ weeanmayásha tuse mir anujtukma armai. Ísakar weeanmayásha tuse mir anujtukma armai. ⁸ Sapurúnĭ weeanmayásha tuse mir anujtukma armai. Jusé weeanmayásha tuse mir anujtukma armai. Pinjamínĭ weeanmayásha tuse mir anujtukma armai.

Ti untsurĭ shuar pújun entsararu

⁹ Nuyá ti untsurí shuaran wainkiamjai. Ashí nunñkanmayá nusháa shuaraim iruntrarú ásar nekapmarchamnia armai. Tura nusha uunt akupin pujutainium tura Muriknium naka wajaarmai. Tintiuki nukea áaniun takaku armai. Tura ashí pújun entsaru armai. ¹⁰ Ashí kakantar untsumainiak tiarmai:

“Ii Yusrj uunt akupin pujutainium eketna au tura Muriksha imia Niñki Uwemtikin áiniawai” tiarmai.

¹¹ Tura nayaimpinmayá suntarsha uunt akupin pujutaincha, kuaru tañkuncha, tura úuntnasha téntatkar armia nu piniakum nunká tepersar Yúsan shiir awajsar ¹² tiarmai

“Nekasaiti. Tuke iniaitsuk ii Yusrj ti shiir awajsatniuiti. Niñki ti neka, ti kakaram, ti akupin, tura ti penker asamtai tuke yumñsatniuiti. Núnisan atí.”

¹³ Nuyá chikichik uunt inintsamai “Pújun entsaru ainia jusha ¿ya ainia tura tuyá ainia?”

¹⁴ Túrutkui “Uuntá, amek nékame” tímiajai.

Tutai nii túrutmiai “Ju shuar ti waitsaru áiniawai. Túrawar Murikiu numpéjai ni pushirj nijiamawar puju awajsaru áiniawai. ¹⁵ Nuna túrawaru ásar yamaikia Yusaj naka pujusar tsawajsha káshisha Yúsnan ni Jeen takainiawai. Tura akupin pujutainium eketna au tuke wainkiartatui. ¹⁶ Yamaikia tsukajajsha kitiakjajsha waitsachartatui. Tura etsasha sukuiniak yajauch awajsachartatui. ¹⁷ Murik, akupin pujutainium naka wajana au, ni murikrin wáiniuk áyureak ti penker púkuni entsa waana nuí apuj Sartatui. Tura Yus ni neajkincha ukuñtiurartatui.” Tu túrutmiai.

8

Anujtukma siatia nu jaakma tura kunñkuin ekeemataijjai túrunamu

¹ Nuyá Murik anujtukma siatin jaakmatai nayaimpiniam chikichik ura jeastatuk ajapén mitia ajasmai. ² Nuyá siati suntar Yusaj naka wajainia nuna wainkiamjai. Nusha siati kachun susamu armai. ³ Nuyá chikichik suntar kunñkuin enketain kurijjai najanamun itiamai. Tura Yúsutainium ayamas wajasmatai núkap kunñkuin sunasmai. Nu kunñkuin ashí Yus-shuar áujsamujai métek kunñkuin ekeematainium ekeemaktiniuyi. Nu ekeematai kurijjai najanamuyi tura uunt akupin pujutainium naka pujumai. ⁴ Tura suntar ekeemakmatai kunñkuinia mukuñtiurj Yus-shuar áujsamujai métek Yúsan amainkiamai. ⁵ Nuyá nu kunñkuin enketain suntar achik ekeematainmayá ji kapaan káirin áimiak ju nunñkanam ukaamai. Túramtai ipiamtasha untsummasha, peemsha, tura uusha armai.

Kachu umpuarma

⁶ Nuyá siati suntar kachun takakainia nu umpuarta tusar iwiarnararmai.

⁷ Emka suntar kachun umpuarmatai micha kákekamai. Nunasha ji numpajai pachimpramuncha nunñkanam ajapawarmai. Túmakui menaintiu nakakma jeeán numincha tura ashí írúnna nuí ekeemakmai. Tura ashí nunñkanam chírichrin takamtsuk ekeemakmai.

⁸ Nuyá suntar jímiara nu kachun umpuarmatai uunt naintia áanin kean nayaantsanam ajunmai. Túramtai menaintiu nakakma jeeá nayaants numpa ajasmai. ⁹ Núnisan menaint jeeá nayaantsanam matsatania jákarmai. Tura menaint jeeá uunt kanua nu emesnararmai.

10 Nuyá suntar menaintiua nu kachun umpuarmatai ti uunt yaa nayaimpinmaya kapaa kákekamai. Tura entsasha tura púkuninmasha menaint nakakam jeeánum kákekamai. 11 Nu yaasha Yapá-numi náartiniuyi. Tura menaintiu nakakam jeeá entsa yapá ajasarmai. Túrunamtai ti untsurí shuar nu entsa yapá ajasmájai jákarmai.

12 Nuyá suntar kuatrua nu kachun umpuarmatai menaintiu nakakam jeeá tsawaí-nantusha kashí-nantusha tura yaasha emesnarar ajapén tee ajasarmai. Túrunawar tsawaísha káshisha menaintiu nakakam jeeánum tsáapnircharmai.

13 Nuyá chíkich suntar nayaimpiniam nanamun wainkiamjai. Nusha kakantar untsumuk timiai “Maa, chíkich menaintiu suntar umpuiniakui nunkanam pujuinia nu ti wáitsartatui.” Tu timiai.

9

1 Nuyá suntar senkua nu, kachun umpuarmatai yaan nayaimpinmaya nunká kákeran wainkiamjai. Tura nu yaan tunáa shuar jákaru matsam-tai yawirín susamuyi. 2 Tura uraimtai nu nánkatkachu wáanmaya ti mukuint jiiñmiai uunt jiniumiá áintsan. Tura etsancha tee awajsamai, yurañmincha tee awajsamai. 3 Nuyá nu mukuintiunmaya manchi jiiñtrar nunká ti yujaarmai. Tura ju nunkanmaya titiñkia áinis najamin ajastinian susamu armai. 4 Chíríchrincha ashí arakmancha ashí numincha yajauch awajsatin suritkiamuyi. Antsu áyatik shuar nijiañinium Yusa naari árar anujtukchamunak yajauch awajsatin armai. 5 Túrasha ajaktsuk senku (5) nántutin wáitkiastin susamu armai. Kame titiñ, shuaran ijiú, najawęa núnis najawęatin susamu armai. 6 Nui shuar wari jakataj tuñiayatan jákachartatui. Ti wakeruiniayatan jákatniun tujinkartatui.

7 Manchisha ísam mesetnum weena nu kawaiya áinis armai. Kurí tawaspa áinis etsenkraku armai. Yapisha shuarna áinis armai. 8 Intiashísha nuwanua núnis armai. Najisha úunt yawá najya núnis armai. 9 Netsepén namaka saepea áinis jiru péeramu armai. Tura nanamenaksha kaway karu japiiniak mesetnum tsékeena núnisan téter ajarmai. 10 Ujukésha titiñki ujukea áinis asa jañki ajakin armai. Nujai tuke senku nantu yujarsar shuaran íjuar wáitkiastin armai. 11 Ni uuntrisha nánkatkachu wáa uraimia nuyaiti. Nusha Israer-chichamjai Apatún tutainti. Tura Kriaku-chichamjaiñkia Apuriún tutainti. Nuka Yajauch Awajkartin tawai.

12 Jujai emka wáitsatin nankaamasai. Túrasha tuke jímiar taasai.

13 Nuyá suntar saisa nu kachun umpuarmatai chichaman antukmajai. Yusaj naka kunkuin ekeemaka Yus-sutai kurimpramu amai. Tura ni kuatru yantame kachu jiiñmiai. Tura nuyá chichaak 14 suntar kachu takakun saisa nuna timiai “Kuatru suntar Eupratis kanusá pujuinia nu atiram akupkarta.” 15 Túramtai nu kuatru suntar wear menaintiu nakakam untsurí shuaran maatai tusar weriarmiayi. Kame nuna túrawarat tusar ikiusma armai. Tura nu uwitin, nu nantutin, nu tsawantin, tura nu úratin atiatin ikiusma armai. 16 Tura suntarnasha kawainium eketainian wainkiamjai. Tura timiá untsurí nekapmar-chamnia asamtai aya námirurín antukmajai. Nusha jimiará siañtu miyún (200.000.000) armai.

17 Tura íimiamunam suntarnasha kawaincha júnisan wainkiamjai: Eketainiaka netsepnum jirun entsaru armai. Nusha kapaaaku winkia tura

yankú armai. Tura kawaisha úunt yawáa muuke áinin armai. Tura ni weneýasha jisha, mukuintiusha, asuprisha ti tsuer keá nu jíiniarmai. ¹⁸ Nu menaintiu ti yajauch wáitsamujai menaintiu nakakam shuar untsurí jákarmai. Jíjiaisha, mukuintiujaisha, asuprijaisha jákarmai. ¹⁹ Nujai nu kaway ni wenejai shuáran wáitkiasarmai. Tura ni ujuké napí múukeya áinin áрмаi. Nújaisha shuaran wáitkiasarmai.

²⁰ Tura nujaiisha jákacharmia nú shuar tuke tunáa túratniun ini-aisacharmai. Tura yajauch wakanniasha tura ántar-yusnasha tik-ishmatratniun iniaisacharmai. Nu ántar-yus kurijiaisha, kúitjaiisha, jiru yanikutakujaisha, kayajaiisha, numijiaisha najanamu ásar wain-maktinniasha, antuktinniasha, tura wekasatniuncha tujintiainiawai. ²¹ Núnisan mankartuatniuncha, wawekratatniuncha, tsanirmatniuncha, tura kasamkatniuncha iniaisacharmai.

10

Papichin suntar takusmia nu

¹ Nuyá chíkich kakaram suntar nayaimpinmaya táarun wainkiamjai. Nusha yuraním amúamu tura múuknum tuntiak téntakmauyi. Yapisha etsajai métek wíncchayui. Tura kujapéscha ji keá áintsankeyi. ² Nusha papin urak takakauyi. Tura imiá uunt asamtai ni nawé untsuurnumaní nayaantsanam tura menarjini kukar tarimias wajasmai. ³ Tura úunt yawá kakar shiniak chicháa áinis ti kakaram untsumkamai. Nujai siati (7) ipiamtasha chichasarmai. ⁴ Nii chichasarmatai ni chichamen áartiniujai tura nayaimpinmaya chichartak “Áaráip, túrutmiai. Juka nekanashti” túrutmiai.

⁵ Tura nuyá, suntar nayaantsanmasha tura kukarsha tarimias wajama nu ni uweje untsuurin nayaimpinmaaní takuimiai. ⁶⁻⁷ Tura timiai “Penké ishichik ajasai. Suntar siatia nu umpúakuinkia Yus ashí yaunchu enentáimpramia nu uminkiattawai. Emka ujatsuk ukunam ni shuarin Yúsnan etserniua nuna ujakmiayi.” Tu timiai. Nuyá chichaak: “Yus tuke iwiaaku pujawai. Tura imiá kakaram asa nayaimpincha, nunkancha, nayaantsancha, tura ashí nuj írunna nunasha nanajaiti” timiai.

⁸ Nayaimpinmaya “áaráip” túrutmia nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsuuriní papin urak takakna nu achiktá” turutmiai. ⁹ Nuyá túrutkui werin papichin seamjai.

Tura surak turutmiai “Papái. Yuátá. Tura yúamka ti yumin átatui. Tura antsu wakeminkia yapamprattame” túrutmiai. ¹⁰ Nuyá papichin suntarnumia jukin yuamjai. Tura nii turutmia núnisan wenuruinkia ti yumin nekapramjai. Tura antsu yuan wakeruinkia yapampramjai.

¹¹ Tura nuyá turutiarmai “Waketkim ataksha ashí nunkanmaya shuaran tura ni kapitántrincha Yus tana nu ujakartiniaitme.” Tu túrutmiai.

11

Jimiará shuar Yusaiaḡ akupkamu

¹ Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram namaḡ-maa-Yus-sutaisha nekapmartá. Tura nuj Yúsan shiir awajeena nusha nekapmartá. ² Antsu jea

áarĩnkia yajaya shuar susamu asamta nekapmatsuk ikiuktiá. Nu shuar ti shiir péprun Jerusaréŋkan kuarentitús (42) nantu nuĵ akupeenak mashi yajauch awajsartatui. ³ Túruiniakui Wikia Wii-shuaran ĵimiaran akatran akupkattajai. Nusha chikichik mir ĵimiará siantu sesenta (1.260) tsawant pujusar Winian etserkartatui. Nuka menaintiu uwí nanċaamasaiti. Úutkur-entsatai pushin entsaru ártatui.” Tu turutiarmai.

⁴ Nu ĵimiar shuarsha nayaimpiniam nakumkamu ániawai. Uriwiu numisha ĵimiar tura shirikip ekeemataisha ĵimiar nayaimpiniam awai. Nusha ĵu nunċá Uuntri Yusaj wajainiak, ĵimiar akatramua nú shuaran nakumainiawai. ⁵ Shuar nin yajauch awajsataĵ tutai ni weneniá ĵinia ĵiiki nemasri ashí áesatniuiti. Núnisanĵ nin yajauch awajsatniun wakera nuka jákartatui. ⁶ Nu aentska Yúsnan áujmatainiak yumi yutukaĵip titinian kakarman takakainiawai. Núnisanĵ entsancha numpa awajsatniun kakarman takakainiawai. Tura ashí yajauchia nuĵaj aentsun wáitkiasinian takakainiawai. Nuna ashí ni wakeruinia nuĵ páchitsuk túramin ániawai. ⁷ Tura ni takatrĩn umikiarmatai Ti Kajen Yajasma nánċatkachu waanmaya ĵiinia nu mesetan najata nupetak máawartatui. ⁸ Tura iwiarnatsuk ni ayashĩ uunt pepru ĵintĩin ajapén tepeartatui. Nu péprunmasha ii Uuntri Jesukrístuncha máawarmiayi. Nu péprunmaya shuar tuke tunaan túrin ásarmatai Eĵiptu tuíniak tura núnisanĵ Sutuma tuíniak nu péprun páchiiniawai. ⁹ Tura menaintiu tsawant nuyá nanċaamas ashí nunċanmaya shuar jaka tepan ísar iwiarnascharti tiártatui. ¹⁰ Nu jákarmatai ashí nunċanam puĵuinia nú shuar ni jakamun ti wararainiak mai sunai ajartatui. Kame nu ĵimiará aents Yúsnan áujmatenak ashí shuaran wáitkiasaru ásarmatai ti warasarmai. ¹¹ Nuyá menaintiú tsawant nuyá nanċaamas jaka tepesarmatai Yus ataksha iwiaaku awajsarmai. Tura nantakiarmatai nuyá shuar nin wainkiar ti ashamkarmai.

¹² Nuyá nu nantakiaru nayaimpinmaya kakaram untsumman antukarmai: “Ĵuĵ yakí wakatarum.” Tu untsummiái. Tutai ashí ni nemasri ĵimiainiaĵn yuraŋkim amuam nayaimpiniam wákarmai. ¹³ Túmainiaĵ ti úurkamtai tias nakakam jeeá pepru saanakmiai. Tura siati mir (7.000) shuar jákarmai nu uĵaj. Chíkichkia sapiĵmiainiak Yus nayaimpiniam puĵana nuna shiir awajsarmai.

¹⁴ Ĵimiar wáitsatin nanċaamasai. Chikichik ajasua nu túrunatin ishichik ajasai.

Suntar siatia nu kachun umpuarmai

¹⁵ Nuyá suntar siatia nu, kachun umpuarmatai chícham kakaram chichainian nayaimpinmayan antunkamai. Ĵuna túmiayi:

“Yamaikia ii Uuntri Yus tura ni Anaikiamu Kristu ashí shuaran akupin ajasari. Niisha tuke amutsuk akupkartatui.”

¹⁶ Nuyá paintikuatru uuntka akupin puĵutainium Yusaj naka puĵuarmia nu piniakum tepersar Yúsán shiir awajenak tiarmai:

¹⁷ “Unt Yusá, ti kakaram asam Ámijiaĵ tujinkiatin atsawai. Yáunchusha, yamaisha, tura tuke amuutsuk iwiaaku puĵuwitme. Ame ti kakarmarmijiaĵ nekas akupkatin juarme yamaikia. Tuma asakmin yuminsajme, tiarmai. ¹⁸ Ashí shuar kajertamkaru aĵn yamaikia amesha kajerkatin tsawant jeayi. Jákarusha iniantkim ni túramurĩ ísartatme. Turam amée shuarka shiir etserturmakua nusha, tura

Aminiak enentáimturmasarua nusha, tura Ámin shiir awajtam-sarua nusha ashí mash ti shiira nuna súakum akiktatme. Antsu ju nunkan emesniuka ashí emesratniunam akupkattame.” Tu tiarmai.

¹⁹ Tuíniakui Yusa Uunt Jee nayaimpiniam ana nu uranmiatai wakenmaani Chicham Aarma Chumpitiai paant amai. Túrunamtai peemsha, ipiamtasha, cháarpisha, uusha amai tura michasha ti kakekamai.

12

Nuwasha tura Ti Kajen Yajasmasha

¹ Nuyá nakumkamu ti enentáimpramnia nayaimpiniam wantinkiamai. Nuwá etsajai penuarma wantinkiamai. Nawesha nantunam ekeemai. Tura múuknum tuse yaan etsenkrakuyi. ² Nu nuwá ajamtin asa jurertaj tusa wáitiak ti kakantar uutmiai.

³ Tumaj ataksha ti enentáimpramnia nayaimpiniam wantinkiamai. Ti Kajen Yajasma kapaaku wantinkiamai. Muukesha siati asa siati akuptai tawaspan etsenkraku áрмаi. Tura kachurisha tiásauyi. ⁴ Menaintiu nakakam jeeán yaan ni ujukéjai japiki akakermai. Tura nunká utsamai. Nu Ti Kajen Yajasma nu nuwá jatema nuj wajasmai. Júermataik yuruataj tusa wajattsamai. ⁵ Tura nuwasha áishmankan jurermai. Nu uchi uunt ajas ashí nunkanam ti kakaram akupkatín asa, nu uchi akupin pujutainium Yus pujana nuj junakmiai. ⁶ Tura núwaka atsamunam pisarmai. Nuj pujustinian Yus iwiarturmai. Tura chikichik mir jimiará siantu sesenta (1.260) tsawant ayurnat tusa akupkamai. Nuka menaintiu uwí nankaamasaiti.

⁷ Nuyá nayaimpiniam meset amai. Nayaimpinmaya suntara kapi-tiántri Mikiar ni suntarjijai Ti Kajen Yajasmajai máanaikiarmai. Ti Kajen Yajasmasha ni suntarjijai ti máanaikiarsha ⁸ nupetmakcharmai. Túramtai nayaimpinmaya jiki akupkamuyi. ⁹ Núnisañ Ti Kajen Yajasma ashí ni suntarjijai nunká akupkamai. Nu Yajasmasha iwianchi kapi-tiántri Satanás tutanti. Yáunchuya-napiiti niisha. Ashí nunkanmaya shuáran ananniuiti.

¹⁰ Nuyá nayaimpinmaya kakaram untsumman antukmajai. Tura timiai:

“Uunt iwianch ii yachin yajauch áujmatin jiki akupkamu asamtai yamaikia ii Yusri uwentikratniusha tura ni kakarmarin iniakmastingha tura akupkatniusha jeayi. Anaikiamu Krístusha ashí akupin ajastincha jeayi. Tura uunt iwianch ii yachin tsawaisha káshisha iniaitsuk Yusaj yajauch áujmatniua nuna ¹¹ úksañ ii yachi nupetmakarai. Yus-susamu murikiu numpea áinis Jesukrístu numpejai nupetmakarai. Niisha jákatniuitkiusha surimiatsuk nekas-chichaman páchitsuk etserkarmai. Nujajisha uunt iwianchin nupetkarmai. ¹² Tuma asamtai nayaimpiniam pujarmena nusha warastarum. Antsu nunká tura entsá pujarmena nusha uunt iwianch atumin tarutmarmatai, maa, waitnentajrume. Ni tsawantri ishichik ajatesman nekáa ti kajekuiti.” Tu timiai.

¹³ Nuyá Ti Kajen Yajasma nunká ajapna nuwá áishmankan jurerma nuna áinramai. ¹⁴ Turakui nuwan uunt nanapen churuwia nanapea áinis sunasmai. Nujai nanamuk yáunchuya-napiya pisar atsamunam wemai. Tura ni ayuratniunam menaintiu uwí nuyá sais nantu pujusmai.

15 Nuyá nu napi ni weneyá entsá jiki nujan_ukrumamai nuwan ajekrataj tusa. 16 Túrasha nun_uka nuwan yaya_uk nakaak nu entsan mash ukuyámai. 17-18 Túramtai nuwan ti kajerak ni weeá chíkich írúnna nujai máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakui, niijiai máaniaktaj tawai.

13

Nuyá Yajasma jímíara nu

1 Nuyá nayaantsa káanmatkarijn wajasan nayaantsanmaya Yajasman jiiniun wainkiamjai. Muukeshá siátitiat kachuri tias tura akuptai tawas-pasha tias armai. Ashí muuken Yúsan yajauch chicharin tu áarmayui. 2 Nui wáinkiamaj nu Yajasma nekas uunt yawáa áinniuitiat nawenka chaj nawea áinniuyi. Weneshá nekas kajen yawáa áinniuyi. Tura Ti Kajen Yajasma Entsayá Yajasman ni kakarmaríncha tura ni akupkatniuríncha susamai nujai ti kakaram akupkati tusa. 3 Entsayá Yajasma muuké chikichkin jakamnia awatmian wainkiamjai. Túrasha pé_unker awaj-nasmai. Túramtai ashí nun_ukanmaya shuar nuna ísar ti enentáimturar nemarsarmai. 4 Túrawar nin tikishmatrar shiir awajsar “¿Yaki jujaisha jeá. Imiá kakaram asamtai yaki niijiai máanaikminiait?” tiarmai. Tura Ti Kajen Yajasma ni kakarmarín Entsayá Yajasman susa asamtai ashí shuar nincha tikishmatrarmai.

5 Núnisañ nu Entsayá Yajasma waantu enentáimtumak Yúsan ya-jauch chicharkatniusha tsan_ukatnakmai. Tura kuarentitús (42) nan-tutin kakaram akupkatniun sunasmai. 6 Núnisañ túrak Yúsan yajauch áujmatuk ni náaríncha ni Jeencha tura ashí ni shuari nayaimpiniam pujuinia nunasha katsekkarmai. 7 Tura Yusna ainia nujai mesetan najana nupetkatniun tsan_ukatnakmai. Tura ashí nun_ukanmaya shuaran akupkatniun tsan_ukatnakmai. 8 Túramtai ashí shuar tuke iwiaaku átinia nu papinium ni naari yámankamtaiknumiá anujkamun atsúarma nuka nu Yajasman tikishmatrarmai. Nu papincha Murik jaka nantakmia nu takakui.

9 Shuar juna ántakka enentáimprati:

10 “Shuaran emetá juinia nusha emetnattawai.

Núnisañ shuaran nan_ukijiai mainia nusha nan_ukijiai mantamnattawai.”

Tuma asamtai Yajasma mesetan najanamtai Yus-shuar Yus iistí tusar tuke enentáimtusar katsuntsar pujustin áiniawai.

11 Nuyá chíkich Yajasman kukariá wáakun wainkiamjai. Nusha murikiu áanin jimíará kachurtiniuyi. Tura Ti Kajen Yajasma áinis kakaram chichaakuyi. 12 Niisha Entsayá Yajasma kakarmarín súam akupniuyi. Tura ashí nun_ukanmaya shuaran “Entsayá Yajasma pen_uké jaa tsuarma nu, shiir awajnasti” tímiai. 13 Núnisañ shuarti túrachminian ti turin asa ashí shuar íimiainaiñ nayaimpinmaya jinia nun_uká ajuarmai. 14 Tura Entsayá Yajasma súam aents túrachminian ti turak ashí nun_ukanmaya shuaran anan_ukawarmai. Túrak Entsayá Yajasma nakumkamurín najanawarat tusa akupkamai. Túramtai puniajai pen_uké jakamnia awatmia pé_unker ajasma nuna nakumkamurín najanawarmai. 15 Kukariá Yajasma kakaram sunasmai. Nujai Entsayá Yajasma najanamun iwiaaku awajsatniua áintsañ ichachkiamai. Túram ashí níniak shiir awajeacham máatniun susamai. 16 Nu arantcha ashí shuar anujmamprarat tusa akupkamai. Uuntcha uchisha

kuítrinniusha kuítrinchasha ankantcha ankantchasha ashí ni nijiaincha tura wakerakka untsuurincha anujuktiniuyi. ¹⁷ Entsaya Yajasma náarin tura wakerakka ni náari númerurin anujuktiniuyi. Túrachuka sumatnasha sumakhamniuyi, surutnasha surukchamniuyi. ¹⁸ Wats, wi tájana ju nekaatniuka ti nekas enentáimtustiniaiti: Entsaya Yajasma númerurí áishmanka númerurí asa sais siantu seséntisáisaiti (666). Ashí ti neka ainia nú shuar Entsaya Yajasma númerurin nekapmar nin nekaati.

14

144.000 shuar Yúsan kantampruawarma

¹ Nuyá Murikiun Seun náinnium wajan wainkiamjai. Nijjaisha siantu kuaréntikuátru mir (144.000) shuar wajaarmai. Nusha nijíai Murikiu náarincha tura ni Aparí náarincha anujtukma aarmai. ² Ti untsurí áran nayaimpiniam túntuiniak teer awajenak kanusa uuntri nujan Krak téter ajá núnisañ antukmajai. Ti kakaram ipiamta núnis amai. ³ Nu tuntuiyamujai siantu kuaréntikuátru mir shuar akupin pujutainium naka wajasar yamaram kántan kantamáwarmai. Niisha kuatru tan kunmasha tura paintikuatru uuntnumsha naka wajasar kantamáwarmai. Nu kántanka chíkichka nekaachmin armai. Aya nu siantu kuaréntikuátru mir shuarka jú nuñkanmayá shuarnumiá uwempraru ásar nu kántan kantamiarmai. ⁴ Nu shuarsha nuwajai yajauch ajascharu ásar ti shiir ániawai. Túrawar Murik weana nuñ nemarainiawai. Ju nuñkanmayá shuarnumiá uwempraru ásarmatai Yussha tura Muriksha ti shiir enentáimtiarmai. Niisha emka juukma ti shiira núnisañ armai. ⁵ Nu shuar penké wáitruachu ásar Yúsaisha ti shiir tunáa máatrachu armai.

Menaintiu suntar chichaman etserainiawai

⁶ Nuyá nayaimpiniam suntar nanamun wainkiamjai. Nusha uwempratin chicham tuke amuukashtinia nuna ashí nuñkanam pujuinia nú shuaran ujakartiniuyi. ⁷ Nusha ti kakantar untsukum timiai: “Yus ashankatarum. Niñki shiir awajsatarum. Yamaikia ashí shuaran súmantikiawartin tsawant jeayi. Nayaimpincha nuñkancha nayaantsancha ashí entsancha najana asamtai shiir awajsatarum.”

⁸ Nuyá chíkich suntar, jímira nu, taa timiai: “Pai, Uunt Papirúnia pépruka penké meserai. Niisha tuke tsanirmaua núnisañ ashí shuaran anampratniua núnisañ utsuurmai. Tuma asa niisha nú shuarjai nupetnak tuke emesnarai.”

⁹ Nuyá chíkich suntar, menaintiua nu, taa timiai: “Shuar Entsaya Yajasmacha tura ni nakumkamurincha shiir awajeakuñkia tura nijainiumsha uwejnnumsha ni naari anujtukmaitkuñkia ¹⁰ Yus nin kakerak ti asutiáttawai. Yapá pachimprachman áartinia áintsañ ti kakerkat-tawai. Túramtai asupri ti tsúer keá nujai jinium wáitsartatui. Yusa suntari tura Murik ímmianum apenáwar jinium wáitsartatui. ¹¹ Ni wáitsatniuri ji esaak kajintsuk tuke mukuñtia nuniskete. Entsaya yajasma tura ni nakumkamurin shiir awajeenak ni naari anujmainia nuka tsawajsha káshisha ayamtsuk wáitsartatui. ¹² Nu asamtai ni chichamen umirainiak Yusna ainia nuka Krístun ti shiir nemarainia ásar nu tsawantai itirchatnum pujuiniak katsuntratin ániawai.”

¹³ Nuyá nayaimpinmayá chichaman antukmajai. Nusha turutmiiai “Ju áatratá: “Uunt Jesusan umirainia nu yamá jakarusha tura ukunam jakarusha ti shiir pujusartatui.” Tu aartá” timiai.

‘Núnisan̄ Yusa Wakan̄ tawai. “Eta, ti takasaru ásar jakar yawerman ayamprartatui. Tura ti penker túrawar akinkiertatui” tawai” turutmiai.

Jú nunkanam arakma juukma

¹⁴ Nuyá yuran̄kim pújun wainkiamjai. Tura yuran̄miniam Aents Ajasua nuna eketun wainkiamjai. Akuptai tawaspan kurijjai najanamu etsenkrakuyi. Tura machitian éren takakuyi.

¹⁵ Tura chíkich suntar Yusa Uunt Jeeñiá jiinki yuran̄miniam eketun kakantar chicharuk tímiai “Árak júuktin tsawant jeayi. Machitrumjai tsupiram juuktá.” ¹⁶ Tutai yuran̄miniam eketu ni machitrijjai nunká arakman tsupir juukmai.

¹⁷ Nuyá chíkich suntar Yusa Uunt Jee nayaimpiniam ana nuyá jíinkimiai. Niisha ni machitri éren takakuyi. ¹⁸ Tura chíkich suntar namañ maar Yus-sútainmaya jíinkimiai. Niisha jinia wáinniuyi. Tura máchit ti éren takakun kakantar chicharuk tímiai “Machitrum ti érea nujai uwa nunká arakma nu tsupiram juuktá. Mash tsamakarai.” ¹⁹ Tutai suntar ni machitrijjai ashí nunkanmaya uwa neren tsupir juukmai. Tura neketainiam chumpiamai. Nu neketai Yus ti kajerak shuáran ti asutiátta nuna nakumeawai. ²⁰ Tura uunt péprunmaya arantach ijiurarmai. Tura neketainmaya numpa jíinkimiai. Nu numpa tres siañtu (300) kirumitrua nuñ pajamar kawayu nujijiai métek ajasmai.

15

Nayaimpinmaya suntar amúamunam wáitkiastinia nuna pininnumian ukainiawai

¹ Nuyá ashammian ti enentáimpramnian nayaimpiniam wainkiamjai. Siati suntar amúamunam wáitkiastinia nuna takusarmai. Nujai ju nunkanam yajauch shuáran ti wáitkiasar Yus kajeamun umirtatui.

² Nuyá antumianka áiv 20 Tura uunt péprunmaya aranntsai ti saar jijjai pachimpramun wainkiamjai. Ni káanmatkarincha Entsayá Yajasman tura ni nakumkamurincha nupetkarma nu nuñ wajaarmai. Tura nin arpa tuntuitiain Yus súsarmai. ³ Túramtai kantamáwarmai. Yusa yaintri Muisaisa kantarincha tura Murikiu kantarincha kantamainiak tiarmai: “Uuntá, ashí tujinchaitme. Ti penker tura ti enentáimturmin ashí najanaitme. Ashí Uunt Akupin asam ashí nekasa nu túrasha pénkera nu túriniaitme. ⁴ Uuntá, zyaki ashampromkachat! Tura yaki ti shiir awajtamsachat! Aya Amek ti shiir tunaarinchaitme. Ashí nunkanmaya shuar ame ti shiir túramun wáinkiár Aminiak jeartamar ti shiir awajtamsartatui.”

Tu kantamáwarmai.

⁵ Nuyá atak Yusa Uunt Jeeñ ísan, Ti Shiir Tesaamun uranniun wainkiamjai. ⁶ Tura Ti Shiir Tesaamunmaya siati suntar siati wáitkiastinjai jíinkiarmai. Niisha ti shiir pújun entsaru armai. Netsepnumsha kurin emenmama armai. ⁷ Nuyá kuaru tan̄kunmaya chikichik kurí pinin̄kian súsarmai. Nu pinin̄ tuke iwiaaku Yusa kajetairijjai piaku armai. ⁸ Tura Yusa kakarmari ti ashammai Ti Shiir Tesaamunam mukuintua núnis piakmai. Túramtai nu siati suntar wáitkiastinian ukarar amuiniatsain̄ Yusa Jeeñ wayachminiuyi.

16

Wáitkiastin pinin̄ ukararma

¹ Nuyá Imiá Shiir Tesaamunmayá ti kakaram chichaamun antukmajai. Nusha siati suntaran tiarmai “Nunká werum Yusa kajetairi siati piniñnum ana nu ashí ukartarum.”

² Tutai emka suntar we, piniñnumiá kukar ukarmai. Túramtai ashí shuar Entsaya Yajasma náarín anujmamprar ni nakumkamurín shiir awajiarma nuna ti najamin kuchap jiintiurarmai.

³ Nuyá chikich suntar jímiara nu, we Yusa kajetairín nayaantsanam ukarmai. Túramtai nayaants jakáa numpéa áinis ajasmai. Tura ashí nui pujuinia nu kajiñkiarmai.

⁴ Nuyá suntar menaintiua nu, entsanam tura púkununmasha ukarmai. Túramtai ashí numpa ajasarmai. ⁵ Nuyá suntar entsá wáinniua nuna chichamen antukmajai. “Uuntá, amek ti penker Yus asam jútikame. Yáunchusha tuke pujú asam ti shíraitme. ⁶ Iis, nu shuar amée shuárumincha tura ame chichammin etserniuncha máawar ni numpen ukatraru ásarmatai Amesha núnismek numpa áarume. Maa, páchitsuk áitkianatin áiniawai.”

⁷ Tutai naman-maa-Yus-sútainmayá chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniua nu ti penker túrin asam nu shuar túramujai métek akiruitme, timiai.”

⁸ Nuyá suntar kuatrúa nu, tsawai nantunam ukarmai. Túramtai jijjai shuáran esaamujai wáitkiastin kakaram sunasmai. ⁹ Tura shuar ti sukuám wáitarmia nu, nu wáitkiastinian nérenniun Yusan yajauch chicharkarmai. Tura ni tunaarín enentáimtsuk Nin shiir awajatsniuncha penké nakitrarmai.

¹⁰ Nuyá suntar senkua nu, Entsaya Yajasma akupin pujutairín ukarmai. Túramtai ni nunkeñen ashí kashi ajasmai. Tura shuar ti najaimiainiak iniaincha esamiarmai. ¹¹ Tura nújajisha yajauch túratniuncha iniáisacharmai. Antsu kuchapríjjajisha tura ti najaimiainiak wáitaiainiak nayaimpinmayá Yúsan ti yajauch chicharkarmai.

¹² Nuyá suntar saisa nu, Eupratis entsanam ukarmai. Túramtai kuyuámai. Nujai nantu tátainmaaniá akupin taarti tusa jintiamnamai.

¹³ Tura nuyá júna wainkiamjai. Ti Kajen Yajasma weneyasha, Entsaya Yajasma weneyasha tura núnisan penké Kukariá Yajasma ántar yúsnan etserniua nuna weneyasha puachia núnin yajauch wakan menaint jíniarmai. ¹⁴ Íwianch áiniak aents tujintiamun túruiniak ashí nunkanmayá akupniun irurarmai. Ti Tujincha-Yusai ni uunt tsawantri jeamtai mesetan najanatai tusar weriarmai. ¹⁵ (Yamá Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwiarnar pujak ni entsatairín penker wáinia nú shuar ti shiir átatui. Misuchu asa natsaarchattawai.” Tu tawai.) ¹⁶ Tura yajauch wakan uunt akupin áinian Armajetúñ nunkanam irurarmai. Israer-chichamnum nu nunka tu anaikiamuiti.

¹⁷ Nuyá suntar siatia nu, nasenam ukarmai. Túramtai nayaimpinmayá Yusa Uunt Jeeniá ti kakaram chicham Yus akupin pujutainmayá chichaak “Mash uminkiai” timiai.

¹⁸ Tura nuyanka peemsha, chárpisha, ipiamtasha ajamai. Tura nunkasha ti kakaram úurkamai. Maa, aents jú nunkanam yámankamtaik pujuarmia nuyá júnis úurkamuka atsuwiti. ¹⁹ Ti Uunt Péprusha menaint nakantramai. Ashí nunkanmayá péprusha saanakiarmai. Nuisha Yus ti kajerak Papirúnia pépruncha kajiñmattsuk ni kajetairín yapá umutaia

áintsan̄ aarmai. ²⁰ Entsá ajapén atentrasha tura murasha menkaramai. ²¹ Núnisan̄ nayaimpinmaya uunt kaya núnisan̄ micha kákeramai. Ti uunt áiniak kintiarjai métek kijin armai. Shuarsha nujai ti wáitiainiyatan̄ áyatik Yúsan yajauch chicharkamai.

17

Tsanirmatai nuwá asutiámu

¹ Nuyá siati suntarnumiá chikichik taruti turutmiai “Winitia. Tsanirmatai nuwá ti asutiátniun iniaktustatjame. Nu nuwá nayaantsanam uku eketui. ² Ashí ju nuñkanmaya akupin niijjai tsanirmawaru áiniawai. Núnisan̄ ashí ju nuñkanmaya shuar, nu nuwá tsanirmatniun tsankateam, nijiamanch umartinia áintsar niijjai ti yajauch túrawar nampekarmai.” Nuna taku Yusnumiá kanaktinian nakumkamai. ³ Nuyá mesekranam kampuntin atsamunam jurukmiai. Tura nui Yajasma kapaakunam nuwá eketun wainkiamjai. Nu Yajasma manmasha ashí Yúsan yajauch chichareamu áatramuyi. Muuke siátitiat kachurj tiásauyi. ⁴ Nu nuwasha tarachin yamakai kapaakujai sha ti shiir iwiarmamar entsaruyi. Kurijjai sha, shírmach kayajai sha, ti shiir sháukjai sha iwiarmamprauyi. Kurí pininkian mujmiainniasha tura ashí ni tsanirmatairi imiá yajauch armia nunasha piakun ajaamak takakauyi. ⁵ Nijiainiunmsha ni naaria áintsan̄ yúpichuch nekaachminia nu júnis áarmauyi: UUNT PAPIRÚNIA, Ashí Tsanirmauncha tura Ashí Ju Nuñkanam Mujmiaianin Túrinia Nunasha Nukurinti. ⁶ Nu nuwasha Yus-shuar Krístunun etserkar máawarma ainia nuna numpen nampekuyi.

Nuna wáinkian ti enentáimturmajai. ⁷ Túrunamtai nayaimpinmaya suntar túrutmiai “¿Urukamtai imiá enentáimtam? Wats, ashí nuwanun paant ujaktatjame. Núnisan̄ yajasma ekenak júana nunasha paant ujaktatjame. Muukeshá siátichukait tura kachurj sha tiáschak áinia. ⁸ Nu yajasma wáinkiam nuka yaunchu pujuwiti tura yamaikia jui pujachiat amúamunam tuke játsuk nánkatkachú wáanmaya jíinkíttiawai. Shuar nuna wáinkiar ni naari tuke iwiaaku pujutai papinium yámankamtaiknumiá anujtukchamua nuka nu yajasma ashankartatui. Nu yajasma yaunchu pujú yamaikia atsayat atak wantinkiattawai’ turutmiai.

⁹ ‘Nekas neka ainia nu juna enentáimturarti: Siati muukenka siati náintian nakumui. Nu nuwá nui eketui. ¹⁰ Núnisan̄ ni siati muuke siati akupniun nakumui. Kame senku akupniuka nankaamasaru ainiawai. Chikichik tuke akupniuiti tura chikichka tuke taatsui. Nii taasha núkap tsawant akupkashtatui. ¹¹ Nuyá ashí ukunmanka yaunchu amia nú yajasma wantiniak nujai uchu akupin ajastatui. Túmaitiat chikich siati akupniujai iruram métek enentáimpramniai. Tura nu yajasma yamaikia atsayat wantiniak akupak umik tuke emesnartinnium wétatui’ turutmiai.

¹² ‘Tias kachurj wáinkiam nuka tias akupin tuke akupeenatsna núiti. Niisha nu yajasmajai métek penké ishichik tsawant akupin ajasartatui. ¹³ Ju tias akupniusha métekrak enentáimiainiak ni kakarmarin yajasma sústartatui nujai sha akupkat tusar. ¹⁴ Murikjai sha mesetan najanawartatui. Túrasha Murik nupetkartatui. Niisha uuntjai nankaamas Uunt asa tura núnisan̄ akupniujai nankaamas Akupin asa nupetmaktatui. Tura Niijjai irutraa nu, Yus Winia atí tusa achikma ásar tura Nin tuke umirin ásar Niijjai nupetmakartatui.’

15 Suntar tuke chichartak turutmiai ‘Tsanirmatai nuwá nayaantsanam uku eketu wáinkiachumek. Nu nayaantsaka ashí nuñkanmaya shuáran nakumeawai. 16 Tura tias káchuka yajasmanum wáinkiam nu, tsanirmatai nuwán nakitrar ajapawar misú ikiukiartatui. Ni ayashíncha yuawartatui tura áesawartatui. 17 Nu akupniu enentáin Yuska ni wakeramurjín apujsaiti. Nii timia nu umintsajín akupniusha métekrak enentáimprar ni kakarmarjín takamtsuk yajasman súsatniun enentáimtikramai. 18 Nuwá wáinkiam nuka ashí nuñkanmaya akupniun akupeana nu pépruiti.”

18

Papirúnia emesramuiti

1 Nuyá nayaimpinmaya suntar táarun wainkiamjai. Ti kakaram akupin asa nuñkancha tsáapin awajsamai. 2 Tura ti kakantar chichaak timiai “Pai, Uunt Papirúnia penké meserai. Tura yamaikia íwianch mat-samtaisha ashí yajauch wakanj pujutairjisha ajasai. Muujmiais nanamtincha tura ashí yajauch nanamtin ainia nusha nuj pasunmainiawai. 3 Nu péprunmaya shuar tuke tsanirmaua núnisañ ashí nuñkanmaya shuaran anampratniua núnisañ ni ti yajauch turamujaj utsuurmai. Núnisañ ashí jú nuñkanmaya akupin Yúsan iniaisar nijjaj tsanirmawarua áinis áiniawai. Tura shuarsha ni yajauch wararmajaj ti kuítrintin ajasaruiti.” Tu timiai.

4 Nuyá nayaimpinmaya ti kakantar chichaman antukmajai. “Wí shuaraitrumna nuka nú peprunmaya jínkitiarum. Túrachkurmeka ni tunaarj jumankirum ni wáitsatniurjíncha pachiinkiatarme. 5 Ni tunaarjisha ti piak nayaimpiniam jeastatuk ajasai. Tuma asamtai Yus ni tunaarjín kajinmatkichuiti. 6 Ni tunáa túramujaj métek akikiam ataksha nuna nankaamas métek patattsata. Ni yajauch túramu nijiamchin ashí áararma núnisañ nuna nankaamas ti wáitsatin nijiamanch pachimpruram susata. 7 Waantu enentáimtumak yajauchin wararsama nujaj métek ti wáitkiastá yamaikia. Tunáan ti túriniaiat ni enentáinkia enentáimias “Uunt Akupniuitjai. Wajechu asan penké wáitsashtiniaitjai” tu enentáimtumawai. 8 Tuma asamtai ti wárik chikichik tsawantaj ni wáitsatniurj tarittiawai. Jákatniusha ti wáitsatniusha tura tsukasha tarí ashí jijjaj ekeemankattawai. Uunt Yus ashí Tujincha nu kajerkamú asa nujaj asutniáttawai.” Tu timiai.

9 Ashí nuñkanmaya akupin nijjaj tsanirmawaru ainia nu ashí yajauchin nijjaj wararsaru ásar nu pepru esaak múkuint ajakui eáarmai. 10 Ti esaak wáitiakui nuj pachiinkiar wáitsatniun ashamainiak arant wajasar tiartatui “Maa, Papirúnia ti uunt pépruitiat nekas wáitnenmai ajawai. Imiá wárik ni wáitsatniurj tarini.”

11 Núnisañ ashí nuñkanam súrin ainia nusha nu péprun ti kuntuts enentáimturar eáartatui. Ni surutain itiamun zyaki sumarkat? 12 Kame juna itiaru áiniawai: kurincha, kuítniasha, kaya shíirmachincha, ti shiir sháuknasha, ti pénger tarachniasha, akupin entsatai shiirmachin yamakaincha kapañaniuncha, sétancha, itiaru áiniawai. Núnisañ ashí kuñkuin numincha, ti shiir awara najanamuncha, ti shíiram numincha, yanjú jiruncha, penké jiruncha, mármur kayancha itiaru áiniawai. 13 Núnisañ ishpiñnasha, nusháa kuñkuinniasha, mira kuñkuinniasha, umutaincha, asutincha, trikiu nerencha, tura trikiu ti pénger

nekenmancha itiaru áiniawai. Núnisan áintstai tañkuncha, murikniasha, kawaincha ni kárurijiaj, tura nú arantka shuárnasha suruktinian itiaru áiniawai.

¹⁴ Tura nu péprun tiarmai “Numí neren ti wakeruk súmauya nu ya-maikia nuj atsawai. Ashí ni kuítrisha tura ashí ni péñkerisha tuke penké amuukayi.” Tu tiarmai.

¹⁵ Ashí nuna súrin armia nu, nuna surukar kuítrintin ajasaru ásar, ti wáitsamun ashamkar arant wajasar earartatui. ¹⁶ Túrawar tiartatui “Maa, uunt pépruiat ti wáitnenmai ajakai. Nuwa ti penker iwiarmampra áinis nuyá shuar akuptai tarachin yamakajiaj kapaaku entsarmai. Kurijiaisha kaya ti shírmachijiaisha tura ti penker sháukjaisha ti shiir iwiarmampraruyi. ¹⁷ Ti wárik ashí ju kuit amukaiti.” Tu tiarmai.

Ashí uunt kanú kapitiantrisha, ashí nayaantsanam katiinia nusha, ashí kanú wiánniusha, tura ashí kanú nérennurisha árantak wajasarmai. ¹⁸ Tura pepru esaak múkuint ajan wáinkiar ti kakantar úutainiak tiarmai “Timiá shiir pepru atsuwiti.” ¹⁹ Tiar ti kuntuts pujuiniak awatmamar kakantar úutainiak tiarmai “Maa, ti uunt pépruiat ti wáitnenmai ajakai. Ashí uunt kanu nérentin nayaantsanam niijiaj takasar kuítrintin ajasarmai. Tura ti wárik mash emesnarai.” Tu tiarmai.

²⁰ Antsu nayaimpiniam pujarumna nu, ashí Yus akatramutirmesha, ashí Yusna etserniutirmesha, tura ashí Yus-shuar árumna nu ni wáitsamujaj warastarum. Nu wáitsamujaj atumin yajauch awajtam-sarmena nuna yapajtiurmakurme.

²¹ Nuyá ti kakaram nayaimpinmaya suntar ti uunt neketai kayan jukí nayaantsanam ajun timiai “Júnisan uunt pepru Papirúnia emesnar atakka wainniakchatin tuke menkakattawai. ²² Tura atakka jantsemma piníkiuisha tampursha shakapsha antunkashtatui. Nu arantcha nuñkia shuar penké takakmaschartatui. Túramtai nekeamusha antunkashtatui. Ashí mitia átatui. ²³ Shiripkincha ekeemakchartatui. Nuatma nampersha antunkashtatui. Nuikkia ni shuarij súrin arma nu ashí nuñkanam nankaamantu armai. Tura ashí nuñkanmaya shuaran waweatniua áintsan níya núnis ajasarat tusa anañkawarmai. Túrasha núnisan ti kakarmaitiat ju mash túrunayi.” Tu timiai.

²⁴ Kame ni akupkamujaj péñker shuar ti mantamnewaru asamtai nu péprunam ashí yaunchu Yusna etserniu numpesha, ashí Yus-shuara numpesha tura péñker shuar ashí nuñkanam maamu ainia nuna numpesha nuj paant wáinkiamniaiti.

19

¹ Nuyá nayaimpinmaya ti untsurí aents kakantar unsumainian antukmajai.

“Ju ti shiir enentáimtumainti. Yuska uwempratniuncha, nekas shiir átinniasha, nankaamaku átinniasha, tura ashí kakarmancha nekas nérenniuiti. ² Niisha aya nekas péñker túratniua nuna túrin asa ti nukap tsanirmaun ashí shuaran tsanirijiaj utsuun ti asutiáyi. Nin ti wáitkias ashí ni shuarij máawarman yapajmiátkaiti” tiarmai.

³ Ataksha kakantar unsumainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.” Tu tiarmai.

⁴ Tuíniakui paintikuatru uunta nu tura kuaru tañkusha nuñká pini-akumawar akupin pujutainium Yus pujana nuna shiir awajtsarmai.

Túrawar “Imiá nekasaiti. Ti shiir túriniaitme” tiarmai. ⁵ Akupin pujutainmaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapitánitkiurmesha péejchachitkiurmesha, ii Yusri tuke shiir awajsatarum.” Tu timiai.

Murik nuatnaikiatin namperi

⁶ Nuyá ti untsurí aents chichainiak kanusa uuntri nujan_krak téter ajá núnisañ antukmajai. Ti kakaram ipiamta núnis amai.

“Tí shíiraiti, tiarmai. Ii Uuntri Yus ashí tujincha asa ashí akupkatniun nan_kaamayi. ⁷ Tuma asamtai shiir enentáimsartai. Murikiu anajmarmari shiir iwiarnarmatai ni nuatnaikiatin tsawantri jeayi. Tuma asamtai ti shiir warasar nincha shiir awajsatai. ⁸ Murikiu anajmarmari_kia iwiarnarti tusa ti shiir pushí sunasmai. Nusha yamaram máatrachu asa ti pújuiti.” Tu tiarmai.

Nu pushí Yus-shuar péñker túramun nakumeawai.

⁹ Nuyá nayaimpinmaya suntar turutmiai “Ju áatrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiai. Ju_ka Yus timia asa imiá nekasaiti.”

¹⁰ Takui nu suntaran shiir awajsataj tusan tikishmatramjai. Túramtai turutmiai “Peñke áinkiaip. Wisha Yusa yáintrintjai ámijiai métek tura yatsumjai métek Kristu nekas chichamen tuke umirin ainia nu. Yúsak shiir awajsatniuiti.” Tu turutmiai.

Kame Kristu imiá nekas timia nuna ashí Yúsnan etserainia nú shuar paant awajkartin áiniawai.

Kaway pújunam eketna nu

¹¹ Nuyá nayaimp uranniun wainkiamjai. Nuí kaway puju wantinkiammai. Nu kawaynium ekeema nuna naarí Ti Peñker Umin tutajyi. Núnisañ Ti Nekas Turin tutajyi. Ti peñker Akupin asa aya nekas péñker túrak mesetan najanaiti. ¹²⁻¹³ Ni jíisha jíijiai métek keeármái. Múuknumsha akuptai tawaspan untsurí etsen_krakuyi. Nuí ni naarí Yus Chicham áarmauyi. Túrasha tana nuna Niñki takamtsuk nekaamai. Numpajai en_kerman entsaruyi. ¹⁴ Ti untsurí nayaimpinmaya suntar mesetnum weena áintsar kawainium ekemkar ti shiir pújun entsaru Nin nemariarmái. ¹⁵ Nu suntara Uuntri wen_eya, ashí nun_kanmaya yajauch shuaran máatin, puniá mai ere tsakatskatín jíinmiai. Tura jirujai asutiátnua áintsañ ti kakaram akupkattawai. Túrak Ashí Tujincha Yusa kajetairi ti kakarma nujai shuáran asutiáttawai. Uwa nekenkar ijiuratniua áitkiasañ wáitkiasartatui. ¹⁶ Ni pushir_incha maku_incha ni naarí áarmauyi: Ashí Akupniun Akupin tura Ashí Uunta Uuntri.

¹⁷ Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperin yurumáitarum. ¹⁸ Akupniu nama_késsha yuítiarum. Suntara kapitántri nama_késsha, kakaram suntara nama_késsha, kaway nama_késsha tura eketainia nuna nama_késsha, kame ashí shuara nama_késsha nan_kaamantu ainia núnasha tura penké shuar ainia núnasha yuítiarum.” Tu untsukmai.

¹⁹ Tura nuyá Entsaya Yajasmancha tura jú nun_kanam akupin ainia nunasha ashí ni suntar_jijai wainkiamjai. Niisha kawainium eketka nujai tura nuna suntar_jijai mesetan najanatai tusar iruntrarmái. ²⁰ Tura

nu mesetnum Yajasmasha tura Kukariã Yajasmasha, penké ántar yúsnan etserniua nu, mai achinkiarmai. Nuikkia Entsaya Yajasma ni kakar-marín súam nu Kukariã Yajasmaka aents tujintiamun ti turak shuáran anañkawarmai. Túramtai nu shuar Entsaya Yajasma náarín apuj-mamsar ni nakumkamurín shiir awajсарmai. Tuma asamtai Entsaya Yajasmáncha tura Kukariã Yajasmáncha íwiakuk asuprijjai ti kea nu ji-antumiannum apeáwarmai. ²¹ Chíkichka kawainium eketkanumiã puniá tsakatskatin weneyã jiinmia nujai mantamnawarmai. Túramtai nanamtin ni ayashin yuawar ejemakarmai.

20

Kristu mir uwí jú nunkanam akupkattawai

¹ Nuyá nayaimpinmayã suntar táarun wainkiamjai. Nusha nánkatkachu waã yawirín tura jinñkiatai jirun kampurman takakuyi. ² Nu suntarsha Ti Kajen Yajasma jiru kampurmajai jinñkiamai. Nu Yajasma iwianchi kapitiántri Satanas tutainti. Yáunchuyã-napiti niisha. Tura nu iwianchin jinñkiá mir uwí pujusat tusa ³ nánkatkachu waãnam epenmíai. Tura waiti uraichminian anujtukmai. Mir uwí nankaamatsain ashí nunkanmayã shuaran anañkawarain tusa túramai. Antsu mir uwí nankaamasmatai ishichik tsawant ankant akupnaktiniati.

⁴⁻⁵ Nuyá akupin pujutainium pujuinian wainkiamjai. Tura shuara túramurín írsarat tusa kakaram sunasarmai. Tura núnisan muuke tsupirka maamu wakanincha wainkiamjai. Nusha Yusa chichamen etserainiak tura Kristu chichamencha etserin ásar maamu armai. Niisha Entsaya Yajasmáncha ni nakumkamuríncha tikishmatracharu armai. Núnisan náaríncha nijiainiumsha tura uwejnnumsha anujmampracharu armai. Nu shuar ataksha nantakiar emka nantaktin tsawantnum pachi-inkiarmai. Túmainiak Krístujai métek mir uwí akupeamun wainkiamjai. Antsu chíkich jákaruka mir uwí nankaamatsain nantakcharmai. ⁶ Antsu emka nantaktin tsawantnum pachiinkiarua nú shuar, ti penker áimak, ti shiir warasmin áiniawai. Nu shuarka jimíarã jákatniunam pachiintsuk Yusna tuke takarin tura núnisan Krístunu tuke takarin ártatui. Tura Krístujai métek mir uwí akupkartatui.

⁷ Tura mir uwí nankaamasmatai uunt iwianch urani akupnaktatui. ⁸ Túram ashí nunkanmayã shuáran anañkawartaj tusa jíinkittiwai. Kuk nunkanmasha tura Makuk nunkanmasha ashí pujuinia nuna anañkawartatui. Tura mesetan najanataj tusa ni suntarin nekapmarchamnia ti untsurí irurtatui. ⁹ Tura ashí nunkan enetak Yus-shuar matsamtaincha tura Yús ti aneamu pépruncha mash éñkekarmai. Túramtai Yus nayaimpinmayã jinia akuptuk mash áesawarmai. ¹⁰ Tura iwianchi kapitiántri, nin anañkawarmia nu, asuprijjai keá ji-antumiannum apenámai. Nu yaunchusha Entsaya Yajasmasha tura Kukariã Yajasmasha, penké ántar yusnan etserniua nu, nuí apenáwarmai. Nuisha tsawajsha káshisha iniañnatsuk ti wáitsartatui.

Ashí amúamunam súmamtikiatin tsawant

¹¹ Nuyá akupin pujutain úntan tura ti pújun wainkiamjai. Tura nuí pujancha wainkiamjai. Niisha ti kakaram asamtai nunkasha nayaimpisha aya menkarar tuke atsuármái. ¹²⁻¹³ Tura túrunatsain nayaantsanam jákarua nusha jíinkiarmai. Núnisan iwiarsamunam jaka pujuinia nusha

jíinkiarmai. Tura jákaruncha, nan̄kaamantu arma nunasha tura pen̄ké shuar arma nunasha, ashí wainkiamjai. Tura Yusaj̄ naka wajaarmai. Nuyá ashí shuar túramu aakma papí urantrarmai. Tura nu papinium aarma nujaj̄ métek ashí ni turamurj̄ paant nékaneakui súmamtiknawarmai. Tura chíkich papisha tuke iwiaaku pujustin papí urankamai. ¹⁴ Nuyá jákatin amuukati tusa ji-antumian̄num apenámai. Nu ji-antumian̄num wétin jimiará jákatin tútainti. ¹⁵ Tura ashí shuar ni naarī tuke iwiaaku pujustin papinium atsúarma nusha nuj̄ apenáwarmai.

21

Nayaim yamaram tura yamá nun̄ka

¹ Nuyá nayaimpisha tura nun̄kasha men̄karamtai nayaim yamarman tura yamá nun̄kancha wainkiamjai. Tura nayaantsasha atsumai. ² Wi, Juan̄, ti shiir péprun, Yusnumiā yamaram Jerusarēnkan nayaimpinmaya táarun, wainkiamjai. Anajmarma ni áishrin̄ in̄kiuntaj tusa ti shiir iwiar-mampra áintsan̄ ti pen̄ker iwiamuyi. ³ Nayaimpinmaya ti kakantar chichaamun antukmajai. “Iisiá, Yus yamaikia aentsjai pujawai. Tuke niijjaī pujakui ashí ni shuarī ártatui. Tura niijjaī tuke pujak nekas tuke ni Yusrī átatui. ⁴ Yus ni neajkin̄ ujujturartatui. Tura nuik amia nuka ashí amuukarmatai jákatniusha, úuttincha, wáitsatniusha, tura najaimiatniusha atsuttawai.”

⁵ Tura akupin pujutanium ekema nu “Iistá, Wi ashí pen̄ké yamarman nájanjai” timiai. Nuyá nu arantcha turutmiai “Juka imiá nekas asamtai aartá. Nekas enentáimtustiniaiti.” ⁶ Ataksha turutmiai “Yamaikia mash uminkiyai. Wiitjai. Yámankamtaiknumiā amúanmasha tuke pjuwitjai. Wisha A rétranmaya Y rétranam ashí retra áintsaitjai. Ashí kitiama núnaka tuke iwiaaku pujutai entsan̄ pen̄ké kuitchajaī áartatjai. ⁷ Nupetmakunka ashí yamarma juna mash susattajai. Wisha ni Yusrī átatjai. Núnisan̄ niisha winia uchir átatui. ⁸ Antsu sápijka, Yúsan enentáimtichusha, ya-jauchin̄ máatrasha, man̄kartincha, tsanirmatan̄ pujurniusha, wawekratniusha, ántar-yusan tikishmatniusha, tura ashí wáitrincha asuprijjaī keá ji-antumian̄num apenáwartatui. Nuka jimiará jákatin tútainti.”

Yamaram Jerusarēn

⁹ Nuyá siati suntar piniñ amúamunam wáitkiastinjaī piakun takakua nuyá chikichik taruti túrutmiais “Winitiá. Murikiu anajmarmarin̄ ini-aktustajame.” ¹⁰ Taku mesekranam naint yakí juruki Yusnumiā ti shiir Jerusarēn pepru nayaimpinmaya táarun iniaktursamai. ¹¹ Nu péprusha Yusa wincharijjaī tsáapniniuyi. Nu tsáapnincha kaya ti shíirmachia núnis jaspi kaya nuní saar asa ti tsáapniniuyi. ¹² Pepru yantamesha ti yakí pen̄kramuyi tura wáitirī tuse amai. Tura nu wáitinium suntar wajatiarmai. Nu wáitinmasha Israer-shuara uuntrī tuse armia nuna naarī áarmauyi. ¹³ Nantu tátainmaan̄j menaintiu waiti amai. Nantu akatainmaan̄jsha menaintiu waiti amai. Nun̄kaan̄jsha menaintiu waiti amai. Arakaan̄jsha menaintiu waiti amai. ¹⁴ Ti uunt kaya tuse apujsamu armai. Tura nuj̄ ekenir pen̄kramuyi. Nu tuse kayanam Murikiu akatramurj̄ tuse armia nuna naarī áarmauyi.

¹⁵ Suntar wijjaī chichaua nu, nekapmatain kurin takakuyi. Nujaj̄ pépruncha, wáitirin̄cha, tura pen̄kramurin̄cha nekapmartiniuyi. ¹⁶ Pepru esant̄isha wan̄kant̄isha yakir̄isha mash métekrak armai. Suntar-sha péprun nekapmataijjaī nekapmaram esant̄isha wan̄kant̄isha tura

núnisañ jeamkamú yakirísha jimíará mir jimíará siañtu (2.200) kirúmitru amai. ¹⁷ Nuyá péñkrincha nekapmarmái. Suntar aents nekapmataijjái nekapmaram sesentikuatru (64) mitru amai. ¹⁸ Nu péñkramusha jaspi kayajái najanamuyi. Péprusha aya kúrikiyi. Nu kuri ti penker sáarauyi. ¹⁹ Peñ apujtukma kayasha ti shiir kaya ainia nujái najanamu asa ti shiir iwíaramuyi. Emka nu jaspi káyauyi. Jímiara nusha sapíru káyauyi. Menaintiua nusha ákata káyauyi. Kuarua nusha ismirártauyi. ²⁰ Senkua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha períru káyauyi. Nuiwia nusha tupa-siu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatístá káyauyi. Ti kayaim apujsamú asamtaí ti shíirmachiíyi. ²¹ Pepru wáitirí tuse ainia nu, ti shiir nayaantsanmayá shaukjái chikichik najanamu armai. Pepru jintísha aya kúrikiíyi. Nu kuri ti penker sáarauyi.

²² Yusa Uunt Jeeñcha wainkiachmajai. Antsu nu peprunam Uunt Yus ashí tujincha nu tura núnisañ Muriksha nu péprun pímiutkui takamtsuk Níiniuyi. ²³ Nu péprunmasha tsawaí-nantusha kashí-nantusha atsumchamai. Antsu Yusa wincharí tsáapin awajmíai. Núnisañ Muriksha tsáapin awajmíai. ²⁴ Nu tsáapnijjáiasha ashí nuñkanmayá shuar wekasartatui. Tura ashí nuñkanam akupin ainia nusha nuí yujainiak ni péñkerjijái nuna shiir awajtuiniawai. ²⁵ Tura kashi atsá asamtaí tuke tsawaítí. Tuma asamtaí wáitirí tuke epenchamú ártatui. ²⁶ Tura ashí nuñkanam péñker ana nuna nuí itiaartatui. ²⁷ Tura yajauchikia penké wayáshatui. Mujmiainian túrincha tura anankartincha penké wayáchartatui. Antsu áyatik shuar tuke iwíiaaku pujutai papinium naarí aarma ainia nuke wayáwartatui. Nu papincha Murik takakui.

22

¹ Nuyá suntar tuke iwíiaaku pujutai entsan ti sáaran iniaktursamai. Nusha uunt akupin pujutainmayá ti saawi jijnmíai. Nu pujutaisha Yusna tura Muriknauyi. ² Pepru jintincha tura entsá mai paen tuke iwíiaaku pujutai numi wajamai. Nusha ashí tuse nantutin neremai. Ni nukésha ashí nuñkanmayá shuar tsuámatainti. ³⁻⁴ Ashí yajauchia nuka atsuttawai. Uunt akupin pujutai, Yúsnasha Murikniasha, nuíñ aa asamtaí ni shuarí ti paant wainiainiak tikishmatrartatui. Tura nijiaíncha ni naarí anujmamkartatui. ⁵ Tura káshisha atsuttawai. Nuí pujuinia nuka shiripkincha etsancha atsumchartatui. Uunt Yúsak tuke tsáapin awajtia-tui. Tura ni shuarí tuke iniañnatsuk akupkartatui.

Jesukrístu tátintri penké nuntumsai

⁶ Nuyá suntar turutmíai “Ju chicham ti nekas asa nekas enentámtusminiáiti. Uunt Yus yaunchu níniun etserniun ni chichamen enentámtikramia núnisañ yamaikia ni suntarín akuptuk wárik túrunatta nuna ashí ni shuarín ujakuítí.”

⁷ “Ti wárik winittíajai” tawai Murikkia.

Shuar ju papinium Yusa Chichame áarman umirna nuka shiir waras-miniaiti.

⁸ Wí, Juan, juna mash ísan mash antukmajai. Tura mash ísan antukan nayaimpinmayá suntar iniaktursama nuna shiir awajsataj tusan tikish-matramjai. ⁹ Túram turutmíai “Penke áinkiaip. Wisha Yusa yáintriñtjai

ámijjaj métek tura yatsumijjaj métek. Yúsnan etserin ásar tura ju papinium áarma nuna umirainiak Yusa yáintri áiniawai niisha. Yúsak shiir awajsatniuiti.”

¹⁰ Nuyá ataksha turutmiai “Ju papinium aarma Yusna asamtai úukam ikiusaip. Ashí túrunatin tsawant ishichik ajatesai. ¹¹ Nu jeatsainkia yajauch shuarka tuke yajauch túruki wetí. Núnisan mujmiainian túraka tuke túruki wetí. Antsu péñkeran túraka péñkeran túruki wetí. Núnisan esetar enentáimniusha tuke esetar Yusjaj wekasati.”

¹² Muriksha tawai “Eta, ti wárik winittijaj. Túran ti shírmachin ashí péñker túramujaj métek súsatniua nuna takukin winittijaj. ¹³ Wiitjai. Yámankamtaiknumiá amúanmasha tuke pjuwitjai. Wisha A rétranmayá Y rétranam ashí retra áintsaitjai.” Tu tawai.

¹⁴ Ni pushirj péñker nijiamatniua núnisan péñker túrinia nú shuar shiir warasminiaiti. Nu shuar nu pepru wáitiríncha wayamniaiti. Túrar tuke iwiaaku pujutai numinmayá yuamniaiti. ¹⁵ Tura antsu Yúsán enentáimtachuka, wawekratniuka, tsanirmatan pujurainia nuka, mañkartinkia, ántar-yus tikishmatniuka, tura ashí shuar wáitian wararainiak tuke túrin ainia nuka aá matsatainiak penké wayachmin áiniawai.

¹⁶ “Wi, Jesus, ashí Yus-shuaran ujakarat tusan winia suntarun akupkajai. Wikia Tawit Weeitjai. Túrasha Tawitia Úuntrintjai. Wikia ti tsáapin yaa, yáñkuamia áintsanketjai.” Tu tawai.

¹⁷ Yusa Shiir Wakanisha tura Murik anajmarmasha “Winitiarum” tuiniawai.

Tura juna ántana nusha “Winitiarum” tití. Tura ashí kitiamá nuka winití. Wakerakka tuke iwiaaku pujutai entsan penké kuítchajaj umartí.

¹⁸ Ashí shuar ju papinium Yus-Chicham aarma nuna antukarun juna ujaajaj: Shuar ju áarman chikichan pataakka Yus nin ti wáitsatin ju aarma nuna patattsattawai. ¹⁹ Núnisan shuar ju aarman emeneakuinkia Yus ni naarín iwiaaku pujutai papiniumiá japirattawai. Tura ti shiir péprunam wayatniun suritkiattawai. Nu péprusha tura nu papisha ju paant ujakma áiniawai.

²⁰ Jú papí áantratniun ujakua nu tawai “Eta, ti wari winittijaj.” Pai, núnisan atí. Wari winití, Uunt Jesúsá.

²¹ Ii Uuntrí Jesukrístu atumniasha shiir yainmakarti. Nuke atí.